


Monoq Gotola Gosohaq



The New Testament in the Alekano (Gahuku) Language of Papua
New Guinea

**Monoq Gotola Gosohaq
The New Testament in the Alekano (Gahuku) Language of
Papua New Guinea**

Nupela Testamen long tokples Alekano (Gahuku) long Niugini

Copyright © 1973, 1986 Bible Society of Papua New Guinea

Language: Alekano (Gahuku) (Alekano or Gahuku)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiola and XeLaTeX on 18 Apr 2025 from source files dated 31 Aug 2023

44bc4c3c-532b-5251-95bd-2c3cf78ba

Contents

FRT	1
Mataiό	3
Makí	79
Luká	123
Zoní	199
Aposolo	251
Loma	315
1 Koliti	348
2 Koliti	378
Galesia	398
Epeso	409
Pilipi	419
Kolosa	427
1 Tesalonika	434
2 Tesalonika	440
1 Timotí	444
2 Timotí	453
Taetasí	459
Pilemó	463
Hipulu	465
Zemusí	490
1 Pitá	498
2 Pitá	507
1 Zoní	513
2 Zoní	521
3 Zoní	522
Zutá	524
Alikamú	527

MONÓ GOTOLA GOSOHÁ

**The New Testament in the Alekano (Gahuku)
Language of Papua New Guinea**

**Nupela Testamen long tokples Alekano (Gahuku)
long Niugini**

Monó Gotola Gosohá

The New Testament in the Alekano language of Papua New Guinea
[gah]

© 1973, 1986 Bible Society of Papua New Guinea

Web version

© 2013, Wycliffe Bible Translators, Inc.
www.Wycliffe.org

<http://pngscriptures.org>

www.ScriptureEarth.org

This translation is made available to you under the terms of the Creative Commons license (Attribution-Noncommercial-No Derivative Works).
<http://creativecommons.org/licenses/by-nc-nd/3.0>

Your are free to share – to copy, distribute and transmit the text under the following conditions:

- **Attribution.** You must attribute the work to *Bible Society of Papua New Guinea* (but not in any way that suggests that they endorse you or your use of the work).
- **Noncommercial.** You may not use this work for commercial purposes.
- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

Notice – For any reuse or distribution, you must make clear to others the license terms of this work.

Tok Orait

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem **yu ken givim kopi long narepela manneri**. Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. **Yu mas givim nating.** Na tu, **yu no ken senism Tok.**

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik strem samting i no orait long dispela tok orait, strem tok, salim Buk Baibel, o tainim Tok bilong God long nupela tok ples, yu ken **askim mipela.**

Ogeta tok orait na lo long tok ples English i stap long <http://creativecommons.org/licenses/by-nc-nd/3.0/legalcode>.

Sapos yu gat askim long dispela, **plis askim mipela.**

Izesu Kilistoni Gakó Lamaná Mataió Luhuva Gizamó

*Izesu Kilistoni avolage
(Luk 3:23-38)*

1 Vegená utó imi itiki itiki ikago Izesu Kilistó eza agulizaki ve Tevitini agávolaho utó imó. Itó Tevití eza Avalahani agávolaho minamó. Nenémini gakoláa imane neve.

2 Avalahakutí Isaká utó imó. Isakani asevalotí Zakopó utó imó. Zakoponi asevalotí Zutaki uvolage agunalagi utó amó.

3 Zutani asevalotí Pelezeko Zelako utó asimó nene Tamalé getamó. Pelezeni asevalotí Hezeloná utó imó. Hezelonani asevalotí Lamú utó imó.

4 Lamuni asevalotí Aminatapá utó imó. Aminatapani asevalotí Nasoná utó imó. Nasonani asevalotí Salamo utó imó.

5 Salamoní asevalotí Poasini nene Lahapá getokago utó imó. Poasini asevalotí Opeteni nene Lutí getokago utó imó. Opeteni asevalotí Zesi utó imó.

6 Zesini asevalotí agulizaki ve Tevití utó imó.

Agulizaki ve Tevitini asevalotí Salomó utó imó. Uliá helekago gevoná venalímo nene Tevitító vike getamó.

7 Salomoní asevalotí nene Lehopoámo utó imó. Lehopoámini asevalotí nene Apiá utó imó. Apiani asevalotí nene Asá utó imó.

8 Asani asevalotí nene Zehosapatá utó imó. Zehosapatani asevalotí Zolamá utó imó. Zolamani asevalotí Uziá utó imó.

9 Uziani asevalotí nene Zotámo utó imó. Zotámini asevalotí nene Ahazí utó imó. Ahazini asevalotí Hezekiá utó imó.

10 Hezekiani asevalotí nene Manasé utó imó. Manaseni asevalotí nene Amó utó imó. Amoni asevalotí nene Zosiá utó imó.

11 * Zosiani asevalotí nene Zekoniá itó agunalagi utó amó. Zuta vegená nagá kimiiki Papelonía mikasigú kilímiki va gamenaló nene utó amó.

12 Papelonía mikasiuka kilímiki vikago neneti nene Zekoniani asevalotí Sealitielé utó imó. Sealitieleni asevalotí nene Zelupapelé utó imó.

13 Zelupapeleni asevalotí nene Apiutí utó imó. Apiutini asevalotí nene Eliakímo utó imó. Eliakímini asevalotí nene Azolá utó imó.

14 Azolani asevalotí nene Zatokó utó imó. Zatokoni asevalotí nene Akimá utó imó. Akimani asevalotí nene Eliutú utó imó.

15 Eliutuni asevalotí nene Eleazará utó imó. Eleazarani asevalotí nene Mataná utó imó. Matanani asevalotí nene Zakopó utó imó.

16 Zakoponi asevalotí nene Zosehé utó imó. Eza Maliani vana loló imó. Maliá nene Izesuni getamó. Eza nene Ómasímo gologí oletative loko lo mololeta ve.

17 Utó iakaláa nene imanéminiki nene utó amó. Avalahakutí nene utó imi iteke lakani nene 14 utó ikago agulizaki ve Tevití utó imó. Tevitikutí nene lakani 14 utó iliki itikago nene Zuta vegená nagá kimiiki Papelonía mikasigú nene kilímiki vamó. Nene gamenalotí nene ámináminoko lakani nene 14 utó imi itikago gologí oletative loko lo mololeta vema utó imó.

* **1:11:** 2 Kug 24:14-15:2; 2 Iki 36:10; Zel 27:20

*Izesu Kilstó utó imó
(Luk 2:1-7)*

18 * Izesu Kilstó utó itímini mogonáá lá oko neve. Izolaho Maliá nene Zoseheni ánígi milimikago ve aleve amasike hotopotó minasimó. Niasigo Ómasímini Sikalahulímíni zámuzaló Maliá nene izegipa agatupagi minamó.

19 Minokago nene ánígi milita ve Zosehé nene monolagi ve minamó ne-nazó, nenemú nene ahulotatomóza, vegená kogovisaló ahulotatomó nene avoza helekatize, legesóoko nene ahulotatove.

20 Loko loake agata gelekago nene, Guiyahanímini ageló makolímo vamotoka utó o amike láá loko lo amimó: Zosehé geza nene Tevitini agávölagamaka, venaka Maliani nene alitohe alemitohe loko nene gagata giliko gena givisemino. Izegipa agatupagi nominamó nene Sikalahulímíni zámuzaló neve.*

21 Eza vegenala zuha nene golesa netalímini nagakutí gologí oketatimó nenazó, minoko gipala getatimó nene agulizá nene Izesú ave loko molatane. Ámina agulizálímini mogonáá nene gologí olimiaká ve.

22 Itó netá matá lá oko utó imó nene Ómasímini agepagutí gakó loaká vemámo nene Guiyahanímini gakó makó nene gihila zitive loko utó imó neve. Eza luhuva makó láá loko gizamó neve:

23 * Gilinahe. Vegi akamimó zaha mina vená makolímo izegipa agatupagi minooke gipala getatimó nene, agulizá nene Emanuelé ave liki litave.

Itó ámina agulizálímini mogonáá lelí gakokutí nene Ómasí nene lezagi makó noive loko.

24 Láá loko vamotoka lo amekago Zosehé nene oteake, Maliani nene numu-nagú alémoko itimó.

25 * Ve aleve oko minoaká nenéminiki minamasike gipala getamó. Getokago Zosehé nene agulizá Izesú ave loko molamó.

2

Sonohí mogona gili vevesiaká a ve amó

1 Heloté nene agulizaki ve napa loló oake gizapa noigo, Izesú nene Petelehe numutoka utó imó, Zutaia mikasigú nene. Gamená nene zupa nene ho noititokatí mikasi mulalokatí sonohí mogonáá gili vevesiaká a ve makó nene Zelusale numutoka amó.

2 Iake nene loká iki Zuta ve lekelí agulizaki ve gosohá nene hí apatoka utó ive. Leza numuteloka ho noitiuka nene utó itímini sonohila okulumató nego ánígokunike gupá ze amitune loko nene noune.

3 Liki loká ikago nene, agulizaki ve Heloté nene gakó geleake, ininá noike agata gululusi nogiligo,

4 keza Zelusale apá amelage ámináminiki ininá amó. Lá niago, Heloté nene guguni giziaká a ve napagi monó mogona apí ikimiaká a vegi kelémo nupa oake nene Ómasímo gologí oleketative loko lo mololeketa vema nene hí apatoka utó itive liki linamó neve.

5 Loko loká okimikago, keza láá liki li amemó: Petelehe numutoka Zutaia mikasiuka utó itive loko Ómasímini agepagutí gakó loaká vemámo Ómasímo lo ami gakó láá loko luhuva gizonoimóma nena:

* **1:18:** Luk 1:27 * **1:21:** Luk 1:31 * **1:23:** Isa 7:14 * **1:25:** Luk 2:21

6 * Petelehe numutokatí agulizaki ve napa makó utó okoko nene Isilae veg-enáne zuha nene gizapa oketati ve nenazo, ámina apá Zutaia mikasigú noimó nenémo Zutaia mikasiuka gotó apá mukí niakutí lemeko nene nomive.

7 Liki nene gakó li amikago nene, geleake, Heloté nene sonohí mogonáa gili vesesiaká a vema asugunatoka kelémó nupa oake, sonohíma apí oko utó itotí gamena nanakí vive loko loká okimikago, nene gamenave liki legesó iki li amemó.

8 Li amikago, Heloté nene láa loko lo kemeake kimisilímó: Lekeza nene Petelehe numutoka vikiamuza miliki vitagá iki alími utó iiki iki li nimitaze. Iki li nimikiko, neza vinake ámináminoko voko gupá ze amitoze.

9 Loko lokago, nivago nene, numúítoka ho noititoka ániga sonohíma utó oake nene, ale goí imó. Ale goí oko vike nene, izegipa namuni mina numuni veletó oko hizekago,

10 ánigiaké, mulúikú lamaná giliaké nene,

11 numukú itiaké ánigamó nene izolahó Maliaki niasigo, ánigiaké kalapusa hiziki izegipa namunima gupá zi amiaké góini agepáa áli vatá iake áminagutí nene henokanoni lehizitamó. Henokanoni nene goli gehani itó lokila anuvavagi iteaká i netá itó anuva hilina lamaná nene

12 lehizimiaké, akinago nene, Ómasímo nene vamotoka láa loko lo kimimó: Lekeza nene Heloté noigo ánigiaké anite gapoló vamiki haitó gapoloka atiginá iki viki numutitoka vi anititaze. Loko lo kemekago nene vamó.

Izipi mikasiuka golisi vamó

13 Nivago nene, Ómasímini ageló makolímo Zoseheni nene vamotoka utó o amike láa loko lo amimó: Helotéma gipakamú nene vitagá oko ale utó okoko nene apilitove loko lokamó nenazo, geza litáoko otekoko izolahiko gipalago nene kelémoko Izipi mikasiuka viki minataze. Viki niiki nene, nénisi gakó litokumukó gámémé iki gili minataze.

14 Loko lokago, Zosehé nene litáoko oteake límugusigú nene izolahiki gipalagi kelémoko Izipi mikasiloka vamó.

15 * Neneloka viki niago Heloté nene hilimó. Lá okago, Zosehege atiginá iki Isilae mikasiló vamó nene hanuvamú negopa Ómasímini agepagutí gakó loaká ve makolímo gipáne nene Izipi mikasiuka minokago sele lo amutó noave loko Ómasímo lo ami gakó luhuva gizamó nene alévolé itive liki atiginá iki vamó.

Izegipa namuni kipili gesá amó

16 Itó Heloté nene velesá helenamike sonohí mogona giliaká a ve nenete agoka viziake vakumú nene izapaló molamó. Izapaló golesa molokago nene, gímisigi ve nene kimiselekago, keza nene Petelehe numutó itó apá alitokagi numutó namató mihina mihina iki nene izegipa namuni gipagó kilisimasí losi ali ahulinamamoláa kipili asú amó.

17 Lá iki kipili asú amó nene, sonohí mogona giliaká a vete sonohíma ganá apíoko ániguhatotí gamena láoko mota vokave liki Heloteni li ametó lá amó. Lá ikago, Lama numuni nene Petelehe numuni helegaloka minamó nenazo, Ómasímini agepagutí gakó loaká ve Zelemiá gakó láa loko limó nene alévolé imó:

* **2:6:** Mik 5:2 * **2:15:** Hos 11:1

18 * Lama numutoka nene ive nama nenémo haitolíminoko nominago Lahelé nene izegipa apalamú ive noigo nene alémo zou litune liki nilago, mukító mota hili asú ikamó nenazo alími zou lamitamó ikago ive okogó minamó neve.

Izipi mikasiukatí atiginá amó

19 Heloté helekago nene, Izipi mikasigú Guivahanímini ageló makolímo Zoseheni nene vamotoka goha utó o amike láa loko lo amimó:

20 Gipaka apilitove loko li vema mota helekave. Nenemú geza otekoko izolahiko gipalago kelémoko Isilae mikasiuka atiginá oko kelémoko vozo.

21 Loko lokago izolahiko gipalago nene goha kelémoko vimó. Atiginá iki Isilae mikasigú minake nene,

22 Zosehé nene gakó makó láa loko gilimó: Helotení gipala Akelaó áisi nene amelahini akilí hitoake, Zutaia mikasigú nene agulizaki ve loló oko noive. Gakó némika liki likago geleake, Zutaia mikasigú voko minatikumú alegesá ligimó. Alegesá legekago nene, vamotoka gakó makó gilimó. Geleake, Galilajáa mikasiloka nene

23 * apá makó agulizá Nasalete nenenoka voko minamó. Lá okago, Ómasímini agepagutí gakó liaká a ve keza Ómasímo amisilitove loko lo mololeta vemú Nasalete veve liki litave liki lina gakó nene alévolé imó.

3

Nagamí holokimiaká ve Zonini monó

(Mak 1:1-8; Luk 3:1-18; Zon 1:19-28)

1 Gamena nene zupa monó nagamí holokimiaká ve Zoní nene Zutaia mikasigú oake, mikasi gomopalaló monó láa loko lo utó imó:

2 * Ómasímini agulizaki ve napa nene omo lokogovisaloka okaze. Likigika ali viligalo.

3 * Loko limó nene, Ómasímini agepagutí gakó loaká ve Isaiá gakó láa loko limó:

Mikasi gomopalaló ve makolímo gakó napagutí nene Guivahanímini gapo vilitalo. Likigikagú limiti gapo ali hee litalo loko nolive.

4 * Loko luhuva giza gakó nene Zonitoka alévolé okago, eza Ómasímini agepagutí gakó loaká ve Ilaizani suni alike kamele iza zopovatunú lilí a gó luhoake, iza galupavatunú lilí a holotani nene gohalaló zeake, pipizá nosánetá nene ganuki himoni nogozagi nene noko minamó.

5 Lá noigo, Zelusale numutotí itó Zutaia apá makotokatí itó Zota nagamí vola helega ima helegalokatí nene aitoka vi anitiake nene,

6 lihimáini li utó ikago, Zota nagamikú monó nagamí holoketamó.

7 * Noholoketago nene, Palisaio monó ve itó Satukaio monó ve keza monó nagamí hilanigi ikago, láa loko lo kimimó: Gosihalímini agapilamó zuha lekeza nene golesa netalímini lihima nene lekelitoka anitinogo noimó nene likigika ali viligamiki hanuva golisi itave loko éaho lo likimigo niave.

8 Likigika nene ali viligiiki nenémini gihila ali utó iiki alo.

9 * Neza láa loko lo nolukumuve: Avalahani agapilamó zuha keza sonohikitana nene gatamoakalímini lilí itave loko lo molota gakó nene alévolé

* **2:18:** Zel 31:15 * **2:23:** Mak 1:24; Luk 2:39; Zon 1:45; Isa 11:1 * **3:2:** Mat 4:17; Mak 1:15 * **3:3:** Isa 40:3 * **3:4:** 2 Kug 1:8 * **3:7:** Mat 12:34, 23:33 * **3:9:** Zon 8:33

itive loko lekelisi negopa, Ómasi nenémo gakó litove loko nene lokiko, gehani imanete Avalahani agapilamó zuha lilí inigi nene lilí itamó nenazo, neménú lukugupelini aliki itiki Avalahani agapilamó zuha nouninazo, Ómasímo lihi-matemú goní oletaminogo ive liki lamilo.

10 * Luni makó nene za mogonagú gamuni oake noive. Neménú gihila lamaná ali utó inamitamoláa nene, hukoko lokú gizanogo ive.

11 Neza nene likigika ali viligikamómave loko nene nagamí hololikimiaká noumóza, nemegesaloka noa ve áisi nene Ómasímini Sikalahulagi likigikagú netá golesa lolímo lati loki hololeketanogo noave. Áí zámuza nenémo není zámuza nene nivilegekave. Neza ánéamina gelekelé otoko aí gasa gó ate akisitomó oko minamuve.

12 Eza nene lolopa giteaká netaki aleko oko laisi nene gesopá zeko lolopa giteko ale lamaná itove loko ale vavá okave. Nosánetá lamaná nene numunagú gizáká oko ale molokiko minanogo ive. Lolopaváa nene giteko lokú gizokiko lova lova oko minanogo ive, loko limó.

Izesú monó nagamí holamó

(Mak 1:9-11; Luk 3:21-22)

13 Gamena nene zupa Izesú nene Galilaia mikasigutí vike Zota nagamitoka anitike nagamí holonetative loko Zonini voko lo amekago,

14 Zóni nene géneka loake láa loko limó: Nénisi ánéama nounazo, géisi holonetatanimó nene etanogo ize. Nenitoka animó nene etamive.

15 Loko lokago, Izesú nene láa loko limó: Nene gakó lamaná nolanimóza, itínasa nene nenéminko minatíze. Hoza nene lá iki alítáive loko loletamómáa nounazo, golesa aminogo ive. Loko lokago, Zóni nene gele amimó.

16 Gele ameake nene alémoko lemeko Zota nagamikú nene holomikago, iteake ánígamó nene, okulumá koló okago, Ómasímini Sikalahú nenémo nama luhusimagitana oko lemeko Izesuni amupiló nolimigo ánígamó.

17 * Lá okago nene, okulumakutí gakó makó láa loko limimó: Imane nigika amenou gipáne noive. Ánigo lamaná okuve, loko limó.

4

Satá Izesuni gimivagú molamó

(Mak 1:12-13; Luk 4:1-13)

1 * Lá okago, Ómasímini Sikalahú nenémo Izesuni nene mikasi gomopalaló alémoko vimó nene Satá gimivagú molative loko geleake alémoko vimó.

2 Neneloka minake gamena 40 oko novigo nosánetá mosimó nenazo, gaúna helekago,

3 gimilegú moloaká ve nenémo aitoka anitimó. Aniteake láa loko limó: Geza Ómasímini gipala noitanimó nene, gehani imane gakó lo kemekako nosánetá lilí ikiko natanize.

4 * Loko lokago, Izesú nene Óe, monó gotolaú láa liki luhuva gizinamómáa neve:

Vegená neneta nosánetakó nokoko lamaná oko minoakaláa nene nomive.

Ómasímini agepagutí gakó nolimímó nene gele alekoko lamaná oko minoakaláa neve.

* **3:10:** Mat 7:19 * **3:17:** Apí 22:2; Age 2:7; Isa 42:1; Mat 12:18; Mak 1:11; Luk 9:35 * **4:1:** Hip 2:18, 4:15 * **4:4:** Gapo 8:3

5 Loko lokago, Izesuni alémoko Zelusalega vike monó zagusave agoka hánaló nene alémoko iteake,

6 * lāa loko lo amimó: Geza Ómasímini gipala noitanimó nene, imanelotí ká omane mikasiló olío molozo. Gakó makó monó gotolaú lāa liki luhuva gizinamó neve:

Geikumú Ómasímo aí ageló nene hoza gakó lo kemekiko gehanímo gigisagú hizekative liki keza limiki kigizani agikagú gílími milanigave, liki luhuva gizinamó nenazo, gotá gepeleminogo ive.

7 * Loko lokago, Izesú lāa loko lo amimó: Óe, monokú gakó makó lāa loko neve:

Guivahani Ómasímo lelémo vatí itihe loko negi netá lilí amilo.

8 Loko lokago nene, agoka háná háná makotó alémoko itímó. Neneloka itike numutó namató kugulizaki vetini apáini itó luhuvagi netáini nene nalapizike,

9 lāa loko limó: Geza nene galapusa hizeko negepoka lokako, gelepizu netá mukí geí loló itive.

10 * Loko lokago, Izesú lāa loko limó: Satá geza nene ahulokoko vozo. Gakó makó nene monó gotolaú lāa liki luhuva gizinamóma neve:

Guivahani Ómasí aikó nene lalapusa hizeko gupá ze ameko agepoka loakaláa neve. Itó aikó gelekelé omiakaláa neve.

11 Loko lokago, ve golesa nenémo ahuloake vokago nene, agelolite aniteke nasahilí itiki minamó.

Galilaia mikasiuka Izesú monó hoza apí imó (Mak 1:14-15; Luk 4:14-15)

12 * Zonini nene nagá numukú ahulimikago noigo nene, Izesú nene gakó geleake Galilaia mikasigú vimó.

13 * Nasalete numutoka voko gamena háná minamike agilikaloka nene Kapanao numutoka voko minoko aleko imó. Ámina apá nene Galilaia nonohuló agataloka minamó nene Zepuloko Napataliko keí kagapilamó zuhatini mikasiloka minamó.

14 Lá okago, Ómasímini agepagutí gakó loaká ve Isaiá epoapoga li gakó nene alévolé imó. Eza lāa loko luhuva gizamó neve:

15 * Zepuloni mikasigú itó Napatalini mikasigú nene,
age nagamí alító, Zota nagamí vola helegaloka nene,
itó Galilaia mikasiuka numuká ve keza miniki aliki iaká niatoka nene,

16 límugusigú miniaká nia vegená keza ló liví napa ánígatave.

Itó heleakalímini límugusigú mina vegená keza nene lapaná utó okiminogo ive.

17 * Nene gamenaló Izesú nene monó lāa loko apí oko lo kimimó: Ómasímini agulizaki ve napa nene omo lokogovisaló okave. Likigika nene ali viligalo, loko lo kimimó.

Izesú lagaha aliaká a ve 4-a sele lo kimimó (Mak 1:16-20; Luk 5:1-11)

18 Gamena makó zupa Izesú nene Galilaia nonohuló agataloka mohona noigo, ve lositá uvolahíko agunalamo minasimó. Makó agulizá nene Saimon,

* **4:6:** Age 91:11,12 * **4:7:** Gapo 6:16 * **4:10:** Gapo 6:13 * **4:12:** Mat 14:3; Mak 6:17; Luk 3:19-20 * **4:13:** Zon 2:12 * **4:15:** Isa 9:1-2 * **4:17:** Mat 3:2

agulizá makó nene Pitá, itó agunalámini agulizá nene Etulú, keza nene lagaha miliaká asi ve niasinazo, nonohulokú nene lagaha gotaha ahuliki niasigo,

¹⁹ Izesú áingoake lāa loko lo kimimó: Némegetiki alizo. Lagaha hoza aliki minasimóma itína vegenatoka hoza aliki kilimi nenitoka milatáive loko lekelémo nomuluve.

²⁰ Loko lokago nene, litá iki lagaha gotaha nene ahulikasike ámegetiki vasimó.

²¹ Itó vake Zepetaioni gipala losítá ámináminiki niasigo ánígamó. Uvolahini agulizá nene Zemusí, itó agunalámini agulizá nene Zoní. Keza sipigú nene améipiki minasike, lagaha gotaha ali lamaná niasigo, Izesú áingoake sele lo kimimó.

²² Sele lo kemekago litá iki améipinigi itó nagamikú lapéinigi nene ahulikasike Izesuni ámegetiki vasimó.

Izesú vegená mukí nasahilí oketamó (Luk 6:17-19)

²³ * Izesú nene Galilaia mikasigú nene vigé vigé oko mohana ike nene, monó numuni minakú minakú nene monó lo keme keme ike Ómasímini gizapaló minoakalímini gakó lamaná lo utó moloko lo kemeká itó haitopaitó netá gizale vegená itó haitopaitó netá kivisi vegená kelémo zokoká oko minamó.

²⁴ Lá noigo, aikumú gakoláa likago, Silia mikasigú vike numutó namató vo asú okago nene gili asú amó. Gili asú iake nene haitopaitó netá kivisi vegená itó kugupe miluma gele vegená itó kigikagú holosi mina vegená itó kigika gopa okago minamoláa itó gepili minamoláa mukí nene Izesutoka kilímiki ikago kelémo zoko asú imó.

²⁵ Lá okago nene, Galilaia mikasiukatí taoni 10-a mina mikasi agulizá Tekapoli loko noi mikasigutí itó Zelusale numutokatí, itó Zutaia apá makotatí, itó Zota nagamí vola helegalokatí nene vegená vaí iki ámegetiki vamó.

5

Izesú zopegaló monó lo kimimó

¹ Izesú nene vegená mukí alegesá ikago áingoake zopegaló iteko minamó. Noigo, izegipala zuha nene aitoka alegesá iki minamó.

² Niago nene Izesú monó láa loko lo kimimó:

Logoliza vizeakalímini gihila (Luk 6:20-23)

³ Kigikámimi henonimú gilikago lemeko mina vegenakumú gelekugo kogoliza nivizemó geleká noive. Okulumalímini lapaná nene ali lá inigave.

⁴ * Itó ive nama iki miluma gilikí miniaká niámó nene keikumú gelekugo kogoliza nivizemó geleká noive. Ómasímo kelémo zou litive.

⁵ * Itó kugupenini aliki limiki miliaká niámó nene keikumú gelekugo kogoliza nivizemó geleká noive. Mikasiuka nene Ómasímini helisa henoni mukí nene ali lá inigave.

* **4:23:** Mat 9:35; Mak 1:39 * **5:4:** Isa 61:2 * **5:5:** Age 37:11

6 Itó Ómasímini avogisaló hee hee liki minatakumú miluma giliki miniaká niamó nene keikumú gelekugo kogoliza nivizemó geleká noive. Hee liki minatamó nenémo kigika itive.

7 Kigika hizi kimiaká niamó keikumú gelekugo nene kogoliza nivizemó geleká noive. Ómasi eza agika hize kimitimó neve.

8 * Itó kigika gizopagi miniaká niamó nene keikumú gelekugo kogoliza nivizemó geleká noive. Keza miniki Ómasi ániganigave.

9 Itó kilími zou liaká niamó nene keikumú gelekugo kogoliza nivizemó geleká noive. Ómasímo izegipáne zuha niave loko loketanogo ive.

10 * Itó hee lo mina mogona ámegetiaká niató miluma netá alikitiki gopoguni milikimikago miniaká niamó keikumú gelekugo nene kogoliza nivizemó geleká noive. Keza nene okulumalímini lapanató viki minanigave.

11 * Itó nenikumule liki alivi letivi iki gopoguni mililikitiki likilími golesa galasa iki lotoka lataka nihizilikitikoma nene lokogoliza vizitave lokogó nene gelenouve.

12 * Okulumakú meinavatini sipisi netimó nenazo, nenemú mulutikú lamaná giliki lokogoliza viziki láa liki gilitave: Ómasímini agepagutí gakó liaká a ve gozapá nene áminámini ikitamóma nenazo, Ómasímo ámina vegenaki meinava napa kimimó nene ámináminoko liminogo ive liki lokogoliza vizilo.

Age itó liví nenémini gakola

(Mak 9:50; Luk 14:34-35)

13 Lekeza nene mukí vegenalitini age lilí iki niave. Agémini lagaváa asú itimó nene, nana oko goha alémo melelé itune. Ma aminogo une. Ha netá loló okamó nenazo, nenemú lekeko ale ahulokuko, ká omane mikasiló neiko nene, vegená nenete lisiki goihá ziki vigá igá inigave.

14 * Itó lekeza nene mikasiuka vegená mukilitini livíni lilí iki niave. Liví napa nene agokaló ale utó molonouko, netá makolímó ale hitosá amive.

15 * Itó liví lege molokoko nene somotunú gahumá oakaláa nomive. Holomáló molokuko nene, numukú nia vegená hize sata o asú okimiaká noive.

16 * Lekeza miniki aliki atímo livímáminoko vegená nene hize sata oketatize. Lá okoko nene, lekelisi lamaná iki iki miliki itamó nene vegená nenete ániigiiki laga kivisekiko, okulumakú ametipini agepoka litaze.

Mosé lo hukoko li gakokumú

17 Nenikumú nene Mosé lo hukoko li gakó itó Ómasímini agepagutí gakó liaká a vete li likimina gakó ale ahulatove loko okane liki lakagata gelemilo. Ale ahulatove loko lumumó negopa, mogonáa lo utó oko lokugo gihila zitive loko lumumóma neve.

18 * Gakó lamaná lo likimitoze, gililo: Okulumaki mikasigi velesá vo tolova amoko ha nekoma nene, Mosé lo hukoko li gakokutí gakó koma ma gopa aminogo ive. Ha mino-loko voko neiko nenémini gihila utó inogo ive.

19 Nenemú makó eza lo hukoko li gakokutí koma makó avutá apeleoko vegená lugáate ámináminiki avutá apilitave loko lo kimitimó nene, okulumakú Ómasímini avogisaló eza lemeko minanogo ive. Itó makó eza lo hukoko

* **5:8:** Age 24:3-4 * **5:10:** 1 Pit 3:14 * **5:11:** 1 Pit 4:14 * **5:12:** 2 Iki 36:16; Apo 7:52 * **5:14:**

Zon 8:12, 9:5 * **5:15:** Mak 4:2; Luk 8:16, 11:33 * **5:16:** 1 Pit 2:12 * **5:18:** Luk 16:17

li gakó gele alekoko vegená makolite ámináminiki gili alitave loko lainimoketatímó nene, okulumakú Ómasímini avogisaló iteko minanogo ive.

20 Nénisi láa loko lo nolukumuve: Lekeza nene monó mogona apí ikimiaká nia vetini itó Palisaio monó vetini mogonáinimú gilikago hee lokogó noitive liki giliaká niamóza, lekelí hehe liki miniaká nia mogonatini nenémo keí mogonáini kiviligemítimó nene, lekeza okulumakú Ómasímini avogisaló ma iteminigave.

Lizapaló moloakalímini gakola

21 * Mosé lo hukoko li gakokutí avotikini láa liki li kiminamóma neve: Geza vegená kepele helemo. Makolímohe makolímohe ve makó apele hilitimó nene, gakó hozámini mututoni loló itive.

22 Itó nénisi nene láa loko lo nolukumuve: Makolímohe makolímohe agivelahinimú izapaló molatímó nene gakó hozámini mututoni loló inogo ive. Itó makolímohe makolímohe agivelahinimú ale mumusopa zeko litimó nene monó gizapa vetini kovogisaló goní napa inogo ive. Itó makolímohe makolímohe agivelahinimú aleko letoko negí ve lotatímó nene, áisi nene ló apalímini mututoni loló inogo ive.

23 Nenémú geza nene guguni gizoaká netá matá aleko voko holomaló molatani zupa nene nigivénehiki logoka hotopotó igo lovaleta onousimóma nenazo, nenema ha neve loko gilitanimó nene,

24 guguni gizoaká netá neneló ahulokako, neko nene, voko gigivekahiki gakó ligili hagili iki nene likigizakú aliki ali hulu itáive. Ali hulu iiki nene guguni gizoaká netáma nene goha voko Ómasímini holomaló molatane.

25 Ve makó eza geí lihimamú goní ogetanogo goní numutoka gelémoko noviko, gapoloka niviki nene lihimavaka asú itive loko netá makó amezo. Itó áminagi aleloko gopa hanuva goní ale heleaká ve noitoka anititanimó nene, goní ale heleaká vemámo pilisi vetini kigizakú gelémo molokiko keza nagá numukú ahuligimikataze.

26 Neza lamaná lo nogumuve. Geza Ómasímini nagá numuni napagú minokoko lihimakámini meinaváa koma napa apaso asú amitanimó nene áminagú mino-loko voko minanogo ane.

Vená loká oaká gakó

27 * Mosé lo hukoko li gakokutí avotikini nene gakó láa liki li kiminamóma neve: Haitó vená makó loká amo.

28 Itó nénisi nene láa loko lo nolukumuve: Ve makó nenémo vená makó nene ánígo amu hilitimó nene ámina vená nene agikatunú mota loká okamó nenazo, nenémini lihima aitoka minanogo ive.

29 * Nenémú gogómula lugaloka nenémo lihima aleaká gapogú gelémo nomilikoma nene, gugupe avasavagi minoko nene meikú holokatanize. Nenémú gogómula nenémo gelémo gopa okative loko gogómula lugaloka nene hize likoko ale ahulozo. Gogómula hamoki minoko vávani oko minanogo ane.

30 * Itó gigizani lugaloka nenémo lihima aleaká gapogú gelémo nomilikoma, gugupe avasavagi minoko meikú holokatanize, nenémú gigizani lugaloka hukoko ale ahulozo. Gigizani hamoki minoko vávani oko minanogo ane.

* 5:21: Gá 20:13; Gapo 5:17

* 5:27: Gá 20:14; Gapo 5:18

* 5:29: Mat 18:9; Mak 9:47

* 5:30:

Mat 18:8; Mak 9:43

**Vená kimisele ahuloaká gakó
(Mat 19:9; Mak 10:11-12; Luk 16:18)**

31 * Mosé lo hukoko li gakó makó láa loko neve: Makó eza venala ahulotato loko nookoma nene pepa luhuva gizo ameoko nene ahulotatize.

32 * Itó nénisi nene láa loko lo nolukumuve: Ve makolímohe makolímohe venala gumesisi mokoló mogonaló negopa hanuvamú amisele ahulatímó nene, ámina mini ezega emega oakalímimi lihimavala nene goí o vanaloka minanogo ive. Itó alika vegi apiziki minasítímimi lihimavala nene goí o vanámini amupiló iteko minanogo ive.

Ómasímini avogisaló lo hukoaká gakó

33 * Mosé lo hukoko li gakokutí nene avotikini nene gakó láa liki li kiminamóma neve: Geza nene Ómasímini avogisaló lo hukoaká noanimó nene sozagutí ale moloko lamo. Guivahanímimi avogisaló gakó lo hukoko lanimó nene gele alekako gihila utó inogo ive. Nene gakó lekeza mota gilinamóza,

34 * nénisi láa loko lo nolukumuve: Ómasímini avogisaló lo hukoaká gakó nene ahulalo. Okulumakutí nene Ómasímo gizapa olimiaká noimó neve. Nenemú okulumatoka ali miliki gakó li hukamilo.

35 * Itó imane mikasiló nene Ómasímo lisoaká noive. Nenemú mikasigú ali miliki gakó li hukamilo. Itó Zelusale nene okulumakú agulizaki ve napámimi apá neve. Nenemú Zelusale numutoka ali miliki lo hukoaká nene ahulalo.

36 Itó lekeza zopovatini loí zekikoma nene gakó li amikiko anupá loló amitímó, itó zopovatini anupá nene gakó li amikiko loí zemitímó neve. Nenemú zopovatiniló ali miliki gakó li hukamilo.

37 Netá nenémináa ahuliuki lamaná oo loló itune likigó, itó óe loló amitune likigó lilo. Nenémini amupiló gakó makó litamó nene ve golesalokatí linigave.

**Golesa netá apasoaká gakó
(Luk 6:29-30)**

38 * Moseni gakó makó láa liki linamó nene giliaká niamóma neve: Makolímo gogómula hize likokikoma, ámináminoko aí agómula hize likozo. Makolímo gegepa ze letokikoma geza aí agepa ze letozo.

39 Liki linamóza, nénisi nene láa loko lo nolukumuve: Likipilitune nikikoma lukugupelini ali agutó vizemilo. Nenemú ve makolímo gagamipa lugaloka zekikoma, gagamipa lugaloka nipilitive loko viligo amezo.

40 Makolímo goní nogetoko nene siotika alekikoma nene, hepé gómagi gopa amezo.

41 Itó kiapé makolímo henokanoni geheko gapo alínipaló vitane loko nolikoma, gapo hánagi nene hanuva geheko vozo.

42 Itó makolímo geí netakumú voká nolikoma, hanuva amezo. Netá mataka gutá ale minatove lokikoma, amezo.

**Gala ve ligika kemeaká gakó
(Luk 6:27-28,32-36)**

43 * Gakó makó láa liki linamó nene giliaká niamóma neve: Geza gigika nene gigivekahini amezo. Gala vega nene aleko letoko mukahá apelezo.

* **5:31:** Gapo 24:1-4; Mat 19:7; Mak 10:4 * **5:32:** 1 Koli 7:10-11 * **5:33:** Liv 19:12; Nam 30:2; Gapo 23:21 * **5:34:** Zem 5:12; Isa 66:1; Mat 23:22 * **5:35:** Isa 66:1; Age 48:2 * **5:38:** Gá 21:24; Liv 24:20; Gapo 19:21 * **5:43:** Liv 19:18

44 Liki linamóza, nénisi láa loko lo nolukumuve: Gala velini nene likigika kimiki nasahilí ikitalo. Gopoguni mililikitata vegenakumú Ómasiloka lilo.

45 Lá niiki okulumakú ametipini gipala mohó gihila lilí iki minatave. Áisi lokago, aí ho silikakéna nenémo vegená golesagi lamanaki mukitoka hamó lelegító hize hanatolimiaká noive, itó áisi lokago nene aí golini nenémo golesa iki mina vegenaki hee liki mina vegenaki hamó lelegitokó ale geha zelimiaká noive.

46 Lekeza nene kigika likimita vegenakó nasahilí iki likigika kimitamó nene, Ómasímitokatí meinaváa alemitamó neve. Takisi gehani aliaká ve lekeza ánigi goselé iaká nia ve nenete kigika limita vegená nene ligika kimitune liki liaká niamole.

47 Itó likigivetikinígó geké likitatamó nene, likigivetikini nana netá lamaná lilí ikimiaká niámó neve. Monó gilina vegenalitini suni negopa, monó gelema vegená kezagi ámina suni aliaká niave.

48 * Nenemú lekelisi okulumakú ametipo hee loko minoaká noimó nenéminikgó minalo.

6

Gohogó vegená nasahilí okimiaká gakó

1 * Lekeza monokumule liki vegená kilími lamaná iki nasahilí ikitata netá nene vegenalite legepoka litave liki lilí amilo. Lekeza vegenalite legepoka litave liki ali minatamó nene, ehe, okulumakú ametipo meinaváa lekememinigo ive.

2 Nenemú gohogó vegená nasahilí oketokoko gigivekage ánigi lamaná itave loko golómeni gizamo. Genezáini losigi ve nenete soza saza gakó lake monó numukú itó vegená kovogisaló vegenalite ánigi lamaná iiki legepoka litave liki lá iaká niave. Neza lamaná lo likimitoze, gililo. Kegepoka liaká niámó nenémo keí meinaváa loló okago mota alikago asú oaká noive.

3 Gohogó vegená nasahilí oketatove lokoma gigizani lamagalokatí asugunatoka nasahilí oketozo. Lá okako gigizani sogaloka nia vegená nenete gelemitave.

4 Lá okako nasahilika nene asugunatoka minative. Amekaho nene asuguná oko aleaká noani netá ánigoaká noinazo, nenemú meinaváa giminogo ive.

Ómasiloka loakakumú apí okimimó (Luk 11:2-4)

5 * Lekeza Ómasiloka nilikima nene sozaló genezáini losigi vegenalitini suni alempilo. Keza nene monó numúikú itó vegená kovogisaló vegenalite ánigi lamaná itave liki otiki Ómasiloka liaká niave. Neza lamaná lo likimitoze, gililo. Kegepoka liaká niámó nenémo keí meinaváini loló okago mota alego asú oaká noive.

6 Geza Ómasiloka litove loko nookoma nene, numukagú iteoko gahe gekoko amekaho asugunatoka ánigoaká noi veloka lozo. Lá okako nene, amekaho asuguná netá aleaká noani netá ánigo asú oaká noi ve nenémo meinaváa giminogo ive.

* **5:48:** Liv 19:2; Gapo 18:13 * **6:1:** Mat 23:5 * **6:5:** Luk 18:10-14

⁷ Lekeza nene Ómasiloka niliki nene lekegepatunú goha liiki goha liiki ikiko hána hána loló okiko ha gakó loló okatize. Monó gelema vegenalite Ómasiloka loloko vova vova nouko gele limitihe liki lá iaká niave.

⁸ Lekeza keí suni alemilo. Ómasímo netá matakumú vitagá nouko nene litá oko voká lonamuko hanuva geleaká noive.

⁹ Nenemú lekeza nene láá liki Ómasiloka lilo:
Okulumakú ametega, geí gugulizá etó oko minatize.

¹⁰ Numutó namató geí gizapaló minoakalímini zámusa utó o asú ino. Okulumakú géisi lanító molanító gelekelé igimiaká niave.

Mikasiuka lezaloka áminagó oko utó ino.

¹¹ Gamena gamena nosánetate lemezo.

¹² Leza ligivetegini lihima nekisáini ahulokimiaká nounimó nenéminoko lihimate ale minuháma nene ale ahuloletozo.

¹³ Gimilegú moloakakú lelémo molamo.
Ve golesámitokati akagá oletozo.

¹⁴ * Lekeza likigivetikini lihima ahulikitatamó nene, okulumakú ametipo nene áminagó oko lekelí lihimatini ale ahuloleketanogo ive.

¹⁵ Itó lekeza vegenalitini lihima ali minatamó nene ámináminoko okulumakú ametipo nene lekelí lihimatini ale minanogo ive.

Monokumule loko nosánetá moseaká gakó

¹⁶ Itó monokumule liki nosánetá mosi keké ita zupa nene monó gelemiki genezáini losigi vegenalitini suni alemilo. Vegená makolite mosé oaká nouni suni ániigliki legepoka litave liki kogoka kegepaló ániiglike muhelé ahelé iaká niave. Neza lamaná lo likimotoze, gililo. Vegenalite kegepoka liaká niámó nenémo meinaváini loló okago, mota alikago asú oaká noive.

¹⁷ Géisi nene monokumule loko nosánetá nomoseko nene gotoka komu aleko ale lamaná okoko gogoka gegepa nagamí zezo.

¹⁸ Lá okako, vegená makolite nosánetá nomosenimó nene ániigi vevesamtave. Amekaho asugunatoka noi ve nenémo gilitize. Itó asugunatoka aleaká ani netá ánioká noi ve amekaho nene meinaváa giminogo ive.

Okulumakú henoni

(Luk 12:33-34)

¹⁹ * Mikasigú henoni nene gaupá geekalímini itó gúnakonite hukiakalímini, itó vegenalite zivi letivi iki gumina oakalímini nenazo, nenemú mikasiuka imane ali nupa nupa amilo.

²⁰ Lekeza okulumakú henoni nene gaupá gemoakalímini gúnakonite hukamiakalímini itó guminaló vete zivi letivi iki gumina alemoakalímini nene ali nupa ilo.

²¹ Gelenape. Henokanoka lamaná neti apatoka nene gigika neinogo ive.

Lugupémini ló liví

(Luk 11:34-46)

²² Gogómula nene gugupémini ló liví neve. Gogómula nenémo mumuzó oakalímini gapogú gelémo molamitimó nene, Ómasímini lapaná nenémo gugupe gigika mukitoka hize hanato asú inogo ive.

²³ Itó gogómula nenémo gelémo golesa itimó nene, gigikaloka ámina oko límugusi ze minanogo ive. Gigikagú liví lonoimó nenémo lihatimó nene,

límugusi zitimóza, sipisi haitolímini zekiko nene gopa gapo veleko minanogo ane.

*Ómasímini hozagi moni henonímimi hozagi
(Luk 16:13; 12:22-31)*

24 Ve hámakolímo kugulizaki ve lositosini gelekelé ma oketaminogo ive. Maga ve agika amekoko maga ve gasó amitímó onoive. Makotó gímize lamaná okoko makó ánigo goselé itimó neve. Lekeza nene ámina iki Ómasímini hozagi moni henonímimi hozagi lelegí oko aleakaláa nomive.

Mulute iteaká gakó

25 Nenemú neza láa loko lo likimitoze, gililo. Lekeza miniki aliki itakumú nene nosánetá hikutí noko minatupe, itó ginegane nene hikutí ale akoloko minatupe liki mulutini itemino. Lekelisi ma liléna. Miniki aliki iaká nia netá nenémo netá gihila nehe, itó nosánetá nenémo netá gihila neve. Lukugupémo netá gihila nehe lukugupeló ginegane nenémo netá gihila neve. Minoko aleko oaká itó lugupe nenémo netá gihila nenaе.

26 Lekeza veletó vogalaló nama nene ánigalo. Keza netá matá ma zuhá isá amave. Itó minumuni o molokago nosánetá nene numúikú ali nupa iki nisá amave. Lá onoimóza, okulumakú ametipo nosánetá gopa ale utó o kemeaká noive. Nenegú nana onoive. Namamate itiki niago lekelisi nene lemeko noune liki nigelehe. Lá oko nomive. Lekeza itiki nianazo, netá matá vitagá nia netá nene hanuva ale utó mololeketanogo ive.

27 Lekelikutí makó éaho muluna noitiko minoko aleko itító nene ezáa agata geleko mini ameko kilisimasi makó molomo iteko minative. Ma nomive.

28 Itó gineganemú nene nanamú mulutini iteaká noive. Gihisigú palauá nenetini mogona gili vevesamahe. Netá nenémináate hoza alisá amave. Itó ginegane lamanatamanakó ali luhatakumú gó isá amave.

29* Lá onoimóza, nenemú lo likimitoze, gililo. Gozapá agulizaki ve napa Salomó nene golivagi netá akoloaká imóza, gihisigú palauá nenete Salomoni agupeló netá nene aviligidake.

30 Palauá nene itínasa utó oaká noive, itó gó lokago gululupasokago hukiki ló giziaká niave. Lá onoimóza, Ómasímo lokago, ámina palauá nenémo lá oko gonanalisi lamaná oaká noimó nenazo, nenemú lekeza komáisí gili alévolé inamó neneta, ginegane nene Ómasímo hanuva ale utó oleketanogo ive.

31 Nenemú lekelisi nosánetá hikutí aleko noko moloko itupe, itó ginegane ale akalatumimó nene hikutí ale akalatupe liki mulutini itemino.

32 Monó gelema vegená keza ámina netakumú kagata gululusi gilikí vitagá iaká niave. Keí suni alemilo. Okulumakú ametipo nene ámina netá makó lekelitoka minamitimó nene lukugupe lamaná amitive loko geleneimóma nenaе.

33 Lekeza ámina netakumukopa, Ómasímo gizapa vetini loló iti gapogú itó Ómasímini hee hee loko minoaká gapogú likigika lakagata goí iki miliko vo minino. Lá ikiko nene, lukugupémini netaki nene hagitana lehizeleketanogo ive.

34 Nenemú azo utó iti netakumú nene mulutini itemino. Azo utó iti netá nenéminí genaváá azogó asú inogo ive.

* **6:29:** 1 Kug 10:4-7; 2 Iki 9:3-6

7

*Vegenalitini lihimamú gakó li hukikitamilo
(Luk 6:37-38,41-42)*

¹ Lekeza vegenalitini lihimáinimú gakó li hukikitamilo. Ómasímo ámináminoko lekelí lihimamú gakó lo hukolikimikatize.

²* Lekeza vegenalitini lihimáinimú li hukikita polosava lekelí lihimamú lo hukoleketanogo ive. Itó lekeza vegenalititoka iki miliki ita polosava ámináminoko Ómasímo lekelitoka oko moloko inogo ive.

³ Nenemú geza gigivekahini agómulagú gilisá onoikoma ángokoko gezaka gogómulagú za lana vonoimó nene nanamú ánigo lamaná amane.

⁴ Gezaka gogómulagú za lana vonoimó nene hanuva nego, gigivekahini nanamú gogómulagú gilisá vonoimó nene ale ahulogetatove loko nolane.

⁵ Sozaló ve genezaka losi minamó neneka, gezaka gogómulagú za lana nemó nene goí oko ale ahulokoko alika geza ánigo vevesooko nene gigivekahini agómulagú gilisá ale ahulotatanimó nene etanogo ive.

⁶ Lekeza nene monolímini gakó lamaná nene galagitana vegená li kememilo. Keza gopa viligiki akohú likipilikataze. Itó monolímini meinava iteko mina gakó nene izagitana vegená li kememilo. Keza nene monotini gili ahuliiki likilími golesa ikataze.

*Ómasiloka loko voká loaká gakó
(Luk 11:9-13)*

⁷⁻⁸ Voká liáká nia vegenalite netá matá mota aliaká niave. Vitagá iaká nia vegenalite gihila ali utó iaká niave. Gaheló hoko-hoko likago koló okimiaká noive. Lá onoinazo, Ómasiloka liki voká litamó nene alinigave. Vitagá itamó nene gihila ali utó inigave. Gaheló hoko-hoko nilikoma, gahe koló oleketanogo ive.

⁹ Lekelikutí ve makolímini gipala nenémo nosánetakumú voká lokiko, amelaho gehani mula makó amitihe.

¹⁰ Itó lagahamú voká lokiko gosihá amitihe. Óe, lá aminogo ive.

¹¹ Lekeza vegená golesa minikamóza, izegipatini gizapa lamaná ikitake netá lamaná ali kegepa iaká nianazo, okulumakú ametipo voká lita vegená nene aleko iteko haitolímini nene netá lamaná lehizeleketanogo ive.

¹²* Lekeza vegenalite némini manámini lilí ilitatave liki giliaká niamó nene lekeza áminagó iki nenémini manámini lilí ikitalo. Ámina gakó nenémo Mosé lo hukoko li gakoki Ómasímini agepagutí gakó liaká a vete apí ikimina gakoki nenémini gotoláa neve.

*Gateni komagú iteaká gakó
(Luk 13:24)*

¹³ Latila oaká apalímini gatenáa napa neve, itó gapováa sipisi neve, itó neneloka vegená mukilite viaká niave. Nenemú ámina gapogú vamiki okulumá gateni komagú itilo.

¹⁴ Alévolé oko minoaká apalímini gatenía koma neve, itó gapováa koma nego génopa hoza aleko iteakaláa nenazo, vegená luguhakó viaká niave.

*Gihila golesa lamaná zeakalímini mogonáa
(Luk 6:43-44)*

* **7:2:** Mak 4:24 * **7:12:** Luk 6:31

¹⁵ Soza saza monó lili ali ve keza kugupe zou lo minamó itó hela gala kigikagi nenémináate lekelitoka anititakumú, ehe, lukugupe gizapa iki minalo.

¹⁶ Keza iki miliki ita sunímo mogonataganáini ale utó okiko ánigi vevesataze. Hilipa nenémo gihila noakalímimi zitimó nehe. Itó gomogisigú nene gihila noakalímimi zitimó nehe. Óe, nenéminoko nomive.

¹⁷ Za lamaná nenémo gihila lamanakó zeaká noive. Za golesa nenémo gihila goleságó zeaká noive.

¹⁸ Za lamanalímo gihila golesa zeakaláa nomive. Za golesámo gihila lamaná zeakaláa nomive.

¹⁹* Lá onoinazo, vegenalitini mogonatagana hamó lelegító neve. Gihila lamaná ali utó amitamoláa hukoko lokú gizanogo ive.

²⁰* Nenemú soza saza monó lili ali vete iki miliki ita suni nenémo mogonataganáini ale utó okiko, lekeza nenémini gihiláa nene ánigi vevesanigave.

Lekelí ánigo vevesonamuve

(Luk 13:25-27)

²¹ Guivahaníneve guivahaníneve liki liaká nia vegenakutí lugáa avasavagi okulumá apakú iteminigave. Aménehini gakó gili aliaká nia vegenakó nene itinigave.

²² Gamena napaló nene vegená lugáate láa liki li niminigave: Guivahanitemaka, leza nene geí gakotó monó lo kemeaká uháma neve. Itó geí gakotó kigikagutí holosi kepeleko kimisele ahuluháma neve. Itó geí gakotó alévolé suni mukí aleháma neve. Nenemú gahe segeletamane.

²³* Liki li nimikiko, neza nene láa loko lo kimitove: Nénisi nene lekelí ánigo vevesonamuve. Golesa netatokagó mihina amó neneta aló vílo loko linogo uve.

Numuni lapusámini gakola

(Luk 6:47-49)

²⁴ Nenemú gakóné imane giliiki ámegetata vegená nenémináate lá iki niave: Gele veveso mina ve makolímo numuna nene mikasi alévolelaló nené oko gekago,

²⁵ nego nene, golini napa zeake nagamí velekago itó una napa alekago, mikasi alévolelaló gimó nenazo, alévolé okogó minamó.

²⁶ Itó gakóné imane giliiki gili ahulata vegená nenémináate lá iki niave:

Negi ve makolímo numuna nene nagamí agataloka getatoka gekago, nego,

²⁷ golini napa zeake nagamí napa vilitimo itó una napa alitimo ake ahelú okago, numunima lemeko pou loko akamó.

²⁸ Loko Izesú ámina gakó lo keme asú okago, ali nupa iki gakola gele vegená nene Izesú monó lo kimikumú sigaga litake láa liki lamó:

²⁹* Monó mogona apí ikimiaká nia vete nene avotegini gakotó amegesaló milatave likigó liaká niámóza, áisi nene ezáa gakola nene gihila noikumule loko amegesa milatató neve loko lainim-olimiaká noive, liki lamó.

8

Izesú lokago halamé gizali ve gililímó

(Mak 1:40-45; Luk 5:12-16)

¹ Izesú agokagutí nolimigo, ve vená mukí nene ámegetiki vamó.

* **7:19:** Mat 3:10; Luk 3:9 * **7:20:** Mat 12:33 * **7:23:** Age 6:8 * **7:29:** Mak 1:22; Luk 4:32

² Nivago, ve makó halamé gizaleake mina ve nenémo vike alapusa hizeko Izesuni láa loko lo amimó: Guivahaníinemaka, geza nelémo gililitove loko nene hanuva nelémo gililitanimó nenazo, nelémo gililitane loko noluve.

³ Loko lokago nene, Izesú nene agizani lutoko agupeloka ale nogilike gililitane loko gelekuze, halamé nene gilelezo. Loko lokago halamé netala litá oko gilimó.

⁴ * Gilelekago, Izesú nene láa loko lo amimó: Geza nene imane gakó avetó oko vegena makó lo kememoko voko guguni gizoaká ve nene gugupe alapizekako mota gilelekane loko ánitatize. Itó gilelenikumú nene Moseni gakotó ale moloko netá makó Ómasi guguni gizo amiti netá amekako gilelenitímíni mogona nene mukí vegena lo kemekiko gili vevesatave, loko lo amimó.

*Izesú ami gizapa vémini gelekelé veva alémo zokamó
(Luk 7:1-10)*

⁵ Izesú nene Kapanao numutoka itekago, Loma apatotí ami vetini gizapa ve makolímo aniteake negénegeka loko láa loko lo amimó:

⁶ Guivahaníinemaka, gelekelé izegipáne nene netá napa avisekago helisala hulupa lo minokago miluma geleko numukuka noize, makó vitíve loko noluve.

⁷ Loko lokago, Izesú nénisi vinake alémo zokatove loko lo amekago,

⁸ ami gizapa vémo láa loko limó: Guivahaníinemaka, goselé gapo okoko ve ánéamina není numukú nanamú ititane. Geza nene imaneloka nooko hanuva gegepatunú lokako gelekelé izegipáne nene zokative.

⁹ Nénisi nene ámináminoko kugulizaki vetini gelekelélá nouve. Itó lovámini gala ve makó není gizapaló niave. Lá niago, ve makokumú nene vozó loko lomikugo hanuva vinogo ive. Itó ve makokumú ano loko lomikugo nene hanuva anogo ive. Itó gelekelé izegipánemú nene voko hoza alezo litomó nene hanuva voko alitimó nenazo, geí gakó ámináminoko alévolé itive loko gelenouve. Nenémú nene geza hanuva imaneloka nooko gakoláa lokako zokatihe loko lunae.

¹⁰ Loko lokago, Izesú geleake nene sigaga lotake ámegetiki va vegena nene láa loko lo kimimó: Neza lamaná lo likimitoze, gilio. Hetoka ve imanémo nenikumú gele alévolé onoimó nene haitolímíni neve. Isilae ve lekezalokatí gele alévolé oaká nenémini makó ánigoko gelesá amumóma neve.

¹¹ * Nenémú nene láa loko lo nolukumuve. Ho noititokatí itó ho nolimitokatí hetoka vegena ve imanegitana nia vegena mukí nenete anitiiki nene Avalahá Isaká Zakopó kezagi okulumalímíni lapanalaló alegesá iki miniki nosánetá niki kogoliza vizinigave.

¹² * Lá niiko, goí oko alesa molo kimimó Isilae vegena nene límugusi apakú ahulokimikiko, limiki miniki ive nama iki miluma maluma giliki kegepa atalá iki minanigave.

¹³ Loko loake, ami gizapa ve nene láa loko lo amimó: Geza nene numutoka vozó. Gele alévolé animó nenémini gihila utó inogo ive. Loko Izesú agepa ateleko noligo nene, gelekelé izegipa nene zokamó.

*Izesú vegena mukí kelémo zokamó
(Mak 1:29-34; Luk 4:38-41)*

* **8:4:** Liv 14:1-32 * **8:11:** Luk 13:29 * **8:12:** Mat 22:13, 25:30; Luk 13:28

14 Izesú nene Pitani numukú iteake, Pitani venalámini izolahini agupegú ló lokago, akonoigo ánígoake,

15 agizakú alimó. Agizakú naligo, ló la netá nene asú omikago, oteake nasahilí otamó.

16 Lá okago, únaká ho lemekago nene, kigikagú holosi mina vegená nene Izesutoka kilímiki amó. Ikago nene, kivisi vegená kelémo zokoká kigika gopa i vegená gakó noloketake holosi kepeleko kimiseleká imó.

17* Lá okago nene, Ómasímini agepagutí gakó loaká ve Isaiá gakó láa loko luhuva gizamó nene alévolé imó:

Netá livisekago keé lamuni netá ezáa agohí gimole.

Izesuni ámegetanigi gele vegená

(*Luk 9:57-62*)

18 Lá okago, ve vená mukí iki Izesutoka hizi vigikago, ánígoake izegipala zuha nene sipigú nilímiki vola helegaloka vitave loko lo kimimó.

19 Lo kemekago nene, monó mogona apí okemeaká ve makolímo voko amatoka minoake Izesuni láa loko lo amimó: Tisánemaka, vitanitoka vitanitoka neza gémegé gémegé inogo uve.

20 Loko lokago, Izesú nene láa loko lo amimó: Gaha nene mikasi koló onoikú itiaká niave. Itó namatini numúuni nemóza, okulumakutí lumu ve gihila neza akato numúne itó gotóneló za nomigo vitagá noumó nenazo, makó vitiíve loko lanimó nenémini mogona gele hee lominoko nolape, loko lo amimó.

21 Itó ámegetiki va vegenakutí makó nenémo láa loko lo amimó: Guivanínemaka, geza gelekako nene, neza minoko améneho helekiko vinake gale zemikinake oko gémegetatove.

22 Loko lokago, Izesú nene láa loko lo amimó: Geza nene némegetoko ano. Hilinita vegená gale zikimiaká nene kigika heleneiti vegená kezagi ámina hoza alitave, loko limó.

Izesú lokago una napa ahulamó

(*Mak 4:35-41; Luk 8:22-25*)

23 Izesú izegipala zuhagi nagamikú lapegú itiake vamó.

24 Nivago nene, una napa nene litá oko amó. Amuza moloko alekago nene, nagamí nene valahuká zeko lapegú nene ite vaí inogo imó. Lá okago, Izesú nene avó akonoigo,

25 izegipala zuhate alími noteke láa liki lamó: Guivahanitemaka, nagamikú simá nanogo nounize, lugutó vizemane.

26 Liki likago, Izesú láa loko lo kimimó: Lekelisi komáisí gili alévolé iaká niatita, nanamú likigika gologolo sekave. Loko loake, oteake, unagi nagamí valahukaki nene ahulalizo loko lo kemekago nene kii nolike zou limó.

27 Zou lokago nene, vegená mukí nenete sigaga lake láa liki lamó: Ve imane haitolímini neve. Unagi nagamí valahukaki keza aí gakoláa gili alikasive, liki lamó.

Gatala mikasiuka holosi golesa amisele ahulamó

(*Mak 5:1-20; Luk 8:26-39*)

28 Nonohuló aviligiakie vola helega Gatala vegenalitini mikasigú anitikago, ve losítá holosi golesa kigikagú mina ve minasimó. Niasike, ámepa vizikasigo, vegená nene kelegesá legekago neneló vigá igá amamó.

* **8:17:** Isa 53:4

29 Ámina ve nenetosa geha mulikú gonosi milimiligutí lemesike Izesugegi hotu lamó. Hotu liake keza litá iti gopaga liki láa liki gamoga giki li amesimó: Ómasímini gipalamaka nana netá golesa oletanogo noane. Gamena alitamító nene milumá hoza liminogo noape.

30 Liki lasimó nene áminaló iza mulusi napa miliki hotó otigí iki gale niki minamó.

31 Gale niki niago nene, holosi nenete negénegeka lake láa liki lamó: Limisele ahulanogo nookoma nene iza mulusi vozane kigikagú nene limisele ahulamane.

32 Liki likago, Izesú nene vilo loko kimiselekago, viki izatini kigikagú itiake nene lemémó. Izatini kigikagú nene limikago, ámina iza mukí nene olí miliaké meiniló limiaké nonohulokú limiki nagamí niki hutiake hili gesá amó.

33 Hili gesá ikago nene, iza gizapa ve nenete golisi viake taoniloka gakó nene liliki vake kigikagú holosi mina vetosini gakoláa avetó iki li kememó.

34 Li kimikago, ve vená mukí nene gili asú iake mukí vegenalite Izesuni ánitatune liki limiaké mikasinini ahulokoko vitive liki negénegeka liki li amemó.

9

Izesú ve gepili alémo zokamó (Mak 2:1-12; Luk 5:17-26)

1 Izesuge nene nagamikú lapegú itiake numunaloka goha atiginá iki amó.

2 Ikago nene, ve gepili makó nene ukoakogú nene zaló miliki aliki amó. Aliki ikago, Izesú nene ezáamú gili alévolé amó nenémini mogonáa ánígoake ve gepilima láa loko lo amimó: Gipáneve, goha gena givisemino. Lihimaka nene ahulogimikuve.

3 Loko lokago, keza monó mogona apí ikimiaká a ve lugáa nenete kigikauka nene Ómasi aviliginogo nolihe liki gelemó.

4 Liki gilikago Izesú nene Zuta vegenalite lihima ahulolimiaká itó vegená kelémo zokoaká nene Ómasímogó loló oaká netá neve liki kigikagú gelemó nenémini mogonatagana ánígoake láa loko lo kimimó: Likigikauka nene nanamú gakó golesa nigeleve.

5 Ve makolímó Ómasi noamitimó nene lihimaka gilatogimikuve loko vávani oko lamitimóza, ámináminoko kelémo zokoaká zámuzagi ve noamitimó nene ve gepili makó geza otekoko mohona oko vozo loko litá oko lo ameminogo íve.

6 Lá onoimóza, okulumakutí lumu ve gihila nénisi nene imane mikasiuka lihima gilatoakalímini zámuza itó vegená kelémo zokoakalímini zámuza nenitoka nemó nenémini mogonatagana ánígi vevesatave loko loake ve gepilima nene láa loko lo amimó: Oteoko nene avilisaka geheko numukauka vozo.

7 Loko lokago oteake avilisala geheko numunaloka vimó.

8 Geheko vokago, vegená mukí keza ánígiaké kehelele vizekago, Ómasímini zámuza nene mikasigú vegená kigizakú molokamó minokave liki giliaké Ómasi agepoka lamó.

Izesú Mataioni sele lo amimó (Mak 2:13-17; Luk 5:27-32)

9 Gamená nene zupa Izesú nene vike takisi moní aleaká ve není nugulizá Mataiona takisi moní aleaká numúnegú minokugo ánigoake láa loko lo nim-imó: Geza nene némegetoko ano. Loko lo nemekago, ámegetoko vumó.

10 * Izesugegi není numukú iteko minunike nosánetá noko minuhá. Lá nouko, takisi aliaká a vegi netá golesa aliaká a ve lugáagi mukí keza iteke mini miní ameke minake nosánetá namó.

11 Ninago Palisaio monó ve nenete ániakié ametipo nana igo takisi aliaká ve sukagi netá golesa aliaká nia ve lugáagi makó minake nosánetá nonave, liki nene Izesuni izegipala zuha loká ilitamó.

12 Li limikago nene, Izesú geleake láa loko limó: Keza kivisemigo ha minamoláate lusa vemú sele lisá amave. Kivisi vegenalitegó nene lusa vemú sele liaká niave.

13 * Itó lekeza nene monó gotolaú Ómasímo li gakó makó lá oko nemómámini mogonáa nene gili vevesiki giliilo:

Neza nene guguni gizi nimitave loko gelesá amuve.

Likigika hizi kimiakakumú geleaká nouve.

Itó kugupeninimú hee loko noune liki liaká nia vegená kelémo otopá zitove loko lememannó neve. Neza nene lihimáinigi vegená kelémo otopá zitove loko lumumóma nena, loko limó.

Nosánetá moseakakumú loká itamó

(Mak 2:18-22; Luk 5:33-39)

14 Gamená nene loka monó nagamí holokimiaká ve Zonini izegipala keza Ómasímo nosánetá mosekuko lelikumú lithihe liki liaká a ve nenete Izesutoka viki alegesá iake láa liki loká itamó: Leza nene Palisaio monó vegenaki monokumule loko nosánetá nene mosé mosé oaká noune. Itó geí izegipaka zuhá keza mosisá amave. Nanamú neve.

15 Liki likago nene, Izesú láa loko lo kimimó: Ve makolímo agivelagegi makó kogoliza viziki minata zupa nene agivelage aikumú miluma giliiki nosánetá mositahe. Lá oko nomive. Minoko gala vete ámina ve nene kigizakutí ipá iki apili hilikiko nene, keza miluma giliiki nosá netá mosinigave. Ámináminiki izegipáne zuhate alika nenikumú miluma giliiki mosí mosí itamóza, itína lá oko nomive.

16 Makó nene lavolavo gó nene litaha lokoko hukokiko nene, lavolavo gosohá nene nagamí ziki ali koma ama lavolavo nene hukoko ale litaha lavolavoló molo apizeko aktoakaláa nomive. Akotiiki nagamí zikiko nene gosohá lavolavo nenémo litaha lavolavolotí hikelekiko litaha gó nene hukoloko voko huko napa inogo ive.

17 Itó makó nene vain nagamí gituhú galakalá noigo nagamí getununi litahagú ligi milisá amave. Vain nagamí nenémo gituhú galakalá nooko giputooko litaha getununi zeko ategékiko vain nagamiki itó goni getununigi nene latila okative liki vain nagamí gosohá nene goni getununi gosohakú leke moloaká noune. Lá okuko getununigi vain nagamiki lamaná oko minanogo ive. Loko limó nene litaha monó sunímíni amupiló nene ezáa gosohá monó molo apizeakaláa nomive loko nosánetá moseakakumú anzoa gakó lo kimimó.

Gizapa véminí moholagi Izesuni gotó ale gili venaki
(Mak 5:21-43; Luk 8:40-56)

* **9:10:** Luk 15:1-2 * **9:13:** Mat 12:7; Hos 6:6

18 Izesú nene gakó lo kemeko noigo nene, monó gizapa ve makolímo oko gupá ze amike láa loko limó: Není mohóne nene itína mota helekaze, nenemú nene voko gigizanitunú ale geleko nónohá zemikoko alémo otitane loko gelémoko vitove loko nouve.

19 Loko lo amekago, Izesú nene oteake izegipala zuha lezagi nene ámegetoko vunimó.

20 Novuko nene, vená makó nene ikanímo apelekago númase gapo molova molova oko noigo kilisimasi 12-a ale ahulamó.

21 Eza nene agikatunú láa loko gilimó: Neza nene voko Izesuni agupeló ahe itó hanuva luhoaká gotó ale gelekinake zokatove.

22 Loko geleake Izesuni amegesaló oko noi ke luhoaká gó agataloka ale gelekago, Izesú nene viligoko láa loko limó: Mohó geza goha gena givisemino. Gele alévolé anitímo gelémo zokokave, loko nene lo amimó. Loko agata ateleko noligo litá oko zokamó.

23 Lá okago, Izesú nene vike monó gizapa vemámini numukú iteko ánigamó nene, musiki ziaká a ve alegesá iki niago ive nama nenémo notoloni lemeko minamó.

24 Nego, Izesú nene itike alémo otitove loko geleneike láa loko limó: Ahuli-iki vilo. Imane mohó nene helemive. Hanuva avó akonoive. Loko lokago nene, keza nene giza gakó lihe liki giza itamó.

25 Giza nitago nene, kimisele hetoka oake, mohóma ako mina holomaloka nene vimó. Vo alí loake agizató ale notigo mohó nene otimó.

26 Otekago, nenémini gakola nene mikasi nekisa vokisauka vo asú imó.

Izesú ve lositá kogómula ale goloutoketamó

27 Lá okago, Izesú nene ámina numuni apá ahuloake novigo, kogómula lika ve lositá nene ámegetiki vasimó. Ámegetiki nivasike nene gamoga giki sele liki agulizaki ve napa Tevitini agávolagamaka lelikumú milumavate geleletamane.

28 Liki likasigo, voko numukú itekago nene, ámina ve lositá viki amatoka minikasigo nene, Izesú loká oketake láa loko limó: Lokogómula ale goloutato zámuza nenitoka nemó nene mota gili alévolé inasihe. Loko loká okimikago keza láa liki lasimó: Guivahanitemaka, mota gele alévolé onousimole.

29 Liki likasigo Izesú nene kogómulaló ale nogilike láa loko limó: Gili alévolé asitímini gihila nene utó ino.

30 Loko lokago, kogómula goloutokago, Izesú nene láa loko lo kimimó: Gilinasihe. Lá oleketu netakumú viki vegená li pou lamilizo.

31 Loko lokago gakó nene gililikí vasimóza, ámina gakoláa li pou likasigo, mikasi nekisa vokisauka nene puu loko vo asú imó.

Izesú agepa lakolí i ve alémo aká imó

32 Itó nivasigo nene, ve makó holosi makolímo agepa ze lakolí okago mina ve nene zaló miliki alikamó.

33 Alikí ikago, Izesú nene holosi apeleko amiseleko ale ahulamó. Alahulokago, litá oko gakó limó. Ámina netá nene vegená mukilite ánigiaké sigaga lake Isilae mikasigú gozapá netá némináa makó utó igo ánigamuháma neve.

34 * Liki lamóza, Palisaio monó ve keza Izesukumú nene holositini agulizaki ve nenémo alémo vatí igo holosi nene kepeleko kimiseleká noive, liki lamó.

Izesú vegená mukikumú agika hizimó

35 * Lá ikago Izesú nene numutó namató mohona ike apá koma napa nene ánígo asú imó. Ánígo asú ike, monó numuni minakú minakú nene monó lo keme keme oko minamó. Lá ike nene, Ómasímini gizapaló minoakalímini gakó lamaná nene lo utó moloko lo kemeko mohona imó. Itó haitopaitó netá gizale vegená itó haitopaitó netá kivisi vegená kelémo zokomo vimó.

36 * Lá oake vegená mukí ánigamó nene muhelé ahelé ake gopa iki minamó. Sipsip iza gizapa venini nomigo hanuva minamó nenéminiki minikago, Izesú ánígoake agika hizekago

37 izegipala zuhamaanoza gakó makó láa loko lo limimó: Vegená imane latila ikataze. Mikú nosánetá mukí omolokamóza, hoza aleaká ve nene lagasó minokunize.

38 * Nenémú lekeza mini amelahitoka likiko nene hozaló ve makó kimiselekiko viki hozavagú minumuni alitaze, loko limó.

10

Izesú ve 12-a kelémo etó imó

(Mak 3:13-19; Luk 6:12-16)

1 Izesuni izegipala zuha 12-a alesa molo lemekago, okuko nene, kigikagú holosi minatamó kipiliki kimisilitave loko itó haitopaitó netá gizalinita vegená itó haitopaitó netá kivisiti vegená kilími zokatave loko zámuza nene limimó.

2 Aposolo 12 leza lugulizate nene makó agulizá Saimon agulizá gosohá nene Pitá, itó agunala Etulú, itó Zepetaioni gipala Zemusí itó agunala Zoní,

3 itó Pilipó, itó Patolomaió, Itó Tomásí, itó Mataiona neza takisi moni aleaká u ve nene, itó Alapaioni gipala Zemusí itó Tataió,

4 itó Saimoná eza Lomagatí gamani amisele ahulanogo i ve, itó Kaliotó apakutí Izesuni amimika li ve Zutá.

Izegipala zuha 12-a keza monó hozaló vamó

(Mak 6:7-13; Luk 9:1-6)

5 Ámina ve 12-a nene nolimisilike hoza gakó láa loko lo limimó: Lekeza nene hetoka vetini mikasigú itó Samalia vegenalitini apá makotoka ma vamilo.

6 Isilae vegená lugáagutí sipsip iza vi tolova amó keitokagó nene viki ánígalo.

7 * Niviki monó nene láa liki nene lilo: Ómasímini agulizaki ve napámini zámuza nene omo lokovogisaloka okave.

8 Nenémú kivisimoláa kilími zokataze, itó helemoláa nene kilími otitaze, itó halamé gizalemoláa kilími gililitaze, itó kigikagú holosi golesa minatamó nene kipiliki kimisili ahulataze. Meinaváa nomimó hagítana lehizeleketumó nenazo, nenémú meinaváa nomitimó hanuva kilími lamaná ilo. Itó moni koma lagasoláagi ma gúiki alemilo, keké.

9-10 * Gapo vitatoka akiseaká gó aliki vamilo. Itó gó lositá nene luhamilo.

* **9:34:** Mat 10:25, 12:24; Mak 3:22; Luk 11:15 * **9:35:** Mat 4:23; Mak 1:39; Luk 4:44 * **9:36:** Nam 27:17; 1 Kug 22:17; 2 Iki 18:16; Izí 34:5; Zak 10:2; Mak 6:34 * **9:38:** Luk 10:2 * **10:7:** Luk 10:4-12

* **10:9-10:** 1 Koli 9:14; 1 Tim 5:18

Itó likigisaló suú nene luhamilo. Itó hánusaló nene alemiki hanuvagó vilo. Vegená makolititoka hoza alita ve nenete ámina vegenalitinigutí nosánetá aliki niki minatamó nene lamaná itive.

¹¹ Itó apá nenenlokahe nenenlokahe viki anitiiki nene ganá nene apá amelagini loká iki mogonáinimú gililo. Makolímini mogona lamaná itimó nene, aí numukú itiki miniki nene ámina numukukó akiliiki viki otiki vitaze.

¹² Itó numukú itiki niminiki nene hulu nene lekelitoka minino liki li kimilo.

¹³ Numuni amelage likilími milikikoma, miniki ámina gakó li kiminamó nenémini gihiláa utó itimóma neve. Itó minikiko mogonáini lamaná amikoma nene, hulu gakolímini gihiláa nene goha atiginá oko lekelitoka anogo ive.

¹⁴* Itó apá makokú likilími lamaná iki gakotini gelemikoma nene leke-megesa vizi kimiiki niviki nene vahé miliki likigisagutí mumusopa usagamá zi ahuliki vilo.

¹⁵* Neza lamaná lo likimitoze, gililo. Gamena napaló nene Soto apakú itó Gomola apakú mina vegená keza lihima koma alinigave. Itó likilími lamaná amita vegená nene lihima napa itiki alinigave.

*Gopoguni mililitata gamena utó inogo ive
(Mak 13:9-13; Luk 12:12-17)*

¹⁶* Gilinahe. Sipsip izagitana nene hela galatini holúikú geha ziki minatave loko nolikimisuluve. Nenemú lekelisi nene gili guni i miniki hulu iki minalo.

¹⁷* Keza nene likigizató aliki gonító likilímiki vinigave. Itó monó numúikú numúikú nene segí nogosani likipilinigaze. Ehe, lekeza gizapa alévolé iki minalo.

¹⁸ Itó není nugulizá lekelitoka minakumule liki kugulizaki vetini itó kia-pegin kovogisaló likilímiki vikiko nene gakó hoza alilikitanigave. Lá niko nene, lekeza keí kovogisaló itó hetoka vetini kovogisaló není monó li utó itave.

¹⁹ Není gakónemule liki gonító likilímiki vita gamena nene, gakó nanave loko litupe itó gakó nana oko geleko litupe liki lakagata giliko gena amino. Gamena nene zupa nene gakó litave loko Sikalahú nenémo likigikagú molelekatanogo ive.

²⁰ Lá okiko, gakó likiko nene, lekelí gakó loló aminogo ive. Ametipini Sikalahú nenémo likigikagú gakó lo nomiliko linigave.

²¹* Itó uvolaho makó nenémo agunala nene agizató alekoko goní omikiko nene agunalama apili hilinigave. Itó amelaho nene gipala nene agizató alekoko goní omikiko nene gipalama apili hilinigave. Itó izegipáini keza izóikini améikini nene goní ikimikiko izóikini améikini kipili hilinigave.

²²* Itó vegená mukilate není nugulizá lekelitoka minakumule liki mukahá likipilinigi niámóza, makó keza gamenaváini asú itító monó ahulamiki alévolé iki miniliki vitamó nene Ómasímo kugutó vizinogo ive.

²³ Itó apá makotoka gopoguni mililikitikoma, golisi iiki apá makotoka nene vilo. Neza lamaná lo likimitoze, gililo. Lekeza monó hozaló Isilae mikasiuka mukí apató vi asú amiko okulumakutí lumu ve gihila neza litá oko anitinogo uve.

* **10:14:** Apo 13:51 * **10:15:** Mat 11:24; Apí 19:24-28 * **10:16:** Luk 10:3 * **10:17:** Luk 21:12-15
* **10:21:** Luk 21:16 * **10:22:** Mat 24:9; Luk 21:17; Mat 24:13

24 * Sukulu izegipa nenémo tisala avilegeakaláa nomive. Gelekelé izegipa nenémo agulizaki veva nene avilegeakaláa nomive.

25 * Lá onoinazo, sukulu izegipa oko moloko itimó nenémo tisalámini lelegító onoikoma etanogo ive. Itó gelekelé izegipa oko moloko itimó nenémo agulizaki vevámini lelegító onoikoma etanogo ive. Ámináminoko ametipina nenikumú holositini gizapa ve Pelezepulole liki linamó nenazo, izegipa nugunamotamó neneta, lekelí lukugulizá aliki mumusopa ziliki viki minanigave.

Lehelele viziti ve lelepizimó

(Luk 12:2-7)

26 * Nenemú gopoguni mililikitata vegenakumú lekelegesá legemino. Hitonoiti netá matá nenémo minoko tolova aminogo ive. Minoko utó o asú itító neve. Itó asuguná ne netá nenémo minoko utó o asú inogo ive.

27 Neza nene límugusigú legesó oko lo lukumu gakó nene lekelisi miniki hanató li utó itaze. Itó lakagatauka musika loko lo lukumu gakó nene lekelisi miniki numuni hetotí gakó napagutí li utó iki litaze.

28 Vegená makolite lukugupegó nene apili hilinigave. Lekemeni apili hiliaká zámuba keitoka nominazo, keikumú nene lekelegesá legemino. Itó lekemeni nemó itó lukugupe nemó ale nupa napa oko ló apakú apele heleaká zámuzagi ve Ómasimú nene lekelegesá ligino.

29 Somohá nene ha netá neve. Itó golohá monitunú nene nama somohá losítá meina hizeakaláa nemóza, ametipo gelemíkoma nama somohá hamokó nene nene mikasigú lememinogo ive.

30 Lekelí gototini zopovatini gatoakaláa nene Ómasímo gele asú oko geleneive.

31 Lekeza nene nama somohá niamave. Lekelisi nene vegená nianazo, itó Ómasímo gizapa olíkimiaká noinazo, nenemú lekelisi nene netá makokumú ma lekelegesá legemino.

Izesuni agulizá lo utó oaká gakó

(Luk 12:8-9)

32 Vegenalitini kovogisaló není nugulizá li utó iki nilími napa ita vegená nene neza ámina oko okulumakú aménehini avogisaló kelémo napa oko litomóza,

33 * vegenalitini kovogisaló nenikumú zivi hitivi ita vegená nene neza ámináminoko okulumakú aménehini avogisaló keikumú zevo hitovo inogo uve.

Nonagaki lovagi ale utó itove loko limi gakó

(Luk 12:51-53; 14:26-27)

34 Nenikumú nene mikasiuka nonagá ale utó inogo limimóma neve liki lamilo. Neza nene nonagakigó nomive. Lovagi ale utó itove loko lumumóma neve.

35 * Neza lumumómámini gihila nene amelahiko gipalago lavaleta lavaleta iki kogoka hotó itimó neve. Itó izolahiko moholago lavaleta lavaleta iki kogoka hotó itimó neve. Itó anohúvolahiko avolahiko lavaleta iki kogoka hotopotó itimó neve.

36 Itó lekelí numutikú lekelí zuhate gala velini lilí inigave.

* **10:24:** Luk 6:40; Zon 13:16, 15:20 * **10:25:** Mat 9:34, 12:24; Mak 3:22; Luk 11:15 * **10:26:** Mak 4:22; Luk 8:17 * **10:33:** 2 Tim 2:12 * **10:35:** Mik 7:6

³⁷ Itó lekeza izotikini ametikiniloka likigika kimiiki itó nenitoka koma nimitamó nene, není mututoni minata avotigila iki niamave. Itó izegipatiniloka likigika kimiiki itó nenitoka koma nimitamó nene, není mututoni minata avotigila iki niamave.

^{38*} Itó zohota zaló kipili hilinigi miluma netá ali gihikitatakumú gili ahuli-iki nigizaka hiziki némegetiki amitamó nene není mututoni minaminigave.

^{39*} Itó makó keza nene kigika kemeníini ale gikitiiki ali minatamó nene, miniki gopa itamó neve. Makó keza nenikumule liki kigika kemeni vínasatamó nene alévolé kemetameni alinigave.

Meinaváá alesá gakó

(Mak 9:41)

^{40*} Vegená makó keza lekelí nasahilí ilikitatamó nene není nasahilí inimiaká niamó gelekave. Itó nasahilí initatamó nene nimisili vema nasahilí imiaká niamó gelekave.

⁴¹ Vegená makó keza monó lole ale ve noikumule liki monó lole ale ve makó nasahilí itatamómámini meinaváá alinigave. Itó vegená makó nenete monolagi ve noikumule liki monolagi ve makó alími lamaná iki nasahilí itatamó nene, nenémini meinaváá alinigave.

⁴² Neza lamaná lo likimotoze, gilio. Lekeza nene není vegenáne zuhagutí makó limiki minatamoki keikuti makó nene není gipa noikumule liki gosohá nagamí ihiki amitamó nene, haha aminogo ive. Meinaváá alitamó neve.

11

Zoní ve losítá kimiselekago Izesutoka vasimó

(Luk 7:18-33)

¹ Izesú nene izegipala zuha 12-a nene ámina gakó lo leme asú oake, leza volko minuhá numutó numutó monó lo kemeko apí okiminogo vimó.

² Lá okago, monó nagamí holokimiaká ve Zoní nene nagá numukú noike netá golesagutí gologí olimiaká ve Kilistó ave loko loaká nouni vémo hoza alimó nenémini gakoláá geleake, izegipala zuha losi nene kimiselekago Izesú noitoka vasike láa liki loká itasimó:

³ Utó itive liki monó gotolaú luhuva gizina vema nene géisi noape, itó alika makó utó itikumú ageva itunímó nehe, liki loká itasimó.

⁴ Loká itasigo, Izesú nene ámina vema noive loko Zoní gilitive loko láa loko lo kimimó: Lekeza nene atiginá iki viki nene loló nou netá matá imane nánigasimó nenémini gakoláá avetó iki Zonini li amilizo.

^{5*} Kogómula lilikupá molamó nene kogómula ale hanatokimiaká noive. Itó kigisaló alimó nene kigisa ale lamaná okimiaká noive. Itó halamé gizalemó nene kelémo gileleká noive. Itó kagata molamó nene kagata ale koló okago gakó giliaká noive. Lepa gonosi nene kelémo oteaká noive. Itó limiki minamó ámemena nenete gakó lamaná nene giliaká niave.

⁶ Lá onoinazo, není mogonamú kagata losi pasi gelemitamó nenete kogoliza viziki minanigave.

⁷ Loko lokago, Zonini izegipala zuhamá atiginá iki nivasigo, Izesú eza vegenala sii sii liki minamoláá nene Zonikumú láa loko lo kimimó: Lekeza nene mikasi gomopalaló nanámini o mina ve ánganigi vamóma neve. Zoní

* ^{10:38:} Mat 16:24; Mak 8:34; Luk 9:23 * ^{10:39:} Mat 16:25; Mak 8:35; Luk 9:24, 17:33; Zon 12:25

* ^{10:40:} Luk 10:16; Zon 13:20; Mak 9:37; Luk 9:48 * ^{11:5:} Isa 35:5-6, 61:1

nene hepelímo gihinahisi ale volaloka imaloka imómámini noigo áníganigi vamóma nehe.

⁸ Itó eza gola gonanalivagi luhoake noigo áníganigi vamóma nehe. Óe. Gó luhuvagi luhæká nia ve nene kugulizaki vetini numukú akiki otiki iaká niave.

⁹ Zoní nene Ómasímini agepagutí gakó loaká ve noigo áníganigi vamó nehe, olo. Neza lo likimitoze, gililo. Lekeza nene ánígi mina vema nene Ómasímini agepagutí gakó loaká ve lugáagitana minamimó neve. Eza haitolímini okave.

¹⁰* Monó gotolaú Ómasímo li gakó makó láa liki gizinamóma neve: Gililo. Neza nene gakó lole ale ve makó amiselekugo áisi voko ale goí oko kigikagú hoza aleko gapo velegetanogo ive.

Ámina gakó nene Zonitoka voko alímó neve.

¹¹ Itó neza lamaná lo likimitoze, gililo. Mikasiuka utó ina vegenakutí makolímo monó nagamí holokimiáká ve Zonini nene ma avilegesá amimóza, Ómasímini gizapaló limiki niamolategi gopa Zonini aviligitigí iki niave.

¹²* Zoní nene monó nagamí holokimiáká i gamenalotí minoloko iteko okulumalímini gapo nene utó o lamaná oko utó noigo, vegená mukiliteamuza miliki lovasava iki okulumalímini lapanala ali lá iaká niave.

¹³ Zoní velesá utó amigo Ómasímini agepagutí gakó liaká a vegi Moseki keza mukitoka alika utó iti netakumú epoapoga liki Ómasímo agulizaki ve napa alemó utó iti gakó liliki vamó.

¹⁴* Itó gilitune liki nilikoma makó lo likimitoze, gililo: Ve makó Ómasímini agepagutí gakó loaká ve Ilaizakitana ative liki lina ve nene Zoní noave.

¹⁵ Lá onoinazo, lekeza lakagatagi minatamó neneta ámina gakó lonoumónene gili vevesiki gililo.

¹⁶ Oko moloko oaká nou netá ánígina vegená nene nanetató lo moloko nolugo vo guni itive. Keza gili goselé iaká nia izegipagítana niave. Izegipa keza alegesá apató niake kigivéikini nene sele liki láa liki li kimiáká niave:

¹⁷ Leza nama luható nene nanamú lisá amave. Itó helegaloka ive nama uható nene nanamú ive nama isá amave, liki liaká niave.

¹⁸ Ámináminoko Zoní nene hozava apí oake nene nosánetá lamaná namike vain nagamí namike etó oko minamó. Etó oko noigo ánígiaké holosi makolímo agika ale gopa okago noihe, liki nene lamó.

¹⁹ Itó helegaloka neza okulumakutí lumu ve gihila okuke iza goula zahí nagamí nosánetá lamaná nonugo, ánígiaké láa liki nilave: Ve imane nene ánígalo. Áisi nene gasova ve itó nagamító ve noike takisi aleaká vegi itó netá golesa aliaká nia ve lugáatini zogonini noive, liki liaká niave. Lá onoinóza, Ómasímo gele guni oko netá matá aleaká noimó nenémini gihiláa utó okago, vevesokogó minoaká noimó nenémini mogonáa nene utó oaká noive, loko limó.

*Kigika ali viligama vegenalite miluma sipisi gilinigave.
(Luk 10:13-15)*

²⁰ Izesú apá lugálaloka nene hoza aleloko vike alévolé suni haitolímini mukí ale utó imó. Ale utó okago ánígamóza, ánígi hagele gele iake kigika ali viligamago, gahá kemeko láa loko nene limó:

* **11:10:** Mal 3:1 * **11:12:** Luk 16:16 * **11:14:** Mal 4:5; Mat 17:10-13; Mak 9:11-13

21 * Agae, Kolazina amelagita. Agae, Petesaita amelagita. Lekelitoka nene golivagi netá utó inogo ive. Golesa netá aliki minakumú nene Tulo apá itó Sitona apá gozapá tui loko vimóza, alévolé suni lekelitoka alumó nene ámina apá lositatoka utó imó nelina, keza nene gozapá miluma giliki kigika ali viligamó nenémimi mogonáa ali utó iki ginegane línhaha luhiake lánehá nene kugupeló hiliki hanuva minaline.

22 Nenemú lo likimitoze, gililo. Tulo apató itó Sitona apató vegená keza gamena napaló nene lihima koma alitamóza, lekelisi nene lihima napa alinigave.

23 * Itó Kapanao amelagita lekeza lukugulizá nene okulumakú ititive liki ali otiák niahe. Nenéminoko nomive. Lokú lekehelú inogo ive. Alévolé suni lekelitoka ale utó umó nene Soto apakú utó imó nelina, kigika ali viligikago ámina apá nene tui loko vamiline. Imane gamenaló nene hanuva minalinamó neve.

24 * Nenemú lo likimitoze, gililo. Lihima kimiti gamenaló nene Soto apatoka nene lihima lagasó keitoka utó inogo ive. Itó lekelí nene ale nupa okoko genavaló geheleketanogo ive, loko limó.

*Nenitoka atamó nene lekelémo geha zinogo uve
(Luk 10:21-22)*

25 Gamena nene zupa Izesú gakó láá loko nene limó: Aménega, geza okulumaki mikasigi keí Guivahani géisi nene noane. Sukulu lunike gele vevesokune liki liaká nia vegená keza monoka giliiki gili guni ikatave loko ale halá geko molokimikanike nene sukulu lamake izegipa namunigitana iki mina vegenalitini kigikagú molokimiaká noane. Lá oaká noanikumú gegepoka noluve.

26 Aménega, nenéminoko utó oloko vitive loko gelenanimó nene etoaká noive.

27 * Loko loake, miní ameko láá loko limó: Améneho netá matá mukí nene nigizakú molo asú okave. Lá onoimóza, Ómasímini gipalámina mogona gili vevesina vegená ma niamave. Améneho hamokó geleneive. Itó aménehini mogona nene ve makolite gili vevesamave. Gipala noutímina itó nezáne lo utó oko lo kemekugo ánigi hehe litave loko gilito vegená niamoláaлезategó aménehini mogona gelenoune.

28 Goselekaselé iki muhelé ahelé iki nia vegená itó haitopaitó netalímo gena likiviseaká noi vegenalita mukitoka nenitoka imi asú iki alo. Lekelémo geha zinogo uve.

29 * Neza nene zou loko nouve. Itó nigika lamanaki nouve. Ikiko nene niginaloka hévetú nemó nene mololeketatoze. Mololikimikugo nene nenitokatí gakó lamaná gilitaze. Itó lekemenitini nene avasú vizeko mino lamaná oko minatize.

30 Není niginaloka hévetú nemó nene huluváa lamaná neve. Itó genavagi nomive, loko limó.

12

*Holisigú Izesuni vegenala zuhate kilé hisiki nimi vamó
(Mak 2:23-28; Luk 6:1-5)*

* **11:21:** Isa 23:1-18; Izi 26:1-28:26; Zoe 3:4-8; Emo 1:9-10; Zak 9:2-4 * **11:23:** Isa 14:13-15; Apí 19:24-28 * **11:24:** Mat 10:15; Luk 10:12 * **11:27:** Zon 3:35, Zon 1:18, 10:15 * **11:29:** Zel 6:16

1 * Gamená nene zupa holisi makokú Izesú ale goí igo izegipala zuha leza kilé mikú mohona oko vunimó. Novunike nene, izegipala leza gaúna helekunike kilé akutokunike gihiláa hiseko nomo novuko nene,

2 Palisaio monó ve keza ánigiaké gili golesa ake Izesuni nene láa liki li amemó: Ánígozo. Izegipakamate netá nalemó nenémo nene golesa okave. Lelí holisigú hoza nalemó nene lá amoakalímini ikave.

3 * Liki likago, Ómasímo vegenala zuhate netakumú vitagá niko ezáa lo huka gakó nene hanuva molo gaheva itímó neve liki gilitave loko láa loko lo kimimó: Gozapá agulizaki ve napatipto Tevití nene vegenala zuhagi nosánetakumú gaúna hiliaké netá makó alemó nenémini gakola monó gotolaú luhuva gizikago lekeza gatinamóza, mogonáa gilisá amahe.

4 * Tevití eza nene Ómasímini monó numukú itekago guguni gizoaká ve napámó Ómasímini avogisaló mila peleti nene amekago namóma neve. Itó vegenala kezagi namóma neve. Itó ámina peleti nene hanuva vegenalite namitave liki guguni giziaká vetegó natave liki monó gotolaú li hukinamóma neve.

5 * Itó Mosé nene guguni giziaká ve keza holisigú nene monó zugusaveú hoza aliki niake nene holisimú li hukina gakó nene avutá apiliaká niamóza, áminámo lihimá keitoka minosá amive loko luhuva gizonoimóza, nene gatiki gilisá amahe.

6 Nénisi nene lo likimitoze, gililo. Likigilikagú noutímima nene monó zugusave avilegeko nene nouve.

7 * Itó monó gotolaú Ómasímo li gakó makó lá oko neve: Neza nene guguni gizi nimitave loko gelesá amuve. Likigika hizi kimiakakumú geleaká nouve. Lekeza nene ámina gakolímini mogona gelelina nene, lekeza lihimaváini nomiti vegenalitini lihimáinimú gakó hoza alikitamaline.

8 Okulumakutí lumu ve gihila neza nene holisi amelahina nounazo, izegipáne zuhate holisigú lilí ita netá nene není netá neve.

Agizani nakeseta ve (Mak 3:1-6; Luk 6:11)

9 Láa loake, nenenotí oteake vike monó numuni makokú nene itímó.

10 Itímó nene ve makó agizani lugaloka nakeseta ve noigo, ve lugáa keza Izesuni loká itake lelí holisigú nene vegená kelémo zokoakaláa nene nehe nomive, liki nene lamóza, hanuva nene Izesuni imane nana gakotó ale moloko lokinake goní otatune liki, gimivágú miliki nene lamó.

11 * Lá iki gimivágú milikago, Izesú nene kigikagú emane ánigo vevesoko áñigoke láa loko limó: Lekelikutí makó nenémo nene sipsip iza akaleváa makó nene holisigú nene gale hánagú velehé limitimó nene, holisimagule lokoko ahulokiko áminagú minatimó nehe. Óve, ale gelelehá oko ale veletoka alahulatimó neve.

12 Lá itímóza, sipsip nene ha netá neve. Itó vegená lélisi nene netá gihiláa noune. Nenemú holisigú nene vegená kelémo lamaná oakaláa nene neve.

13 Loko loake ámina ve nene gigizani lutozo loko lokago, agizani lugaloka nene lutokago, agizani magáa minamómámini oko goha lamaná imó.

14 Lamaná okago nene, Palisaio monó vegená keza ámina netá ánigamó. Ánígiaké limiki viake Izesuni nene nana inake apele hilitune liki lova gizamó.

* **12:1:** Gapo 23:25 * **12:3:** 1 Sam 21:1-6 * **12:4:** Liv 24:9 * **12:5:** Nam 28:9-10 * **12:7:** Hos 6:6; Mat 9:13 * **12:11:** Luk 14:5

Ómasímo gelekelé izegipala Izesuni alémo etó imó

15 Lá okago, Izesú ámina gakó geleake nene, numuni apá ahuloake apá makotoka vimó. Lá oko novigo mukí vegena ámegetiki vamó. Lá ikago, kivisi vegena mukí nene kelémo zokoake nene,

16 aí mogonáa nene avetó iki lili ali amitave loko lo hukoko loketamó.

17 Láa loko lokimikago, Ómasímini agepagutí gakó loaká ve Isaiáanoza gakó makó láa loko luhuva gizamó nene gihila zimó:

18 * Ómasímo láa loko nolive: Gelekelé izegipáne alémo etó umó nene ánígalo.

Nigika amenouke aikumú nene gele lamaná oaká nouve. Itó neza Sikalahúne nene aí amupiló molokugo alémo vávani okiko, hetoka ve numutó namató vegena nene lihimáinimú gona moloketati gakó nene lo utó oko lo kimitimó neye.

19 Eza lovaleta oko gopaga lamoko gapoló gakó napagutí laminogo ive.

20 Vegená ámemenáa límiki minamó nene ma kelémo golesa o asú aminogo ive. Limiki mina vegena nenete gelemó ló guluma koma nenéminoko nemó nene ma ze lihaminogo ive. Itó lá okoko hozaváa amuza moloko aleloko voko miniko nene, ale kegesoaká nerémo netá mukí kivilegeko minanogo ive.

21 Lá okiko, hetoka ve numutó namató vegena líte kigika nene aí agulizató ali miliiki aikumú kagata losi gelemiki ageva iki minanigave, loko lo hukoko límó.

Izesuko Pelezepuloko

(Mak 3:20-30; Luk 11:14-23)

22 Nene gamenaló ve makó nene holosi makolímo agika ale gopa oko agómula lika ve itó agepa hize lakolí okago mina ve nene Izesú noitoka alímiki vamó. Alímiki vikago, Izesú nene alémo lamaná okago, ve eza agómula goloutoake nene, gakó límó.

23 Gakó lokago nene, vegena mukí nenete ánígiake sigaga litake agulizaki ve Tevitini agávolaho ative liki la ve netihe.

24 * Liki likago nene, Palisaio monó vete ámina gakó giliake láa liki lamó: Pelezepuló eza holositini agulizaki ve loló oake alémo vatí igogó holosi nene kepeleko kimiseleká noive.

25 Liki likago, Izesú nene kigikagú gakó hanuva geleake láa loko lo kimitimó: Mikasi makotoka vegena keza hizi hoú liiki lova gopa hitzatamó nene, keí mikasi gámé minatimó neye. Itó apá makotoka itó numuni makokú vegena keza hizi hoú liiki eza akohú apiliko eza akohú apiliko itamó nene hutilí iki vinigave.

26 Itó Satá ezáa izegipala zuha kepeleko kimiseleneitimó nene, aí avogisaló nene itína mota hizi hoú liake alévolé iki minamitamó neye.

27 Lekeza nenikumú Pelezepuloni zámuzatunú holosi nene kepeleko kimiseleká noive liki liaká niave. Láa likima nene lekelitini izegipatini zuha nenete nene Satá ámina oko kelémo vatí igo holosi kipiliki kimisiliaká niahe. Óe, lá oko nomive. Nenemú kéisi nene soza gakotinímíni mogona hanuva ali utó itamó neye.

28 Lá onoimóza, nénisi nene Ómasímini Sikalahulímo nelémo vatí igo holosi nene kepeleko kimiseleká nounazo, Ómasímo agulizaki ve napa ale utó oleketamó nenémini zámuza lokovogisaloka mota omo ávatiha onoimó nenémini mogona mota utó okave.

* **12:18:** Isa 42:1-4 * **12:24:** Mat 9:34, 10:25

29 Ve makolímo gasovagi ve amuza ve makolímini numukú nene litá oko iteko henokanona nene ma ipá oko alitihe. Nenéminoko nomive. Gasovagi ve amuza vema nene goí oko agisa agizató nagá aleakaláa nene neve. Lá okogó aí henoni ipá inogo ive. Loko limó nene Satani zámuza avilegeake holosiva kepeleko kimiseleká nouve loko lo moloko limó neve.

30 * Loko loake makó láa loko limó: Makó keza nene nenikutí ve minamitamó nene není gala ve minanigave. Ve makó keza nilími vatí iki vegená kilími nupa Amitamó nenete kilími hutili iáká niámó geleneive.

31 Nenémú lo likimitoze, gililo. Ómasímo golesa netá haitopaitó itó alivi letivi liaká haitopaitolímini nenémini lihimavala ahulokimiakaláa nemóza, ve makolímo Sikalahukumú alevo letovo oko litímó nene Ómasímo ámina lihima ahulotati gapo nomive.

32 * Makó keza okulumakutí lumu ve gihila není imane alivi letivi itamó nene Ómasímo ámina lihima nene hanuva ahulokimiakaláa nemóza, Sikalahukumú alivi letivi iki lita lihima nene mikasigú nemó itó okulumakú nemó nene ma asú Amitító neve.

*Oko moloko nounitímo mogonate ale utó oaká noive
(Luk 6:43-45)*

33 * Lekeza nene za gihila lamaná makó ánigiiki za lamanakutí neve liki litaze. Itó za gihila golesa makó ánigiiki nene ámina iki za golesagutí neve liki litaze. Za gihila nenémo zámini mogona ale utó oaká noive.

34 * Gosihálímini agapilamó zuha lekelisi nene niave. Mogonatini golesagi nianazo, gakó lamaná ma lisá amave. Ligikagú vái o minakutí legepatunú loaká noune.

35 Vegená lamanalitini kigikagú nene netá lamanakó ititimó nenazo, kigikagutí nene vatí sunigó utó itímó neve. Itó vegená golesatini kigikagú nene golesa netakó minatimó nenazo, kigikagutí ámináminoko golesa sunigó ititimó neve.

36 Nenémú nénisi lo likimitoze, gililo. Lihima aleaká gamenaló nene vegená mukilite ha gakó haitopaitolímini gopa linakumú nene gakó hozava aliiki asenimi hiziki lúitamó neve.

37 Gakó lanimó nenémo oko moloko animómámini mogonaka lo utó molokiko, lamaná itímó nene, lihimaka nomitimó minatanimó neve. Itó golesa itímó nene, lihimaka ha minatimó neve.

*Vegená golesate alévolé suni ánitatune liki lamó
(Mak 8:11-12; Luk 11:29-32)*

38 * Láa loko lo kemekago, monó mogona apí ikimiaká a ve itó Palisaio monó ve lugáa keza gakó láa liki li amemó: Tisatemaka, geza nene alévolé suni ma ale utó okako nene ánitatune.

39 * Liki likago, Izésú láa loko lo kimimó: Oko moloko oaká nou netá ánigiaká nia vegená lekelisi nene vegená golesave itó monó gili ahuliaká vegená niave. Lekelisi alévolé suni ale utó ugo ánitatune liki liaká niámóza, lekelisi nene haitó suni makó ale utó ugo ánitaminigave. Ómasímini agepagutí gakó loaká ve Zonatoka emane utó i suni makó nenitoka utó okiko nenegó ánitatave.

* **12:30:** Mak 9:40 * **12:32:** Luk 12:10 * **12:33:** Mat 7:20 * **12:34:** Mat 3:7, 23:33; Luk 3:7; Mat 15:18 * **12:38:** Mat 16:1; Luk 11:16 * **12:39:** Mat 16:4

40 * Zoná nene gamena losive makole nene lagaha sipisímini agatupagú minake goha otimóma neve. Áminagó oko okulumakutí lumu ve gihila nénisi nene gamena losive makole mikasigú mininake goha otinogo uve.

41 * Itó Zoná nene Ninive vegená monó lo nokimigo kigika ali viligamóma neve. Itó nénisi ató imane nene Zonakitana minamoko Zonani avilegeko noumóza, lekeza není gakó gili ahuliake likigika ali viligamave. Nenemú Ómasímo gona mololeketati gamena nene Ninive apá amelage nene otiki miniki oko moloko nou netá ániyiaká nia vegenalitini lihimáinimú lotuva liginigave. Lá ikiko lihima alitamó neve.

42 * Itó agulizaki vená Sipá mikasi emegaló minamó nenémo Ómasímo gona mololeketati gamena nene otekoko oko moloko nou netá ániyiaká nia vegenalitini mogonatini nene lotuva legekiko lihima nene alitamó neve. Ámina vená nenémo Salomó gele vevesoko gilimómámini gihiláá gilinogo mikasi hotokatí gapo háná háná amó. Itó nénisi ató imane noumó nene Salomoni avilegeko noumóza, lekeza není gakó gelemave.

*Holosi golesa atiginá i gakó
(Luk 11:24-26)*

43 Holosi makó nene ve makolímini agikagutí iteoko avasú vizeko minati numunímú vitágá inogo vegená minama mikasiló voko mohona itive. Vitágá oloko novoko,

44 neza numúne nene ahulokuke umóma nenazo, goí oko minu numutoka goha atiginá oko vinake minatoze lokoko nene, atiginá oko, oko ánigatímó nene, ámina numuni lolopa gitiki ali guni inakú nene numuni gizapa ve nomiko ánigatímó nene,

45 goha nene ahulokoko voko holosi agivelagini 7-a nene kugupelotí sisipa anuva ovimó nene kelémoko oko áminagú nene limiki miniki aliki inigave. Lá ikiko, ámina ve nene goí oko golesa oko minamóza, íi, alika nene golesa o lamaná oko golesa inogo ive. Lá onoize, ve golesa áimane lekelitoka utó itikumú noluze, ehe.

*Izesuni izolahiki agunamotamologi
(Mak 3:31-35; Luk 8:19-21)*

46 Izesú gakó lo kemeko noigo, amegesaloka nene izolage izegipa agunamotamola nene gakó lo amitune liki hetoka gizapa iki niago,

47 ve makolímo Izesuni nene gelenape, izokage izegipa gugunamotamokama gakó lo gimitune liki nene hetoka iki gizapa niave.

48 Loko lokago, Izesú nene láá loko lo amimó: Izónge nugunamotamónemú lape.

49 Loko loake, izegipa apala nouni liginaloka nene agizani hisú oko láá loko limó: Ánígaló. Izónge izegipa nugunamotamóne imane niave.

50 Okulumakú améneho li gakó ámegetiaká niamó kéisi nene izónge izegipa nugunamotamóne niave, loko limó.

13

*Zuha netá atilí oaká vemú anoza gakó
(Mak 4:1-9; Luk 8:4-8)*

* **12:40:** Zna 1:17 * **12:41:** Zna 3:5 * **12:42:** 1 Kug 10:1-10; 2 Iki 9:1-12

¹ Izesú nene ámina gamenaló numuni minakutí lemeake nonohuló agataló lemeki noike,

² * gakó apí okiminogo mitó minokago, ve vená mukí nene iki sii sii liki getatoka alegesá ikago, ánigoake vegená gíki akumule loko nagamikú lape makokú nene itimó. Iteko minake nene,

³anoza gakó haitopaitolímini lo kimimó. Lá noike, makó láa loko limó: Gilinahe. Zuha netá atilí oaká ve makó nenémo netá gihila nene atilí inogo vimó.

⁴ Víke mikuka atilí omo novigo nene, makó nene gapogú alemó zekago gaha namate ake ni asú amó.

⁵ Itó lugáa nene gehani amupiló mikasi lagasó netó lemekago, mikasi hána nomimó nenazo, goloakaláa golokago litá oko itiha,

⁶ ho nolake avagugu vizekago, luhusa hána nomigo osagava vizimó.

⁷ Itó gihila lugáa nene lilihámini luhusa nene mikasigú ha netó alemó zeake, goloko itekaha, lilihámo zetamó.

⁸ Itó lugáa nene mikasi lamanakú lemeko minake goloko iteake gihila lamaná zimó. Zava makototí nene gihila 100 nene zimó. Zava makototí nene gihila 60 zimó. Zava makototí nene gihila 30 zimó.

⁹ Lekeza lakagatagi minatamó neneta gakó imane gili vevesiki gililo.

Anoza gakokumú lo kimimómámini mogona

(Mak 4:10-12; Luk 8:9-10)

¹⁰ Gakó láa loko lo lemekago, izekipala zuha leza amatoka voko minunike geza nene anoza gakó nenémináa nanamú lo nokemene.

¹¹ Loko lokuko nene, eza láa loko lo limimó: Okulumalímini gasovaló minoakalímini asuguná gakó nene lekeza gilitave loko nene lonoimóza, lugáa keza gelemitave loko nene neve.

¹² * Makó keza monó nene vatí iki gizapa iki ali minata vegená nene áminaló nene miní ameko kemekiko minumuni lamaná utó o kiminogo ive. Itó makó keza monó nene lamaná iki gizapa amita vegená nene hanuvagó ale minune liki litamóza ipá oko alekiko nene hanuva minanigave.

¹³ Keza nene ánigatune liki ánigi-likí nivamóza, ánigi hehe lisá amave. Itó gilitune liki gilimi vaha vaha mogonáa nene gili vevesisá amave. Nenemú anoza gakó imane lo nokumuve.

¹⁴ * Lá okago Ómasímini agepagutí gakó loaká ve Isaiá alika utó iti netakumú lo ami gakó nenémo keitoka voko alekave. Ómasímo li gakó nene láa loko luhuva gizamóma neve:

Lakagatatuń giliakaláa nene hanuva gilitamóza, gili vevesaminigave.

Itó lokogómulatunú ánigiakaláa nene hanuva ánigatamóza, ma ánigi vevesaminigave.

¹⁵ Vegená mulusi imane niamó kigika nene hize lí oake kigika kii lo vimó niave. Itó kogómula nene liko vimó niave, itó kagata molamó niave. Nenemú netá matá hanuva ánigoakaláa hanuva nánigave. Itó kagatatuń geleakaláa hanuva nigeleve. Kigikatunú nene gili lamaná iki nene ma gilisá amave. Lá iiki kigika ali viligisá amanazo, neza nana oko kelémo lamaná itomó neve.

¹⁶ * Itó Ómasímo nónohá zelikimikago, lekelisi nene lokogómulatunú ánigi vevesiaké lakagatatuń gili lamaná iaká niave.

* **13:2:** Luk 5:1-3

* **13:12:** Mat 25:29; Mak 4:25; Luk 8:18, 19:26

* **13:14:** Isa 6:9-10

* **13:16:**

Luk 10:23-24

17 Neza lamaná lo likimotoze, gililo. Gozapá Ómasímini agepagutí gakó liaká ve mukí kezagi itó monó gele ve mukí kezagi nene oko moloko nou netá lekeza ániagiáká nia netáma ánígatune liki lamóza, ánígamamómá neve. Itó lekeza nene negepagutí gakó giliaká nia gakó gilitune liki lamóza, gele-mamómá neve.

*Zuha netakumú anoza gakolímini mogonáa
(Mak 4:13-20; Luk 8:11-15)*

18 Netá gihila atílí oakalímini mogona nene lo likimotoze, gililo.

19 Ómasímini gasovaló minoakalímini gakó giliiki gili vevesama vegenalite monó nene kigikagú milikago minamó nene golesa netá amelaho Satá nene netá gihilama aleko golisi vokiko netá gihila gapoló alemó zimó nenéminiki minanigave.

20 Itó gehani amupiló lemeko minamó nenéminiki minata vegená nene monó nigliki laga kivisekago giliaká niamóza,

21 kigikagú emane nene luhusa ale gilitamigo, gamena alínipa aliniko, monó gakó giliinakumule liki gopogu galatakatalá milikitata gamenaló nene litá iki ahulanigave.

22 Itó lilihagú limimó nenéminiki minata vegená nene monó giliakaláa hanuva gilitamóza, imane mikasiuka gena kepeleaká noi netá itó monimú lagaváa giliaká nia netá nenémo monó zemikago, keitoka gihiláa makó utó osá amive.

23 Itó mikasi lamanakú limimó nenéminiki minatamoláa monó giliiki gili vevesiki ali minata vegenatoka nene gihila zeaká noive. Makolititoka napa otigí zeaká noive, makolititoka mukí zeaká noive, makolititoka vauva aleko zeaká noive.

Lilihamú anoza gakó

24 Láa loko loake, anoza gakó makó láá loko lo limimó: Okulumalímini avogisaló iteaká mogonamú nene ve makolímo nene minagú laisi gihiláa atílí imó neneló ale moloko litoze.

25 Gihiláa atílí oake vokago nene, makó holugú nene vegená kovó aki asú iki akinago, gala veva nenémo aniteake laisi vogalaló minoake nene, liliha nene atílí oake vimó.

26 Lá okago laisi goloko iteakaláa goloko iteake, gihiláa nene nozigo, liliha makó nene ámináminoko goloko itimó.

27 Lá okago, izegipala zuha nenete iki láá liki li amemó: Gugulizaki velemaka, geza nene mikagú nene netá lamanaláa makó atílí animómá nemóza, liliha mukí nene nana oko itive.

28 Liki likago, eza nene gala ve makolímo onoitive loko lokago, keza voko lilihamasasutatupe liki likago nene,

29 eza láá loko nene limó: Óe, liliha nene asuti ahulatamóza, laisigi nene asutikatave.

30 Nenemú nene laisigi lilihagi hanuva minatize. Neiko nene, laisi ale moloaká gamenaló nene minumuni aliaká ve láá loko loketatove: Lekeza nivíki liliha nene apí iki gizaká iiki asapú ikiko lokú gizatunize. Itó laisima nene haitó gizaká iiki ale moloaká numúnegú milataze, loko limó.

*Masteti gihilamú anoza gakó
(Mak 4:30-32; Luk 13:18-19)*

31 Izesú nene anoza gakó láá loko lo limimó: Okulumalímini avogisaló vi hilata vegená keza nene masteti gihila nenéminiki niave.

32 Ámina netá nene zuha netá lugáagutí koma koma nemóza, ve makó nenémo ámina netá nene minagú atilí okago goloko iteko napa oake zamú mukí kivilegeko zagitana loló onoive. Lá okago, nama nenete anitiake nenémini izanaló nene numuni giaká niave.

Peleti lulu vizeaká netakumú anoza gakó

(Luk 13:20-21)

33 Anoza gakó makó láa loko lo limimó: Okulumalímini lapanató vo holoakaláa nene peleti lulu vizeaká netá nenéminoko neve. Vená makolímo ámina netá nene polisigi ali gopa okago hutilí okago peleti nene lulu vize napa oaká noive.

Izesú anoza gakolímini mogona lo kimimó

(Mak 4:33-34)

34 Vegená vaí iki alegesá ikago, Izesú eza gakó mukí imane lo kimimó nene anoza gakokutí nene lo kimimó. Gakó lo kiminogo noike anoza gakokutikó lo kemeaká imó.

35* Lá noigo, Ómasímini agepagutí gakó loaká ve makó nenémo gakó láa loko luhuva gizamó nene alevolé imó:

Negepagutí anoza gakokutí lo nokiminake mikasi emane utó amigo gakó halá geko minoloko voko minamó nene itína nene lo utó itove.

Lilihamú anoza gakolímini mogonáa lo utó imó

36 Izesú nene vegená ahulokimiakе numukú itekago, izegipala zuha leza laisi mikú liliha utó itímini mogona lokako gilitune loko loká omikuko,

37 Izesú láa loko limó: Gihila lamaná atilí i vemú lumó nene okulumakutí lumu ve gihila nezáinemú luve.

38 Minimú lumó nene mukí mikasiukamú luve. Itó netá gihila lamanakumú lumó nene Ómasímini lapaná alina vegenakumú luve. Lilihamú lumó nene netá golesa amelaho Satani vegenala zuhamú luve.

39 Gala ve aniteake netá golesa atilí i vemú lumó nene Satakumú luve. Laisi ale moloaká gamenaló minumuni aliaká vemú lumó nene, mikasiuka netá asú iti gamenaló nene hozaló ve keza hoza alitakumú luve.

40 Liliha nene asutiiki lokú gizamó nene ámináminoko mikasiuka netá asú iti gamenaló nene

41 okulumakutí lumu ve gihila neza nene agelóne kimiselekugo, není gizapaló vegenáne zuha niakutí kilími gohá iaká nia vegená itó golesa netá aliaká nia vegená gizaká iki kilími nupa iiki

42 ló napagú ali ahulikimikiko liminigave. Neneloka limuki miniki ive nama iki miluma maluma gilikí kegepa atálá iki minanigave.

43 Itó hee liki minamoláa keza nene améipini avogisaló nene ho nenémini iki lapanainigi minanigave. Lá onoize, lekeza lakagatagi minatamó neneta gakó imane gili vevesiki gililo.

Helisa netakumú anoza gakó

44 Okulumalímini lapanató iteakalímini meinava lá oko neve. Helisa netá makó nene za zuhagu minatímó nene etó oko apazá neiko nene, ve makó nenémo voko ánígokoko nene goha ale halá gekoko agoliza vizeko voko ezáa moni henokanona nene salimi asú okoko moni aleoko ámina za zuhama meina hizeko alinogo ive.

* 13:35: Age 78:2

Lulukumú anoza gakó

45 Okulumakú iteakalímini meinaváa lá oko neve. Ve makó nenémo lulú makó meinava iteko mina netakumú nene vitagá oloko vike nene

46 hozavagú molokiko neiko, lulú makó meinava iteko noitimó nene ale utó okoko nene ezáa moni henokanona salimi asú okoko moni aleoko ámina netá nene meina hizeko alinogo ive.

Lagaha gotahamú anoza gakó

47 Okulumalímini lapanató iteaká gapováa nene lagaha gotaha nenémini oko nene neve. Vegená keza lagaha gotaha nene age nagamikú ahulikago lemeake lagaha nene haitopaitolímini nene aleáká noive.

48 Gotaha nene vaí okago, gelelehá iki ali getatoka iake minake nene, noakalímini nene lapegu ali milimili iaká niave. Namoakalímini nene ali etó iki ahuliaká niave.

49 Mikasi gamenava asú iti zupa nene ageló nenete áminámini inigave. Ageló nenete numutó namató vetini holukutí vegená golesa gizaká iiki

50 lokú nene ali ahulikitangave. Neneloka miniki ive nama iki miluma maluma gili ki kegepa atalá iki minanigave.

Litaha monokutí itó gosohá monokutí ale utó oaká gakó

51 Izesú láa loko lo leme asú oake nene, láa loko loká oletamó: Lekeza nene mukitoka gakó imane gili asú inahe. Loko lokago, leza mota gele asú onoune

52 loko lokuko, eza láa loko limó: Ve makolímo aí henoni litahagutí itó gosohakutí gona moloko aí vegenala zuha kemeaká noimómáminiki monó mogona apí ikimiaká a ve lugáa keza okulumalímini lapanalímini mututoni lili nia vegená nenete Ómasímini litaha monolímini agikagutí itó gosohá monolímini agikagutí ali utó itamó neve.

Nasalete apatoka Izesuni ánigi ahulamó

(Mak 6:1-6; Luk 4:16-30)

53 Izesú nene anoza gakó haitopaitolímini láa loko lo leme asú oake nene, ámina numuni apá ahuloake

54 ezáa gotó apalaloka vo anitimó. Vo aniteake monó numukú iteake monó lo kimimó. Monó gakó nene avetó oko lo kemekago, giliake sigaga sagaga litake láa liki lamó: Ve imanémo gele vevesoakaláa nene hikutí alive. Itó alévolé suni aleaká noimómave.

55 Leza aí mogonáa gelenounize. Áisi nene kapetamámini gipalama noive. Itó izolahini agulizá nene Maliáma neve. Itó agunamotamolatini kugulizáini nene Zemusiki Zoseheki itó Saimon itó Zutá nene agunamotamola niave.

56 Itó mohó agunala kezagi imaneló miniki aliki iaká nianazo, áisi lezagita ve noimóza, áisi nene haitopaitó suni nana oko aleaká noive.

57* Liki liake aikumú gelemó nene gena okago, aí nene ali letivi iki likago, Izesú láa loko lo kimimó: Ómasímini agepagutí gakó liaká vetini kugulizá nene numutó namató puu loko vitimóza, kezáini gotó apatokagi numúikukagi kezáini kugulizá nomitive, loko limó.

58 Ámina apató vegená keza nene gili alévolé amamó nenazo, Izesú nene alévolé suni mukí neneló ale utó amimó.

* 13:57: Zon 4:44

14

*Monó nagamí holokimiaká ve Zoní hili gakó
(Mak 6:14-29; Luk 3:19-20; 9:7-9)*

1 Gamená nene zupa agulizaki ve napa Heloté nene Izesuni gakoláa likago gilimó.

2 Geleake nene, gelekelé izegipala nene láa loko lo kimimó: Zoní monó nagamí holokimiaká ve áisi nene hilimómagutí oteake imane zámuza nene netá haitolímini ale utó oake noihe loko limó.

3 Nene hanuva lamimó. Heloté nene amunaloka emane uvolaho Piliponi vená agulizáa nene Helotiasini ipá oko alimó.

4 * Lá okago, Zoní nene Heloteni nene uvokahini vená ipá oko alenimó nene etamive. Loko lo ame-ame oloko vokago, Heloté nene venalámo gala vizekago ve makó kimiselekago vake Zonini agizató aliake nagá numukú ahulitamó.

5 Mukí vegenalite Zonikumú nene Ómasímini agepagutí gakó loaká ve noive liki liaká amó nenazo, Heloté nene Zonini apilitomó nene Ómasímo nana onetatihe loko ahelele vizekago ahulamó.

6 Lá imóza, Heloteni nene geta gamena alitokago mukí kugulizaki ve aí numukú nene iki alegesá amó. Alegesá iki niágó, Helotiasini mohola nenémo kovogisaló melekeni noigo, Heloté nene ánígo amu heleake,

7 láa loko limó: Neza nene Ómasímini avogisaló lo hukoko noluve. Geza nemú manamú nivisive loko litani netá hanuva giminogo uve.

8 Loko lokago nene, izolahlo lo amekago láa loko limó: Monó nagamí holokimiaká ve Zonini luvana nene hutoko lapegú moloko nemekako ánígokinake mota helekave loko litove loko noluve.

9 Loko lokago nene, agulizaki vémo agepa gahava nomigo gilimó gena imóza, Ómasímini avogisaló lo hukokumóma nenazo itó alesa molokugo iki mina vegenalitini kovogisaló imane lo hukokunazo loake, gele ameake, gopa nene pilisi ve makó voko luvana hutoko alekative loko lomikago,

10 vike nagá numukú nene luvana hutoake gotola gitegeko nene

11 lapegú moloake mohóma amekago, moholámo aleko vike izolahini alemo amimó.

12 Alemo amekago nene, Zonini izegipala zuha nenete ámina gakoláa nene giliake vake gonosiváa gale zemó. Gale ziake, ámina gakó nene Izesuni avetó iki li amemó.

*Ve 5 taußen nosánetá kemeko namó
(Mak 6:31-44; Luk 9:10-17; Zon 6:1-13)*

13 Li amikago, geleake ámina apá ahuloake izegipala zuhagegi nagamikú lapegú itekunike vola helegaloka mikasi gomopalaló vo anitehá. Lá okuko, vegená mukí keza giliake, numuni apáini ahuliake mikasigú ámegetiki vamó.

14 Lá ikago, Izesú nene lapegutí olío lemeko ánígamó nene, vaí iki alegesá ikago ánígoake, agika hizekago kivisi vegená nene kelémo zokamó.

15 Lá okago, únaká ho lemekago, izegipala zuha leza aitoka unike láa loko lo amunimó: Imane apá nene ha gámetó minokaze, itó gamena mota asú okaze, vegenáma apá makotoka makotoka viiki nosánetáini meina hitzavate loko kimiselemane.

16 Loko lo amekuko, Izesú láa loko lo limimó: Nanamú vitave. Lekezatini nene nosánetá kimiki nalo.

* **14:4:** Liv 18:16, 20:21

¹⁷ Loko lokago, leza íí, peleti 5-a itó lagaha lositakó imane molonouhá lae.

¹⁸ Loko lokuko, Izesú láa loko limó: Nene aliki nenitoka alo.

¹⁹ Loko lo lemeake, vegená keza gihisiló minatave loko lolimiake, peleti 5-agí itó lagaha lositaki aleake, okulumatoka okenava oko nánigake, Ómasi agepoka loake, peleti gitegeko lemekago, leza vegená mukí gona moloko kemehá.

²⁰ Kemekuko, mukilite nikake kagatupa okago nosánetá lumáa ali nupa iki gosúveha 12 vaí okago ali milamó.

²¹ Nosánetá na véa 5000 nenéminiki minamó. Vená izegipáini nene gata-mune.

Izesú nagamí amupiló liso liso vimó (Mak 6:45-52; Zon 6:15-21)

²² Lá okago, Izesú ezáa nene vegená nokimisilike izegipala zuhama sipigú itiiki vola helegaloka goí iki vitave loko loletamó. Lolumikago novuko nene,

²³ vegená kimisele asú oake ezágó agoka makokú iteko minake Ómasiloka loko minamó. Lá noigo,

²⁴ límugusi zekago akovevé loló okago nene, izegipala zuha leza sipigú volo volo nonohuló holutó novuko logómulalokatí nene una napa aleko ake lehelú inogo igo, nagamí nenémo valahuká zeko lelémo ligitagani imó.

²⁵ Lá noigo, gokululuva notovoigo, Izesú nene nonohuló amupiló liso liso vike vo alí noligo,

²⁶ izegipala zuha leza ánígokunike, holosi noahe oko lehelele vizekago, gopaga lunimó.

²⁷ Gopaga lokuko, Izesú litá oko láa loko limó: Lekelegesá legemino. Nezamá nouve. Mulutini lepa hizino.

²⁸ Loko lokago, Pitá nene láa loko limó: Guivahanitemaka, géisi noitanimó nene lokako nagamí amupiló imane lisokinake géisi noanitoka vitohe.

²⁹ Loko lokago amane loko lokago, Pitá nene sipigutí olío lemeake, Izesú noító nene apí oko nagamí amupiló liso liso vimó.

³⁰ Liso liso novigo, una nalikumú geleake alegesá legekago, nagamikú velehé liminogo noike, Guivahaníinemaka nelémo nugutó vizemané loko gopaga lokago,

³¹ Izesú litá oko agizani lutoko nanukike láa loko lo amimó: Geza komáisí nenikumú gele alévolé anitika, nanamú gagata losi gelenimó neve.

³² Loko loake, sipigú goha itikasigo, una nene asú imó.

³³ Asú okago, sipigú makó minuhá ve leza Izesuni gupá ze ameko geza lamaná Ómasímini gipala noane, loko lunimó.

Genesalete apatoka Izesú kivisi vegená kelémó zokamó (Mak 6:53-56)

³⁴ Loko lunike, vola helegaloka Genesalete apakú vo anitunimó.

³⁵ Nagamí nonohuló agataloka getatoka nene itekuko, vegená keza Izesuni ánígi vevesiaka Izesuteho mota okave liki numuni apá alitoka gakoláa ahulikago, vegená keza giliakte kivisi vegená Izesutoka kilímiki amó. Kilímiki ake

³⁶ kivisi vegená imane nene gele kemekako, gugupeló ahe itó hanuva luhoáak gó gahevalokahe imane ali giliiki nene zokatave, liki negénegeka likago, áminámini niake ale gele vegená nene zoki asú amó.

15

Avóike apí a mogonatagana (Mak 7:1-13)

1 Gamená nene zupa Zelusalegatí Palisaio monó ve itó monó mogona apí ikimiaká a ve lugáa kezagi Izesutoka ake láa liki loká itamó:

2 Izegipaka zuha keza avotegini mogonatagana ali minamake nanamú ahulikave. Nosánetá natune liki ligika ale golotuva loaká suni aliki kigizani nene nagamí zemave.

3 Liki likago, Izesú láa loko lo kimimó: Lekelisi nanamú avotikini gakóini gili alinigi Ómasímo lo hukoleketa gakó avutá iaká niave.

4* Ómasímo láa loko lonoimóma neve: Izokahiko amekahiko kugulizá ale otezo. Itó makó nene láa loko lonoimóma neve: Makó eza nene izolahiko amelahiko usi vízekimiaká gakó lo kimitimó nene, apele hilitunize.

5 Lá onoimóza, lekeza nene láa liki liaká niave: Makó eza nene izolahiko amelahiko hize lé oketanogo lonou netáma mota Ómasímini amekuve,

6 liki liake nene izotikini ametikini nasahilí ikitata gapo hizi lí iaká niave. Itó lekeza lá iake, Ómasímini gakó nene vasá ziake lekezatini avotikini gakó alévolé iki ali miniaká niave.

7 Genezatini lositaki neneta Isaiá alika utó iti netakumú gakó láa loko limó nene, lamaná lekelikumú lonoimóma neve. Ómasímo li gakó nene láa loko luhuva gizonoiomóma neve:

8* Vegená mulusi imane nene kegepatunukó nugulizá ali otiaká niamóza, kigika nenitoka mili gíminizinamake mili hotó inave.

9 Vegenalitini gakó nene není gakokitana okago li kimi-kimi iki miniaká niake, soza miliki gupá zi nimiaká niave.

Ligika ale gopa oaká netá (Mak 7:14-23)

10 Izesú nene láa loko lo kemeake vegená lugáa mukí sele lo kemekago, aitoka ikago, láa loko lo kimimó: Neza gakó lo likimitoze. Gili vevesiki gililo.

11 Ni mikilí ikago lakagatupagú lemeaká noi netá nenémo likigika ale golotuva lamitimó neve. Lekegepagutí emane ititi netalímo likigika ale golotuva litimó neve.

12 Loko lo kemekago, izegipala zuha leza amatoka voko láa loko lunimó: Geza nene Palisaio monó ve imane gakó lo kemekako gili golesa ikave. Gili golesa amó nene mota gelenape.

13 Loko lokuko, Izesú eza anoza gakó láa loko lo limimó: Za nene okulumakú améneho zuhá amigo hanuva goloko itimoláa nene áisi asutoko luhusagi ale ahulanogo ive.

14* Lá onoinazo, lekeza ahulikimikiko minino. Palisaio monó ve nene kogómula lika mola végítana niave. Agómula lika ve makolímo agómula lika ve makó nene gapo alapizithe. Kogómula lika ve losi nenetosa eza agizató aliko eza agizató aliko iiki vitáimó nene losiló galegú hilanigasive.

15 Loko lokago, Pitá láa loko lo amimó: Geza nene anoza gakó itínasa lanimómámini mogonáa lo utó okako gilitune.

16 Loko lokago, Izesú láa loko limó: Íi, lekelisi nene áminagó iki lakagata velesá kolosamimó niahe.

* **15:4:** Gá 20:12; Gapo 5:16; Gá 21:17; Liv 20:9 * **15:8:** Isa 29:13 * **15:14:** Luk 6:39

17 Mogonáa gili vevesamahe. Lekegepatunú nosánetá nikago aselikú nene lemeake nene eza gapová voaká noive.

18 * Itó lekegepagutí iteaká noimó nenémo likigikagutí utó oake lekemeni ale golotuva loaká noive.

19 Vegená likigikagutí iteaká noi netá nene lá oko neve: Golesa lakagata geleká, itó vegená kepele heleaká, ve vená huki ezega emega oaká, mokoló mogona, gumina, soza, kemegeka loaká, nene.

20 Neta nenémináamo lekemeni alémo golesa oaká noive. Ligizani nagamí zemunike noaká nouhá nenémo lemeni ale golotuva losá amive.

*Kenan mikasiukatí hetoka mina venalímo gele alévolé imó
(Mak 7:24-30)*

21 Loko loake, Izesuki makó vunike mikasi ahuloko Tulo numutoka itó Sitona numutoka apá agilikaloka voko nouko nene,

22 Kenan mikasiukatí hetoka mina vená makó nene aitoka noake gamoga geko lúa loko limó: Guivahanínemaka, geza Tevitini agávolagamaka golesa netakutí gologí oletataní velemaka, milumaváne gelenetamane. Holosi golesa makolimo mohónémimi agikagú minoake alémo gopa napa okago noinae.

23 Loko lokago, Izesú nene geletigí gelemotigí oake novigo nene, izegipala zuha leza venáimanémo negénegeka lomo lémegetoko amó goselé ovize. Geza nene amiselekako vitihó.

24 Loko lokuko, Izesú lúa loko lo limimó: Neza nene Isilae vegená vi tolava inakutí kelémo vatí itane lokogó nimiselekago lumumóma nena.

25 Loko lokago, venánenémo litáoko amatoka oko agisauka gupá nozike lúa loko limó: Guivahanínemaka, geza nelémo vatí amane.

26 Loko lokago, Izesú nene Isilae vegenalite Ómasímimi lusa goí iki ali alitakumú geleneikeanoza gakó lúa loko lo amike limó: Izegipatini nosánetá nene ipáoko galatini kegepagú ahuloakaláa nomive.

27 Loko lokago, hetoka venánenémo Isilae vegenakó negopa, ezagi Ómasímimi lusa ale alitakumú geleneike lúa loko limó: Guivahanínemaka, nene lamaná lokanimóza, neza litoze. Gala amelage nene nosánetá ninago lanáa koma alemó zimó nene galate gopa niaká niamole.

28 Loko lokago, Izesú lúa loko limó: Geza nene gigika ma nego lokanize. Nenemú nene lani netáutó ogetanogo ive. Loko lokago nene, ámina game-nalóisí mohola nene zokoko lamaná imó.

Izesú vegená mukí kelémo zokamó

29 Lá oake Izesú nene numuni apáma ahuloake goha atigináoko vike Galilaia nonohulotoka aniteake zopega makokú iteko minamó.

30 Iteko noigo, vegená mulusi haitopaitolíminiki alegesá amó. Iki alegesá amó nene kigisáló alimó kogómulaaló alimó itó lilikupá gepili nuvane itó gakó lamamó negi ve itó kivisi vegená mukí kilímiki iki Izesuni agisauka kilími nupa ikago kelémo zoko asú imó.

31 Lá okago, gakó lama vegená nene kegepa alémo vávani okago gakó lamó, itó kigisa kigizani nakeseta vegená nene kelémo lamaná okago lamaná iki minamó, itó kigisáló alimó nene lisi pehe liake otiki vamó. Itó kogómulaaló ali vegená nene kogómula ale goloutokimikago kogómula ánigamó. Lá iki minago vegená mukí keza sigaga lake leza Isilae vegenalitini Ómasite napa noive liki agepoka lamó.

Ve 4 tausen nosánetá kemeko namó
(Mak 8:1-10)

32 Lá okago, Izesú nene izegipala zuhama sele lo lemekago, aitoka okuko, lá loko lo limimó: Vegená mukí imane nosánetá namake nenitoka nene gamena losive makole minikago milumaváini gelekuze. Itó itína gaúna hiliki niko, kimiselekugo, numúitoka niviko gapoló kovonana vizekatihé loko nenemú nagata gulugo gena nivisekave.

33 Loko lokago mikasi gomopalaló nouninazo, vegená imane nosánetá nene hikutí ale utó oko kemeko nature.

34 Loko lokuko, Izesú loká oletake lekelitoka peleti nanakí neve. Loko lokago, leza nene peleti 7-a, itó lagaha koma luguhákó ma neve.

35 Loko lokuko, áminama aliki alo loake nene aleko okuko, Izesú nene vegená muki mikasiló minalo loko lolimiake,

36 peletigi lagahagi aleake, Ómasi agepoka loake, gitegeko lemekago, leza vegená gona moloko kemekuko namó.

37 Niki niki kagatupa ikago, nosánetá lumáa minamó ali nupa iki gosúveha nene 7-a vaí okago ali milamó.

38 Nosánetá na ve nene 4000 nenéminiki minake namó. Vená izegipáini ma gatamune.

39 Lá okago Izesú nene ámina vegená kimisele ahulokago, nivago, sipigú makó itunike Magatana mikasiuka vola helegaloka vo anitunimó.

16

Alévolé suni ánigatune liki lamó
(Mak 8:11-13; Luk 12:54-56)

1* Palisaio monó vegi itó Satukaio monó vegi keza Izesutoka iake gimivagú molatune liki loká itake láa liki lamó: Geza nene Ómasilokatí alévolé suni makó ale utó okako geí mogona ánigatune.

2 Liki likago, eza láa loko lo kimimó: Lekeza nene límugusi zinogo noigo guhizakó ánigiake azo ho latimó neve, liki liaká niave.

3 Itó gó lokago gó nohitago nene golini zitimó neve liki liaká niave. Itó lekelisi nene okulumató ánigiake nenémini mogona gona miliki giliaká niamóza, itína gamenaló oko moloko oaká noutímíni mogonamú nene ma gili lamaná amake hanuva miniaká niave.

4* Imane gamenaló nia vegená lekelisi nene ve golesave itó monó nene gili ahuliaká vegená niave. Lekelisi nene alévolé suni ale utó okugo ániganigi giliaké nilahe. Lekelisi nene haitó suni makó ale utó ugo ániganigave. Gozapá monó loaká ve Zoná nene gamena losive makole oko vokago heleaká gapogutí otí sunigitana makó nenitoka utó iko nenegó ániganigave, loko lo kemeake ahulokimiakte vimó.

Palisaio monó vegi Satukaio monó vegi keí mogonataganá
(Mak 8:14-21)

5 Itó izegipala zuha leza nene peleti makó aleko vitunikumú lagatí molokago ahulunike sipigú makó itunike nonohuló avilegekunike ima helegaloka oko anitechá.

* **16:1:** Mat 12:38; Luk 11:16 * **16:4:** Mat 12:39; Luk 11:29

6 * Oko anitekuko, Izesú nene anoza gakokú láa loko lo limimó: Lekeza nene Palisaio monó vegi itó Satukaio monó vegi keí lulu vizeaká netalímo lekepelekatize, ehe.

7 Loko lo lemekago, peletímini lulu vizeaká netakumú lihe loko lezatelo ka logele hagele unike peleti nene ahulokoko unikumú nene gakó lo nolimize.

8 Loko luni gakó nene agataló holokago geleake láa loko lo limimó: Agae, lekeza komáisí gili alévolé amó neneta, peleti ahulokoko unikumú nolive liki nanamú mulutini itekago lekezatitoka ligili hagili niave.

9 * Neza nene alévolé suni aleko nosánetá hanuva ale utó oleketatomómámini mogonáa velesá gili hee lamahe. Neza ve 5 tausenimú peleti 5-a gitegeko kemekugo, niaké kagatupa okago lumáa ahulikago gosúveha 12 nene vaí okago aleve. Nenemú lakagatí molokago nilahe.

10 * Itó vegená nene 4 tausen keikumú peleti ligizani lugaloka losi olío molago kemekugo, nikake kagatupa okago, lumáa nene gizaká iki ali milamóma nene gosúveháa 7 ali milamó neve. Nenegi lakagatí molokago nilahe.

11 Leza nene peletimú lo lemenape liki lekeza nene není mogonamú nanamú gili vevesamave. Palisaio monó vegi Satukaio monó vegi keí lulu vizeaká netalímo lekepelekatize, ehe.

12 Loko gakó nene lo lemekago, nelén nene gele vevesunimó. Gele vevesunike nene, peletímini lulu vizeaká netakumukopa, Palisaiote itó Satukaiote soza monó liaká akumú nene lokave loko nene gulunimó.

Pítá Izesuni mogonamú lo utó imó

(Mak 8:27-30; Luk 9:18-21)

13 Izesú nene Sisalia mikasiuka agulizaki ve Piliponi agulizató apá nene agilikaloka voko noike, izegipala zuha nene láa loko loká oletake limó: Vegená keza nene okulumakutí lumu ve gihila nenikumú nene éahove liaká niave.

14 * Loko lokago nene, vegená lugáa nenete Zoní monó nagamí holokimíaká vema noane liki liaká niave. Itó lugáa nenete Ilaizá gozapá okulumakú iti vema noane liki nilago, lugáa nenete Ómasímini agepagutí gakó loaká ve Zelemiá ahe itó Ómasímini agepagutí gakó loaká ve makó gozapá minamokitana noane liki liaká niave.

15 Loko lo amekuko nene, itó lekelisia nene nenikumú éahove liki liaká niave.

16 * Loko loká olimikago nene, Saimon Pítá nene láa loko limó: Geza gologí oletatane loko lo moleta vema alévolé Ómasímini gipala nene noane.

17 Loko lokago, Izesú nene láa loko lo amimó: Zonaní gipala Saimoga, gei gakó nene gelekugo gogoliza novizenimó geleaká noive. Vegenalite ma li gimikago lamane. Okulumakú améneho nene gelémo vávani igo lokanize.

18 Nenemú lo gimitoze, gelezo. Geza gugulizaka nene Pítá noane. Itó lelí gakokutí nene gasova gehanímo. Itó nénisi nene ámina gasova gehanímámini amupiló nene monó ali amegesa milina vegená kelémo nupa okoko ahulokimíkugo meikú hilatatímíni zámuzáa nenémo ma kelémo amunauka aminogo ive.

19 * Itó nénisi nene okulumalímini lapanató vi hilatatímíni kiiláa giminogo uve. Itó geza nene mikasiuka netá makokumú lo hoipa oketatanimó nene

* **16:6:** Luk 12:1 * **16:9:** Mat 14:17-21 * **16:10:** Mat 15:34-38 * **16:14:** Mat 14:1-2; Mak 6:14-15;
Luk 9:7-8 * **16:16:** Zon 6:68-69 * **16:19:** Mat 18:18; Zon 20:23

Ómasímo okulumakukagi ámina netakumú lo hoipa oketanogo ive. Itó mikasiuka netá makokumú lo hoipa oketamitanimó nene Ómasímo okulumakukagi ámina netakumú lo hoipa oketamitimó neve.

²⁰ Loko loake, izegipala zuhama nene lagata alike alévolé oko lo limimó: Neza gogó oleketative loko lo mololeketa vema noumóza, nene gakó nene vegéná keké li kememilo, loko limó.

*Izesú ezáa alika hiliti gamenamú lo kimimó
(Mak 8:31-9:1; Luk 9:22-27)*

²¹ Gamena nene zupa Izesú nene apí oake minomo vike netá matá aitoka utó iti gakó nene izegipala zuha láa loko lo limimó: Zelusalega itekugo nene, monó gizapa ve itó guguni giziaká ve itó monó mogona apí ikimiaká vete miluma netá mukí nimiiki nipili hilikiko, gamena losive makole minokinake goha otinogo uve.

²² Nene gakó lo leme asú okago, Pitá nene Izesuni alémo apazá zeake géneka loko gahá amike láa loko limó: Guivahaníinemaka, Ómasímo asega zegeto-loko noviko nenémini suni nene geí gumupiló utó aminogo ive.

²³ Loko lokago, Izesú viligoko Pitani láa loko lo amimó: Satani gakó lanitika, géisi nene mino olové amane. Není gapo hize lí itani gakó lokane. Gakó nene lokanimóza Ómasímini gakó lamanike ha vegenalitini kigikagutí gakó aleko lokane.

^{24*} Loko loake, gamena nene zupa Izesú izegipala zuhama miní ameko láa loko lo limimó: Vegená makó nenete není némegetoko vitune liki niglikkima nene, kugupémo giliti netá gili ahuliiki zohota zaló kipili hilinigi miluma netá ali gihikitatakumú gili zagiiki némegetiki ataze.

^{25*} Makó keza nene kigika kemeníini aliki amánapa iki minata vegená nene kigika kemeni gopa inogo ive. Itó makó keza nenikumule liki kigika kemeni viñasatamó nene alévolé kemetameni alinigave.

²⁶ Makó keza nene mikasi amupiló ne netá ali asú iiki itó kezáini kigika kemeni gopa okoko tolova itimó nene ámina mikasigú henoni nenémo nana oko kelémo lamaná itive. Itó kigika kemeni nene nana nana iki meina hiziki goha alitamó neve. Nenéminoko nomive.

^{27*} Okulumakutí lumu ve gihila neza aménehini lapaná nenémo numupiló itekiko, agelova mukí nene kelémoko lemekinake vegená mukí mikasigú iki miliki iaká niamó nenémini ago helegáa lihima kimitomó neve.

²⁸ Neza lamaná lo likimitoze, gililo. Lekelisi ató nene nia vegená lekelikutí nene lugáa makó hili asú inamiki ha niko okulumakutí lumu ve gihila neza liminake agulizaki vetini loló oleketatomómámini zámuza nene lamaná oko utó okiko lekelisi ániganigave, loko limó.

17

*Izesuni agupe haitolímíni imó
(Mak 9:2-13; Luk 9:28-36)*

^{1*} Izesú hoza gamena 6-a minomo noitike Pitani Zemusini itó Zemusini agunala Zoninigi kelémoko kezáikó agoka hána makokú itemó.

* ^{16:24:} Mat 10:38; Luk 14:27 * ^{16:25:} Mat 10:39; Luk 17:33; Zon 12:25 * ^{16:27:} Mat 25:31; Age 62:12; Lom 2:6 * ^{17:1:} 2 Pit 1:17-18

² Neneloka itiake kogómulałó nene Izesú haitó agupe ale luhamó. Okulumakú agupe ale luhoake nego, agoka agepa nenémo ho silikakéna nenéminoko noigo, goláa nenémo gízopa vae vae loko minamó.

³ Lá okago, Ómasímini agepagutí gakó emane amunaló liaká asi ve Ilaizako Moseko nene utó i kimikasigo, keza Izesugegi gakó ligili hagili amó.

⁴ Ligili hagili ikago, ániaki, Pitá nene Izesuni láa loko lo amimó: Guivahanitemaka, imaneloka minuhá laga okaze. Nenemú gelekakó nene imaneló gaizopa losive makole geleketatunize, makó geile, makó Ilaizanive, makó Mosenive.

⁵* Loko noli agepagi límusi saheheváa nene lemeko ze hitokimikago, límusigutí Ómasímo láa loko limó: Imane nigika amenou gipáne noimó nene ánígo numu helekuze, lekeza nene gakoláa gili alilo.

⁶ Loko lokago, izegipala zuha keza nene mikasigú kogoka hiziki akiak kehelele vizekago, kigisa kigizakutí nene guli guli oko minamó.

⁷ Lá niago Izesú nene volo kugupeloka ale nogilike láa loko limó: Leklegesá legemiko otemave.

⁸ Loko lokago, otiki ánígamó nene Izesú ezáagó noigo ánígamó.

⁹ Ániaki, Izesugegi agokagutí nilemeke Izesú láa loko lo kimimó: Agokaló lekeza netá matá ánígamó nene vegéná litá iki avetó iki li kememilo. Nénisi okulumakutí lumu ve gihila heleneitokutí iteko vokugo li kimitaze.

¹⁰* Loko lokago keza láa liki loká itake lamó: Gologí oletati vema anitemigo Ilaizá goí oko anititive liki monó mogona apí ikimiaká ve nenete nanamú liaká niave.

¹¹ Liki likago nene eza láa loko limó: Ilaizá goí oko aniteko netá matá mukí ale vavá itive liki lamaná linamóza,

¹²* neza lo likimotoze, gililo. Ilaizakitana noi vema mota anitekamóza, ániyi vevesamake kezáini kagata gele netá golesa lilí itiki minamó. Keza ámináminiki okulumakutí lumu ve gihila není nene miluma netá niminigave.

¹³ Loko Ilaizakitana vemú limó nene monó nagamí holokimiaká ve Zonikumú nolinae liki gelemó.

Izesú holosi golesagi mina gipa alémo zokamó (Mak 9:14-29; Luk 9:37-43)

¹⁴ Lá iake, agokagutí limiake vegéná mukí niatoka ikago nene, ve makolímó ake Izesuni amatoka alapusa hizike láa loko limó:

¹⁵ Guivahaníinemaka, gipánemú nene milumaváne gelemane. Eza negi hizeake seholovala veleake minake, lokú ahe itó nagamikú ahe lemeko pou loko akoaká noive.

¹⁶ Izegipaka zuhate alími zokatahe loko keitoka alémoko vumóza, lá imi vaha vaha alími zokamave.

¹⁷ Loko lokago, Izesú láa loko limó: Lekeza ató imane gili alévolé amake mulutikú amanapa iki minamó neneta lekelikumú goselé nepelekave. Lekezagí gamena gamena minoloko voko mininake nene lokogohí gehekogó minatohe. Loko loake nene, izegipama nene nénisi noutoka alímiki alo.

¹⁸ Loko lokago, alímiki ikago, Izesú nene ámina holosi nene gahá amekago ahulomioko vimó. Vokago, izegipama ámina gamenalóisí lamaná okago nene,

* ^{17:5:} Apí 22:2; Age 2:7; Isa 42:1; Mat 3:17, 12:18; Mak 1:11; Luk 3:22; Gapo 18:15 * ^{17:10:} Mal 4:5

* ^{17:12:} Mat 11:14

19 izegipala zuha lezategó Izesuki makó minunike loká otoko leza nene holosima nanamú apeleko amiselemuháma neve.

20-21 * Loko lokuko, láa loko lo limimó: Lekelisi nene gele alévolé oakatini nene alinipa minokago lá amave. Lamaná lo likimitoze, gililo. Lekelisi gili alévolé niamó nenémo komá netá netimóza, masteti gihila komamámo goloko iteko napa napa oaká noimómáminoko amuzavagi netimó nene, agoka imane mino olové ozo liki litamó nene hanuva mino olové itimó neve. Itó lekelisi nene netá makó lili amitatiiminoko nomive, loko limó.

*Izesú ezáa alika hiliti gamenamú goha lo kimimó
(Mak 9:30-32; Luk 9:43-45)*

22 Koma minomo noiteko izegipala zuha lelémoko vike Galilaia mikasigú vo aniteake nene Izesú láa loko lo limimó: Okulumakutí lumu ve gihila neza nene mini háná amiki vegentalitini kigizakú nilími milikiko,

23 nipili hilitamóza, gamena losive makole minokinake heleneitokutí goha otinogo uve. Loko lo lemekago, izegipala zuha leza mulute gitihiná imó.

Monó zagusavémini takisi moni ahuloaká gakó

24 * Minoko nene Kapanao numutoka atiginá oko vokuko, monó zagusavémini takisi aliaká a ve nenete Pitani amatoka vake loká itake láa liki lamó: Monó tisatini nenémo monó zagusavémini takisi moni ahuloaká noihe.

25 Liki likago, Pitá nene nana ive. Moloaká noimole. Láa loake, numunagú iteko gakó nene Izesuni velesá lo amenamigo, Izesú loká otake láa loko limó: Saimoga, geza nanave loko nogelene. Imane mikasigú kugulizaki véinite hí vegenantokatí takisi moni aliaká niave. Kezáini vegénaini zuhalokatí aliaká niahe itó gutá a vegenantokatí aliaká niave.

26 Loko lokago, Pitá nene gutá a vegenantokatí aliaká niave loko lokago nene, Izesú láa loko lo amimó: Láa lokoma mikasi amelage kugupe meina hizemiki hanuva minataze.

27 Itó neza ámina monó numuni napámíni amelaho nounazo, ámina takisi moni ahulamoko ha minatomóza, keza nene lelikumú gilikiko golesa okatize. Nenemú geza nonohulokú lemeko lagaha aleaká nagá nene nagamí nonohulokú ahulo molokoko lagaha ganá alitanimoláa nene gelelehá o veletoka okoko agepa ale á oko ánigozo. Lagahamámini agepagú nene moni neko ánigoko alekokoma gezagi nezagi lugupe meina hizitii moni aleko voko kemezo, loko limó.

18

*Vegená mukikutí éaho livilegeko noive
(Mak 9:33-37; Luk 9:46-48)*

1 * Gakó láa loko lo limi zupahé nene izegipala zuha leza Izesutoka vunike láa loko loká otunimó: Ómasímo agulizaki ve napa ale utó o limikiko nene lelikutí éaho livilegeko agulizaki ve loló itimó neve.

2 Loko lokuko, Izesú izegipa koma makó sele loko alémoko ake holutegú hize otemiaké

3 * láa loko limó: Neza lamaná lo likimitoze, gililo. Lekelisi nene likigika ali viligiiki aliliiki limiki izegipa koma imanéminiki minamitamó nene Ómasímini avogisaló nene keké ma vaminigave.

* **17:20-21:** Mat 21:21; Mak 11:23; 1 Koli 13:2 * **17:24:** Gá 30:13, 38:26 * **18:1:** Luk 22:24 * **18:3:** Mak 10:15; Luk 18:17

⁴ Makó keza nene izegipa koma imanéminiki kezánimú gilikiko lemeko minatimó nenete Ómasímini avogisaló viki kugulizaki ve lili itamó neve.

⁵ Ve makó nenete nenikumule liki izegipa koma áimanéminiki nasahilí itatamó nenete není nasahilí inimiaká niámó gelekave.

*Golesa netakumú gala vizeaká gakó
(Mak 9:42-48; Luk 17:1-2)*

⁶ Itó nenikumú gili alévolé i mina izegipáne limiki minamoki keikutí hamó nene ve makolímo golesa netá alitive loko gala vizeko litimó nene, agae, Ómasímo loló otati netá nene genavagi golesa neve. Ámina vémini luvanaló gehani napa nagá ziiki age nagamikú ahelú i ahulatátimini avilegeko genavagi netá golesa loló otanogo ive.

⁷ Itó agae, golesa netá alitave loko gala vizeko loaká suni haitopaitolímini nene mikasiuka neve. Ámina netá golesa nene hanuva utó inogo imóza, ve makolímo golesa netá alitave loko gala vizeko lomo mohona itimó nene Ómasímo nana otative. Agae, netá golivagi loló otanogo ive.

⁸* Nemémú nene gigizánimohe itó gigisámohe lihima aleaká gapogú gelémo nomilikoma, hukoko nene ale ahulozo. Gigizani hamokó neiko itó gigisa hámakó neiko alévolé oko minoakálímini apakú ititaninazo. Gigizani losigi itó gigisa losigi minokoko lihima alitanítimo ló apakú gelémo molokiko, ló nene lihamike lova lova oko nomina lokú vokatanize.

⁹* Itó gogómulámo lihima aleaká gapogú gelémo nomilikoma, geza hanuva hize lí okoko ale ahulozo. Gogómula hamó neiko minoko alévolé oko minoaká apakú ititaninazo. Gogómula losigi minokoko lihima alitanítimo milumámini lokú gelémo molokatize.

*Sipsip iza tolova imó nenémini anoza gakola
(Luk 15:3-7)*

¹⁰⁻¹¹ Lekeza ehe tináneve. Lekeza izegipa nugunamotamónemú gilikiko lememino. Neza nemémú lo likimitoze, gilio. Ageloninite okulumakú miniaká niámó keza nene okulumakú gamena gamena aménehini avogisaló minake gizapa ikimiaká niave.

¹² Nemémú lekeza nene nanave liki nigeleve. Ve makó nemémó sipsip izava nene 100-a niakutí sipsip hamokó tolava itimó nene, vitagá amitihe. Lá oko nomive. Sipsip lugáa 99-a nene agokaú ahuloketonoko hamó legesó imolamú amuza moloko vitagá oloko vinogo ive.

¹³ Lamaná lo nolukumuve. Eza vitagá ova ova oko sipsip iza hamóma ale utó okoko agoliza vizinogo ive. Agoliza vizitimó nene sipsip iza 99 hanuva niamláamú agoliza vizeminogo ive.

¹⁴ Itó ámináminoko lekelí ametipo okulumakú noimó nemémó izegipa nugunamotamóné lekelikutí makó nene legesó itikumú ma amu helemive.

Gigivekaho lihima suni alegetati gakó

¹⁵* Gigivekaho makolímo geitoka lihima suni alegimikikoma, geza voko lekezatikó miniki lihimala alapizezo. Lá noako, geí gakó gelekikoma nene, goha gigivekahini alémo geitoka itanize.

* **18:8:** Mat 5:30 * **18:9:** Mat 5:29 * **18:15:** Luk 17:3

16 * Lá onoimóza, geí gakó gelemikoma, ve hamó ahe losítá ahe kelémoko lekeza ámina lihimagi ve noitoka makó vilo. Lá ikiko, monó gotolaú gakó makó láa liki luhuva gizinamó nenémo gihila zitive:

Gakó hoza alitató nene vegená losihe losive makolehe ve makolímini mognamú gakó hoza alitamó nene voko hee linogo ive.

17 Lá onoimóza, keí gakó gelemikoma nene, geza monó gilina vegená lo kemezo. Itó eza nene monó gele vegenalitini gakó gele ahulokikoma, aikumú gelekako eza nene mota lihimalagi ve ánigi goselé iaká nia ve loló ino.

Lo hoipa oaká itó amoaká gakó

18 * Neza lamaná lo likimitoze, gilio. Lekeza mikasiuka netá makokumú li hoipa ikitatamó nene Ómasímo okulumakuka ámina netakumú lo hoipa oketatímó neve. Itó lekeza netá makokumú mikasiuka li hoipa ikitatitamó nene Ómasímo okulumakukagi ámina netakumú lo hoipa oketatitímó neve.

19 Makó miní ameko lo likimitoze. Lekelikutí vegená makolitehe itó lositakó ahe keza netá makokumú nene ligika mili nupa iiki hamokó loló okiko Ómasiloka litáimó nene okulumakú améneho gele kiminogo ive.

20 Itó vegená makolitehe itó losive makolehe itó lositakó ahe keza apá makotoka není nugulizakumú ali nupa itamó nene nénisi holúikú minanogo uve.

Lihima ahulamoaká nenémini anoza gakola

21 * Loko lokago, Pitá nene Izesuni amatoka mino molake láa loko loká otake limó: Guivahaníinemaka, nigivéneho makolímo gamena nanakí zupa lihima netá alenimikiko ahulotatove. Gamená 7 ahe.

22 Loko lokago, Izesú láa loko lo amimó: Gamená 7 nomive. Gamená 7 ahuloto-loko vova vova noako gamena 700 loló ino.

23 Nenemú nene Ómasímini avogisaló minoakalímini ago helegáa lekelepirizeko gakó makó litoze. Agulizaki ve napa makolímo gelekelé izegipalatini lihimáini netimoláamú ale hehe linogo gilimó.

24 Lihima milikitinitamó ale hehe linogo apí oko hozaváa naligo, ve makó nene aitoka alímiki amó. Aitoka lihima 10 milioni kina minamó.

25 Lá imóza, eza nene ámina lihima apasati moni nene ma nomimó. Lá okago nene, agulizaki ve nenémo láa loko limó: Galanava apasatikumú ezáagi itó vená izegipala izava galava itó henokanonagi nene mota vegetalite meinava hizi asú iki alikiko megusa lilí iki minatave.

26 Loko lokago, gelekelé izegipa nenémo voko agulizaki vemámini agisauka alapusa hizeko láa loko limó: Asene zenetoloko voko noako, neza voko mininake moni ale utó okinake apaso asú oko gimitove.

27 Loko lokago, eza ámina hozaló vémini agulizaki ve nenémo hozaló vevamú miluma gelemiakе ahulotamó. Itó lihimalagi nene hanuva ahulotamó.

28 Ahulomikago, ámina gelekelé izegipama numukutí olío lemeake vike hozaló ve agivelahini makó nene moni 100 kina amunaloka emane ameneító nenazo, ánigoake luvana aleko poló noihe láa loko lo ameko limó: Geza moni gumumómá nene mukí apasoko aló nememane.

* **18:16:** Gapó 19:15 * **18:18:** Mat 16:19; Zon 20:23 * **18:21:** Luk 17:3-4

29 Loko lokago, agivelaho nene agisauka alapusa hizike negénegeka nolike láa loko lo amike limó: Geza asene zeneto-loko voko noako, moni alika ángokinake apasoko gimitove.

30 Loko limóza, eza gele ahuloake agivelahinima nene goní omikago nagá numukú ahulitamó. Nenegú minoko lihima asú itive loko kalapusí amimó.

31 Lá okago, keza agivelage lugáa nenete ámina suni ániaki mulükú golesa glelemó. Golesa giliakie keza nene viki agulizaki veninima avetó iki li amemó.

32 Lá ikago, agulizaki ve nenémo ámina gelekelé izegipa nene sele lo amekago, okago, láa loko lo amimó: Gelekelé izegipa golesa neneka, geza negénegeka lako lako lihimaka mukí nene hanuva ahulogetumómá neve.

33 Neza geikumú miluma gelegetumómá nenazo, geza ámináminoko gi-givekahikumú miluma geleko lihimava nene ahulotataninazo.

34 Loko loake, agulizaki veva nenémo izapaló golesa molokago miluma netá aliti-liki niviko minoko lihimavala mukí apasative loko pilisí vetini kigizakú molamó.

35 Loko Izesú loake, miní ameko láa loko limó: Lekeza mukító nene likigik-agú likigivetikini lihima ahulikitamítamó nene, není améneho okulumakú noimó nenémo áminagó oko lekelitoka loló oleketanogo ive.

19

Izesú vená kimisele ahuloakakumú gakó lo kimimó (Mak 10:1-12; Luk 16:18)

1 Izesú nene gakó lo asú oake, Galilaia mikasi ahuloake Zutaia mikasiloka Zota nagamí vola helegaloka vimó.

2 Novigo, vegená mukí ámegetiki vamó. Neneloka kivisi vegená nene kelémo zoka zoka oko minamó.

3 Lá noigo, Palisaio monó ve lugáa aitoka ake amekú miliki láa liki lamó: Mosé lo hukoko li gakkó nene ve makolímo netá nemú manamú venala amisele ahulosá neve loko gizonimoza, nene etahe etamive.

4 * Liki likago nene, Izesú láa loko lo kimimó: Lekeza nene monokú gakó láa loko nemó nene gatiki gilinamómá lakagatí molokahe:

Gozapá Ómasímo ale utó ikú emane nene vegi venaki kelémo utó onoimómá neve.

5 * Itó kelémo utó oake láa loko limó:

Nenemú ve makolímohe makolímohe izolahini amelahini ahulokimioko ve-nalagi nene kugupe kigika hamokó loló okiko apiziki minatáive.

6 Loko gakó imane limó nenazo, ve aleve keza losítá hoú liki nene minamini-gasive. Hamó kugupe loló onoimó gelekave. Nenemú Ómasi nenémo kelémo apizimó nenazo vegenalita nene kelémo hotopotó oakaláa nomive.

7 * Loko lo kemekago, Palisaio monó vete láa liki lamó: Mosé nene vená kimisilinigma nene luhuva netá giziki kimiiki kimisililo loko limó nene nanamú live.

8 Liki likago, Izesú nene láa loko limó: Mosé nene hanuvamú lamine. Lekelisi ánuvane negi nagi hiziki likigika gopa ovikumule loko vená kimisilitave loko gele likimímoma neve. Lá onoimóza, netá matá apí oko kelémo utó i gamenaló emane nene nenéminoko nomimómá nena.

* **19:4:** Apí 1:27, 5:2 * **19:5:** Apí 2:24 * **19:7:** Gapo 24:1-4; Mat 5:31

9 * Nenemú nénisi nene láa loko lo nolukumuze, gililo. Ve makolímohe makolímohe nene venala mokoló netató negopa ha netakumú amisele ahulokoko haitó vená alitimó nene, lihima napa alinogo ive.

10 Loko lokago, izegipala zuha leza íi, vegi venaki nene mogona lá oko minokanazo, vená ma aleminake hanuva gohuna minatuninazo.

11 Loko lokuko, Izesú láa loko lo limimó: Ve vená mukilite gakó imane aleminigave. Ómasímo zámuza kemeneimoláa kéisigó nene alitamó neve.

12 Ve lugáa nene izókini kagatupagutí vená alemoakalímini utó inamó neve. Itó vegená lugáa nene gohana netá kimiká itó sihana gakó li kimiká iakká ikago hanuva miniaká niave. Itó ve lugáate Ómasímini luhuva hutilí oko vitikumú giliake vená aleakumú nene kezáini óe liaká niave. Makó keza nenemú nene zámuza alinitatite gakó imane gili alitamó neve, loko limó.

*Izesú izegipa komakama nónohá zeketamó
(Mak 10:13-16; Luk 18:15-17)*

13 Ámina gamenaló nene izegipa koma koma Izesutoka kilímiki vamó. Ezra agizani lutoko gotóító molonoko nónohá zeketative liki kilímiki nivago, izegipala zuha leza gahá kemehá.

14 Gahá noluko, Izesú nene láa loko lo limimó: Lekeza izegipa koma nene ahulikimikalo. Nenitoka ataze. Ánémináate Ómasímini avogisaló viakálímini mututoni nianazo, lekeza li hoipa ikitamilo.

15 Loko loake nene, agizanitunú ale nogilike nónohá zeketamó. Lá oake ámina apá ahuloake vimó.

*Henonavagi ve
(Mak 10:17-31; Luk 18:18-30)*

16 Ve makó Izesú noitoka ake láa loko loká otake limó: Tisánemaka, neza nana netá lamaná alekinake alévolé nemetameni alitomó neve.

17 Loko lokago, Izesú láa loko lo amimó: Geza netá lamanakumú nanamú loká nonetane. Lamanalímini amelaho Ómasí hámakó noinazo, mogonáne gele hee noloko netá lamanakumú loká nonetape. Itó alévolé gemetameni alitove lokoma gapo lota gakó gele alekoko mukí ámegetozo.

18 * Loko lokago, ámina vémo gapo lota gakokutí hí gakokumú nolane loko lokago, Izesú láa loko limó: Gapo lota gakó lá oko neve: Vegená kepele helemo. Ve aleve suni ale gopa oko huko ezega emega amo. Gumina amo. Soza hakupá gakó lamo.

19 * Geza nene izokahiko amekahiko kugulizá ale otezo. Gezakamú geleaká noanimómáminoko gigivekaginimú geleko gigika kemezo.

20 Loko lokago, gosohá vemámo láa loko lo amimó: Ámina lo huka gakó mukí nene ámegetoaká noumóma nena. Makó hí netakumú ligitagani okuke alemuve.

21 Loko lokago, Izesú láa loko lo amimó: Geza gigika avasavagi minnative loko geleokoma, voko henonika mukí meinavaló moloko moni aleoko gohogó vegená kemekoko oko némegetozo. Lá okako, okulumakú alévolé helisa henoni nene geitoka utó inogo ive. Loko lokago,

22 gosohá ve nenémo ámina gakó geleake henona vaí oko minamó nenazo, gona moloko kimitohe loko agata gilitímo mulunagú gena avisekago vimó.

* **19:9:** Mat 5:32; 1 Koli 7:10-11 * **19:18:** Gá 20:13-16; Gapo 5:17-20 * **19:19:** Gá 20:12; Gapo 5:16;
Liv 19:18

²³ Novigo, Izesú nene izegipala zuha lo limike láa loko limó: Neza lamaná lo likimitoze, gililo. Henóiki ve nenete okulumá lapanató silipa iki ititamó neve.

²⁴ Goha makó lo likimitoze. Kamele iza nenémo nakasi vovónagú voakaláá nene vávani oko nomimóza, henonavagi vémo Ómasímini lapanató voakaláá nene genavagi golesa neve.

²⁵ Loko lokago, leza gelekunike ininá goha unímó. Ininá unlike loká otunike láa lokoma éaho agutó vizekiko minoloko voko minative.

²⁶ Loko lokuko, Izesú gonú lepele hee lonoike láa loko lo limimó: Vegenalite nenémini itamoláá nomimóza, Ómasí nenémo loló itove loko i netá mukí hanuva loló inogo ive.

²⁷ Loko lokago, Pitá láa loko lo amimó: Gelenape. Leza mukí netá matate ahulokunike geí gémegetokune. Lá onoimó nenazo, leza alika netá makó alesá nehe.

^{28*} Loko lokago, Izesú láa loko lo limimó: Neza lamaná lo likimitoze. Aliká netá matá muki gosohá utó iti gamenaló nene okulumakutí lumu ve gihila neza lapanánegi noinake gizapa okimiaká siató nougo, némegetiaká nia ve 12-a lekeza ámináminiki lapanatíki miniki gonanalivagi siá 12-a neneló miniki Isilae vegenalitini mulusi 12-a gizapa ikitiki gona milikitanigave.

²⁹ Ve vená mukí není nugulizakumule liki numúnihe itó gouna zuhahe izóíkinihe améíkinihe itó izegipánihe mínihe ahulatamó nene ahulatátmíni meinava alilikí itiki alitaze. Itó minova minova oaká kemetameni alinigave.

³⁰ Itína goí ina vegenakutí mukilite alika milanigave. Itó alika milina vegenakutí mukilite alika goí inigave, loko limó.

20

Vain mikú hozaló vemú anoza gakola

¹ Ómasímini luhuva hutilí oko vitikumú hoza aleakalímini meinaváá nene hamó lelegító minatitímini mogona lá oko neve. Ve makolímini mikasi napa minamó nenémo neteká holugú otekoko vain minagú hoza alitave loko hozaló vemú vitagá oko vimó.

² Vike hozaló vete aliaká amómáminiki gamena hamotó nene 1 kina alitave loko lokago gili amikago vain minagú kimiselekago hoza alitamó.

³ Hoza nalego, neteká ho itekago 9 kilokumaló nene vike ánigamó nene maketiloka ve makó hanuva niago ánigamó.

⁴ Ánigoake lekezagi nene vain mikú hoza alitamó nene moni nene hoza alita avotigila oko likiminogo uve.

⁵ Loko lokago, keza nene viki hoza alemó. Holisakaki itó únakaki 3 kilokumagi voko ánigamó nene ámináminigó imó.

⁶ Únaká 5 kilokuló nene maketiloka voko ánigamó nene ve makó lugáá nene hanuva otinago ánigamó. Ánigoake lekeza neteká únaká imane gamenaló nana okago hanuva otinave.

⁷ Loko lokago, ve makolímo hoza lemémive, liki likago, eza láa loko lo kimimó: Lekezagi není vain mikú viki hoza alilo.

^{8*} Loko loake únaká molokago, vain mini amelaho nene hozaló gizapa veva láa loko lo amike limó: Hozaló ve sele lo kemekako, ikiko, meinaváá

* **19:28:** Mat 25:31; Luk 22:30

* **20:8:** Liv 19:13; Gapo 24:15

kemezo. Aliko hozaló a ve nene moni kemeloko novoko goí iki iki hoza alemoláa nene keme lutegezo.

9 Loko lokago, gele amekago, únaká 5 kilokuló hoza ale vema nene 1 kina alikago,

10 keza goí iki hoza ale ve nene meinava napa alitupe liki gelemóza, ma nomimó. Kezagi nene 1 kinasí alimi vamó.

11 Naleke vain mini amelahini nene gahá amiki

12 lāa liki lamó: Keza alika a ve nene hoza gamena koma aletó meinava kezagi hamolíminokogó lemekane. Lá onoimóza, leza nene genavagi hoza ho napa lató itó hómō lugupeló lake govisi lipiligo miluma geleko alekunímómove.

13 Liki likago, mini amelaho nene keí holúikutí ve makó lāa loko lo amimó: Nigivénega, neza gelémo golesa amuve. Leza ligika molo hamó okusike 1 kina alitane loko lokusimóma neve.

14 Geza meinavaka alekoko vozo. Meina gumumó nene hamolíminokogó alika a ve nene kimitove loko gelenouve.

15 Nana onoive. Neza ámina monínetunú netá makó loló itove loko gelenoumóza, nene ma akohenamihe. Neza netá lamaná alegeturumóza, geza nenemú gelekako golesa onoihe, loko mini amelaho limó.

16 * Loko Izesú loake miní ameko lāa loko limó: Ámináminiki itínasa alika milina vegená nene alika goí inigave. Itó itínasa goí ina vegenakutí mukilite alika milanigave, loko limó.

Izesú ezáa alika hilitikumú gakó ligo losive makole imó (Mak 10:32-34; Luk 18:31-34)

17 Izesugegi nene Zelusale numutoka tivinigi niake gapoló nivake izegipala zuha 12-a nene lelémo apazá zeake lāa loko lo limike limó:

18 Gililo. Itína nene Zelusalega notune. Neneló okulumakutí lumu ve gihila není nene guguni giziaká ve napagi itó monó mogona apí ikimiaká a vegi keí kigizakú milikiko, neneló goní initiki nipili hilita gakó li hukanigave.

19 Lá iiki, hetoka vetini kigizakú nilími milikiko, gopoguka linitiki segi nogosanitunú nipiliiki zohota zaló nipili hilinigave. Lá iíkiko, gamena losive makole minokinake goha otinogo uve, loko limó.

Zemusiko Zoniko loká itasi netá (Mak 10:35-45)

20 Gamena nene zupa Zepetaioni venala nenémo gipala losítá nene Izesutoka kelémoko vike gupá ze amike netá makokumú gele nimitane loko nouve, loko limó.

21 Loko lokago, Izesú nene nanetakumú givisekago nolane. Loko lokago, eza lāa loko limó: Gele nemekako, gugulizaki ve napa loló okako geí gizapalo nene gipáne losi imane nene gonanalivagi siató gigilika luga luga minatáive loko noluve.

22 Loko lokago Izesú nene ámina ve losítá lāa loko lo kimimó: Lekeza loká initasi metalímini mogona gili gopa ikasike nilasive. Nénisi nene ekesá netá natomó nene lekelisi nene áminagutí hanuva natáimó nehe. Loko lokago, keza nana ive. Hanuva natíomóma nenaе.

23 Liki likasigo Izesú lāa loko lo kimimó: Ekesá netá natomó nene lamaná lekezagí natáimóza, není nigilika luga luga minoakaláa není netá nego likimitohe. Améneho ale vavá oketa vegenalitini siakumú nilasive.

* **20:16:** Mat 19:30; Mak 10:31; Luk 13:30

24 Loko lokago, izegipala zuha lugáa 10-a leza ámina gakó gelekunike ligiveteginimú mukahá kepelekuko,

25 * Izesú nene sele lo limike láa loko limó: Mikasigú kugulizaki ve keza mukí nene gelekelé izegipáini nene kagahaisiuka limitigí iki niago gizapa ikimiaká niave. Itó guivahani keza nene vegená ámemenáa kiviligiki miniaká niave. Nene lekeza mota gilinamóza,

26 * lekelitoka nene lá oko minamitize. Lekelitokatí makó nenémo nugulizaki ve minatove loko nolokoma hanuva lemetigí oko gelekelé oleketoko minative.

27 Itó vegená mukí kivilegeko minatove loko nolokoma lemeko lekelí megusa izegipa loló oleketanogo ive.

28 Okulumakutí lumu ve gihila néni nene lekeza gelekelé initatave loko lememeuve. Vegená mukitoka gelekelé oketoko meina hizeko gologí oketatoive loko minoko aleko nugupe ahulanogo lumumóma neve, loko limó.

*Izesú kogómula lika ve losítá ale goloutoketamó
(Mak 10:46-52; Luk 18:35-43)*

29 Izesuki makó vunike Zelikí apá ahulunimó. Ahulokunike novuko, vegená mukí nenete sii sii liki lémegetiki vamó.

30 Lá niago nene, ve losítá kogómulaló alimó nenetosa gapoló minasike, Izesú noave liki nilago gilikasike, Izesuni gamoga giki sele lasike láa liki lasimó: Guivahani geza agulizaki ve Tevitini agávolagamaka gologí oletatane loko lo mololeta vetemaka, lelikumú milumate geleletamane.

31 Liki nilasigo, vegená mukí nenete legesó iki minatáive liki gahá kememó. Lá amóza, keza gili ahulikasike pigi viziki sele lasike láa liki lasimó: Guivahani geza Tevitini agávolagamaka, lelikumú milumate geleletamane.

32 Liki nilasigo, Izesú nene vike gapoló noike sele lo kemekago, ikasigo láa loko limó: Lekeza nana netá aleketatokumú nilasive.

33 Loko lokago, logómula imane ale panava zeletatane loko nolusive.

34 Liki likasigo, Izesú nene milumaváini gelekimiakte kogómulaló ale nogiligo, ámina gamenaló kogómula goloutokago ánigikasike Izesuni ámegetiki vasimó.

21

*Sigaga litanigi ago Izesú Zelusalega vimó
(Mak 11:1-11; Luk 19:28-40; Zon 12:12-19)*

1 Lá okago, keza vake Zelusale apá ali alitiakte Petepage numutoka Olivi agoka agisauka nene vi anitemó. Neneloka vi anitiakte, Izesú nene izegipala zuhagutí ve losítá nokimisilike

2 láa loko limó: Lekeza viki helegaloka apá komaló vi anitiiki nene, toki iza izolahiko gipalago nene nagá zikitinamó nene ánigiiki vínasiki imaneló kilímiki alizo.

3 Itó vínasiki aliki nisiko nene, ve makolímo loká noleketikoma Guivahani témo hoza nego imane izamú lokago nousive liki lilizo. Láa likisiko litá oko gelekemekiko vínasiki aliki anigasive.

4 Loko lokago, vasimó nene hanuva lá amasimó. Ómasímini agepagutí gakó loaká ve makolímo anoza gakó luhuva gizamó nene haha okative loko lá asimó.

5 * Nene láa loko luhuva gizamóma neve:

Zaion agokaló vegeňá láa liki li kimilo: Gilinahe. Agulizaki velini nenémo lekelitoka novive. Eza lemetigí oko noike nene toki izámini amupiló iteake noave. Toki izámini akaleva nenémo agohí gigo húane novive.

6 Itó izegipala zuhamate keza vasike Izesú li gakó nene gili alikasike,

7 toki iza izolahiko gipalago nene kilímiki asimó. Kilímiki ikasike nene, luhoaká góini nene gololohá ikasike toki iza amegesamaló milikasigo, Izesú neneló iteko minamó.

8 Noigo, mukí vegeňá nenete góini nene gololohá iake gapogú nene avilisá itamó. Itó lugáa nenete kokonasi agila letiake gapogú nene avilisá itiliki vamó.

9* Lá niago, vegeňá mukí goí iká alika miliká amó nenete gakó napagutí láa liki lamó: Agae, Tevitini agávolagamaka, gegepoka litune. Guivahanítémini gakotó anitelimikane. Ómasímo lusa gegetative. Agae, veletoka okulumakú Ómasí aagepoka litune.

10 Liki likago, Zelusalega ite anitekago, apá amelage keza nene mulúini itimó. Mulúini iteko séna gekago nene, éaho noago nilave liki likago,

11 Ómasímini aagepagutí gakó loaká ve Izesúma Galilaia mikasigutí Nasalete numutotí ve nene noave, liki lamó.

Monó zugusavemú lo hukoketamó (Mak 11:15-19; Luk 19:45-48; Zon 2:13-22)

12 Izesú nene vike monó zugusave napagú nene iteko áingoake, áminagú moni meina kona ali volaló imaló a vegeňáma kimisele ahuloake, haitó mikasigutí moniló ámina mikasigú moni kimiaká a vetini holoma aleko gululupa soake, itó Ómasímini guguni gizi aminigi nama luhusi miliaká a vegeňalitini holoma aleko gululupa soake,

13* láa loko lo kimimó: Ómasímo li gakó makó nene monó gotolaú láa liki luhuva gizinamóma neve: Není numunimú nene Ómasiloka loaká numunive liki litave liki luhuva gizinamóma neve. Láa onoimóza, lekeza nene alími maketi numuni lilí inamó nene guminaló vete halá giki miniaká geha mulí lilí ikamó geleaká noive, loko limó.

14 Lá oko monó zugusaveú noigo, vegeňá kogómula likamó itó kigisa kigizató alimó nene aitoka ikago kelémo lamaná oko minamó.

15 Lá noigo guguni giziaká a ve napa itó monó mogona apí ikimiaká ve nene golivagi netá oko moloko imó nene ángiaké, itó izegipa koma nenete monó zugusaveú minake gopaga lake sigaga sagaga litiki, Tevitini agávolahove gegepoka litune liki nilago giliaké, kizapaló molokago,

16* gakó nilamó nene gelemape liki likago, Izesú láa loko lo kimimó: Imane vegeňalite sigaga nilinitamó nene gelenoumóza, lekeza nene monó gotolaú gakó makó lá oko nemó nene gatinamóza, lakagatí molahe:

Geza lokako namuni keza aminí ninamó nenete sigaga ligitiki gegepoka linigave.

17 Láa loko lo kemeake, Zelusalega ahuloake Petania numutoka vike límugusi zekago neneloka akamó.

Gohuna za usí vizimó (Mak 11:12-14,20-24)

* **21:9:** Age 118:26 * **21:13:** Isa 56:7; Zel 7:11 * **21:16:** Age 8:2

18 Akoake gó lokago, neteká Izesú nene nene Zelusalega goha novike gaúna olamó.

19 Gaúna olokago, gohuna za makó nene gapo gohalaló nego áingoake mogonagú noike gihila zeneihe loko ánigamó. Ánigamó nene agilagó minokago áingoake gohuna za nene láa loko lo amimó: Geza nene gihila makó zemoko gohuna loloko voko minatanize. Loko noli agepagi ámina za nene osagava vizimó.

20 Osagava vizekago, izegipala zuha leza ánigokunike sigaga loko za imane nana okago litá oko osagava vizive.

21* Loko lokuko, Izesú nene láa loko lo limimó: Neza lamaná lo likimitoze, gililo. Lekeza nene lakagata losi gelemilo. Gili alévolé iki minatamó nene imane gohuna zamú lumó nenéminiki lekeza alika lilí inigave. Itó nenégo nomive. Lekelisi gili alévolé iminiki agoka makó nene vozane agoka litá oko zeko akutooko age nagamikú holamane liki litamó nene gakotini gele alitimó neve.

22 Itó Ómasiloka netá makokumú voká linigi nene, gili alévolé inikigó litamó nene ámina netá alinigave, loko limó.

*Zámuzamú Izesuni loká itamó
(Mak 11:27-33; Luk 20:1-8)*

23 Lá oake nene vike monó zagusaveú goha itike monó lo kemeko minamó. Lo kemeko noigo, guguni giziaká ve napa itó monó gizapa ve keza Izesutoka ake gimivágú miliki láa liki lamó: Geza imaneloka netá matá azozá alenímó nene éahini gakotó alene. Itó éaho lokago alenímó neve.

24 Liki likago, Izesú nene láa loko lo kimimó: Nezagi gakó makó loká oleketatoze. Li nimikiko nénisi nene éahini gakotó imane netá lá oaká nouhe nenéa nene lo likimitove.

25 Zoní nene monó nagamí holokimiaká hoza alimó nene hikutí ale utó ive. Ómasímini gakotó alihe itó mikasiuka vegenalitini gakotó alimó neve. Loko loká okimikago kezáitoka ligili hagili niake ámina gakotó nana oko ale viligoko lo amitune liki gelemó nene gopa okago, láa liki gelemó: Leza Ómasímini gakotó ale utó imole losá nene, eé, lekeza nanamú aí gakó nene gili alévolé amave, loko linogo inae.

26 Itó vegená mukí nenete Zonikumú nene Ómasímini agepagutí gakó loaká veve liki linamóma nenazo, hanuva vegenalitikutí ámina hoza ale utó imole losá nene vegenalite nana ilitatahe loko lehelele vizekave.

27 Liki kezáitoka liake láa liki lamó: Zonini mogona ma gelemune. Liki likago, Izesú láa loko lo kimimó: Láa likima neza netá matá imane aleáká noumó nene, éahini gakotó lá oaká nouhe nenegi ámina oko lo lekememinogo uve.

Gipa lositalitini anoza gakola

28 Gakó makó láa loko lo likimitoze, giliki ánigalo. Ve makolímini gipala losítá minasimó. Améipo nene ganá gipala nene láa loko lo amimó: Geza gipánemaka, itínasa nene voko vain mikú nene hoza alezo.

29 Loko lokago eza alemitove loko loake alika nene genezala ale viligoake gopa voko alimó.

30 Lá okago, alika gipala nenémo amelaho nene ámina gakokó lo amekago, alitove loko loake vike hoza alemoko zogozogo vizeko minamó.

* **21:21:** Mat 17:20; 1 Koli 13:2

31 Itó lekeza nene amelahini gakó éaho gele alimole liki nigelevé. Loko lokago, keza ganá gipala nenémo gele amimole. Liki likago, Izesú nene láa loko lo kimimó: Neza lamaná lo likimitoze, gililo. Takisi moni aliaká vema lekeza ánigi goselé iaká nia vegi itó gapoló vená keza nene Ómasímini avogisaló nene goí i likimiki vinigave.

32 * Zoní lekelitoka aniteko hehe loko minoaká gapo nene lekelepizekago, lekeza nene monolagi gili ahulikamóma neve. Gili ahulikago, takisi aliaká a vegi itó gapoló venaki nene iki Zonini gakola nene gili alévolé ikamóma nemóza, lekelisi nene aí monó gili alévolé amake likigika ali viligamamóma neve.

*Vain nagá minimú anoa gakó
(Mak 12:1-12; Luk 20:9-19)*

33 * Loko Izesú loake makó láá loko limó: Neza anoa gakó makó litoze, gililo. Ve makó nenémo mikasiva napa minokago, makotoka vain nagá zuhá o asú oake vego vego oko geisa híze asú oake, gihila mí zeko liliká ziti gale legeake, gizapa numuni hána geake, gizapa iki niko meinava likimitove loake vegená makó nene gutá kemeake, mikasi makotoka venoni vimó.

34 Voko noigo, gihiláa guzá loaká gamena alitokago, gihiláa makó alinitiki atave loko agulizaki ve nenémo gelekelé izegipala nene kimisilimó.

35 Kimiselekago, vi anitikago, mitó gizapa iki mina ve nenete kigizató aliake, makó nene kigizanitunú apelemó, makó nene apili helemó, makó nene gehanitunú apelemó. Lá ikago, gelekelé izegipa makolite viki agulizaki véinima avetó iki li amemó.

36 Li amikago, geleake, gelekelé izegipa mukí goha kimiselekago vamó nene ámináminiki kimisilikí kepelemó.

37 Kimisilikago, vikago nene, agulizaki ve nenémo lá ikave loko ahulamike gipala hámakó nene láá loko geleake amisilimó: Není gipa gihila imane amiselekugo, agulizaki vemáminí gipalama okaze liki ánigiiki nene alími lamaná itamole, loko geleneike amiselekago nene, vo anitekago,

38 mitó gizapa ve keza ánigiaké kezáitoka láá liki ligili hagili amó: Imanémo nene mikasi amelahini gipala noinazo, minokoko imane hoza nene ale lá inogo ive. Nenemú nene lélisi apele helekuko helisa henoni nene lelí lolítive,

39 liake nene agizató aliake vain mikutí nene ahelú iliki vake apili helemó. Lá ikamó nenazo,

40 nenemú nene mini amelaho aniteoko nagá mini gizapa ve nene nana oketatímó neve.

41 Loko Izesú nene loká okago, keza láá liki li amemó: Áisi lamaná ámina ve golesa kepele gesá itímóma nena. Itó vain mini nene haitó gizapa ve gutá kemekiko, keza nene guzá lati gamenaló nene gihiláa gona miliki amitave.

42 * Liki likago, Izesú nene láá loko miní ameko lo kimimó: Monó gotolaú gakó makó lá oko neve:

Numuni giaká vete gehani napa makó ánigi ahulamó nenémo geha lapusa alévoletláa loló oake noive. Ámina netá nene Guivahanímímini gakotó utó okaze. Vegená neneta ánigokuko nene lamaná okave.

Liki luhuva gizina gakó nene lekeza gatinamóza, lakagatí molahe.

43-44 Nenemú lo likimitoze, gililo: Ómasímini gizapa olíkimiakalímini lusa nene Zuta ve lekelotí ipá okoko haitó vegená kiminogo ive. Lá okiko lusámini gihiláá ámina vegenalite ali utó inigave, loko lo kimimó.

45 Ámina anoza gakó nene lo asú oko lokago, guguni giziaká ve napa itó Palisaio monó vema keza giliake láá liki lamó: Agae, anoza gakokutí gehanimú limó nene Izesuni ánígo ahulunikumú lokave, liki giliake nene

46 agizató alekinake nagá amitune liki lamóza, Izesukumú nene vegená mukilite Ómasímini agepagutí gakó loaká veve liki likamó nenazo, vegenalite lipilikatave liki kelegesá legekago ahulamó.

22

Vená ale kemeaká nosakumú anoza gakó (Luk 14:15-24)

1 Izesú goha miní ameko anoza gakó láá loko limó:

2 Okulumálímini lapanalímini mututoni lilí itakumú nene agulizaki ve makolímo netá matá oko moloko imó nenenloka lo moloko avetó oko lo likimitoze, gililo. Agulizaki ve makolímo gipalaló vená alemo molanogo noike nosánetá ale vavá imó.

3 Ale vavá noike gelekelé izegipala kimiselekago, goí oko alesa molo kimi vegená nene iki nosánetá natave liki viki li kememó. Li kimikago, keza nene amánapa ikago,

4 gelekelé izegipalama goha nokimisilike láá loko limó: Neza alesa molo kumu vegená nene viki láá liki li kimilo: Nosánetá nene mota ale vavá okaze. Pulumaká iza gehato minamoláama itó nosánetá haitopaitolímini nene mota ale vavá okave. Lekeza vená ale kemeaká nosató nene alo.

5 Loko lokago, keza gelekelé izegipa nenete viki ámina gakó li kememóza, keza gilikago goselé kipilimó. Gili ahuliaké ha-gelegele amó. Makó nene miíniuka vamó. Itó makó lugáá nene hozagazanikú vamó.

6 Itó lugáá nenete agulizaki vemámini gelekelé izegipa nene kigizató alinake ali golesa iki kepelemó. Makó lugáá nene kipili helemó.

7 Lá ikago, eza agulizaki ve nenémo gele golesa oake, izapaló golesa molokago, pilisi veva kimiselekago, vake ámina gelekelé izegipala kipili hele vegenáma kipili gesá iake numuni apáini nene vitú vitú iki ali golesa amó.

8 Lá ikago, agulizaki ve nenémo gelekelé izegipalama láá loko lo kimike limó: Vená ale kemeaká nosá nene mota ale vavá okumóza, alesa molo kumu vegenalitini kemetameni nenémo ámina nosá nata avotigila oko minamive.

9 Nenemú lekeza gapo izana koma komagú viki vegená nánigikima alesa mili kimikiko vená ale kemeakató nosá ale vavá uhá nene iki natave.

10 Loko lo kemekago, gelekelé izegipama nene viki gapo koma komagú mihina ake vegená vóvotiki golesa lamaná mukí nene kilími ake nosá ale vavá í numukú nene iki vai í lamaná amó.

11 Vegená mukí iki niago, agulizaki ve nenémo ánígoketanogo itimó. Itike ve makó ánígamó nene vená ali keme gamenámini luhiaká nia gó lamaná luhamike noigo, ánígoake,

12 agulizaki vémo láá loko lo amimó: Nigivénega, nana okago vená ali kiminigi niámómámini luhoaká gó luhamanike imanegú iteko noane. Loko ligo, eza gakó litimoláá nomimó.

13* Lá okago, agulizaki ve nenémo gelekelé izegipalama láa loko lo kimimó: Lekeza agisa agizató nagá aliiki ali hetó iiki límugusi apakú ahulimikiko lemeko minino. Neneló minoko ive nama oko miluma maluma geleko agepaatalá oko minanogo ive.

14 Loko Izesú lo kemeake makó láa loko limó: Ómasímo vegená mukí alesamolo kemeneimóza, vegená luguhakó kelémo etó okago itiaká niave.

Lugupe meina hizeaká gakó (Mak 12:13-17; Luk 20:20-26)

15 Izesú láa loko lo kemekago, Palisaio monó ve keza vake láa liki lamó: Nana gakotunú gelehusi gekuko nenegú apilitive. Liake nene gakó gona giziki minake,

16 kezáini izegipáini zuhagutí itó Heloteni izegipala zuhagutí lugáa nene kimisilikago, Izesú noitoka viake láa liki li amemó: Tisalemaka, geí mogonaka gelenoune. Geza gakó gihilágó loaká noane. Gakó lamanakó lanike vegená Ómasímini gapováa vevesoko kelepizeaká noane. Vegenakumú gonukonú osá amane. Vegená iti minamó limi minamó mukí nene lelegí okogó lainim-okimiaká noane.

17 Lá onoinazo, geza hanuva lo limitanize. Nanave loko nogelene. Loma gamanímini agulizaki ve napa Sisani nene takisi moni ameaká nounimónene etahe etamive.

18 Liki lamó nene amemitune loko lokikoma gamaniloka alémoko vokóngi otatune. Itó hanuva amitune loko lokikoma Zuta vegenalite gili golesa itave loko Izesú nene keí gakónímini mogona golesa hanuva geleake, láa loko lo kimimó: Genezatini lositaki neneta, nanamú giminégú milanigi nilave.

19 Takisi monigutí makó nelepizilo. Loko lokago, moni makó aliki aitokavamó.

20 Vikago, loká oketake vogunahana imanegi itó imane luhuvagi nene éahini neve.

21 Loko loká okimikago, keza gamanímini agulizaki ve napa Sisanive liki lamó. Liki likago eza nene láa likima nene gamanímo voká loaká noi netá nene gamani amilo. Itó Ómasímo voká loaká noi netá nene Ómasí amilo.

22 Loko lokago, keza nene gakó giliaké sigaga limiaké ahulimiaké vamó.

Hilinitakutí otiakakumú loká itamó (Mak 12:18-27; Luk 20:27-40)

23* Ámina gamenaló Satukaio monó vegená lugáa Izesutoka amó. Keza vegená hilinakutí otisá amave liki liaká a vegená nene Izesú noitoka ake,

24* láa liki lamó: Tisalemaka, Mosé láa loko limó: Ve makó izegipala getamoko minoko helekikoma agunalámó ámina gevóna vená nene alekoko uvolahohili vemú izegipala geto molative.

25 Láa lokamó nenazo, gozapá uvolahohi agunala 7-a nene lelitoka minamó. Lá iki minake, ganá ve nenémo vená aleake, izegipa getamike helekago, agunala nenémo ámina vená alimó.

26 Alekago ámina sunímo utó o amekago, lá imi imi vake vake keza ve 7-a nene ámináminigó amó.

27 Keza hili asú ikago, venáini nene alika hilimó.

* **22:13:** Mat 8:12, 25:30; Luk 13:28 * **22:23:** Apo 23:8 * **22:24:** Gapo 25:5

28 Ámina ve 7-a nenete aí vanagó minikamó nenazo, nenemú hilinakutí goha otita gamena nene ámina venáma éahini venala loló itimó neve.

29 Liki galegutí oteaká gakokumú amé ziki giza itanigi likago, Izesú nene konotó aleko láa loko limó: Lekeza monó gotolaú gakó makó nemómá nene gatinamóza, mogonáa gelemake itó Ómasímo galegutí kelémo oteaká zámuzamú nene ma gelemake gili gopa iki nilahe.

30 Keza hele vegená otita gamena nene vená aleakaláa nene nomive. Itó vená aleme kemeakaláa nomive. Okulumakú ageló nenéminkiki gohuna minanigave.

31 Lá onoimóza, hele vegená goha otitakumú nene gohakú loká oleketa-toze. Lekeza imane gakó Ómasímo lo likimimó nene gatinamóza, mogonáa gilinamahe. Emaneloka miniliki ite vemú láa loko lonoimóma neve:

32* Neza Avalahani Isakani itó Zakoponi Ómasí minutímína mino loko voko nominuve. Láa loko limó nenazo, nenemú kemeni helenei vegenalitini Ómasí negopa, kemenía hanuva ne vegenalitini Ómasí noinazo, Ómasimú gili zuginake hele vegenaki hanuva mina vegenalitini Ómasí noive.

33 Loko lokago, vegená mukí keza gakoláa lo kimikumú nene sigaga sagaga lake agae, vatí oko ale viligoko lo kimive, liki lamó.

Li mila gakokutí napáa

(Mak 12:28-34; Luk 10:25-28)

34 Izesú nene gakotunú Satukaio monó vetini kegepa ze letoko lokago, Palisaio monó ve keza nene gakó nigeleke aitoka iki alegesá iake,

35 kei holíkutí ve makó gakó mogona geleaká i ve nenémó Izesuni amekú molanogo láa loko limó:

36 Tisalemaka, Mosé lo hukoko li gakokutí nene hilímo kivilegeko napa neve,*

37 Loko lokago, Izesú láa loko lo ameko limó: Gigika itó gemeni itó geleakaka mukí nene Guivahani geí Ómasí lehizetozo.

38 Nene gakó nenémó napa iteko neve.

39* Itó napa otigí nenémó hamolíminigó oko nemó nene lá oko neve: Gezakamú geleaká noanimómáminoko gigivekaginimú geleko gigika kemezo.

40 Ámina lo hukoko li gakó losi nenémó Mosé lo mola gakó itó Ómasimíni agepagutí gakó liaká a vete li mila gakolímíni gotoláa loló onoise, loko limó.

Gologí oketative loko lo moloketa vemú loká oketamó

(Mak 12:35-37; Luk 20:41-44)

41 Itó Palisaio monó ve keza alegesá iki niago, Izesú loká oketake láa loko limó:

42 Lekeza Ómasímo gologí oleketative loko lo mololeketa vemamú nanave liki nigelevé. Éahini agávolaho noitive. Loko lokago, keza agulizaki ve napate Tevitini agávolahove.

43 Liki likago, eza láa loko lo kimimó: Láa likima Sikalahulímo nanamú Tevitini alémo vávani okago Tevití nene ámina vemú nene Guivahaníneve loko live. Tevití láa loko limó neve:

44* Mezáu ve nenémó není Guivahani nene není nigizani zamagaloka mino-loko voko noako, gala vega nene geí gigisa lapuvauka ahuloketanogo uve loko lo amimóma neve.

* 22:32: Gá 3:6 * 22:37: Gapo 6:5 * 22:39: Liv 19:18 * 22:44: Age 110:1

45 Tevití nene gologí oleketative loko lo mololeketa vemú nene Guivahaníne ve loko limó nenazo, ámina ve nenémo nana igo Tevitini agávolahogó noitive.

46 Tevitini agapilamola noitimóza, Tevitini ve napagi nene noitive. Loko lokago, ve makolite Izesuni anotó aliki li amemitamó onoive. Keza ámina gamenámini veletó nene gakó makó loká itatakumú gelego gena okago, gimivagú miliki loká itamisá amo.

23

Monó mogona apí ikimiaká a vemuki Palisaio monó vemuki alévolé oko lo hukonoimole

(*Mak 12:38-39; Luk 11:43-46; 20:45-46*)

1 Izesú koma nominake izegipala zuhagi itó vegená mukiki gakó lo limike lá loko limó:

2 Keza monó mogona apí ikimiaká vegi itó Palisaio monó vegi Moseni akilí ali hitinake lo mola gakó mukí apí ilikimiaká niave.

3 Lá inake gakó mukí li likimiaká niave. Nene giliiki ámina gakotó ámegetalo. Lá onoimóza, keza iki miliki nia kemetameni nene lekezagi lá amilo. Keza gakó mukí liaká niámóza, kezáini nene ámina gakó ma ámegetisá amave.

4 Mosé lo mola gakó nenémo genavagi loló okago vetini kigínagú gihikimikago, gihinago, kezáini nene ámina genavagi netá ma kigizani hisúinitunú kilími vatí itígí iki ma alisá amave.

5 * Netá mukí aliaká niámó nene vegenalite ánigi kumu hilitive lokogó neve. Monó gotola pepa nene pokisi komagú miliake golihító miliake nagá ziaká niave. Itó kigizatoki ámina iáká niave. Luhiaiká gó napaló nene gonanalisisvagi luhuva háná miní amiki akotiake luhiaiká niave.

6 Lá inake nosánetá napa ninató nene agepaló siakumukó giliaká niave. Itó monó numukú numukú nene kovogisaló minoaká holomamú kumu heleaká niave.

7 Itó vegenalite maketiloka geké lilitatave likigó, itó Tisale liki lilitatave likigó giliaká niave.

8 Lá onoimóza, vegenalite lekelikumú Tisale liki li likiminigi niko gili kememilo. Ómasi hamokó nene lekelí tisá noigo, lekeza aí izegipala niake hamó lelegító niave.

9 Imane mikasiuka ve makokumú nene ametehove liki lamilo. Ametipo hámakó okulumakú noive.

10 * Itó lekelikumú nene lukugulizaki veve liki li likimikatave loko noluve. Lekelí guivahani hamó nene Ómasímo gologí oleketative loko lo mololeketa ve nouve.

11 Ve makolímo ve napatini loló itove lokoma nene hanuva lemetígí oko gelekelé oleketoko minative.

12 * Lekelikutí ve makolímohe makolímohe ezáa agulizala ale otitimó nene, ezáa agulizala liminogo ive. Itó ve makolímo ezáa agulizala aleko lemeko molatímó nene, Ómasímo agulizala ale napa inogo ive.

Genezáini losigi minakumú gakó lo hukoko limó

(*Mak 12:40; Luk 11:39-42,44,52; 20:47*)

* **23:5:** Mat 6:1; Gapo 6:8; Nam 15:38

* **23:10:** Mat 20:26-27; Mak 9:35, 10:43-44; Luk 22:26

* **23:12:** Luk 14:11, 18:14

13-14 Lekeza Palisaio monó ve itó monó mogona apí ikimiaká nia ve ehe tináneve. Lekeza genezatini losigi niamó neneta Ómasímini lapanató voaká gapo nene vegenalitini kovogisaló hizi lí iaká niave. Lekezatini áminagú itisá amave. Itó vegená makó itinigi niago, hanuva itikatave liki ánigi ahulikitísá amave.

15 Lekeza monó mogona apí ikimiaká vegi itó Palisaio monó ve lekezagi genezatini losigi neneta, ehe tináneve. Lekeza age nagamitokagi itó mikasiukagi mihina niake vegená makó lekelí izegipatini zuha lilí itave liki kilími miliaká niave. Izegipatini zuha lilí ikago, lekezatinímini iki kilími miluma apakú miliaká niago, kéisí likivilegetigí iki meinímini mututoni lilí iaká niave.

16 Lekeza kigikámini agómula likonoiti vema gapo kelepisinigi niamó neneta, lekeza ehe tináneve. Lekeza nene makolímohe makolímohe monó zagusave agulizá oko agizani iteko litimó nene nagamí pizekikoma ha netá nemóza, makolímo monó zagusaveú goli gehani agulizá oko agizani ale oteko litimó nene nagamí pizemoko litímimi inogo ive liki liaká niave.

17 Lekeza negi nagi likigikámini agómula likamó neneta, nana netalímo iteko nehe. Goli gehani iteko nehe itó goli gehani ale etó oko moloaká monó numuni nenémo iteko nehe.

18 Itó ve makolímohe makolímohe guguni gizoaká ita veletó neti netá agulizá oko agizani noiteko litimó nene nagamí pizekikoma ha netá nemóza, ita amupiló neti netá agulizá oko agizani noiteko litimó nene nagamí pizemoko litímimi inogo ive liki liaká niave.

19 Lekeza likigikámini agómula lika ve neneta, guguni gizoaká nenémo iteko nehe, itó guguni ale etó oko moloaká ita nenémo iteko nehe.

20 Nenemú ve makolímo guguni gizoaká itáló agulizá oko agizani noiteko litimó nenémo ita veletó neti netaki agulizá oko agizani noiteko litimó geleká noive.

21 Itó ve makolímohe makolímohe monó zagusave agulizá oko agizani noiteko litimó nenémo monó zagusavegi monó zagusaveú minoko aleko oaká noi Ómasigi kugulizá oko agizani noiteko litimó geleká noive.

22* Ve makolímohe makolímohe okulumá agulizá oko agizani iteko litimó nene, Ómasi minoaká noi holomagi holomaló minoaká noi Ómasigi kugulizá oko litimó geleká noive.

23* Lekeza monó mogona apí ikimiaká vegi itó Palisaio monó vegi ehe tináneve. Lekeza genezatini losigi vese, mikú noguni mupanuha itó za silogehenigitana oko anuva oaká netá haitopaitolímini nene aliake netá 10 10 minakutí hamopamó nene Ómasíminive liki amiaká niave. Lá iaká niamóza, lo huka gakokutí iteko minamoláda napa nene hehe loko minoko vegená gona moloaká itó likigika hize kemeaká itó Ómasimú gele alévolé oaká netá nene ahulikave. Netá matá 10 10 nekutí hamopamó Ómasi ameaká netá nene ahulokaáláa nomimóza, nolu netá napa nene niage hanuva loló oaká netá neve.

24 Lekeza kigikámini agómula likonoi vema gapo kelepisinigi niamó neneta, netá koma likigika ale gopa amoaká netá nene gizaká iki ali ahuliaké lekelémo gopa oaká netá napa nene hanuva gopa nikí mikilí iaká niave.

25 Lekeza monó gakó apí ikimiaká nia vegi Palisaio monó vegi, lekeza ehe tináneve. Lekeza genezatini losigi nego nagamí goni itó lape hetoláa nagamí

* **23:22:** Isa 66:1; Mat 5:34

* **23:23:** Liv 27:30

zinake agikáagú nene guminaló suni itó lukugupémo ánígo amu hili netá nene goni vizi vaí iaká niave.

26 Palisaio monó ve gigikámini agómula likonoimó neneka, geza gigikaka nagamí zeko ale guni onako hetokagi nene guluvitanogo ive.

27 * Lekeza monó mogona apí ikimiaká vegi itó Palisaio monó ve neneta, ehe tináneve. Genezatini losi nego gakó losi liaká niave. Lekeza nene gonosi milimililó vegenalite ánígikiko kumu hilitive liki simeniló gonanalisi iki guhí hiliaká niamó nenéminiki niave. Hetoláaloka ánígi lamaná iaká niamóza, gale agikagú nene hele vegenalitini gonosi zámuza neike anuva oaká netá áminagú vaí onoive.

28 Lekezagí lá ikigó niave. Vegenalite hanuva lukugupeló nánigake lekeza hehe liki niave liki giliaká niave. Likigikagú nene soza loaká gakolímo itó li huka gakó pelevesava ziaká netalímo vaí oko neve.

*Lihima alika kumupiló ititikumú gakó lo kimimó
(Luk 11:47-51)*

29 Lekeza monó mogona apí ikimiaká vegi itó Palisaio monó ve neneta, ehe tináneve. Lekeza genezatini losigi ve neneta, Ómasímini agepagutí gakó liaká a vetini gonosi milimili numuni lamaná lilí iake hee liki iki miliki a vetini gonosi milimili nene gonanalisi ikimiaké,

30 leza gozapá avotegini gamenaló minutilina, Ómasímini agepagutí gakó liaká a ve makó kepele hele vegená nene kelémo vatí amutiline liki liaká niave.

31 Nene gakó li utó iaká niamó nene lekezatini mogonatinimú nilave. Lekeza Ómasímini agepagutí gakó liaká a ve kipili hele vetini kagapilamó zuha niave.

32 Avotikini mogona golesa nene lekelitoka vo aleko neve.

33 * Lekeza gosihálímini agapilamó zuha neneta Ómasímini goní nenémo lekelémo ló apakú molanogo ive. Lekeza keé liki golisi aminigave.

34 Nenemú gilio. Neza Ómasímini agepagutí gakó liaká a vegi itó monolímini mogona apí ikimiaká nia vegi itó monó pukugutí giliaká nia vegi kimiselekugo lekelitoka vinigave. Keí holúikutí nene lekeza lugáa kipili hiliiki lugáa nene zohota zaló gánava zíki apatiiki lugáa nene monó numutíkú segi nogosanitunú kipiliiki apá napa makokutí nene gímiziliki viki haitó apakú ahulikitaganigave.

35 * Lá ikiko, mukí hee liki nia vegená kipili helemómámini lihima nene lekelí lukumupiló iteko minanogo ive. Hehe loko mina ve Epoloni apele nohiligo golani leki gamenalotí nene ve lugáa kipili hililiki nivago, Palakiani gipala Zakaliá nene monó zavusave itó guguni giziakató nenéminí holutó noigo lekeza napelego golani lekimó keí golanímini lihima mukí nene lekelí lukumupiló itinogo ive.

36 Neza lamaná lo likimitoze, gilio. Ámina mogonámini lihimavaláa nene imane oko moloko nou netá ánígiaká nia vegenalitini kumupiló ite asú inogo ive.

*Izesú Zelusale vegenakumú ive imó
(Luk 13:34-35)*

* **23:27:** Apo 23:3 * **23:33:** Mat 3:7, 12:34; Luk 3:7 * **23:35:** Apí 4:8; 2 Iki 24:20-21

³⁷ Kee, Zelusale vegenaíse, lekeza Ómasímini agepagutí gakó liaká a ve kipili hiliká itó Ómasímo hozaló kimiselekago lekelitoka a ve gehanitunú ahuli miliki kipili hiliká iaká niave. Neza nene lekelí izegipatini zuha nene okolohómo izegipala ale amakuka moloaká noimómáminoko kelémo mulúneuka molanogo oaká noumóza, lekeza gili nimisá amave.

³⁸ Lekeza gililo. Ómasímo viselelikimikiko, apatiní nene gámé pizinogo ive.

³⁹* Láa loko lo nolukumuve. Není nene goha áninagamiki miniliki viki alika Guivahanímini gakotó anitelimikane, Ómasímini lusaló okane liki li niminigave, loko limó.

24

Alika monó zugusave ali golesa itakumú lo kimimó (Mak 13:1-2; Luk 21:5-6)

¹ Izesú eza monó zugusave ahuloake novigo, izegipala zuha leza monó numunima alapizinogo aitoka unimó.

² Lá unimóza, eza láa loko lo limimó: Lekeza numuni mukí imane nánigahe. Agae, neza lamaná lo likimitoze, gililo. Monó numuni napámini gehani mukí nene apiliki tele vizikiko gehani nene amupiló amupiló iki mililikí itekutí zeko gululupa so asú inogo ive. Itó ziki lana iiki ali hutilikatíli inigave.

Miluma gilituni gamenámini ganá netá (Mak 13:3-13; Luk 21:7-19)

³ Loko loake, koma minake, Izesú eza Olivi agokaú mitó noigo, izegipala zuha lezagó aitoka itekunike láa loko loká otoko lunimó: Geza lo lemezo. Itína utó ití netakumú lanimó nene nanahé utó itive, itó mikasiuka netá matá asú iti gamena itó geza atiginá itani gamena alitokiko nana anosa utó okiko ánigokinake gele hee litune.

⁴ Loko lokuko, Izesú nene lonotó aleko láa loko limó: Ehe, gizapa ilo. Ve makolímó atiginá oko ato gamenamú lokogoka vizekatize.

⁵ Ve mukilíti nanitiki není nugulizató liki neza Ómasímo gologí oleketative loko lo mololeketa vema nouve liki vegena mukí kogoka vizinigave.

⁶ Lekeza haitopaitó lovámini gakoláa giliiki itó lova hizinigi nikó nenémíni gakoláa gilinigave. Lekeza ehe tináneve. Lekeza mulutini itemino.

⁷ Ómasímo netá nenémínáa utó itive loko lonoimóza, mukí netá matá velesá asú aminogo ive. Numutó namató vegena makolite gala véni lova ali nikimiko, itó numutó namató agulizaki ve napa makolímíni zuhagi itó makolímíni zuhagi lova hizinigave. Itó haitopaitó mikasiuka gaúna gamena utó oko mino-loko noitiko mukí mikasiuka nene imimá napa omo noviko,

⁸ miluma netá nenémínáa utó itímó nene venalite izegipa getanigi miluma giliaká niámó nenémíno utó inogo ive.

⁹* Ámina gamenaló nene likigizató aliki viki goní ilikitiki miluma netá alilikitanigave. Itó lá niiki lekelikutí makó likipili hilinigave. Není nugulizá lekelitoka minakumule liki vegena mukí nenete mukahá likipilinigave.

¹⁰ Ámina gamenaló nene vegena mukilite Ómasimú gili alévolé iakáini nene ahulanigave. Keza nene eza amimí iko eza amimí iko iki gasó eza amiko eza amiko inigave.

11 Lá niko, mukí Ómasímini agepagutí gakó liaká ve sozámini utó iiki vegená mukí kogoka vizinigave.

12 Golesa mogona nenémo hutilí noiko, vegená mukí nenete kigika ke-meaká netá nene geha zinogo ive.

13* Lá onoimóza, makó keza gamenaváini asú itító monó ahulamiki alévolé iki minatamó nene, Ómasímo kugutó vizinogo ive.

14 Itó Ómasímini gasovaló minoakalímini gakó lamaná nene mikasi nekisa vokisauka numutó namató vegená mukitoka giliiki gili alitahe liki nene li hutilí i asú inigave. Lá ikiko gamena asú inogo ive.

Miluma geleká gamena napámini gakola

(Mak 13:14-23; Luk 21:20-24)

15* Lekeza nene mulikizapa iti netá golesa nene apá ale golesa oaká netá gozapá Ómasímini agepagutí gakó loaká ve Tanielé nenemú limó nenémo etó o mina numukú oteneiko ánganigave. (Imane gakó gatatanímó neneka nene gakokumú gele guni ozo.)

16 Ámina gamenaló Zutaia mikasiuka nita vegená nene golisi iliki agokaloka ititakumule.

17* Keza makó numuni numupitó nita vegená nene golisi iliki limiki henoniíni nene numúkutí ma aliki vamitakumule.

18 Vegená makó mikuka nitakutí nene numukuka luhoaká góini alitune liki atiginá iki vamitakumule.

19 Kee, izegipa kagatupagi nita vená itó izegipa namuni aminí nikimita vená nene nana itamó neve.

20 Lekeza nene nolu netakutí golisi ita zupa nene golini gamenagú ahe itó Ómasímo lo mololeketa holisi gamenagú ahe utó amitive liki Ómasiloka likigó minaþo.

21* Ámina gamenaló nene genavagi netá napa utó itimó nenémo mikasi nene gosohá nego nenéminoko utó amigo minoloko iteko imane gamenaló utó amive. Nolu gamenaló nene utó okoko, nenémini veletoka goha utó aminogo ive.

22 Lá onoimóza, Ómasímo ámina miluma gilita gamena ale atuhá amitimó nene vegená makó ma kavasavagi minamitamóza, Ómasímo kelémo etó i vegenakumule loko ámina gamena ale atuhá inogo ive.

Okulumakutí limi ve gihila atiginá iti gakó

(Mak 13:24-27; Luk 21:25-28)

23 Ámina gamenaló ve makolímo ángalo, gologí oletati vema imaneloka utó okave, itó volane noive loko lo nolikimikoma lekeza gili zagemilo.

24 Ámina gamenaló gologí oleketati ve sozámini itó soza saza Ómasímini agepagutí gakó liaká ve utó iiki Ómasímo kelémo etó onoi vegená kogoka vizitupe liki vegenalite sigaga lita netaki soza alévolé sunigi lilí iki avevezaha inigave.

25 Gililo. Imane nolu netá utó onamigo mota lo lekemekuve.

26* Itó ve makolímo ángalo, Ómasímo gologí oleketati vema nene mikasi gomopalaló noive loko lo nolikimikoma, lekeza neneloka vamilo. Itó ángalo, eza nene vozane numukú halá geko noive liki nilikoma, lekeza gili zagemilo.

* **24:13:** Mat 10:22 * **24:15:** Tan 9:27, 11:31, 12:11 * **24:17:** Luk 17:31 * **24:21:** Tan 12:1; Ali

7:14 * **24:26:** Luk 17:23-24

27 Okulumató gó melevezá itimó nene ho noitikukatí ho nolimitoka vinogo ive. Okulumakutí lumu ve gihila neza nenéminoko omo nougo lekeza není ániyi asú inigave.

28 * Netá helemó gonosiváa nekú nene nama gosúveha mukilite litá iki ániyiiki alegesá iaká niave. Ámináminoko okulumakutí nolumugo mukí vegenalite ániyi asú inigave.

29 * Nene gamenaló ámina genavagi netá nene asú okiko, ho nene noitiko litá oko límugusi zekiko, ikanimo hize sata amiko, itó sonohí nene okulumatotí atohimí niziko, okulumató amuzavagi netá nene mómoká i asú inigave.

30 * Lá ikiko, okulumakutí lumu ve gihila goha ato anosa nene okulumató utó noiko, imane mikasiuka není gakó gelema vegená mulusi mukí nene ive nama inigave. Lá niiki okulumakutí lumu ve gihila neza alévolé zámuzánegi itó lapanánegi nene okulumalímini límusi amupiló nolumugo ániganigave.

31 Agelóne kimiselekugo, pikuli nene anó napa nomilikó kelémo etó u vegená ezega emegatí ho noititokatí ho nolimitokatí itó mikasi nekisa vokisalokatí kilími nupa inigave.

Gohuna zámini anoza gakola
(Mak 13:28-31; Luk 21:29-33)

32 Lekeza za gohunámini anoza gakola gili vevesiki gililo. Izanámo nene nagamila nego agila guluma sekago, lekeza ániyake hogai gamena mota alitokave liki liaká niave.

33 Ámináminoko lekeza imane nolu netá mukí utó noiko ániyiiki guivahanite anogo gatekú omo alitokave liki gilitaze.

34 Neza lamaná lo likimitoze, gililo. Oko moloko oaká nou netá áningina vegená velesá hili asú inamiko imane nolu netá mukí utó inogo ive.

35 Mikasigi itó okulumaki tolova itáiha, imane lonou gakó nene ma gopa oko tolova aminogo ive.

Gamena napamú gelemune
(Mak 13:32-37; Luk 17:26-30,34-36)

36 Lá onoimóza, ámina gamenamú ve hamoláate keké gelemave. Okulumakú agelogegi nene ma gelemave. Gipala nezánegi ma gelemuve. Améneho hamokó áisi geleneive.

37 * Okulumakutí lumu ve gihila není gamena alí noliko Noá mina gamenaló lili a mogona áminagó oko utó inogo ive.

38 Gozapá nagamí napa velesá velenamigo, nene gamenaló zahí nagamí niki minake vená meinakona ake zuguzugu zegezege viziki miniliki niago, Noage sipigú itemó.

39 * Ámina vegenalite Noani nagamí viliti gakó gili ahuliake gopa niago, nagamí napa vilike vegená mukí kepele gesá imó. Okulumakutí lumu ve gihila neza ato gamena nene lá oko utó inogo ive.

40 Ámina gamenaló ve losítá nene makó mikú hoza nalisiko, Ómasímo maga ve alémokoko maga ve ahulotanogo ive.

41 Vená lositalitosá nosá isiki nisiko, Ómasímo vená magáa alémokoko magáa ahulomikiko minanogo ive.

* **24:28:** Luk 17:37 * **24:29:** Isa 13:10; Zee 2:10,31, 3:15; Ali 6:12,13; Izi 32:7; Isa 34:4 * **24:30:** Tan 7:13; Ali 1:7 * **24:37:** Apí 6:5-8 * **24:39:** Apí 7:6-24

42 Nenemú Guivahanitini ati gamena nene lekeza ma gilinamamó nenazo, lekeza gizapa keké viziki minalo.

43 * Lekeza gakó imane gili minalo: Numuni amelaho nene guminaló ve atikumú gilitimó nene, gizapa noiko guminaló ve oko numuni zeko epetooko henoni nene aleminogo ive.

44 Ámináminoko okulumakutí lumu ve gihila neza atokumú negeva iki minamita gamena atomó nenazo, lekezagi ali vavá iki minalo.

*Litokó alévolé oko Ómasi gelekelé otatuni gakó
(Luk 12:41-48)*

45 Není gelekelé izegipa makó nene gele vevesiniki gili minatamó itó hozaváini nene litokó aliki minatamó nene mogonamú anoza gakó lo likimitoze. Gelekelé izegipa makolímó gizapa vevámo aí numukú netá matató gizapa oko minoko hozaló izegipa lugáa gizapa oketative loko lomikiko nosánetá nata gamenaló gona moloko kimitive.

46 Gizapa veva nene okoko ámina gelekelé izegipa nene goí oko lotatíminoko hoza nalikoma ánigmatimó nene ámina gelekelé izegipamú gulugo agoliza vizitimó neve.

47 Neza lamaná lo nolukumuve. Gizapa vevámo gizapa lamaná i izegipama mukí netató gizapa ve loló otanogo ive.

48 Lá onoimóza, ámina izegipama gelekelé izegipa golesa noitimó nene není gizapa ve nene litá oko aminogo ive loko mulunagú gelekoko

49 hozaló izegipa lugáa nene nokepeleko itó piá nagamító ve kezagi niki minatamó neve.

50 Lá iki nikó, ámina izegipámini gizapa veva nene ámina izegipama ageva oko minamiti gamenahe itó gatizá minati gamenahe okoko

51 ámina gelekelé izegipa nene agupe apelevo hukovo okoko soza liaká ve genezáini losigi mina ve niakú alémo molanogo ive. Lá okiko ámina apakuka minoko ive nama oko miluma maluma geleko agepa atalá oko minanogo ive.

25

Zaha vená 10 keí anoza gakola

1 * Ato gamenaló nene okulumalímini gasovaló vita mogona nenémini oko neve. Vená goliló ve anogo noigo, zaha vená 10-a nenete alími vatí inigi lamu lóini aliki viki gapoló hotu lokinake zaha venáma noitoka alemoko atune liki vámó.

2 Keikutí vená 5 nene negi vená minamó. Itó vená 5 nene kagata koló onoimó.

3 Keza negi vená nenete lamu lóini aliki vámó nene nagamilagi aliki vamamó.

4 Keza kagatagi vená nenete hela nagamí nene gonigú leki miliake lamu loki nene aliki vámó.

5 Vená goliló ve nene litá oko amigo, keza zaha venáma nene kogómula ahíhí okago aki minamó.

6 Lá iki akinago, holugú akovevé nene sele makó láá loko utó imó: Vená goliló vema mota okave. Lekeza viki gapolotí alímiki ataze, vilo.

7 Liki likago, keza vená nenete otiake lamu lóini nene levonaha ali ahuliake ló ligi milamó.

⁸ Lá iake, keza negi vená nenete kagatagi mina venáma láa liki li kememó: Lekeza kalasini makó limilo. Lelí lamutegú nene nagamíma asú okago mota lihanogo noive.

⁹ Liki likago, keza kagatagi mina vená nenete láa liki li kememó: Óe, lekeza viki situakutí meina hizemave. Lekelitokagi lelitokagi vo alemiti avotigila oko minokave.

¹⁰ Liki likago, keza negi venáma situakú kalasini meina hizinigi viki niago, eza vená goliló vema anitimó. Lá okago, keza ali vavá iki mina venámagi makó itiki numukú minake vená ali kimiaká nosakutí namó. Itó gahe nene giki etoha amó.

¹¹ Lá ikago vená lugáama alika ake láa liki sele lamó: Guivahanitemaka, guivahanitemeka, gahe segeletozo.

¹²* Liki likago, eza láa loko lo kimimó: Neza lamaná lo likimitoze, gililo. Lekelí nene ma ánigo hee lamu vená niaze, vilo.

¹³ Loko Izesú nene loake, miní ameko láa loko limó: Nenemú lekeza ato gamenamú ma gilinamamó nenazo, gizapa i guni iki minalo.

Gelekelé ve losive makolemú anoza gakó

(Luk 19:11-27)

¹⁴ Atiginá inake není gizapaló mina vegentalite iki miliki inakumú goní oketatomó nenémini mogonamú anoza gakó makó lá onoise. Ve makolímō venoni vinogo noko gelekelé izegipala sele lo kemekago, ikago, aí netá mukí nene gizapa initatave loko kigizakú molamó.

¹⁵ Eza nene gelekelé izegipalatini mogonamú itó zámuzáinimú hamopamó geleneike nenémini avotigila oko moni nene gona moloko kimimó. Ve makó nene 5 tausen kina amimó. Ve makó nene 2 tausen kina amimó. Ve makó nene 1 tausen kina amimó. Lá oake nene, gapo hána venoni vimó.

¹⁶ Vokago, ámina 5 tausen kina ami vemámo vike pisinisi ike polopeti moni 5 tausen kina makó ale utó imó.

¹⁷ Itó eza 2 tausen kina ami vemámo ámináminoko pisinisi ike 2 tausen kina ale utó imó.

¹⁸ Itó 1 tausen kina ali vemámo agulizaki vemámini moni nene aleko vike mikasigú gale legeake gale zimó.

¹⁹ Gamená hána oko vokago, gelekelé izegipatini kugulizaki vema atiginá oake ámina moni gozapá kemeneikumú nene gakó hoza aliki ali hee litave loko gelekelé izegipama sele lo kimimó.

²⁰ Lá okago ámina 5 tausen kina ali ve nenémo ake láa loko limó: Gugulizaki venemaka, ánígozo. Geza 5 tausen kina nemenimó nene neza viko pisinisi uke 5 tausen kina goha makó ale miní ameko ale utó okuke aleko nouve.

²¹ Loko loake amekago, eza agulizaki vevámo láa loko lo amimó: Geza gelekelé ve lamaná noane. Geza vatí oko hozaló gizapa lamaná okane. Hoza komaló ale guni oko gizapa lamaná okanize, nenemú mukí netá gemekugo gizapa itane. Geza oko gugulizaki vegagi logoliza vizeko minatíve.

²² Loko lo amekago, eza 2 tausen kina ami ve nenémo ake láa loko limó: Gugulizaki venemaka, ánígozo. Geza 2 tausen kina nemenimó nene aleko vuke pisinisi okuke 2 tausen kina makó goha ale miní ameko ale utó okuke aleko nouve, loko limó.

²³ Loko loake amekago, agulizaki vevámo láa loko lo amimó: Geza gelekelé ve lamaná noane. Geza vatí oko hoza lamaná oko gizapa okane. Geza hoza

* ^{25:12:} Luk 13:25

komaló ale guni oko gizapa lamaná okanize, nenemú mukí netá gemekugo gizapa itane. Geza oko gugulizaki vegagi logoliza vizeko minatíve.

²⁴ Loko lo amekago, eza 1 tausen kina ali ve nenémo ake láa loko limó: Gugulizaki venemaka, geí mogona mota gelenoumole. Geza gínikaha ve noane. Ve makolite míni zuhá inató minumuni omolokago géisi nosá aleko asutoaká noane. Itó ve makolite hoza alikago gihiláa utó okago géisi aleaká noane.

²⁵ Lá oaká noanikumú neza nehelele vizekago, ámina 1 tausen kina nene aleko voko mikasigú gale zenoumole. Ména, Geza netaka imane alitane.

²⁶ Loko lokago, ve napava nenémo anotó aleko láa loko limó: Geza hozaló ve golesa goselé vaseletó ve noane. Geza není mogona gelenane. Ve makolite míkú netá zuhá inató nosá aleko asutoaká nouve. Itó vegená makolite zuha netá gihila atilí inató minumuni omolokago netá gihila aleaká nouve.

²⁷ Nenemú není moni nene peni numukú molataninazo, nanamú neve. Lá onako neza goha inake ámina moniló míni ameke nimilinitiko voko alitonazo.

²⁸ Lá okanize, aitokati ipá iiki 10 tausen kina ale mina vema amilo.

²⁹ * Gililo. Vegená netá ali miniki gizapa lamaná iki minatamoláa nene goha míni ameko kiminogo uve. Lá onoimóza, ve makolímo netá koma ale minoko gizapa lamaná amitimó nene goha ipá oko alinogo uve.

³⁰ * Itó ámina hozaló ve goekae ovimoláa nene amisili hetó ikiko límugusi apakú lemeko ive nama oko miluma maluma geleko agepa atalá oko minanogo ive, loko limó.

Gamena napaló gona moletaati gakó

³¹ * Okulumakutí lumu ve gihila neza lapanánegi noinake agelogegi makó inake gonanalivagi siató minanogo uve.

³² Lá oko nougo, keza mikasiuka vegená mukí iki novogisaló alegesá inigave. Lá niko, neza gona moloko vegená nene kelémo losi molanogo uve. Izaló gizapa vémo meme iza kelémo haitó noikeye itó sipsip iza kelémo haitó oaká noimó nenémini oko

³³ neza sipsip izagítana nia vegená nene kelémo nigizani zamagaloka milinake, meme izagítana nia vegená nene kelémo sogaloka molanogo uve.

³⁴ Lá okinake nugulizaki ve noumó imanémina nigizani zamagaloka mina vegená nene láa loko lo kiminogo uve: Améneho nónohá zeleketa vegená neneta, gililo.

³⁵ Neza gaúna nohulugo nosánetá nimiaká amó, itó nagamikumú non-ivisigo nagamí ihimi nimiaká amó, itó veno ve loló okuke nougo numutikú nilímí miliaká amó.

³⁶ Ginegane nomigo ginegane nimiaká amó. Nivisekago nougo lekeza nasahili inimiaká amó. Nagá numukú nougo lekeza iki áninigiaká amó. Lá iaká amó nenazo, gozapá mikasi apí oko ale utó inogo Ómasímini gizapaló minata apá ale vavá oleketonoimóma nene iki alilo.

³⁷ Loko lo kemekugo, keza hee liki mina vegená nenete láa liki li niniwigave: Guivahanitemaka, leza nanahé zupa gaúna nogolago ánígokunike nosánetá gemehá neve. Itó nanahé zupa nagamikumú nogivisigo nagamí ihemo gemehá neve.

* ^{25:29:} Mat 13:12; Mak 4:25; Luk 8:18 * ^{25:30:} Mat 8:12, 22:13; Luk 13:28 * ^{25:31:} Mat 16:27, 19:28

38 Itó nanahé zupa veno ve loló oko noako numuteuka gelémo muluhá neve. Itó nanahé zupa ginegane nomigo leza ginegane gemehá neve.

39 Itó nanahé zupa givisekago noako áníguhá neve. Itó nanahé zupa nagá numukú noako áníguhá neve.

40 Liki likiko, neza nugulizaki ve noumó imanémína láa loko lo kiminogo uve: Neza lamaná lo likimitoze, gili minalo: Vegenáne zuha limiki minamoki loló oketupe liki lilí amó nene není lilí initamó gelekave.

41 Loko lo nokiminake nigizani sogaloka minata vegená nene láa loko lo kiminogo uve: Usilímini mututoni lekeza gilio.

42 Neza gaúna heleko nougo nosánetá makó nimisá amamó. Nagamikumú nonivisigo nagamí ihimi nimisá amamó.

43 Neza veno ve loló okupe nougo lekeza numutikú nilími milisá amamóma neve. Itó gineganemú vitágá nougo ginegane ma nimisá amamóma neve. Itó nagá numukú nougo itó nivisekago nougo lekeza ma iki áníginitamamóma nenazo, není ahuliiki viki ló lihamike lova lova oko nomina ló améneho Satagegi itó agelolagi ale vavá oketonoimó nenegú limilo.

44 Loko lo kemekugo, keza láa liki li nimirigave: Guivanahitemaka, geza nanahé zupa gaúna heleko noako itó nanahé zupa nagamikumú nogivisigo itó nanahé zupa veno ve loló oko noako itó nanahé zupa gineganega nomigo itó nanahé zupa givisekago noako itó nanahé zupa nagá numukú noako gelémo vatí amuhakumú lane.

45 Liki likiko, neza láa loko lo kiminogo uve: Neza lamaná lo likimitoze, gilio. Imane mikasiuka limiki mina vegenaki lá ikitamamó nenémo není lá initamamó gelekave.

46 * Loko lo kemekugo, ámina vegená nene miluma apakú viki miniki miluma asú amoakalímíni alinigave. Itó hehe liki mina vegená nene alévolé kemetamenigi minova minova oaká apató viki minanigave.

26

Izesuni apilinigi lova gizamó

(Mak 14:1-2; Luk 22:1-2; Zon 11:45-53)

1 Izesú nene ámina gakó lo leme asú oake ámina gamenaló izegipala zuha láa loko lo limike limó:

2 * Gamena losi oko vokiko gozapá avotikini asenini zeketakumú gele minoaká holisi utó inogo ive liki lekeza gilinave. Lá noiko, okulumakutí lumu ve gihila neza nene ve makolímo nimimika loko lova vetini kigizakú nelémo molokiko zohota zaló nipili hilinigave, loko limó.

3 Ámina gamenaló monó gizapa vegi guguni giziaká vegi keza Isilae vegetalitini guguni giziaká ve napatiní gizapa venini Kaiapani numuni napagú alegésá amó.

4 Keza asuguná iki Izesuni agizató aliki apili hilita gakó ligili hagili iki li hukamó.

5 Lá amóza, ámina holisigú apele helemitune. Vegenalite lova napa ali utó iki lipilikataze, liki lamó.

Petania apatoka Izesuni anuva lamanaki uveli holotamó

(Mak 14:3-9; Zon 12:1-8)

* **25:46:** Tan 12:2 * **26:2:** Gá 12:1-27

6 Izesú nene Petania numutó nene Saimon eza halamé gizaleake minake zoka vémini numukú minamó.

7* Lá noigo, vená makó aitoka ake agizakú anuva uveli meinava iteko mina netá nene gehanigitana gonigú aleake Izesú nosánetá noko noigo gotolaú leketamó.

8 Lá noigo, izegipala zuha leza ángokunike gele golesa nounike lezateloka láa loko lumenó: Anuvagi uveli lamaná nene nanamú latila noive.

9 Itó leza ámina anuvagi uveli nene hanuva minalina, vegéná meina hizitave loko kemesá nene meinava napa alekunike gohogó vegéná kumutiline.

10 Loko noguluko Izesú nene gakote geleake láa loko lo limimó: Lekeza imane vená nana igo genavagi gakó li nameve. Eza nene netá lamaná alenimikave.

11* Gohogó vegéná keza nene lekezagi miniliki viki minatamóza, neza lekezagi gamena hána minoloko voko minaminogo uve.

12 Vená imanémo gonosi milimiligú gale zinitatakumú geleake nugupeló anuvagi uveli holonimikave.

13 Neza lamaná lo likimitoze. Mukí mikasiuka není gakó lamaná imane li utó iki li kimitató li kimitató nene imane venalímini mogonamú gili zagitave liki eza loló oneta sunimú li kiminigave.

Zutá Izesuni amimika litove loko lo hutamó

(Mak 14:10-11; Luk 22:3-6)

14 Loko lokago, ámina gamenaló izegipala zuha 12-a lelikutí Kaliotó numutó ve agulizá Zutá áisi nene guguni giziaká ve napa niató vimó.

15 Vike Izesuni amimí itotó lekeza nanetá nimitune liki nigelevé. Loko lokago, keza silivá gehani 30 alitane liki li hutiake amikago,

16 eza nene Izesuni amimika linogo amapani molamó.

Izesú izegipala zuhagi asenini zekimiaká nosá namó

(Mak 14:12-21; Luk 22:7-14,21-23; Zon 13:21-30)

17 Lulu vizemi peleti niaká a holisímini ganá gamenagú nene izegipala zuha leza Izesú noitoka voko geza asenini zeketakumú gele minoaká nosánetá nene hikú viki ale vavá initatave loko nolane. Loko lokuko,

18 eza láa loko limó: Lekeza taonigú viki ve makó noitító nene viki tisamámo není gamena mota alitokaze, geí numukú asenini zekimiaká nosá nene izegipáne zuhagi nature lokago nousive liki li amilizo.

19 Loko lokago lelikutí ve lositosa nene Izesú litímimi asike asenini zekimiaká nosá ali vavá asimó.

20 Lá ikasigo gánavaló nene Izesuki izegipala zuha 12-a lezagi alegesá unike nosánetá nunimó.

21 Nosánetá noko nounike Izesú láa loko limó: Lamaná lo likimitoze, gililo. Lelekikutí makolímó nimimika linogo ive.

22 Loko lokago, leza miluma nogeleko hamopamó Guivahanitemaka, nenikumú nolape, nenikumú nolape loko loká miká otunimó.

23* Lá okuko, Izesú láa loko lo limimó: Hamó lapegu peleti nagamí zeko nonousi ve nenémo nimimika linogo ive.

24 Okulumakutí lumu ve gihila nenikumú monó gotolaú luhuva gizinamómámini oko hilito gapogú novumóza, nimimika liti ve agae, lihima sipisi alitimó nenazo, izolaho aí getamilina nene vávani oko minaline.

²⁵ Loko lokago, amimika liti ve Zutá nene láa loko limó: Tisalemaka, nenikumú nolape. Loko lokago, Izesú nene gezaka mota lokanimole loko limó.

Lepa nosá apí oko kimimó

(Mak 14:22-26; Luk 22:15-20; 1 Koli 11:24-25)

²⁶ Nosánetá nonunike Izesú nene peleti aleake Ómasi agepoka loake gitegeko izegipala zuha nolimike láa loko limó: Aliki nalo. Imane není mémeláne neve.

²⁷ Loko loake, vain goni aleake Ómasi agepoka loake nolimike láa loko limó: Lekeza mukitó nalo.

²⁸* Lo múnaheáká gakolímimi golaníne nene vegena mukilitini lihimáini gilatoketative loko lekitomó imane neve.

²⁹ Lamaná lo likimitoze, gililo. Vain nagalímini gihilagutí goha naminake minoloko vinake améneho nugulizaki velini loló onetati gamenaló vain nagamí haitolímimi lekezagi makó nature.

³⁰ Loko loake, monó nama makó lunike lemeko Olivi agokaú itinogo vuhä.

Izesuni Pitá egamega otatikumú lo utó imó

(Mak 14:27-31; Luk 22:31-34; Zon 13:36-38)

³¹* Agokaloka itinogo nounike Izesú láa loko lo limimó: Monó gotolaú Ómasímo li gakó makó láa liki gizinamóma neve:

Gizapa ve apelekugo sipsip iza mulusi nene hutilí iki golisi inigave.

Liki gizinamóma nenazo, itína holugú lekeza mukitó golisi iiki visilintatamóza,

³²* helekugo, goha nelémo otekiko, Galilaia mikasiuka goí o lekemecko vitove.

³³ Loko lokago, anotó aleko Pitá láa loko lo amike limó: Nénisi viselegetamitove. Keza mukitó gele alévolé oakáini nene golo golo sokikoma, neza lá aminogo uve.

³⁴ Loko lokago, Izesú láa loko lo amimó: Lamaná lo gimitoze, gelezo. Itína holugú nene okolohomámo anó molonamiko nenikumó ánígamuve loko egamega onetatanimó nene gamena losive makole inogo ive.

³⁵ Loko lokago, Pitá láa loko lo amimó: Neza nene geikumú egamega ogetaminogo uve. Nipili hilinigi niko gezagi makó heleksigoma lá ogemaminogo uve. Loko lokago, izegipala zuha mukitó leza láa lokogó lunimó.

Izesú Gesemane zazuhagú Ómasiloka loko minamó

(Mak 14:32-42; Luk 22:39-46)

³⁶ Loko lokuko Izesú nene izegipala zuhamagi apá makó agulizá Gese-mane nenenloka makó vuhä. Vo anitekunike láa loko lo limimó: Lekeza nene imaneló niko neza volaneloka vokinake Ómasiloka litove.

³⁷ Loko loake Pitani itó Zepetaioni gipala losigi nene kelémoko vimó. Nivake mulunagú peisi nozigo miluma golesa gilike

³⁸ láa loko lo kimimó: Neza mulúnegú nene gónpa geake hilitomó onoive. Lekeza imaneló miniki nenikumú gizapa iki niko makó gizapa oko mi-nature.

³⁹ Loko loake koma minomo novike avogisalokatí pou loko agoka hizeko nakake Ómasiloka láa loko limó: Aménega, gapo neikoma geza genavagi gihinitata netá imane ale ahulonetatane loko nolumóza, není nigikaloka ale molamoko geí gigikaloka nelémo molatane loko noluve.

* 26:28: Gá 24:8; Zel 31:31-34

* 26:31: Zak 13:7

* 26:32: Mat 28:16

40 Loko loake, goha ake, izegipala zuhama kovó akinago áingoake, Pitani alémo oteko láa loko lo amimó: Lekeza nene nana ive. Nezagi gizapa oko mininake gamena koma ma otí minamitamó nehe.

41 Lekemekú milatakumú gopa ikataze, lekeza gizapa iki miniki Ómasiloka liki minalo. Ligikámo vávani noimóza, lugupémo gena noive.

42 Loko loake, goha vike Ómasiloka like láa loko limó: Aménega, genavagi netá imanémo nivilege vamitimó noikoma, geí gigikaloka nelémo molozo.

43 Loko loake, goha oko ánigamó nene kogómula ahihí okago, kovó akinago ánigamó.

44 Ahulokimiaké goha vike Ómasiloka ligó gamena losive makoki imó. Goí oko vike Ómasiloka limómámini okogó limó.

45 Loko loake, goha ake izegipala zuha lelémo otike láa loko lo limimó: Lekeza nanamú lakavasú viziki hanuva aki nimirave. Gilinahe. Okulumakutí lumu ve gihila nimimika liki lihimáinigi vetini kigizakú nilími milata gamena mota okave.

46 Lá onoize, lekeza otiiki viló. Ánigalo. Nimimika liti vema alító mota okave.

Izesuni amimika lokago alemó

(Mak 14:43-50; Luk 22:47-53; Zon 18:3-12)

47 Izesú gakó lo limi agepagi izegipala zuha 12 lelikutí makó Zutá noago, vegená mukí ámegetiki niake sopoló hánagi gelekahosigi ali minake amó. Keza nene guguni giziaká vete itó Zuta vetini monó gizapa vete emane amunaloka kimisilikago vamó.

48 Nivake Izesuni amimí inogo i vémo gakó makó lo kimike láa loko limó: Neza vinake ve makó nene agoka legeko nonugoma ániiki ámina ve noive liki nigiliki agizató alilo.

49 Loko loake, ake, Izesú noitó litá oko vo amatoka aniteake, oho, Tisalema, nene noape loko loake, agoka legeko namó.

50 Lá noigo, Izesú láa loko lo amimó: Nigive, geza loló inogo noani netá nene litá oko loló ozo. Loko noligo, lova ve nenete ake Izesuni agizató ali gikitiki alemó.

51 Nalego Izesuki makó minuhakutí makolímo sopoló hánaga nene golagutí aleko gelelehá oake guguni gizoaká ve napámíni gelekelé izegipa apilike agata zeko isimó.

52 Lá okago, Izesú láa loko lo amimó: Sopoloka nene alenikuka goha ale molozo. Lekeza sopolotunú geza okaní geza okaní liki likipili gesá ikataze.

53 Geza nene gelemape. Neza aménehitoka litomó nene litá oko ageló nene lovámíni galaváa mulusi napa 12-a nene kimiselekiko limiki nilími vatí inigave.

54 Lá itamóza, lá okugo Ómasímini luhuva nenémo nana oko gihila zitive. Gozapá monó gotolaú nenéminoko utó itive liki luhuva gizinamóma neve.

55* Loko loake, ámina gamenaló ali nupa ina vegená nene Izesú láa loko lo kimike limó: Lekeza nenikumú gelemó nene geligeli ve nougo sopoló hánagi gelekahosigi aliki niake nigizató alinigi niahe. Neza gamena gamena monó zugusaveú minuke monó lo keme keme oko minumómaló nene nigizató alemamó nehe.

* **26:55:** Luk 19:47, 21:37

56 Lá ikamóza, Ómasímini agepagutí gakó liaká a vete emane amunaló monó gotolaú nenikumú luhuva gizina gakó nene gihila zitive loko netá mukí imane utó noive. Loko lokago, izegipala zuha leza Izesuni ahulomikunike golisi hutilí oko vunimó.

*Kansoletini kogómulaló Izesuni goní itamó
(Mak 14:53-65; Luk 22:54-55,63-71; Zon 18:13-14,19-24)*

57 Izesuni agizató aliake guguni giziaká vetini ve napa Kaiapani numukú alími ki vake keza monó mogona apí ikimiaká vegi itó monó gizapa vegi ali nupa iki minató alími ki vamó.

58 Lá niago Pitá nene hotó otigí oko kêmegetoko vike guguni giziaká vetini ve napámini hé numunaló áneneló vo aniteake, iteake pilisi vegi minake neneneló goní itatakutí nana netá utó itihe loko gizapa oko minamó.

59 Lá noigo, guguni giziaká ve napagi monó kansolegi mukító nene Izesuni apele hilitune liki soza hakupá gakónimú vitágá amóza,

60 ma ali utó amamó. Mukilite ake Izesukumú soza hakupá gakó lamóza, liki amupesamó. Lá iva iva niakte ve lositá nenetosa otikasike

61 * láa liki lasimó: Imane vémo nene Ómasímini monó zugusave zeko tele vizekinake gamena losive makolegó oko noviko goha hanuva gitomó neve loko noligo gulusimóma neve.

62 Liki likasigo, guguni giziaká vetini ve napa nenémo oteake Izesuni láa loko lo amimó: Geza goní nigitasike nilasi gakotó ale viligoko lo kimitani gakó ma nomihe, olo.

63 Loko lokago, Izesú agepa apizeake minokago, eza ve napa nenémo láa loko lo amimó: Alévolé Ómasímini avogisaló lo utó itane loko nologetuve. Geza Ómasímini gipala gologí oletatane loko lo mologeta vema noape loko lo lemezo.

64 * Loko lokago, Izesú láa loko lo amimó: Nene geza mota lokanimóza, neza makó láa loko lo nolukumuve: Imane gamenámini veletó nene okulumakutí lumu ve gihila neza amuza vémini agizani zamagaloka nougo, itó okulumálímini límusi amupiló nolumugo ániganigave.

65 * Loko lokago, guguni giziaká vetini ve napa nenémo gele golesa oake luhoaká gola aleko polo noligike láa loko limó: Mota Ómasi aviliginogo lokave. Gakola gilinita vegená makó nanamú sele lokinake gakola makó litune. Eza Ómasi avilegeko li gakó lekeza itínasa mota gilikave.

66 Nenemú lekeza nana otatune liki nigelevé. Loko lokago, keza nakahunímini gakó lokaze, mota hilitive.

67 * Liki liake, lugáate Izesuni agoka agepagú gituhú nitake kigizanitunú napelego, lugáate agoka agepaló nihitake kigizanitunú napeleke

68 gologí okimiaká ve nene ka, geza gakó mogona geleká ve noitanimó nene éaho nogipilihe lo utó oko lo lemezo liki li amemo.

*Pitá Izesuni egamega otamó
(Mak 14:66-72; Luk 22:56-62; Zon 18:15-18,25-27)*

69 Lá niago, Pitá nene hé numunaló noigo guguni giziaká vetini ve napámini gelekelé mohó makolímo Pitá noitó oake, geza Galilaia mikasigutí ve Izesuki miniaká niasi vema noane,

70 loko lo amekago, eza vegená kovogisaló egamega ike gakó lanimó nene ma gelemuve. Loko loake,

71 hé numunamámini gatetó lemeko noigo, gelekelé mohó makolímo aí áingoiko áminaló mina vegená nene láa loko lo kimimó: Ve imanémo Nasalete numutotí ve Izesuki miniaká asi vema noinae.

72 Loko lokago, Pitá goha egamega ike láa loko limó: Ómasímini avogisaló nigizani ale oteko lamaná noluve. Ma ánígonamu vemú nolane.

73 Loko loake, gamena komáisí noigo, áminaló oti mina ve nenete Pitá noitoka ake láa liki li amemó: Lamaná nilave, geza ámina vémini zuhagutí noane. Gonó lupámo geí Galilaia mikasiukatí mogonaka ale utó okave.

74 Liki likago, Pitá nene Ómasímini avogisaló lo hutoko lamaná noluve, ámina ve nene ánígonamuve. Soza litomó nene Ómasímo usí vizenimikatize, loko limó. Loko noli agepagi litá oko okolocho nenémo anó molamó.

75 Anó molokago, Pitá nene Izesú nene okolocho renémo anó molonamiko není ánígonamuve loko egamega onetatanímó nene gamena losive makole inogo ive loko lo ami gakó goha agata geleake, lemeko hetoka ive napa imó.

27

Izesuni Pilató noitoka alímkí vamó (Mak 15:1; Luk 23:1-2; Zon 18:28-32)

1 Neteká ho noitigo, guguni giziaká ve napagi itó monó gizapa vegi Izesuni apili hilita gakó li hukamó.

2 Lá niake nagá ziki alímkí agulizaki ve Pilató noitoka goní itanigi alímkí vamó.

Zutá hilimó

3 Zutá eza Izesuni amimika li ve nenémo ánígamó nene Izesunima goní nitake hilitive liki gakó li hukimikago, Zutá nene goha agika ale viligoake silivá moni 30-ma nene guguni giziaká ve napagi itó monó gizapa vegi minatoka aleko atiginá oko voko kimimó.

4 Lá noike láa loko limó: Neza lihima alenouve. Eza lihimavala nomi vema amimika lokugo hilinogo noive. Loko limóza, nene lelí netá nomive. Geí netaka neve.

5* Liki likago, eza Zutá nene ámina silivá moni 30 nene aleko itike monó numuni napagú hutilí oko ahuloake, lemeake vike nagá imó.

6 Lá okago keza guguni giziaká vemate ámina silivá moni 30 nene aliake láa liki lamó: Imane hutono moni nene ve makó hilinogo imómámini moni neve. Kezeza nenémi moni nene monó numukú milamilo liki li hukinamóma neve.

7 Liki liake, ligili hagili iake gakó makó li hukamó. Lá iake mikasi mulalokatí vetini gonomos milimili minative liki mikasi agulizá nene mikasi somo lilí iaká vetini mikasi nene meina hizemó.

8 Lá iake ámina mikasi agulizá nene gola mikasive liki milamó. Ámina agulizá nene itínasagi nene hanuva neve.

9* Lá onoigo gakó makó gozapá Ómasímini agepagutí gakó loaká ve Zelemiani agepagú lo mola gakó nene gihila zimó. Láa loko luhuva gizamóma neve: Keza ámina silivá moni 30 alemó nene Isilae vegenalite monimú li milamó

imané vémini meinavamú neve liki linamóma nenazo,

10 ámina moni aliake mikasi somo lilí iaká nia vetini mikasi meina hizemó nene Guivahanímo lo nimitó neve.

* 27:5: Apo 1:18-19 * 27:9: Zak 11:12-13

*Pilató Izesuni mogonamú loká otamó
(Mak 15:2-5; Luk 23:3-5; Zon 18:33-38)*

¹¹ Izesuni nene alími ki vake kugulizaki vetini ve napa Pilatoni avogisaló hizi otitamó. Lá ikago, eza agulizaki vemámo loká otake láa loko limó: Geza nene Zuta vetini kugulizaki ve napáini noape. Loko lokago, Izesú nene gezaka mota lokanimole.

¹² Loko lokago, guguni giziaká vemagi itó monó gizapa vemagi keza Izesunimú hizi miliki gakó nilago, eza la gakotó ma lo kememigo,

¹³ Pilató nene láa loko limó: Geza nene mukí gakó liki goní nigitamó nene gelemape.

¹⁴ Loko limóza, Pilató li gakotó ma viligoko lo amemimó. Lá noigo kugulizaki vetini ve napa Pilató nene agata gululusi gilimó.

*Izesú hilitive liki goní itamó
(Mak 15:6-15; Luk 23:13-25; Zon 18:39-19:6)*

¹⁵ Asenini zeketakumú gili mina holisi gamena meleketó meleketó nene Zuta ve vená nenete aseva zetatune liki ve makolímimi agulizá ikago agulizaki ve nenémo nagá numukú mina ve nene kimisele ahuloká ahuloká okago nene, ámina ve keitoka viaká amó.

¹⁶ Ámina gamenaló nene ve makó agulizá hutilí oko vi ve nene nagá numukú minamó, Izesuni apolahö agulizá napa nene Palapasí.

¹⁷ Lá okago, ve vená alegesá ikago, Pilató loká oketake lekeza éahini aseva zemikugo lekelitoka vitive liki nilave. Gologí olimiaká veve liki lina ve Izesuni aseva zetatohe, itó Izesuni apolahini Palapasini aseva zetatohe.

¹⁸ Loko limó nene keza Izesukumú amekugú niki miniake gonító alími utó amó nenemú Pilató geleneike loká oketamó.

¹⁹ Itó Pilató nene goní gakó lo hukoaká siató noigo, venala nenémo aitoka gakó lo ahulake láa loko limó: Geza nene ámina hehe loko noi vemámini agupeloka gakó ma lo molotamo. Itína holugú nene vamó makó ánigo amekuke aikumule loko miluma napa gelemikuve, loko limó.

²⁰ Itó guguni giziaká ve napamagi itó monó gizapa vemagi vegenalitini mulúikú hiziki láa liki nilago, Palapasini aseva zetative liki Pilatotoka nilake Izesuni nene apili hilitave liki lamó.

²¹ Liki likago, eza agulizaki vemámo ve losi imane niasimó nene éahini ahulomikugo lekelitoka vitive. Loko lokago, Palapasinive liki lamó.

²² Liki likago, Pilató nene lá okinake vegená mukilite gologí olimiaká noi veve liki lina ve Izesuni nene nana otatove. Loko loká okimikago, keza zohota zaló nagá otamane liki lamó.

²³ Liki likago, Pilató eza nanamú neve limó. Eza nana netá golesa alekago nilave, loko limóza keza zohota zaló nagá otamane liki pigi viziki lamó.

²⁴* Liki likago, Pilató gilimó nene eza liti gakó nene ma vo alemitimó oake lova napa utó itimó okago, eza nene vegenalitini kovogisaló nagamí aleake agizani nagamí zimó. Lá noike láa loko limó: Imane ve apili hilitatímimi lihimá nenitoka ma minaminogo ive. Nene lekelí netale.

²⁵ Loko lokago, keza vegená mukí nenete anotó aliki láa liki lamó: Ámina lihimá nene lezalokagi itó izegipa lagapilamotokagi minino.

* **27:24:** Gapo 21:6-9

26 Liki likago, Pilató nene Palapasini gologí omikago keitoka vimó. Itó Pilató lokago, Izesuni nene segi nogosanitunú apilikago zohota zaló nilitunú ziki apili hilitave loko pilisí vetini kigizakú molamó.

*Pilisí vete Izesuni gopoguni militamó
(Mak 15:16-20; Zon 19:2-3)*

27 Lá okago agulizaki vemámini pilisí vevate Izesuni nene alímiki agulizaki vemámini numuna napagú nene iteke keza ámina pilisí ve mukitoka nene kilími nupa amó.

28 Lá iake agulizaki veginana lilí itake Izesuni ginegane nene gololohá iki ali miliake ginegane okohu gó nene luhiimiake,

29 gasovagi nagatunú nene akilí lilí iake gotolaló hitimiake, agizani zamagaloka nene akepa nogosaní makó amikago ale minamó. Lá onoigo, pilisí vete amatoka iki kalapusa hizeke gopoguka litake láa liki lamó: Oga, mokáneve, Zuta vetini kugulizaki veninimave.

30 Liki nilake agoka agepagú gituhú nitake ámina akepa nogosaní nene alíake gotolaló zemó.

31 Ziake gopoguka li asú itake okohu gó luhitamó nene gololohá iake ezáa gineganeva nene goha luhitamó. Luhiimiake zohota zaló nilitunú ziki apili hilinigi alímiki vamó.

*Izesuni nene zohota zaló apelemó
(Mak 15:21-32; Luk 23:26-43; Zon 19:17-27)*

32 Lá inigi nivake Apilika mikasiukatié Sailini apatotí ve makó agulizá Saimon nene gapoló noago ániigiae Izesuni alémo vatí oko zohota zava gehetative liki gala vizikago,

33 makó vake apá makotó vamó, agulizá Goligota, nene agulizalímini mogona nene gotóini gonosi helisa apale loko.

34 Neneló anitiakte Izesú native liki vain nagamiki ekesá netaki ali gopa iake miluma gelemitive liki amemó. Amikago eza nene no geleake namike hanuva minamó.

35* Lá okago, zohota zaló apilikí apatemó. Lá iake gineganeva nene éaho alitihe éaho alitihe liake kezáini nene satu zohí amó.

36 Lá niake áminaló nene gizapa iki minamó.

37 Velé gotolaloka nene goní ita gakó nene láa liki luhuva gizikago minamó: Imane ve nene Izesú ave Zuta vetini kugulizaki veninive.

38 Liki luhuva giziaké Izesuni amatoka nene guminaló ve geligeli ve lositá nene makó nene agizani sogaloka apatiakte itó makó nene agizani zamagaloka kipiliki apatemó.

39* Lá inake keza vegéná vigá igá amó nenete gotóini goké goké nizeke amé ziki gopoguka litake,

40* láa liki lamó: Geza nene monó zugusave zeko tele vizekoko gamena losive makolegó oko vokiko gitomó neve loko loaká noanimóma neze, geza gugupeka alémo agutó vizemane. Geza Ómasímimi gipala nouve lokoma zohota za nene ahulokoko lememané.

41 Liki nilago, keza guguni giziaká ve napamagi itó monó mogona apí ikimiaká ve itó monó gizapa vemagi hamolíminiki amé ziki gopoguka litake láa liki lamó:

* 27:35: Age 22:18 * 27:39: Age 22:7, 109:25 * 27:40: Mat 26:61; Zon 2:19

42 Vegená lugáa kelémo kugutó vizeaká imóza ezáa nene alémo agutó vizemitimó okave. Eza Isilae vetini agulizaki vema noitimó nene itinasa zohota zalotí apasokoko limitinae. Lemekiko leza aikumú gele alévolé itinipazo.

43* Eza nene Ómasimú gele alévolé onoike neza nene Ómasímini gipala nouve loko limó nenazo, Ómasímo aikumú geleneitimó nene itína alémo agutó vizitimole.

44 Liki likago, gumináló geligeli ve losi Izesuni agilika luga luga zohota zaló kipiliki apatemó nenetosagi ámináminiki amé zitigí iki lasimó.

Izesú hilímó

(Mak 15:33-41; Luk 23:44-49; Zon 19:28-30)

45 Holisáká nene mukí mikasiuka límugusi ze asú oake minoloko novigo únaká ho ale zohota imó.

46* Únaká ho ale zohota noigo, Izesú pigi vizeko ezáa gakokutí nene Eli Eli lema sapakatani loko limó. Lelí gakotegutí nene Ómasinemaka, Ómasinemaka, geza nanamú viselenimikane.

47 Láa loko lokago amatoka mina ve lugáate ámina gakó giliake imane vémo Ilaizáni sele nolive.

48* Liki liake, keikutí makolímo ololu loko vike notunigitana netá aleake akepa lolovaló hizeake vike ekesá vain nagamikú lupizeake, Izesú native loko aminogo noigo,

49 lugáate láa liki lamó: Ánígonozo, Ilaizá oko alémo agutó vizitihe, gizapa onoitune.

50 Liki nilago, Izesú nene gakó napagutí nolike sikalahula ahulokago vimó.

51* Lá noigo, áminasító monó zugusaveú Ómasímini avogisaló iteaká gatetó zi lí ika lavolavo nene veletokati zeko hoú loloko limike ale luga luga imó nene lelí gahe ale koló oletamó. Lá noigo mikasi imimá noikeyehani napa napa nene zevo hoú lovo imó.

52 Lá noigo, gonosi milimili gale makó nene koló noigo, Ómasímini vegenala zuha lugáa gozapá hilina vegená nene otémó.

53 Gonosi milimili ahuli asú iake Izesú nene galegutí otekago viki Zelusale numutoka itikago, mukí vegenalite ánigamó.

54 Itó pilisí vetini ve napagi pilisí vegi Izesuniló gizapa iki minake, mikasi nene imimá imó itó haitopaitó netá mukí utó itímo kehelele goha vizekago, imane ve nene lamaná Ómasímini gipala minamó neve liki lamó.

55* Itó vená mukí minamó keza nene amunaló Galilaia mikasi ahuliaké Izesuni izamuha hiziki ámegetiki viaká a vená nene hotó otigí iki minake ánigi minamó.

56 Keikutí Magatala numutotí vená Maliá minamó itó Maliá makó nene Zemusiko Zoseheko keí izóipo, itó vená makó nene Zepetaioni venala minamó.

Izesuni gale zitamó

(Mak 15:42-47; Luk 23:50-55; Zon 19:38-42)

57 Únaká huluvaló henonavagi ve makó Alimataia apatotí ve agulizá Zosehé eza goí oko Izesuni izegipala zuha minamó.

58 Eza nene Izesuni gonosiváa alinogo nene voko Pilatoni loká imó. Loká okago, Pilató nene gonosiváa ali amilo loko lokago, gili amemó.

* 27:43: Age 22:8 * 27:46: Age 22:1 * 27:48: Age 69:21 * 27:51: Gá 26:31-33 * 27:55: Luk 8:2-3

59 Gili amikago, Zosehé nene lavolavo gó gosohá mokoná lamanatunú nene asapú imó.

60 Lá oake gonosi nene ezáa gonosi milimiliva gosohakú aleko voko molamó. Gonosi milimili nene meikú nego mulí ezáa goló vateikamó nenegú molomiake gehani napa makó nene ahelú ahelú oko aleko vike gonosi gale agepaló nene ze lí imó.

61 Lá noigo, vená lositá minasimó, makó nene Magatala numutotí vená Maliá itó Maliá makó minasike gonosi gale ávatihá ánígi minasimó.

Gonosi galeló gizapa itamó

62 Lá ikasigo, gó lokago holisi gamenamámini nosánetá ale vavá oaká gamena vokago guguni giziaká ve napagi itó Palisaio monó vegi viki Pilatotoka alegesá amó.

63 * Ake láa liki lamó: Ve napale leza gakó ma gelekunike noune. Ámina sozaló ve nene ha agómulagi noiķe gamena losive makole vokiko neza otinogo uve loko limómámini okatize.

64 Nenemú pilisí ve makó kimiselekako, viki gonosi gale agepamaló nene gamena losive makole etoha iki gizapa itave. Izegipala zuhamate gonsiváa gumina iki aliki viiki vegéná nene gonosi galegutí mota otekave liki li kimikatanaze. Goí oko soza gakó limó nene alika soza gakó litatímo avilegeikanogo ive.

65 Liki likago, Pilató láa loko lo kimimó: Lekeza pilisí ve makoki kilímiki vilo. Ámina gonosi gale agepaló nene lekeza itatímini avotigila iki gehanima zi lí ilo.

66 Loko lokago, keza nene vake gonosi gale agepaló zi hita gehani nene alévolé oko minative liki anosa miliki nagá makó alemó. Lá iake lovámini galaváa nene áminaló gizapa itave liki ahulikitamó.

28

Izesú heleneikutí otimó

(Mak 16:1-10; Luk 24:1-12; Zon 20:1-10)

1 Holisi gamena asú okago, Sategú neteká ho itinogo noigo, Magatala numutotí vená Maliá itó Maliá makómagi gonosi galema ánganigi vasimó.

2 Nivasigo genémané mikasi nene imimá napa imó nene Guivahanímini ageló makó nene okulumakutí lemeake gehani napa nene gonosi gale agepaló zi hitamóma nene ahelú oko alahuloake ámina geható nene ase hizeko noigo imimá napa imó.

3 Noigo agoka agepa nene gó melevezakitana oko noigo luhoaká gola nene gizopa nukúnukú loko minamó.

4 Lá okago, lovámini gala ve keza nenemú kehelele vizekago luvolovo ziake hele vegenakitana iki zámuzáini mieglelél amó.

5 Lá noigo vená lositáma tizikasigo ageló nenémo láa loko lo kimimó: Lekeza lekehelele vizemino. Lekeza zohota zaló apiliki apate ve Izesuni ánganigi niasive loko gelenoumole.

6 Eza imanegú noamive. Lá okove gozapá ezáa litó mota otekave. Láa loko lekeza iki ámina ve ako mina apá ángalizo.

* **27:63:** Mat 16:21, 17:23, 20:19; Mak 8:31, 9:31, 10:33-34; Luk 9:22, 18:31-33

⁷ Lá iiki litá iki viiki izegipala zuhama galegutí nene mota otekave. Goí o lekemeko Galilaia mikasiuka novive. Lekeza viki neneloka aí nene ánganigave liki li kimilizo. Nene lo lekemenoumómámini okove.

⁸ Loko lo kemekago, keza vená losi nene kehelele novizigo itó kogoliza nivizesike hetoka lemesike geha mulikutí litá iki ololu liki vasike aikumú izegipala zuhama li kiminigi vasimó.

⁹ Nivasigo, Izesuki gapoloka galinali hotu liake, eza nene niasihe loko lo kimimó. Loko noligo, keza nene vi alitikasike agisaló alesimó. Lá niasike gupá zi amiki agepoka lasimó.

¹⁰ Nilasigo, Izesú láá loko lo kimike limó: Lekeza lekehelele vizemino. Lekeza viki nugunáne nene Galilaia mikasiuka viiki keza nene není neneloka ánganigave liki li kimilizo loko nene limó.

Lova vete Izesú otí gakó avetó iki li kememó

¹¹ Keza vená losima nene gapo miliki nivasigo, gale agepaló gizapa imina ve lugáamate viake taonigú itemó. Itiake guguni giziaká ve napama nene utó i netakumú avetó iki li kememó.

¹² Li kimikago, keza guguni giziaká vemagi itó monó ve napamagi ali nupa ake gakó makó ligili hagili ake gakó makó li milamó. Lá ake lovámini galaváama nene age nonó gehani mukí kememó.

¹³ Nikemeke láá liki lamó: Lekeza nene láá likigó lilo: Leza ako helenouko holugú nene izegipala zuhate ake gonosiváa gumina iki aliki vikave likigó nene lilo.

¹⁴ Itó agulizaki ve napamámo ámina gakoláa gelekoko nolikoma, leza gakó makó lo aminogo une. Lekezaloka gakó makó minaminogo ive.

¹⁵ Liki likago, keza lovámini gala vemate la gakotó amegetatave milamó. Lá ikago ámina gakoláa nene Zuta vetiniuka hutilí oko vo asú okago, itínasa gamenagi nene ámina gakokó liaká niamole.

Izesú aposolo 11-a monó hozaló kimisilímó

(Mak 16:14-18; Luk 24:36-49; Zon 20:19-23; Apo 1:6-8)

¹⁶* Izegipala zuha 11 leza Galilaia mikasiuka vuniike Izesú nene agoka makotoka vitave loko lo limitó nene itekunike,

¹⁷ Izesuni ángokunike gupá zeko agepoka lunimóza, makó lugáate nene heleneikutí lamaná oteko áisi noihe liki kagata losi gelemó.

¹⁸ Lá ikago Izesú nene omo altoake gakó lo nolimike láá loko limó: Ómasi nenémo okulumalímini mikasímini zámuza nene nenikó neme asú onoimóma neve.

¹⁹ Nenemú lekeza mikasi nekisa vokisauka viki vegená mukí nene kilími není izegipáne zuha lilí ilo. Lá niiki aménehimi agulizató itó gipala není nugulizató itó Sikalahulímini agulizató kilími nupa iki monó nagamí hilikitalo.

²⁰ Lá niiki nénisi loleketonou gakotó ámegetatave liki lainim-ikitalo. Gili-nahe. Imane mikasímini gamena asú onamiko neza nene lekezagí makó mino-loko voko minanogo uve, loko limó.

* **28:16:** Mat 26:32; Mak 14:28

Izesu Kilistoni Gakó Lamaná Makí Luhuva Gizamó

Nagamí holokimiaká ve Zoní Izesuni gapo veletamó
(Mat 3:1-12; Luk 3:1-18; Zon 1:19-28)

¹ Izesu Kilstó Ómasímini gipalamú gakó lamaná nene lá oko apí imó neve.

²* Nenémimi gakoláá Ómasímo gipala lo ami gakó nene Ómasímini agepagutí gakó loaká ve Isaiá láá loko luhuva gizamóma neve:

Gelezo, není gakó lo keme keme iti ve amiselekugo,
áisi ale goí oko voko kigikagú hoza alitanimó nenémimi gapoga velegetative.

³* Mikasi gomopalaló ámina vémo gakó napagutí láá loko nolive:
Guivahanímú nene likigika ali hee litalo.

Likigikagú limiti gapo ali hee litalo.

⁴ Ámina gakó Zonitoka okago eza mikasi gomopalaló vo anitimó nene ve-
gená makó eza noitoka ali nupa ikago likigika ali viligiiki nenémimi mogona
utó itive liki monó nagamí hilitamó nene Ómasímo lihimatini ahuloleketative
loko lo utó oko lo kemeko minamó.

⁵ Lá okago, Zelusale numutokatí itó Zutaia apá makotokatí nene mukí
vegená Zoní noitoka vake lihimáini li utó ikago, Zota nagamikú monó
nagamí holoketamó.

⁶* Zoní nene Ómasímini agepagutí gakó loaká ve Ilaizakitana oko kamele
iza zopovatunú liliá gó luhoake, itó iza galupavatunú liliá a holotani nene
gohalaló zeake, ganuki himoni nogozagigó noko minamó.

⁷ Noko minake, láá loko lo utó oko lo kemeko minamó: Nemegesaloka noa
ve aí zámuza nenémo není zámuza nivilegekave. Nénisi ánémama aí lelegító
minamunazo, hoza lagasó aletoko aí gasa gó ate akisitomó nene etaminogo
ive.

⁸ Nénisi nagamikó nohololeketumóza, áisi nene Ómasímini Sikalahú
hololeketanogo ive, loko lo kimimó.

Izesú monó nagamí holamó
(Mat 3:13-17; Luk 3:21-22)

⁹ Gamena nene zupa Galilaia mikasigú nene apá makó minamó, agulizá
Nasalete. Izesú nenetotí Zoní noitoka anitekago Zota nagamikú monó
nagamí holotamó.

¹⁰ Holomikago, nagamikutí iteake ánigamó nene, okulumá koló okago,
Ómasímini Sikalahú nene nama luhusigitana oko Izesuni amupiló nolimigo
ánigamó.

¹¹* Lá okago okulumakutí Ómasímo gakó makó láá loko limó: Geza nene
nigika amenou gipáne noane. Geí ánigo lamaná okuve.

Satá Izesuni amekú moloko minamó
(Mat 4:1-11; Luk 4:1-13)

¹² Loko lokago Sikalahulímo Izesuni amiselekago mikasi gomopalaló vimó.

13 Neneloka voxo noigo, gamena 40-a oko novigo Satá nene gimivagú moloko minamó. Itó Izesú eza nene hela gaha namatini holúikú noigo ageló keza nasahilí itiki minamó.

*Galilaia mikasiuka Izesú monó hoza apí imó
(Mat 4:12-17; Luk 4:14-15)*

14 Lá okago, Zonini nene nagá numukú ahulimikago noigo, Izesú nene Galilaia mikasigú vo aniteake Ómasímini gakó lamaná lo utó oko láa loko lo kimimó:

15* Gamena mota alitokaze, Ómasímo gizapa oleketati gamena nene omo alitokave. Nenemú likigika ali viligiiki gakó lamaná gili alévolé ilo, loko limó.

*Izesú lagaha aliajá ve losive losive sele lo kimimó
(Mat 4:18-22)*

16 Nominake Galilaia nonohuló agataloka mohona noigo Saimoko agunala Etuluko keza lagaha miliaká asi ve minasinazo, nonohulokú nene lagaha gotaha ahuliki minasigó. Lá niasigo ánigoake Izesú láa loko lo kimimó:

17 Némegetiki alizo. Lagaha hoza aliki minasímoma, vegematoka hoza nalisiko vegená není zuha lilí itave loko lekelémo nomuluve.

18 Loko lokago, litá iki lagaha gotahama ahulikasike ámegetiki vasimó.

19 Lá ikasigo Izesú koma makó novike Zepetaioni gipala losítá Zemusiko agunala Zoniko keza nagamikú lapegú minasike lagaha gotaha ali lamaná niasigo, ánigoake,

20 sele lo kemekago, gilikasike, améipini Zepetaiogegi gelekelé izegipalagi lapegú niago ahulikimikasike Izesuni ámegetiki vasimó.

*Holosi golesa agikagú mina ve
(Luk 4:31-37)*

21 Lá okago, keza Kapanaao numutoka viki anitiakte holisi gamena alitokago, Izesú nene monó numukú iteko monó lo kimimó.

22* Lo kemekago, gilikago, itimó. Monó mogona apí ikimiaká a vete gakó lainim oketamó nenéminko apí oketamimó. Ezáa monó gakola gale geheko lo kemekago, giliake sigaga sagaga litamó.

23 Lá okago, gamena nene zupa monó numukú ve makó minamó nene agika ale gopa i holosi agikagú minamó.

24 Eza gamoga geko Nasalete ve Izesuvu, geza nana netá golesa aleletanogo noane. Géisi lelémo golesa itove loko noape. Geí ánigo hee hee noluve. Géisi Ómasilokátí etó oko noani vema noane.

25 Loko lokago, Izesú nene gahá amike gegepa apizeoko agikagutí iteko legesó oko vozó.

26 Loko lomikago, agika ale gopa i holosi nenémo ale helonalo lomikago, gopaga nolike agikagutí iteko ahulomiakte vimó.

27 Lá okago ve vená mukí keza ininá ake kezáitoka loká loká ake lamó: Íi, imane nana suni neve. Monó nene haitolímini amuzavagi neve. Áisi gakola gale geheko holosima lokimikago gili amiaká niave.

28 Liki likago, aikumú gakoláa likago litá oko Galilaia mikasiuka puu loko vimó.

*Izesú Pitani venalámini izolahini alémo zokamó
(Mat 8:14-15; Luk 4:38-39)*

* **1:15:** Mat 3:2 * **1:22:** Mat 7:28-29

29 Lá okago, monó numukutí limiake, Saimon itó Etulú keí numukú Zemusigegi Zonigegi itemó.

30 Saimoni venalámini izolahini agupegú ló la netá avisekago akonoigo, Izesuni litá iki li amemó.

31 Li amikago, vo aniteake agizató aleko alémo otekago, agupegú ló la netá nenémo litá oko asú omikago, oteake Izesugini nasahili oketamó.

Ho lemekago Izesú vegeñá mukí kelémo zokamó
(Mat 8:16-17; Luk 4:40-41)

32 Lá noigo, únaká ho lemekago, mukí kivisi vegeñaki kigikagú holosi golesa mina vegeñaki Izesutoka kilímiki ikago,

33 apá amelage mukí iki gatetó alegesá amó.

34 Lá ikago, haitopaitó netá kivisi vegeñá mukí kelémo zokoake holosi golesa mukí nene kigikagutí kepeleko kimisilimó. Lá itó nene ánigi hee hee likanazo, ái mogona lili ali amitave loko lo hukoketamó.

Izesú monó lo kemeko mohona imó
(Luk 4:42-44)

35 Gó lomolomo gokululuva notovo igo, línumuvamú Izesú eza numukutí lemeake apá makotoka mikasi gomopalaló voko minake Ómasiloka limó.

36 Lá noigo Saimon nene agivelagegi keza agizaka hiziki,

37 alími utó iake láa liki li amemó: Vegená mukí geikumú vitagá niaze, geza imaneló nana noane.

38 Liki likago, eza láa loko lo kimimó: Apá mukí vaí oko alitoka neve. Neneló monó lo utó itove loko makó vitune. Neza nene ámina hoza alitove loko omo nouve.

39* Loko loake vike Galilaia mikasiuka mohona o asú noike, keí monó numuni minakú minakú monó lo utó oko minake, holosi nene kigikagutí kepeleko kimiseleko alahula ahula ahula imó.

Izesú lokago halamé gizali ve gililimó
(Mat 8:1-4; Luk 5:12-16)

40 Lá okago, halamé netá gizali ve makolímo aitoka oake negénegeka loko alapusa hizike lo amike limó: Geza nene nelémo gillitove loko nene hanuva nelémo gillitanimó nenazo, nelémo gillitan loko noluve.

41 Loko lokago, Izesuni agika hizekago agizani lutoko agupeloka ale nogi-like lo amike limó: Gililitane loko gelekuze. Gilelezo.

42 Loko lokago, litá oko halamé netáma asú omikago agupe lamaná okago,

43 Izesú litá oko namisilike lo hukotake limó:

44* Gelenape. Geza imane gakó avetó oko vegeñá lo kememo. Gilelekane liki gili hee litave loko geza nene voko guguni gizoaká ve gugupe alapizekako mota gilelekane loko ánigative. Itó gilelenikumú nene Mosé lolketa netá Ómasi guguni gizo amitive loko amekako eza vegeñá mukí lo kemekiko nenémini mogona gili vevesatave.

45 Loko lokago, ámina ve nenémo voko avetó avetó oko lole ale imó. Nenemú Izesú nene vegeñá sii sii liki alegesá ikatave loko taoni makotoka hanuva vamike apá agataloka minokago, vegeñá keza numutó namatotí gopa aitoka ikigó minamó.

* 1:39: Mat 4:23, 9:35 * 1:44: Liv 14:1-32

2

*Izesú ve gepili alémo zokamó
(Mat 9:1-8; Luk 5:17-26)*

¹ Gamená makó oko vokago, Izesú nene Kapanao numutoka goha vo anitekago, Izesú nene numukú noive liki gakoláa giliakie

² vauva aliki iki alegesá akumú gatetoki hizi lí amó. Lá okago, monó lo nokimigo,

³ ve losive losive nenete ve gepili makó ukoakoló aliki niago, keitoka vegená makó kemegetiki amó.

⁴ Lá ikago vegená gikí ikago, Izesuni amatoka amitamó okago numupító itinigi ukoakoló milimiakie akaló aliki itemó. Izesuni gotolaló ali koló iake, ve gepili mina ukoakoma nagá ziki ahulikago Izesuni amatoka limimó.

⁵ Lá okago, Izesúma gili alévolé amó nenémini mogona ánigoko geleake ve gepilima láa loko lo animó: Gipáneve, lihimaka ahulogimikuve.

⁶ Loko lokago, monó mogona apí ikimiaká ve neneló minamoláate láa liki kigikatunú gelemó:

⁷ Í, Ve makó éaho lihimate ale ahuloletatimó neve. Ómasi hamokó lihima ale ahuloaká noimó nenazo, eza agupe aleko iteko Ómasi aviliginogo nolihe.

⁸ Láa liki kagata nigelego, Izesú nene Zuta vegenalite lihima ahulolimiaká itó vegená kelémo zokoaká nene Ómasímogó loló oaká netá neve liki gelemó nene hanuva agikatunú geleake láa loko lo kimimó: Likigikauka gakó nenémináa nanamú nigeleve.

⁹ Ve makolímo Ómasi noamitímó nene lihimaka gilatogimikuve loko vávani oko lamitimóza, ámináminoko kelémo zokoaká zámuzagi ve noamitímó nene oteoko ukoakoka geheko vozó loko litá oko lo ameminogo ive.

¹⁰ Lá onoimóza, okulumakutí lumu ve gihila neza mikasigú nene lihima gilatoakalímini zámuza itó vegená kelémo zakoakalímini zámuza nenitoka nevi liki gili hee hee litave loko ve gepilima lo amike limó:

¹¹ Otekoko ukoakoka geheko numukaloka vozó loko nologetuve.

¹² Loko lokago, galinali kogovisáló ukoakoma geheko vimó. Lá okago, vegená mukí keza sigaga litake Ómasi agepoka láa liki lamó: Nene suni ánigosá amuhá gosohá utó okago ánigokune, líki lamó.

*Livaini sele lo animó
(Mat 9:9-13; Luk 5:27-32)*

¹³ Izesú lá oake goha lemeake nonohuló agataloka vike vegená mukí aitoka alegesá ikago monó apí o kemeko minamó.

¹⁴ Nenelotí novike, Alapaioni gipala Livaí nene takisi aleaká numukú noigo, ánigoake némegetoko ano, loko lokago, Livaí nene oteake ámegetoko vimó.

¹⁵ Viike Livaini numukú itiki minasike nosánetá ninasigo, takisi moni aliáká vegi golesa netá aliáká niave liki kagata giliaká a ve makoláagi mukí keza Izesuni ámegetiki viaká a ve minamó.

¹⁶ Lá niago, Palisaio monó vegenalitini monó mogona apí ikimiaká ve nenete Izesú nene ámina ánigi goselé iaká vegenaki nosánetá ninago ánigiake nene, izegipala zuha láa liki li kememó: Í, áisi nene golesa netá aliáká vegená nenémináagi nosánetá nana igo nonave.

¹⁷ Liki likago, Izesú nene geleakeanoza gakó makó láa loko lo kimimó: Keza ha minamoláate lusa vemú sele lisá amave. Kivisi vegenalitegó lusa

vemú sele liaká niave. Neza hee loko noune liki liaká nia vegená kelémo otopá zitove loko lemendumóma neve. Neza lihimáinigi vegená kelémo otopá zitove loko lumumóma nena, loko limó.

*Nosánetá moseakakumú loká itamó
(Mat 9:14-17; Luk 5:33-39)*

18 Zonini izegipala zuhagi Palisaio monó vegenaki keza Ómasímo nosánetá mosekuko lelikumú litihe liki mosé mosé iaká amó. Lá niago, ve lugáa keza Izesutoka vake láa liki loká itamó: Zonini izegipala zuhagi Palisaio monó vegenalitini izegipáini zuhagi keza nosánetá mosé mosé iaká niamóza, geí izegipaka zuha keza mosisá amave. Nanamú neve.

19 Liki likago, Izesúanoza gakó láa loko lo kimimó: Ve makolímo agivelagegi makó kogoliza viziki minata zupa nene keza aikumú miluma giliiki nosánetá mositamó nehe. Lá oko nomive. Ámina vegi apiziki minata zupa nene nosánetá moseminigave.

20 Ámina vema apili hilita zupa alitokiko, nene zupa miluma nigiliki nosánetá mosinigave. Áminámini iki, izegipáne zuhate alika nenikumú miluma giliiki mosí mosí inigave. Itína nene moseminigave.

21 Itó lavolavo gó gosohá gó zenamímó nene huki koma iiki ali litaha lavolavoló miliki akotisá amave. Alikanagamí zikiko gíkí okiko nene gosohá gó komamámo litaha lavolavomalotí hikelekiko lavolavoma golesa o asú inogo ive.

22 Itó vain nagamí gosohá gituhú galakalá noigo nene litaha getunungí milisá amave. Vain nagamímámo giputooko getununima zeko pulutokiko vain nagamíma hutílí okatize, itó getununima ámina oko golesa okatize. Vain nagamí gituhú galakalá noimó nene litaha getunungí ne-gopa gosohámagukó miliaká niave. Loko anoza gakó limó nene Zuta vetini litaha mogonáagi Izesuni izegipala zuhate gosohá iki miliki ita sunigi molo apizeakaláa nomive loko limó.

*Izesuni vegenala zuhate holisigú kilé hisiki nimi vamó
(Mat 12:1-8; Luk 6:1-5)*

23 * Holisi gamena makokú Izesuni izegipala zuhagi kilé mikú mihina niago, izegipala zuhate gaúna hilikago kilé asutiake gihiláa hisiki nimi vamó.

24 Lá niago, Palisaio monó vegenalite gili golesa ake Izesuni li amiki lamó: Ánigozo, netá nalemó nenémo golesa okave. Lelí holisigú imane hoza lá amoäkalámini nene nanamú naleve.

25 * Liki likago, eza monolímini li hukina gakó nenémo vegená kelémo vatí iti gapo nene hize lí itive loko utó amive liki gilitave loko láa loko lo kimimó: Gozapá agulizaki ve Tevitige vegenala zuhagi nosánetakumú gaúna hiliaké netá alemó nene monokú luhuva gizinamóza lekeza ámina gakó gatiaké mogonáa gelemiki nilahe.

26 * Tevití eza Ómasímini numukú itekago guguni gizoaká ve napa Apialá nene Ómasímini avogisaló mila peleti amekago noake ezagi makó mina vegená nene kemeko namó. Ámina peleti nene hanuva vegenalite namitave liki guguni giziaká vetegó natave liki alévolé iki li hukinamó nene gopa namó neve.

* **2:23:** Gapo 23:25 * **2:25:** 1 Sam 21:1-6 * **2:26:** Liv 24:9

²⁷ Loko loake, miní ameko láá loko lo kimimó: Holisi gamenamule loko Ómasímo vegená loló amimóza, holisi gamena nene vegenakumule loko utó onoimó neve.

²⁸ Lá onoinazo, okulumakutí lumu ve gihila neza holisi amelahina nounazo, izegipáne zuhate holisi gamenagú lilí ita netá nene není netá neve, loko limó.

3

Agizani nakeseta ve (Mat 12:9-14; Luk 6:6-11)

¹ Minoko monó numukú nene agizani nakeseta ve makó iteko noigo, Izesú áminagú goha itekago,

² holisimagú nenazo, ámina ve imane holisimagú hoza aleko alémo zokokikoma goní otatunize liake gizapa iki minamó.

³ Lá niago, Izesú nene agizani nakeseta vema láá loko lo amimó: Holutegú ote minozo.

⁴ Loko loake vegená láá loko loká oketamó: Holisigú nene netá lamána alesatímo etatihe netá golesa alesatímo etative. Vegená kelémo lamána osatímohe kepele helesatímóve.

⁵ Loko limóza, anotó alemake niago, izapaló molago gonú nokipilike gili ámegekumú miluma geleake, agizani nakeseta vema gigizani lutozo loko lokago, agizani lutokago goha lamána imó.

⁶ Lá okago, Palisaio monó vegená keza limiki vake nana oko apele hilitune liki kezagi Helotení patigú vegenaki litá iki lova gizamó.

Nonohulotó vegená iki mulusi milamó

⁷ Lá okago, Izesú eza izegipala zuha kelémoko nonohulotó lemekago, vegená mukí Galilaia mikasilotí kímegetiki vamó. Itó kéisigó vamamó.

⁸ Zelusalegití itó Zutaia apakú numuni apá makotokatí itó Itumaio mikasilotí itó Zota nagamí vola helegalotí itó Tulo numutokatí Sitona numutokatí vegená keza iki Izesú oko moloko imó nenémini gakoláa giliake vaí iki aitoka alegesá amó.

⁹ * Lá ikago, Izesú alegesá iki mina vegená aitoka mununú ikatave loko izegipala zuhate nagamikú lape makó aliiki nagamí getatoka milikiko nenegú iteko minoko gakó lo kimitove loko loketamó.

¹⁰ Vegená mukí kelémo zokamómave liki netá golesa gizale vegenalite agupeló ale gilitunitímo lelémo zokative liki aitoka iki mulusi milakumule loko lapemú limó.

¹¹ Lá okago, holosi golesa kigikagú mina vegenalite ániga zupa kighúna giki gamoga giki géisi Ómasímini gipalama noane liki liaká amó.

¹² Láa liki likago aí mogona avetó iki lili ali amitave loko alévolé oko lo hukoketamó.

Izesú ve 12 hozaló ve kelémo molamó (Mat 10:1-4; Luk 6:12-16)

¹³ Izesú nene zopegaló iteake agikatunú gili vegená sele lo kemekago aitoka viki alegesá amó.

¹⁴ Lá ikago, ve 12-a ezagi minatave loko itó kimiselekiko monó gakó li kimitave loko

* ^{3:9:} Mak 4:1; Luk 5:13

15 itó zámuza kemekiko kigikagú holosi minatamó kipilikí kimsilitave loko kelémo etó oake kugulizá nene aposolo vemave loko molamó.

16 Ve 12-a nene lá iki minamó: Kugulizá Saimon, agulizá gosohá Pitani molamó,

17 itó Zepetaioni gipala Zemusí itó agunala Zoní, keza nene kugulizá Poanelekesi loko molamó, lelí gakokutí nene gó hegeaká ve.

18 Itó Etulú itó Pilipó itó Patolomaió itó Mataió itó Tomasí itó Alapaioni gipala Zemusí itó Tataió itó Saimoná eza Loma vemú giligo ahulanogo i ve,

19 itó Kaliotó numutotí ve Zutá eza minomo iteko Izesuni amimika limó.

Izesuko Pelezepuloko

(Mat 12:22-32; Luk 11:14-23)

20 Izesú nene aí numutoka vimó. Vo anitekago vegená vaí iki alegesá akumú nosánetá namamó.

21 Lá ikago, Izesuni vegenala zuhate áisi negi hizekave liki la gakó giliake, agizató alitune liki vamó.

22 * Lá ikago, monó mogona apí ikimiaká ve Zelusalegatí a ve keza Izenunímú láa liki lamó: Holosi golesa makó agulizá Pelezepuló nene agikagú noive, itó holositi agulizaki vémo alémo vatí igo holosi nene kepeleko kimiseleká noive.

23 Lá liki nila gakó Izesú nene geleake sele lo kemeake Satani zámuza mota avilegeneikumú anoza gakó makó láa loko lo kimimó: Íi, Satá ezáa izegipa zuha kepeleko kimsilithe.

24 Mikasi makokú vegená hizi hoú latamó nene, alévolé iki minamiko ámina apatoka gámekokó pizinogo ive.

25 Itó hamó zuha nenete hizi hoú latamó nene, ámina vegená alévolé iki minaminigave.

26 Lá onoinazo, Satá nene ezáa vegenala zuhagi hizi hoú latamó nene, voko alévolé oko minamitimó nenazo, tolova inogo ive.

27 Itó ve makolímo gasovagi ve amuza vémini numukú litá oko iteko aí henoni mukí ipá oko aleakaláa nomive. Goí oko ámina vémini agisa agizató nagá aleoko alika nene iteko alitimó neve. Lá oko nagá aleoko alika iteko henoniva ipá inogo ive loko limó nene Satani agizató nagá aleuke holosiva nene kepeleko kimiseleká nouve loko anoza gakokutí limó.

28 Loko loake, makó láa loko limó: Neza lamaná lo likimitoze, gililo. Netá golesa haitopaitó neneníni lihimáa apasoakaláa nomive. Ámina lihima ámina vémini amupiló mino lúaló moloko minanogo ive.

29 * ve makolímo Ómasímini Sikalahukumú alevo letovo oakaláa nene Ómasímo neneníni lihimáa apasoakaláa nomive. Ámina lihima ámina vémini amupiló mino lúaló moloko minanogo ive.

30 Loko limó nene Ómasímini Sikalahulímini zámuza tunú negopa, holosi makolímo Izesuni agikagú lemeko alémo vatí igo holosi nene kepeleko kimiseleká noive liki lakumú nene láa loko Izesú lo kimimó.

Izesuni izolahiki agunamotamolagi

(Mat 12:46-50; Luk 8:19-21)

31 Izesuni izolage izegipa agunamotamolagi anitiake numuni hetoka aikumú sele lamó.

³² Sele nilago, alími vego iake mina vegenalite láa liki li amemó: Gelenape, izokage izegipa gugunamotamoka keza hetoka emane niake geikumú sele nilave.

³³ Liki likago, Izesú láa loko lo kimimó: Izónegini nugunamotamónemú nilahe.

³⁴ Loko loake, aitoka mina vegená nene gonú nokipilike láa loko limó: Ánigalo. Izónige izegipa nugunamotamóne imane niamole.

³⁵ Ómasímo li gakotó gili amiaká nia vegená kéisi nene izónige nugunamotamóne niave, loko limó.

4

Zuha netá atilí oaká vemú anoza gakó

(Mat 13:1-9; Luk 8:4-8)

¹* Izesú goha nonohuló agataloka monó lo nokimigo, aitoka vegená mukí keza sii sii liki alegesá ikago vegená gikí akumule loko nagamikú lapegú iteko minokago, lape nene nagamikú minokago, vegená alegesá amó mukí keza getatoka minamó.

² Minikago, Izesú anoza gakó haitopaitolímini lo nokimike makó láa loko lo kimimó:

³ Gililo. Zuha netá atilí oaká ve makolímo netá gihila atilí inogo vimó.

⁴ Mikuka atilí omo novigo, gihila makó gapoló alemó zekago, gaha namate ake ni asú amó.

⁵ Makó nene gehani amupiló mikasi lagasó netó lemekago mikasi hána nomimó nenazo, goloakaláa litá oko golokaha,

⁶ ho nolake avagugu vizekago, luhusa hána minamike osagava vizimó.

⁷ Makó nene lilihámini luhusa nene mikasigú ha netó alemó zike golokago, liliha nenémo goloko iteake zemikago gihila zemimó.

⁸ Makó nene mikasi lamanakú lemeko minake goloko iteko gihila zimó. Zava makó nenémo gihila 30 zimó, makó nenémo gihila 60 zimó, makó nenémo gihila 100 zimó.

⁹ Lakagatagi minatamó neneta imane gakó gili hee liki gililo, loko limó.

Anoza gakokú lo kemeaká ítímíni mogona

(Mat 13:10-17; Luk 8:9-10)

¹⁰ Vegená lugáa vi asú ikago, aitoka mina vegenaki izegipala zuha 12-a kezagó minake ámina anoza gakokumú loká imikago,

¹¹ láa loko lo kimimó: Ómasímini gasovaló minoakalímini asuguná gakó lekeza gilitave loko loniomóza, hetó niamoláa keza anoza gakokukó gilitave loko loaká nouve.

¹²* Nenemú Ómasímini agepagutí gakó loaká i ve Isaiá gakó makó láa loko luhuva gizoniomó nene keitoka alévolé oko neve:

Kogómulatunú ánígiakaláa ha ánigatamóza, ma ánigi vevesaminigave.

Itó kagataturú giliakaláa nene ha gilitamóza, gili vevesaminigave.

Kigila ali viligamikoma, lihimáini ahuloketamigo, ha minanogo ive.

Zuha netakumú anoza gakolímini mogonáa

(Mat 13:18-23; Luk 8:11-15)

* **4:1:** Luk 5:1-3 * **4:12:** Isa 6:9-10

13 Izesú miní ameko láa loko lo kimimó: Imane anoza gakó lumó nenémini mogonáa gelemahe. Lá noikoma, anoza gakó mukí nene nana iki gili vevesatave.

14 Netá gihila atilí oaká vémo monó nene atilí oaká noive.

15 Zuha netá makó atilí noigo gapoló alemó zimó nenémini iki minatamó keza monó gilitamóza, Satá litá oko aniteko monó nene kigikagú milikago minamó nene aleko vokago kigikagú minamimó.

16 Itó zuha netá gehani hizenei mikasiló limimó nenémini iki minatamó keza monó nigilikí litá iki laga kivisekago giliaká niamóza,

17 kigikagú luhusa ale gikitamigo gamena alínipa aliniko monó gakó alinakumú gopogu galatakalatá milikitata gamenaló nene litá oko akatímó neve.

18 Itó lilihagú limimó nenéminiki minatamó keza monó giliaká niamóza,

19 imane mikasiuka gena kepeleaká noi netá itó monimú lagava giliaká nia netalímo itó netá haitopaitokumú kumu heleaká noi netá nenémo kigikagú minoake, monó zemikago keitoka gihila utó osá amive.

20 Itó mikasi lamanakú limimó nenéminiki minatamó nenete monó giliki alinago, keitoka gihila zeaká noive. Makolititoka napa otígí zeaká noive, makolititoka mukí zeaká noive, makolititoka vauva aleko zeaká noive.

Liví legeakakumú anoza gakó (Luk 8:16-18)

21* Loko loake anoza gakó makó miní ameko láa loko lo kimimó: Ve makolímo liví lege molokoko holoma sepekú ahe somotunú gahumá oakaláa nomive. Eza liví moloaká holomaló molokago, hize hanatanogo ive.

22* Ámináminoko Ómasímini asuguná ne netá mino-loko vo tolova amitive. Minoko utó o asú inogo ive. Halá genei netá ámina oko hanato asú inogo ive.

23 Lakagatagi minatamó neneta gakó imane gili hee liki gilio.

24* Loko loake láa loko limó: Lekeza gakó imane nigilikí gili guni iki gilio. Lekeza gakó gilita polosava nene Ómasímo áminagó oko nene monó lehizeleketanogo ive. Itó nenegó nomive. Aleko iteko likiminogo ive.

25* Makó keza monó nene vatí iki gizapa iki ali minatamó nene Ómasímo goha miní ameko kiminogo ive. Itó makó keza monó nene lamaná iki gizapa amitamó nene monó alenoupe gilitamóza, goha ipá oko alekiko nene hanuva minatamó neve.

Zuha netakumú goloakakumú anoza gakó

26 Izesú gakó makó láa loko limó: Ómasímini monolímo likigikagú gihila ale utó itimómámini mogonáa lá oko neve: Ve makolímo mikú zuha netá mikasigú atilí oake, noike,

27 gó lana gó lana nominago nenémini mogonáa ánigo hee lamigo, zuha netáma goloko iteko napa noigo,

28 mikasímo ezáa lulu vizeake goloaká noive. Apí oko hosi oake goloko itike agila oake, gihila zeaká noive.

29* Gihila zeake zuha lokago, aleko natuni gamena alitokave loake, hukatave loko kimiselekago minumuni aliaká niave.

* **4:21:** Mat 5:15; Luk 11:33 * **4:22:** Mat 10:26; Luk 12:2 * **4:24:** Mat 7:2; Luk 6:38 * **4:25:** Mat 13:12, 25:29; Luk 19:26 * **4:29:** Zoe 3:13

*Masteti zuha netakumú anoza gakó
(Mat 13:31-32; Luk 13:18-19)*

³⁰ Gakó miní ameko láa loko limó: Ómasímini avogisaló vi hilata vegená hizi hutíl itakumú nene nanetalímíni amupiló ale moloko litove. Nenemú litove loko nene nana gakotó anoza ale moloko litove.

³¹ Masteti loko nei zuha netá nenéminoko neve. Ámina netá nene mikasigú atilí inigi niago, mikasiuka gihila lugáagutí ezáa koma koma nemóza,

³² atilí ikago, goloko iteko iteko napa oake, zamú mukí kivilegeko izana napagi itekago, nama nenete samapalagú numuni giaká niave.

*Izesú anoza gakó mogonáa lo kimimó
(Mat 13:34-35)*

³³ Izesú anoza gakó haitopaitó mukí hamolíminoko monó lo kemeko minamó nene gilita polosava lo kimimó.

³⁴ Gakó lo kiminogo noike anoza gakokutikó lo kemeake, lo utó oko lo kememike ezagi izegipala zuhagi kezáikó minake nene, gakó mogonáa mukí lo utó oko lo kimimó.

*Izesú lokago una napa ahulamó
(Mat 8:23-27; Luk 8:22-25)*

³⁵ Ámina gamenalokó únaká gamena gánavaló nene Izesú eza izegipala zuhama volá helegaloka mota vitune,

³⁶ loko loake alegesá iki mina vegená ahulokimiaké sipigú iteko noigo, keza alímiki nivago, vegená makolite nagamikú lape makokú kêmegetiki vamó.

³⁷ Nivago una napa alekago, nagamí nene valahuká zitímo lapegu lemeko vaí inogo noigo Izesú nene lape asevaló akonoike, gotolaló za moloko akonoigo,

³⁸ izegipala zuhate alími otiake láa liki li amemó: Monó gizapa velemaka, nagamikú simá nanogo nounize, geza nanamú lelikumú gele lememanike hanuya noane.

³⁹ Liki likago, Izesú oteake unama gahá amekake nagamí nonohuló nene valahuká zemoko legesó oko minozo loko lokago, una nene ha okago nagamí nene kii nolike zou limó.

⁴⁰ Lá okago, izegipala zuha láa loko lo kimimó: Nanamú lekelegesá ligive. Nenikumú velesá gili alévolé amahe.

⁴¹ Loko lokago, kehelele goha vizigo kezáini ligili hagili ake láa liki lamó: Agae, imane ve nene haitolímíni neve. Unagi nonohuloki nenetosa gakola gili alikasive, liki lamó.

5

*Gelasa mikasiuka holosi golesa amisele ahulamó
(Mat 8:28-34; Luk 8:26-39)*

¹ Nonohuló vola helegaloka viake, Gelasa vegenalitini mikasiuka anitemó.

² Neneló agikagú holosi golesa mina ve makó minamó.

³ Ámina ve nenémo geha mulikú akoaká noigo, ve makolite agizató alisá ikago seni nagatunuki alemó nene alemimó.

⁴ Gamena gamena agisa agizató etoha iki seni nagatunú aliaká amóza, agizató nagá nene zeko halí oake, agisaló nagá alemó nene zeko hukokago, ve makolímo amuza moloko alémo zou lamitímó imó.

5 Gamená gamena únaká neteká mulikuki agokaloki minake nene, gopaga loko minake nene, gehanitunú aguapeva gesopá zeko minoaká imó.

6 Ámina ve nenémo Izesú nene sipigutí nolimigo geha mulikú gonosi apakú minakutí ake hototí Izesuni ánigoake ololu loko oko Izesuni agisauka gupá ze amike

7-8 gamoga geko láa loko limó: Izesuvo, Ómasi napámini gipalamaka, géisi nana netá golesa loló onetanogo noane. Loko lokago, Izesú nene holosi golesa nenenka, ámina véminí agikagutí iteko vamane loko lomikago, holosi nenémo amanapa ike neza Ómasímini agulizá noluze, miluma hoza nememo.

9 Loko lokago Izesú nene loká otake gugulizaka éagave. Loko loká omikago eza limó: Leza mukí nouninazo, lugulizá nene ami mulusi nouve.

10 Loko loake ámina mikasitolí limiselemitane loko negénegeka limó.

11 Loko lokago, iza gululusi mukí zopegaló gale niki niago,

12 holosite negénegeka lake izatini kigikagú limiselekako limitune.

13 Liki likago, gele kemekago, holosi golesa nenete agikagutí itiake iza gululusi tu tausen nenetini kigikagú itiake limikago, olíi miliaké meiniló limiaké nonohulokú limiki nagamí niki hutiake hiligesá amó.

14 Hilikago, iza gizapa vete golisi viake taoni napaloka iza gihiló numutokagi avetó iki li kimikago, vegená keza utó i netá ániganigi viake,

15 Izesutoka anitiake holosi agikagutí kimiselekago va ve nene ginegane ale luhoake geleakala lamaná okago, mitó noigo, ánigiake kelegesá ligimó.

16 Lá niago, nene suni ániga vete holosi golesagi mina ve lamaná imó itó iza helemó nenémini gakoláa avetó iki li kimikago,

17 mikasinini ahulokoko vitive liki Izesuni negénegeka lamó.

18 Likago, Izesú eza sipigú noitigo, holosi agikagutí kimiselekago va ve nenémo Izesuki makó miniatíve loko negénegeka lokago,

19 Izesú gele amemike láa loko lo amimó: Numukaloka voko Guivahanímo geikumú agika hizekago loló ogeta netá lamanalímini gakola nene vegenaka zuha avetó oko lo kemezo.

20 Loko lokago, Tekapoli mikasiloka atiginá oko vike Izesú loló ota netakumú lo utó oko lo kimigo, ve vená mukilite Izesuni sigaga litiki minamó.

Zailoni moholagi Izesuni gotó ale gili venaki

(Mat 9:18-26; Luk 8:40-56)

21 Lá ikago, Izesuge sipigú itiake ima helegaloka goha iake, getató limiki niago, vegená vaí iki aitoka alegesá amó.

22 Lá ikago, monó numukú agulizaki ve makó Zailó loko noi vémo oko

23 Izesuni ánigoake, gupá ze amike negénegeka like limó: Není mohó komámini amení nomigo, mota hilinogo noize, zokoko agómulagi miniatíve loko, oko gigizanitunú ale geleko nónohá zetatake loko noluve.

24 Loko lo amekago, geleake, makó nivasigo, vegená alegesá amó vaí iki ámegetiki nivake, aitoka sii sii liki nivakú nene

25 vogaláikú vená makó nene ikanímo avutá apelekago númase gapo kilisi-masi 12 oko novigo molova molova oko noi vená minamó.

26 Lusa ve mukilite miluma netá mukí amikago moni keme asú imóza, avisí netáma asú otamike alika sipisi netá gizaleko minamó.

27 Eza nene Izesuni gakoláa geleake vegená alegesá amó nivakú nene Izesuni amegesaloka oake,

28 agupeló ahe itó hanuva luhoaká golaló ale gelekinake zokatove loko agata geleake luhoaká golaló ale gilimó.

29 Ale nogilike, litá oko sepá zekago, nivisi netá asú onimikave loko agupégú gilimó.

30 Gelekago, Izesú nene zámuzala agikagutí vokago geleake, vegená alegesá akutí viligoko láa loko limó: Není luhoaká gotó éaho ale gilive.

31 Loko lokago, aí izegipala zuhate láa liki li amemó: Vegená alegesá ikima sii sii likima nianazo, nugupeló éaho ale nogilive loko nolape.

32 Liki likago, éaho alihe loko ániganogo ánígomo mohona imóza,

33 vená nenémo Izesú loló ota netakumú geleake ahelele novizigo, luvolovo nozike ake, agihúna geko lo utó oko lo ame asú imó.

34 Lo utó oko lo amekago, eza láa loko lo amimó: Mohónemaka, nenikumú gele alévolé anitímo gelémo zokokave. Mulukagú hulu iko vozo. Givisi netakutí zokoko minozo.

35 Loko noligo, monó numukú agulizaki vemámini numukutí vegená makó iake láa liki li amemó: Mohokama mota helekave. Nenemú tísaka nanamú goha negénegeka nolotane.

36 Liki gakó lamóza, Izesú nene gele ahuloake, monó numukú agulizaki vema láa loko lo amimó: Geza gehelele vizemino. Gele alévolé okogó minozo.

37 Loko loake, vegená makó ámegetiki vamitave loko lo hukoko lokago, Pitaki Zemusiki agunala Zoniki kezagó kelémoko vimó.

38 Viki monó numukú agulizaki vemámini numukú anitiki ánígamó nene, gakó napa napa liki ive nama iki hitagá hiziki niago ánígamó.

39 Ánígoake Izesú nene numukú iteake ve venáma láa loko lo kimimó: Lekeza nanamú gakó akó napa napa liki ive nama niave. Mohóma nene helemive. Hanuva avó akonoive.

40 Loko alémo otitove loko gelenei gakó noligo, giza napa itamóza, vegená mukí kehelú ike kimiselekago, hetoka limikago, mohómámini izolahiko amelahiko izegipala zuha losive makolemagi kelémoko mohóma akonoitó itimó.

41 Iteake agizató nalike aí gakokutí láa loko lo amimó: Talita kumi. Nenémini mogonáa lelí gakokutí nene mohó koma otitane loko noluve loko neve.

42 Loko lokago, mohó nenémo litá oko oteake mohona oko minamó. Aí kilisimasi 12-a minamó. Itó vegená keza ánígiake litá iki sigaga goha lamó.

43 Lá niago imane netakumú vegenalite gilikataze, avetó iki li kememilo loko lo hukoketake nene, ámina mohó nene nosánetá amilo loko lo kimigo nosánetá aliake amemó.

6

Nasalete numutoka Izesuni ángi ahulamó (Mat 13:53-58; Luk 4:16-30)

1 Izesú nene apá ahuloake, ezáa gotó apalaloka vo anitekago, izegipala zuha keza ámegetiki vamó.

2 Lá ikago holisi gamena alitokago, monó numukú monó lo keme keme oko noigo, vegená mukilite giliakte sigaga sagaga litake láa liki lamó: Imane vémo nene gakó hikutí alive. Gele vevesoakaláa éaho amive. Imane ve nenémo imane alévolé suni nene hikutí ale utó oaká noive.

3 Leza aí mogonáa gelenoune. Aísi numuni geaká ve nene Maliani gipala noinae. Itó Zemusí Zosé Zutá Saimonige keí uvóipoma noinae. Mohó agunala kezagi imaneló miníki aliki iaká nianazo, aísi nene hanuva lelikitana ve noive. Liki liake gelego, gena okago, aliki limíki likago,

4* Izesú láa loko lo kimimó: Ómasímini agepagutí gakó loaká vémini agulizá nene numutó namató puu loko vitimóza, ezáa gotó apatokagi ezáa vegenala zuhalokagi ezáa numunakagi aí agulizá minamitimó neve.

5 Loko loake aísi neneló Ómasímini zámusa ale utó itove loko imóza, gena avisekago ahuloake, kivisi vegená lugáa agizanitunú ale geleko nónohá zeketake kelémo zokamó.

6 Lá oake, aikumú gili alévolé amakumú giligo gena imó.

Izegipala zuha 12 keza monó hozaló vamó

(Mat 10:5-15; Luk 9:1-6)

Lá okago, Izesú nene numutó numutó mohana oko monó lo keme keme oko minamó.

7 Lá oake, minomo noitiike, izegipala zuha 12 nene kelémo nupa oake, mihina iki holosi golesa vegenalitini kigikagutí kipilikí kimisilitave loko zámusa nokimike, losi losi oko nokimisilike láa loko loketamó:

8* Gapo vitatoka nene netá makó alemiki hánuságó aliki vilo. Itó peleti alemiki akiseaká gó alemiki gó komagú nene moni gúemiki,

9 likigisáló suú luhiki nene luhiká gó losítá luhamiki vilo.

10 Loko loake láa loko lo kimimó: Itita numuni makokú itiikima ámina numukú aki-likí niviki ámina apatotí vitave.

11* Itó apá makotoka likilími lamaná amikoma itó lekelí gakó gelemikoma nene, ámina apá nahuliki vahé miliki likigisalotí mumusopa nene usagamá zi ahuliki vilo.

12 Loko lokago, vake vegená keza kigika ali viligatave liki li utó iki li kimiake,

13* holosi mukí kigikagutí kipilikí kimisilike itó kivisi vegená mukí nene netupá hilikimiaké kilími zokimi vamó.

Nagamí holokimiaká ve Zoní hili gakó

(Mat 14:1-12; Luk 3:19-20; 9:7-9)

14* Lá ikago gakoláa hutilí oko vike agulizaki ve napa Helotení agataló vo holokago gilimó. Ámina gamenaló nene vegená makolite Izesukumú nene Zoní monó nagamí holokimiaká vema heleneikutí oteake imane zámusa nene netá haitolímini ale utó oaká noive.

15 Liki nilago lugáa keza Izesukumú nene Ómasímini agepagutí loaká ve Ilazá goha okulumakutí lemeake noive liki nilago, lugáa nenete gozapá Ómasímini agepagutí gakó liaká a ve makokitana oko noive liki liaká amóza,

16 Heloté nene geleake Zoní eza luvana hukotu vemámo galegutí oteake ámina netá loló oaká noive loko limó.

17-18 Nene hanuvamú lamive. Heloté nene amunaloka emane uvolaho Piliponi venala Helotiasini nene ipá oko alimó. Lá okago, Zoní nene Helotení lo ame ame oloko vike uvokahini vená ipá oko alenimó etamive. Loko lokago, venalámo gala vizekago Heloté nene ve makó kimiselekago vake Zonini agizató aliake nagá numukú ahulitamó.

* **6:4:** Zon 4:44 * **6:8:** Luk 10:4-11 * **6:11:** Apo 13:51 * **6:13:** Zem 5:14 * **6:14:** Mat 16:14;
Luk 9:19

19-20 Lá ikago, Helotiasí nene Zonikumú izapaló molokago apele hilinogo gilimóza, Zoní nene lihimavala nomi ve minake monolagi ve minokago, Heloté nene apilitomó nene Ómasímo nana onetatihe loko ahelele vizekago Zonini gizapa lamaná otatonazo lokago Helotiasí nene Zonini apelemitímó imó. Heloté nene Zonini gakó gamena gamena geleake agata losi goha gilimóza, Zoní li gakokumú geleake laga avisimó.

21 Minake Heloteni nene geta gamena alitokago, mukí kugulizaki vegi lova gizapa vegi Galilaia mikasiuka vegená iti minamómagi kelémo nupa oake nosánetá vatá okimikago, niki niago, Helotiasí nene Zonini apiliti gamena ale utó imó.

22 Heloteki nosánetá niki niago, Helotiasini moholama iteake kovogisaló melekeni okago, keza ánigi kumu hiliake agulizaki ve napa nenémo mohóma láa loko lo amimó: Geza netá nemú manamú nogilitanimó nene lokako gimitove.

23 Loko loake, Ómasímini avogisaló lo hutoko limó: Nana nana netakumú loká onetatane. Ha giminogo uve. Gizapa nou mikasimuki loká onetatanimó nene hanuva hutoko giminogo uve.

24 Loko lokago, mohó nenémo hetoka lemeake isolahini nene gizapa vemámo láa loko lokanazo, nana netakumú loká otatove. Loko lokago, izolaho láa loko lo amimó: Mota helekave gilitokive loko monó nagamí holokimiaká ve Zonini luvana hutoko gotoláa nimitane loko lamane.

25 Loko lokago, mohómámo litá oko agulizaki ve napa noitoka goha iteake láa loko loká otamó: Monó nagamí holokimiaká ve Zonini gotola itínasa gitegeko lapegú molokoko nimitane loko noluve.

26 Loko lokago, agulizaki ve napa nenémo giligo gena imóza, Ómasímini avogisaló lo hukokumóma nenazo itó alesa molokago iki mina vegenalitini kovogisaló lo hukokunazo loko geleake,

27 litá oko pilisi ve makó amisilike Zonini gotola gitegeko alekative loko lomikago, vike nagá numukú nene Zonini luvana hutoake gotola gitegeko

28 lapegú moloake aleake mohóma amekago, mohó nenémo izolaho noitoka aleko voko amimó.

29 Lá okago, Zonini izegipala zuhate ámina gakoláa giliake viki gonosiváa aliki vake geha mulikú gale zemó.

Ve 5000 nosánetá kemeko namó

(Mat 14:13-21; Luk 9:10-17; Zon 6:1-13)

30 Aposolo zuha nene losi losi iki mihina i asú iake, atiginá iki ake Izesú noitoka ali nupa ake netá iki miliki ake monó li kemekumú nene avetó iki li ami asú ikago,

31 vegená mukí vigá igá niago, nosánetá nata gamenagi nominazo, Izesú nene lezategó vegená niamató voko lavasú vizeko minatune.

32 Loko lokago kezáílkó nagamikú lapegú itiake vake vegená niamató vamó.

33 Nivago vegená mukí keza ánigiaké ánigi vevesiaké, taoni mukikutí nene mikasigú ololu liki vake goí ikitiki neneló vi anitemó.

34* Vi anitiaké vegená vaí iki alegesá iki minikago, Izesú nene sipigutí olío lemeko ánigamó nene sipsip iza gizapa venini nomimó nenéminkí minikago ánigoake, keikumú agika hizekago gakó mukí lo keme keme oko minamó.

* **6:34:** Nam 27:17; 1 Kug 22:17; 2 Iki 18:16; Izí 34:5

35 * Lá niago, ho lemekago, izegipala zuhate aitoka ake láa liki lamó: Imane apá nene ha gámetó nouko gamena mota asú okaze,

36 viki iza gihiló numutokagi luhuva numutokagi mihina iki nosánetáini meina hizitave loko kimiselezo.

37 Liki likago, konotó aleko lekezatini nosánetá kimiki nalo. Loko lokago, izegipala zuhate láa liki lamó: Íi, moni gó lositatunú peleti meina hizekoko kemesá nenegi vo aleminogo ive.

38 Liki likago, eza loká oketake limó: Lekezaloka peleti nanakí neve. Viki ánígalo. Loko lokago, viki ánígiaké láa liki lamó: Ligizani helegaloka asú igo neve, itó lagaha lositá neve.

39 Liki likago, mukí vegená nene hizi letiká hizi letiká iki gihisi gosoható minatave loko lokimikago,

40 hizi letiki tivamoláa nene 100 nenéminiki itó amunaloka miniliki lemémoláa nene 50 nenéminiki minamó.

41 Lá iki minikago, peleti ligizani helegaloka asú igo itó lagaha lositáma aleake okulumatoka okenava oko ánigoake Ómasi agepoka loake peletima gitegeake, vegená gona miliki kimitave loko izegipala zuha kemeake, lagaha losimagi vegená mukilite natave loko gona moloko kimimó.

42 Lá okago vegená mukilite nikake kagatupa okago,

43 peletigí lagahagi lumáa ali nupa iki gosúveha 12-a vaí okago ali milamó.

44 Itó nosánetá na véa nene 5 tausen nenéminiki minamó. Vená izegipagi gatamune.

Izesú nagamí amupiló liso liso vimó (Mat 14:22-33; Zon 6:15-21)

45 Lá iki niago, eza vegenáma nokimisilike izegipala zuha nene nagamikú lapegú itiiki vola helegaloka Petesaita numutoka goí iki nivitave loko loketamó.

46 Lá oake vegená gekévaké loko kimiseleake eza nene zopega makotó Ómasiloka linogo itimó.

47 Lá noigo límugusí zekago, izegipala zuha nene lapegú viki viki nonohuló holukú nivago, Izesú nene ezáagó getató minake ánigamó nene,

48 una napa aleko kogómulalokatí kehelú inogo inazo, nagamí apiliaká nogosanitunúamuza miliki apeleke ligitagani amó. Lá niago gokululuva notovoigo, Izesú nene nonohuló amupiló liso liso vike keza niatoka vo anitimó. Keza kiviligitimó noike,

49 nonohuló amupiló mohona noigo ánigiaké, holosi noave liki giliaké keza mukító kelegesá legekago gopaga lamó.

50 Lá niago, Izesú litá oko gákó lo kimike láa loko lo kimimó: Lekelegesá legemino. Mulutini lepa hizino. Nezama nouze.

51 Loko loake, sipigú itekago hepé kii limóza,

52 nosánetá 5 tausen vegená kimitotí Izesú haitopaitó avevezaha aleaká itímimi mogonáa gili hee hee lamake sigaga liki minamó.

Genesalete mikasiloka kivisi vegená kelémo zokamó (Mat 14:34-36)

53 Keza vola helegaloka Genesalete numutoka vi anitiaké, nagamikú lape ali gaheva ake nagá ziake,

54 lapegitú olí limikago, vegenalite litá iki aí ánigi vevesiaké,

* **6:35:** Zak 10:2; Mat 9:36

55 ololu liki numutó numutó vi asú iake, kivisi vegená nene ukoakogú kilími miliake, Izesú mina numutó numutokumú giliake neloló kilímiki vamó.

56 Minakutí minakutí nene taoniloka itó luhuva numutoka itó iza gihiló numutoka nene kivisi vegená nene alegesá apatoka kilímimi miliake láa liki li amemó: Gugupeló ahe itó hanuva gineganega gahevalokahe ali giliiki nene zokatave. Liki negénegeka likago, áminámini niake ali gele vegená nene zoki asú amó.

7

Avóike apí a mogonatagana (Mat 15:1-9)

1 Palisaio monó vegenaki Zelusale numutotí monó mogona apí-ikimiaká a ve lugáagi Izesutoka iki alegesá amó.

2 Lá amó nene izegipala zuha lugáate kigizani nagamí zemake nosánetá ninago ánigamó.

3 Palisaio monó vegenaki Zuta vegená mukitoka keza golesa okatune liki avóike la gakotó giliiki kigizani vauva aliki nagamí zemikima nosánetá nisá amamó. Avóike li hukiki la gakó ali amegesaló miliki lá iaká amó.

4 Itó maketilotí nosánetá meina hiziki alikamó nene monó gelemi ve makolímo ámina nosánetá ale geleneitimó nene ligika ale golesa iti netá loló okave liki giliake nosánetáma monó nagamí hepa hepa ikakegó niaká amó. Itó nenémini okogó minamive. Mogonatagana haitopaitolímini ali minamó. Nagamí gonigi somogi kapa lapegi nene ligikagú golotuva loko lelémo golesa okative liki nagamí ziaká amó nene avóike ali minató ali amegesaló amegesaló mililiki itemó.

5 Lá iaká amó nenazo, Palisaio monó vegenaki monó mogona apí ikimiaká a vegi keza Izesuni loká itake lamó: Geí izegipaka zuha nene avotegini mogonatagana ali minamake nanamú ahulikave. Nosánetá natune liki, ligika ali golotuva liaká suni aliki kigizani nagamí zemake ninave.

6 * Liki likago, Izesú láa loko lo kimimó: Genezatini lositaki neneta Isaiá nene alika utó iti netakumú gozapá limó nene lamaná lekelikumú lokamóma neve. Ómasímo li gakó láa loko luhuva gizonoiomóma neve:

Vegená mulusi imane keza kegepatunukó nugulizá ali otiaká niamóza, kigika nenitoka mili gímininamake mili hotó niave.

7 Vegenalitini gakó nene není gakokitana okago li kimi-kimi iki miniaká niake soza miliki gupá zi nimiaká niave.

8 Lekelisi nene Ómasímo lo hukoleketa gakó ahuliake vegenalitini mogonatagana ali miniaká niave.

9 Láa loake nene láa loko lo kimimó: Avotegini mogonatagana alitune liki Ómasímo lo hukoleketa gakó lekemegesa amiake niamó nene vatí suni nego aliajáká niahe.

10 * Mosé nene lekeza izokahiko amekahiko kugulizá ale otezo, itó ve makó eza izolahiko amelahiko usí vizekimiaká gakó lo kimitimó nene apele hilitune loko leketonoimóma neve.

* **7:6:** Isa 29:13 * **7:10:** Gá 20:12; Gapo 5:16; Gá 21:17; Liv 20:9

11 Láa loko limóza, lekelisi láa liki liaká niave: Ve makó eza izolahiko amelahiko nene hize lé oketatove loko u netá mota kolopani loló okave. Nenémini mogonáa lelí gakokutí nene Ómasímini mota amekuve.

12 Loko litikumú nene izolahini amelahini nasahilí oketati gapo hize lí oaká noive.

13 Lekeza lá iake nene Ómasímini gakó vasá ziake lekezatini avotikini gakó alévolé iki lukesa ali miniaká niave. Itó nenegó nomive. Nenémini netá mukí ali miniaká niave, loko limó.

*Ligika ale gopa oaká netá
(Mat 15:10-20)*

14 Láa loko loake ve vená mukí sele lokago, aitoka alegesá ikago, láa loko lo kimimó: Nénisi nene gakó lo likimitoze, gili. Mukitoka giliiki gili vevesiki gili.

15-16 Ni mikilí ikago lakagatupagú lemeaká noi netá nenémo likigika ale golotuva lamitimó neve. Likigikagutí iteaká noi netalímo likigika ale gopa itímó neve.

17 Loko loake numukú iteake, ve vená ámegekimikago, izegipala zuhate áminaanoza gakokumú loká imikago, láa loko lo kimimó:

18-19 Íi, lekelisi ámináminiki lakagata kolosamimó niahe. Mogonáa gili vevesamahe. Legepatunú netá matá nokuko ligikagú lemekoko eza gapavagú voaká noinazo, lakagatupagú lemeaká noi netalímo likigika ale gopa osá amive. Loko limó nene nosánetá mukí nene noaká netakó minokave loko live.

20 Láa loake makó láa loko limó: Likigikagutí iteaká noi netalímo lekemeni ale golotuva loaká noive.

21 Vetini kigikagutí nene golesa kagata geleaká, mokoló mogona, gumina, vegená kepele heleaká, ve vená huki ezega emega oaká,

22 ánigi lamaná oaká, netá golesa aleaká, kogoka vizeaká, hokolizá itó mumuzó oaká, kemégeka loaká, kugupe aleko iteaká, zogozogo vizeaká nememú noluve.

23 Imane netá golesa mukí nagatumó nenémo likigikagutí iteake lekemeni ale golotuva loaká noive, loko limó.

*Silia mikasiukatí hetoka venalímo gele alévolé imó
(Mat 15:21-28)*

24 Nenetí ámina apá ahuloake Tulo numutoka apá agilikaloa vimó. Vo aniteake, numuni makokú iteake nenemú gelemítave loko gilimóza halá gemitimó okave.

25 Vená makolímini mohola nene holosi makolímo agikagú lemeake alémo golesa o minamó. Lá noigo ámina venámámo Izesuni gakoláa geleake litá oko ake Izesuni agisagú agihúna gimó.

26 Ámina vená nene Zuta vená negopa hetoka vená minake, Pinisia apá nene Silia mikasiuka getamó minatímo eza nene moholámini agikagutí holosi apeleko amisilitive loko loká omikago,

27 Izesú nene Isilae vegenalite Ómasímini lusa goí iki ali alitakumú gelenikeanoza gakó makó láa loko lo amimó: Izegipatini nosánetá ipá oko galatini kimitunimó nene etamive. Izegipa nenete goí iki niki kagatupa itave.

28 Loko lokago, ámina hetoka venámámo gele veveso minake ezáagi Ómasímini lusa ale alitikumú geleake láa loko limó: Guivahanínemaka,

lamaná lokanimóza, nezama litoze. Nosánetá noaká holomalotí izegipate nikí lana koma alemó zimó nene galatini netá loló oaká noive.

²⁹ Loko lokago, Izesú lo amike limó: Láa loko lanikumú gele gumuze, atiginá oko numukaloka vozo. Holosi nenémo mohokámini agikagutí mota ahulomiake vokave.

³⁰ Loko lokago, numunaloka vike ánígamó nene, holosi nene moholámini agikagutí golisi okago holomaló hanuva akonoigo ánígamó.

Izesú negi ve alémo agata koló imó

³¹ Lá okago, Izesú nene Tulo numutotí atiginá oko vike Sitona numutoka avilegeake, vike Tekapoli mikasi avilegeake Galilaia nonohulotó vo anitimó.

³² Vo anitekago, negi ve makó genezala gena imó nene alímkí Izesutoka vi anitiakte, eza nene agizanitunú nónohá zemíkiko lamaná itive liki negénegeka likago,

³³ vegená alegesá akutí alémo otopá zeake kezáikó minasike agizani hisulatunú agatagú hizeake gituhú oake, agizanitunú genezalaló lupizeake,

³⁴ okulumakú okenava oko ánígoake, ahuu lo nahulake láa loko lo amimó: Epata. Nenémini mogonáa lelí gakokutí nene koló ino loko.

³⁵ Loko lokago, agata koló okago, genezala viligoake gakó lamaná limó.

³⁶ Lá okago, Izesú nene avetó iki vegená li kememitave loko lo hukoetamóza, eza lo hutoko loketaha loketaha negénegeka liki li utó iliki vamó.

³⁷ Keza nene sigaga goha liki minake láa liki lamó: Netá mukí loló noimó nene lamaná okogó loló oaká noive. Kagata mola vegená nene ale vevesokimikago gakó giliaká niave, itó kegepa lakolí i ve ale vevesokimikago gakó liaká niave, liki lamó.

8

Izesú Ve 4000 nosánetá kemeko namó

(Mat 15:32-39)

¹ Gamena nene zupa vegená vaí iki alegesá ikago, keí nosánetá nomigo, Izesú nene izegipala zuhama sele lokago, aitoka ikago, láa loko lo kimimo:

² Vegená mukí imane nosánetá namake nenitoka nene gamena losive makole minikago milumáini gelekuve.

³ Itó lugáa nene hotokatí nianazo, itína gaúna giliki niko numútoka kimiselekugo vitamó nene gapoloka kovonana vizinogo ive.

⁴ Loko lokago, izegipala zuhamate láa liki li amemó: Mikasi gomopalaló imane vegená mukí imane nosánetá hikutí ale utó oko kemeko natune.

⁵ Liki likago, Izesú loká oketake lekelitoka peleti nanakí neve loko lokago, keza 7-a neve.

⁶ Liki likago, vegená mukí nene mikasiló minatave loko lokimiakte, peleti 7-a aleake Ómasi agepoka loake, gitegeake vegená gona miliki kimitave loko izegipala zuha kemekago, keza vegená gona miliki kememó.

⁷ Lagaha lagasó minokago, nenemuki Ómasi agepoka loake imanegi gona miliki kimilo loko lokimikago kememó.

⁸ Vegená nenete niki niki kagatupa okago, lumáagi lanahanagi ali nupa iki gosúveha 7-a vaí okago ali milamó.

⁹ Ámina nosánetá na vegená nene 4 tausen nenéminiki minake namó.

¹⁰ Lá ikago kimiselekago numútoka nivago, izegipala zuhagi litá iki sipigú itiakte Talamanuta numutoka vamó.

*Alévolé suni ánígatune liki lamó
(Mat 16:1-4)*

11* Vi anitikago, Palisaio monó vegená keza iake gimivagú miliki okulumakuti ve noitihe loko gilitune liki alévolé suni ale utó okako ánígatune liki Izesugegi lova leta amó. Lá ikago,

12* Izesú gele golesa oake láa loko limó: Imane oko moloko oaká nou suni ánígiaká nia ve neneta alévolé suni ale utó okugo itína ánígatune liki nanamú liaká niave. Lamaná lo likimitoze, gililo. Alévolé suni makó ale utó ugo ánígaminigave.

13 Loko loake, ahulokimiaké izegipala zuhagi nene sipigú goha itiaké ima helegaloka amó.

*Palisaio monó vegenaki Heloteki keí mogonatagana
(Mat 16:5-12)*

14 Lá niago, peletimú kagatí molokago, alemago peleti hamokó nene nagamikú lapemagú minamó.

15* Lá okago, Izesú nene Palisaio monó vegi Helotémagi soza mogonánimú anoza gakokú kagata aleko láa loko limó: Palisaio monó vegi agulizaki ve napa Heloteki keí lulu vizeaká netá ehe, lekepelekatize.

16 Loko lokago, izegipala zuhamate peletimini lulu vizeaká netakumú lihe liki kezaitoka láa liki ligili hagili iki minamó: Peleti nene lagatí molokago ahulokoko unikumú lokave.

17 Liki la gakolímo agataló holokago geleake láa loko lo kimimó: Peleti ahulokunike unikumú lokave liki nanamú ligili hagili iki niminave. Azozá netá matá oko moloko utimini mogonáá giliki velesá gili hee hee lamahe. Likigika kolosamihe.

18* Lekeza lokogómula nemóza ánígamahe. Lakagata nemóza gelemahe. Lakagatí molokago ahe.

19 Ve 5 tausen keikumú peleti ligizani lugaloka asú igo gitegekugo niake kagatupa okago lumáá ahulikago gosúveha nanakí vaí iki aleve. Loko lokago, keza 12-a neve, liki lamó.

20 Láa liki likago, eza vegená 4 tausen keikumú peleti 7-a kemekugo niake kagatupa okago lumáá gizaká iki ali milamó nene gosúveha napa nanakí vaí iki aleve. Loko lokago, keza 7-ave liki lamó.

21 Láa liki likago, eza láa loko lo kimimó: Nene áníginamóma nemóza, goí oko loló oleketu netakitana oko goha loló itomó neve liki velesá gili vevesinamahe, loko limó.

Petesaita numutoka agómula lika ve ale goloutotamó

22 Lá okago, vake Petesaita numutoka vi anitikago, agómula lika ve makó nene Izesutoka alímkí viake, agizanitunú ale gelekoko ale goloutative liki negénegeka likago,

23 agómula lika vemámini agizató aleake símekaloka alémoko limike, agómulaló gituhú otake agizanitunú ale geleko nónohá zetake loká otake netáma nánigape.

24 Loko lokago, agómula goloutoko ánígoake vegená mihina niago nánigumóza, zagitana iki niago nániguve.

* **8:11:** Mat 12:38; Luk 11:16 * **8:12:** Mat 12:39; Luk 11:29 * **8:15:** Luk 12:1 * **8:18:** Zel 5:21;
Izi 12:2; Mak 4:12

²⁵ Loko lokago, goha agizanitunú agómulaló nónohá zemikago, ánigo hokolotoake lamaná okago, netá mukí ánigo kolosoko ánguve loko limó.

²⁶ Lá okago, Izesú nene numunaloka namisilike limó: Numuni napaloka góí oko vamoko geza minoko aleko itanitoka vozo, loko lo amimó.

Pítá Izesuni mogonamú lo utó imó

(Mat 16:13-20; Luk 9:18-21)

²⁷ Izesú nene izegipala zuha kelémoko Sisalia mikasiuka agulizaki ve Piliponi agulizató apatoka luhuvagi numuni numutó numutó vamó. Gapoloka nivake izegipala zuha loká oketake vegenalite nenikumú éahove liki liaká niave.

²⁸* Loko lokago, keza li amiki lamó: Monó nagamí holokimiaká ve Zoní nene goha utó oko noane liki liaká niave. Itó lugáa nenete Ilaizá eza gozapá okulumakú iti vema goha lemeko noane liki liaká niave. Itó lugáa nenete Ómasímini agepagutí gakó liaká a ve gozapá minamokitana noane liki liaká niave.*

²⁹* Liki likago, Izesú goha loká oketake lekelisi nenikumú éahove liaká niave. Loko lokago, Pítá nene láa loko limó: Geza Ómasímo gologí oletatane loko lo mololeta vema noane.

³⁰ Loko lokago, aikumú avetó iki vegená láa liki li kememitave loko lo hutoketamó.

Izesú alika hiliti gamenamú lo kimimó

(Mat 16:21-28; Luk 9:22-27)

³¹ Lá okago, gamena nene zupa apí oko gakó láa loko lo utó oko lo kimimó: Okulumakutí lumu ve gihila neza nene miluma netá mukí nimiiki, monó gizapa vegi guguni giziaká ve napagi monó mogona apí-ikimiaká vegi keza není ánigi ahulikiko miluma netá mukí nimiiki, nipili hilikiko, gamena losive makole minokinake heleneitokutí goha otinogo uve.

³² Loko lo utó oko lo kemekago, Pítá nene alémo apazá zeake géneka like gahá amimóza,

³³ Izesú viligoko izegipala zuha ánigoake Pitani gahá namike limó: Satani gakó lanitika mino olové omane. Geza gakó gelenanimó nene Ómasímini gakó lamanike vegenalite kigikagutí liaká nia gakó nene lokane.

³⁴* Loko loake, vegená mukí itó izegipala zuhamagi sele lo kemeake láa loko lo kimimó: Ve makolite není némegetatune liki nigilikima kugupémo giliti netá gili ahuliiki zohota zaló kipili hilinigi miluma netá gihikitatakumú gili zagiiki némegetatakumule.

³⁵ Makó keza nene kigika kemeníini aliki amánapa iki minata vegená nene kigika kemeni gopa inogo ive. Itó makó keza nenikumule liki itó gakó lamanakumule liki kigika kemeni vínasi ahulatamó nene alévolé kemeta-meni alinigave.

³⁶ Ve makó keza imane mikasímini amupiló ne netá ale asú iiki itó kezáini kigika kemeni gopa okoko tolova itimó nene nenémo nana oko kelémo lamaná itive.

³⁷ Kigika kemeni nene nana netatunú meina hiziiki goha alitamó neve. Ma nomive.

³⁸ Imane vegená mukí kéisi netá golesa aliaká nia vegená itó Ómasi kemegesa amiaká nia vegená niago, holúikú ve makó keza nenikumupe

monónemupe gilikiko kovoza hilitimó nene, okulumakutí lumu ve gihila neza aménehini lapaná nenémo numupiló itekiko apazá agelova kelémoko limito gamenaló nene keza kovoza hilimó nenéminoko nezagi kugulizá ale otitokumú novoza hilinogo ive, loko limó.

9

1 Láa loko loake, Izesú miní ameko láa loko lo kimimó: Lamaná lo likimitoze, gililo. Lekelisi ató nene nia ve lekelikutí lugáa makó hili asú inamiki ha niko Ómasímini gizapa olíkimiakalímimi zámuza nene amuza moloko utó okiko ániganigave.

Izesuni agupe haitolímimi imó (Mat 17:1-13; Luk 9:28-36)

2 Loko loake, hoza gamena 6-a minomo noitike Izesú nene Pitá Zemusí Zoní kezagó kelémoko agoka hánagú kezáikó itemó. Neneló kogómulaló noike haitó agupe ale luhoake noigo,

3 gineganevámo gizopa vaevae loko minokago, mikasigú vegenalite nenéminoko ale mokoná lamoaká nenéminoko minamó.

4 Lá okago Ómasímini agepagutí gakó imane amunaló liakó asi ve Ilaizako Moseko utó i kimikasigo, keza Izesugegi gakó ligili hagili iki minamó.

5 Lá niago, Pitá nene Izesuni láa loko lo amimó: Monó gizapa velemaka, imaneló minuhá laga okaze. Nenemú gaizopa losive makole geleketatunize, makó geile, makó Mosenive, makó Ilaizanive.

6 Loko limó nene kelegesá goha legekago, lo amiti gakokumú vitagá oake nene gakó gopa limó.

7* Noligo, límusi sahehevámo lemeko ze hitokimikago, límusigutí Ómasímo láa loko limó: Imane nene nigika ameaká nou gipáne noize, aí gakó gili alilo.

8 Loko lokago, litá iki gilipe iki ánigamó nene keitoka Izesú ezáagó noigo ánigamó.

9 Ánigiale Izesugegi agokagutí nilemeke Izesú ánigina netakumú avetó iki li kememitave loko, okulumakutí lumu ve gihila neza helenoitototí otekugogó li kimitave loko loketamó.

10 Láa loko li gakó gili alemóza, hilinakutí otiakalímimi mogonamú loká loká amó.

11* Láa liki loká itamó: Monó mogona apí-ikimiaká ve nenete gologí oletati vema velesá anitemiko Ilaizá goí oko anititive liki nanamú liaká niave.

12 Liki loká imikago, eza monó nagamí holokimiaká ve Zonikumú láa loko lo kimimó: Ilaizá goí oko aniteko netá matá mukí ale vavá itive liki lamaná linave. Itó okulumakutí lumu ve gihila neza nene miluma netá numupiló miliiki gopoguni milinitatave liki nenikumú monó gotolaú luhuva gizinamómagi neve. Áminamú lakagatí molahe.

13 Itó Ilaizakumú láa loko lo nolukumuve. Eza mota anitekago, aikumú monó pukugú luhuva gizina gakotó kezáini kagata gele netá golesa mota lilí imikago mota helekave, loko limó.

Izesú holosi golesagi mina gipa alémo zokamó (Mat 17:14-21; Luk 9:37-43)

* **9:7:** Mat 3:17; 2 Pit 1:17-18 * **9:11:** Mal 4:5; Mat 11:14

14 Láa loko lokago, izegipala zuha lugáa niatoka vi anitiake ánígamó nene, vegená vaí iki alegesá iake kezagi monó mogona apí-ikimiaká vegi lova leta iki niago ánígamó.

15 Ánígikago, vegená muki nenete Izesuni ánígiaké, litá iki sigaga goha litake aitoka ololu liki vake geké litamó.

16 Lá niago Izesú loká oketake lekeza nanamú lovaleta niave.

17 Loko loká okimikago, keikutí ve makolímo oteake láa loko lo amimó: Monó gizapa velemaka, holosi golesa gipánemini agikagú lemeko minoake agepa aleko lakolí okago, alémoko geitoka nouve.

18 Gipáne nenémo holosi nene agikagú lemeake alémo gopa napa oaká gamena nene mikasigú alémo akokago zupakopá zeko mohona oaká noive. Lá noike sehovala novilike agepagutí gelilikelií nolike, agisa agizani pehe loake minoaká noive. Lá okago, izegipaka zuha keza holosi apiliki amisilitave loko lo kumumóza amiselemitamó okave.

19 Loko lokago, Izesú láa loko lo kimimó: Lekeza ató imane gili alévolé amamó neneta, lekelikumú goselé nepelekave. Gamena gamena lekezagi minoloko voko mininake likizamuha hizekogó minatohe. Izegipama nénisi noutó alími ki alo.

20 Loko lokago, gipa nene aitoka alími kiago, holosi golesa nenémo Izesuni áñigoake gopa alémo ininá okago, mikasiló pou loko akoake, ako viligá viligá noike, sehovala vilimó.

21 Lá noigo Izesú nene amelahini loká otake hí gamenaló gizalimó neve. Loko loká okago limó: Izegipa komaló gizaleneimó neve.

22 Mukí gamena ámina netalímo alémo golesa inogo lokú nemó nagamikú nemó ahelú o ahuloaká onoimóma neve. Lá onoimóza, zámuza geitoka neikoma lelikumú gigika hizekiko lelémo vatí ozo.

23 Loko lokago, Izesú láa loko lo amimó: Zámuza geitoka neikoma loko lanimó nene nanamú lane. Makó keza Ómasímo lelémo vatí itimó neve liki gili alévolé iki minatamó nenete mukí netá nene vávani ikigó lilí itamóma neve.

24 Loko lokago gipánemini amelaho nene litá oko gamoga geko limó: Koma gele alévolé onoumóza koma miní ameko luhusáne ale kii lonimikako napa oko gele alévolé itove loko noluve.

25 Loko lokago, Izesú ánígamó nene ve vená mukí alegesá niago, áñigoake, holosi golesama lovaga lo amike namisilike limó: Holosi golesa geza agepa agata aleko lakolí anitika, agikagutí itekoko vozo. Lá okoko goha atiginá oko oko itemitane loko lo nohukogetuve.

26 Loko lokago, gopaga like alémo ininá goha okago, agikagutí iteko vimó. Iteko vokago, gipa nenémo gonosítana oko mikasiló ako minakumú nene vegená makolite mota helekave liki lamó.

27 Lá liki lamóza, Izesú nene agizató aleko alémo otekago ote minamó.

28 Lá okago, Izesú nene izegipala zuhamagi numukú itiki kezáikó minake láa liki loká itamó: Leza nene nanamú apeleko amiselemuháma neve.

29 Liki likago, eza láa loko lo kimimó: Holosi imanémimi nene netá makotunú kepeleko kimiseleakaláa nomive. Ómasiloka loakatunukó kepeleko kimisilinogo une, loko limó.

*Izesú alika hiliti gamenamú goha epoapoga lo kimimó
(Mat 17:22-23; Luk 9:43-45)*

30 Ámina apá ahuliak Galilaia mikasi aviligiki vamó.

31 Nivake Izesú nene izegipala zuhama láa loko lo keme keme imó: Okulumakutí lumu ve gihila neza nilími gala vetini kigizakú milikiko nipili hilinigave. Nipili hilikiko gamena losive makole minokinake goha otinogo uve. Loko lo kemeake vegená makolite ámina gakoláa gilikatave loko legesó oko vimóza,

32 ámina gakó nene gili vevesamake loká otatune liki lamóza, kehelele vizekago loká itamamó.

Vegená mukikutí éaho livilegeko noive (Mat 18:1-5; Luk 9:46-48)

33 Kapanao numutoka vi anitiakte, numunagú itiakte Izesú loká oketake gapoloka nanetakumú ligili hagili ave.

34 * Loko loká oketamó nene gapoloka nivake lelikutí éaho livilegeko agulizaki ve noive liki kezáitoka ligili hagili anazo, anotó alemiki kegepa apiziki minamó.

35 * Lá niago, mitó minake izegipala zuha 12-a sele lo kemeake láa loko lo kimimó: Ve makó eza nugulizaki ve napa minatove loko gilitimó nenémo lemeko minoko vegená mukilitini gelekelé oketanogo ive.

36 Loko Izesú loake, izegipa koma makó nene holúikú alémoko oko hize otemiakte aputá vizeneike láa loko lo kimimó:

37 * Makó keza izegipa koma imanéminiki nenikumule liki nasahilí itatamó nene, není nasahilí inimiaká niamó geleká noive. Itó makó keza nasahilí initamó nene nenikó nasahilí initamitave. Améneho nimisili ve aiki nasahilí itatamó geleká noive, loko limó.

Keikutí ve noamitimó nene lelikutí ve noitive (Luk 9:49-50)

38 Lá okago, Zoní láa loko lo amike limó: Tisalemaka, ve makolímo geí gugulizató like holosi golesa nene vegenalitini kigikagutí kepeleko nokimisiligo ánígunimó nene, lelí lémegetamimó nenazo, géneka lotunimó neve.

39 Loko lokago Izesú láa loko limó: Lekeza géneka litamilo. Makó eza nugulizató loko alévolé netá netá loló itimó nene litá oko nenikumú alevo letovo aminogo ive.

40 * Vegená makó keza lelí gala ve minamitamó nene lelikutí vegená ninigave.

41 * Neza lamaná lo likimitoze, gililo. Makó keza není vegenáne zuha niakumule liki geha nagamí kapu hamokó ihiki likimitamó nene haha aminogo ive. Meinaváa alitamó neve.

Golesa netakumú gala vizeaká gakó (Mat 18:6-9; Luk 17:1-2)

42 Nenikumú gili alévolé i mina izegipáne zuha limiki minamoki keikutí ve makolímo netá golesa alitive loko agoka vizeko litimó nene, agae, Ómasímo nana otatimó neve. Ámina vémini luvanaló gehani napa nagá ziki age nagamikú ahelú i ahulatatímíni avilegeko genavagi netá golesa loló otanogo ive.

* **9:34:** Luk 22:24 * **9:35:** Mat 20:26-27, 23:11; Mak 10:43-44; Luk 22:26 * **9:37:** Mat 10:40; Luk 10:16; Zon 13:20 * **9:40:** Mat 12:30; Luk 11:23 * **9:41:** Mat 10:42

43-44 * Lá onoinazo, gigizani nenémo lihima aleaká gapogú gelémo nomilikoma gigizani hutozo. Geza nene gigizani avasavagi minokoko ló apakuka lihamítí lokú holokataninazo, gepili minoko okulumakú ititanimó nene lamaná itive.

45-46 Gigisa nenémo lihima aleaká gapogú gelémo nomilikoma nene gigisa hutozo. Geza nene gigisa avasavagi nooko ló apakú gehelú ikatanazo, gepili minoko okulumakú ititanimó nene lamaná itive.

47 * Gogómula nenémo lihima aleaká gapogú gelémo nomilikoma nene gigizanitunú gogómula hize likozo. Geza nene gogómula avasavagi nooko lokú gehelú ikatanazo, gogómula hamokó minoko Ómasímini avogisaló ititanimó nene lamaná itive.

48 * Ló apakú holoko minatanimó nene, gugupegú ginini hizitimó nene asú amiti lokú voko minanogo ane.

49 Nosánetakú nene anuva amoko laga itive loko age ahuloaká noune. Nenémini oko vegená mukitoka kigikámini lotuva nene Ómasímini ló nenémo latimó neve.

50 * Age nene netá lamaná nemóza, agema melelé amitimó nene nana iki goha alími melelé itave. Ma lá aminigave. Lekelisi nene age nenémini iki minalo, itó hulu iki nene minalo, loko limó.

10

*Izesú vená kimisele ahuloakakumú gakó lo kimimó
(Mat 19:1-12; Luk 16:18)*

1 Izesú ámina apá ahuloake, limike Zutaia mikasi avilegeake Zota nagamí vola helegaloka vokago, vegená mukí goha aí amatoka alegesá ikago, goi oko aleaká imó nenéminoko monó lo keme keme oko minamó.

2 Lá noigo, Palisaio monó vegenalite anitiakte loká itake gimivagú milake lamó: Mosé lo hukoko li gakokú nene ve makolímó venala amisele ahulatove loko hanuva amisele ahulatimó neve liki gizinamóma nene etatihe etamitive.

3 Láa liki loká imikago eza ale viligoko loká oketake limó: Mosé nene nanave loko loleketamó neve.

4 * Loko lokago, keza lamó: Vená kimisilinigima nene luhuva netá giziki kimiiki kimisilitave loko Mosé gele kemeaká imóma nena.

5 Liki likago, Izesú láa loko lo kimimó: Lekelisi negi nagí hiziki likigika gopa ovimó nenemú imane lo hutoleketa luhuva gizamóza,

6 * netá matá apí oko kelémo utó i gamenaló emane nene Ómasímo vegi venaki kelémo utó imó.

7 Nenemú Ómasímo láa loko limó:

Nenemú ve makolímohé makolímohé izolahiko amelahiko ahulokimioko venalagi nene,

8 * kugupe nemó kigika nemó hamokó loló okiko apiziki minatáive. Loko gakó imane limó nenazo, keza losítá hoú liki minaminigasive. Hamokó kugupe loló onoimó gelekave.

9 Nenemú Ómasímo kelémo apizimó nenazo, vegenalita kelémo hotopotó oakaláa nomine.

* **9:43-44:** Mat 5:30 * **9:47:** Mat 5:29 * **9:48:** Isa 66:24 * **9:50:** Mat 5:13; Luk 14:34-35 * **10:4:**
Gapo 24:1-4; Mat 5:31 * **10:6:** Apí 1:27, 5:2 * **10:8:** Apí 2:24

10 Loko lokago, numukú itiki niake, izegipala zuhamate ámina gakokumú goha loká imikago,

11* Izesú láa loko lo kimimó: Ve makó eza venala amisele ahulokoko haitó vená alitimó nene, ve vená huko ezega emega imómámini lihima alinogo ive.

12 Itó ámináminoko vená makolímo vana amisele ahulokoko ve makotó vitimó nene, ve vená huko ezega emega imómámini lihima alinogo ive, loko limó.

*Izesú izegipa koma kama nónohá zeketamó
(Mat 19:13-15; Luk 18:15-17)*

13 Ve vená mukí keza agizanitunú kugupeló aleko nónohá zeketative liki izegipa koma kama Izesutoka kilímiki vikago, izegipala zuhate gahá kememó.

14 Gahá kimikago, Izesú ánigoake mulunagú golesa okago láa loko lo kimimó: Lekeza izegipa koma nene ahulikimikalo. Nenitoka ataze. Keza izegipa koma nenémínáa nene Ómasímini avogisaló viakalímini mututoni nianazo, li hoipa ikitamilo.

15* Neza gakó lamaná lo likimitoze. Ve makó keza izegipa namuni monokú itiáká niamómáminiki vávani iki monokú itemitamó nene, Ómasímini avogisaló nene keké vaminigave.

16 Loko lo kemeake, izegipa komama kuputá vizike agizanitunú nónohá zeketamó.

*Henonavagi ve
(Mat 19:16-30; Luk 18:18-30)*

17 Izesú eza ámina apatotí vitove loko noigo, ve makolímo ololu loko vike alapusa hizike loká otake tisá lamanámaka, nana okinake alévolé nemetameni alitomó neve.

18 Loko lokago, Izesú láa loko lo amimó: Geza nenikumú ve lamanale loko lanimó nene mogonánemú gele hee lo minoko nolape itó hanuva nolane. Lamaná améneho Ómasí hamokó noize, makó nomive.

19* Itó geza gapo lota gakó geleaká noane. Láa lokove: Geza vegená kepele helemo. Ve aleve suni ale gopa oko huko ezega emega amo. Guminá alemo. Soza hakupá gakó lamo. Vegenalitini netá hanuvamú alemo. Izokahiko amekahiko nene kugulizá ale otezo.

20 Loko lokago, eza láa loko lo amimó: Tisatemaka, neza nene umaki velotí nene ámina hoza aleaká noumole.

21 Loko lokago, Izesú nene gonú napilike agika aitoka moloake gakó láa loko lo amimó: Netá hamokó nemó nene ale hee litanize. Geza voko henokanoka mukí molokoko meinaváa monima aleoko gohogó vegená gona moloko kemeoko oko némegetozo. Lá okako okulumakú helisa henoni geitoka utó ogetanogo ive.

22 Loko lokago, ámina gakó geleake aí henoni vaí o minamó nenazo, gona moloko kimitohe loko agata gilitímo agoka agepa muhelé okago, mulunagú gena avisekago vimó.

23 Lá oko novigo, Izesú viligoko izegipala zuhama ánigoake láa loko lo kimimó: Henoníini vegená nene Ómasímini lapanató silipa iki itesá neve.

* **10:11:** Mat 5:32; 1 Koli 7:10-11 * **10:15:** Mat 18:3 * **10:19:** Gá 20:12-17; Gapo 5:16-20

24 Loko lokago, izegipala zuhamate ámina gakokumú ininá amóza, Izesú goha láa loko lo kimimó: Izegipánemata, Ómasímini amakú vo holoaká nene genavagi neve.

25 Kamele izámo nakasi vovónagú voakaláa nene vávani oko nomimóza, henonavagi ve nene Ómasímini lapanató voakaláa nene áminámini oko genavagi golesa neve.

26 Loko lokago, ininá goha iake li amiki lamó: Láa lokoma éaho agutó vizekiko minoloko voko minative.

27 Liki likago, Izesú gonú nokipilike láa loko lo kimimó: Vegenalite nenémini itamoláa nomimóza, Ómasímo netá makó loló itove loko agata giliti netá nene vávani okogó loló oaká noive.

28 Láa loko lokago, Pitá láa loko lo amimó: Gelenape. Leza mukí netá matate ahulokunike geí gémegetokuninazo, alika nene meinava alitunimó nehe.

29 Loko lokago, Izesú limó: Neza lamaná lo likimitoze. Ve makó keza numúnihe gouna zuhahe izóikini améikini izegipánihe mínihe nenikumule liki itó není gakó lamanakumule liki ahulatamó nene,

30 Itína imane gamenaló nene numuni gouna zuha izóikini izegipáni míni 100 nenéminiki alitamóza, vegená makolite hanuvamú gopoguni milikitani-gave. Lá ikiko alika utó iti gamena keza alévolé oko minoaká kemetamenigi minanigave.

31 * Lá oniomóza, itína goí ina vegenakutí mukilite alika milanigave, itó alika milina vegenakutí mukilite goí inigave, loko limó.

Izesú ezá alika hilitikumú gakó ligo losive makole imó (Mat 20:17-19; Luk 18:31-34)

32 Gapoló vake Zelusalega itinigi niake Izesú ale goí oko novigo, izegipala zuhamate ininá niago, ámegetiki va vegená alika kezaitoka utó iti netakumú kehelele vizigo minamó. Lá niago, Izesú eza izegipala zuha 12 nene kelémó otopá zeake, aitoka alika utó iti netakumú láa loko lo kimimó:

33 Gililo. Leza Zelusale numutoka notue. Neneló okulumakutí lumu ve gihila není nene guguni giziaká ve napagi monó mogona apí-ikimiaká vegi kei kigizakú milikiko goní initiki nipili hilita gakó li hukiki hetoka vetini kigizakú milanigave.

34 Lá ikiko, gopoguka linitiki gituhú initiki segi nogosanitunú nipiliuki nipili hilinigave. Lá ikiko, gamena losive makole minokinake goha otinogo uve, loko limó.

Zemusiko Zoniko loká asi netá (Mat 20:20-28)

35 Zepetaioni gipala losítá Zemusiko Zoniko nene Izesutoka asike láa liki lasimó: Tisalemaka, lélisi nene nemú manamú logimikusigo nene, ámina netá aleletatane loko nolusive.

36 Liki likasigo, eza nana netá aleketatokumú nilasive.

37 Loko lokago, láa liki li amesimó: Geí lapanakaló leza geí gigilika luga luga minalizo loko gele limitane loko nolusive.

38 * Liki likasigo, Izesú láa loko lo kimimó: Loká ninitasi netalímini mogona gili gopa ikasike likasive. Nénisi nene ekesá netá natomó nene lekelisi

áminagutí hanuva natáimó nehe. Itó miluma netá gihitomó nene lekelisiva gihitáimó nehe.

³⁹ Loko lokago, láa liki li amesimó: Hanuva natíimó nena. Liki likasigo, Izesú láa loko lo kimimó: Ekesá netá natomó nene lamaná lekezagi nanigasive. Itó miluma netá gihitomó nene lekezagi gihitáimóza,

⁴⁰ není nigilika luga luga minoakaláa nene, není netá nego likimitohe. Ale vavá oketa vegenalitini holomamú nilasive.

⁴¹ Loko lokago, izegipala zuha lugáa 10-a ámina gakó giliake, Zemusiko Zoniko keikumú mukahá kipilikago,

⁴²* Izesú nene izegipala zuha mukí sele lo kemeake láa loko lo kimimó: Ve makokumú nene mikasiuka vegenalitini kugulizaki ve niave liki liaká niamó nenete gelekelé izegipáini nene alévolekutí gizapa ikimiaká niave. Itó guivahani keza nene ámina iki ámenenáa kiviligiki miniaká niamó nene lekeza giliaká niave.

⁴³ Lá onoimóza, lekelitoka lá oko minamino. Lekelikutí ve makolímó nugulizaki ve minatove loko nolokoma nene hanuva lemetigí oko gelekelé oleketoko minatize.

⁴⁴ Makó eza mukí vegená kivilegeko minatove loko nolokoma lemeko vegená mukilitini megusa izegipa loló oko gelekelé oketatize.

⁴⁵ Okulumakutí lumu ve gihila neza gelekelé initatave loko lememuve. Vegená mukitoka gelekelé oketoko golesa netáini nene meina hizeko gologí oketatove oko nene minoko aleko u nugupe ahulatove loko lumumole, loko limó.

Agómula lika ve Patimiasí goha pulsoko ánigamó (Mat 20:29-34; Luk 18:35-43)

⁴⁶ Izesugegi Zeliko apatoka viki anitemó. Ámina apá ahulanigi niake, ezagi izegipala zuhagi vaí iki alegesá iki mina vegená makó nivago, Timeoni gipala Patimiasí eza agómula lika ve monimú voká vokató ve nene gapo agataloka minamó.

⁴⁷ Minake, Nasalete ve Izesúma noave liki likago geleake, gamoga geko sele loko limó: Izesuvu geza nene agulizaki Tevitini agávolaga, gologí oletatane loko lo mololeta velemaka, nenikumú miluma gelenetamane.

⁴⁸ Loko lokago, vegená mukilate legesó oko minative liki agómula lika vema gahá ameke li amemóza, áisi gele ahuloake gamoga geko sele limó: Geza Tevitini agávolagamaka, nenikumú gigika hizino.

⁴⁹ Loko negénegeka ligo ligo, Izesú geleake voko gapoló noikeye ámina ve nene sele likiko ino. Loko lokago, agómula lika vema láa liki sele li amemó: Gogoliza vizeko otekoko ano. Geí sele nolize.

⁵⁰ Liki likago, hepé gola gololohá o ahuloake, moí oko oteake Izesutoka vimó.

⁵¹ Vo anitekago, Izesú nana netá alegetatokumú nolane loko loká omikago, agómula lika vemámo tisánemaka, nogómula ale goloutonetatane loko noluve.

⁵² Loko lokago, Izesú láa loko lo amimó: Geza nene vozo. Nenikumú gele alévolé anitímo gelémo zokokaze. Loko noli agepagi, agómula goloutokago ánígoake gapoloka Izesuni ámegetoko vimó.

* **10:42:** Luk 22:25-26; Mat 23:11; Mak 9:35

11

*Sigaga litanigi ago Izesú Zelusale numutoka vimó
(Mat 21:1-11; Luk 19:28-40; Zon 12:12-19)*

¹ Keza vake Zelusalega ali ávatiha niake, Olivi agoka gohalaló nene apá losítá minamó nene Petepage itó Petania loko netoka vi anitemó. Neneloka anitiake, Izesú nene izegipala zuhagutí ve losítá láa loko lo kimiike kimisilimó:

² Helega numutoka vi anitiiki toki iza akaleva nagá zinamóma nene, vegená kogohí geko mohona onamitimatoláa nene, ánigiiki vínasiki aliki alizo.

³ Vínasiki aliki nisiko, ve makolímo nanamú niasive nolikoma, láa liki lilizo: Guivahanítémo hoza nego ámina izamú lokago aleko vinogo nousive. Goha imaneloka litá oko amiselekiko aliki anigave, liki li amilizo.

⁴ Loko lo kemekago, vasike ámina toki iza akaleva nene gapo gahevaloka gatetó nagá zinamó ánígikasike nívínasasigo,

⁵ gatetó mina vegenalite ánígiake, toki iza akaleva nene nanetakumú nívínasasive.

⁶ Liki likago, Izesú lo kimi gakó nene li kimikasigo gili kememó.

⁷ Lá ikago, keza toki iza akaleva nene Izesutoka aliki vasike, gineganéini nene gololohá ikasike toki iza akalevamámini amegesaló milikasigo, Izesú iteko amupiló minamó.

⁸ Lá oko novigo, vegená mukilite gineganéini gapoló avilisá imi nivago, lugáa nenete kokonasi agila nene gihisigutí hutiki mililikí viki gapoló avilisá imi vamó.

⁹* Lá niago, goí iká alika miliká a vegenalite gakó napagutí láa liki lamó: Agae, Guivahanímini gakotó anitelimikaninazo, Ómasímo nónohá zegetino.

¹⁰ Avoteho Tevitikitana minati vémo gizapa oketatimatoláa Ómasímo lusa getetino. Agae, veletoka okulumakú Ómasí agepoka litune, liki lamó.

¹¹ Lá imi vago, Zelusalega ite aniteake, monó zugusave napagú iteake netá makó ánígomó mohona o asú oake, gamena asú okago, ezagi izegipala zuhamagi Petania numutoka limiki vamó.

*Zuta vegenakumú lo vizeko gohuna za usí vizimó
(Mat 21:18-19)*

¹² Límugusi zeake gó lokago, Petania numutoka ahuliaké nivake, Izesuni gaúna olokago,

¹³ ánígamó nene gohuna za makó hotó neike agila mukí minokago ánígoake gihila zeneihe loko voko ánígamó nene, gihila zeaká gamena alitamigo, agilagó nego ánígoake

¹⁴ za nene láa loko lo amimó: Geza nene gihila makó zemoko gohuna loloko voko noako geikutí nene vegenalite keké namitave. Láa loko noligo, izegipala zuhate ámina gakó gili asú amó.

*Monó zugusave lo hukoketamó
(Mat 21:12-17; Luk 19:45-48; Zon 2:13-22)*

¹⁵ Lá iake Zelusalega vi anitiake, Izesú nene monó zugusaveú itike áminagú moni meina kona ali volaló imaló a vegená kimisele ahuloake, hotó mikasigutí moniló ámina mikasigú moni kimiaká a vetini holoma aleko gululupa soake, Ómasímini guguni gizi amitakumú nama luhusi miliaká a vegenalitini minoaká holoma aleko gululupa soake,

* ^{11:9:} Age 118:26

16 monó zagusave napagú nene netá matá aliki tigá igá amilo loko lo hukoketamó.

17* Lo hukoketake láa loko lo kimimó: Ómasímo li gakó nene monó gotolaú láa liki luhuva gizinamóma neve: Není numunímú haitopaitó vegenalite Ómasiloka liaká numunive liki litave liki gizinamóma neve. Lá onoimóza, lekeza nene alími maketi numuni lilí inamó nene guminaló veta halá giki miniatá geha mulí lilí ikave.

18 Loko lokago, guguni giziaká ve napagi monó mogona apí-ikimiaká vegi keza nenemú giliake, nana okinake apele helekuko imane suni asú itive liki lamó. Láa liki ligili hagili amóza, vegená mukilite monó lo keme keme okago laga kivisigo sigaga lita mogonamú giliake kelegesá legekago nenemú ahulitamó.

19 Lá okago únaká gamena gamena Izesuge ámina apá ahuliki viaká amó.

*Gohuna za osagava vizitímini mogona
(Mat 21:20-22)*

20 Neteká gó lokago, nivake, gohuna za nenémo mogonagutí osagava vizekago, ánígamó.

21 Lá okago, Izesú gakó limó nenemú Pitá geleake láa loko lo amimó: Tisao, ánígozo. Gohuna za azozá usí vize amenimómamo mota osagava vizeake neve.

22 Loko lokago, Izesú lo kimike limó: Ómasimú gili alévolé ilo.

23* Neza lamaná lo likimotoze, gililo. Ve makolímohe makolímohe vozane agoka litá oko zeko akutooko age nagamikú holamane loko litimó nene agata losi gelemoko nolu gakó alévolé inogo ive loko gele alévolé itimó nene, utó o aminogo ive.

24 Lekelisi nene netá nemú manamú giliiki Ómasiloka voká niliki mota alekune liki gili alévolé inikigó litamó nene, alinigave.

25-26* Itó otiki Ómasiloka lita gamena gamena nene, ve makolímini lihima ali minatamó nene ahulalo. Lá ikiko, okulumakú ametipo ámina oko lekelí lihimatini ahuloleketanogo ive, loko lo kimimó.

*Izesuni zámuzamú loká itamó
(Mat 21:23-27; Luk 20:1-8)*

27 Zelusalega goha atiginá iki iake, Izesú monó zagusave napagú iteko mohona noigo, guguni giziaká ve napagi monó mogona apí-ikimiaká vegi monó gizapa vegi aitoka iake

28 láa liki loká itake lamó: Geza imaneloka netá matá aleaká noanimó nene éahini gakotó lá oaká noane. Éaho lokago aleaká noane.

29 Liki loká imikago, Izesú láa loko lo kimimó: Nezagi gakó hamó loká oleketatoze. Lekeza li nimikiko neza éahini gakotó imane netá ale utó oaká nouhe nenéa lo likimitove.

30 Zoní monó nagamí holokimiaká hoza alimó nene hikutí ale utó ive. Ómasímini gakotó alihe, itó vegenalitini gakotó alive. Li nimikiko gilitoze.

31 Loko loká okimikago, kezáitoka ligili hagili iki láa liki lamó: Okulumakutí ale utó imole loko litunimó nene, íi, lekeza nanamú Zonini gakola gili alévolé amave loko linogo inazo,

* **11:17:** Isa 56:7; Zel 7:11

* **11:23:** Mat 17:20; 1 Koli 13:2

* **11:25-26:** Mat 6:14-15

³² itó mukí vegenalite Zoní nene Ómasímini agepagutí gakó loaká ve noive liki nilanazo, ámina hoza nene vetinigutí ale utó imole loko losá nene vegenalite nene nana ilitatahe loko lehelele vizekave liki kezáitoka liake,

³³ Izesú li gakokumú láa liki li amemó: Leza nene Zonini mogonala ma gelemune. Liki likago, Izesú láa loko lo kimimó: Láa likima nene netá matá imane aleáká noumó nene éahini gakotó lá oaká nouhe nenegi neza ámina oko lo lekememinogo uve, loko limó.

12

Vain nagá minimú anoza gakó (Mat 21:33-46; Luk 20:9-19)

¹* Izesú anoza gakó makó láa loko lo kimimó: Ve makolímo vain nagá nene zuhá oake, vego vego oko geisa hize asú oake, gihiláa mí zeko liliká ziti gale legeake, gizapa numuni hána geake, gizapa iki niko meinava likimitove loko vegená makó gutá kemeake mikasi makotoka venoni vimó.

² Voko minake nagá gihila guzá loaká gamena alitokago, geleake nagá gihila mikutí lugáá alenetoko ative loko gelekelé izegipala makó nene gizapa nia vegenatoka amiselekago,

³ vo anitimó. Vo anitekago, vain mitó gizapa imina vete apiliake nagá gihila amemake hanuva amisilikago atiginá oko vimó.

⁴ Lá ikago, gelekelé izegipa makó goha amiselekago keitoka goha anitekago, mini gizapa vete gotola ziki hoú nilake gopoguka litamó.

⁵ Lá ikago, makó goha amiselekago, aí nene apili helemó. Lá ikago, goha mukí kimiselekago, vi anitikago, lugáá nene gosohá nogosani kepelemó, itó lugáá nene kipili helemó.

⁶ Lá ikago, agika ami gipala hamokó minamó. Aí nene keitoka alika luma lama zeko láa loko geleake amisilike limó: Není gipa gihila imane amiselekugo ve napámini gipalama okaze liki ánigiiki nene alími lamaná itanigave.

⁷ Loko geleake amisilimóza, vo anitekago, mitó gizapa vete kezáitoka ligili hagili ake láa liki lamó: Imanémo nene mikasi amelahini gipala noinazo, áisi nene minokoko imane hoza ale lá inogo ive. Nenemú mota losé apelekuko helekiko, helisa henoni imane nene lelí loló itive.

⁸ Liki liake, gipalama agizató aliake losé apili hiliake, nagá gihila mikutí hetoka nene gonosiváa ali ahulamó.

⁹ Lá ikamó nenazo, nagá mini amelaho nene nana itive. Áisi okoko mini gizapa vema kepele ahulokoko vain mini nene haitó vete gizapa itave loko lehizeketanogo ive.

¹⁰ Itó imane monó gotolaú gakó láa liki luhuva gizinamóma nene lekeza gatinamóza lakagatí molokahe:

Numuni giaká vete gehani napa makó ánigi ahulamó nenémo geha lapusa alévoleláa loló oake noive.

¹¹* Ámina netá nene Guivahanímini gakotó utó okanazo, vegenalita ánigokuko lamaná okave.

¹² Láa loko lo kemekago, Zuta vetini monó gizapa ve keza anoza gakokutí gehanimú limó nene Izesuni ánigo ahulunikumú lokave liki giliake, agizató alinake nagá Amitune liki gelemóza, lá itunimó nene vegená vaí iki minamó nenete nana ilitatahe liki kehelele vizekago, ahulimiakte hanuva vamó.

* ^{12:1:} Isa 5:1-2 * ^{12:11:} Age 118:22-23

*Lugupe meina hizeaká gakó
(Mat 22:15-22; Luk 20:20-26)*

¹³ Zuta ve keza Palisaio monó vegenakutiki Heloteni patigú vegenakutiki ve lugáa nene Izesúma gakó makó lo gopa okiko agizató alitave liki aitoka kimisilikago,

¹⁴ Izesutoka vi anitiake láa liki li amemó: Tisalemaka, geí mogonaka gelenoune. Gakó gihilagó loaká noane. Geza vegenakumú gonukonú osá amane. Géisi vegeňá iti minamó limi minamó mukitoka Ómasímini gapováa vevesoko lelepizeaká noane. Nenemú lokako gilitune. Loma apatoka agulizaki ve napa Sisaní nene takisi moni ameaká nouhá etave etamíve.

¹⁵ Takisi moni kimitupe kememitune. Láa lamó nene amemiture loko lokikoma gamaniloka alémoko voko goní otatune. Itó hanuva amitune loko lokikoma Zuta vegenalite gili golesa itave liki gimivagú milikago, Izesú gakó latímini mogonáa geleake láa loko lo kimimó: Nanamú giminégú milanigi nilave. Moni makó nelepirzikiko ánitavate.

¹⁶ Loko lokago, makó alapizikago áingoake láa loko loká oketake limó: Vogunahana imane itó luhuva imanegi éahini neve. Loko lokago, keza gamani agulizaki ve napa Sisanive liki lamó. Láa liki likago,

¹⁷ Izesú láa loko lo kimimó: Láa likima nene gamanímo voká loaká noi netá nene gamani amilo, itó Ómasímo voká loaká noi netá nene Ómasí amilo. Loko lokago, vatí oko ale viligoko lo kimikumú sigaga goha litiki minamó.

*Hilinitakutí otiakakumú loká itamó
(Mat 22:23-33; Luk 20:27-40)*

¹⁸* Satukaio monó vegeňá lugáa keza hilinakutí otisá amave liki liaká a vegeňá makolite Izesutoka iake láa liki loká itake lamó:

¹⁹* Tisalemaka, Mosé láa loko luhuva gizo limimóma neve: Ve makolímo izegipa geto molamoko minoko helekikoma, agunalámo ámina gevóna vená alekoko uvolahini hili vemú izegipa geto molative loko loletamóma neve.

²⁰ Lá okanazo, uvolaho agunala 7-a minamó. Lá iake, ganá ve nenémo vená aleake, izegipa getamike helekago,

²¹ agunalámo ámina vená aleake minake, izegipa getamike helekago, aguna makolímo ámináminoko alímó.

²² Itó lá liki vake ve 7-a nenete ámina venakó ali volaló imaló iki minake izegipa getamike hili asú ikago, venáini nene minake alika hilimó.

²³ Ve 7-a nenete ámina vená ali volaló imaló iki minamó nenazo, hilinakutí goha otita gamena nene ámina vená nene éahini venala minitative.

²⁴ Liki galegutí oteaká gakokumú amé ziki giza itanigi likago, Izesú láa loko lo kimimó: Lekeza monó gotolaú gakó gelemake itó Ómasímo galegutí kelémo oteaká zámuzagi ma gelemake gili gopa ikave.

²⁵ Keza hele vegeňá otita gamena nene, vená aleakaláa nomive, itó vená alimi kimiakaláa nomive. Okulumakú ageló nenéminkí minanigave.

²⁶* Itó hele vegeňá goha otiaká nenemú neza lo likimitoze. Gozapá nene Mosé eza zamukutí ló guluma utó okago, áingoake noigo, Ómasímo gakó láa loko limó nene gatiaká niamóza mogona gelemave. Ómasímo nene ká emane amunaló hilina vemú nene Moseni láa loko lo ameneimóma neve: Neza Avalahani Isakani Zakoponi keí Ómasí minutímína minoloko voko nominuve.

* **12:18:** Apo 23:8 * **12:19:** Gapo 25:5 * **12:26:** Gá 3:6

27 Loko limó nenazo, nenemú eza kemeni hele vegenalitini Ómasi negopa, kemenia hanuva ne vegenalitini Ómasi noinazo, Ómasimú gili zaginake hele vegenaki hanuva mina vegenalitini Ómasi noive. Lekeza ámina gakó gili gopa goha ikave, loko limó.

Li mila gakokutí napáá

(Mat 22:34-40)

28 Láa liki lova-leta iki niago, monó mogona apí-okimiaká ve makolímo oake gámémé oko geleake Izesú nene ale lamaná okó ale viligoko lo nokimigo geleake, loká otake láa loko limó: Mosé lo hukoko li gakokutí hilímo kivilegeko napáá neve.

29* Loko lokago, Izesú láa loko lo amimó: Napa nenémo lá oko neve: Lekeza Isilae vese gililo. Guivahani Ómasile nene Guivahani hamokó noive.

30 Likigika lekemeni geleakatini zámuzatini mukí nene Guivahani Ómasitiniloka amilo.

31* Itó gakó napa makó nenémo lá oko neve: Gezakamú geleká noan-imómáminoko gigivekaginimú geleko gigika kemezo. Loko loketa gakokutí napáá makó iteko minamive.

32* Loko lokago, monó mogona apí-okimiaká vemámo láá loko lo amimó: Tisalemaka, gakó nene lamaná lokane. Nene gelekugo etokave. Ómasi hamokó noive, Ómasi makó nomive.

33* Itó ligika nemó gele vevesoakate nemó zámuzate nemó mukí aitoka amitunimó itó lezatemú geleká nounimómáminoko ligivetegikumú geleko ligika kimitunimó nenémo Ómasi guguni gizo ameaká netá haitopaitolímíni nene avilegekave.

34 Loko gele vevesoko lokago, Izesú geleake láa loko lo amimó: Ómasi alémo geí gizapa ogetati ve loló itani gamena nene hotó nomive. Loko lokago, giliaké, netá makokumú goha loká itatakumú kelegesá legekago, loká itamamó.

Gologí oketative loko lo moloketa vemú loká oketamó

(Mat 22:41-46; Luk 20:41-44)

35 Izesú monó zagusave napagú monó lo keme keme noike láa loko limó: Monó mogona apí-ikimiaká vete nene gologí oleketative loko lo mololeketa ve nene agulizaki ve napate Tevitini agávolaho noive liki nanamú liaká niave.

36* Tevití eza Ómasimini Sikalahú nenémo agikagú alémo vávani okago láa loko limó:

Mezaú ve eza není Guivahaníne nene není nigizani zamagaloka minoloko
voko noako, mukí gala vega nene gigisa lapuvauka ahuloketanogo
uve loko lo amimóma neve.

37 Tevití nene gologí oleketative loko lo mololeta vemú nene Guivahaníneve lokamó nenazo, gologí oletative loko lo molota vémo nana igo Tevitini agávolahogó noitive. Tevitini agapilamola noitimóza, Tevitini ve napagi noitive. Loko Izesú noligo, alegesá iki mina vegená mukí nenete giliaké laga kivisimó.

Monó mogona apí-ikimiaká a vemú alévolé oko lo hukonoimole

(Mat 23:1-36; Luk 20:45-47)

* **12:29:** Gapo 6:4-5 * **12:31:** Liv 19:18 * **12:32:** Gapo 4:35 * **12:33:** Hos 6:6 * **12:36:** Age 110:1

³⁸ Izesú nene monó lo nokimike miní ameko láá loko lo kimimó: Monó mogona apí-ikimiaká vemú, ehe. Kugupeló netá háná luhatakumú itó maketiloka mihina niago vegená makolite gekévaké likitatakumú,

³⁹ itó monó numukú numukú nene vegená mukilitini kovogisaló minoaká holomaló minatakumú, itó nosánetá napa ninató nene agepaló siakumukó nene netakumú kumu heleaká noive.

⁴⁰ Keza gevóná venalitini henokanoni gumina ali asú iká itó kegepatunú soza miliki agepoka háná liki Ómasiloka liká iaká nianazo, ámina ve nenete miniki lihima napa genavagi alinigave, loko limó.

Gohogó vená gevonalímo ahula moni (Luk 21:1-4)

⁴¹ Izesú eza monó zagusaveú nene moni miliaká pokisi gahevaloka minake, vegená mukilité ámina pokisigú moni nimilago ánigo minamó. Ánigo noigo, henónigí vegená mukí nenete moni mukí miliva miliva niago,

⁴² gohogó vená gevóná makolímo oake golohá moni koma losítá nene pokisimagú ahulamó.

⁴³ Lá okago, Izesú nene izegipala zuha sele lo kemeake láá loko lo kimimó: Neza lamaná lo likimitoze, gílilo. Vegená mukí imanete vaí iki milina monigutí nahulamóza, gohogó vená gevóná imanémo gohogó noikutí netá matala mukí nosánetá meina hizitimoláa ahulo asú okave.

⁴⁴ Nenemú gohogó vená imanémo moni miliaká polisigú ahula monimámo mukí vegenalitini moni avilegeneimó gelekave, loko limó.

13

Alika monó zagusave ali golesa itakumú limó (Mat 24:1-2; Luk 21:5-6)

¹ Izesú nene monó zagusavegutí nolimigo, izegipala zuhagutí makolímoláa loko lo amimó: Tisalemaka, ánigozo. Imane geha numuni lagámini ali tolova iki ginamó neve.

² Loko lokago, Izesú láá loko lo amimó: Áimáa numuni napa imanemú nolape. Itína nene ha nego nánigamóza, minoko lova gala ve keza imaneló gehari apili ki tele vizikiko gehani nene amupiló amupiló iki mililikí itekutí gululupaso asú inogo ive.

Miluma gilituni gamenámini ganá netá (Mat 24:2-14; Luk 21:7-19)

³ Loko loake, Izesú nene izegipala zuha Olivi agokaloka kelémoko iteake, monó zagusave helegaloka nego, nenenó minake, Pitá Zemusí Zoní Etulú kezagó Izesú noitoka vake loká itake lamó:

⁴ Itína netakumú lanimó nene nanahé gamena utó itive, itó lani gamena nene alitanogo noiko nana anosa utó okiko ánígatume. Lo lemezo.

⁵ Liki likago, Izesú láá loko lo kimimó: Ehe, gizapa ilo. Ve makolímo lokogoka vizekatíze.

⁶ Vegená mukilité nanitiki není nugulizató liki okulumakutí lumu ve gihila nezama noue liki vegená mukí kogoka vizinigave.

⁷ Lekeza haitopaitó lovámini gakola nigliki itó lovatiní konó nigliki nene mulutini itemino. Ámina netá utó itímóza netá matá velesá asú aminogo ive.

⁸ Numutó namató vegená makó nenete gala venini lova ali nikimiko, agulizaki ve makolímini zuhagi itó makolímini zuhagi lova hizinigave. Itó

mukí mikasiuka imimá noiko gaúna gamena mukí utó itimóza, ámina netá utó itimó nene venalite izegipa getanigi miluma giliaká niamó nenémini oko utó inogo ive.

9 * Lá onoize, lekelisi gizapa keké viziki ilo. Gakó hoza alilikimiiki gonító likilímiki vinigave. Itó monó numúikú numúikú nene segi nogosanitunú likipilitamó neve. Není nugulizá lekelitoka minakumule liki kugulizaki ve napatini itó kiapegini kovogisál likilími milikiko keí kovogisál oti miniki neni mogona li kiminigave.

10 Lá itamóza, gamena litá oko asú aminogo ive. Goí oko Ómasímini gakó lamaná nene numutó namató puu loko vitive liki li hutilí i asú inigave.

11 Likigizató aliki likilímiki viki goní ilikitata gamena nene, nanave loko litupe liki lakagata giliko gena amino. Gamena nene zupa Sikalahulímo likigikagú gakó mololikimikiko áminagó nene lilo. Lélisi lupe lamiki Sikalahulímini gakó loló ino.

12 Ámina zupahé nene uvolaho makolímo agunala agizató alekoko goní omikiko agunala nene apili hilinigave. Amelaho nene gipala agizató alekoko goní omikiko nene gipala apilinigave. Izegipáini nenete izóikini améikini lova ali kimiiki likiko izóikini améikini kipili hilinigave.

13 * Není nugulizá lekelitoka minakumule liki vegená mukilite mukahá likipilinigi niamóza, vegená makolite gamenáini asú amitító monó ahu-lamiki alévolé iki vitamó nene Ómasímo kugutó vizinogo ive.

Miluma geleaká gamena napa (Mat 24:15-28; Luk 21:20-24)

14 * Minoko lekeza nene mu likizapa iti netá golesa nene minamoáká apatoka apá ale golesa oaká netá nenémo oteneiko ánigatave. [Imane gakó gatatanimó neneka imane nolu gakokumú gele guni ozo.] Ámina gamenaló Zutaia mikasiuka nita vegená nene golisi iliki agokaloka ititakumule.

15 * Keí numupító nita vegená nene golisi iliki limiki numúikú henoníni ma aliki vamitakumule.

16 Itó mikú noiti ve nenémo luhoaká gó alitove loko numunaloka atiginá oko vamitikumule.

17 Kee, izegipa kagatupagi nita venaki izegipa namuni aminí nikimita venaki nene ámina gamenaló nene nana itamó neve.

18 Lekelisi nolu netá nene golini gamena utó amitive liki Ómasiloka liki minalo.

19 * Ámina gamenaló genavagi netá utó itimó nenémo Ómasímo apí oko netá matá ale utó i gamenalotí emane utó osá ami netá nene minoloko itike itike imane gamenaló utó amive. Nolu gamenaló utó okoko nenémini veletó goha utó aminogo ive.

20 Guivahanímo ámina miluma gilita gamena ale atuhá amitimó nene, vegená makó ma kavasavagi minamitamó nemóza, kelémo etó onoi vege-nakumule loko ámina gamena nene ale atuhá inogo ive.

21 Nene gamenaló ve makolímo ánígalo, gologí oletati vema imaneloka utó okave, itó ánígalo, volaneloka utó okave loko lo likimitimó nene, ámina gakó gili zagemilo.

* **13:9:** Mat 10:17-20; Luk 12:11-12 * **13:13:** Mat 10:22 * **13:14:** Tan 9:27, 11:31, 12:11 * **13:15:** Luk 17:31 * **13:19:** Tan 12:1; Ali 7:14

22 Ámina gamenaló nene gologí oleketati ve sozámini itó Ómasímini agepagutí gakó liaká ve sozámini utó iiki vegenalite sigaga lita netaki soza avevezaha sunigi aliiki Ómasímo kelémo etó onoi vegená kogoka vizitupe liki lá inigave.

23 Ehe, nolu netá nene utó onamigo mota lo lekeme asú okuve. Nenemú gizapa alévolé iki minalo.

Okulumakutí ve gihila atiginá iti gakó
(Mat 24:29-31; Luk 21:25-28)

24* Ámina gamenaló ámina genavagi netá asú okiko, ho noiteko litá oko límugusí zekiko ikanímo hize sata amiko,

25* sonohí nenete okulumatotí atohiki velehé nilimiko, okulumakú amuzavagi netá mómomáká i asú niko

26* okulumakutí lumu ve gihila neza zámuzánegi itó lapanánegi nene límusí amupiló nolumugo ámiganigave.

27 Lá okiko, agelogini kimiselekugo, kelémo etó onou vegená ho noititokatí ho nolimitokatí itó ezega emegatí itó mikasi nekisa vokisaukatí kilími nupa inigave.

Gohuna zámimi anoza gakó
(Mat 24:32-35; Luk 21:29-33)

28 Gohunagítana zamú anoza gakola nemó nene gili vevesiki gililo. Izanámo nene nagamila nego agila guluma sekago lekeza ániakié ho gamena mota alitokave liki giliaká niave.

29 Itó ámináminiki lo lukumu netá nene utó noiko ániiki ve napate nene gatekú omo ávatiha okave liki litaze.

30 Neza lamaná lo likimotoze, gililo. Imane gamenaló nia vegená velesá hili asú inamiko nolu netá mukí nene utó inogo ive.

31 Okulumaki mikasigi tolava itáihá, není gakó nene ma gopa oko tolava aminogo ive.

Gamena napamú gelemune
(Mat 24:36-44)

32 Lá onoimóza, ámina gamenamú ve hamoláate keké gelemave, itó okulumakú ageló keza ma gelemave, itó Ómasímini gipala noutímina ma gelemuve. Améneho hamokó ásigó geleneive.

33 Ato gamenamú lekeza ma gelemanazo, ehe, gizapa i guni iki minalo.

34* Lá oko neve. Ve makolímo venoni vinogo nooko numuni apala ahuloko vinogo noike gelekelé izegipala nene mukí hoza nene etó etó oko kigizakú moloko netá matalaló gizapa initatave loko ahulokimikáe gatetó gizapa ve nene gizapa oko minozo loko lomiaké vimó.

35 Nenemú numuni amelahoma ati gamena nene gánavaló ahe akovevé ahe gó anuva noikohe gokululuva notovoikohe lekeza ma gelemanazo, nenemú gizapa i guni iki minalo.

36 Lokovó akiniko galinali oko ánigolikimikatize.

37 Lo nolukumu gakó nene lekelikumukó lamuve, vegená mukikumú noluze. Lekeza nene gizapa iki minalo, loko limó.

* **13:24:** ZOE 2:10,31; ALI 6:12 * **13:25:** ISA 34:14; ALI 6:13 * **13:26:** TAN 7:13 * **13:34:** LUK 12:36-38

14

*Monó gizapa vete Izesuni apilinigi lova gizamó
(Mat 26:1-5; Luk 22:1-2; Zon 11:45-53)*

¹* Avóikini asenini zeketakumú gili mina holisigú lulu vizemi peleti niaká a holisi alitokago, gamena losítá ha nego, guguni giziaká ve napagi itó monó mogona apí-ikimiaká vegi keza láa liki lamó:

² Vegenalite lova napa ali utó iki lipilikatanazo, holisigú nene Izesuni apelemitune. Lá onoinaizo, asuguná oko Izesuni agizató aleko apele hilitune liki gakó liki liake nenémini gapomú vitagá amó.

*Petania numutoka Izesuni anuva lamanaki uveli holotamó
(Mat 26:6-13; Zon 12:1-8)*

³* Lá noigo Izesú nene Petania numutoka noikeye Saimon eza halamé netá gizaleake minake zoka vémini numukú iteko nosánetá noko noigo, vená makolímo gehanigitana goni aleake, agepáa zeko ategeake áminagú nene anuva lamanaki uveli agulizá nalita nene meinava iteko mina netá nene Izesuni gotolaló leketamó.

⁴ Lá okago, ve lugáate mulúikú golesa okago, kezáitoka lamó: Uveli lamaná nene nanamú latila ive.

⁵ Amina uveli nene hanuva minalina meinaváa moni 300 kina alekinake gohogó vegeňa kumutiline. Liki liake gahá amikago,

⁶ Izesú geleake láa loko lo kimimó: Ahulitalo. Nana igo gena gakó li nameve. Vená imanémo netá lamaná alenimikago etokave.

⁷* Gohogó vegeňa keza lekelitoka gamena hána miniliki viki minanigi anazo, kelémó lamaná itune liki nene kilími lamaná itamóza, neza lekezagí minoloko voko minaminogo uve.

⁸ Ezáa loló itove loko agata gili netá nene loló okave. Aliká nénisi helekugo gonosi milimilugú gale zinitatakumú agata geleake nugupeló anuva lamanaki uveli holonimikave.

⁹ Neza lamaná lo likimitoze, giliilo. Makó mikasiuka není gakó lamaná imane li utó iki li kimitató li kimitató nene imane venalímini mogonamú gili zagitave liki eza loló oneta sunimuki li kiminigave, loko limó.

*Zutá Izesuni amimika litove loko lo hutamó
(Mat 26:14-16; Luk 22:3-6)*

¹⁰ Lá okago, Izesuni izegipala zuha keikutí ve makó agulizá Zutá eza Kaliót apatotí ve nenémo guguni giziaká ve napa niatoka vike Izesuni amimika loko alémoko oko likigizakú ahulatove loko lo kimimó.

¹¹ Lo kemekago, giliake, mulúikú lamaná okago, age nonó lá oko gimitune liki Zutani agómulaló li hutikago, geleake Izesuni amimika linogo amapani molamó.

*Izesú izegipala zuhagi asenini zekimiaká nosá namó
(Mat 26:17-25; Luk 22:7-14, 21:23; Zon 13:21-30)*

¹² Lulu vizemi peleti niaká a holisímini ganá gamena nene avóikini asenini zeketakumú gili minake sipsip iza akaleva apiliaká a gamenaló nene, izegipala zuhate Izesuni loká itake lamó: Asenini zeketakumú gele minoaká holisímini nosánetá nene hiláauka viki ali vavá initatave loko nolane.

* **14:1:** Gá 12:1-27 * **14:3:** Luk 7:37-38 * **14:7:** Gapó 15:11

13 Liki likago, izegipala zuhagutí ve lositá nene nokimisilike láa loko lo kimimó: Zelusalega nanitisiko ve makó eza paisele somo nagamilagi geheneike gapoló hotu nilikima nene ámina ve ámegetiki vilizo.

14 Lá iki víki ámina ve nene numukú itekiko numuni amelahini láa liki li amilizo: Tisalémo nezagi izegipáne zuhagi asenini zekimiaká nosá natuni numuni agika hiláauka neve loko lokago nousive.

15 Liki likisiko, numuni agika veletó nego netá matá avilisá ohá lekelepezikiko nenenló nosánetate ali vavá ilizo.

16 Loko lo kemekago, izegipala losima keza gili alikasike taoniló vi anitakisike ánígasimó nene Izesú lo kimimómáminoko nego ánígikasike asenini zekimiaká holisímini nosá ali vavá asimó.

17 Lá ikasigo, límugusi zekago, Izesú nene izegipala zuha 12-agí ali nupa iake,

18 * nosánetá niki niake, Izesú láa loko limó: Lamaná lo likimitoze, gililo. Lekelikutí nosánetá nonuhakutí ve makolímo nimimika linogo ive.

19 Loko lokago, keza miluma nigeleke hamopamó li amiki nenikumú nolape.

20 Liki likago, eza láa loko lo kimimó: Ve 12 lekelikutí hamó lapegeuti peleti nagamí zeko natíi ve nenémove.

21 Okulumakutí lumu ve gihila nenikumú monó gotolaú luhuva gizinamómámini oko hilito gapogú novumóza, nimimika loko nelémoko viti vema agae, lihima sipisi alinogo ive. Izolaho aí getamilina nene vávani oko minaline, loko limó.

Lepa nosá apí oko kimimó

(Mat 26:26-30; Luk 22:15-20; 1 Koli 11:23-25)

22 Nosánetá ninake Izesú nene peleti aleake Ómasi agepoka loake gitegeko nokimike láa loko limó: Aliki nalo. Imane není mémeláne neve.

23 Loko loake vain goni aleake Ómasi agepoka loake, kemekago, nenegutí mukító ninago,

24 * láa loko lo kimimó: Lo múnaheaká gakolímíni golaníne nene vegená mukikumule loko lekitomó imane neve.

25 Lamaná lo likimitoze, gililo. Vain gihilagutí goha naminake minoloko vinake Ómasímini agulizaki vetipo loló oleketato gamena nene vain nagamí haitolímíni natove, loko limó.

Izesuni Pitá egamega otatikumú lo utó imó

(Mat 26:31-35; Luk 22:31-34; Zon 13:36-38)

26 Láa loko lokago, monó nama makó liake limiake, Olivi agoka agisauka anitiakte,

27 * Izesú láa loko lo kimimó: Monó gotolaú nene Ómasímo li gakó nene láa liki luhuva gizinamóma neve: Gizapa ve apelekugo sipsip iza nene hutilí iki golisi inigave. Liki gizinamóma nenazo, lekeza mukító není visilinitanigave. Lá onoitízoa,

28 * helekugo goha nelémo otekiko, Galilaia mikasiuka goí o likiminogo uve.

29 Loko lokago, Pitá láa loko lo amimó: Neza viselegetamitove. Keza mukító gele alévolé oakáini nene gologolo sokikoma nénisi nene lá aminogo uve.

30 Loko lokago, Izesú láa loko lo amimó: Lamaná lo gimitoze, gelezo. Itína holugú nene okolohomámo anó losi molonamiko nenikumú ánígamuve loko gamena losive makole egamega onetanogo ane.

31 Loko lokago, Pitá pigi vizeko limó: Neza geikumú egamega ogetaminogo uve. Nipili hilinigi niko, gezagi helekusigoma nene lá ogetaminogo uve. Loko lokago izegipa zuha mukító keza alími vatí ake ámina gakokó lamó.

Izesú Gesemane zazuhagú Ómasiloka limó

(Mat 26:36-46; Luk 22:39-46)

32 Lá ikago, apá makó agulizá Gesemane loko neneló vi anitiake, izegipala zuha láa loko lo kimimó: Lekeza imaneló niko neza voko Ómasiloka litoze.

33 Loko loake, Pitanigi Zemusinigi Zoninigi kelémoko voake, Izesú nene mulunagú peisi nozigo miluma geleake,

34 láa loko lo kimimó: Mulúnegú gónpupa geake hilitomó noize, lekelisi nene imaneloka miniki gizapa iki minalo.

35 Loko loake, koma minomo novike mikasigú agoka nohizike Ómasiloka láa loko limó: Aménega, genavagi gihito netá imane gelekako nivilege vitive loko noluve.

36 Loko nolike láa loko limó: Aménegamaka, geza mukí netá loló itove loko gagata gilitani netá nene vávani okogó loló itanimó nenazo, genavagi gihinitata netá imane nenitokatí ale olové itane loko nogulumóza, není nigikaloka molamoko geí gigikaloka nelémo molatane loko noluve.

37 Loko loake, oake izegipala zuha ánígamó nene, kovó akinago ánígoake, Pitani alémo otike láa loko lo amimó: Saimon geza akonape. Geza gamena koma gizapa oko ote minamitape.

38 Lekemekú milatakumú gopa ikatanaze, gizapa iki miniki Ómasiloka liki minalo. Likigikámo vávani noimóza, lukugupémo gena noive.

39 Loko lo kemeake, goha vike ámina gakó like Ómasiloka loake,

40 atiginá oko ánígamó nene, kogómula ahíhí okago kovó akinago ánígamó.

41 Lá okago anotó aliki li amita gakokumú vitagá amó. Goha ago nene losive makole okago, Izesú lo kimike limó: Lekeza lakavasú viziki hanuva aki niminahe. Ánesile. Gilinahe. Okulumakutí lumu ve gihila neza lihimáinigi vetini kigizakú nimimika liki nilími milata gamena mota alitokave.

42 Otilo, mota vitunize. Ánígaloo. Nimimika liti vema mota alító okave.

Izesuni amimí okago alemó

(Mat 26:47-56; Luk 22:47-53; Zon 18:3-12)

43 Láa loko lo kemeko noigo, izegipala 12 keikutí kigivéipo makó Zutá noago, vegená mukí keza ámegetiki niake gelekahosigi sopolo hánagi ali minake amó. Keza nene guguni giziaká vegi monó mogona apí ikimiaká vegi monó gizapa vegi keza emane amunaloka kimisilikago,

44 nivake amimika liti vemámo gakó makó láa loko limó: Novinake ve makó agoka legeko nonugo nene ánígiiki ámina ve noive liki agizató aliki gizapa itiki alímiki viló.

45 Loko loake ake, Izesú noitoka litá oko vo amatoka aniteake, oho, tisathove nolike agoka legeko namó.

46 Lá okago lova ve nenete ake Izesuni agizató ali gikitiki alemó.

47 Lá niago, amatoka mina vegenakutí makolímo aí sopolo hána nene golagutí segeake guguni gizoaká ve napámimi gelekélezegipala apilike agata zeko isimó.

48 Lá okago, Izesú nene lova vema láa loko lo kimimó: Neza nene laskoli nougo sopolو hánagi itó gelekahosigi aliki niake nigizató alitune liki niahe.

49 * Gamena gamena lekezagi monó zagusave napagú minuke monó lo keme keme oko minumómaló nigizató alisá amamó nehe. Lá ikamóza, emane amunaló nenikumú monó gakó luhuva gizinamó nene alévolé itive loko netá imane utó okave.

50 Loko lokago, izegipala zuha nenete ahulimiake golisi hutilí iki vamó.

Makí golisi vimó

51 Lá ikago, gosohá ve makolímo gó gizopa agupeló likeake Izesuni nene ámegetoko novigo, ámina ve nene agizató alikago,

52 góma nene gololohá oko ahulo kigizakú oake agupe zapakó golisi vimó.

Kansoletini kogómulaó Izesuni goní itamó

(Mat 26:57-68; Luk 22:54-55,63-71; Zon 18:13-14,19-24)

53 Lá okago, Izesuni nene guguni gizoaká ve napa noitoka alími ki vikago, guguni giziaká ve napagi itó monó gizapa vegi monó mogona apí ikimiaká vegi alegesá iki minakú alími ki itemó.

54 Izesuni alími nivago, Pitá nene hotó otigí oko kêmegetoko vike, guguni gizoaká ve napámini hé numunagú áneneló iteko ámina vémini gelekelé izegipategi minake lotó agupe lotá oko minamó.

55 Lá noigo, guguni giziaká ve napagi keí kansolegi mukító nene Izesuni apele hilitune liki soza hakupá gakóinimú vitagá amóza,

56 hakupá gakó la ve nenete gakóini hamó lamamó. Mukí liki amupesamó nenazo, ali utó amamó.

57 Makolite otiki hakupá gakó aikumú láa liki lamó:

58 * Eza nene monó zagusave napa kigizanitunú ginamóma imane zeko tele vizekinake, gamena losive makole noviko goha nigizanitunú gemito ha hanuva lokugo utó inogo ive loko noligo gulunimole.

59 Liki lamóza, gakóini nene hamó gapoló vamigo,

60 guguni giziaká vetini ve napámini nenémo holúikú oteake Izesuni loká otake goní nigitake nila gakotó geza ale viligoko lo kimitani gakó ma nomihe.

61 Loko limóza, Izesú nene agepa apizeake minake gakó ale viligoko lo amemigo, guguni giziaká vetini ve napa nenémo goha loká otake limó: Geza gologí oletatane loko lo mola vema Ómasi agepoka loaká nouhámámini gipala noape.

62 * Loko loká omikago Izesú limó: Oo, nene mota nolane. Itó makó lo likimitoze, gililo. Okulumakutí lumu ve gihila neza amuza vémini agizani zamagaloka nougo, itó okulumalímini límusigú nolumugo ániganigave.

63 Loko lokago, guguni giziaká vetini ve napa nenémo gele golesa oake luhoaká gola aleko polo noligike vegenala zuha láa loko lo kimimó: Gakola gilina vegená makó nanamú sele lokinake gakó goha lokiko gilitune.

64 Ómasi avilegeko li gakó mota gilikaze. Nenémú lekeza gilikago nana onoive. Loko lokago, keza mukilate nakahunímini gakó lokaze, mota losé apilitune liki li hukitake,

65 lugáate gituhú itake agoka agepaló nihitake kigizanitunú napeleke lamó: Geza gakó mogona lo utó oaká ve noitanimó nene, éaho nogipilihe lo utó oko lo lemezo. Liki likago, gelekelé izegipáinimate kigizanitunú apelemó.

*Pítá Izesuni egamega otamó**(Mat 26:69-75; Luk 22:56-62; Zon 18:15-18,25-27)*

⁶⁶ Lá niago Pítá nene hé numuni amunaloka noigo, guguni gizoaká ve napámíni gelekelé mohola makolímo oko ánigamó nene,

⁶⁷ Pítá nene agupe ló lotá oko noigo, áingoake gonú napilike geza nene Nasaleste numutotí ve Izesuki miniáká niasi vema noane.

⁶⁸ Loko lokago, Pítá eza egamega ike gakó lanimó nene ma gelemuve, itó mogonáa gele vevesamuve. Loko loake, gatekú nolimigo,

⁶⁹ ámina gelekelé mohó nenémo aí goha áingoake alegesá iki mina vegenáma lo kimike ve imane Izesuni zuhagutí noive.

⁷⁰ Loko lokago, goha egamega hulupaváa imó. Lá okago, gamena komásí neigo áminaló oti mina vegenalite Pitani goha láá liki li amemó: Géisi Galilaia ve noaninazo, géisi lamaná Izesuni zuhagutí noane.

⁷¹ Liki likago, eza Ómasímini avogisaló lo hutoko lamaná noluze, soza litomó nene Ómasímo usí vizenimikatize, lekeza gakó nila ve nene ánígonamu vemú nilave, loko limó.

⁷² Loko noli agepagi okoloho nenémo goha anó molamó. Anó molokago, Pítá nene Izesú lo ami gakó nene, okoloho nenémo gamena lositá anó molonamiko není ánígonamuve loko egamega onetatanimó nene gamena losive makole inogo ive loko amunaloka lo ami gakó goha geleake ive napa imó.

15*Izesuni Pilató noitoka alímiki vamó**(Mat 27:1-2,11-14; Luk 23:1-5; Zon 18:28-38)*

¹ Neteká ho noitigo, guguni giziaká ve napagi monó gizapa vegi monó mogona apí-ikimiáká vegi monó kansole ve mukí kezagi lova gizi hutiake Izesuni nene nagá zimiakte alímiki vake Pilatoni agizakú milamó.

² Lá ikago, Pilató nene Izesuni áingoake loká otake geza nene Zuta vetini kugulizaki ve napáini noape. Loko loká omikago, eza láá loko lo amimó: Nene gezaka motá lokanimole.

³ Loko lokago, guguni giziaká ve napamate mukí netakumú goní imikago,

⁴ Pilató goha loká otake limó: Geikumú gakó genavagi nilamó nenazo, geza gakó ale viligoko lo kimitanimoláa ma nomihe.

⁵ Loko loká omikago, Izesú gakó ale viligoko lo kememigo Pilató nene agata gululusi gilimó.

*Izesú hilitive liki goní itamó**(Mat 27:15-26; Luk 23:13-25; Zon 18:39-19:16)*

⁶ Kiapé eza Zuta vetini avolagini asenini zeketakumú gili mina holisigú meleketó meleketó nene Zuta ve keza aseva zetatane liki ve makolímini agulizá ikago, agulizaki ve nenémo nagá numukú ahulikita ve kimisele ahuloká ahuloká okago, ámina ve nene numúítoka viaká amó.

⁷ Lá imó nene gamena nene zupa ve makó nagá numukú minamó, agulizá Palapasi. Áisi nene vegená lugáa kelémo vatí ike gamaniloka lova gizakú nene ve makó kepele hilimó nenazo, nagá numukú ahulimikago minamó neve.

⁸ Lá okago, vegená mukí nenete Pilató noitoka vake eza aleaká imómáminoko alitive liki loká imikago,

9-10 guguni giziaká ve napa nenete Izezukumukó amekugú niki miniake gonító alímiki vakumú nene Pilató geleneike lása loko lo kimike limó: Láslikima Zuta vetini agulizaki vetipo nene aseva zemikugo lekelitoka vitive liki nilahe.

11 Loko limóza, guguni giziaká ve napa nenete vegená mukilitini mulúikú hizikago

12 aitót Palapasini aseva zetamane liki likago, Pilató goha lo kimike limó: Zuta vetini kugulizaki véini noive liki liáká nia vemú nene nana otatove.

13 Loko loká okimikago, goha gopaga liki zohota zaló hilitikumule.

14 Liki likago, Pilató nene nanamú. Nana netá golesa alekago nilave.

15 Loko lokago, keza goha gopaga liki likago, Pilató nene ali nupa imina vegenalitini mulúikú hulu itive loko Palapasini gologí omikago keitoka vimó. Itó Pilató lokago, Izesuni nene segi nogosanitunú apiliake víki zaló nilitunú ziki apili hilitave loko kigizakú molamó.

*Ami vete Izesuni gopoguni militamó
(Mat 27:27-31; Zon 19:2-3)*

16 Lá okago, ami venate agulizaki ve napamámini numuni holutó nene Izesuni alímiki iteke ami ve lugáa mukí kilími nupa ake,

17 agulizaki vegetana lilí itake okohu gó luhimiake gasovagi nagatunú akilí lilí iki gotolaló hitimiake,

18 amé ziki géké litake oga mokáneve, Zuta vetini kugulizaki vénimave.

19 Liki liake, akepa nogosanitunú gotolaló ziake gituhú nitake agisagú gupá nizeke soza miliki agoka agaka vizemó.

20 Lá ake gopoguka li asú itake okohu gó luhitamó nene gololohá iki ali miliake ezáa gola luhimiake, zohota zaló nene nilitunú ziki apili hilinigi alímiki vamó.

*Izesuni zohota zaló apelemó
(Mat 27:32-44; Luk 23:26-43; Zon 19:17-27)*

21* Lá iake gapoló nivago, ve makó agulizá Saimon eza Apilika mikasiuka Sailini apatotí ve Alesaté itó Lupú keí améipo nene minaukatí noago, hotu liake gala vizikago, Izesú geheko vi za nene alémo vatí oko getetoko vimó.

22 Lá noigo, alímiki vake apá makotoka agulizá Goligota loko, lelí gakokutí nene gotóini gonosi helisa apale loko nenenloka anitiake,

23 Izesú native liki vain nagamikú nene miluma gelemiti lusa netá makó agulizá mulu nene miliki ali gopa iake amemóza, namimó.

24* Namigo, zohota zaló nene apiliaki apatiake gineganева gona miliki aliki éaho alitihe éaho alitihe liki satu zohí amó.

25 Lá iki apelemó nene gó loake ho ite alévolé noigo, zaló apiliaki apatemó.

26 Lá ikago, nakahunímini gakó luhuva nene Zuta vetini kugulizaki véinive liki giziaké apatemó.

27-28 Itó laskoli ve geligeli ve makó nene agizani sogaloka apatemó, itó makó nene agizani zamagaloka apiliaki apatemó.

29* Lá ikago, vegená vigá igá amó nenete gotóinitunú goké goké nizeke amé ziki gopoguka litake láá liki lamó: Oho, monó zugusave zeko tele vizekinake gamena losive makolegó oko vokiko goha gitove loko loaká anitika,

30 gugutó vizeko zohota za ahulokoko lememané.

* **15:21:** Lom 16:13 * **15:24:** Age 22:18 * **15:29:** Age 22:7, 109:25; Mak 14:58; Zon 2:19

31 Liki nilago, guguni gizoaká ve napagi monó mogona apí ikimiaká vegi keza hamolímimi iki amé ziki gopoguka litake kezáitoka láa liki lamó: Vegená lugáa kelémo kugutó vizeaká noimóza, ezáa nene alémo agutó vizemítimó okave.

32 Eza nene Isilae ve lelí gologí olimiaká ve itó lelí agulizaki ve noitimó nene itínasa zohota zalotí apasoko lemekiko, ánígokinake gakola gele alévolé ituninazo. Liki likago, keza luga luga zohota zaló kipiliki apate ve nenetosa áminámini iki kilími vatí asike amé zitigí iki lasimó.

Izesú hilímó

(Mat 27:45-56; Luk 23:44-49; Zon 19:28-30)

33 Holisakatotí mukí mikasiuka límugusi ze asú oake mino-loko novigo únaká ho nene ale zohota imó.

34 * Ho ale zohota noigo, Izesú pigi vizeko ezáa gakokutí nene Eloí, Eloí, lama sapakatani loko limó nene lelí gakokutí nene Ómasinemaka, Ómasinemaka, geza nanamú viselenimikane.

35 Loko lokago, amatoka mina vegena lugáate nene gakó giliake láa liki lamó: Gililo. Ómasímini agepagutí gakó loaká ve Ilaizani sele nolive.

36 * Liki liake ve makolímoo ololu loko vike notunigita netá legeake akepa lolovaló hizeake ekesá vain nagamikú lupizeake ale oteko Izesú native loko amimó. Namiike láa loko limó: Anigatune. Ilaizá oko apasotatihe loko gizapa onoitune.

37 Loko lokago, Izesú gakó napagutí like, ahuu lo nahulake hilímó.

38 * Lá okago, monó zugusave napagú Ómasímini avogisaló itiaká nia gatetó zi lí ika lavolavo nene velekutí zeko hoú loloko limike ale luga luga imó nene lelí gahe ale koló imó.

39 Izesú nene ahuu lo nahulake helekago, ami vetini gizapa vémo Izesuni agómulaló noikeye imane ve nenémo lamaná Ómasímini gipala minamó neve, loko limó.

40 Itó vená lugáate hotó otigí iki otí minake ánigi minamó. Keikuka nene Magatala numutotí vená Maliá minamó, itó Maliá makó eza Zemusí komáa itó Zosé kei izóipo itó Salomé nene makó minamó.

41 * Keza amunaló Izesú nene Galilaia mikasiuka noigo ámegetiki nivake izamuha hiziki minamó neve. Kezagi itó Izesugegi Zelusalega itina vená lugáa mukímagi nenenló minamó.

Izesuni gale zitamó

(Mat 27:57-61; Luk 23:50-55; Zon 19:38-42)

42 Únaká huluvaló nene holisi gamenamámini netá ali vavá iaká a gamena alitokago, holisi gamenama alitokago, gamena hamó ha nego,

43 Alimataia numutotí ve Zosehé eza monó kansole vete agika itiake a vémo áisi Ómasímo gizapa ve napa ale utó oketati gamenamú gizapa oko mina vémo ahelele vizimó ze hitoake Izesuni gonosiváa alinogo Pílatoni nene loká omikago,

44 Izesú mota hilihe loko agata losi geleake, ami vetini gizapa vema sele loake, mota hilihe loko loká otamó.

45 Loká omikago, ami vetini gizapa vemámini gakó geleake, gonosiváamú nene Zosehé hanuva aleko vitive loko gele amimó.

* 15:34: Age 22:1

* 15:36: Age 69:21

* 15:38: Gá 26:31-33

* 15:41: Luk 8:2-3

46 Gele amekago, Zosehé nene gonosiváa asapú otatikumú lavolavo gó mokoná lamaná meina hizeake gonosiváa nene zalotí apasoko ale mikasiló oake, gó mokoná lamanámagú asapú omiake aleko vike meikú geha mulí goló vateikamó nenegú molomiake, gehani napa makó ahelú oko geha mulilímini agepaló ze li imó.

47 Nenegú nomolago, Maliá eza Magatala numutotí vená itó Maliá makó Zoseni izolaho nene áminaló ániyi minasimó.

16

Izesú heleneikutí otímó

(Mat 28:1-8; Luk 24:1-12; Zon 20:1-10)

1 Ho lemekago, holisi mota asú okave liki liake, Magatala numutotí vená Maliá, itó Maliá makó Zemusini izolaho, itó Salomé keza Izesuni gonosiváaló anuva lamanaki uveli holotatune liki anuva uveli meina hizemó.

2 Hiziki aliake, holisi napa Sategú nene gó lomolomo gonosi apakú viki nanitego, ho itimó.

3 Lá okago, vake gonosi apató ali alitiake kezáiini ligili hagili aka geha mulí agepalotí gehani napama nene éaho ale ámegeletative.

4 Liki ligili hagili iake ánígamó nene, ámina gehani napa mota ahelú o ámegekago gale koló onoigo ánígamó. Ánígiake,

5 geha mulikú itiake ánígamó nene, gosohá ve makó nene luhoaká gó mokoná háná luhoake zamagaloka noigo, ánígiake ininá goha amó.

6 Ininá niago, eza láa loko lo kimimó: Lekeza ininá amilo. Lekeza nene Nasalete ve Izesuni zohota zaló apiliki apate vema áníganigi niahe. Imanegú noamive. Mota otekave. Gonosiváa milita apáma ánígaló.

7 * Itó ánígiiki viki Pitage itó izegipala zuha lugáamagi láa liki li kimilo: Amunaló lo likimimómámini oko goí o lekemeko Galilaia mikasiuka mota vokanazo, lekeza neneloka aí áñiganigave liki li kimilo.

8 Loko lokago, luvolovo nizeke ininá anazo, hetoka limiake geha mulikutí golisi vamó. Ololu liki vake kehelele vizekago, vegená makó avetó iki li kememamó.

Izesú Magatala apatotí Maliatoka utó o amimó

(Zon 20:11-18)

[**9**] Izesú nene lelí holisi Sategú nene neteká holugú galegutí oteake, Magatala numutotí vená Maliá eza holosi golesa 7-a agikagutí kepeleko kimisele ámegeta vená nene ganá utó o amimó.

10 Lá okago, eza vike agivelagini nene miluma maluma nigeleke ive nama iki niago avetó oko lo kimimó.

11 Heleneikutí oteake hanuva noigo ánígokuve loko lo kemekago, giliaké gili zagemamó.

Izesú izegipala losiloka utó o kimimó

(Luk 24:13-35)

12 Nenelotí keikutí ve lositá nene gihisigú nivasigo, Izesú nene ametameni haitolímíni ale luhoake utó o kimimó.

13 Lá okago, keza atiginá iki taoniloka vasike vegená lugáa avetó iki li kemesimóza, gakó lasimó nene gili zagemamó.

* **16:7:** Mat 26:32; Mak 14:28

*Izesú aposolo 11 monó hozaló kimisilimó
(Mat 28:16-20; Luk 24:36-49; Zon 20:19-23)*

¹⁴ Aliko Izesú nene izegipala 11 kezáikó alegesá iki nosánetá niki niago, utó o kemeake eza galegutí oteake noigo aí áníga vegenalitini gakó gili zagemamó nenazo, gili alévolé amakumú itó kigika hize lí ikumú nene gahá kimimó.

^{15 *} Lá ike láa loko lo kimimó: Lekelisi nene numutó namató ho noititoka nolimitoka viki vegená mukító niámó nene není gakó lamaná li kimilo.

¹⁶ Lá ikiko gili alévolé iiki monó nagamí hilinita vegená nene okulumalímini mututoni itamóza, gili alévolé amita vegená nene meinímini mututoni inigave.

¹⁷ Itó imane anosa nene gili alévolé iki minata vegenatoka utó oketanogo ive. Není nugulizá iki holosi golesa nene kipilikí kimisilingave. Haitó konokutí galinali linigave.

¹⁸ Gosihá nene gopa ali otiki minatamó itó gipe nagamí gopa natamó nene nenémo kelémo golesa aminogo ive. Kivisiti vegená nene kigizanitunú nónohá zikitatamó nene zokanigave, loko limó.

*Izesú okulumakú itímó
(Luk 24:50-53; Apo 1:9-11)*

¹⁹ Láa loko Guivahani Izesú lo kemekago, Ómasímo alémoko okulumakú itekago, eza Ómasímini agizani lamagaloka minamó.

²⁰ Lá noigo, keza izegipala zuha nenete numutó namató viake gakola li utó iki li nikemego, Guivahani nenémo kelémo vatí ike ámina anosa utó o kimitunú nene keí gakó hize lé oketamó.]

* **16:15:** Apo 1:8

Izesu Kilistoni Gakó Lamaná Luká Luhuva Gizamó

Luká eza imane luhuva Teopiloni gizo amimó

1 Ve mukilite holutegú utó i netá nenémini gakoláa ali amegesaló miliki luhuva gizinamó.

2 Keza nene monó liaká vete mogonalotí Izesuni netá mukí ánigi hee liake li utó iki li leme gakó luhuva gizinamó nenazo,

3 neza ámina oko ámina gakó lamaná nene legesó oko ale lamaná oko gele hee lokuke nene, Teopilo gugulizaki venemaka, geí nene ale etó etó oko luhuva imane gizo nogumumó nene

4 géisi nene gatoko avetó gakó li gememó nene gihila lamaná neve loko gilitane loko nogizuve.

Monó nagamí holokimiaká ve Zoní utó itikumú epoapoga limó

5* Zutaia mikasigú nene agulizaki ve napa Heloté gizapa oko mina zupa nene Ómasi guguni gizo ameaká ve makó minamó agulizá Zakaliá, Apiani mulusigutí. Eza Alonani agapilamokutí vená makó alimó agulizá Elisapeté.

6 Keza Ómasímini avogisaló kigika lamanaki minasike gapo lota gakó Ómasímo lo hukoko li gakó lihimáini nomimó minasike gili alikigó minasimó.

7 Elisapeté nene gohuna vená minokago, keza izegipáiini nomimó minasike ozaha gelehosí milasimó.

8 Zakaliani mulusi keza monó numuni napagú Ómasi guguni gizi amita gamena alitokago,

9 guguni giziaká vete aliaká amó nenéminiki hozanini ali etó etó iki alimi nivake, Zakaliani nene Ómasi guguni gizo ameozi liki alími etó ikago, monó zagusave agikagú itike anuva lamanaki netá nene Ómasi guguni gizo namigo,

10 vegená mukilite geisa agikagú minake Guivahaniloka liki minamó.

11 Nilago Guivahanímini ageló makolímo utó o amike guguni gizoaká ita lamagaloka ote minamó.

12 Oteneigo, Zakaliá ánigoake ininá ike alegesá ligímó.

13 Alegesá legekago, ageló nenémo láa loko lo amimó: Zakaliazo, geza gelegesá legemino. Guivahanímo numuna nolanimó nene mota geleneize, venaka Elisapeté nene izegipa agatupagi minoko gipa getatimó nene agulizá Zoní ave loko molozo.

14 Geza mulukagú lamaná geleko gogoliza vizinogo ane. Itó vegená mukilite gipaka utó itikumú nene laga kivisinogo ive.

15* Eza nene Guivahanímini avogisaló nene ve napa loló oko minative. Eza vain nagamí ahe itó negi nagamí ahe nonamoko moseko nominiko, izolahini agatupagú noikutí Sikalahulímo aí agikagú mino vái itive.

16 Lá okiko Isilae vegená mukí nene gapo golesagutí kelémo atiginá okiko, Guivahani Ómasímini kovogisa i aminigave.

17* Eza Ómasímini agepagutí gakó loaká ve Ilaizá oaká imó nenéminoko amuza moloko Guivahanímini gapo veletoko aí gakó lo utó utó oko minanogo

ive. Lá oko minoko olotiva vegenalitini itó izegipa komatini kigika ale apizeketative. Lá okiko gakó gili ahuliaká vegená nenete kigika lamanaki vete nigele monó nene kagata gámémé iki gilinigave. Itó eza ámina hoza alekiko, vegená mukí keza Guivahanimú ageva iki minanigave.

¹⁸ Ageló nenémo láa loko lokago, Zakaliá eza anotó aleko láa loko lo amimó: Venánegi leza ozaha gelehosima nousinazo, nenemú geí gakó gulugo gihiláa loló amive.

¹⁹* Loko lokago, agelómámo láa loko lo amimó: Gelenape. Neza nugulizáne Gapelienama noluve. Neza Ómasímini avogisaló minoko aleko oaká noumóma neve. Áisi nimiselekago lumuke gakó lamaná imane lo nogumuve.

²⁰ Nenemú gelezo. Gakó lo nogumumó nene gele alévolé amanimómámini lihima nene gakó lamoko negi hizeko minoloko novako, minoko gakó lo nogumumó nene gihila ziti gamena nene gakó goha linogo ane. Neza nolu gakó nene hetagá aminogo ive.

²¹ Loko lokago, Zakaliá eza monó numuni napagú gamena háná minokago, vegená keza ageva iki minake minake gopa kagata gelemó.

²² Lá iki niago, Zakaliá alika limike gakó lo kiminogo gopa imó. Gakola gopa okago, keza nene monó zagusaveú netá haitolímíni makó ánigonitive. Liki nigelego, eza negi hizeake gakó nana oko lo kimitohe loko agizanitunú avevezaha o kimike gakó lo kememimó.

²³ Lá oko noigo, hoza aliti gamena asú okago Zakaliá nene numunaloka atiginá oko vimó.

²⁴ Aliká venala Elisapeté nene izegipa agatupagi minamó. Lá oake ikani 5 oko novigo halá geko minake,

²⁵ Guivahanímo gamena molamó nene alitokago Guivahanímo hize lé onimiaké gohuna vená minukumule loko novoza hulu netá monéna ale ahulonimikave, loko limó.

Izesú utó itikumú epoapoga limó

²⁶ Lá okago, izegipalagi minatotí ikani 5-a ale ahulokago, Ómasímo ageló Gapelienima goha amiselekago Galilaia mikasiuka Nasalete numutoka vimó.

²⁷* Neneloka izaina vená makó minamó, agulizá Maliá. Eza nene agulizaki ve napa Tevitini agapilamó zuhagutí ve makó minamó agulizá Zosehé aí ánigi milimikago minamó.

²⁸ Noigo ageló nenémo Maliá noitoka utó oake láa loko lo amimó: Guivahanímo hize lé ogetago noanitika nenoape. Guivahanímo geitoka noive.

²⁹ Loko agelómámo lokago, Maliá giligo gena okago, agikatunú nene gakó limómámini mogona nana oko netive.

³⁰ Loko nogiligo, agelómámo láa loko lo amimó: Maliazo geza gehelele vizemino. Ómasímo geí ánigokago lamaná okave.

³¹* Gelenape. Geza izegipakagi minoko gipa getatanimó nene agulizá Izesú ave loko molozo.

³²* Eza nene sipisi ve loló oko noiko Ómasímini gipalave liki linigave. Itó Guivahani Ómasímo nene avolaho Tevitini akilí ale hitomikiko minanogo ive.

* **1:19:** Tan 8:16, 9:21 * **1:27:** Mat 1:18 * **1:31:** Mat 1:21 * **1:32:** 2 Sam 7:12-16; Isa 9:7

33 Itó mino lúaló moloko Zakoponi agapilamó zuhaloka gizapa oko minanogo ive. Guivahani loló oko minatimó nene asú amoko gamena háná háná mino-loko voko minanogo ive.

34 Loko agelómámo lokago, Maliá láa loko lo amimó: Neza vánegi apizeko minamusive. Nenemú nolani gakó nene nana oko alévolé itive.

35 Loko lokago, ageló nenémo láa loko lo amimó: Ómasímini Sikalahulímo geí gumupiló liminogo ive, itó Guivahanímini zámuzámo hize lé ogetanogo ive. Nenemú gipa getatanimó nene etó keké vizeko noi gipa Ómasímini gipalave liki linigave.

36 Itó makó lo gimitoze, gelezo. Geí zuhagutí Elisapetéma nene gele-hosimámo izegipa agatupagi noigo ikani 6 mota vokave. Eza nene gohuna venámove liki nilago izegipalagi minokave.

37* Ómasímo loló amiti netala ma nomive. Loló iti netakó nenazo, nenemú Ómasímo Elisapetenimú li gakó mota gihila zekave.

38 Loko lokago, Maliá nene neza Guivahanímini gelekelé mohó nounazo, nolani gakó nene ámináminoko utó ino. Loko lokago, ageló nenémo ahulomí-ake vimó.

Maliá Elisapeté noitoka vimó

39 Maliá nene mino háná amike Zutaia mikasiuka agokaloka numuni makó minatoka iteko vimó.

40 Iteko vike Zakaliani numukú itike Elisapetení geké lotamó.

41 Geké lomikago, Elisapetení mulunagutí izegipalama ziginí igo gilímó. Gelekago, Ómasímini Sikalahulímo nene Elisapetení agikagú lemeko vaí ok-agó,

42 gakó napa like láa loko lo amimó: Ómasímo eza vená mukikutí gelémo etó ike nónohá zegimikave, itó izegipa getatanimó nenegi lusa gemikave.

43 Geza není Guivahanímini izolagama noane. Vená ánáema nounazo, nanamú nenitoka okane.

44 Gelezo. Geké nolonetako, izegipa nenémo mulúnegutí agoliza novizike ziginí okago gelekuve.

45 Itó geza nene Guivahanímo lo gimi gakó vo alitive loko gele alévolé okako, Ómasímo lusa gegimikave. Nenemú gulugo lamaná okave.

Maliá agoliza vizike Ómasí agepoka limó

46 Loko lokago, Maliá láa loko limó:

Neza nigikatunú Guivahani agepoka noluve,

47* itó sikalahúnétunú Ómasí nugutó vizeaká vemú nogoliza vizuke agepoka noluve.

48-49 Itó gelekelé mohola neza minomo lemeko minumó itínasa nelémoko noitive.

Ómasí alévolé ve nenémo nenitoka netá gihila ale utó okamó nenazo, nenemú omolelé amalelé iki mini-likí itita vegenalite

nenikumú giliiki Ómasímo lusa geta venale liki linigave.

Aí agulizá etó oko neve.

50 Aí gili amita vegená nasahilí okimiaká noive.

Omolelé amalelé iki minimi ite vegená lá okimiaká noive.

51 Kezáini kugupemú gelego iteaká noi vegená nene

ezáa alévolé zámuza ale utó ike kelémo ahuloaká noive.

⁵² Itó kugulizaki ve kehelú okago

keí gonanalivagi holomalotí velehé limiaká niave.

Itó vegená limiakí minamolátini kugulizáini ale napa oaká noive.

⁵³ Gohogó vegená itó gaúna hiliki nimina vegená nene

netá gihila kemekago, kagatupa igo miniaká niave.

Itó henóinigi vegená ahulokimikago

muhelé iki miniaká niave.

⁵⁴ Ómasi eza gelekelé otoko minuni vegená nene hize lé olimikave.

Eza agika lamanakímove loko Isilae vegená leza lá olimikave.

⁵⁵* Avotegini láa loko lo moloketamó nene

Avalahani itó agapilamó zuhagi lo mololetamómámini gihila utó oloko
voko minanogo ive.

⁵⁶ Loko Maliá loake, Elisapeteki minasike ikani losive makole ale ahu-
loake, numunaloka atiginá oko vimó.

Monó nagamí holokimiaká ve Zoní utó imó

⁵⁷ Itó Elisapeté eza izegipa getati gamena alitokago, gipa getamó.

⁵⁸ Getokago, vegenala zuha agivelage keza Guivahanímo muluna ze hoú
lake ale utó i netakumú giliake, ezagi makó mulúikú lamaná gelemó.

⁵⁹* Lá iake, gamena 8 oko vokago, gipa namunimámini agupeló Ómasímíni
anosa militanigi mukí vegená alegesá ake amelaho Zakaliani agulizató
milanigi lamó.

⁶⁰ Liki likago, izolaho géneka like Óe, agulizá Zoní ave loko molatune.

⁶¹ Loko lokago, keza láa liki li amemó: Íi, geí zuhatini kugulizá makó
nenéminoko nomive.

⁶² Liki géneka hánaka nilake, Zakaliá nene gipalámini agulizá nanave loko
molative liki kigizanitunú avevezaha ikago,

⁶³ eza pepamú agizanitunú avevezaha okago, pepa alimi amikago, agulizá
Zoní ave loko luhuva gizamó. Gizokago, giliake sigaga lamó.

⁶⁴ Lá ikago, Zakaliani genezala litá oko lamaná okago, Ómasi agepoka limó.

⁶⁵ Lá okago, agive lugáa keza giliake kelegesá ligimó. Lá okago, Zutaia
mikasigú zopegaloka numutó namató nene ámina gakó avetó iki ligili hagili
ikago,

⁶⁶ vegená mukilite gakóini giliake ali kigikagú milake gipama nene napa
okoko nana itive. Liki lamó nene, Guivahanímini zámuza nene ámina gipaloka
nego giliake lamó neve.

Zakaliá epoapoga li gakó

⁶⁷ Itó amelaho Zakaliani nene Ómasímíni Sikalahulímo agikagú minake
alémo vávani igo alika utó iti netakumú epoapoga like láa loko limó:

⁶⁸ Isilae ve leza Guivahanite Ómasi agepoka litune.

Eza nene vegenala zuha lelí lelémo vatí ike

netá golesagutí gologí olimikave.

⁶⁹ Lugutó viziti lapusa ale oteko hizekave.

Gelekelé izegipala Tevitini agapilamó zuha lelitoka neve.

⁷⁰ Ómasímíni agepagutí gakó liaká ve kelémo vávani okago
epoapoga gozapá láa liki liaká amóma neve:

* 1:55: Apí 18:14 * 1:59: Liv 12:3

71 Lova vetini kigizakutí gologí oletanogo ive.

Mukahá lipiliaká nia vegutí akagá oletanogo ive.

72 Avotegini nigika hize kimitove loko lo moloketamole.

Lo munaheake lo hukoko li gakó gele minake lá oketamole.

73 Itó avoteho Avalahani láa loko alévolé oko lo molotamole:

74 Gala vetini kigizakutí gologí oletanogo ive.

Lá okiko lelegesá legemiko gelekelé otoko minanogo une.

75 Nenémú ligika avasavagi miniko gakote minamiko
gelekelé otoko minoko hililune, liki lamó neve.

76* Itó gipa geza Guivahanímini monó gakoláa lole ale oko aí gapo veletatan-
ínazo,

geikumú nene vozaú vémini agepagutí gakó loaká veve liki linigave.

77 Ómasimo vegenala zuha kugutó viziti gakó lo kemekako,
keza gili zagikiko, lihimáimi ahuloketanogo ive.

78 Lelí Ómasile eza milumate geleká noimó nenazo,
eza litító nene velé okulumakutí okululuva notovoko,

79* límugusigú nouhá vegená hize hanatoletanogo ive.

Itó heleakakú nominuhá vegená hize sata oletanogo ive.

Lá onoiko nonagá lamanalímini gapova utó iko
nenegú vinogo une, loko Zakaliá limó.

80 Itó ámina gipa nene agupegi agikagi napa oko alévolé okago, mikasi
gomopalaló voko noigo, hoza aliti gamena alitokago, Isilae vegenatoka utó
oko minamó.

2

Gipa Izesú utó imó

(Mat 1:18-25)

1 Gamena nene zupa Loma vetini agulizaki ve napa minamó, agulizá Agustó. Eza numutó namató vegená kugulizá alilo loko gakó ahulokago vímó.

2 Nenémini hoza gozapá alemamó. Kilinió nene Silia mikasiuka agulizaki ve loló oko noigo ámina netá apí iki alemó.

3 Lá niago, vegená mukí nene lugulizá alitave liki avóikini gotó apáitoka viká viká niago,

4 Zosehé eza agulizaki ve napa Tevitini agapilamó minamó nenazo, eza ámináminoko Galilaia mikasiuka Nasalete numutoka minatotí ahuloko Zutaiá mikasiuka nene Tevitini gotó apatoka Petelehe numutoka itímó.

5 Noitike ánigi milita vená Maliáma izegipa agatupagi alémago vasimó.

6 Viki minasike izegipala getati gamena alitokago, venoni vegenalitini akiaká numuni gikí okago, olovó zikasike pulumaká izatini numukú itiki minasike,

7 ganá gipala getoake, gotunú asapú omiake pulumaká izatini nosánetá kimiaká lapegú molomikago ako minamó.

Sipsip izáló gizapa vegi ageló vegenaki

8 Lá okago, ámina mikasiuka ve lugáa nene holugúnaka gihisiló minake sipsip izáiniló gizapa iki minamó.

9 Lá niago Guivahanímini ageló makolímo keitoka utó noigo, Guivahanímini lapanalímo hize sata omikago, kehelele vizimó.

10 Lá okago, agelómámo láa loko lo kimimó: Gilinahe. Neza gakó lamaná aleko nolumumó nenazo, lekeza lekehelele vizemino. Nenémini gihiláa nene vegená mukitoka utó o likimiko mulutikú agila guluma inogo ive.

11 Itínasa lukugutó viziti ve Guivahani eza gologí oleketative loko lo mololeketa vema nene Tevitini gotó numutó utó o noíve.

12 Itó anosa makó lo likimitoze, gililo. Izegipa namuni makó nene gotunú asapú iki izatini nosánetá lapegú milimikago akonoize, viki ánígalo.

13 Loko lo kemekago, galinali ageló vegená mulusi napa nene okulumakutí limiki kigivéipo minató alegesá iki minake Ómasi agepoka lake nama láa liki lamó:

14 Logoliza vizeko okulumakú Ómasi agepoka litune.

Mikasiuka Ómasímo ánígo amu hili vegenatoka hulu utó ino.

15 Liki ageló vegenámate liake atiginá iki okulumakú itikago, sipsip izaló gizapa ve keza láa liki ligili hagili amó: Leza Petelehe numutoka vinake Guivahanímo gakó lo limitímini gihila ánígatune.

16 Liki liake litá iki viki Maliako Zoseheko kilími utó iake gipa namunima pulumaká izatini nosánetá lapegú akonoigo ánígamó.

17 Ánígiake, agelómámo izegipamú lo kimi gakó nene avetó iki li kememó.

18 Lá ikago, izaló gizapa vetini kegepagutí gakoláa gele vegená keza sigaga li asú amóza,

19 Maliá nene gakó mukí ale agikagú moloake agata geleva geleva oko minamó.

20 Itó sipsip iza gizapa ve keza atiginá iki vake ageló lo kimitó utó okago áníga netakumú nene Ómasi agepoka liki agulizá ali otiki minamó.

Izesuni agupeló Ómasímini anosa militamó

21* Gipa Izesúma utó okago, gamena 8-ía vokago, gipamámini agupeló nene Ómasímini anosa militake agulizá Izesú ave liki milamó. Ámina agulizá nene Maliá izegipa agatupagi minonamigo ageló nenémo goí oko lo amító nene milamó.

Monó zavusavegú Izesunima Ómasímini gipa minative liki anosa militamó

22* Gipala getakumú agupe ali lamaná itave loko Mosé lo hukoko li netá aliki lilí itái gamena alitokago, Zoseheko Maliako keza gipa Izesuni nene Zelusalega alímiki itesike, Guivahani Ómasímini gipa minative liki anosa militasimó.

23* Lá asimó nene Guivahanímo láa loko lo hutokago mina gakó nene gili alesike lá asimó:

Ganá gipa utó noiko, Guivahanímini gipa minative liki lehizitalo.

24 Itó
Nama luhusihe nama gelehová ahe lositá aliki viki není guguni gizi nimilo loko Guivahanímo lo huta gakó nene gili alesike namagi aliki vasimó.

25 Lá ikasigo, Zelusalega ve makó minamó, agulizá Simeó. Eza nene hee hee loko monolagi ve minake, Isilae vegenáma miluma giliki minakutí gologí oketati vemú ageva oko minoaká imó. Aí agikagú nene Ómasímini Sikalahulímo lemeko vaí oko minake,

26 gakó láa loko lo amimó: Geza helemoko hanuva noako Guivahanímo gologí oleketative loko lo mololeketa vema áníganogo ane.

* 2:21: Luk 1:31 * 2:22: Liv 12:6-8 * 2:23: Gá 13:2, 12

27 Itó Simeó nene Sikalahulímo alémo vávani okago monó zavusavegú itimó. Lá imó nene Maliako Zoseheko keza Ómasímo lo hukoko li gakotó aliki lilí itatave liki gipa Izesunima alímihi itesigo,

28 Simeó nene gipa Izesunima zanava oko geheneike Ómasi agepoka like lá loko limó:

29-30 Guivahanínemaka, imane lugutó viziti vema itínasa nene nogómula gihilatunú ánigokuve. Gakó lo molonetanimó nene gihila mota zekaze, nenémú geí gelekelé ve neza monokú nelémo molako hulu nivisiko hilitove.

31 Geza numutó namató vegenalite ánigatave loko lelémo lamaná iti ve imane alémo utó okane.

32* Nenémo hetoka vegenalitini kigika hize hanatokimikiko monó gilinigave. Itó Isilae vegenalitini lugulizá ale otnogo ive.

33 Loko gipa Izesukumú lokago, izolahiko amelahiko gilikasike sigaga lasimó.

34 Lá ikasigo, Simeó eza lusa getake izolahini Malianima láa loko lo amimó: Gelenape. Imane gipaloka Isilae vegená hizi hou litave loko lonoimóma neve. Ámina gipámini gakotó nene vegená lugáa keza lisiki gululú viziki akatave. Itó lugáa keza lisi gikitiiki otitave. Eza anosavagi noitimó nenazo, ve mukilite alivi letivi itatave.

35 Itó napliko geza gipakamú miluma geleko gigika hizinogo ive. Nene suni utó noiko, vegená mukilitini kigikagu gakóini utó inogo ive.

36 Loko lokago, Ómasímini agepagutí gakó loaká vená makó minamó, agulizá Haná. Áisi Panueleni mohola Aseloni mulusigutí minatímo veló voko minake kilisimasi 7 ale ahulokago, vana helekago,

37 gevóna vená loló oko minomo noitike kilisimasi 84 ale ahulake gelehosi molamó. Áisi nene monó zugusave ahulamike gamena gamena únaká neteká Ómasi geké lotoko minake, nosánetá moseko minake, Ómasiloka loaká imó.

38 Eza nene ámina gamenaló anitike Ómasi agepoka like, Zelusale numutoka Ómasímo gologí oketati gamenamú ageva iki mina vegená nene gipa Izesukumú avetó oko lo kimimó.

Nasaleta numutoka atiginá iki vamó

39* Lá okago, Maliako Zoseheko keza Guivahanímo lo huka gakolímini hozaváa ali asú ikasike, Galilaia mikasiuka keí numutoka Nasalete neneloka atiginá iki vasimó.

40 Neneloka viki niasigo gipa Izesuni nene Ómasímo gizapa otake hize lé omikago, napa ike alévolé oko minake gakó mukí gilimó.

Gipa Izesú monó zugusaveú minamó

41* Avókini asenini zeketakumú gili mina holisi zupa meleketó meleketó nene Maliako Zoseheko keza Zelusalega itiaká asimó.

42 Lá iki niasigo, gipa Izesú nene kilisimasi 12 ale ahulokago ámina holisi makó alitokago goí iki aliaká asimó nenéminkí gipa Izesuni alímihi Zelusalega makó itemó.

43 Itiki niago, holisima asú noigo nene, keza nene gipa Izesuni nene Zelusalega taiza imikasigo, noigo, Maliako Zoseheko taiza itasikumú gelemasike atiginá iki lemesimó.

* **2:32:** Isa 42:6; 49:6; 52:10 * **2:39:** Mat 2:23 * **2:41:** Gá 12:1-27; Gapo 16:1-8

44 Vegená lugáaloka gímizeko vo noitihe liki gilikasike, gapoloka nivasigo límugusi zekago, keí zuhagi itó kigivéike niakú vitagá asimó nene,

45 noamigo, Zelusalega atiginá iki itesimó.

46 Itiki vitagá iva iva iki niasigo, gamena losive makole oko vokago, Izesú nene monó zavusave napagú noike monó gakó lainim-ikimiaká vetini holúikú minake gakóini gilike itó mogonamú loká oketoko noigo ánigasimó.

47 Itó monó ve nenete gipa Izesú gakó gilikumú itó loká atoka ale viligoko lo kimikumú sigaga litamó.

48 Lá oko holúikú noigo alími utó ikasike, ininá goha asike izolahlo láa loko lo amimó: Gipáne geza nanamú taiza oletane. Gelenape. Amekahiki leza geikumú mulute ze hóu loko mohona oko vitagá onousive.

49 Loko lo amekago, Izesú láa loko lo kimimó: Nanamú vitagá asimó neve. Nene aménehini numukú aleko minozo loko loneta hozamagú nouve. Nene gakó gelemasike nilasiche.

50 Loko limóza, keza nenémini mogonáa gili vevesamasimó.

51 Lá ikasigo, izolahiko amelahiko alímiliki vake Nasalete numutoka vasigo eza gelekelé oketoko minamó. Itó izolahlo nene gili gakó mukí ale agikagú moloko minamó.

52 * Noigo, Izesú nene agikagi agupegí napa oko alévolé igo minamó. Lá okago niago, Ómasigi mukí vegenaki Izesukumú keza ánigi kumu hiliki minamó.

3

Zoní monó gakó lo kimimó (Mat 3:1-12; Mak 1:1-8; Zon 1:19-28)

1 Tipelió eza Loma vegenalitini kugulizaki ve napa-napa loló oko noigo, kilisimasi 15 oko vokago, Potiasi Pilató eza Zutaia mikasiuka kiapé napa loló oko noigo, itó agunala Pilipó nene Itulaia itó Talakoniti mikasiuka kiapé loló oko noigo, itó Lisaniá nene Apilene mikasiuka kiapé loló oko noigo,

2 itó guguni giziaká ve napatini gizapa ve losítá Anasiko Kaiapako niasigo, ve nenéminiki gizapa ve lilí iki niago, gamena nene zupa Zakaliani gipala Zoní nene mikasi gomopalaló noigo, Ómasímo hoza gakó lotamó.

3 Lá okago, Zota nagamí vola helega ima helega mohona mohona ike, vegená kigika ali viligiíki monó nagamí hilikiko Ómasímo lihimáini ahuloketative loko lo utó oko lo kemeko minamó.

4 * Lá noigo, Ómasímini agepagutí gakó loaká ve Isaiáma epoapo gakó láa loko gizamó nene Zonitoka alévolé imó:

Mikasi gomopalaló ve makolímo gakó napagutí láa loko nolive: Guivanhanímini gapova likigikagú vilitalo. Áí gapo ali hee litalo.

5 Gímuza lemeneitimó nene apiziki alími lamaná ilo. Agoka iteneitimoláa alími lasava zilo. Zová zeneitimoláa alími pehe lalo. Gapoló mikasi itesú lemesú itimó nene apiziki alími geleni lilí ilo.

6 Lá ikiko, mikasigú vegená mukí keza Ómasímini kugutó vizeaká netá ániganigave.

7 * Lá noigo vegená mukilite Zoní noitoka vake monó nagamikumú likago, eza láa loko lo keme keme oko minoaká imó: Lekeza gosihalímini agapilamó

zuha neneta, golesa mogonatinímini lihimala anitinogo noimó nene lekeza likigika ali viligamiki hanuva golisi itune liki niae.

8* Lekeza likigika ali viligiiki nenémini gihila ali utó ilo. Neza lo likimitoze, gillilo. Avalahani agapilamó zuha keza sonohikitana nene gatamoakalímini lilí itave loko lo molota gakó alévolé itive loko lekelisi negopa, Ómasi nenémo gakó litove loko nene lokiko gehani imanete Avalahani agapilamó zuha lilí inigi nene hanuva lilí itamó nenazo, lekeza lukugupetini aliki itiki Avalahani agapilamó zuhama nouninazo, Ómasi eza lihimatemú goní oletaminogo ive liki lamilo.

9* Luni leko makó nene za mogonagú gamuni oake noimóma neve. Nenemú gihila lamaná ali utó inamitamoláa nene asahizeko lokú gizanogo ive.

10 Loko lo kemekago, mukí alegesá iki mina vegenalite loká itake leza nana itune.

11 Liki likago, láa loko lo kimimó: Ve makó nenémo sioti losi aleminokoma agivelahini sioti nomiti ve nene magáa amino. Itó nosánetaki nene áminámini ilo.

12* Loko lokago, takisi aliaká vete monó nagamí hilanigi aniteke loká itake monó velemaka, leza nana itunimó neve.

13 Liki likago, eza láa loko lo kimimó: Takisi moni gamanímo alilo loko molató nene aviligiki alimi itiki alemilo.

14 Loko lokago, pilisí ve nene ake loká itake leza nene nana itunimó neve liki likago, eza láa loko lo kimimó: Lekeza vegenalite moni limitave liki kipilikí kilími golesa amiki hakupá gakó likitamilo. Itó ikató hozalotí moni aliaká niamó nenemú goselé lekepelemino, loko limó.

15 Vegená mukí keza Ómasímo gologí oketative loko lo moloketa ve atikumú gituhú niki ageva iki minake, Zonikumú nene ámina vema noihe liki kagata losi gelemó.

16 Lá ikago, Zoní nene vegená mukí láa loko lo kimimó: Neza nene nagamikó hololikiaká nouve. Není nemegesaloka noa vémini zámuza nenémo není zámuza nivilegekave. Neza ánéama nounazo, aí gasa gó ate akisitomó nene etaminogo ive. Áisi nene Ómasímini Sikalahuki likigikámini pipizá netá loko loafá loki hololeketanogo ive.

17 Eza nene lolopa giteaká netaki aleko oko laisi nene gesopá zeko lolopa giteko ale lamaná inogo ive. Nosánetá lamaná nene gizaká oko ale numunagú molokiko minanogo ive. Lolopaváa nene giteko lokú gizokiko lova lova oko minanogo ive, loko limó.

18 Zoní eza lá oko vegená kagata alike ámina gakoki gakó lugáagi lo kimike Ómasímini gakó lamaná lo kemeko minamó.

19* Lá imóza, agulizaki ve Heloté nene uvolahini venala Helotiasini ipá oko aleake netá golesa lugáa alekago, Zoní nenemú gahá amekago, Heloté nenemú gele golesa oake,

20 miní amike netá golesa goha alike Zonini nene nagá numukú ahulotamó.

Izesú monó nagamí holamó (Mat 3:13-17; Mak 1:9-11)

21 Zonini nene nagá numukú velesá ahulotamigo vegená mukí monó nagamí holokimikago, Izesú ámináminoko Zonitoka voko monó nagamí holamó. Holoake, Ómasiloka noligo, okulumá koló okago,

22 * Ómasímini Sikalahú nene nama luhusi agupegi loló oake Izesuni amupiló lemeko minamó. Noigo, okulumakutí gákó makó láa loko utó imó: Gipáne gihila noane. Geí ánigo lamaná okuve, loko limó.

Izesuni avolage

(Mat 1:1-17)

23 Izesú nene kilisimasiva 30 nenéminoko oko novigo monó hoza apí oko alimó. Naligo, vegená nenete Zoseheni gipala nehe liki gelemó. Zosehé nene Helini gipala,

24 eza nene Matatani gipala, eza nene Livaini gipala, eza nene Melikini gipala, eza nene Zanaini gipala, eza nene Zoseheni gipala,

25 eza nene Matatiani gipala, eza nene Amosini gipala, eza nene Nahumini gipala, eza nene Eselini gipala, eza nene Nagaini gipala,

26 eza nene Malatani gipala, eza nene Matatiani gipala, eza nene Semeinini gipala, eza nene Zosekeni gipala, eza nene Zotani gipala,

27 eza nene Zoanani gipala, eza nene Lesani gipala, eza nene Zelupapeleni gipala, eza nene Sealitieleni gipala, eza nene Nelini gipala,

28 eza nene Melikini gipala, eza nene Atini gipala, eza nene Kosamini gipala, eza nene Alimatamani gipala, eza nene Eleni gipala,

29 eza nene Zosuani gipala, eza nene Eliezeleni gipala, eza nene Zolimini gipala, eza nene Matatani gipala, eza nene Livaini gipala,

30 eza nene Simeoni gipala, eza nene Zutani gipala, eza nene Zoseheni gipala, eza nene Zonamani gipala, eza nene Eliakímini gipala,

31 eza nene Meleani gipala, eza nene Menani gipala, eza nene Matatani gipala, eza nene Natananí gipala, eza nene agulizaki ve napa Tevitini gipala,

32 eza nene Zesini gipala, eza nene Opetení gipala, eza nene Poasini gipala, eza nene Salani gipala, eza nene Nasoñani gipala,

33 eza nene Aminatapani gipala, eza nene Ataminoni gipala, eza nene Alanini gipala, eza nene Hezelonani gipala, eza nene Pelezeni gipala, eza nene Zutani gipala,

34 eza nene Zakoponi gipala, eza nene Isakani gipala, eza nene Avalahani gipala, eza nene Telani gipala, eza nene Naholeni gipala,

35 eza nene Seluguni gipala, eza nene Lagauni gipala, eza nene Pelegeni gipala, eza nene Epeleni gipala, eza nene Selani gipala,

36 eza nene Kenani gipala, eza nene Alapasatani gipala, eza nene Semeni gipala, eza nene Noani gipala, eza nene Lamekeni gipala,

37 eza nene Metusalani gipala, eza nene Enokuni gipala, eza nene Zaleteni gipala, eza nene Mahalalení gipala, eza nene Kenani gipala,

38 eza nene Enosini gipala, eza nene Seteni gipala, eza nene Atani gipala, Atá nene Ómasilokatí.

4

Satá Izesuni gimivagú molamó

(Mat 4:1-11; Mak 1:12-13)

1 Izesú nene Ómasímini Sikalahulímo agikagú leme vaí oake alémo zaú okago, Zota nagamí ahuloake mikasi gomopalaló vimó.

* **3:22:** Age 2:7; Mat 17:5; Luk 9:35

2 Neneloka gamena ve lositosini kigisa kigizani asú igo akoko noike, nosánetá namike alika gaúna heleko minamó. Lá noigo, Satá nene oko giminagú molake

3 láa loko lo amimó: Geza Ómasímini gipala noitanimó nene, geza lokako gehani imanémo nosánetá loló okiko noko minamane.

4* Loko lokago, Izesú láa loko lo amimó: Óe, monó gotolaú luhuva láa liki gizinamóma neve:

Vegená neneta nosánetakó nokoko lamaná oko minoakaláa nene nomive.

5 Loko lokago, Satá agoka hána makokú alémoko itike numutó namató kugulizaki ve mukilitini apáini litá oko alapize asú oake,

6 láa loko lo amimó: Amuza miliki niago kugulizá novi netaki mikasigú netá lamanaláa nenegi imane geikó gême asú itove. Ámina netá nene není nigizakú molo asú onoinazo, makope makope amitove loko hanuva amitomóma neve.

7 Nenemú geza není nigisauka gupá zeko negepoka lokako geikó loló o asú itive.

8* Loko lokago, Izesú láa loko lo amimó: Óe, gakó makó monó gotolaú láa liki gizinamóma neve:

Guivahani Ómasigó lalapusa hizeko gupá ze ameko agepoka loakaláa neve, itó aikó gelekelé omiakaláa neve.

9 Loko lokago Satá nene Izesuni alémoko Zelusalega vike monó zavusave napámini agoka hánaló alémoko itike láa loko lo amimó: Geza Ómasímini gipala noitanimó nene, imanelotí olío ká omanegú molozo.

10* Gakó makó monó gotolaú láa liki luhuva gizinamóma neve:

Geikumú Ómasímo aí ageló nene hoza gakó lo kemekiko gizapa iki gilími vatí inigave.

11* Itó makó láa loko neve:

Gehanímo gigisagú hizekative liki keza limiki kigizani lukilagú gilími milanigave.

Liki luhuva gizinamóma nenazo, golesa aminogo ane. Loko lokago, Izesú láa loko lo amimó:

12* Óe, monokú gakó makó láa loko neve:

Guivahani Ómasi nene gopa netakumú giminagú molamitane.

13 Loko lokago Satá nene lá oká lá oká ike agoka vize asú oake, ahuloko gamena makó zupave loake ahulomiake vimó.

*Izesú Galilaia mikasiuka monó hoza apí oko alímó
(Mat 4:12-17; Mak 1:14-15)*

14 Izesú nene Sikalahulímo hize lé otake zámuza amekago, Galilaia mikasiuka atiginá oko vimó. Atiginá oko okago, aí gakoláa helega helega vo asú igo gelemó.

15 Neneloka monó numuni minakú minakú nene iteko lemeko oko monó lo kemekago, vegená mukilate laga kivisekago geké litamó.

*Nasalete numutoka Izesuni ánigi ahulamó
(Mat 13:53-58; Mak 6:1-6)*

16 Lá ikago, Izesú ezáa napa i apá Nasalete numutoka nene áminámini oko vo anitike, holisi alitokago, monó numukú itimó. Eza holisi mina zupa zupa ámináminoko iteaká imó. Iteko monó gatoko lo kiminogo noitigo,

17 Ómasímini agepagutí gakó loaká ve Isaiá giza pepama amikago, ataloko ánígoake gakó makó láa loko minamó nene ale utó ike gato kimimó:

18 * Guivahanímini Sikalahulímo nenitoka holonetake, hoza gakó láa loko lonetamóma neve. Minimi limiki nia vegená nene gakó lamanáma lo kemezo. Kalapusi numukú nia vegená gologí oleketatove loko, itó kogómula lika vegená nene ale goloutoleketatove loko, itó muhelé ahelé iki minata vegená nene gologí oleketoko lekelémo molatove loko lo kemezo.

19 Guivahanímo lekelémo lamaná iti gamena alitokave loko lo kemezo.

20 Loko Izesú nene gatoko lo kemeake, pepama gakeko gelekelé vema goha ameake mitó minamó. Noigo, monó numukú mina vegená keza mukitoka aí gonú apiliki niago,

21 gakó láa loko lo kimimó: Monó gotola gakó gatokugo gelemómámini gihila itínasa nenitoka utó okave.

22 Loko lokago, keza giní i amiake, aí agepagutí gakó gilikago laga kivisimó. Lá okago, keza sigaga lake lamó: Eza nene hanuva ánígonouhá ve Zoseheni gipala nenazo, nenémimi gakó nana oake nolive.

23 Liki likago, eza láa loko lo kimimó: Anoza gakó makó láa liki liaká niave: Lusa ve gezaka haitó vegená kelémo vatí ani netá aleko gezaka vegenaka zuha kelémo lamaná amane. Neza nagata gulomó lekeza ámina anoza gakó vasá zeke li nimiiki, Kapanao numutoka hoza aleko gakolá gu-lunímómáminoko imane gotó numukaloka alekako ánígatuse liki li nimitaze.

24 * Loko loake, miní ameko láa loko limó: Neza lamaná lo likimitoze, gilio. Ómasímini agepagutí gakó loaká vémo ezáa gotó apalaloka voko monó lo kemekago eza lelí gipate noive liki gakola gilisá amave.

25 * Nene sunimú gakó lamaná lo likimitove. Ilazá eza monó hoza ali gamena nene okulumá gapo lí okago minake melekeni losive makolegi ikani 6-íá oko novigo golini zemimó. Golini zemigo gaúna gamena napa nene mukí apatoka utó imó. Ámina gamenaló nene Isilae mikasiuka gevóná vená mukí minamóza,

26 * Ómasímo Ilazani nene ámina vená keitoka kelémo vatí itive loko amiselemive. Sitona mikasiuka Salepata apatoka Zuta vená negopa hetoka gevóná vená makó noitoka alémo vatí itive loko amisilimó.

27 * Itó Ómasímini agepagutí gakó loaká ve Elisá hoza ali gamena nene Isilae mikasiuka halamé gizale ve mukí minamóza, Elisá keikutí kelémo zokamike Silia mikasiuka hetoka ve makó Nemanigó alémo zokamó.

28 Loko lo kemekago, ámina gakó giliake, Ómasímo lezagi ahuloletati gakó lokave liki giliake monó numukú mina vegená keza mulúikú golesa giliake, kizapaló goha molokago,

29 zaú iki otiake númaseloka Izesuni alímiki vake ámina apá mina agoka lusenaló agataloka ahelú i ahulanigi alímiki iteha,

30 áisi nene ahulokimiaké holúkitú hanuva vimó.

* **4:18:** Isa 61:1-2 * **4:24:** Zon 4:44 * **4:25:** 1 Kug 17:1 * **4:26:** 1 Kug 17:8-16 * **4:27:** 2 Kug 5:1-14

*Holosi golesa agikagú mina ve
(Mak 1:21-28)*

31 Lá oake Izesú nene Galilaia mikasiuka lemeake, Kapanao numutoka anitike holisigú holisigú nene monó lo kemeko minamó.

32* Lá noigo, monó gakola gale geheko lo kemeaká imó nenazo, nenemú keza ininá iki sigaga litamó.

33 Lá niago, keí monó numukú nene ve makó minamó nene holosi makolímo agikagú minake alémo gopa okago minamó nenémo gamoga geko láo loko limó:

34 Eé, Nasalete ve Izesuvo, nana netá golesa aleletanogo noane. Lelémo golesa inogo noape. Geí nene ánigo hehe noluve. Geza Ómasilokatí etó keké vizeko noani vema noane.

35 Loko lokago, Izesú gahá amike gegepa apizeoko legesó oko agikagutí lemeko vamane. Loko lokago, holosi nenémo vegená holuíkú ámina vema nene ahelú okago puu loko akamóza, alémo golesa amike ahulomiake vimó.

36 Lá okago keza vegená mukitoka ininá ake ligili hagili ake lá liki lamó: Nana ive. Monola nene haitolímimi neve. Áisi gakola gale geheko aí amuzatunú lokimiaká noigo holosi golesate ahulikimiaká niave.

37 Liki likago, Izesunimú gakó nene ámina apá helega helega puu loko vo asú imó.

*Izesú Pitani venalámini izolahini alémo zokamó
(Mat 8:14-15; Mak 1:29-31)*

38 Lá okago, Izesú nene monó numukutíma lemeake Saimoni numukú itimó. Neneló Saimoni venalámini izolahini agupegú ló napa lo minokago, alémo zokative liki li amemó.

39 Li amikago, áisi voko alító oteneike agupegú ló la netáma nene gahá amekago agupegú ló la netáma asú otamó. Asú omikago, ámina venalímo litá oteake Izesugini nasahilí oketamó.

*Izesú únaká vegená mukí kelémo zokamó
(Mat 8:16-17; Mak 1:32-34)*

40 Únaká ho nolimigo, haitopaitó netá kivisi vegená kilímiki Izesú noitoka ikago, agizanitunú kugupeló ale geleko kelémo zokamó.

41 Itó vegenalitini kigikagú holosi golesa minamó nene kepeleko nokimisiligo, gopaga lake geza Ómasímini gipala noane. Liake ahulikimiaké vamó. Nivago, keza Izesukumú Ómasímo gologí oletative loko lo mololeta vema noive liki gelemó nenazo, Izesú nene gahá nokimike aí mogona lili ali amitave loko lo hukoketamó.

*Izesú monó lo keme keme oko mohona oko vimó
(Mak 1:35-39)*

42 Neteká ho noitigo, Izesú eza numuni apakutí lemeake voko mikasi amegesa vizitoka minoko numuna linogo voko minamó. Noigo, vegená keza aikumú vitagá iki iki alími utó iake, ahuloketamitive liki lamóza,

43 eza láo loko lo kimike limó: Neza nene apá lugaloka mohona oko Ómasímini gasovaló minoakalímimi gakó lamaná lo keme keme inogo uve. Ámina hoza alitane loko Ómasímo nimiseleneimóma neve.

44 Loko loake, vike Zutaia mikasiuka monó numuni minakú minakú iteko monó lo keme keme oko mohona imó.

* **4:32:** Mat 7:28-29

5

*Izesú litó lagaha mukí alemó
(Mat 4:18-22; Mak 1:16-20)*

¹* Gamena makó zupa Izesú eza Genesalete nonohuló agataloka noigo, vegená keza Ómasímini gakó gilitune liki ali nupa iake aitoka sii sii liki minikago,

² lagaha aliaká ve makó nene nagamikú lapéinigutí limiake, lagaha gotaháinima nagamí nizego, itó sipi losítá nene nagamikú ha nego,

³ Izesú nene ánigoake magáa Saimoni nagamikú lape minakú iteake, nagamí getatokatí hilulú oloko koma vitane loko loká imó. Gele amekago sipigú minake mukí ali nupa a vegenáma monó lo kimimó.

⁴ Lo keme asú oake Saimoni láa loko lo amimó: Hilulú oloko voko nagamí ohunágú molo-minoko nene gigivekagegi lagaha alinigi niaze, gotahalini nene ohunagú ahulalo.

⁵* Loko lokago, Saimon Pitá nene anotó aleko láa loko lo amimó: Gizapa velemaka, leza itína holugúnaka gotaha ova ova oko minuháza, lagaha hamolagi ma alemune. Lá unimóza, geza lanimómove loko nene lagaha gotaha nene goha nagamí ohukú ahulatune.

⁶ Loko lo ameake, aliki viki gotahama ahulake lagaha mukí nalego, lagaha gotaháini nene zeko hukanogo noigo,

⁷ kigive lugáa sipi makokú minamoláama iki kilími vatí itave liki kigizani gumí zi kimiki sele lamó. Lá ikago, keza ake sipi losítámagú lagaha ali nimilago, lagaha vaí oake nagamikú lapema nene nagamikú liminogo imó.

⁸⁻⁹ Lá noigo, Saimon Pitaki makó mina vegenaki keza lagaha mukí alekumú ánigiaké sigaga lamó nenazo, Pitá eza Izesuni agisauka gupá zeko lo amike Guivahanínemaka, neza lihimánegi ve nounazo, ahulonimioko vozo.

¹⁰ Loko noligo Zepetaioni gipala losi Zemusiko Zoniko keza Saimoni agivelahiko nenetosa ámináminiki sigaga lasimó. Sigaga nilasigo, Izesú nene Saimoni láa loko lo amimó: Geza gehelele vizemino. Itína imanémini veletó nene geza monó hoza aleloko novako mukí vegená nene není zuha lilí itave.

¹¹ Loko lokago, nagamikutí lapéinima aliliki getatoka vake nene, mukí netá matáimi ahuliaké Izesuni ámegetiki vamó.

*Izesú lokago halamé gizali ve gililímó
(Mat 8:1-4; Mak 1:40-45)*

¹² Izesú nene apá napa makotoka voko noigo, halamé agupeló vaí oko gizali ve makó noike, Izesuni ánigoake vike agisauka gupá ze ameake negénegeka like láa loko limó: Guivahanínemaka geza nene nelémo gililitove loko nene hanuva nelémo gililitanimó nenazo, nelémo gililitane loko noluve.

¹³ Loko lokago, Izesú nene agizani lutoko agupeló ale nogilike gililitane loko gelekuze, gilelezo. Loko lokago, litá oko gililímó.

¹⁴* Lá okago, ámina gakó nene avetó oko vegená avetó oko lo kememitive loko lo hukomiaké láa loko limó: Aló gilelekane liki gili hee litave loko geza nene voko guguni gizoaká vémitokama gugupe alapizekako ánigative. Itó gilelenikumú nene Mosé loleketa netá aleko Ómasi guguni gizo amitive loko amekako eza vegená mukí lo kemekiko nenémini mogona gili vevesatave.

15 Loko limóza, aí gakoláa nene puu loko vokago, mukí vegentalite gili asú iake Izesuni gakó gilitune liki itó kivisi netakutí kelémo zokative liki Izesú noitoka alegesá iaká amóza,

16 eza mikasi gomopalaló voko minake Ómasiloka linogo voaká imó.

Izesú ve gepili alémo zokamó

(Mat 9:1-18; Mak 2:1-12)

17 Gamena makó zupa Izesú eza monó gakó lainim-oketoko noigo Palisaio monó vegenaiki monó mogona apí ikimiaká vegi keza Galilaiia apatotí itó Zelusalegatí itó Zutaia apá makotokatí nene mukí numutotí iki neneló ali nupa amó. Lá niago Izesú nene kivisi vegena kelémo zokati zámuzagi minató minamó.

18 Lá noigo ukoakoló zaló mililikí a ve gepili makó nene alímiki iake Izesuni agisauka ahulitanigi niago,

19 vegena muki gíki iake gapo hizi lí ikago, alímiki numupító itiake ali koló iake, ukoakogi nagá ziake ahulikago vegentalitini holúikú limike Izesuni avogisaloka lemekago,

20 Izesú nene ánigoake gili alévolé amó nenémini mogonáa ánigoko geleake, ve gepilima láa loko lo amimó: Vémage, lihimaka ahulogimikuve.

21 Loko lokago monó mogona apí-ikimiaká vegi Palisaio monó vegi keza kagata gululusi giliaké kezáitoka láa liki ligili hagili amó: Makó éaho lihima gilatoaká noive. Ómasímo hamokó lá oaká noinazo, ezáa aguhevamú giligo itekago, Ómasi aviliginogo limó nene etamive.

22 Liki kigikatunú nigelego, Izesú nene Zuta vegentalite lihimate ahulolim-iaká itó vegena kelémo zokoaká nene Ómasímogó loló oaká netá neve liki gilinave loko geleake láa loko lo kimimó: Lekeza likigikauka nanamú láa liki nigeleve.

23 Ve makolímo Ómasi noamitimó nene lihimaka gilatogimikuve loko vavani oko lamitimóza, kelémo zokoaká zámuzagi ve noamitimó nene gakó lokiko gihila zemitihe loko ve gepili makó nene oteoko vozo loko litá oko lo ameminogo ive.

24 Lá onoimóza, okulumakutí lumu ve gihila neza mikasigú lihima gilatoaká zámuzagó negopa, lihimatini ale ahulolikimiaká zámuza nenitoka neve. Loko loake nenémini mogonáa gili hee hee litave loko ve gepilima lo amike nene láa loko nologetuve: Otekoko ukoakoka geheko numukaloka vozo.

25 Loko lokago, mukí vegentalitini kogómulaló nene litá oko oteake ukoakova ale geheko numunaloka vike Ómasímini agulizá ale oteko minamó.

26 Lá noigo, vegena mukilite sigaga liake Ómasi agepoka lake mulúini otopá nozigo itínasa haitolímini suni ánigokune, liki lamó.

Izesú Livaini sele lo animó

(Mat 9:9-13; Mak 2:13-17)

27 Aliká Izesú lemeake novike takisi aleáká ve makó agulizá Livaí áisi nene hoza aleáká numunauka noigo ánigoake geza nene némegetoko ano.

28 Loko sele lo amekago Livaí nene netá mukí ahuloake ámegetoko vimó.

29 Makó vasike Livaini numukú nosánetá napa Izesuni vatá omikago, takisi aliaká vegi ve makoki keza mukító namó.

30 * Ninago, Palisaio monó vegi monó mogona apí-ikimiaká vegi keza Izesuni izegipala zuhamú gili golesa niake láa liki li kememó: Lekeza nene

takisi aliaká vegi netá golesa aliaká vegená makoki nanamú makó miniki nosánetá ninave.

³¹ Liki likago, Izesú geleake láa loko lo kimimó: Hanuva lamaná iki mina vegenalitegó lusa vemú sele lisá amave. Kivisi vegenalitegó lusa vemú sele liaká niave.

³² Neza hee loko noune liki liaká nia vegená kelémo otopá zitove loko lemémumóma neve. Neza lihimáinigi vegená kigika ali viligatave loko kelémo otopá zinogo lumumóma nenaes, loko limó.

Nosánetá mosiakakumú loká itamó (Mat 9:14-17; Mak 2:18-22)

³³ Lá okago, keza láa liki li amemó: Zonini izegipala zuha keza gamena mukí monokumule liki nosánetá mosé mosé iki Ómasiloka liaká niave. Itó Palisaio monó vetini izegipáini zuha keza ámina suni aliaká niamóza, gei izegipaka zuha keza nosánetá gopa aliki niaká niamó nene nanamú niave.

³⁴ Liki likago, Izesú anoza gakó láa loko lo kimimó: Vená ali amita ve ezagi agiyelagegi apiziki niminiko ve makolímo nosánetá moseketatímó nehe. Lá aminogo íve.

³⁵ Gala vete vená ali amita vema kigizakutí ipá ita gamena alitokiko, nene zupa miluma nigiliki nosánetá mosinigave. Ámináminiki izegipáne zuhate alika nenikumú miluma gilikí mosé mosé inigave. Itína lá oko nomive.

³⁶ Loko loake, miní ameko anoza gakó makó láa loko lo kimimó: Lavolavo gó nene litaha looko hukokiko nene, gosohá gó makó hukiiki litaha gotó molo apizeko akotoakaláa nomive. Nagamí zikiko gikí okiko lavolavo gó gosohá hukokiko gosohá lavolavo gó nenémo litaha lavolavo gotó haitolíminoko minanogo íve.

³⁷ Itó vain nagamí nene gituhú galakalá noigo nene nagamí getununi litahagú ligi milisá amave. Vain nagamí nenémo gituhú galakalá nooko giputooko litaha getununi zeko ategékiko vain nagamiki nagamí getununigi latíla okatinazo,

³⁸ vain nagamí gituhú galakalá noimó nene goni getununi gosohakukó leke moloaká noune.

³⁹ Itó ve makolímohe makolímohe vain nagamí litahagó noaká noike, áminamú laga avisekago gosohá vain nagamí natove loko gelesá amive. Litaha vain nagamí nene vatí oko neve loko loaká noive. Loko limó nene litaha monó sunímini amupiló nene ezáa gosohá monó molo apizesá nene etamive loko anoza gakó limó.

6

Holisigú Izesuni vegenala zuhate kilé hisiki nimi vamó (Mat 12:1-8; Mak 2:23-28)

¹ * Holisi gamena makokú nene Izesú eza izegipala zuhagi kilé mikú mihina niake, izegipala zuhate kiléma akutiake gihiláa kigizanitunú hisiki nimi vamó.

² Lá niago, Palisaio monó ve lugáate ánigiaké gili golesa ake láa liki lamó: Holisi gamenagúma nenazo, hoza nalemó nene netá golesa lilí niave. Lá amoakalímini nene nanamú naleve.

³ * Liki likago, Ómasímo vegenala zuhate netakumú vitágá niko ezáa lo huka gakó nene hanuva molo gaheva itimó neve liki gilitave loko Izesú láa

loko lo kimike limó: Gozapá agulizaki ve napa Tevitige vegenala zuhagi nosánetakumú gaúna hiliake netá makó alemó nene lekeza gakó gatinamóza, mogona gelemiki nilahe.

4* Tevití eza Ómasímini monó numukú itekago guguni gizoaká ve napámo Ómasímini avogisaló mila peletima ameko ezagi makó mina vegená kimigo namóma neve. Ámina peleti nene hanuva vegenalite namitave liki guguni giziaká vetegó natave liki alévolé iki li hutinamóza ámina gamena nene hanuva vegenalite gopa namó neve.

5 Loko loake, Izesú miní ameko láá loko lo kimimó: Okulumakutí lumu ve ghila neza holisi amelahina nounazo, izegipáne zuhate holisi gamenagú lilí ita netá nene není netale, loko limó.

Agizani nakeseta ve alémo lamaná imó (Mat 12:9-14; Mak 3:1-6)

6 Holisi makokú Izesú nene monó numukú iteko monó lainim-oketoko noigo, agizani zamagaloka nakeseta ve makó minamó.

7 Noigo, monó mogona apí-ikimiaká vegi Palisaio monó vegi keza ámina vema alémo lamaná okikoma imane holisimagú nenazo, goní otatunize liake, gizapa iki minamó.

8 Lá iki kagata gelemoláa nene Izesú ánigoake, agizani nakeseta vema otekoko holutegú ote minozo loko lo amekago, eza oteake áminaló ote minamó.

9 Lá oko oteneigo, Izesú láá loko lo kimimó: Netá makokumú loká oleketatoze. Holisigú nene netá lamaná alesatímo etatihe netá golesa alesatímo etative. Vegená kelémo lamaná osatímo nehe kepele helesatímo nene neve.

10 Loko loake, vegená mukí gonú nokipilike agizani nakeseta ve nene gigizani lutozo loko lo amekago, agizani lutokago, goha lamaná imó.

11 Lá imóza, monó mogona apí-ikimiaká vegi Palisaio monó vegi keza kizapaló molokago Izesuni nana otatune liki ligili hagili amó.

Izesú izegipala 12 kelémo molamó (Mat 10:1-4; Mak 3:13-19)

12 Gamena nene zupa Izesú nene Ómasiloka linogo agokaú itimó. Itike Ómasiloka loko minova minova noigo gó lamó.

13 Gó lokago, ho noitigo, izegipala zuhamá sele lo kemekago, ikago, keikutí ve 12 kelémo etó oake, kugulizá nene aposolo veve loko molamó.

14 Keza lá iki minamó: Kugulizá Saimon agulizá gosohá Pitá ave loko molamó, itó agunala Etulú, itó Zemusí, Zoní, Pilipó, Patolomaió,

15 Mataió, Tomasí, Alapaioni gipala Zemusí, itó Saimoná eza Loma gamani amisele ahulanogo i ve, itó Zemusí makolímíni gipala Zutá,

16 itó Kaliotó numutotí ve Zutá eza minomo noitike Izesuni amimika li ve neve.

Izesú vegená mukí nasahilí oketamó (Mat 4:23-25)

17 Izesú nene izegipala zuhagi limiake apá geleni makotó neneló viki niago, aí vegenala zuha makoki ve vená mukí Zelusalegatí itó Zutaia apá makotokatí itó age nagamí gahevaloka nene Tulo itó Sitona apatotí keza Izesuni gakó gilitune liki itó kivisi vegená kelémo zokative liki neneló alegesá iki minamó.

* **6:4:** Liv 24:9

18 Niago, holosi golesa kigikagú mina vegená nene kelémo lamaná imó.

19 Itó Izesuni agupeló ali gilikago aí agupegutí zámuza nenémo netá kivisi vegenáma kelémo zoko asú imó nenazo, alegesá iki mina vegená mukilite ligizani lutoko agupeló ale gilitunitímo lelémo zokative liki gelemó.

Okulumakú mututoni itó meikú mututoni nenémini gakola

(Mat 5:1-12)

20 Lá ikago, Izesú nene izegipala zuhamá gonukonú kepeleake láa loko limó: Lekeza gohogó vegená neneta, Ómasímini lapaná ali lá itamó nenazo, lokogoliza nivizemó geleká noive.

21 Lekeza netá lamanakumú likivisigo mina vegená neneta, netá lamanalímo likigikagú vaí itimó nenazo, lokogoliza nivizemó geleká noive. Lekeza ive nama iki nimina vegená neneta, lekeza giza zohí itamó nenazo, lokogoliza nivizemó geleká noive.

22* Okulumakutí lumu ve gihila nenikumule liki vegená makolite mukahá likipiliiki visililikimiiki lekelikumú alivi letivi iiki vegená golesave liki lukugulizatini ali ahulatamó nene, lokogoliza vizitave lokogó gelenouve.

23* Lá nilikitikoma likigisa ziki miniki lokogoliza viziki gozapá avóike keza Ómasímini agepagutí gakó liaká a ve ámina iki lili ikimikago Ómasímo meinava napa kimimó nenazo, okulumakú meinavatini sipisi netimó neve liki gililo.

24 Lekeza henotiki vegená neneta, lekeza ehe tináneve. Lokogoliza viziki iki miliki amó mota asú okave.

25 Lekeza niki lakagatupa iki nia vegenalita, ehe tináneve. Aliká gaúna hilinigave. Lekeza giza zohí iki nia vegená neneta, ehe tináneve. Aliká lekeza miluma giliki ive inigave.

26 Lekeza vegená mukilite lukugulizá ali otiaká niamó neneta, ehe tináneve. Avóike ámináminiki soza monó lili ali vetini kugulizá ali otiaká amóma nemóza, Ómasímo ámináminoko keikumú giligo itemimóma neve.

Gala velini likigika kimilo

(Mat 5:38-48)

27 Lá onoimóza, není gakó nigele vegenáise gakó lo likimitoze, gililo. Lekeza gala velini nene likigika kimiiki nasahilí ikitalo. Vaika likamita vegená nene kilímí lamaná ilo.

28 Lekelikumú alivi letivi nia vegená nene nónohá zikitalo. Gopoguni mililikitata vegenakumú numuna lilo.

29 Ve makolímo agizanitunú nene gagampaló helegaloka zekikoma, helegalka gipilitive loko velegapé ze amezo. Ve makolímo geí hepé goka ipá oko aleko novikoma, geí sioti aleko amanapa amo. Nenegi aleko vitize.

30 Itó ve makolímo geí netakumú voká litimó nene hanuva amezo. Itó ve makolímo geí netá aleko vitove lokikoma hanuva amekako aleko vokiko goha ale nimitive loko voká lamo.

31* Lekeza vegená makolite némini manámini suni lili ilitatave liki giliaká nia netá nene lili ikitalo.

32 Vegená golesate kigika limiaká nia vegená nene ligika kimitune liki liaká nianazo, ámináminiki kigika likimiaká nia vegenakó likigika kimitamó nene, Ómasímo lekegepoka lamitive. Vegená golesate kezagi ámináminiki kigika limiaká nia vegená nene ligika kimitune liki liaká niave.

33 Lekeza netá lamaná lilí ilikimiaká nia vegenakó nene pekimi iki netá lamaná lilí ikitatamó nene, Ómasímo lekegepoka lamitive. Vegená golesate kezagi ámina suni aliaká niave.

34 Lekeza vegená makolite netá makó limitave liki giliiki netá makó kimitamó nene Ómasímo lekegepoka lamitive. Vegená golesate alika keza ámináminiki limitave liki ve golesa makó nene moni kimiaká niave.

35 Lá niamóza, lekelisi gala velini likigika kimiiki netá lamaná lilí ikitiki goha limitave liki gelemiki hagitana kimo. Lá ikiko, alika nene meinavatini napa iteko neiko, lekeza okulumakuka Ómasímini izegipa lamaná minatave. Ómasi eza agepoka lama vegenaki vegená golesagi hanuva muluna moloke-take lehizekimiaká noive.

36 Lekeza lá iki ametipo miluma gelelikimiaká noimómámini iki vegenakumú miluma gilikitalo.

Numuni lapusámini anoza gakola (Mat 7:1-5)

37 Lekeza nene vegenalitini mogonataganamú lotuva legemilo. Lá niko Ómasímo lekelí mogonataganamú lotuva legeminogo ive. Lekeza vegenalitini lihimamú gakó li hukikitamo. Lá niko Ómasímo lekelí lihimamú gakó lo hukoleketaminogo ive. Lekeza vegenalitini lihima ahulikitatamó nene, Ómasímo ámina oko lihimatini ahuloleketanogo ive.

38 Lekeza vegenalititoka iki miliki ita polosava nene Ómasímo ámináminoko lekelitoka oko moloko inogo ive. Ómasímo lamaná oko likigikagú lehizekimioko mi zeko hilulú oko nogúeko goha gútímó nene velemó zesa oko minanogo ive. Lekeza gona miliki kimiaká niamómámini avotigila oko Ómasímo ámináminoko gona moloko likiminogo ive.

39* Loko loake, miní ameko netá golesánimú anoza gakó makó láa loko lo kimimó: Agómula lilikupá mola ve makolímo agómula mola ve makó nene gapo alapizitihe. Óe, lá oko nomive. Ve lilikupá losi nenetosa eza agizató aliko eza agizató aliko vitáimó nene lositáma galegú hilanigasive.

40* Itó sukulu izegipa makolímo litá oko tisala avilegemitive. Alika sukulu loloko voko gele asú okoko tisala nenéminoko minanogo ive.

41 Geza gigivekahini agómulagú gilisá onoive loko lanimóza, gezaka gogómulagú za lana vonoimó nene nanamú ánigo lamaná amoko lane.

42 Gezaka gogómulagú za lana vonoimó ha nego ánigamanimó nenazo, géisi nene nigivénega, gogómulagú gilisá vonoimó nene ale ahulogetatove loko nanamú nolane. Geza sozaló ve genezaka losi minamó neneka, gezaka gogómulagú za lana nemó nene goí oko ale ahulooko gogómulatunú ánigo vevesooko alika nene gigivekahini agómulagú gilisá onoimó nene ale ahulotatanimó nene etanogo ive.

Gihila golesa lamaná zeaká nenémini mogona (Mat 7:17-20; 12:33-35)

43 Itó za lamaná makolímo gihila golesa zeminogo ive. Itó za golesa makolímo gihila lamaná zeminogo ive.

* **6:39:** Mat 15:14 * **6:40:** Mat 10:24-25; Zon 13:16

44 Za gihilamámo ámina zámini lamaná imoláhe golesa imoláhe ale utó oaká noive. Hilipa nenémo gizasi apelekiko hukiki natahe. Itó gumené nenémo loisi apelekiko akutiki natahe. Lá oko nomive.

45 Ámináminoko ve lamanalitini kigikagú netá lamaná minatimó nenazo, kigikagutí vatí sunigó ititimó neve. Ámináminigó oko ve golesatini kigikagutí nene golesa sunigó ititimó neve. Ligikagú vaí o minakutí legepagutí loaká noune.

*Numuni lukesavámíni anzoa gakola
(Mat 7:24-27)*

46 Lekeza nenikumú Guivahaniteve Guivahaniteve liaká niamó neneta není gakó nene nanamú ámegetisá amave.

47 Nenitoka iake není gakó gili aliaká nia vegenalitini mogonamú lo likimitoze.

48 Ve makolímo numuni ginogo gale háná legeake gehani amupiló lapusa hizeake, numuni gekago, golini zike nagamí napa veleko una napa nenémo ake numunima ahelú imóza, numuni nene geható ginazo, mórmoká amike alévolé oko minamó.

49 Nenéminiki niamóza, ve makolite není gakó giliakaláa giliaké není gakó gili alisá amave. Keza nenéminiki niave. Ve makolímo numuni ginogo lapusa hizemoko mikasi veletó soza moloko numuni gekago, alika nagamí veleko una napa nenémo ake ahelú okago, numunima litá oko lemeko pou loko akamó.

7

*Izesú ami gizapa vémini gelekelé veva alémo zokamó
(Mat 8:5-13)*

1 Izesú eza monó gakómá neneló lo keme asú oake Kapanao numutoka vimó.

2 Neneló Loma apatotí ami vetini gizapa ve makolímini gelekelé veva netá napa gizaleake helesakosá oko noigo, gizapa vevámo izegipalamú nene amekumú izegipala nenazo,

3 Izesuni gakoláa geleake, Zuta vetini ve uvóipini makó nokimisilike Izesuni li amikíko okoko není gelekelé izegipa nene avisí netáma alémo zokatihe liki viki loká ilo loko loketamó.

4 Lokimiaké kimiselekago, keza Izesutoka viki anitiaké amuza miliki láa liki li amemó: Lelí lova vetémini gizapa vema oko moloko noimó nene lamaná noive.

5 Eza nene agikáa nene leza Zuta vegená lemeaká noive. Itó monó numute utó itive loko nene moni napa molokago, acohékago, gilitamóma neve. Lá oaká noi vema nenazo, gakola gele amitanímó nene vevesanogo ive.

6 Liki li amikago, Izesú geleake kezagi makó vamó. Viki numu ávatiha vikago, lova gizapa ve nenémo agive makó nene Izesutoka nokimisilike gakó láa loko kimiselekago vamó: Guivahaníinemaka, neza ánéáminaloka goselé gapo okoko numúnégú nanamú ititane. Áminaló minozo.

7 Nezánmémú gulumó vevesamigo, geitoka vamuve. Nenemú gezama hanuva neneló nooko gegepatunu lokako gelekelé izegipáne zokative.

8 Neza ámináminoko kugulizaki vetini gelekeleláa nouve. Itó ami ve makó nene není gizapaló niave. Lá niago keitokati makokumú vozo lomikugo hanuva vinogo ive. Itó makokumú ano lomikugo nene hanuva anogo ive. Itó

gelekelé izegipánemú nene voko hoza alezo litomó nene hanuva voko hoza alinogo ive. Nenéminoko geí gakó nene alévolé onoinazo, hanuva ámináló minoko gakó lokako avisí netá zokative loko lunae.

⁹ Liki li amikago, Izesú nene ámina gakó geleake, ámina ami vetini gizapa vema sigaga lotake mino viligoake, ámegetiki va vegená láa loko lo kimirimó: Neza lamaná lo likimitoze, gililo. Isilae vegená lekezelokatí gele alévolé oaká nenéminá makó ánigoko gelesá onamumómá neve.

¹⁰ Loko lokago, ami gizapa vémo kimišili vegená atiginá iki numutoka vake ámina vémini gelekelé ve ánigamó nene zokoake noigo ánigamó neve.

Izesú Naino numutoka gohuna venalímini gipa heleneikutí alémo otímó

¹¹ Lá okago, Izesú mino háná amike apá makó agulizá Naino neneloka izegipala zuhagi nivago vegená mukí kímegetiki vamó.

¹² Viki numu gatetó nanitego gonosi makó zaló miliki aliki lemémó nene, gevóná vená makolímini gipala hámakó minamó nene helekago, gale zinigi numutotí ve vená mukí nilemego,

¹³ Guivahanímo gevóná venáma ánigoake muluna gitihiná okago ive amo loko loake

¹⁴ vike ukoakoló ale gilimó. Ale gelekago, gihiake otinago, Izesú gipa geza otitane loko noluze, otemané loko lokago,

¹⁵ helnei netalímo oteake gakó akó limó. Noligo, Izesú nene izolahiki goha minatáive loko lotamó.

¹⁶ Lomikago vegená keza ániga netakumú kelegesá goha legekago, Ómasí agepoka lake Ómasímini agepagutí gakó loaká ve napa nene holutegú utó oko noive liki likago, lugáate Ómasímo vegenala zuha lelémo vatí inogo ve imane amiselekago okave.

¹⁷ Liki likago aikumú gakoláa nenémo Zutaia mikasiuka itó mikasi helega helegaloka voko oko imó.

Zoní ve losítá kimiselekago Izesutoka vasimó (Mat 11:2-19)

¹⁸ Zoní nene nagá numukú noigo, izegipala zuhate Izesú oko moloko i gakola avetó iki li amikago,

¹⁹ ámina gakó geleake, Izesukumú agata losi geleake, keikutí ve losítá alesa moloake Guivahanima láa liki loká itáive loko kimisilimó: Utó itive liki monó gotolaú luhuva giza vema nene géisi noape itó alika makó utó itikumú ageva itune, liki lilizo loko kimiselekago,

²⁰ ámina ve keza Izesutoka viki lasimó: Monó nagamí holokimiaká ve Zoníma gologí oletative loko lo mololeta ve ative liki li milamómá géisi nene noape, itó makokumú ageva itune liki loká ilizo loko limiselekago nousive.

²¹ Liki likasigo, ámina zupama Izesú nene mukí kivisi vegená itó netá gizale vegená kelémo zokoká itó kigikagutí holosi golesa kepeleko kimiseleká itó kogómula likamó ale pulusoketoká imó.

^{22*} Lá noigo, ve losima anitiki loká imikasigo Izesú nene ámina vema noive loko Zoní gilitive loko láa loko lo kimimó: Lekeza atiginá iki viki netá matá imane loló nougo ánigiki miliki asimó nenéminí gakola avetó iki Zonini li amilizo: Kogómula lilikupá molamómá nene kogómula ale hanatokimiaká noive. Kigisaló alimó nene ale lamaná okimiaká noive. Halamé gizalemó nene giliiliaká niave. Kagata molamómá nene kagata ale koló okago gakó giliaká

* ^{7:22:} Isa 35:5-6; Isa 61:1

niave. Lepa gonosi kelémo oteaká noive. Itó limiki minamó ámemena nenete není gakó lamaná giliaká niave.

²³ Lá onoinazo, makó keza není mogonamú kagata losipasi gelemitamó nenete kogoliza viziki minanigave liki li amilizo.

²⁴ Loko Zoní kimisili vema lo kemekago, atiginá iki nivasigo, Izesú vegeňá sii sii liki minamoláa Zonikumú láa loko lo kimimó: Lekeza Zoní noitoka mikasi gomopalaló vamó nene nanakitana vema ániganigi vamómáa neve. Ve makó akepagitana oko hepelímo aleko mómomká noiko ániganigi vamómáa nehe.

²⁵ Itó ve makó gonanalivagi gó ale akoloake noigo ániganigi vamómáa nehe. Gilinahe. Luhuvagi gó ali akilikí miniaká nia ve keza kugulizaki vetini numuni napagú akiki otiki minake nosá hisugú viziaká niave.

²⁶ Lekeza Ómasímini agepagutí gakó loaká ve makó ániganigi vamómáa neve, olo. Itó makó lo likimitoze, gililo. Lekeza ánigi mina vema Ómasímini agepagutí gakó liaká ve lugáa keikitana minamive. Eza haitolíminoko minokáve.

^{27*} Monó gotolaú Ómasímo gakó makó láá loko limó nene láá liki luhuva gizinamóma neve:

Gililo. Není gakó lole ale ve makó amiselekugo, ale goí oko voko kigikagú hoza alitanimómámini gapoga velegetanogo ive.

Loko li gakó nene Zonitoka vo alimó neve.

²⁸ Loko loake, láá loko limó: Neza lamaná lo likimitoze, gililo. Mikasiuka utó ina vegeňakutí makolímo Zonini ma avilegesá amive. Lá onoimóza, Ómasímo gizapa okimiaká noi vegeňá limiki niamoláa kezagi gopa Zonini avilitigí iki niave.

^{29*} Loko lokago, takisi aliaká nia vegi vegeňá lugáagi keza ámina gakó giliaké Zonitokatí monó nagamí amunaloka emane hilinamó nenazo, Ómasímini gakó hizi lé ikago gihila zimóza,

³⁰ Palisaio monó vegi monó mogona apí ikimiaká a vegi keza nene Zonini monó nagamikumú goselé iake Ómasímo veleketa gapo nene ánigi ahulamó neve.

³¹ Loko loake, Izesú makó láá loko limó: Oko moloko nougo ánigiaká nia vegeňá nene nanetató lo moloko lokugo vo guni itive. Hiláagitana niave.

³² Keza gili goselé iaká nia izegipagítana niave. Izegipa keza alegesá apatoka minake izegipa lugáama sele liki leza nama luható nene nanamú nama lisá amave. Itó helegaloka nene ive nama luható nene nanamú ive nama isá amave liki li kimiaká niave.

³³ Itó nezagí Zonímagi ámináminoko nousigo goselé lekepeleká noive. Monó nagamí holokimiaká ve Zoní eza apí oko hozaváa nalike iza goula nosá zahí nagamí lamaná namike etó oko minokago kezeza ánigiaké holosi makolímo agika ale gopa okago noive liki lamó.

³⁴ Itó okulumakutí lumu ve gihila neza lemeko iza goula zahí nagamí nosánetá lamaná noaká nougo ánigiaké ve imane ánigalo. Áisi nene gasova ve nagamító ve eza nene takisi aliaká ve itó ánigo goselé oaká nouhá vegeňá makolitini zogonini noive liki liaká niave.

³⁵ Láá nilamóza, Ómasímo gele guni oko netá matá aleaká noimó nene vevesokogó minoaká noigo, izegipala zuha keza nenémini mogona ali utó iaká niave, loko limó.

* ^{7:27:} Mal 3:1

* ^{7:29:} Mat 21:32; Luk 3:12

Izesú eza Palisaio monó ve Saimonani numukú minamó

³⁶ Palisaio monó ve makolímo nosánetá natane loko Izesuni alesa molo amekago, numunagú itiki nosánetá niki minasimó.

³⁷* Ámina apatotí mokoló vená makolímo Izesú eza Palisaio monó vemámini numukú iteko noive liki lamóma geleake, anuva hilina gehanigita gonigú minamó nene aleko iteko,

³⁸ amegesaloka noike ive noigo, agómula nogoza nene Izesuni agisaló lemekago, gotola zopovatunú nene agisa gilatotamó. Gilatomiake, Izesuni agisa nene agoka legeko nonake, anuvavagi meseme nene agisaló holotamó.

³⁹ Holomikago, Izesuni alesa molo ami ve nenémo ánígoake, agikatunú láa loko gilimó: Imane Izesuni agupeló ale nogili vená nenémo golesa netató vená noive. Izesú eza ató imane Ómasímini agepagutí gakó loaká ve minalina, ámina venálímini mogonamú nene moko mogonaló venale loko gililine.

⁴⁰ Loko agikatunú gelekago, Izesú nene Saimonao, neza gakó makó lo gimitoze loko lo amekago, tísánemaka, lokako gilitove.

⁴¹ Loko lokago Izesú anoza gakó makó láa loko limó: Ve makolímo alikamule loko loake moni nene ve losi gutá kimimó. Makó nene 500 kina amimó, itó maga ve nene 50 kina amimó.

⁴² Lá okago alika nene áminaló nene pekimitíve liki monimú vitágá asimó nene nomigo, eza ahalulizo loko lokago, ali haha asimó. Keitokatí hilímo aikumú lagaváa napaló geleneitive.

⁴³ Loko lokago, Saimoná láa lo amimó: Nagata gulumó moni nekisala napaló ahulota ve nene neitive. Loko lokago, Izesú geza vatí oko lokane.

⁴⁴ Loko loake, venáma noitoka viligo moloake Saimonani láa loko lo amimó: Vená imane ánígonape. Neza numukagú itekugo, géisi nigisa níziani nagamí zito nagamí leke molonetamako, imane vená nenémo ive nogozatunú nigosaló holonimiaké gotola zopovatunú nogilatonetave.

⁴⁵ Itó géisi leza Zuta vetini suni aleko nogoka negepa namanimóza, vená imanémo numukagú apí oko noitugo nigosáneamuza moloko agoka agepa nonave.

⁴⁶ Géisi oaká nouhá netá aleko gotónegú nene meseme holonetamanimóza, imane vená nenémo nigosaneló anuvavagi mesemetunú holonimikave.

⁴⁷ Neneló láa loko lo nogumuve. Imane vená eza nenikumú geleake nasahilí napa onimikago lihimala mukí ahulomikuve. Makó eza lihimavala koma ahulomikiko noittímó nene lihimavala gilatota vema agika napa ameminogo ive.

⁴⁸ Loko loake, venáma láa loko lo amimó: Lihimaka ahulo asú ogimikuve.

⁴⁹ Loko lokago, ezagi nosá niki mina vegená keza kigikatunú láa liki lamó: Áisi haitolímíno nolihe. Lihimavaka asú okave loko nolimó nene hí ve suka nolive.

⁵⁰ Liki nilago, Izesú nene venáma láa loko lo amimó: Nenikumú gele alévolé anitímó gelémo lamaná okaze, mulukagú hulu iko vozo, loko limó.

8

Izesugegi vená makó miniaká amó

¹ Nene zupa velelaló nene Izesú eza apá koma napaló mohona ike vegená nene monó lo kemeko Ómasímini gizapaló minoakalímini gakó lamaná lo

* ^{7:37:} Mat 26:7; Mak 14:3; Zon 12:3

keme keme oko mohona imó. Mohona noigo, ámegetiki mihina niamoláa nene izegipala zuha 12-a

²* itó vená lugáa amunaló emane kigikagutí holosi kepeleko kimisilimoláa itó kivisekago niago kelémo zokamoláa keitokatí makó Maliá agulizá Magatalalo liki milamó, agikagutí holosi 7 kepeleko kimisili vená,

³ itó makó agulizá Zoañá eza Heloteni hozaló gizapa ve Kuzani venala, itó Susaná itó vená lugáa keza moni henokanonigi miniake Izesugini nasahilí ikitiki minamó.

*Zuha netá atilí oaká vemú anoza gakola
(Mat 13:1-9; Mak 4:1-9)*

⁴ Numutó namató ve némitó ve Izesutoka vóvotiki alegesá iki minamó. Lá niago, ánigoake anoza gakó makó láa loko lo kimimó:

⁵ Zuha netá atilí oaká ve makolímo netá gihiláa atilí inogo vimó. Mikuka atilí omo novigo, gihila lugáa gapoló alemó zekago, vegenalite lisiki matelé zemó. Itó gaha namate ake ni asú amó.

⁶ Itó gihila lugáa nene gehani amupiló lemeko minake, goloko iteakaláa itekamóza, mikasi nogoza minamigo osagava vizeake hilimó.

⁷ Itó gihila lugáa nene lilihámini luhusa nene mikasigú ha netó lemeko minake goloko itike liliha nenémo zemikago, nogotamó.

⁸ Makó nene mikasi lamanakú lemeko minake goloake, gihila mukí zimó. Hamó zámo nene gihila 100 zimó. Loko lo asú oake, gakó napagutí láa loko limó: Lakagatagi minatamó neneta, gakó imane gili hee liki gililo, loko limó.

*Zuha netakumú anoza gakolímini mogonáa
(Mat 13:10-23; Mak 4:10-20)*

⁹ Loko lokago izegipala zuhate anoza li gakokumú loká itago,

¹⁰* eza láa loko lo kimimó: Ómasímini gasovaló minoakalímíni asuguná gakó lekeza gilitave loko lonoimóza, lugáa keza nene anoza gakokó gilitaze. Lá niiki netá matá kogómolutanú nene ánigatamoza ánigi vevesaminigave, itó kagatatuń gakoláagó gilitamoza, mogonáa gili vevesaminigave.

¹¹ Itó anoza gakó imane nolumó nenémini mogonáa lá oko neve. Zuha netá gihiláa nene Ómasímini gakó neve.

¹² Gihiláa gapoló lemeko minamó nenéminiki minatamó keza monó gilitamó nene kigikagú limitimóza, áminasító Satá nene gili alévolé ikiko Ómasímo kugutó vizekative loko aniteko ámina gakó nene ipá oko aleko voaká noive.

¹³ Itó gihila lugáa gehani amupiló lemeko goloaká imó nenémini iki minatamó keza monó nigliki laga kivisekago giliaká niamóza, kigikagú luhusáini alemigove liki gamena alínipa alinago giminikú moloaká netá utó okago monóma ahuliaká niave.

¹⁴ Gihila lugáa lilihagú lemeko minamó nenéminiki minatamó keza monó giliakaláa gilitamóza, kugupémíni netakumú gelekeleláa niminiko, moni henokanonímíni lagavámo kigikagú lemeake monóma zemikago, keitoka gihila utó oko guzá losá amive.

¹⁵ Gihila lugáa mikasi lamanakú lemeko minamó nenéminiki minatamó keza monó giliiki kigika ali guni iiki legesó iki ali minikago, keitoka monolímímini gihila utó oaká noive.

* **8:2:** Mat 27:55-56; Mak 15:40-41; Luk 23:49

* **8:10:** Isa 6:9-10

*Liví legeakakumú anoza gakó
(Mak 4:21-25)*

16* Hí vémo liví legeoko somotunú ze hitatimó neve, itó hí vémo legeoko sepekú lolosá gitimó neve. Lá oko nomive. Itita vegená nene hize hanatoketative loko legeoko holomaló molanogo ive.

17* Ámináminoko Ómasímimi asuguná onoi netá nene mino-loko voko tolova amitive. Minoko utó o asú inogo ive. Halá genei netá nemó nene ámina oko utó o asú okoko hitaminogó ive.

18* Monó alinita vegená nene vatí iki gizapa iki ali minatamó nene Ómasímo goha miní ameko makó kiminogo ive. Itó makó keza monóma lamaná iki gizapa amitamó nenete alenoupe liki litamóza, goha ipá oko alekiko hanuva minatamó neve. Nenemú lekeza gakó imane nigliki gili guni ikigililo, loko limó.

*Izesuni izolahove agunamotamolave
(Mat 12:46-50; Mak 3:31-35)*

19 Gamena makó nene mukí vegenalite Izesuni hizi vigiaké niago, Izesuni izolage izegipa agunamotamolave ake vegenakumú olovó ziake mini hetó minamó.

20 Lá niago, ve makolímo ánigoake Izesuni nene izokage izegipa gugunamotamokama geí áníganigi amó nene hetoka niave.

21 Loko lo amekago, Izesú nene vegenáma láa loko lo kimimó: Ómasímimi gakó giliiki gili alitamó imanete není izónäge izegipa nugunamotamónē niave, loko limó.

*Izesú lokago una napa ahulamó
(Mat 8:23-27; Mak 4:35-41)*

22 Gamena makó zupa Izesú ave izegipala zuhagegi nagamikú lapegú itemó. Itiaké, Izesú nene nonohuló likeko vola helegaloka vitune loko lokago, giliaké, vámó.

23 Nivake, Izesú nene agómula ahihí okago, avó akonoigo una napa nalike nonohulóma golesa oake valahuká nozike sipimámini agikagú lemeko vaí oake, nagamí nonohulokú hilisá amó.

24 Lá niake, Izesuni alími oteke láa liki li amemó: Gizapa velemaka, leza nagamí nonohulokú simá nanogo nouhá lae. Liki likago, Izesú oteake, unamagi nagamí valahukámagi gahá kemekago, kii nolike zou limó.

25 Zou lokago, lekeza gili alevolé iakatini hí neve. Loko lo kemekago, izegipala zuhate keza ámina netá ániakié, kelegesá legekago, sigaga lake ligili hagili niake, agae, ve imanémō hepeki nagamí valahukaki gakó lokimikamó nene gili alikasimó nenazo, ve imane haitolímimi netive, liki lamó.

*Gelegesa mikasiuka holosi golesa amisele ahulamó
(Mat 8:28-34; Mak 5:1-20)*

26 Lá okago, Galilaia nonohuló helegaloka Gelegesa vegenalitini mikasiuvi anitemó.

27 Neneló anitiaké nagamí gahevaloka nitego, numuni apá napalokatí ve makó ake Izesuki hotu lasimó. Ámina vémini agikagú nene holosi golesa mukí minikago gamena háná gó luhamike minake numukú akosá amigo, hanuva geha mulikú gonosi milimiligukó akoko mohona oaká i ve minamó.

* **8:16:** Mat 5:15; Luk 11:33 * **8:17:** Mat 10:26; Luk 12:2 * **8:18:** Mat 25:29; Luk 19:26

28-29 Ámina holosite gamena gamena ámina vémini agikagú alévolé iki minikago, vegená keza agisa agizató seni nagatunú ziake gizapa iki minamóza, holosi nenete nagá nene apilikí hukimikago golisi mikasi gomopalaló voaká imó. Áisi nene Izesuni ánigoake gopaga like agisauka pou loko mikasiló akoake gakó napagutí gamoga geko láa loko limó: Izesuvo, Ómasi napámini gipalamaka, géisi nene nana netá golesa onetanogo noane. Loko lokago Izesú nene holosi golesa geza ámina vémini agikagutí itekoko vamane loko lo amekago, holosi nenémo amanapa ike geza miluma hoza nememitane loko alévolé oko loká nogetuve.

30 Loko lokago, Izesú loká otake limó: Gugulizaka éagave. Loko loká omikago, holosi vaí iki agikagú minamó nenazo, neza nugulizáne nene ami mulusi nouve loko limó.

31 Loko lokago, holosimate meikú limisele molamitane liki negénegeka lamó.

32 Liki likago, ámina mikasiló iza gululusi mukí nene agokaú gale niki niago, limiselekako izatini kigikagú limitune liki negénegeka likago, gele kemekago,

33 holosi golesa nenete ámina vémini agikagutí itiake vake izatini kigikagú itiake limikago, ámina iza keza olfi miliake meiniló limiake nonohulokú limiki nagamí niki hutiake helemó.

34 Limiki hilikago, iza gizapa vemate ánigiaké ololu liki taoniloka itó numuni amegesaloka viki avetó iki li kimikago

35 vegená keza ámina utó i netá ániganigí viake, Izesutoka anitiaké holosi agikagutí kimiselekago va vema nene luhoaká gó luhoake itó geleakaláa lamaná okago, Izesuni agisauka gakó geleko noigo, ánigiaké kelegesá ligimó.

36 Lá niago, ámina netá ániga vete holosivagi mina ve lamaná ikumú nene ánigi mina vegená avetó i kememó.

37 Lá ikago, Gelegesa mikasiuka amelage keza kelegesá goha legekago, Izesú eza nene mikasinini ahulooko vitive liki li amemó. Li amikago, eza atiginá oko vinogo nagamikú lapegu itimó.

38 Noitigo, holosi agikagutí kimiselekago va vemámo Izesuki minatiive loko negénegeka lokago, Izesú gele amemike láa loko lo amimó:

39 Geza numukaloka voko Ómasímo loló ogeta netá lamanalímini gakoláa nene vegenaka lo kemezo loko amiselekago, ámina vemámo atiginá oko vike Izesú loló ota netakumú nene apá amelagini lo utó oko lo keme asú imó.

Zailoni moholagi Izesuni gotó ale gili venaki (Mat 9:18-26; Mak 5:21-43)

40 Lá okago, vegená keza vola helegaloka Izesukumú ageva iki niago, atiginá oko omo anitekago, ánigiaké, geké vaké limikago,

41-42 monó numukú agulizaki ve makó agulizá Zailó loko noi vémini mohola hamokó aí kilisimasiva 12-a mina mohó nene helesakosá oko minokago eza ake Izesuni agihúna geko numúneloka makó vitíve loko negénegeka loko limó. Lá okago, makó nivasigo, vegená keza sii sii liki nivago,

43 holulkú vená makó minamó nene ikanímo apelekago númerase gapo molova molova oko noigo, kilisimasí 12 oko novigo lusa ve nene moni keme asú imóza, keza lusa geha geha amitímó okago ahulitamó.

44 Ámina venálimo Izesuni amegesaloka oake, luhoaká gó gahevaloka ale gilimó. Ale nogiligo áminasító nene galaniva utamó.

45 Lá noigo, Izesú loká oketoko éaho nugupeloka ale gilive loko lokago, vegená keza egamega ikago, Pitá láa loko limó: Gizapa velemaka, vegená sii sii liki nivamó nenazo, makolímo noitive.

46 Loko lokago, Izesú láa loko limó: Óe, makolímo nugupeló ale nogiligo, zámuzáne makó nene nugupelotí novigo noguluke noluve.

47 Loko lokago, vená eza mogonáne mota utó noinazo loko geleake, luvolovo zeake Izesuni agihúna geake, vegenalitini kovogisáló nene avisi metalímini mogona itó ale nogilike zokamó nenémini mogona lo utó okago gili asú amó.

48 Nigelego Izesú láa loko lo amimó: Mohónemaka, nenikumú gele alévolé anitímo gelémo zokokave. Mulukagú hulu iko vozo.

49 Loko noligo, monó numukú agulizaki vemámini numukutí ve makolímo oake láa loko limó: Mohokama mota helekave. Lá okanazo, tisate nene goselé gapo hanuvamú okatize, ahlukozo.

50 Loko lokago, Izesú geleake Zailoni láa loko lo amimó: Geza gehelele vizemiko gele alévolé okogó minatanimó nene, mohoka goha otinogo ive.

51 Loko loake, numutó vo aniteake vegená makó nene ámina numukú itemitave loko lokimikago, hetó niago, Pitá Zoní Zemusí itó mohó izolahiko amelahiko kezagó kelémoko itimó.

52 Iteke ve vená keza ámina mohó ive nama itiki niago, ánigoake goha alémo otitikumú geleneike anoza gakó láa loko lo kimimó: Ive amilo. Mohóma nene helemive. Hanuva avó akonoive.

53 Loko lokago, mota heleneimó nemóza liki giliaké giza itamó.

54 Giza imikago, Izesú nene agizató aleake sele loko mohó geza otezo loko lokago,

55 áminasító ameni atiginá okago otimó. Otekago, nosánetá aliiki mohóma amiko native loko loketamó.

56 Lokimikago, izolahiko amelahiko keza gelesimó nene golivagi netá loló imó. Lá okago, Izesú nene ámina netakumú gakó avetó iki vegená li kememitave loko lo hukoketamó.

9

Izegipala zuha 12 keza monó hozaló vamó

(Mat 10:5-15; Mak 6:7-13)

1 Izesú eza izegipala zuha 12-pala sele lo kemeake vegenalitini kigik-agutí holosima gale gihiki kipilikí kimisilitave loko itó kivisi vegená kilími zokatave loko nenémini zámuza kimimó.

2 Kemeake, Ómasímini gizapaló minoakalímini gakó li kimiki kivisiti vegená kilími zokatave loko nokimisilike,

3* gakó láa loko lo kimimó: Gapo vitatoka netá matá aliki vamilo. Hánusa akiseaká gó peleti moni nene alemíki, itó gó losítá luhamíki vilo.

4 Itita numuni makokú itiikima, ámina numukú akiliki niviki ámina apatotí vitave.

5* Apá makotoka likilími lamaná amikoma, ámina apá ahuliiki niviki vahé miliki likigisalotí mumusopa nene usagamá zi ahuliiki vilo.

6 Loko lo kemekago, keza numutó namató vake Izesuni gakó lamaná nene li utó i kimi kimi iká kivisi vegená kilími zokiká amó.

*Monó nagamí holokimiaká ve Zoní hili gakó
(Mat 14:1-12; Mak 6:14-29)*

7 * Lá niago, agulizaki ve Heloté nene aposolute alévolé netá lilí niakumú geleake, agata gululusi gilimó nene, ve makolite Zoní nene heleneikutí oteake ámina netá loló noive liki nilago,

8 itó makolite nene Ómasímini agepagutí gakó loaká i ve Ilaizá goha utó okave liki liaká niago, makolite nene gozapá Ómasímini agepagutí gakó liaká a vegutí makóma Ómasímo alémo oteneive liki liaká amó nene,

9 Heloté geleake, láa loko limó: Zonini luvana hukumóza, ve makokumú gakoláa nenémika liki lago nogulumó nene hí ve noitive. Loko loake, Izesuni áníganogo gilimó.

*Ve 5000 nosánetá kemeko namó
(Mat 14:13-21; Mak 6:30-44; Zon 6:1-13)*

10 Aposolo keza monó hozaló kimisilitotí atiginá iki iake, keza iki miliki a netakumú Izesuni avetó iki li amemó. Avetó iki li amikago, eza kelémoko vike kezáikó apá makó agulizá Petesaita numutó vi anitemó.

11 Lá niago, ve vená mukí keza giliakte, Izesuni ámegetiki nivago, eza kelémo moloake Ómasímini gasovaló minoakalímini gakó lo kimike, kivisi vegena kelémo zokamó.

12 Lá noigo, únaká nene gamena asú inogo noigo, izegipala zuha 12-palamate iake láa liki li amemó: Leza mikasi gomopalaló nouninazo, vegena kimiselekako luhuva numutokagi iza gihiló numutokagi viki nosánetakumú vitágá iki niuki akatave.

13 Liki likago, Izesú nene lekezatini nosánetá kimiki nalo loko lokago, keza anotó aliki láa liki lamó: Peleti ligizani lugaloka asú igo itó lagaha lositákó molonounimó nenazo, leza imane vegentalitini nosánetá voko meina hizeketatune loko nolape.

14 Liki lamó nene áminaló mina véa 5000 nenéminiki niago giliakte láa liki likago, Izesú nene izegipala zuha láa loko lo kimimó: Mukí vegena nene 50 50 nenéminiki mulusi miliki minalo liki likitalo.

15 Loko lokago, keza izegipala zuhate láa liki likimikago, vegena máma mulusi miliki niago,

16 Izesú nene peleti ligizani lugaloka asú igoma itó lagaha lositámagi aleake, okulumakú okenava oko nánigake Ómasí agepoka loake peleti gitegeake, ámina nosánetá gona miliki kimitave loko izegipala zuha kimimó.

17 Lá okago, vegena mukilite nikake kagatupa okago, nosánetá lumáa ali nupa iki gosúveha 12 vaí okago ali milamó.

*Pitá Izesuni mogonamú lo utó imó
(Mat 16:13-19; Mak 8:27-29)*

18 Gamena makó nene Izesú eza Ómasiloka loko noigo, izegipala zuha kezagó neneló niago, eza loká oketake vegentalití nenikumú éahove liki liaká niave.*

19 * Loko lokago, keza láa liki li amemó: Monó nagamí holokimiaká ve Zoníma goha utó noane liki liaká niave. Itó lugáate nene Ilaizá gozapá okulumakú iti vema goha lemecko minane liki liaká niave, itó lugáate nene

* **9:7:** Mat 16:14; Mak 8:28; Luk 9:19 * **9:19:** Mat 14:1-2; Mak 6:14-15; Luk 9:7-8

gozapá Ómasímini agepagutí gakó liaká vegutí makó nene galegutí otekave liki liaká niave.

²⁰* Liki likago, Izesú loká oketoko lekelisi nenikumú éahove liki liaká niave. Loko lokago, anotó aleko Pitá nene geza Ómasímo gologí oletatane loko lo mololeta vema noane, loko limó.

*Izesú hiliti gamenamú epoapoga limó
(Mat 16:20-28; Mak 8:30-9:1)*

²¹ Láa loko lokago, Izesú láa loko lo hukoketoko limó: Lekeza imane gakó lo nolukumumó nene vegená makó li kememilo.

²² Okulumakutí lumu ve gihila neza nene monó gizapa vegi guguni giziaká ve napagi monó mogona apí-ikimiaká vegi keza miluma netá mukí nimiiki není ánígi goselé ikíko nipili hilikiko, gamena losive makole minokinake heleneitokutí goha otinogo uve.

²³ * Loko loake, vegená mukí láa loko lo kimimó: Vegená makolite není némegetatune liki niglikima nene kugupémo giliti netá matá nene gili ahuliiki zohota zaló kipili hilinigi miluma netá ali gihikitatakumú gamena gamena gili zagiiki némegetiki ataze.

²⁴ * Makó keza kigika kemeníni ali amánapa iki minata vegená nene kigika kemeni gopa inogo ive. Itó makó keza nene nenikumule liki kigika kemeni víiasi ahlusatamó nene alévolé kemetameni alitamó neve.

²⁵ Makó keza mikasímini amupiló ne netá ali asú niko kezáini kigika kemeni gopa okoko tolova itímó nene, mikasiuka henonimámo nana oko kelémó lamaná itive.

²⁶ Ve makó keza nenikumupe monónemupe avetó itakumú kovoza hilitimó nene, okulumakutí lumu ve gihila neza lapanáne itó aménehini lapaná nenémó numupiló itekiko apazá agelova kelémoko limito gamenaló nene keza kovoza hilimó nenéminoko nezagi nene kugulizá ale otitokumú novoza hilinogo ive.

²⁷ Neza lamaná lo likimitoze, gililo. Lekelisi ató nene nia vegená lekelikutí lugáa makó hilinamiki ha niko Ómasímo gizapa oketatímámámini zámuza utó okiko ániganigave, loko limó.

*Izesuni agupe haitolímíni imó
(Mat 17:1-13; Mak 9:2-13)*

²⁸ Izesú ámina gakó lo kemeake, gamena 8-ía nenéminoko oko vokago, Pitani Zonini Zemusini kelémake agokaú Ómasiloka linogo itímó.

²⁹ Itike Ómasiloka loko noigo, haitó agoka agepa ale noluhake noike gine-ganevámo gizopa vaevae loko minamó.

³⁰ Lá noigo, galinali ve losítá Moseko Ilaizako keza okulumakutí utó ikasike Izesugegi gakó ligili hagili ake,

³¹ okulumalímíni gonanalivagi niasike, Izesú nene Zelusalega noheleko Ómasímo lo mola netá loló itikumú ligili hagili amó.

³²* Lá niago, Pitagegi kogómula ahíhí okago, kovó akinakutí otiake ánígamó nene, Izesú eza lapanalagi noigo itó ve losima ezagi niasigo ánígamó.

³³ Áníkago, ve losima keza ahulimiikki vinigi niasigo, Pitá láa loko Izesuni lo amike limó: Monó gizapa velemaka, imaneló minuhá laga okaze. Lá

* 9:20: Zon 6:68-69

* 9:23: Mat 10:38; Luk 14:27

* 9:24: Mat 10:39; Luk 17:33; Zon 12:25

* 9:32: 2 Pit 1:17-18

okanazo, gaizopa losive makole geleketatune, makó geile, makó Mosenive, makó Ilaizanive loko limó nene gakó gele guni amike gopa limó.

³⁴ Loko noli agepagi límusímo lemeko ze hitokimikago, límusi hitoketakumú kehelele vizimó.

³⁵* Lá noigo, límusigutí Ómasímo láa loko limó: Imane gipáne alémo etó onou gipáne noize. Ái gakó gili alilo.

³⁶ Gakó láa loko utó okago, giliake ánigamó nene Izesú ezáagó noigo ánigamó. Ánigiaké, ámina gamenaló ániga netakumú kegepa apiziake avetó iki vegená makó nene li kememamó.

Izesú holosi golesa mina gipa alémo zokamó

(Mat 17:14-21; Mak 9:14-29)

³⁷ Akiake gó lokago, agokagutí limiake niago, vegená mukí iake Izesugegi hotu lamó.

³⁸ Hotuliaké keikutí ve makolímo gakó napagutí láa loko limó: Monó gizapa velemaka, není gipa hamokó oko ánigatane loko loká nogetuve.

³⁹ Holosi makolímo aleko alévolé oake noigo, galinali gopaga loaká noive. Lá noigo, holosi nenémo alémo mómoká goha okago, sehovala veleaká noive. Itó apeleva apeleva oko noikey litá oko ahulotosá amive.

⁴⁰ Itó izegipaka zuha nene holosima apiliki amisilitave loko lo kumumóza, amiselemitamó okave.

⁴¹ Loko lokago, Izesú láa loko lo kimimó: Lekeza ató imane gili alévolé amake mulutikú amánapa iki minamó neneta lekelikumú goselé nepelekave. Lekezagi gamena gamena minoloko iteko minokugo gili alévolé itahe. Lá ikaze, gipaka imaneló alémoko ano. Loko lokago, izegipama Izesutoka noago, holosi nenémo mikasiloka ahelú okago pou loko ákonoigo, alémo mómoká imó.

⁴² Lá okago, Izesú nene holosi golesama gahá amike namisilike, ámina gipa alémo zokoake, goha amelahitoka alémo atiginá imó.

⁴³ Lá noigo, ve vená mukí keza Ómasímini zámuza napamú sigaga sagaga lamó.

Izesú hiliti gamenamú goha epoapoga limó

(Mat 17:22-23; Mak 9:30-32)

Lá iake Izesú oko moloko i netakumú sigaga nilago, Izesú nene izegipala zuha láa loko lo kimimó:

⁴⁴ Lekeza imane gakotó lakagata miliki gilikí minalo: Okulumakutí lumu ve gihila neza gala vetini kigizakú nene nepele hilitune liki nilími milanigave.

⁴⁵ Loko limóza, nene gakolímini mogonáa gilikatave loko kigika kagata koló amimó nenazo, keza gili vevesamake, ámina gakokumú loká itanigi kehelele vizekago loká itamamó.

Vegená mukikutí éaho livilegeko noive.

(Mat 18:1-5; Mak 9:33-37)

⁴⁶* Lá ikago, izegipala zuhamate gakokumú lova hizeke lelikutí éaho livilegeko agulizaki vele minative liki lamó.

⁴⁷ Nilago Izesú eza kigikagú nigele gakó geleake izegipa koma makó alémoko ake amatoka alémo oteneike,

* 9:35: Luk 3:22 * 9:46: Luk 22:24

48 * lāa loko lo kimimó: Makó keza nenikumule liki izegipa koma áimanémini nasahilí ikitatamó nene, není nasahilí inimiaká niamó gelekave. Itó makó keza nasahilí initatamó nene nimisili ve aménehini nasahilí itatamó gelekave. Lekelikutí ve makolímo lemeko nouve loko giliti ve nene Ómasímo alémo ve napa loló okiko likivilegeko minanogo ive.

*Lekelí gala ve noamitimó nene lekelikutí ve noinogo ive
(Mak 9:38-40)*

49 Loko lokago, Zoní lāa loko lo amimó: Gizapa velemaka, leza ve makolímo geí gugulizató like holosi golesa nene vegenalitini kigikagutí kepeleko nokimisiligo ánigunimó nene lelí lémegetami ve nenazo, géneka lotunimole.

50 Loko lokago, Izesú lāa loko lo amimó: Lekeza géneka litamilo. Ve makó keza lekelí gala velini niamitamó nene lekelikutí ve ninigave, loko limó.

Samalia vegená makolite Izesuni alími milamamó

51 Ómasímo Izesuni goha okulumakú alémoko ititi gamena alitokago, Izesú nene Zelusalega vitove loko alévolé oko agata gilimó.

52 Lá oake ve makó kimiselekago, vake Izesú atikumú ali vatí itanigi Samalia mikasiuka apá makotoka vi anitemóza,

53 Samalia vegenaki Zelusale vegenaki kogoka hotopotó minamó nenazo, Izesú eza Zelusalega vitove loko likumú goselé kepelekago alími milamago,

54* izegipala zuhagutí Zemusiko Zoniko keza nene suni ánigikasike lāa liki li amesimó: Guivahanitemaka, leza lokuko okulumakutí lolímo lemeko imane ve kepele gesá itive loko nogelepe.

55 Liki likasigo, Izesú mino viligoake gahá kimimó.

56 Gahá kemeake haitó apatoka makó vamó.

*Izesuni ámegetanigi mini viliga vegená
(Mat 8:19-22)*

57 Gapoloka nivago, ve makolímo Izesuni lo amike vitanitoka vitanitoka nene neza gémegé gémegé oko minanogo uve.

58 Loko lokago, Izesú lāa loko lo amimó: Mikasi koló onoikú nene gahate itiaká niave, itó namatini numúni nemóza, okulumakutí lumu ve gihila neza akato numuníne itó gotóneló za nomigo vitagá noumó nenazo, makó vitíve loko nolape.

59 Loko loake, ve makó nene geza oko némegetozo. Loko lokago, eza lāa loko limó: Guivahanínemaka, geza gelekako nene, neza minoko améneho helekiko vinake gale zemikinake gémégetatove.

60 Loko lokago, Izesú lāa loko lo amimó: Hilinita vegená gale zikimiaká hoza nene kigika heleneiti vegená kezagí ámina hoza alitamó neve. Géisi nene voko Ómasimini gizapaló minoakalímini gakó lo utó oko lo kemezo.

61 * Loko lokago, makolímo lāa loko limó: Guivahanitemaka, geí gémégetanogo noumóza, voko není numukú nia vegenáma kemesosoka lok-inake gémégetatove.

62 Loko lokago, Izesú lāa loko lo amimó: Ve makolímohe makolímohe není hozagutí mino viligatímó nenémo Ómasimini gapogú hoza alitimoláa nomive, loko limó.

* **9:48:** Mat 10:40; Luk 10:16; Zon 13:20

* **9:54:** 2 Kug 1:9-16

* **9:61:** 1 Kug 19:20

10***Ve 72 monó hozaló vamó***

¹ Lá okago, Guivahanímo ve 72-a kelémo etó oake, gona moloko losi losi iki ale goí iki vitave loko alika ezáa vinogo noi apatoka numutó namató kimisilimó.

²* Lá noike aí vegenala zuha lilí inigi nia vegenakumú anoza gakó makó láa loko lo kimimó: Mikú nosánetá mukí omolokamóza, hoza aleáká vegená lagasó minokunize. Nenemú lekeza mini hoza amelahitoka likiko nene hozaló vegená makó kimiselekiko hozavagú viki minumuni alitaze.

³* Lekeza viro. Gilinahe, hela galagitana mina vegenalitini holúikú nene likigikagú geha ziki sipsip izagitana minatave loko lekelí nolikimisuluve.

⁴* Lekeza vinigi niki, moni gúeaká gó itó akiseaká gó itó likigisaló suú alemiki lekeza gapoló niviki miniki aliki amiki amuza miliki viro.

⁵ Numuni makokú itinigi niikima numuni amelagini mulutikú hulu oleketino liiki itilo.

⁶ Ámina numukú hulu ve makó noitimó nene, hulumú lina gakó nene aitoka gihila zitimóza, nenémini ve noamitimó nene hulu gakolímini gihiláa nene lekelitoka goha atiginá oko anogo ive.

⁷* Ve makolititoka hoza alita vegená nenete ámina vegutí nosánetá aliki niki minatamó nene lamaná itimó nenazo, numuni makokú itiikima ámina numukú mini-liki niviki meinavatini nosánetá zahí nagamí likimitamokó nene niki minalo. Lekeza haitó numukú itemiki numuni hamokukó minalo.

⁸ Apá makokú niviko, ámina apá amelage likilími milikoma lekeza nosánetá likimitamokó nene niki niminiki

⁹ kivisi vegená nene kilími zokiki láa liki li kimilo: Ómasímini gizapaló minoakalímini zámuza nene lokovogisaloka okave.

¹⁰ Itó apá makokú niviko, likilími lamaná amikoma, lekeza viki gapoló otiníki láa liki li kimilo:

¹¹* Lekelí apakutí mumusopa ligisaló gímizeneimó nene lekelikumú vahé moloko atilí noune. Lá nounimóza, gakó imane gili minalo: Ómasímo gizapa oleketatimó nenémini zámuza nene lokovogisaloka omo alitokago ánigi ahu likave, liki li kimilo.

¹²* Neza gakó lo likimitoze, gilio. Gamená napaló nene Soto apakú mina vegenalite golesa mogonáinimú goní koma itamóza, likilími lamaná amita vegenalite goní sipisi inigave.

Kigika ali viligama vegenalite miluma sipisi gilinigave

(Mat 11:20-24)

¹³ Agae, Kolazina amelagita, itó Petesaita amelagita, lekelitoka golivagi netá utó inogo ive. Alevolé suni lekelitoka loló umó nene golesa netá aliaká a vegená miniaká a apá Tulo apatoka itó Sitona apakú utó ilina, keza gozapá miluma giliiki kigika ali viligamó nenémini mogonáa li utó iki ginegane litaha ali akilihi ló lana nene kugupeló hiliki minaline.

¹⁴ Gamená napaló nene Tulo apakuki Sitona apakuki mina vegenalite goní itamóza, lekeza goní napa genavagi inigave.

¹⁵ Itó lekeza Kapanao amelagita, lugulizá okulumakú ititive liki ali otiaaká niahe. Nenéminoko nomive. Zunigú lekehelú inogo ive.

* **10:2:** Mat 9:37-38 * **10:3:** Mat 10:16 * **10:4:** Mat 10:7-14; Mak 6:8-11; Luk 9:3-5 * **10:7:** 1

Koli 9:14; 1 Tim 5:18 * **10:11:** Apo 13:51 * **10:12:** Mat 10:15; Apí 19:24-28; Mat 11:24

16 * Loko loake, goha miní ameko izegipala zuha láa loko nokimisilike limó: Ve makó keza lekegepagutí gulupe liki gilitamó nene není negepagutí gakó gilinogo ive. Itó ve makó keza kemegesa likimitamó nene, kemegesa nememó gilitimó neve, itó kemegesa nimitamó nenete nimisili ve kemegesa amemó gilitimó neve.

Ve 72 atiginá amó

17 Láa loko kimiselekago, viki miniake, goha ake mulúikú agila guluma igo kogoliza viziki láa liki lamó: Guivahanitemaka, geí gakotó nene holosi golesa nenete kezagi gili limiki golisi iáká niave.

18 Liki likago, Izesú láa loko lo kimike limó: Satá eza gó vegitana oko okulumakuti lemekago ánígokuve.

19 * Lekeza gililo. Neza zámuza lekemekugo lekeza gosihatató itó akohú oaká gosihakitana netató lisatamó itó lelí lova gala ve Satani zámuzalaló nilisikoma nenémo lekepeleminogo ive.

20 Lá onoimóza, holosite lekelí gakó gili aliaká niakumukó gilikó itemiko, lekeza Ómasímini mututoni minakumule loko lukugulizá nene okulumakú gizonoiomó nenemú lokogoliza viziki minalo.

Izesú agoliza vizimó (Mat 11:25-27; 13:16-17)

21 Loko loake áminasító Ómasímini Sikalahulímo agika alémo vávani noigo, mulunagú ló guluma noigo láa loko limó: Aménega geza okulumalímini mikásímini Guivahani géisigó nene noane. Sukulu lunike gele vevesokune liki liaká nia vegená keza gili gili guni ikatave loko monó imane ale halá geko molokanike sukulu lamake izegipa namunigitana iki mina vegenalitini kigikagú molokimiaká noanikumú gegepoka noluve. Aménegamaka, geza nene nenéminoko utó oloko vitive loko gelekako nene etoaká noive.

22 * Loko loake, miní ameko láa loko limó: Améneho netá mukí nene nigizakú molo asú okave. Itó ve makolite Ómasímini gipala noutímini mogona gelemave. Améneho ezagó geleneive. Itó ve makolite aménehini mogona gili vevesamave. Neza gipaka noumó itó nezáne lo utó oko lo kemekugo ánigi hehe litave loko gilito vegená niamóлезategó aménehini mogona gelenoune.

23 Loko loake, izegipala zuhaloka mino viligoake keikó Izesú láa loko lo kimimó: Ómasímo nónohá zelikimikago lekeza lokogómulatunú netá imane ánigi vevesikave.

24 Neza gakó lo likimotoze, gililo. Gozapá Ómasímini agepagutí gakó liaká a vegi kugulizaki ve napagi nenete oko moloko nou netá lekeza ánigiaká niamó nene ánigatune liki gelemóza, ánigamómá neve. Itó lekeza negepagutí giliaká nia gakó gilitune liki amóza, gelemamómá neve.

Samalia ve lamanalímini gakola

25 * Loko lokago, monó mogona apí-okimiaká ve makolímo oteake Izesuni amekú moloko láa loko loká otake limó: Monó gizapa velemaka, neza nana okinake alévolé nemetameni alitohe.

26 Loko li gakotó nene Izesú lo amike limó: Mosé nanave loko lo hukoleke-tave. Geza nene gakó nanave loko gatoko gelene.

* **10:16:** Mat 10:40; Mak 9:37; Luk 9:48; Zon 13:20 * **10:19:** Age 91:13 * **10:22:** Zon 3:35; 10:15

* **10:25:** Mat 22:35-40; Mak 12:28-34

27 * Loko lokago, eza láa loko limó: Geza gigika gemeni zámuzaka itó geleakaka mukí nene Guivahani geí Ómasiloka lehizetozo. Itó gezakamú geleká noanimómáminoko gigivekaginimú geleko gigika kemezo loko luhuva gizonimoáma neve.

28 * Loko lokago, Izesú láa loko lo amimó: Lo nogumu gakotó lo vevesoko lokane. Lani gakotó amegeesa molokogó loló itanimó nene alévolé oko minanogo ane.

29 Loko lokago, ámina ve nenémo ezáa mogonala hize lé inogo Izesuni loká otake láa loko limó: Nigivénege keza éage niave.

30 Loko lokago, Izesú láa loko lo amike limó: Ve makó eza Zelusalega ahuloake Zeliko numutoka nolimigo laskoli vete gapoló apiliaké lavolavo gola netá mataala mukí gumina iki aliki vikago, hilinogo gapoló ako minamó.

31 Lá oko akonoigo, Ómasi guguni gizoaká ve makó nene ámina gapoló novike ánígamó nene hilinogo akonoigo zová zeko avilegeko vimó.

32 Vokago, ámináminoko monó zugusaveú hozaló ve Livaini agapilamokutí makó nenémo áminaloka oake ánígamó nene lá oko akonoigo, ánígoake zová zeko avilegeko vimó.

33 Vokago, Samalia vegi Zuta vegi apiziki minamamóma nemóza, Samalia ve makolímo ámina gapoló novike apíli ahula vema akonoitó oko ánígoake, muluna gitihiná okago,

34 noító vike apelego golani imómaló nene hilinagi vain nagamiki holomíake asapú omiake, alémo oteake toki izavámini amegeusaló ahulomiake vike veno vegenalitini numukú itesike nasahilí otamó.

35 Akikasike gó lokago ámina ve vinogo noikeye veno vegenalitini numuni gizapa ve nene kina losítá namike limó: Geza imane ve gizapa lamaná otozo. Lá noako moni gumumó nene asú okikoma neza goha inake gimitove, loko limó.

36 Nenémú geza nanave loko nogelene. Ve losive makole akutí nene laskoli vete apilikago gapoló ako mina vemámini agivelaho hí ve minamó neve.

37 Loko lokago, monó mogona apí-okimiaká vemámo láa loko limó: Miluma gelemiake alémo lamaná i veve. Loko lokago, Izesú nene géisi voko áminámini ozo, loko lotamó.

Malatako Maliako Izesuni alesa mili amesimó

38 * Lomiaké, gapoló nivake apá makokú anitemó. Nene apakú vená makó minamó agulizá Malatá eza Izesuni alémo numunagú molokago,

39 mohó agunala agulizá Maliá eza nene ake Guivahanímíni agisauka minake aí gakó geleko minamó.

40 Lá noigo, Malatá eza nosánetá ale vavá i hozamú muluna itimó. Lá oake, Malatá vike Izesuni láa loko lo amimó: Guivahanímaká, mohó nugunáne Maliá nene ahulonimikago nezánegó nosánetá ale vavá noumó ánígamape. Lo amekako, oko hozaló nelémo vatí ítive.

41 Loko lokago, Guivahanímó lo amike láa loko limó: Malata, Malata, geza gagata gululusi nogelenike muluka itekave.

42 Geza netá hámakokumú gelezo. Maliá nene netá lamanaláa ale gizáká ike nenitokatí zámuza alekave. Nenémo aitoka gihila zekiko makolímo agizakutí ipá aminogo ive, loko limó.

11

*Izesú Ómasiloka loakakumú lainim-oketa gakó
(Mat 6:9-15; 7:7-11)*

1 Gamena makó zupa Izesú nene apá makotoka Ómasiloka loko lo asú okago, izegipala zuhagutí makolímo láa loko lo amimó: Guivahanitemaka, Zóni nene izegipala zuha Ómasiloka litave loko lainim-oketoaká i netá aleko lainim-oletozo.

2 Loko lokago, Izesú láa loko lo kimimó: Ómasiloka niliki nene láa liki lilo: Ametega, geí gugulizá etó oko minatize. Numutó namató geí gizapaló minoakalímini zámuza utó o asú ino.

3 Geza gamena gamena nosate lemezo.

4 Leza ligivetegini lihimá nekisáini ale ahulokimiaká nounimó nenémini oko lihimate ale ahuloletozo. Geza gimilegú moloaká netakú lelémo molamo.

5 Loko loake, láa loko lo kimimó: Lekelikutí ve makolímo nene holugú akovevé zogovámini numutoka voko sele loko zogone geza peleti losive makole nemezo.

6 Zogone makó nene gapoló ake ake není numukú itínasa okago, nosánetá koma amitomó nomigo loká nouve.

7 Loko lokiko, zogova nenémo numukutí nene leza gahe gekunike vená izegipánegi akonouhakú goseleka lamo. Neza otekinake netá makó gememinogo uve.

8 Loko litimó nene, neza láa loko lo nolukumuve. Eza není zogone minokagove loko oteoko netá makó amemitimó nene, maga ve nenémo sele lova lova okiko, eza oteoko vitagá noi netáma aminogo ive.

9-10 Nenemú láa loko lo nolukumuve. Ómasiloka voká liaká niamó nenete netá mota aliaká niave. Vitágá iaká niamó nenete netá gihila ali utó iaká niave. Itó gaheló hoko-hoko likago gahe koló okimiaká noive. Lá onoinazo, lekeza Ómasiloka voká liikima ámina netá alinigave. Vitágá iikima netá gihila ali utó inigave. Gaheló hoko-hoko nilikoma gahe koló oleketanogo ive.

11 Lekelikutí ve makolímini gipalámo lagahamú voká lokiko nene amelaho gosihá amitihe.

12 Itó okoloho mulamú voká lokiko nene akohú gosihakahá amitihe. Lá aminogo ive.

13 Nenemú lekeza vegená golesa neneta izegipatini gizapa lamaná ikitake netá lamaná ali kegepa iaká nianazo, okulumakú ametipo nene voká lita vegená nene aleko iteko Sikalahula lehizeleketanogo ive, loko limó.

*Izesuko Pelezepuloko
(Mat 12:22-30; Mak 3:20-27)*

14 Gamena makó zupa nene ve makolímini agepa ale lakolí okago mina holisi nene Izesú apeleko amiselekago, vokago, agepa apizi vema nene agepa á oake gakó akó limó. Lá okago, vegená keza sigaga lamóza,

15 * lugáate láa liki lamó: Holositini agulizaki ve Pelezepuló loko noi vémo alémo vatí noigo holosi kepeleko kimiseleaká noive.

16 * Liki likago, lugáate amekú milake loká itake okulumakutí alévolé suni makó ale utó okako geí mogonaka ánígatunize.

17 Liki likago, Izesú kigikámini gakó hanuva geleake láa loko lo kimimó: Mikasi makokú vegená hizi hoú liiki lova gopa hizitamó nene keí mikasi

* **11:15:** Mat 9:34; 10:25 * **11:16:** Mat 12:38; 16:1

nene gámekó minatimóma neve, itó numuni makokú vegená keza hizi hoú liiki eza akohú apiliko eza akohú apiliko itamó nene ámina numuni ahuliiki hoú latamó iki vinigave.

¹⁸ Lekeza nenikumú nene Pelezepuloni zámuzatunú holosi kepeleko kimiseleká noive liki liaká niamóza, Satá nene ezáa izegipala zuhagi hizi hoú latamó nene aí gizapaló minatamoláa nene nana iki alévolé iki minatave.

¹⁹ Nenikumú nene Pelezepuloni zámuzatunú holosi golesa kepeleko kimiseleká noive liki liaká niave. Láa likima lekelitini izegipatinu zuhate nene ámina iki Satani zámuzatunú holosi golesa kipilikí kimisiliaká niave liki litahe. Óe, láa liki lamitamó nenazo, kéisi soza gakotinímini mogonáa hanuva ali utó itamó neve.

²⁰ Lá onoimóza, neza Ómasímini zámuzatunú holosi kepeleko kimiseleká nounazo, Ómasímini gasovaló minoakalímini zámuza nenémo lokovogisaloka mota omo ávatiha okamó nenémini mogona mota utó okave.

²¹ Satá eza gasovagi ve amuza ve minooko gimisi magé aleoko numuna gizapa itimó nene, netá matala mukí nene avasavagi minanogo ive.

²² Lá itimóza, neza alévolé ve noutímina nene okoko ámina ve lova ale ameko aí aviligitomó nene, gimisi magé gele alévolé i netáma ipá oko vegená makó gona moloko kimitove.

²³ * Itó makó keza nenikutí vegená minamitamó nene, není gala vegená ninigave. Makó keza nilími vatí iki vegená kilími nenitoka amitamó nenete kilími hutilí iaká niamó gelekave.

Holosi golesa atiginá iti gakó

(Mat 12:43-45)

²⁴ Holosi makolímo ve makolímini agikagutí iteoko nene avasú vizeko minati numunímú vitagá inogo osagava apató voko mohona itive. Vitagá oloko novoko neza numúne ahulokuke umóma nenazo lokoko mohona oko vitagá itimóza, nomiko neza goha áminagú atiginá oko vinake minatove loko agata geleoko

²⁵ atiginá oko voko ánígatimó nene ámina numuni agika nene lolopa gitiki ali guni ikiko itó gizapa ve makó noamiko ánígatimó nene,

²⁶ eza goha ahulooke voko holosi agivelagini 7-ia kugupelotí sisipa anuva ovimoláa kelémoko oko nene áminagú miniki aliki inigave. Lá ikiko ámina ve góí oko golesa oko minamóza, íi alika nene golesa o lamaná oko golesa inogo ive. Ve golesa áimane lekelitoka utó itikumú noluze, ehe tináneve.

Ómasímo lamaná nónohá zeketonoí vegená

²⁷ Loko noligo, ve venalitini holúkutí vená makó minamó nenémo Izesuni sele like láa loko lo amike limó: Vená makó nenémo geí getoake aminí gemeneimó nene Ómasímo lusa getonoimóma neve.

²⁸ Loko lokago, Izesú láa loko limó: Láa loko lanimóza, Ómasímini gakógiliki Ómasímo li gakotó ámegetiaká nia vegená nene Ómasímo nónohá zeketonoimóma neve.

Vegená golesate alévolé suni ánígatune liki lamó

(Mat 12:38-42)

* **11:23:** Mak 9:40

29* Loko loake, vegená sii sii liki alegesá niago, Izesú miní ameko láo loko lo kimimó: Oko moloko oaká nou netá ániagiáká nia vegená nene vegená golesa minikave. Keza alévolé suni makó ánígatune liki liaká niamóza, haitó suni makó ale utó ugo ánígaminigave. Zonatoka emane utó i sunigitana makó utó iko nenegó áníganigave.

30* Zoná nene lagaha sipisimámini agikagú lemeko gamena losive makole minake heleaká gapogutí goha oteake Ninive vetini kovogisaló ámina sunimú lo utó o kimimómámini oko okulumakutí lumu ve gihila neza imaneló vegenalitini kovogisaló není anosa ale utó oketanogo uve.

31* Ómasímo gona mololeketati gamena nene Sepá mikasiuka agulizaki vená minamó nenémo oteoko imane gamenaló nia vegenalitini mogonáini lotuva legekiko lihima napa alitamó oko nene neve. Ámina vená nenémo nene agulizaki ve napa Salomóma mukí netá mogona gele vevesoko gillímómámini gihiláa gilinogo mikasi hotokatí gapo háná háná amó. Itó nénisi ató imane Salomoní koma avilegeko noumóza lekeza není gakó gilisá amave.

32* Ómasímo gona mololeketati gamena nene Ninive apá amelage otiki oko moloko oaká nou netá ániagiáká nia vegenalitini mogonáini lotuva liginogo ive. Lotuva legekiko lihima alitatokó oko neve. Nene hanuvamú nomive. Zoná nene monó lo nokimigo Ninive apá amelage kigika ali viligamó neve. Itó nénisi ató imane Zonakítana oko minonamuve. Zonani avilegenoumóza, lekeza gakóně gili ahuliake likigika ali viligamamó neve.

Lugupémini ló liví (Mat 5:15; 6:22-23)

33* Hí vémo ló liví legeoko holoma sepekú molatimó neve, itó somotunú gahumá itimó neve. Lá oko nomive. Liví nene legeake numukú itita vegená hize hanatoketative loko holomaló molosá neve.

34 Itó gogómula nene gugupémini ló liví neve. Gogómula nenémo mumuzó oakalímini gapogú gelémo molamitimó nene, Ómasímini lapaná nenémo gigikagú hize hanato asú itimóza, gogómula nenémo gelémo golesa itimó nene, gugupeló itó gigikagú límugusí ze minanogo ive.

35 Nenémú gigikagú Ómasímini liví lonoinmó nenémo lihokiko límugusigú minokatanize, gizapa lamaná ozo.

36 Gigika makotoka límugusi zemoko hanato asú onoiko, ló livilímo hize hanatogatimó nenéminoko gigika hanatokogó minanogo ive, loko limó.

Izesú Palisaio monó vemuki monó mogona apí-ikimiaká vemuki alévolé oko lo hukonoimole

(Mat 23:1-36; Mak 12:38-40)

37 Izesú láo loko lo asú noigo, Palisaio monó ve makolímo nosánetakumú alesa molo amimó. Lá okago, Izesú nene numunagú iteake nosánetá makó nikí minasimó.

38 Ámina Palisaio monó ve nenémo Izesuni ánígamó nene, Zuta vetini suni aleko agizani nagamí zemike nosánetá hanuva nonago ánígoake, etami suni nalive loko geleake, ininá oake agata gululusi gilimó.

39 Lá noigo Guivahanímo láo loko lo amimó: Gelezo. Palisaio monó ve lekeza lape somogitana iki niave. Lekeza nagamí goni itó lape hetolaloka

* **11:29:** Mat 16:4; Mak 8:12 * **11:30:** Zna 3:4 * **11:31:** 1 Kug 10:1-10; 2 Iki 9:1-12 * **11:32:**
Zna 3:5 * **11:33:** Mak 4:21; Luk 8:16

nagamí ziaká niamóza, likigikagú guminaló suni itó haitopaitó netá golesa nenémo vaí onoive.

40 Lekeza ve negi ve lamaná niave. Ómasímo netá hetoláa itó agikáa hamó lelegító loló okamóma neve. Nene gelemahe.

41 Likigikagutí vegená nasahilí ikitatamó nene, likigika viheletokogó minanogo ive.

42* Lekeza Palisaio monó ve ehe tináneve. Lekelí mikutí mapánuha ekipá anuva lamanaki netá itó netá makó haitopaitolímimi 10 10 nekutí nene hamopamó aliake Ómasi amiaká niamóza, lekeza nene hehe loko hamó lelegító vegená gona moloakalímimi itó likigika Ómasiloka moloakalímimi nene ahulikave. Lekelí netá matá 10 10 nekutí Ómasi amiakalímimi nene ahulakaláa nomimóza, imane netá napa nenegi hanuva loló oakalímimi neve.

43 Lekeza Palisaio monó ve ehe tináneve. Lekeza monó numukú numukú nene vegenalitini kovogisaló minoaká siató minutune liki giliaká niave, itó lekeza maketiloka mukí vegená nenete geké lilitatave liki giliaká niave.

44 Lekeza ehe. Lekeza gonosi milimili halá geneimó nenéminiki niave. Áminaló vegenalite mihina niake likigikagú lili okave liki gilisá amave.

45 Loko Izesú lokago, monó mogona apí-okimiaká ve napa makolímo lo amike monó gizapa velemaka, geza láa loko nolanike lelikumuki gahá nolape.

46 Loko lokago, Izesú láa loko limó: Oo, lekeza monó mogona apí-ikimiaká ve, lekeza ehe tináneve. Lekezatini li mila gakó nenémo genavagi loló okago vetini kigínagú gihikimiaká niago, keza silipa iki gihiaaká niamóza, ámina genavagi netá nene lekezatini likigizani hisúinitunú kilími vatí itigí iki ma alisá amave.

47 Lekeza ehe. Lekeza avotike Ómasímini agepagutí gakó liaká ve kipili hilina vetini gonosi milimili numuni lamaná lilí iake gonanalisi ikimiaká niave.

48 Lá niago, lekeza avotike iki miliki iaká amoláa hizi lé iaká niamómámini mogona utó okave. Avotike keza Ómasímini agepagutí gakó liaká ve kipili hilíkago, lekeza keikitana niake gonosi milimili numúini lamaná lilí ikimiaká niave.

49 Nenemú Ómasi eza gele vevesoaká noi ve nenémo láa loko lonoimóma neve: Negepagutí gakó liaká vegi aposologi kimiselekugo, viki niiko, lugáa gopoguni milikimiiki lugáa kipili hilinigave.

50 Loko lonoimó nenazo, mikasi gena oake mino-loko iteko novigo, Ómasímini agepagutí gakó liaká ve níkepeleego golani lekemó nenémini lihimava nene imane gamenaló nia vegenalitini kumupiló ite asú inogo ive.

51* Neza lamaná lo likimitoze, gililo. Atani gipala Epoloni apele nohiligo golani leki gamenalotí Ómasímini agepagutí gakó liaká a vegená lugáa kipili hililihi nivago golani lekikago, Zakaliá eza Ómasi guguni gizi amiaká itagi etó onoi numunigi holutó noigo napeleego golani lekimó, keí golanímini lihimavaláa nene imane gamenaló nia vegenalitini kumupiló itinogo ive.

52 Lekeza monó mogona apí-ikimiaká ve, ehe. Lekeza gakó gele vevesoaká gahémini kiila aliki vikave. Lekezatini áminagú itemake, vegená makó itinigi niago gapo hizi lí ikimiaká niave.

53 Loko loake, numukutíma nolimigo, monó mogona apí-ikimiaká vegi Palisaio monó vegi keza gakotunú Izesuni lova ali aminigi gakó loká loká itamó.

54 Izesú gakó lo gopa okiko goní otatune liki aí agepaló gizapa iki minamó.

12

Izesú soza sunimú kagata alímó (Mat 10:26-27)

1* Lá niago, vegená makó iki kugupeló kugupeló iki sii sii liki alegesá ikago, Izesú nene izegipala zuhaloka láá loko lo kemeneike limó: Palisaio monó ve nenete sozaló vetini suni aliki iki miliki iaká amó nene ekesá netá neve. Lekeza nenemú ehe, gizapa ilo.

2* Hitonoiti netá nene utó o asú ititokó neve. Itó asuguná iki lilí ina netá nene utó okiko vegená mukilite gilinigave.

3 Lá niiki holugú límugusigú gakó legesó iki linamó nene hanatoka likiko mukí vegenalite gili asú inigave, itó lekeza numuni agikagu gakó musika linamó nene numuni hetotí gakó napagutí li utó niko gilinigave.

Lehelele viziti ve lelepizimó (Mat 10:28-31)

4 Nigivénegita, lo likimitoze, gililo. Vegená makolite lukugupegó apili hilinigave. Alika netá makó lilí ilikitatamó nomitimó nenazo, lá ita vegenakumú lekelegesá legemino.

5 Lá onoimóza, lekehelele viziti ve makó lekelepizitove. Ómasí eza lukugupe apele helekoko ló apakú lekehelú o ahuloaká zámuzagi ve noive. Neza lamaná lo nolukumuze, gililo, aikumú lekelegesá ligino.

6 Somohá nene ha netá nianazo, golohá moni lositatunú nama somohá ligizani lugaloka asú igo meina hizemosaláa neve. Lá onoimóza, Ómasí nene nama somohá makokumú ma agatí molosá amive.

7 Lekelí gototini zopovatini gatoakaláa nene Ómasímo gele asú oko geleneive. Itó lekeza nama somohá niamave. Lekelisi nene vegená nianazo, itó Ómasímo gizapa olikimiaká noinazo, nenemú netá makokumú ma lekehelele vizemino.

Izesuni izegipala zuha noune loko lo utó oaká itó zeko hitoaká (Mat 10:32-33; 12:32; 10:19-20)

8 Neza lo likimitoze, gililo. Vegenalitini kovogisaló ve makó keza není nugulizá li utó iki nilími napa itamó nene, okulumakutí lumu ve gihila neza Ómasímini agelogini kovogisaló ámina oko kelémo napa oko linogo uve.

9 Ve makó keza vetini kovogisaló nenikumú zíví hitivi itamó nene, neza ámináminoko Ómasímini agelogini kovogisaló keikumú zevo hitovo itomóma neve.*

10* Itó makó keza okulumakutí lumu ve gihila nenikumú alivi letivi itamó nene, Ómasímo ámina lihimavala ahuloakaláa nene nemóza, Ómasímini Sikalahukumú alevo letovo oakaláa nene, Ómasímo nenémini lihimavala ahuloakaláa nomive.

* **12:1:** Mat 16:6; Mak 8:15

* **12:2:** Mak 4:22; Luk 8:17

* **12:10:** Mat 12:32; Mak 3:29

11 * Itó monó numúikupe monó gizapa vetini itó kugulizaki vetini kovogisalope goní nilikitikoma, konotó aleko nana gakó litupe itó nanave loko litupe liki lakagata gliko gena amino.

12 Ámina gamenalóísí lekeza lita gakó nene Sikalahulímo lo lekeme lekeme noiko li kimitamó nenazo, lekeza mulutini itemino.

Negi henonagi vemú anoza gakó

13 Loko lokago, alegesá iki mina vegenakutí ve makolímo Izesuni lo amike láa loko limó: Monó gizapa velemaka, geza uvónnehini lo amekako, ameteho nene helisa henoni mololetamó nene gona moloko lugáa nimitive.

14 Loko lokago, Izesú láa loko lo amimó: Vémage, helisa henonimú gona mololetatane loko itó gonikumú lo hukoleketatane loko éaho nelémo etó okago nolane.

15 Loko loake, vegená láa loko lo kimimó: Lugupémini henoni vaí oko minatimó nenémo ligikámini henoni ale utó amitimó nenazo, ánigo lukumu heleaká netakumú gizapa ilo.

16 Loko loake, anoza gakó láa loko lo kimimó: Moni henoni vaí oko minima ve makolímini mikasi nenémo nosánetá vaí oko ale utó imó.

17 Ale utó okago, mulunagú nene ale moloaká numukú nene nosánetá vaí okanazo, nosánetá lugáa nene nana itove.

18 Loko geleake, láa loko gilimó: Nosánetá ale moloaká numunima lukokinake napa napa gitove. Lá okinake nosánetánegi netá matánegi nene ámina numukú ale molatove.

19 Ale molokinake, nezánemú láa loko litove: Nezáne netá matá vaí oko minokamó nenazo, asú amiko melekeni mukí oko vinogo ive. Nenemú navasú vizinake nosánetá noko zahí nagamí noko nogoliza vizeko minanogo uve.

20 Loko gelekago, Ómasímo láa loko lo amimó: Negi ve neneka, itína holugú geí sikalahuka alekugo hilinogo ane. Lá okiko nosánetá henokanoka ale molanimó nene hutíli inogo ive.

21 Loko lo amitimó nenazo, netá matá vaí oko minati ve makó eza Ómasímimi agómulaló gohogó ve minatimó nene, ámina suni aitoka utó inogo ive.

Mulute iteaká gakó

(Mat 6:25-34)

22 Loko loake, izegipala zuha láa loko lo kimimó: Lá onoigo láa loko lo nolukumuve. Lekeza miniki aliki itakumú nene nosánetá hikutí noko minatupe itó ginegane nene hikutí ale akalatupe liki mulutini itemino.

23 Nosánetá nene netá gihila nomive. Lekelisi miniki aliki itamó nenémo netá gihila neve. Itó lukugupeló ginegane nenémo netá gihila nomive. Lukugupe nenémo netá gihila neve.

24 Namamú lakagata gilikí gili vevesalo. Keza netá matá zuhá isá amave, itó minumuni o molokago nosánetá nene numúikú ali nupa iki nisá amave, itó nosánetá ali milata numuni gisá amamóza, Ómasímogó nosánetá gopa ale utó o kemeaká noive. Itó lekeza nama minamave. Vegená nianazo, itó nama mukí nene limiki niago lekeza itiki niamó nenazo, Ómasímo netá matá hanuva ale utó mololetatamó nena.

25 Lekelikutí makó éaho muluna noitiko aleko itító nene ezáa agata geleko kilisimasi makó miní ameko molomo iteko minative. Ma nomive.

* **12:11:** Mat 10:19-20; Mak 13:11; Luk 21:14-15

26 Itó nene netá koma nemóza, lekeza ámina netá alisá amamó nenazo, netá makokumú nanamú mulutin íteaká noive.

27 * Lekeza palauá guvava oko minoaká noimó nenémini mogona gili vevesamahe. Palauá kéisi nene hoza makó alisá amave, itó ginegane lamanatamanakó ali luhatakumú gó isá amave. Lá onoimóza, neza lo likimitoze, gililo. Gozapá agulizaki ve napa Salomó nene gonanalivagi netá ale luhoaká imóza, palauá nenete Salomoni agupeló netá aviligikave.

28 Palauá nene itínasa utó oake gó lokago gululupasokago hukiki ló giziaká niave. Itó Ómasímo lokago ámina palauá nenémo gonanalivagi netá ale koloaká noinazo, nenemú lekeza komasí gili alévolé inamó neneta ginegane nene Ómasímo hanuva ale utó oleketanogo ive.

29 Lekeza lakagata gululusi nigiliki leza nana netá natunimó neve, itó nana zahí nagamí natunimó neve liki mulutini itemilo.

30 Keza numutó namató monóini nomi vegená nenete ámina netakumú kagata gululusi gilikí vitág iaká niave. Lá niamóza, ametipo nene ámina netá lekeliteka minamitímó nene minamitave loko geleneive.

31 Lekeza ámina netakumukopa Ómasímo gizapa vetini loló iti gapogú likigika lakagata goí iki miliko vo minino. Lá ikiko nene, lukugupémini netaki nene hagitana lehizeleketanogo ive.

Okulumakú henoni ale nupa oaká gakó (Mat 6:19-21)

32 Lekeza vegená luguhá nupa inamó neneta lekehelele vizemino. Ametipo gizapa omiaká noi netá matá mukí lehizeleketanogo agoliza vizeko nogilive.

33 Nenemú nene henokanotini salimiiki áminalotí meinava moni aliiki gohogó vegená kimilo. Lá iki moni gúeaká gó haitolímini hulupa lamítímini alilo. Lekeza lá iki okulumakuka asú amiti henoni ali nupa itamó nene, neneló gumináló vete mihina aminigave, itó gúnakonímo hutamitímó neve.

34 Henokanotini lamaná neti apatoka nene, likigika neinogo ive.

Gelekelé izegipate gizapa iki minata gakó

35 * Lekeza lavolavo gotini ali likiiki gohatitó leti ziiki lamu ló ligi miliiki ali nené iki minalo.

36 * Ve makó keza gizapa venini nene vená alimi ame gamenaló amisi gitatotí numutoka atiginá oko atikumú ageva iki minake, eza oko gaheló okohá zekiko litá oko gahe segetatune liki gizapa iki minamó. Lekeza ámináminiki gizapa iki minalo.

37 Gizapa venini nenémo oko gelekelé izegipala nene akamiki gizapa iki minikiko ánígatímó nene kogoliza viziki minanigave. Neza lamaná lo likimitoze, gililo. Gizapa venini nenémo okoko hoza aleaká lavolavo likeoko nosánetá iki miniki nalo loko lo kemeoko, ezáa oko nosánetá vatá oketoko gona moloko kiminogo ive.

38 Eza nene holugú akovevé ahe itó gó lomolomohe oko ánígatímó nene, gelekelé izegipala gizapa iki nikó ánígatímó nené, keza kogoliza viziki minanigave.

39 * Itó lekeza imanemú gililo. Numuni amelaho nene guminaló ve ati gamenamú gililina, guminaló vemule loko gizapa onoitimó nenazo, guminaló ve nene oko numuni zeko epetamitimó neve.

40 Ámináminoko okulumakutí lumu ve gihila neza negeva iki minamita zupa anogo unazo, lekezagi ali nené iki minalo.

*Amegesa moloko Ómasi gelekelé otatuni gakó
(Mat 24:45-51)*

41 Loko lokago, Pitá láá loko limó: Guivahanitemaka,anoza gakó lo nolemenimó nene lelikumukó nolape itó ve makokumuki nolane.

42 Loko lokago, Guivahanímo láá loko limó: Hozaló ve makó nene gele vevesonoko gele minatimó itó hozaváa nene amegesa moloko minati ve nene gizapa vevámo aí numukú netá matató gizapa oko minoko hozaló ve makó lugáa gizapa oketative loko lomikiko nosánetá nata gamenaló nene gona moloko kimiti vémini mogonamú lo likimitove.

43 Gizapa veva nene okoko ámina hozaló ve nene goí oko lotamómámini oko hoza naliko ánitigmatimó nene, ámina hozaló vemú giligo nene lamaná itimó neve.

44 Lá onoinazo, neza lamaná lo nolukumuze, gililo. Gizapa vevámo lá oko gizapa lamaná i vema nene mukí netató gizapa ve loló otanogo ive.

45 Lá itimóza, ámina hozaló ve nenémo není gizapa vema nene gamena hána minokaze, litá oko aminogo ive loko mulunagú gelekoko, hozaló ve vená makó lugáa kepeleká itó nosánetá nene hanuva noko minoká itó zahí nagamí noko itó ekesá nagamí noko negi nagi hizeko minoká itimó nene,

46 ámina hozaló vémini gizapa veva nene okoko ámina hozaló ve nene gizapa vevamú ageva oko minamiti gamena eza gatizá minati gamena okoko ámina hozaló ve nene agupe apelevo hukovo ooko amisele ahulokiko, hozamú mulúükú gili alévolé inamita vegéná niakú voko minanogo ive.

47 Hozaló ve makolímo nene gizapa vevámini agepagutí gakó gelekoko netá ale vavá oko minamoko gizapa vemámo li gakotó amegesa molamitimó nene, gizapa veva nenémo vauva aleko napilikó goní hoza napa alitimóza,

48 hozaló ve makolímo gizapa vevámini agepagutí gakó gelemoko nogosani nati suni alitimó nene, gizapa veva nenémo hana okogó apilinogo ive. Ómasilokatí helisa henoni vaí iki alinita vegéná nene Ómasímo ali atiginiki nimitave loko goha lokiko aminigave. Itó Ómasímo ve makó nene netá vaí oko kemeneitimó nene, ali atiginiki nimitave loko lokiko goha aminigave. Itó amemitamó nene, nana oketative.

*Izesuni monokumú hize hoú latuni gakó
(Mat 10:34-36)*

49 Neza mikasiuka ló gizoleketatove loko lemekumóma neve. Itó mukí vegenalitini golesa netáini ló gizatove loko itína lalina, mulúnegú lamaná gululine.

50 * Miluma netá gihinitanigave. Velesá gihiniti asú inamiko mulúne gitihiná iko minoloko novugo alika gihinitanigave.

51 Nenikumú nene imane mikasiuka nonagá ale utó itane loko lemekane liki nigelehe. Óe, lo likimitoze, gililo. Není monokumú hize hoú loaká netá ale utó inogo lumumóma neve.

52 Itína gamenalotí veletó nene numuni makokú vegená ligizani lugaloka asú igo nitamó nene, není monokumú hizi hoú liiki, ve losive makole nenete ve losimú nene gala ve lili' ikitanigave, itó ve losi nenetosa ve losive makolemú gala ve lili' ikitanigasive.

53* Lá iiki, lá iki hizi hoú lanigave. Amelahiko gipalago mini luga luga iki hoú lanigasive, itó izolahiko moholago mini luga luga iki hoú lanigasive, itó anohúvolahiko avolahiko mini luga luga iki hoú lanigasive.

*Itína gamenámini mogona gele vevesoaká gakó
(Mat 16:2-3)*

54 Loko Izesú loake, alegesá a vegená láa loko lo kimimó; Lekeza límusi makó ezeagalokatí noitiko ánigiake, golini mota zinogo ive liki liaká niave. Láa liki linató nene gihila zeaká noive.

55 Itó okulumá nene anupakó utó noiko, ánigiake, hogái napa lanogo ive liki liaká niató nene gihila zeaká noive.

56 Lekeza sozaló vegenáise, mikasímini mogona gona miliká itó okulumálímini mogona gona miliká iaká niámóza, itínasa gamena oko moloko noumómámini mogona nanamú gili vevesisá amave.

*Goní ogetati ve amekú molozo
(Mat 5:25-26)*

57 Itó lekezatini nene mogona makó hee lo noitimoláa nanamú gona milisá amave.

58 Lá niake, ve makolímo goní ogetanogo goní numutoka gelémoko novoko goní napa ale heleaká veló gelémoko noviko, gapoloka makó niviki mulunagú hulu itive loko netá makó amitanize. Lá amoko áminagi aleloko gopa hanuva goní ale heleaká ve noitoka anitanimó nene, goní napa ale heleaká ve nenémo pilisi vetini kigizakú gelémo molokiko nagá numukú ahuligimikataze.

59 Neza lamaná lo nogumuve. Zunigú nagá numuni napagú minokoko lihimakámini meinaváa koma napa apaso asú amitanimó nene, áminagú ahulogimikiko mino-loko voko minanogo ane, loko lo kimimó.

13

Tolova ikatave liki likigika ali viligalo

1 Ámina gamenaló nelélo mina vegená lugáate Galilaia vegená makolitini gakoláa nene Izesuni láa liki li amemó: Keza Ómasímini guguni gizi namego, Pilató nene kepele nahulake Ómasímini guguni gizi ame netalímini golanigi keí golanigi ale gopánapa imó.

2 Liki li amikago, eza konotó aleko láa loko lo kimike limó: Galilaia vegenakutí lá iki hele vegenalitini lihimaváini napa napa nego lá iki kemeni vami gapo vikave liki nigelehe.

3 Lá oko nomive loko lo nolukumuve. Lekelisi ámináminiki likigika ali viligamitamó nene, lekezagí lá ikigó tolova inigave.

4 Itó Siloama apatoka numuni napa makó nene lemeko akake vegená 18 kepele hilimó nene, Zelusalega mina vegenakutí lá iki hele vegenalitini lihimaváini napa minamole liki nigelehe.

5 Lá oko nomive loko lo nolukumuve. Lekelisi ámináminiki likigika ali viligamitamó nene, lekezagí lá ikigó tolova inigave.

Zuta vegeNALITE kigika ale viligamosá nenémini anoza gakó

⁶ Loko loake, Ómasímo Zuta vegeNakumú goselé apilikumú anoza gakó makó láa loko limó: Ve makolímo nene gohuna za makó zuhá oake, minake, alika ake gihilamú vitagá imó. Oko ánígamó nene gihiláa nomigo,

⁷ mikú hozaló véa láa loko lo amimó: Ánígozo, melekeni losive makole oko novigo imane gohuna zámini gihiláa liginogo umóza, gihiláa nomive. Mikasi nogozáa hanuvamú ale asú okatize, apele ahulozo.

⁸ Loko lokago, mikú hozaló vemámo láa loko lo amike limó: Golohá venemaka, itína meleketó mogonauka hoza aleko mikasi ale viligokinake, pulumaká izatini ase makó nene molatove.

⁹ Lá okugo, alika kilisimasiló nene gihila zitimó nene, lamaná itive. Gihila zemikoma, apelezo loko lokako, apele ahulatove, loko live loko Izesú limó.

Holisigú helisala zová zi vená alémo zokamó

¹⁰ Holisi makokú Izesú nene monó numukú iteake monó gakó lainimoketamó.

¹¹ Lá noigo, vená makó minamó nene holosi makó agikagú noigo melekeni 18-ia oko novigo netá napa gizaleko minoaká imó. Lá noike, helisagi zová zekago, hee loko ote minamitimó imó.

¹² Lá noigo, Izesú nene ánigoake, gakó napagutí láa loko lo amimó: Vená geza givisi netá apasogimikuve.

¹³ Loko nolike venámámini gotolaló agizanitunú nónohá zetago áminasító litá oko ámina vená nenémo ote vevesoake Ómasi agepoka limó.

¹⁴ * Lá noigo, monó numuni gizapa ve napámó holisigú Izesú alémo zokakumú mulunagú golesa geleake, áminaló mina vegeNá láa loko lo kimimó: Hoza aleaká gamena nene 6-así nenazo, livisi vegeNá lelémo zokative liki nigliKima nene holisi gamenagú amiki hoza gamenagukó alo.

¹⁵ Loko lokago, Guivahanímó láa loko lo amimó: Lekeza sozaló ve genezatini losigi minamó neneta, holisigú nene pulumaká izatini numukú viíki nagamí natave liki tokí iza pulumaká izatini nene hoza aliki vínasiki kilímiki viáká niamó neve.

¹⁶ Lá onoinazo, Zuta venáma imane nene Satá alémo golesa okago, noigo, melekeni 18-ia oko vimó nene avisi netalímini mogonáa nene holisi game nagú apasotatomó etamihe.

¹⁷ Loko noligo, gala veva nenetini kovoza napa hilimó. Lá noigo, ve vená mukí keza golivagi netá lamanálímini loló ikumú nene kogoliza vizeke geké lamó.

Masteti zuha netakumú anoza gakó

(Mat 13:31-32; Mak 4:30-32)

¹⁸ Lá niago, Izesú láa loko lo kimimó: Ómasímini avogisaló vi hilata vegeNá nene nanámímini niave. Nanetalímini amupiló ale moloko litove.

¹⁹ Masteti gihila nenéminiki niave. Ve makolímo ámina gihila hamó alekoko minagú zuhá imó nene goloko iteake zagitana okago, nama nenete ake izanaló numuni gemóma neve.

Peleti lulu vizeaká netakumú anoza gakó

(Mat 13:33)

* ^{13:14:} Gá 20:9-10; Gapo 5:13-14

20 Loko loake, goha láa loko limó: Ómasímini lapanató vo holoakaláa nene nanetalímíni amupiló ale moloko litove.

21 Peleti lulu vizeaká netá nenéminoko neve. Vená makolímo nene peleti lulu vizeaká netá nene talam losigú polisigi ale gopa okago, hutilí okago, peleti nene lulu vize napa imó neve loko Izesú limó.

Gateni komagú iteaká gakó

(Mat 7:13-14,21-23)

22 Izesú nene Želusalega vinogo noike apá kománapagú vike, gakó lainimoketomo mohona noike vimó.

23 Lá noigo, ve makolímo lo amike Guivahanínemaka, Ómasímo vegeňa luguhákó kugutó vizitiote. Loko lokago, Izesú láa loko lo kimike limó:

24 Gateni komagú itinígima lekeza helisatini ali alévolé iniki ititave. Neza láa loko lo nolukumuve. Vegená mukilite ititune liki gilitamóza, iteminigave.

25 Lá niiko, numuni amelaho nene oteko numuni gahe ze lí okoko gahe lopena hizekiko, lekeza hetoka otiniki gaheló okohá ziki sele liki Guivahanitemaka, gahe segeletozo. Liki likiko, neza lekelí ánígo hehe lamuve. Hí numutotí vegená niave.

26 Loko lo lekemekugo, lekeza láa liki li niminigave: Gezagi makó minunike nosánetá noko zahí nagamí noko nounike, geza nene lelí numute gapoló vanike numuteló monó gakó lainim-oletanímóma neve.

27 * Liki li nimikiko, neza láa loko lo likimitove: Lekeza hí apakú vegená niahe loko gelemuve loko mota lo lekemekuve. Lekeza golesa netatokagó mihina amó neneta aló vilo loko lo likimitoze.

28 * Loko lokugo, lekeza ánígatamó nene, Avalahá Isaká Zakopó itó Ómasímini agepagutí gakó liaká a ve mukí nene Ómasímini gizapaló niiko itó lekezatini likimisele ahulokiko hetó niiki ánígiiki ive nama iki miluma maluma giliki lekegepa atalá iki minanigave.

29 Lá niiko, vegená ho noititokatí itó ho nolimitokatí ezegalokatí emegalokatí iki alegesá iiki Ómasímo gizapa okimiakató nosánetá niki kogoliza vizinigave.

30 * Lekeza gililo. Itína gamenaló limiki mina vegenakutí makolite alika itiki minanigave. Itó itína itiki mina vegenakutí makolite alika limiki minanigave, loko limó.

Izesú Zelusale vegenakumú ive imó

(Mat 23:37-39)

31 Ámina gamenalósi Palisaio monó ve makó iake láa liki li amemó: Geza imane apá ahulokoko vozo. Agulizaki ve napa Heloté gepele hilinogo ive.

32 Liki likago, eza hoza aleloko voko ale asú okoko alika hilitikumú anzoa gakó láa loko lo kimimó: Lekeza viki ámina gala ameki ve láa liki li amikiko gilino: Itinagi azogi mininake holosi golesa kepeleko kimisele ahuloká itó kivisi vegená kelémo zokoká okinake okozá hozane nene ale lutigitove.

33 Lá onoimóza, haitó apá makotoka Ómasímini agepagutí gakó loaká ve makó apili hilitamó nene etamitive. Zelusalega lá itave liki linamómá nenazo, itinagi azogi okozaki nene neza gaponeuka vinogo nouve.

34 Kee, Zelusale vegenáise, Ómasímini agepagutí gakó liaká ve kipili hiliká itó Ómasímo lekelitoka hozaló kimisili vegená nene lekeza gehanitunú ahuli

* **13:27:** Age 6:8 * **13:28:** Mat 8:11-12, 22:13, 25:30 * **13:30:** Mat 19:30, 20:16; Mak 10:31

miliki kipili hiliká iaká niave. Neza lekelí izegipatini zuha nene okolohómo izegipala ale mulunauka moloaká noimómáminoko gamena gamena kelémo mulúneuka molanogo oaká noumóza, lekeza gili nimisá amave.

³⁵ * Nenemú gililo. Ómasímo viselelikimikiko apatini nene gámé numuni vizinogo ive. Neza lo likimitove, gililo. Lekeza není nene goha ma áninagamiki mini-liki nivíki alika nene Guivahanímini agulizató anitelimikane. Ómasímo lusa gegimikave liki li niminigave, loko limó.

14

Izesú agisa agizani lulu vizi netá gizali ve alémo zokamó

¹ Holisi makokú Izesú nene Palisaio monó vetini kugulizaki ve makolímini numukú iteko nosánetá noko noigo, Izesú netá ale gopa itihe liki gizapa iki minamó.

² Lá niago, áminaló ve makó minamó nene, agisa agizani lulu vizi netá gizali ve nene Izesuni avogisaló minamó.

³ Noigo, Izesú nene monó mogona apí-ikimiáká vegi Palisaio monó vegi loká oketake leza kivisi vegéná nene holisi gamenagú kelémo zokosá nehe kelémo zokamosá neve.

⁴ Loko lokago, keza nene kegepa apiziake minamó. Lá niago, ámina avisí vema alémo zokoake amiselekago, vimó.

⁵ * Vokago, Izesú láa loko lo kimimó: Lekelikutí ve makolímini gipalahe pulumaká izahe gale hánagú holisi gamenagú velehé limitimó nene, holisimagule lokoko ahulokiko áminagú minatimó nehe. Itó litá oko gelelehá oko galegutí alémo otitimó neve.

⁶ Loko lokago, anotó aliki li amemisá amó.

Nosánetató alesa molo kemeakakumú gakó

⁷ Lá ikago, alesa molo kemekago a vegéná nene nosánetá nanigi niake, siá lamanalááló minatune liki niago, Izesú áingoake, anoa gakó makó láa loko lo kimimó:

⁸ * Ve makolímo nosánetá napaló atane loko alesa molo gemekiko nookoma, siá lamanató minamo. Ámina nosánetató ve makolímini agulizá nenémo geí givilegeneitimó nene,

⁹ alesa molo likimi ve nenémo okoko geza imane noani siá ahulokoko imane ve amezo. Loko lo gemekiko, geza góvoza helekiko kemegesaloka ne siá golesaló minokatanize.

¹⁰ Nosánetá napaló alesa miligimikikoma, geza vokoko kemegesaloka siató noako, alesa molo gemeneiti ve nenémo okoko zogone geza kovogisaloka ne holomaló voko minozo. Loko lo gemekiko, nosánetá niki nia vegentalini kovogisaló gugulizá oteko vinogo ive.

¹¹ * Ve makolímohe makolímohe ezáa agulizá ale otitimó nene, ezáa agulizala liminogo ive. Itó ve makolímo ezáa agulizala aleko lemeko molatimó nene, Ómasímo aí agulizala ale napa inogo ive.

¹² Loko loake, Izesú alesa molo ami vema láa loko lo amimó: Geza nosánetá napa ale vavá nooko nene, zogoga itó gugunaka itó geza zuha itó geza numukaloka vegéná itó moníini vaí onoiti vegénakó alesa molo kememo.

Keza nosánetá napa ali vavá niiki alesa mili gimiiki, nosánetá kemenító goha akú gimikataze.

13 Geza nosánetá napa ale vavá nooko nene, gohogó vegenaiki kigisa kigizani nakeseta vegenaiki kigisa genisi ina vegenaiki kogómula lika vegenaiki alesa molo kemezo.

14 Lá okako, keza niiki nene, alika goha akú nosánetá pekimi iki gimi-tamoláa nominazo, geza gogoliza vizeko minanogo ane. Lá oko noako, Ómasímo vegena lamanaláa hilinitakutí kelémo otiti gamena nene meinaváa giminigo ive, loko limó.

Nosánetá napamú anoza gakó

(Mat 22:1-10)

15 Nosánetá noko mina ve makolímo Izesú láa loko noligo geleake, láa loko lo amimó: Keza Ómasímo gizapa okimiaká onoitó miniki nosánetá niki minata vegena kogoliza viziki minanigave.

16 Loko lokago, Izesú nenemú anoza gakó makó láa loko lo amimó: Ve makó nenémo nosánetá napa ale vavá inogo vegena mukí alesa molo kimimó.

17 Alesa molo kemekago, nosánetá nata gamena alitokago, nosánetató atave loko hozaló veva amiselekago, alesa molo kimi vegena toká vike lekeza alo, nosánetá mota ale vavá okave.

18 Loko lo kemekago, keza mukító vitakumú goselekaseleka lake makolímo nene láa loko lo amike limó: Neza mikasi makó meina hizenounazo, neneloka voko ániganogo novuze, agulizaki vema láa loko lo ameo.

19 Loko lokago, makolímo láa loko limó: Itínasa pulumaká iza ligizani luga luga asú igo meina hizenoumó nenazo, hanuva nítahé loko ániganogo nouze, agulizaki vema láa loko lo ameo.

20 Loko lokago, makó nenémo láa loko limó: Neza itínasa vená alekuke nouke, nenemule loko vaminogo uze, loko limó.

21 Láa liki likago, ámina hozaló vemámo nene goha atiginá oko vike keza la gakó nene gizapa veva avetó oko lo amekago, geleake, izapaló molokago, hozaló vema láa loko lo amike limó: Geza litá oko taoniloka voko gapo napagú komagú novoko neneló gohogó vegena kigisa kigizani nakeseta vegena kogómula lika vegena kigisa genisi ina vegena kelémoko ano.

22 Loko lokago, hozaló vevámo gele ameko mohona oake okoko láa loko lo amimó: Gizapa venemaka, hoza gakó lonetanimó mota gele alekumóza, siá makó nene hanuva minokave.

23 Loko lokago, golohá veva nenémo hozaló vema láa loko lo amimó: Geza nene pilipílí gapoló itó mi gapoló novoko není numukú gikí iki minatave loko vegena gala vizeko kelémoko ano.

24 Neza láa loko lo nogumuve. Neza goí oko alesa molo kumu vegena amanazo, není nosánetakutí keké naminigave, loko lo kimimó.

Izesuni ámegetoko vinogo gele vevesatuni gakó

(Mat 10:37-38)

25 Vegená mukí nene Izesuni ámegetiki nivago, eza viligoko láa loko lo kimimó:

26* Makó eza nezagi minatiive lokokoma izolagini amelagini vená izegipala eza zuhamú gelekiko itekikoma, itó ezáa minoko aleko itímó nenemú

* **14:26:** Mat 16:24; Mak 8:34; Luk 9:23

gelekiko itekikoma nene, itó nenikumú gelekiko lemetigí oko noikoma nene, není izegipa loló oko minaminogo ive.

²⁷ Makó ezáa zohota zaló apili hilinigi miluma netá gihitatakumú gele zageoko némegetamítimó nene, není izegipa loló oko minaminogo ive.

²⁸ Lekelikuti makolímo numuni napa makó ginogoma ganatilisi meinaváá gelekoko moni mota akohihe akohemihe loko molo geleko ánígokoko, gití avotigí nehe nenémini mogonáá geleko áníganogo ive.

²⁹ Itó lá amoko litávatá oko gopa numuni ale hizeako gitimó nene, monima asú okiko vitagá okoko numunima ahulokiko, vegená keza ánígiiki nene giza itiki,

³⁰ imane vémo sozáa moloko numuni napa ale hizeake lá iha iha ahulokago lá onoive liki linigave.

³¹ Itó agulizaki ve napa makolímo agivelahini agulizaki ve makó apilitove loko oko lova agoka ameminogo ive. Áisi ganá láa loko agata gilinogo ive: Leza áimane luguhakó 10 tausen minokune, itó kéisi mukí 20 tausen minikanazo, kepelesá nehe kepelemosá nehe lokoko,

³² ezáagi izegipa agunamotamolagímú gilikó akohemikoma, gala veva nene numunaloka ha noiko, litá oko hutono netá ameko ve makó amiselekiko voko itína nonagá itune loko nimiselekago nouve.

³³ Loko litimó nenazo, nenemú lekelitokatí makó eza ámina oko netá matala mukí ahulo asú amitimó nene nana oko není izegipa loló oko minative.

Age melelé amitikumú anoza gakó

(Mat 5:13; Mak 9:50)

³⁴ Age nene netá lamaná nemóza, agema laga amitimó nene, nana oko goha alémo melelé itune. Ma lá aminogo une.

³⁵ Némini manáminoko ale melelé itunimoláá nomive. Hanuva lepe ahulanogo une. Nenemú lakagatagi minatamó neneta gakó imane gili hee liki gililo. Lekezagi melelé iki minalo, loko limó.

15

Sipsip izá tolava imó nenémini anoza gakola

(Mat 18:12-14)

¹* Takisi aliaká vegi moko mogonaló vegenaki mukí iki monó gakola gilinigi Izesutoka alegesá iaká amó.

² Lá niago, Palisaio monó vegi monó mogona apí-ikimiaká vegi keza nenemú geleko, golesa imó. Golesa okago, Izesukumú láa liki liaká amó: Imane ve eza mokoló vegenámagi kelémo molokago nosánetá noaká noimó nene etamive.

³ Liki likago, Izesú geleake, anoza gakó makó láa loko lo kimimó:

⁴ Lekelitokatí makolímo sipsip izava 100 minatakutí nene hamó tolava itimó nene vitagá amitihe. Lá oko nomive. Lugáá 99 hanuva minamoláá makotoka kelémo nupa onoko ahuloketonoko mohona oko tolava imoláamú vitagá inogo ive.

⁵ Vitagá oko oko ale utó okoko, mulunagú lamaná geleko agohí geko numutoka alekanogo ive.

⁶ Aleko oko agivelagini kelémo nupa okoko láa loko lo kiminogo ive: Sipsip izáne tolava imóma ale utó molokuze, logoliza vizitune loko litimó neve.

* **15:1:** Luk 5:29-30

⁷ Nenemú neza lo likimitoze, gililo. Vatí oko noune liki litamoláa 99 asite kigika ali viligamita vegenakumú nene okulumakú kogoliza aminigave. Ve golesa hámakolímo agika ale viligokagoma nene okulumakú kogoliza napa viziaká niave.

Moni tolova imó nenémini anoza gakola

⁸ Itó vená makolímo silivá gehani 10-ía molo ikakutí hámakó alemó zitimó nene ma ahulaminogo ive. Eza liví legeko lolopa giteva giteva oko ale utó molokoko,

⁹ vená agivelagini kelémo nupa okoko gehanínema alemó zimóma vitagá oko ale utó okuze, nezagi makó logoliza vizitunize loko lo kiminogo ive.

¹⁰ Nenemú neza lo likimitoze, gililo. Ómasímini ageloge keza ámina iki mokoló ve hámakolímo agika ale viligokagoma kogoliza napa viziaká niave.

Gipa makó latila inogo imó nenémini gakola

¹¹ Izesú nene gakó makó láa loko lo kimimó: Ve makolímini gipala losi minasimó.

¹² Miniki alika nanasi nenémo amelahini lo amike ahónó, geza moni henokanoni molo netanimóma nemezo. Loko lokago, moni henokanoni gona moloko gipa losítáma kimimó.

¹³ Kemekago, alika nanasi eza mino háná amike henokanona ale nupa oake, gita oko aleko vimó. Voko mikasi gohauka minake, gumesisi gamasisi ike, izá goula nosató henokanona ahulo asú imó.

¹⁴ Ahulo asú oake noigo, ámina mina mikasiló nene gaúna sipisi helemó. Hilikago, nosánetakumú vitagá oake,

¹⁵ mikasi amelaho makotoka voko lokago, eza izá gizapa oko minatane loko lomikago, nenenloka voko izama gizapa noike,

¹⁶ nosá makó amemake mosimikago izatini nosánetakutí natove loko imóza, nenegi mositamó.

¹⁷ Lá ikago, minake agata kolosokago, láa loko agata gilimó: Aménehini gelekelé izegipala mukí minake, goula nosánetá lamaná niki nitamóza, neza imaneloka gaúnamú hilinogo nounazo,

¹⁸ numúneloka atiginá oko vinake aménehitoka láa loko lo amitove: Ahónó, golesa netá loló okugo, lihimavánemo Ómasiloka itó geitoka gena okaze,

¹⁹ goha gipakave loko minamitove. Hanuva gelekelé izegipaka nelémo molokako minatove. Loko geleake, oteko amelahitoka vimó.

²⁰ Voko numu gatetó anitigo, amelaho ánigoake, milumavala geleake, ololu loko vike anukeake agoka agepa nonago,

²¹ gipalamámo láa loko lo amimó: Ahónó netá golesa loló okugo, lihimaváne Ómasiloka itó geitoka gena okaze. Nenemú goha gipakave loko minamitove.

²² Loko noligo, amelaho nene gelekelé izegipala lo kimike limó: Lekeza litá iki gó lamaná aliiki goló vizitalo. Ana lamaná ali vizitiki suú ali militiki ali namiki,

²³ pulumaká izá akaleva geható minamó makóma apilikí gitalo. Leza ninake logoliza vizeko minatune.

²⁴ Gipáne nene heleneikutí goha otekave, itó eza tolova onoikutí goha utó okave. Loko lokago, kogoliza viziki gehani giziki namó.

²⁵ Lá niago, ganá gipalamámo hozauka minakutí ake, númaseloka anitike gilimó nene, kogoliza viziki meleketakeni niago, geleake,

²⁶ gelekelé izegipa makó sele lo ameake, okago, loká otoko nuvane nana niave,

²⁷ loko lokago, áisi limó: Gugunakama gozapá vimóma avasavagi omo anitekago, ametipo pulumaká iza akale geható minamóma nene apelego gizo vatá noune.

²⁸ Loko lo amekago, ganá gipalamámo izapaló molokago, mesaha oake áminaló vo anitemigo, améipo geleake, lemeko alémo hulu iha,

²⁹ gele ahuloake láa loko lo amimó: Gelezo. Melekeni mukí ale ahulokuke gelekelé ogetoko minuke, gakoka makó gele ahulosá amumóma nemóza, geza nene meme iza akaleva makó nemeko nigive nagavegi ma apeleko namuháma neve.

³⁰ Itó gipaka alika nanasima geí moni henokanonima moko netató ahulo asú okave. Ánenémini okago, geza lokako pulumaká iza akale geható minamóma apiliki gizi vatá nitahe.

³¹ Loko lokago, améipo láa loko lo amimó: Gipánemaka, geza gamena hána nezagi minanimóma nenazo, není netá mukí nene geíma neve.

³² Itó gugunaka nene heleneikutí oteko okave, itó tolova onoikutí goha utó okave. Nenemú mulutegú lamaná geleko logoliza vizuko lamaná noive, loko limó.

16

Heno gizapa ve golesámini anoza gakola

¹ Izesú nene izegipala zuhama gakó makó láa loko lo kimimó: Henonavagi ve napa makolímini gizapa ve makó minamó. Minoko gizapa vemámini gakó makó nene gizapa vemámo henoni ale gopa oaká noive liki lamó nene geleake,

² sele lo ameake, láa loko lo amimó: Geí gakó nanave liki lago guluhe. Ve nenéminaka není gizapa ve goha minamitane loko noluve. Hoza tiketima alekano. Moni henokanonine gizapa anitímini mogonáa ale utó molatune.

³ Loko lokago, henoni gizapa vemámo agikatunú láa loko gilimó: Imane golohá venémo hozanema ipá okiko nana itomó neve. Govisi hoza alitomó nene goselé nepelekave. Gapoló monimú voká vokató mohona itomó nene novozáne helekatieve.

⁴ Loko gelekunazo, neza golohá venémo nimiselekiko ve nigivénege nilími lamaná niko numúikú minoko aleko itomoláamú netá lamaná makó oketa-toze.

⁵ Loko loake, golohá vevámini nekisáa ali mina vegenáma hamopamó alesa molamó. Moloake, makó láa loko loká otamó: Golohá venémini nekisa geitoka nanakí neve.

⁶ Loko lokago, áisi meseme nogoza talam 100 neve. Loko lokago, litá oko tiketi imane alekoko 50 loko gizamane.

⁷ Loko loake, makóma loká otake golohá venémini nekisáa geitoka nanakí neve. Loko lokago, áisi laisi gó 1 tausen neve. Loko lokago, litá oko tiketi imane alekoko 800 loko gizamane.

⁸ Loko lokago, golohá vevámo geleake, henona ale gopa napa gizapa vema gele veveso minake alikumú geké lotamó. Itó monónini nomi vegenalite netá matá inigi gili vevesi minake napaló gili kimiaká niave. Monotinigi vegená lekeza nenémini suni lekelitoka ma minamive.

⁹ Nenemú litoze, gilio. Lekeza ámina iki moni henokanoní ha netale liiki vegená kimikiko keza likigive lili ikiko, ámina netá ali minata gamenaváa asú

okiko nene alévolé apatoka molo lekemekiko áminagú miniki meinavatini alinigave.

10 Makó eza netá koma kamaló nene ale guni oko gizapa itimó áisi nene netá napaloka ámina oko ale guni oko gizapa lamaná inogo ive. Itó makó eza netá koma-kamaló ale gopa napa itimó áisi nene netá napagi ámina oko ale gopa napa inogo ive.

11 Lekeza henokanoni ha netá nene ali lamaná iki gizapa amitamó nene, netá ghila nene éaho likimitive.

12 Itó netá hagitana likimíó nene gizapa i guni amitamó nene, lekelí alévolé henoni nene alika éaho lehizeleketative.

13 * Ve hámakolímo kugulizaki ve lositalitini gelekelé ma oketaminogo ive. Lá itimó nene maga ve agika amekoko maga ve mukahá apilitimó onoive. Itó maga veloka gímize lamaná okoko maga ve ánigo goselé inogo ive. Lekeza ámináminiki Ómasímini hoza nemó itó moni henokanonímini hoza nemó ganagana lelegí oko aleakaláa nomive.

Mosé lo hukoketa gakoki Izesú gosohá lo hukoketa gakoki

14 Loko lokago, Palisaio monó ve keza moni henokanonimú lagaváa gili miniaká a ve nenete giliake, gakola gili hazutazu amó.

15 Lá ikago, Izesú láa loko lo kimimó: Lekeza nene vegená kovogisaló veveso noune likiamuza miliki mihina iaká niámóza, Ómasímo nene likigikáminí mogonáa gelekáa noive. Vegenalite ánigamó nene vevesonoi netá gelekáa noigo, Ómasímo ánigoko gilimó nene mu-izapa oaká noive.

16 * Mosé lo hukoko li gakó itó Ómasímini agepagutí gakó liaká a vetini gakó minoloko ova ova ike ike Zonitoka anitimó. Nenelotí veletoka nene Ómasímini gizapaló minoakalímini gakó lamaná hutilí oko vokago vegená mukilite lovasava iki Ómasímini avogiságú vinigi lá iaká niave.

17 * Okulumaki mikasigi keza vo tolova itíive liki vi tolova itáimóza, Mosé lo hukoko li gakó nenémimi lotonáa hamokó ma haha aminogo ive.

Izesú vená kimisele ahuloakakumú gakó lo kimimó (Mat 5:31-32; 19:19; Mak 10:11-12)

18 * Ve makolímohe makolímohe venala amisele ahulokoko haitó vená alitimó nene, ve vená huko ezega emega oakalímini lihima alinogo ive. Itó ve makolímohe makolímohe ahulinita vená makó alitimó nene, ámina netalímini lihima alinogo ive loko Izesú limó.

Lasaloki henonagi ve napagi kei gakó

19 Izesúanoza gakó makó láa loko limó: Henonavagi ve napa minamó. Eza gó luhuvagigó meinava iteko minamokó ale akoloko minamó. Itó gamena gamena ló gehaka like agoliza vízé vízé oko minoaká imó.

20 Lá noigo, gohogó ve makó agulizá Lasaló eza agupeló halamé gizaleake henonagi vemámini numuni sepekuka ako minake,

21 nosá nakutí litímotila alemó zimoláa ma nimiko natonazo loko geleko minoaká imó. Lá oko noigo, galate aniteke halamelalotí génimiaká amó.

22 Lá oko minake, gohogó vema helekago, ageló keza alímiki itiki Avalahani amatoka ahulimikago minamó. Itó alika nene henonavagi vema helekago, gale zitamó.

* **16:13:** Mak 6:24 * **16:16:** Mat 11:12-13 * **16:17:** Mat 5:18 * **16:18:** 1 Koli 7:10-11

23 Gale zimikago, meikú lemeko miluma maluma geleko minake, okenava oko ánigamó nene Lasaló nene Avalahani amatoka noigo ánikagamó.

24 Ánikogoake, sele loko láa loko limó: Avalahazo, aménegamaka, nenikumú milumaváne geleoko Lasaloni amiselekako agizani gosavatunú nagamikú lupizeoko oko genezáneloká naliko hulu nivisitihi. Neza lokú imane miluma maluma golesa geleko nouho.

25 Loko lokago, Avalahá láa loko limó: Gipánemaka, gelenape. Geza mikasiuka lagámini amupiló minanímoma nene mota asú okamole. Itó Lasalónene miluma malumámini amupiló minamómá ámina oko asú okave. Itína nene Lasaloni alími hulu niago, géisi miluma maluma geleko noane.

26 Itó ligilikagú nene zuni napa aleko hukokámoma nenazo, imanelokatí lemeakaláa nomine. Itó nenenekatí itéakaláa nomine.

27 Loko lokago, henonavagi vemámo láa loko limó: Aménegamaka, makó litoze, gele nemezo. Elane není numutoka

28 izegipa nugunáne ligizani lugaloka asú igo niave. Keza miluma apakú imane ikataze, Lasaloni amiselekako voko kagata alitive.

29 Loko lokago, Avalahá láa loko limó: Óve, Moseni gakó itó Ómasímíni agepagutí gakó liaká a vetini gakómá nemole. Nenema gilinitanae.

30 Loko lokago, eza limó: Óe, Avalahazo, aménegamaka, mokáne, lá oko nomine. Heleneitikutí ve makolímo oteoko voko lo kemekiko, kigika ali viliganigave.

31 Loko lokago, láa loko limó: Keza Mosele itó Ómasímíni agepagutí gakó liaká a vetini gakó gili ahuliaká nitamómá, ve makolímo heleneitikutí oteoko voko lo kimitímóza, nene ámina iki gili ahulanigi anae, loko limó.

17

Golesa netakumú gala vizeaká gakó

(Mat 18:6-7,21-22; Mak 9:42)

1 Izesú eza izegipala zuhama gakó makó láa loko lo kimimó: Golesa netakumú gala vizeaká nene ha minanogo imóza, golesa netakumú gala vízé vizé iti ve nene agae, Ómasímo nana otatimó neve.

2 Izegipáne koma koma minakutí ve makolímo netá golesa alitive loko gala vizeko litimó nene Ómasímo nana otatimó neve. Gehani napa nene luvanaló nagá ziki age nagamikú ahelú itamola avilegeko Ómasímo genavagi netá golesa loló otanogo ive.

3 * Ehe, lekeza likigika gizapa iki minalo. Likigive makolímo galana alekikoma, gahá ameko agata alezo. Lá okako, geí gakó gelekikoma lihimavala ahulotozo.

4 Itó gamena hámakó zupa lihma netá alegetoloko vitimó nene gamena 7-ia geitoka oko nigivénega, néminí ogetutímo mulúne gitihiná okave loko lo gimitímó nene, nenemú geza ámina oko lihimavala ahulotoko minozo, loko limó.

Gele alévolé oakate ale hutilí oletati gakó

5 Aposolo keza Guivahanima nene geza gele alévolé oakate ale hutilí oletozo.

6 Liki likago, Guivahanímo láa loko limó: Masteti gihila komámo goloko iteko zamú geleaká noive. Nenéminoko gele alévolé oakatinía ma minatímó

* **17:3:** Mat 18:15

nene, nimuza za volane asutooko age nagamikú omane lemeko ote miname liki li amitamó nene, gakotini gele lekemekoko hanuva lá inogo ive.

Gelekelé izegipa loleta hoza

7 Lekelikutí ve makolímini gelekelé izegipala makó nene mikasigú hoza aleko minatikutí itó iza gizapa oko minatikutí únakala anitekiko, gizapa veva nenémo geza litá oko numukuka iteko nosánetaka noko minozo loko hanuva lo amitihe.

8 Lá oko nomive. Áisi nene láa loko lo aminogo ive: Géisi hoza aleaká lavolavo likeoko únaká nosá vatá onimikako, nonugo, hozaka asú okiko, alika gezaka vatá oko natane.

9 Loko lo amekiko, gelekelé izegipama eza gizapa vevámo lota hoza nene alekogó noiko, gizapa vevámo gele lamaná itihe. Ma alémo napa aminogo ive.

10 Itó mogonatipogi ámina oko neve. Lekeza hoza gakó loleketumó nene lilí i asú iikima leza gelekelé izegipa ánéa nene loletani hozagó alekune, miní ameko makó loló amune liki lilo, loko limó.

Izesú lokago halamé gizale ve 10 gilelemó

11 Izesú Zelusalega vinogo Galilaia mikasigi Samalia mikasigi holúikú novike,

12 apá makotoka aniteake noitigo, halamé vegená ligizani luga luga asú igo keza ániqiaké, zuha kemeaká netá nenazo liake hotokatí sele liki

13 láa liki lamó: Gizapa vele Izesugama, lelikumú milumavate gelezo.

14* Liki likago, ánikogoake, láa loko lo kimimó: Lekeza viki gililitamolamú lukugupetini nene guguni giziaká ve nene kelepizilo. Loko lokago, keza nivago, kugupeló gizale netá gilili asú amó.

15 Gilili asú ikago, keitokatí hámakolímo gileleake, ánígoake, atiginá oko gakó napagutí Ómasi agepoka lomo lomo,

16 Izesutoka vike agihúna geko akoake, agepoka limó. Ámina ve nene Zuta ve negopa, Samalia mikasigutí vémo lá imó.

17 Lá okago, Izesú láa loko limó: Ve ligizani luga luga asú igo gililikamóza, ve 9-ía keza hitoka vave.

18 Keza atiginá iki iki Ómasi agepoka linigi lamake, hanuva gatizá nivago, Samalia mikasigutí hetoka ve imane eza hámakó noahe.

19 Loko loake, ámina ve láa loko lo amimó: Gele alévolé anitímo gelémo zokokaze, nenemú oteoko vozo, loko lo amimó.

Ómasímo gizapa oketati gamena utó iti gakó (Mat 24:23-28,37-41)

20 Palisaio monó ve keza Izesuni loká itiki Ómasímo gizapa olimiaká ve napa hí zupa utó o lamaná itive liki likago, eza láa loko lo kimimó: Ómasímo gizapa olíkimiaká netá nene lekeza áníginiko gonanalivagi utó aminogo ive.

21 Nenemú lekeza anosa makó ániqiiki, eé, imaneloka utó okave, itó eé, elaneloka utó okave liki laminigave. Gilinahe. Ómasímo gizapa olíkimiaká netá nene likigililikagú utó oko nemole, loko limó.

22 Itó izegipala zuhamá láa loko lo kimimó: Minoko gamena makó alitati zupa nene, okulumakutí lumu ve gihila neza gamena hamokó zupa utó ugo áníganigi lagava gilitamóza, ma ánígamiginigave.

* **17:14:** Liv 14:1-32

23 Nene zupahé eé, imane lelitoka utó onoive, itó eé, keitoka utó onoive liki li likimikikoma kêmegetiki vamilo. Itó giliko, lamaná amino.

24 Gopisína nene okulumá nekisalokatí melevezá okago, vo lutegeaká noive. Ámináminoko okulumakutí lumu ve gihila neza ato gamena alitokiko mikasi nekisa vokisaloka nene vegená mukító keza není ánigi asú inigave.

25 Lá oko nemóza, oko moloko oaká nou netá ániyiaká nia vegenalite není ánigi golesa liki miluma netá mukí nimitave liki linitinamóma neve.

26 * Noá mina zupa nene vegená keza miniki aliki amó ámina iki okulumakutí lumu ve gihila není gamena alí noliko ámina inigave.

27 * Keza iza goula nosá nake vená meina-kona ake, zuguzugu zegezege viziki miniliki nivago, Noá eza vená izegipala kelémo sipigú itekago, nagamí napa veleko anitike kepele gesá imó.

28 * Itó Lotí mina zupa áminagó amó. Keza iza goula nosá nake meina-kona ake, hozagaza aliki zuhaina zahaina ake, numuni luki giká lá iká iki Lotini gakó gelemiki niago,

29 Lotí eza Soto apá ahuloake novigo, okulumakutí nene lánehakó netá ló gulumavagi limike vegená kepele gesá imó.

30 Okulumakutí lumu ve gihila neza minoko utó ito zupa nene mukí vegená keza ámina inigave.

31 * Ámina zupa nene numuni numupító nita vegená nene atiginá iki numúítokatí henóimi ma aliki vamitakumule. Itó vegená hozáitoka minatatotí henonimú giliki atiginá iki numutoka amitakumule.

32 Lekeza Lotini venalámitokagó gili minalo.

33 * Makó keza nene kigika kemeníni ali gikitiki ali minata vegená nene kigika kemeni gopa inogo ive, itó makó keza kigika kemeni vínasi áhulatamó nene alévolé kemetamenigi minanigave.

34 Neza lo likimitoze, gililo. Ámina holugú nene ve losi keza hamó holomaló akinitáikutí maga ve alémokoko maga ve ahulomikiko minative.

35-36 Vená losi ámina iki nosá isiki minatáitotí Ómasi nenémo vená magáa alémokoko magáa ahulomikiko minanogo ive.

37 Loko Izesú lokago, izegipala zuhamate loká itake Guivahanitemaka, nene netá hitoka utó itive. Líki likago, eza láá loko limó: Anuva i netalímo nama gosúveha maú zigo alegesá iaká niave. Ámina oko kigika anuva i vegená minató minató goní napa inigave, loko lo kimimó.

18

Goní ale heleaká vegi gevóná venaki keí anoza gakó

1 Izesú nene izegipala zuhama viki akamiki gamena gamena goselekaselé amiki Ómasiloka liliki viki minikoma nene Ómasímo gele kimitikumú anoza gakó makó láá loko lo kimimó:

2 Apá makotó nene goní ale heleaká ve makó minamó. Áisi nene Ómasi noimó itó vegená niamó keikumú ma gelesá amimó.

* **17:26:** Apí 6:5-8 * **17:27:** Apí 7:6-24 * **17:28:** Apí 18:20-19:25 * **17:31:** Mat 24:17-18; Mak 13:15-16 * **17:33:** Apí 19:26; Mat 10:3, 16:25; Mak 8:35; Luk 9:24

³ Lá onoigo, ámina apató nene gevoná vená makó minamó. Áisi nene goní ale heleaká ve noitoka gamena gamena vike láa loko lo ameaká imó: Geza gala venémo nelémo golesa inogo igo nugutó vizitane loko noluve.

⁴ Loko lo ameaká noigo, goní ale heleaká vemámo gevoná venámámini gakó gamena háná gele ahuloake minoaká imóza, minoko agikatunú láa loko limó: Neza Ómasi noimó vegéná niamó keikumú ma gelesá amumóza,

⁵ gevoná vená imanémo negénege gakó loaká noive. Lá oko loloko ova ova oko nominiko, goselé nepelekátize, nenemú alémo vatí oko ámina gakó apele hilitove loko limó.

⁶ Loko Guivahanímo lo asú oake, láa loko limó: Goní ale heleaká ve gínikahámo gakó limó nene mota gilinahe.

⁷ Olile. Lekeza Ómasimú nanave liki liaká niave. Eza kelémo etó i vegena la zuhamate gamena gamena negénegeka liki niiko ale vevesoketamítimó neve liki nilahe. Itó gele ahulokoko minatímó nehe. Lá oko nomive.

⁸ Neza láa loko lo nolukumuve. Eza ale akutoko ale vevesoketanogo ive. Lá itimóza, okulumakutí lumu ve gihila neza minoko atiginá oko imane mikasiuka ato zupa nene, není gelegele minatamoláa nene ma nitahe minamitahe loko nagata gululusi noguluve, loko limó.

Palisaio monó vegi kugupe meina aleaká vemuki anoza gakó

⁹ Ve lugáate kezáinimú gelego vevesokago, kigivékinimú gelego lemeaká noigo, Izesú ánigoake keikumú anoza gakó makó láa loko limó:

¹⁰ Ve losi keza Ómasiloka linigi monó numuni napagú itesimó, makó nene Palisaio monó ve, itó makó nene takisiló mohona oko moni gumina aleaká ve.

¹¹ Palisaio monó vemámo ote hee lonoike ezáamú lá oko geleake láa loko limó: Kee, Ómasizo, ve lugáa keza laskoli miniki guminatamina iki vená loká iki miniaká niave. Neza keikitana ve minamuve, itó takisi ale ale ve hé melanigitana minamuve. Nenemú gegepoka noluve.

¹² Neza holisigú holisigú gamena lositá nene monokumule loko nosánetá mosekuke minoaká nouve. Itó moni henokanoni nániguke 10 10 nekutí hamopamó nene monokumule loko moloaká nouve.

¹³ Loko lokago, takisi ale ale vemámo nene akelepauka minake okenava oko ániganogo avoza helekago, gasínamake minake, láa loko agepoka limó: Kee, Ómasinemaka, ve golesa není gigika hize nemezo loko limó.

¹⁴ * Gilinahe. Takisi ale ale vemámini lihimavala ahulo asú omikago numunaloka atiginá oko vimó. Palisaio monó vemámini lihima nene ha minamó. Lá onoinazo, kezáini kugulizáini ali otita vegentalitini kugulizá liminogo ive. Itó makó keza kezáini kugulizáini aliki limiki milatamó nene Ómasímo kugulizáini ale napa inogo ive, loko limó.

Izesú izegipa koma kama nónohá zeketamó (Mat 19:13-15; Mak 10:13-16)

¹⁵ Itó ve vená keza izegipáiini nene Izesú noitoka agizanitunú kugupeló aleko nónohá zeketative liki kilímiki viaká amó. Lá niago, izegipala zuhamate gahá kimikago,

¹⁶ Izesú nene sele lo kimike limó: Lekeza izegipa koma ahulikimikiko nenitoka atave. Nenémináa keza Ómasímini avogisaló viakalímini mututoni nianazo, li hoipa ikitamilo.

* **18:14:** Mat 23:12; Luk 14:11

17 Neza lamaná lo likimitoze, gililo. Makó keza izegipa namuni monokú vávani iki itiaká niamó nenéminiki monokú itemitamó nene, Ómasímo gizapa okimiakakú keké iteminigave, loko limó.

*Henonavagi gizapa ve
(Mat 19:16-30; Mak 10:17-31)*

18 Itó monó gizapa ve makolímo Izesuni loká otoko Tisá lamanámaka, neza nana okinake alévolé nemetameni alitomó neve.

19 Loko lokago, Izesú láa loko lo amimó: Geza nenikumú ve lamanale loko nanamú nolane. Lamaná améneho Ómasí hámakó noize, makó nominazo, není mogonamú gele hee luminoko nolape.

20 * Itó geza gapo lota gakó gelenane. Láa lokove: Ve aleve suni ale gopa oko huko ezega emega amo. Geza vegená kepele helemo. Guminá amo. Geza soza hakupá gakó lamo. Geza izokahiko amekahiko kugulizá ale otezo.

21 Loko lokago, gizapa vemámo láa loko limó: Neza ámina lo huka gakó mukí nene izegipa namutotí apí oko ámegetoaká noumóma neve.

22 Loko lokago, Izesú geleake, láa loko lo amimó: Netá hámakó velesá loló amanimó nene ale hee litanize. Geza voko henokanoka mukí nene meináló moloko moni alekoko gohogó vegená kemekoko, oko némegetozo. Itó lá okako okulumakú helisa henoni utó ogetanogo ive.

23 Loko lokago, ve eza henokanona vaí oake minamó nenazo, gona moloko kimitohe loko giligo gena imó.

24 Lá okago, Izesú ánígoake limó: Henokanóki vegená keza Ómasímini lapanató silipa iki ititamó neve.

25 Kamele izámo nakasi vovónagú voakaláá vávani oko nomimóza, henokanóki vegená nene Ómasímini lapanató voakaláá nene ámina oko genavagi golesa neve.

26 Loko noligo gele vegenalite láa liki lamó: Íi, láa lokoma éahinima Ómasímo agutó vizekiko minoloko voko minivative.

27 Liki likago, Izesú lo kimimó: Vegenalite nenémini itamoláá nomimóza, Ómasímo loló itove loko agata gili netá nene vávani okogó loló oaká noive.

28 Loko lokago, Pitá láa loko lo amimó: Gelenape. Leza mukí netá matate ahulo asú okunike geí gémegetokuninazo, alika nene meinava alesá nehe.

29 Loko lokago, Izesú Pitaginima láa loko lo kimimó: Lamaná lo likimitoze, gililo. Makó keza numúini apáini nehe vená izegipáiñihe gouna zuhahe izóikini améikinihe Ómasímini lapanakumule liki ahulikitiki iki nemegesaló atamó nene,

30 nenémini meinava nene mikasiuka napaló alinigave, itó miniki okulumakuka alévolé kemetameni alinigave, loko lo kimimó.

*Izesú ezáa alika hiliti gamenamú epoapoga ligó gamena losive makole imó
(Mat 20:17-19; Mak 10:32-34)*

31 Izesú nene izegipala zuhama amegesa vizitoka kelémo moloake láa loko lo kimimó: Gililo. Leza Zelusalega noitune. Itekuko, Ómasímini agepagutí gakó liaká a vete okulumakutí lumu ve gihila nenikumú epoapoga linamó mukí nene alévolé inogo ive.

32 Hetoka vetini kigizakú nilími milikiko, keza gopoguka linitiki galaná milinitiki, gituhú initanigave.

* **18:20:** Gá 20:12-16; Gapo 5:16-20

³³ Lá iiki uheni nagatunú nipiliuki nipili hilikiko, gamena losive makole minokinake heleneitokutí goha otinogo uve.

³⁴ Loko lokago, keza gelego ligitagani imó. Mogonáa hitokimikago, ámina gakó gilinigi gili vevesamamó.

Zeliko numutoka agómula lika ve monimú voká vokató ve ale pulusotamó (Mat 20:29-34; Mak 10:46-52)

³⁵ Izesú eza vike Zeliko numutó ale alitamó. Ale alitokago, gapo agilikaloa nene agómula lika ve makó minake, monimú voká vokató minoaká imó.

³⁶ Lá oko noike, mukí vegená vigá igá niago, mogonamú loká okimikago,

³⁷ keza Nasalete numutotí ve Izesúma noave.

³⁸ Liki likago, gakó napagutí sele loko Izesuvu, geza Tevitini agávolagamaka akágá oletatane loko lo mololeta vetemaka, nenikumú miluma gelenetamane.

³⁹ Loko lokago, goí iki niva vegenalite legesó oko minative liki gahá amemóza, áisi nene gele ahuloake gamoga gike sele like geza Tevitini agávolagamaka, nenikumú gigika hizino.

⁴⁰ Loko lokago, Izesú geleake, gapoló noike lekeza nenitoka alímihi alo. Loko lokimikago, agómula lika vema Izesutoka alímihi ikago, loká otake limó:

⁴¹ Geza nana netá aletegetatokumú nolane. Loko lokago, agómula lika vemámo Guivahanínemaka, nogómuláne ale goloutonetatane loko noluve.

⁴² Loko lokago, Izesú láa loko lo amimó: Gogómulaka goloutino. Nenikumú gele alévolé anitimo gelémo zokokaze.

⁴³ Loko noligo, áminasító agómula goloutamó. Goloutokago ánigoake Izesuni ámegetoko vike Ómasi agepoka limó. Lá noigo, ániga vegená keza ámina iki Ómasi agepoka lamó.

19

Izesuko Zakiasiko

¹ Izesú nene Zeliko numutoka aniteake, avilegeko vinogo igo,

² ámina apató ve makó minamó, agulizá Zakiasí, áisi nene takisi aliaká a vetini agulizaki venini. Eza henokanónamo vaí o mina ve minamó.

³ Áisi nene ve alínpa nenazo, Izesuni agupeló ánigatove lokoko vegená mulusígú minake Izesuni ánígamike,

⁴ ololu loko vegená kivilegeake, vike zaló iteko noike imaneló nougo Izesú imaneloka okiko ánigatove.

⁵ Loko geleake noigo, Izesú eza áminaló vo aniteake, okenava oko ánigoake láa loko lo amimó: Zakiasizo, litá oko lemeno. Itína neza geí numukuka vitífive loko nouve.

⁶ Loko lokago, litá oko lemeake, mulunagú lamaná geleko numunauka alémoko vimó.

⁷ Vi itikasigo mukí vegená keza ánígiake, gili golesa iake áisi nene nanamú ve golesámini numukú iteko noive.

⁸ Liki likago, Zakiasí áisi nene Guivahanímini avogisaló oteko láa loko limó: Guivahanínemaka, gelezo. Moni henokanónone lelegí oko gona molokinake lugáa nene gohogó vegená kiminogo uve. Itó vegená lugáatini moni henokanónini soza saza luke avilegeko aleaká umó nene neko, aleko iteko hamó alutó nene losive losive kimitove.

⁹ Loko lokago, Izesú limó: Nenémini hoza aliaká nia vemú nene monóini nomi vegená niave liki liaká niamóza, imane ve Zakiasí nene ezagi Avalahani

agávolaho Zuta ve gihila noive. Itína aí numukú oko ánigumóma agutó vizeaká netá mota utó okave.

^{10*} Okulumakutí lumu ve gihila neza tolova inita vegenakumú vitagá oko kugutó vizitove loko lumumóma neve, loko limó.

*Moni gó ligizani luga luga asú igo nenémini anoza gakó
(Mat 25:14-30)*

¹¹ Izesú Zelusalega ale alí noligo, gakola gele vegenalite itína Ómasímo gizapa olimiaká ve napa alémo utó iti gamenava alitokave liki nigelego, gili hee litave loko Izesú anoza gakó makó láa loko lo kimimó:

¹² Agulizaki ve makolímo agulizaki ve napaloka voko lokugo mikasi gizapa ve nenémini akilí hitonimikiko atove loake, mikasi gohauka vinogo noike,

¹³ gelekelé izegipala ligizani luga luga asú igo sele lo kemeake, moni gó hamopamó nokimike láa loko limó: Lekeza imanetunú lilí iki ali hutilí iki niko, atiginá oko ánigatove.

¹⁴ Loko loake, vokago, aí gizapaló mina vegená lugáate gili golesa imiake, vegená kimisilikago, ámegetiki vake agulizaki ve napama láa liki li amemó: Géisi nene mikasi gizapa vele minamitane loko nolune.

¹⁵ Liki likago, agulizaki ve napamámo nene gopa voko minake mikasi gizapa vémini akilí amekago, atiginá imó. Atiginá oko vike nene gelekelé izegipala moni kimi vegená láa loko alesa molo kimimó: Moni lukumumóma nene hozaváa alikago, nanakí akohekahe, alikalo loko alesa molokago,

¹⁶ gelekelé izegipa makolímo anitike limó: Guivahanínemaka, geza moni gó hámakó nemenimó nenetunú hoza aleko gó gosohá ligizani luga luga asú igo ale utó molokuve.

¹⁷ Loko lokago, láa loko lo amimó: Geza gelekelé ve lamaná noane. Vatí oko hozaló gizapa okane. Geza ha netalímini hozaváa ale guni oko gizapa okanize, néni numuni apá ligizani luga luga asú igo nenetini gizapa ve loló ogimikugo minatane.

¹⁸ Loko lokago, gelekelé izegipa makolímo anitike limó: Guivahanínemaka, geza moni gó hámakó nemenimó nenetunú hoza aleko gó gosohá ligizani lugaloka asú igo ale utó molokuve.

¹⁹ Loko lokago, láa loko lo amimó: Vatí okove. Geza numuni apá ligizani lugaloka asú igo nenetini gizapa ve minatane, loko lotamó.

²⁰ Itó gelekelé izegipa makolímo aniteake láa loko limó: Guivahanínemaka, moni gó hámakó nemenimó nene gotunú asapú oko otoha oko ale molonoumó imane aleko nouve.

²¹ Geza gínikaha ve minokaninazo, ve makolite hoza alikago gihiláa utó okago aleáká noane. Itó ve makolite mini zuhá inató gihila omolokago nosánetá aleko asutoko noaká noane. Nenemú gelekuke geikumú nehelele vizekago monika nene gizapa oko alenoumole.

²² Loko lokago, gizapa vemámo láa loko lo amimó: Gelekelé izegipa golesa gezaka lani gakó nene ale viligoko goní nogetuve. Geza gínikaha ve noutímimi mogona gelenane. Ve makolite hoza alikago gihiláa utó okago aleáká nouve, itó ve makolite mini zuhá inató gihila omolokago nosánetá aleáká nouve.

²³ Nene mogonáne gelekanimóza, moníne nene peni numukuka molokako ámina moniló miní amiki nimilinitiko neza goha inake voko alitonazo. Nanamú neve.

* **19:10:** Mat 18:11

24 Loko loake, aí amatoka oti mina vegená láa loko lo kimimó: Moni gó aleneimó nene aliiki moni gó ligizani luga luga asú igo alenei vema nene amilo.

25 Loko lokago, keza ininá iake Guivahanitemaka, eza nene moni gó ligizani luga luga asú igo mota alekamole.

26* Liki likago, eza limó: Neza gakó makó lo likimitoze, gililo. Ve makolímo Ómasilokatí netá makó alenokoma gizapa lamaná itímó nene Ómasímo goha miní ameko aminogo ive. Itó netá makó gizapa lamaná amiti ve nenémo ale nouhe loko agata gilitímóza, Ómasímo goha ipá oko alinogo ive.

27 Itó není gala ve nene nenikumú Guivahanite loló amitané liki liaká a vema kilímiki iki není nogómulaló kipili hililo, loko limó.

Sigaga litanigi ago Izesú Zelusale numutoka vimó

(Mat 21:1-11; Mak 11:1-11; Zon 12:12-19)

28 Izesú láa loko lo kemeake, Zelusalega vinogo ale goí o kemeko novike,

29 Oliví agoka gohalaló numuni apá lositá nene Petepage itó Petania minasító ale alí nolike, izegipala zuhagutí ve lositá nokimisilike,

30 láa loko lo kimimó: Lekeza helega numutoka viki anitiiki toki iza akaleva nagá zinamóma nene vegená kogohí geko mohana onamitimoláa nene ánigiiki vínasiki aliki alizo.

31 Vínasiki aliki nisiko, ve makolímo nanamú nivínasasive loko nolikoma, Guivahanímo hoza nego ámina izamú limiselekago nousive, liki li amilizo.

32 Loko loake kimiselekago, keza vasigo, Guivahanímo goí oko lo kimi gakotó ámina netá utó imó.

33 Utó okago, toki iza akalevámini nagá nivínasasigo, iza amelage lekeza nene toki iza akalevama nanamú nivínasasive,

34 liki likago, keza láa liki li kemesimó: Guivahanímo hoza nego imane izamú lokago oko novínasusive.

35 Liki likasigo, iza amelage gili kimikago, toki iza nene Izesutoka aliki vikasike, hepekumú luhoaká góini gololahá iki ámina toki iza akalevámini amegeusaló milikasike Izesú nene iza amegeusaló ahulimikasigo,

36 toki izámini amegeusaló minoake novigo, vegená keza hepekumú luhoaká góini nene gololahá iake gapoló nene avilisá itimi vamó.

37 Lá niago, Zelusalega ale alitoake, Oliví agokalotí lomo noi gapoló vo alí noligo, izegipala zuha mukilite kogoliza nivizeke alévolé suni aligo ánigakumú nene gakó napagutí Ómasí agetepoka lake,

38* láa liki lamó: Guivahanímini gakotó agulizaki ve napa anitelimikane. Ómasímo nónohá zegetatize. Okulumakú nonágá oletino. Ómasímini mogonáa nene lapanalagi minino.

39 Liki likago, vegená alegesá iki minakutí Palisaio monó ve makolite holúkú niake láa liki lamó: Gizapa ve geza izegipaka zuha imane láa liki lamilo loko lo hukoketamane.

40 Liki likago, eza láa loko lo kimimó: Neza lo likimitoze, gililo. Keza gakó lamiki ha minatamó nene, gehani imanete gakó napagutí negepoka linigave, loko limó.

Izesú Zelusale vegenakumú ive imó

41 Lá oake, omo anitike Zelusale apá nánigake, agika nohizigo ive napa ike,

* **19:26:** Mat 13:12; Mak 4:25; Luk 8:18 * **19:38:** Age 118:26

⁴² láa loko limó: Lekeza nonagá iki minata gakó gili ahuliaká niamó nene itína gamena gili alitanazo. Lá onoimóza, mogoná halá geneimó nenazo, lokogómulatunú ánigi vevesaminingave.

⁴³ Gamena makó lekelitoka noiko, gala velinite iki numutini apatini hizi vigiiki mikasi amumú iki geisa hiziiki, likilími vigiiki

⁴⁴ vená izegipatinigi lekehelú iki likipili gesá inigave. Lá niiki numutini zivi akúvasivi niiki geha numuni nene ziki akúvasikiko gehani nene amupiló amupiló iki mililiki itekutí gululupaso asú inogo ive. Lekeza Ómasímo lukugutó vizinogo lekelitoka amómámini mogona gili vevesamamó nenazo, ámina suni lekelitoka utó oleketanogo ive.

Monó zagusave lo hukoketamó

(Mat 21:12-17; Mak 11:15-19; Zon 2:13-22)

⁴⁵ Loko Izesú loake, monó zagusaveú itike netá matá meina konaló vegená kimisele nahulake,

⁴⁶* láa loko lo kimimó: Ómasímo li gakó nene monó gotolaú láa liki luhuva gizinamóma neve: Není numunimú Ómasiloka loaká numunive liki litave. Láa liki gizinamóza, lekeza guminaló veta halá giki miniaká nia geha mulí lili ikave.

⁴⁷* Loko lo kemeake, gamena gamena monó zagusaveú nene monó gakó lainim-oketamó. Lá noigo, guguni giziaká ve napagi monó mogona apí-ikimiaká vegi itó Zuta vegenalitini monó gizapa vegi keza apili hilita gapováamú vitágá amóza,

⁴⁸ vegená mukilite Izesú li gakó nene gámemé iki gili minikago, Izesuni apili hilita gapo ali utó amamo.

20

Izesuni zámuzamú loká itamó

(Mat 21:23-27; Mak 11:27-33)

¹ Lá niago, nene gamenaló Izesú nene monó zagusaveú itike monó lainim-oketoko gakó lamaná lo utó oko lo nokimigo, guguni giziaká ve napagi monó mogona apí-ikimiaká vegi monó gizapa vegi iki anitiakte,

² imaneloka azozá loló ani netá nene éahini gakotó lá ane, itó éaho litó loló ape, lo lemezo.

³ Liki loká imikago, eza láa loko lo kimimó: Nezagi ámina oko gakó hamó loká oleketanogo uze, lekeza li nimilo.

⁴ Zoní monó nagamí holokimiaká hoza alimó nene, hikutí ale utó ive. Ómasímini gakotó alihe itó vegenalitini gakotó alive.

⁵ Loko loká okimikago, kezáitoka ligili hagili ake nene gakotó nana oko lo viligoko lo amitune liki gelemó nene gopa okago, láa liki gelemó: Leza Ómasilokatí ale utó imole loko litunímó nene, íí, lekeza nanamú Zonini gakotáa gili alévolé amave loko linogo noimó.

⁶ Itó vegená mukí menete Zonikumú nene Ómasímini agepagutí gakó loaká veve liki linamóma nenazo, hoza alimó nene hanuva vetinígutí ale utó imole loko litunímó nene gehanitunú lipili hilinigave.

⁷ Liki nigeleke Izesuni láa liki li amemó: Zoní éahitotí hoza ale utó ihe loko nenémini mogonáa gele vevesamune.

* **19:46:** Isa 56:7; Zel 7:11 * **19:47:** Luk 21:37

8 Liki likago, Izesú láa loko lo kimimó: Láa likima nene netá imane loló oaká nougo ániagiaká niámó nene éahini gakotó lá oaká nouhe nenegi nezagi áminagó oko lo lekememinogo uve.

*Vain nagá minimú anoza gakó
(Mat 21:33-46; Mak 12:1-12)*

9* Loko loake, anoza gakó makó nene Izesú láa loko vegená lo kimimó: Ve makolímo vain nagá mini nene zuhá oake, gizapa iki nitiko meinava likimitove loko vegená makó gutá kemeake, haitó mikasiloka hotó voko gamena hánha minamó.

10 Noigo gihila guzá lati gamena alitokago, gizapa nia vegená nenete mikutí nagá gihila lugáa alinitiki atave loko gelekelé izegipa makó amiselekago, vo anitekago, keza mini gizapa vamate ámina ve apiliake nagá gihila amemake hanuva amisilikago golohá veva noitoka vimó.

11 Lá okago, gelekelé izegipala makó goha amiselekago vimó. Vo anitekago keza mini gizapa vamate gopoguka litake apiliake, hanuva amisilikago vimó.

12 Lá okago, makómá amiselekago vimómámini agupe apilivi hukivi iake, hetoka alími ahulamó.

13 Lá ikago, mini amelaho láa loko limó: Neza nana itove. Ma alími lamaná itahe loko nigika amenou gipáne amiselekugo vitize.

14 Loko geleake, amiselekago voko áminaló anitekago, mitó gizapa vamate ániagiaké kezáitoka láa liki ligili hagili amó: Imanémo nene mikasi amelahini gipala nenazo, áisi nene minokoko olopa ve molokoko imane hoza ale lá itímó nenazo, helisa henonima lelí loló itive loko mota apele hilitune.

15 Liki liake, nagá gihila mikutí ahelú iliki vake losé apili helemó. Lá inamó nenazo, nagá mini amelaho aniteoko ámina mikú hozaló vema nene nana oketative.

16 Aisi okoko gizapa vema kepele heleoko ámina vain mini nene haitó gizapa ve lamaná lehizeketanogo ive. Loko Izesú lokago, giliake, keza eé, lá oko nomive lamane. Liki likago,

17* geleake, gonú nokipilike láa loko lo kimimó: Láa likima monó gotolaú gakó láa liki luhuva gizinamóma nenémíni mogonamú lekeza nanave liki nigelevé:

Numuni giáká vete gehani napa makó ánigi ahulamó nenémo geha lapusa alévoelé lá loló oake noive.

18 Ve makó nenete ámina geható velehé limitamó nene ziki nogotanigave. Itó ámina gehani nenémo ve makolímini amupiló alemó zitimó nene, ámina ve nene zeko lanahana inogo ive.

*Kugupe meina hizeaká gakó
(Mat 22:15-22; Mak 12:13-17)*

19 Loko lokago, monó mogona apí-ikimiaká vegi guguni giziaká ve napagi keza ámina anoza gakokuti gehanimú limó nene Izesuni ánigo ahulunikumú lokave liki giliake, ámina gamenaló agizató alekinake nagá amitune liki lamóza, lá itunimó nene vegenalite nana ilitatave liki kehelele vizimó.

20 Kehelele vizekago, Izesuni apilita gamenamú gizapa iki niake keikutí ve makó kimisilikago, vake amamaka miliki minake, Izesú gakó lo gopa

itikumú amamaka moloko noinake gakó makó lokiko hee lamikoma agulizaki ve napámini agizakú molokuko nagá amitave liki vevesina vegetana lili iki minake,

²¹ Izesuni láa liki loká itamó: Tisalemaka, geza ve vená lainim-okimiaká noani gakó nene hee lokogó nego geleaká noune. Geza vegená mukí ánigo hamó lelegí oko ánigokanike, Ómasímini gapo kelepize vevesoaká noane.

²² Geza nanave loko nogelene. Loma apatoka gamanímini agulizaki ve napa Sisani nene takisi moni ameaká nouhá nene etáhe etamive.

²³ Liki lamó nene etamive loko lokikoma gamaniloka goní otatune itó vatí okove loko lokikoma Zuta vegenalite gili golesa itave liki amekú miliki la gakó nogilike, láa loko lo kimimó:

²⁴ Lekeza moni makó nelepizilo. Ámina moniló noi vogunahana imanegi itó luhuva imanegi éahini neve. Loko lokago, gamani ve napa Sisani neve.

²⁵ Liki likago, láa likima nene, gamanímo voká loafá noi netá nene gamani amilo, itó Ómasímo voká loafá noi netá nene Ómasí amilo.

²⁶ Loko Izesú limó nene gámémé iki linamómámini gelehusigutí lá oko avilegekago, sigaga liake kegepaló gena okago, vegenalitini kovogisáló agizató alemisá amó.

Hilinitakutí otiakekumú loká itamó (Mat 22:23-33; Mak 12:18-27)

²⁷ Lá okago, Satukaio monó vegená keza hilinitakutí otisá amave liki liaká a vegená lugáate Izesutoka iake,

²⁸ * Láa liki loká itamó: Tisalemaka, Mosé nene luhuva láa loko gizo lemeneimóma neve: Ve makolímo vená alitimó nene, izegipa getamoko mino-loko voko helekikoma, agunalámo ámina gevóná vená alekoko uvolaho hili vemú izegipala geto molative loko luhuva gizamó neve.

²⁹ Lá okanazo, uvolaho agunala 7-a minamó. Lá iki niakte ganá ve nenémo vená aleake, minoloko novike izegipa getamike helekago,

³⁰ agunala makolímo áminámini okago,

³¹ agunala makolímo áminámini okago, keza ve 7 nenete ámina vená ali volaló imaló iki minake izegipa getamike hili asú ikago,

³² ámina gevóná vená nene minake alika hilimó.

³³ Ámina ve 7-a nenete ámina vená ali volaló imaló iki minamó nenazo, hilinitakutí goha otita gamena nene ámina vená nene éahini venala minative.

³⁴ Liki likago, Izesú láa loko lo kimimó: Lekeza imane gamenaló vená aliká itó vená alimi kimiká iaká niámóza,

³⁵ Ómasímo vegená makokumú nene alika gamenaló hilinitakutí otitatímini mututoni niave loko loketonoimóma nenete vená alisá amave, itó vená alimi kimisá amave.

³⁶ Keza ageló nenéminiki goha hilisá amave. Hilinitakutí otita vegená nene Ómasímini mututoni miniki gosohá kemetamenigi minanigave.

³⁷ * Itó heleakakutí oteakakumú nene lo likimitoze, gililo. Mosé ámina netakumú gakó makó lo lemeneimóma neve. Eza zamukutí ló guluma i gakó gizake hele vegenalitini mogonamú gilike Guivahanímú nene láa loko limóma neve: Eza Avalahani Isakani Zakoponi keí Ómasí minamó nominave.

38 Loko limó nenazo, hele vegenaki ha nia vegenaki nene Ómasímini agómulał nene ha nia vegenakó niave loko ánigo nominamó nenazo, nemú kemeni helenei vegenalitini Ómasi negopa, kemenía hanuva ne vegenalitini Ómasi noinazo, Ómasimú gili zaginake hele vegenaki hanuva nia vegenaki kei Ómasi noive.

39 Loko lokago, monó mogona apí-ikimiaká ve lugáate tisalemaka, gakó lamaná lokane.

40 Liki liake, goha gámémé iki loká itakumú kehelele vizekago, loká itamisá amó.

*Gologí oketative loko lo moloketa vemú loká oketamó
(Mat 22:41-46; Mak 12:35-37)*

41 Lá niago, eza láa loko lo kimimó: Gologí oleketative loko lo mololeketa vemámo agulizaki ve napa Tevitini agávolaho noive liki nanamú liaká niave.

42 * Tevití eza Ómasi agepoka liká nama liká a gakokutí láa loko luhuva gizonoimóma neve:

Mezaú ve eza není Guivahaníne nene není nigizani zamagaloka minoloko voko noako,

43 gala vega nene gigisa lapuvauka ahuloketanogo uve loko lo amimó neve.

44 Tevití ámina vemú nene Guivahaníneve lokamó nenazo, gologí oleketative loko lo mololeketa vemámo nana igo Tevitini agávolahogó neitive. Tevitini guivahanigi neitive.

*Monó mogona apí-ikimiaká a vemú alévolé oko lo hukonoimole
(Mat 23:1-36; Mak 12:38-40)*

45 Loko Izesú loake, vegená mukilite nigelego, izegipala zuha láa loko lo kimimó:

46 Monó mogona apí-ikimiaká vemú lekeza, ehe. Keza nene luhiaká gó háná luhatakumú, itó maketiloka vegená makolite geké vaké likitatakumú, itó monó numukú numukú vegená kovogisaló minoaká holomaló minatakumú, itó nosánetá napa ninató agepaló iti mina siató minatakumú kumu heleaká noive.

47 Keza gevóná venalitini henokanoni gumina i asú iká itó kegepatunú soza miliki Ómasi agepoka háná liki Ómasiloka liká iaká niave. Ámina ve nenete lihima napa genavagi alinigave, loko limó.

21

*Gohogó vená gevonalímo moni ahulamó
(Mak 12:41-44)*

1 Izesú nene monó zugusaveú minake okenava oko ánigamó nene henóiki vegenalite moni moloaká pokisigú moni nimilago ánigamó.

2 Lá noigo, gohogó vená gevonalímo makolímo golohá moni losítá nene áminagú nomolago, ánigoake,

3 izegipala zuha láa loko lo kimimó: Neza lamaná lo likimitoze, gililo.

4 Vegená imanete vaí o mina monigutí ahulamóza, vená gevóná imanémo gohogó noikutí nosá meina hizitimoláa ahulo asú okamó nenazo, áisi moni ahulamó nenémo keza moni ahulamó kivilegékamó gelekave, loko limó.

*Monó zavusave ali golesa itakumú epoapoga limó
(Mat 24:1-2; Mak 13:1-2)*

* **20:42:** Age 110:1

5 Izegipala zuha makó nenete monó zagusave nánigake gehani lamanalátuunú ginamó itó gonanalisi lamanaláa áminaló minamó nene ániagiaké sigaga nilago, Izesú láa loko lo kimimó:

6 Lekeza imane netá itína nánigamó nene alika gamena atító nene lova ve makolite imaneló gehani mukí apiliki tele vizikiko, gehani nene amupiló amupiló iki mililiki itekutí gululupa so asú inogo ive.

7 Loko lokago, keza loká itiki monó gizapa velemaka, itína lani netá nene nanahé gamena utó itive, itó nana anosa utó okiko ángokinake lani netá nene mota alévolé inogo ive loko litune.

8 Liki likago, eza láa loko limó: Ehe, lokogoka vizitakumú gizapa ilo. Vegená mukilite nanitiki nugulizató liki okulumakutí lumu ve gihila nezama nouve nilikoma, itó gamena mota ávatiha okave nilikoma, kêmegetiki vamilo.

9 Itó mikasi makotokatí lova napa hiziki niiko, itó holutikutí lova utó noiko, lekehelelele vizemino. Nenémini suni nene goí oko utó itive loko lonoimóza, mukí netá matá litá oko asú aminogo ive.

Gopoguni nimililikitiiko anosa napa utó itive

(Mat 24:3-14; Mak 13:3-13)

10 Loko loake, miní amike láa loko lo kimimó: Numutó namató ve mukí nenete gala venini lova ali nikimiko, agulizaki ve makolímini zuhagi makolímini zuhagi lova hizinigave.

11 Itó mukí mikasiuka imimá napa noiko haitopaitó mikasiuka gaúna gamena napa utó oko minoloko noitiko, itó vegená mukí kivise asú iti netá napa utó noiko, okulumató mulutini pou lití netaki utó noiko, anosa napa napa makó utó inogo ive.

12 Lá itimóza, ámina suni utó onamiko likigizató aliiki gopoguni mililikitiiki monó numukuki nagá numukuki goní ilikitatave. Lá niiki není nugulizá lekelitoka minakumule liki likigizató aliiki kugulizaki ve napatini itó kia-peginí kovogisaló likilími milikiko,

13 lekeza není mogonamú gili alévolé inamó nenémini gakoláa li utó iki li kimižave.

14* Nenémú itína lakagata gili nivevesiki láa liki li hukalo: Goní nikilitikoma nila gakotó nanave loko lo kimitupe liki goí iki lakagata gululusi gelenimo.

15 Nénisi lekegepa ale vávani okinake gakó loakatini lekemekugo litamó nenazo, gala velinite ma lekehelú aminigave.

16 Izotike ametike uvotike lekelí zuhagutí makolite likigivetike kezagi likigizató aliiki goní ilikimikiko, lekelitoka makó lugáa likipili hilitave.

17 Lá niiki není nugulizá lekelitoka minakumule liki vegená mukilite mukahá likipilitamóza,

18 likigika makó gopa aminogo ive. Avasavagi hanuva minanogo ive.

19 Lá itímó nenazo, lekeza alévolé iki oti minatamó nene, alévolé lekemeta-menigi minanigave.

Zelusale apá ali golesa itakumú epoapoga limó

(Mat 24:15-21; Mak 13:14-19)

20 Lá iki niiki, Zelusale apatoka lova vetini gimisigi vete iki hizi vego níkoma, lekeza nene netá matá otuhá apatekiko, gámé loló iti gamena alitokave liki gililo.

* **21:14:** Luk 12:11-12

21 Lá niiki nene Zutaia mikasigú nita vegená nene agokaló golisi nitiko, Zelusalega vegená nene, ámina apá nahuliko, Zelusale numutoka gahevaloka nia vegená nene nenegú iteminigave.

22 * Ámina gamenaló nene netá golesáinímini lihimaváini kimiti gamena nenazó, monó gotolaú luhuva gizinamóma utó oko alévolé o asú inogo ive.

23 Kee, izegipa kagatupagi nita venaki izegipa namuni aminí nikimita venaki, ámina gamenaló nene nana itamó neve. Imane mikasiuka genavagi netá utó okiko, Ómasímini izapaló molati netá nenémo imane mikasiuka vegená hize viginogo ive.

24 Lá okiko, lugáá sopolotunú likipili hiliiki lugáá nene nagá likimiiki numutó namató likilími milikiko, hetoka vete nene Zelusale apá lisiki nogotiki minilikí viki niiko, hetoka vegenalitini gamenaváini lutiginogo ive.

*Okulumakutí limi ve gihila atiginá iti gakó
(Mat 24:29-31; Mak 13:24-27)*

25 * Okulumató ho sonohí ikani nenémo haitopaitó avevezaha noiko, age nagamí valahuká zeko sasa loko noiko mikasiuka vegená mukí keza anó nigliki ininá niiki mulúini pou noliko,

26 okulumató amuzavagi netá mukí nene mómká i asú iki haitó suni alitamó nenazó, lá itakumú kehelele vizitítimo kovonana noviziko, mikasiuka alévolé suni utó inogo noitímó mulutini itinogo ive.

27 * Lá okiko, okulumakutí lumu ve gihila neza zámuzánegi itó lapanánegi nene límusi amupiló nolumugo ániganigave.

28 Nenemú ámina suni utó noiko, lekeza otí hee liiki okenava iki ánigiiki, gologí oletati gamena nene mota alitokave liki gililo.

*Gohuna zámini anzoa gakó
(Mat 24:32-35; Mak 13:28-31)*

29 Loko Izesú loake, anzoa gakó makó láá loko lo kimimó: Gohuna zahe za makó ahe ánigiiki gililo.

30 Za agila nene guluma sekago lekeza ánigiake hogáí gamena mota alitokave liki giliaká niave.

31 Ámináminoko nolu suni utó noiko Ómasímo gizapa oleketati gamena mota alitokave liki gilinigave.

32 Neza lamaná lo likimitoze, gililo. Imane gamenaló nia vegená velesá hili asú inamiko imane nolu netá mukí utó inogo ive.

33 Okulumaki mikasigi tolova itáiha, není gakó nene, ma gopa oko tolova aminogo ive.

Gizapa iki minalo loko loketamó

34 Ehe, lekeza lekemeni gizapa lamaná ilo. Negi nagí hizeaká sunímo itó negi nagamí vauva aleko noaká sunímo itó lakagata gululusi geleaká nenémo gena likivisekiko, gamena napa lekelitoka galinali utó olimikatize.

35 Ámina gamena napa nenémo gelehusigú nenéminoko imane mikasiuka numutó namató vegená mukí likipilinogo ive.

36 Lekeza Ómasímo amuza lekemekiko ámina utó ití netá olívé noinake okulumakutí lumu ve gihila není novogisál ote minatune liki Ómasiloka liki gizapa iliki viki minalo.

* **21:22:** Hos 9:7 * **21:25:** Isa 13:10; Zoe 2:31; Ali 6:12-13 * **21:27:** Tan 7:13; Ali 1:7

³⁷* Loko Izesú lo kemeake, gamena gamena nene monó numuni napagú gakó lo kemeake, holugú nene ámina apá ahuloake, zopega makó agulizá Olivi agoka nenegú iteko akoaká imó.

³⁸ La noigo, vegená mukínenete neteká holugú ake monó zavusavegú nene Izesutokatí gakó gilinigi alegesá iaká amó.

22

Izesuni apilinigi lova gizamó

(Mat 26:1-5; Mak 14:1-2; Zon 11:45-53)

¹ Lulu vizemi peleti niaká a holisi agulizá napa nene avóikini asenini zeketakumú gili mina holisi nene alitokago,

²* guguni giziaká ve napagi monó mogona apí-ikimiaká vegi keza vegená mukikumú kehelele vizekago, Izesuni apili hilinigi gapováamú hanuva gizapa iki minamó.

Zutá Izesuni amimika litove loko lo hutamó

(Mat 26:14-16; Mak 14:10-11)

³ Lá niago, Satá nene Izesuni vegenala zuha 12 keikutí Kaliotó numutotí ve Zutani mulunagú lemeake alémo vávani igo,

⁴ eza vike guguni giziaká ve napagi itó monó zavusavegú pilisí vegi gakó akó lake, Izesuni amimika loko keitoka alémoko atitímini gakola ligili hagili amó.

⁵ Lá niake, keza kogoliza vizeke hutono gehani nene Zutani amitune liki li hutamó.

⁶ Li hutikago, Zutá nene konotó aleko mukí vegená alegesá inamiko keitoka amimika linogo amapani molamó.

Izesú izegipala zuhagi asenini zekimiaká nosá namó

(Mat 26:17-25; Mak 14:12-21; Zon 13:21-30)

⁷ Lulu vizemi peleti niaká a gamena asenini zeketakumú gele minoaká holisimule liki sipsip iza akaleva apiliaká a gamenama alitokago,

⁸ Izesú nene izegipala zuhagutí losítá nene Zonímagi Pitámagi nokimisilike láa loko limó: Lekeza viki asenini zekimiaká nosá ali vavá ikisiko leza natune.

⁹ Loko lo kemekago, keza nosánetá hikú ale vavá onetativé loko nolane.

¹⁰ Liki likasigo, Izesú láa loko lo kimimó: Gililizo. Lekeza nene taoniiloka viki nanitisiko ve makolímo paisele somo nagamilagi geheneiko, gapoló hotu nilikima ámina ve ámegetiki viiki eza ititi numukú nene itilizo.

¹¹ Itiiki numuni amelahini láa liki li amilizo: Tisalémo nezagi izegipáne zuhagi avotegini asenini zeketakumú gele minoaká nosá natuni numuni agika nene híláauka neve liki loká ilizo loko lokago lo nogumusive.

¹² Liki likisiko, numuni agika veletó nego netá matá avilisá ohá lekelepizitive. Neneló nosánetate ali vavá ilizo.

¹³ Loko lo kemekago, vasike ánigasimó nene, lo kimimómáminoko nego ánigikasike, asenini zekimiaká nosánetáma ali vavá asimó.

Lepa nosá apí oko kimímó

(Mat 26:26-30; Mak 14:22-26; 1 Koli 11:23-25)

¹⁴ Lá ikasigo, nosánetá nata gamena alitokago, Izesúma aposologegei minake nosánetá niki minamó.

15 Lá iki niake Izesú láa loko lo kimimó: Imane asenini zeketakumú gele minoaká nosá nene miluma velesá gelenaminake lekezagi natune loko mulúnegú lamaná geleloko voko minumó neve.

16 Lá onoimóza, makó lo likimitoze, gili minalo. Nosánetá imane goha naminake minoloko voko Ómasímo gizapa oleketatitímini gapováa utó okiko nanogo uve.

17 Loko loake, vain goni makó aleake, Ómasi agepoka loake láa loko limó: Lekeza imane gona miliki nalo.

18 Gakó makó lo likimitoze. Imane gamenalotí veletó nene vain nagalímini gihilagutí goha naminake, minoloko vinake Ómasímo nugulizaki vetipo loló onetati gamena utó okiko natove.

19-20 Loko loake, peleti makó aleake, Ómasi agepoka loake gitegeko gona moloko nokimike láa loko limó: Imane není mémeláne neve.

21 * Lá onoimóza, ángalo. Není nimimika liti vegi holoma hamotó minusike, ligizani ahuloko nosánetá aleko noko nousive.

22 Okulumakutí lumu ve gihila neza vozo loko loneta gapoloka hilito gapogú novumóza, není nimimika liti vema nene agae, lihima genavagi alinogo ive.

23 Loko lokago, izegipala zuha keza éaho lá itikumú nolihe liki liake kezáitoka lokatoká amó.

Éaho agulizaki ve loló itive liki lova sava amó

24 * Lá iake, izegipala zuhamate lelikutí éaho agulizaki ve loló itive liki lova sava amó.

25 * Lá ikago, Izesú láa loko lo kimimó: Mikasiuka hanuva vegenalite gelekelé ikimiaké kagahisiuka limitigí iki niago kugulizaki véinite alévolekutí gizapa ikimiaká niave. Itó kugulizaki vete legepoka litave liki liaká niámóza,

26 * lekelitoka nene lá oko minamino. Lekelitokatí itiki minamoláate nene limiki mina vegená nenéminkí minataze. Itó lekelí gizapa ve nenete hanuva lemetylí iki gelekelé ve nenéminkí minataze.

27 * Lekelisi lilo. Éaho agulizaki ve noive. Nosánetá hanuva minoko natimó nenémohe, itó nosánetá vatá oko ale wavá otati ve nenémo agulizaki ve noihe. Hanuva minoko natimó nenémo agulizaki ve noitimóza, néni nene lekelí holutikú nene agulizaki ve suni alemoko gelekelé izegipagítana loló oko minoaká nouve.

28 Lekeza nene gasova netalímini agikagú nougo lekeza áminagú nilími vatí iki miniaká niave.

29 Améneho vegená mukí gizapa oketatane loko lonetamó áminámini oko neza hoza gakó nololeketuve.

30 * Lekeza gizapa okimiaká noutó miniki nosánetá niki lokogoliza vizitave loko itó gonanalivagi siató miniki Isilae vegenalitini mulusi 12 gizapa ikitiki gona milikitánigave loko nololeketuve.

Izesú Pitá egamega otatikumú epoapoga limó (Mat 26:31-35; Mak 14:27-31; Zon 13:36-38)

31 Saimon, Saimon, laisi lotuva lake gizaká iki alími etó iaká niámomáminoko Satá nene lekeza aí agizakú hilikiko gizaká oko lekelémo etó inogo lonoimóza,

* **22:21:** Age 41:9 * **22:24:** Luk 9:46 * **22:25:** Mat 20:25-27; Mak 10:42-44 * **22:26:** Mat 23:11;
Mak 9:35 * **22:27:** Zon 13:12-15 * **22:30:** Mat 19:28

32 nénisi nene gele alévolé animó nene gologolo samitive loko Ómasiloka loaká nouve. Lá onoumó nenazo, geza monó gapoló goha atiginá oko voko minokoko, gigivekagini hize lé oketozo.

33 Loko lo amekago, Pitá láa loko lo amimó: Guivahanínemaka, geza kalapusi numukupe itó gipili hilinitamope nezagi áminagú vinogo uve.

34 Loko lokago, Izesú láa loko lo amimó: Pitaga neza lo gimotoze, gelezo. Itína holugú nene okolocho nenémo velesá anó molonamiko geza nenikumú áninganamuve loko egamega onetatanimó gamena losive makole inogo ive.

Gopoguni mililitatamó nenémini amupiló minatunikumú ale vatí tuni gakó

35* Loko loake, láa loko lo kimimó: Goí oko nolikimisuluke, moni gúeaká gó itó akiseaká gó itó likigisaló suú aliki vamilo loko lo lukumu gamenaló nene nivake netá makokumú vitágá amó nehe. Loko lokago, keza óve liki likago,

36 eza láa loko lo kimimó: Lá ikamóza, itína gamenaló moni gúeaká gó ahe akiseaká gó ahe ale neiti vemámo aleko vitive. Itó sopoló hána alenamiti vémo nene hepé golalotí moni alekoko sopoló hána meina hizitive.

37* Neza lamaná lo nolukumuve. Monó gotolaú gakó makó láa liki luhuva gizinamó nene nenitoka utó inogo noive:

Netá golesa aliaká nia vetini kigivéipo noive liki aiki gatamó.

Itó monó gotolaú luhuva mukí nenikumú gizinamó nene nenitoka utó oko alévolé noive.

38 Loko lokago, keza nene Guivahanitemaka, ánigozo. Sopoló hána losi imane neve. Liki likago, eza není gakó gelemaze, áminasile loko lo kimimó.

Izesú zazuhagú Ómasiloka loko minamó

(Mat 26:36-46; Mak 14:32-42)

39 Nenetí hetoka lemeake vike, eza goí oko aleaká imómámini oko alinogo Olivi agokaú noitigo, izegipala zuhamate ámegetiki vamó.

40 Olivi agokaloka vo alí nolike izegipala zuha láa loko lo kimimó: Lekeza imaneló miniki lekemekú milatakumú gopa okatune liki Ómasiloka liki minalo.

41 Loko ahulokimiaké, alítóisí minomo novike, alapusa nohizike Ómasiloka láa loko limó:

42 Aménega, geza lá itove loko gelekokoma genavagi gihinitata netá imane nenitokatí ale olové itane loko nogulumóza, není nigikaloka molamoko geí gigikaloka molatane loko noluve.

43 Loko noligo, okulumakutí ageló makó limike utó o amike hize lé otamó.

44 Lá okago, miluma alévolé oko nogilike, amuza moloko Ómasiloka noligo, govisi apilímó nene golani nenéminoko mikasiuka aleloko limimó.

45 Lá noigo, Ómasiloka loko minatotí oteake, izegipala zuha niató goha oake, netá golesa utó itikumú miluma giliki kovó akinago oko áingoake,

46 kelémó oteake láa loko lo kimimó: Lekeza nanamú lokovó akinave. Lekeza otiiki lekemekú milatakumú gopa okatune liki Ómasiloka liki minalo.

Izesuni amímí okago alemó

(Mat 26:47-56; Mak 14:43-50; Zon 18:3-11)

47 Loko lo kemeko noigo, Izesuni vegenala zuhagutí ve makó Zutá áisi nene goí o kimigo vegená mukí iki Izesutoka iki alegesá amó. Lá ikago Zutá nene Izesuni agoka agepa legeko nanogo noitoka omo alí noligo,

* 22:35: Mat 10:9-10; Mak 6:8-9; Luk 9:3, 10:4

* 22:37: Isa 53:12

48 Izesú láa loko lo amimó: Zutazo, geza okulumakutí lumu ve gihila není nogoka negepa legeko nanogo nimimika linogo noape.

49 Loko lokago, Izesuni amatoka mina vete nene utó inogo i netá nánigake Guivahanitemaka, sopolotunú kipilitupe.

50 Liki nilake, keikutí ve makolímo nene guguni gizoaká ve napámini gelekelé izegipala nene sopolotunú apilike agata zamagaloka zeko isímó.

51 Lá okago, Izesú nenémini suni alemo loake, agizani lutoko ámina vemámini agataló ale nogilike agata alémo lamaná otamó.

52 Alémo lamaná omiake, guguni giziaká ve napagi monó zavusavegú pilisí vegi monó gizapa vegi Izesuni agizató alitune liki a vema láa loko lo kimimó: Lekeza nenikumú gelemó nene laskoli nougo sopololo hánagi gelekahosigi aliki niakte nigizató alinigi niahe.

53* Gamená gamena lekezagi monó zavusave napagú minoaká umó nene, nigizató alisá amamó neve. Lá ikamóza, itína nene lekelí gamena nego, límugusi amelahini Satani amuza netá mota utó okave.

Pítá Izesuni egamega otamó

(Mat 26:57-58,69-75; Mak 14:53-54,66-72; Zon 18:12-18,25-27)

54 Loko lokago, Izesuni agizató aliake, alímkí vake guguni giziaká vetini gizapa vémini numukú alímkí itemó. Lá niago, Pítá nene hotó otigí oko kêmegetoko novigo,

55 ámina numukú hé numunaló holutó nene ló giziake minamó. Lá iki niago, Pítá kezagi makó minamó.

56 Eza ló hanatolaloka ló lotá oko noigo, gelekelé vená makolímo ánígoake, gonukonú napilike imane ve nene Izesuki miniaká asi ve noive.

57 Loko lokago, eza egamega ike venáage, neza ánígonamu vemú nolane.

58 Loko lokago, koma noigo, ve makolímo Pitani ánígoake geza nene ámina vémini zuhagutí noane. Loko lokago, Pítá nene vémage, neza noamuve.

59 Loko lokago, gamena koma novigo, ve makó nenémo pigi vizeko ezagi Galilaia anoki ve noinazo, lamaná ezagi makó minasimó neitve.

60 Loko lokago, Pítá nene vémage, geza nolani gakoka ma gelemu gakó nolane. Loko noli agepagi okolohomámo anó molamó.

61 Anó molokago, Guivahanímo mino viligake avogisa o amike Pitani ánígamó. Ánígokago, Pitá eza Guivahnímo amunaló lota gakó nene itína okoloho nenémo anó molonamiko egamega onetatanimó nene gamena losive makole inogo ive loko lo ami gakóma goha nogilike,

62 agika hizekago, lemeko hetoka ive napa imó.

Izesuni gopoguka nilitake kigizanitunú apelemó

(Mat 26:67-68; Mak 14:65)

63 Lá okago, Izesuni agizató ali mina vete gopoguka nilitake kigizanitunú napeleke,

64 agómulaló lavolavo gotunú zi hitimiake láa liki lamó: Geza lo utó oko lo lemezo. Éaho nogipilive.

65 Liki liake, alivi letivi iki haitopaitó gakó litiki minamó.

Kansoletini kogómulaló Izesuni goní itamó

(Mat 26:59-66; Mak 14:55-64; Zon 18:19-24)

* **22:53:** Luk 19:47, 21:37

66 Niago, neteká gó lokago, Isilae mikasiuka gizapa ve keza guguni giziaká ve napagi monó mogona apí-ikimiaká vegi alegesá iake, monó kansoletini niatoka Izesuni alímiki viake

67 geza gologí oletative loko lo mololeta vema nookoma lo lemezo. Liki likago, eza láa loko lo kimimó: Neza lo likimitomó nene lekeza gili alévolé aminigave.

68 Itó áminamú loká oleketatomó nene lekeza nonotó aliki li nememini-gave.

69 Lá onoimóza, imane gamenalotí veletó nene okulumakutí lumu ve gihila neza amuza ve Ómasímini agizani lamagaloka minanogo uve.

70 Loko lokago, keza li amiki nilake láa lokoma geza Ómasímini gipala nouve loko nolape, olo. Liki likago, eza lá onoive liki lekezatini mota likave.

71 Loko lo kemekago, keza láa liki lamó: Áí gakola gilina vegená makó nanamú sele lokinake gakó makó gilitune. Áí agepagutí láa loko lokago mota gelekunimóma neve, liki lamó.

23

Izesuni alímiki Pilató noitoka vamó

(Mat 27:1-2,11-14; Mak 15:1-5; Zon 18:28-38)

1 Láa liki liake, keza mukító otiake Izesuni alímiki Pilató noitoka vamó.

2 Alímiki viake, apí iki goní itake láa liki lamó: Imane vémo leza Zuta vegená lelémo gopa oaká noiike, takisi moni nene Loma vegenalitini gamani agulizaki ve napa Sisani amemilo loko loake, ezáamú nene nugulizaki ve napa gologí oleketatove loko lo mololeketa vema nouve loko loaká noive.

3 Liki likago, Pilató eza Izesuni loká otake geza nene Zuta vetini kugulizaki ve napáini noape. Loko loká omikago, Izesú nene gezaka lokanimole.

4 Loko lokago, Pilató nene guguni giziaká ve napamagi mukí vegenámagi láa loko lo kimimó: Neza imane vémini lihimavalamú vitágá umó nomive.

5 Loko lokago, keza pigi vizeke láa liki lamó: Eza mukí vegená kelémo otopá zemo novike Galilaia mikasiuka apí oake, Zutaia mikasiuka vo asú okoko gakó lainim-oketomo novike imaneló omo anitekave.

Izesuni Heloté noitoka alímiki vamó

6 Liki likago, Pilató nene gakóini geleake, imane ve nene Galilaia mikasiuka ve noihe.

7 Loko loká okimiake, Izesúma Heloté gizapa onoi mikasiukatí ve noigo geleake, itó Heloté nene ámina gamenaló Zelusalega minamó nenazo, Izesuni nene Heloté noitoka alímiki vilo loko amiselekago, alímiki vamó.

8 Lá ikago, Heloté nene Izesuni gakó gozapá geleko minamó nenazo, Izesú nene avevezaha makó okiko ánigatonazo loko agata gelekelé oko noitotí nene Izesuni ánigoake agoliza goha vízimó.

9 Lá oko noike nene, Heloté nene Izesú oko moloko i netá mukikumú loká otamóza, Izesú nene Heloté li gakotó ma anotó aleko lo amemimó.

10 Lá noigo, guguni giziaká ve napamagi itó monó mogona apí-ikimiaká vemagi keza aí amatoka otinake amuza miliki goní itamó.

11 Lá ikago, eza ve golesa noigogitana Helotege itó gimisigi výate gopoguka litamó. Gopoguka limiake, agulizaki ve napámini luhoaká gó lamanaláa luhimiake, Heloté nene Pilató noitoka goha amiselekago vimó.

12 Lá okago, Heloteko Pilatoko keza nene gozapá gala ve lilí iki minasimóza, nenenetó goha zogo milasimó.

*Izesú hilitive liki goní itamó
(Mat 27:15-26; Mak 15:6-15; Zon 18:39-19:16)*

13 Lá ikasike, Pilató nene ve vená mukí itó guguni giziaká ve napagi monó gizapa vegi kelémo nupa oake,

14 lāa loko lo kimimó: Lekeza imane ve nenitoka alímiki iake, vegená kelémo otopá zeaká noive liki lamóza, lekelí lokovogisaló aí mogonamú vitagá umó nene, gililo. Lekeza netá matá golesa alikumú goní notune liki lamóza, neza nene vitagá umó ma ale utó amuve.

15 Heloteki eza ámina oko lihimavamú vitagá imó nene nomigo lelitoka amiselekago okave. Lá onoize, gililo. Eza nene netá golesa makó alilina, apele hulutilinamóza, lá oko nomimó nenazo,

16-17 neza lokugo uheni nagasunitunú apiliiki amisilikiko hanuva vitive. Loko lokago,

18 keza ganaganagó gamoga giki lāa liki lamó: Imane ve nene agoka legesó itize. Palapasini nene gologí omikako lelitoka ino.

19 Liki lamó nene Palapasí nene Zelusale apakuka gamaniloka lova gizoko kipili vémo lova hizeko ve makó apele helekago, nagá numukú ahulikago mina vemú lamó.

20 Lá noigo, Pilató nene Izesuni gologí otatove loko geleake, gakó goha lo kimimóza,

21 keza pigi viziki malipo zaló hilitikumule, zohota zaló hilitikumule.

22 Liki likago, Pilató goha lāa loko lo kimimó: Nanamú. Nana netá golesa alekago nilave. Aí apele hilituni mogona makó ale utó amuve. Lá onoinazo, neza lokugo, uheni nogosanitunú apiliiki amisilikiko hanuva vitive.

23 Loko lokago, keza Pilató li gakó zivi hitivi ake pigi viziki gakó napagutí zohota zaló nagá otamane liki la gakolímo Pilatoni gakó alémo amunauka imó.

24 Lá ikago, Pilató nene keza negénegeka liki lakumú keí gakó lá itove loko lo hutamó.

25 Lo hukoake, amunaló emane gamaniloka lova gizake lova ale utó oko ve makó apele heleake nagá numukú mina vemú gologí otative liki loká ita vema nene gologí omiake, Izesuni nene kezáini kagata gele netá lilí itave loko giminisi vetini kigizakú kimimó.

*Izesuni zohota zaló apelemó
(Mat 27:32-44; Mak 15:21-32; Zon 19:17-27)*

26 Lá okago, Izesuni nene apilinigi alímiki nivago ve makó agulizá Simon eza Apilika mikasiuka Sailini apatotí ve nene minaukatí taoniloka novike gapoló noigo ánigiake, agizató aliake zohota zama gihimikago, agínagú geheake Izesuni ámegetoko vimó.

27 Lá iki nivago, mukí ve vená kêmegetiki nivake, vená nenete miluma gitilake ive nama itimi vamó.

28 Lá iki nivago, Izesú nene mino viligoake lāa loko lo kimimó: Lekeza Zelusale venáise, nenikumú ive amiki lekezatinimú itó lekezatini izegipatin-imú ive ilo.

29 Gamenia makó alitonoimó nene utó okiko lāa liki litaze: Izegipa geti-nama vená itó izegipa nene aminí kiminama vená keza gohuna vená nene vatí iki minikave.

30 * Liki liiki ámina gamenaló nene agoka napamú nene agae, agoka vozaneka, zeko akutooko oko hitoletatapo, liki linigave. Itó agoka komamú iki zi hitilitalo liki linigave.

31 Loko loake, láa loko lo kimimó: Neza gosohá lokitana noumóza, není nene hanuva lokú gizatamó nenazo, lekeza osagava lokitana vegená nene nana ilikitatave.

32 Loko lokago, netá golesa aliaká asi ve losigi Izesunigi kipili hilinigi kilímiki vamó.

33 Kilímiki vake, apá makó agulizá gotóini gonosi helisa apale liki latoka anitiakte, nelélo Izesuni nene zohota zaló apilikí apatiakte, netá golesa aliaká asi ve losima makó nene agizani sogaloka hizeke itó makó nene agizani lamagaloka apilikí apatemó.

34 * Lá ikago, Izesú nene aménega, gili vevesamake gopa netá nalemó nenazo, geza lihimáini ahuloketozo, loko limó. Loko lokago, keza nene Izesuni luhoaká gola nene éaho alitihe éaho alitihe liki satu zohí amó.

35 Lá noigo, vegená mukí alegesá iki ánigi minamó. Lá niago, Zuta vetini gizapa ve nenete gopoguka litake láa liki lamó: Vegená kugutó vizeaká i vema eza Ómasímo alémo etó onoi ve nene gologí oleketative loko lo mololeketa vema nouve loko loaká i vema nenazo, ezáa agutó vizino.

36 Liki liake, giminisi ve nenetegi gopoguka nilitake ekesá vain nagamí natihé liki agokaú miliaké,

37 geza Zuta vetini kugulizaki ve nookoma, gezaka gugutó vizezo.

38 Liki li namego, velé gotolaloka luhuva makó nene imane ve nene Zuta vetini kugulizaki veninive liki gizikago minamó.

39 Lá onoigo, netá golesa aliaká asi vegutí magáámo láa loko Izesuni alevo letovo oko limó: Geza gologí oletative loko lo mololeta vema noitanimó nene, gezaka gugutó novizeko lezagi lugutó vizemane.

40 Loko lokago, maga véa nenémo gahá amike láa loko lo amimó: Ezagi lezagi goní nilitake, hilitave liki lilitinamóma nenazo, nohelenike geza Ómasimú gehelele vizemihe.

41 Loko loake, leza nene lihimatemaló apasiki lipili nihelemó nene vevesonoimóza, imane ve nene lihimavala nomi ve hakupá netá aliki apili niheleve.

42 Loko loake, Izesuni láa loko lo amimó: Izesuvu geza gugulizaki ve loló ooko gizapa okimiaká hoza alitani zupa nene nenikumú gele minatane loko noluve.

43 Loko lokago, Izesú láa loko lo amimó: Neza lamaná lo gimotoze, gelezo. Itína nene Palatisi zazuha apakú gezagi apizeko minanogo usive.

Izesú hilimó

(Mat 27:45-56; Mak 15:33-41; Zon 19:28-30)

44 Loko noligo, holisaka gamena nene hómíni silikakéna gopa noike mukí mikasiuka nene límugusi ze asú oake mino-loko novigo únaká ho ale zohota imó.

45 * Lá noigo, monó zavusavémini gatetó Ómasímini avogisaló iteaká gatetó zi lí ika lavolavo nene zeko hoú lo losi imó nene lelí gahe ale koló imó.

46 * Lá noigo, Izesú nene gakó napagutí nolike aménega, není nemeni nene geí gigizakú nomuluve. Loko loake, ahuu lo nahulake hilimó.

47 Lá noigo, lovámini gala vevatini gizapa vemámo utó i netáma ánígoake, Ómasímini agulizá ale otike lamaná imane ve nene hee loko noi ve minamó neve.

48 Loko lokago, ámina suni áníganigi alegesá ina vegéná nenete ánígiake, miluma napa giliake, kolómusaló zimi zimi atiginá iki numúítoka vamo.

49 * Lá niago, aí agivelagegi itó Galilaia mikasigutí ámegetiki a venaki keza nene hotó otigí iki otinake ámina suni ánígamó.

Izesuni gale zitamó

(Mat 27:57-61; Mak 15:42-47; Zon 19:38-42)

50 Lá ikago, ve makó minamó, agulizá Zosehé. Áisi nene Zutaia apá makó agulizá Alimataia loko noi numutó ve minamó. Eza ve lamaná itó veveso mina ve Zuta vetini monó kansole ve makó minamó.

51 Lá imóza, kansole lugáate Izesuni apilitune liki kagata giliake lova gizi hukakumú nene gele kememi ve nenémo Ómasímo gizapa okimiaká ve alémo utó iti gamenamú gizapa oko mina ve minamó.

52 Áisi nene Izesuni gonosiva alinogo Pilató noitoka vike loká omikago, gele amekago,

53 zalotí apasoko aleko lemeake, gizopa gó lamanakú asapú omiake, aleko voxo meikú geha mulí goló vatinakú nenegú ve vená makó gale zikitinamakú gale zetamó.

54 Palaitegú gale zetamó, avóikini asenini zeketakumú gili mina holisi gamena alí noligo nene.

55 Lá noigo, Galilaia mikasigutí Izesuni ámegetiki a vená nenete Izesuni gonosiváa nana oko gale zetatihe liki áníganigi Zoseheni ámegetiki vake gonosi milimilimagú viki ánígamó.

56 * Ánígiake, numúítoka atiginá iki vake gonosiváaló holotatune liki anuva hilina ali vavá amó.

Izesú heleneikutí otímó

(Mat 28:1-10; Mak 16:1-8; Zon 20:1-10)

Lá iake, ámina vená nenete holisígú Zuta vete li hukinamómaló nene kavasú viziki minamóza,

24

1 Sategú neteká holugú nene gonosiva mola apató vinigi anuvagi hilina ali vavá iki milamóma nene aliki vamo.

2 Vi anitiake ánígamó nene, geha mulí agepaló gehani napa zi hitamó nene aló ahelú i ámiginago ánígamóza,

3 keza áminagú itiake ánígamó nene Guivahani Izesuni gonosiváa ánígamamó neve.

4 Lá iake ámina netakumú negi nagi hiziki niago, ve losítá galinali utó ikasike, iki holúkú minasimó nene, luhoaká góini nenémo gizopa vaevae lokó minamó.

5 Lá noigo ánígiake ámina vená nenete kehelele novizigo, mikasiuka gupá zemó. Lá niago, ámina ve losi nenetosa láa liki li kemesimó: Hele vegenalitini apakú amenigi oteko noi vemamú nanamú vitagá niave. Eza imanegú noamive. Mota otópá zeko otekave.

6-7 * Lekeza Galilaia mikasiuka minake okulumakutí lumu ve gihila neza netá golesa aliaká nia vetini kigizakú nilími milikiko, zohota zaló nipili hilikiko, gamena losive makole minokinake goha otinogo uve loko lo likimi gakokumú goha lakagata giliaki minalo.

8 Liki likasigo, keza gozapá láa loko lo kimi gakómaloka goha kagata giliaki,

9 geha mulikú gonosi mola apáma ahuliake, goha atiginá iki vake, aí izekipala zuhagutí ileveníagi vegená lugáagi nene ániga sunimú avetó iki li kememó nene,

10 Maliá eza Magatala apatotí vená itó Zoañá itó Maliá magáa eza Zemusini izolaho itó vená makó lugáa nenete ámina gakó avetó iki aposoloma li kememóza,

11 aposolomate gakó imane gihila nilave liki gili alévolé amamó.

12 Lá niago, Pitá nene oteake gonosi mola apámaloka ololu loko vike geha mulikú gupá zeko ánigamó nene, lavolavo gó gizopa lamaná lositáma hanuva nego ánigoake, eza nene goha atiginá oko numutoka vike, ámina suni utó ikumú agata gululusi geleko minamó.

Emause numutoka nivasigo Izesú kêmegetoko vimó

(Mak 16:12-13)

13 Lá noigo, ámina gamenaló izekipala zuhagutí ve losi nene Emause numutoka vinigi gapoló vasimó. Emause apá nene Zelusalegatí hotó otigí oko 11 kilomita nenéminko minamó.

14 Lá iki nivasike, Izesutoka utó i netakumú ligili hagili iki nivasigo,

15 Izesú nene vogaláikutí utó oake makó vamóza,

16 kogómulaló hitonoigo, Izesú noive liki ánigi vevesamasigo,

17 eza gakó nene nana onoigo ligili hagili iki nivasive loko lokago, keza nene viki notesike kogoka kegepa muhelé noigo,

18 keikutí maga ve agulizá Kiliopá ave loko noi vémo anotó aleko láa loko lo amimó: Veno ve mukí iki Zelusale apakú ali nupa niamó nenete imane gamenaló utó i sunimú gili asú inamóza, géisi ve hamó nene gelemapae.

19 Loko lokago, eza nana suni utó ikumú nilasive loko loká okimikago, keza láa liki li amesimó: Nasalete numutotí ve Izesuni sunimú nolusive. Eza nene Ómasímini agepagutí gakó loaká ve minake, Ómasímini agómulaló itó vegentalini kogómulaló alévolé gakó loaká ve itó alévolé suni aleaká ve minamó neve.

20 Lá imó nemóza, lelí guguni giziaká vete napagi lelí monó gizapa vetegi apili ahulatake liki goní imikago, zohota zaló apiliaki apeteke apili hele vemú nolusive.

21 Itó goí oko Isilae mikasiuka gala vetini kigizakutí lelémo atiginá itihe loko gelenounimóza, gakó makó láa loko neve. Ámina suni utó ikutí nene gamena losive makole mota vokave.

22 Lá onoimóza, lelí zuhagutí vená makó lugáate iki likago ininá okune. Keza neteká holugú nene gonosi milimilimaló vake,

23 gonosiva ánigamake, ageló losi utó ikasike Izesú nene oteko agómulagi noive liki lasi gakokumú nene ámina vená nenete vamokitana ánigiake, atiginá iki iki avetó iki li lemémó.

24 Lá ikago, lelikutí makolititosa viki geha mulikú gonosi milimilima ánigasike, venalite iki avetó amómáminoko nego ánigasimóza, ámina ve nene agupeló ánigamasimó.

* **24:6-7:** Luk 9:22, 18:31-33

25 Liki likasigo, Izesú láa loko lo kimimó: Lekeza ve negi niasive. Mulutini lepa hizetígí onoigo Ómasímini agepagutí gakó liaká a vete gakó mukí luhuva gizinamóma nene gili zagemasive.

26 Ómasímo gologí oleketative loko lo mololeketa vema nene ámina miluma netá ali gihimikiko helekoko alika nene oteoko lapanala goha alitive likigó gizinamóma neve.

27 Loko loake, Moseki itó Ómasímini agepagutí gakó liaká a vetegi gizina gakó lo kemeloko novike, ezáamú monó gotolaú gizina gakó mukí nenémini mogonamú ale hee loko lo kimimó.

28 Lo kemeloko novike, Emause apá ali ávatiha iake, eza nene ámina apá avilegeko vinogo noigo,

29 keza agata aliki ho mota lemeake límugusi zinogo noize, lezagi makó akatune liki li amikasigo, Izesú nene gele kemekago, numukú nene makó itemó.

30 Itiki minake, nosá nanigi niake, eza nene mitó minake peleti aleake, Ómasi agepoka loake, gitegeake kimimó.

31 Lá noigo, kogómula panava zekago, Izesuni nene ánigi hee hee lasimó. Ánigi hee hee nilasigo, litá oko legemage imó.

32 Lá okago, keza lá liki ligili hagili asimó: Gapoloka gakó lo limike monó gotolámini mogona lo utó oko lo nolimike lelémó zaú okave.

33 Liki ligili hagili asike, litá iki otiki Zelusalega atiginá iki vasimó. Vi anitikasike, aí izegipala zuha 11-imagi agive lugáagi alegesá iki niago ánigikasigo,

34 ámina ve losítá nene litá iki avetó iki Guivahanitema nene lamaná oteko noike Saimoni utó o amekave.

35 Liki li kimikago, keza lá iki Izesúma gapoloka kêmegetoko vike nosánetá nanigi peleti gitigitó ánigi hee lasi gakó nene avetó iki li kemesimó.

Izesú izegipala zuhaloka utó o kimimó (Mat 28:16-20; Mak 16:14-18; Zon 20:19-23)

36 Izegipala zuhamate ámina gakó ligili hagili niago, Izesú nene galinali utó oake, ote minake hulu nene lekelitoka minino.

37 Loko lokago, keza ánigiake, ininá iake holosi utó okahe liki kehelele vizimó.

38 Lá iki kagata nigelego, eza láa loko lo kimimó: Lekeza nanamú ininá iki lakagata losi nigeleve.

39 Imane nezama lamaná utó nouve. Lekeza nigisa nigizatoka nuhúma ánigalo. Itó ánigiki iki nugupeló ali giliiki ánigi hee lilo. Neza nugupegi vegéná lahani utó okuve. Holosi nene nenéminiki niamave.

40 Loko lo kemeake, agisa agizani nene kelepizimó.

41 Lá okago, keza mulúikú agila guluma itímo velesá gili alévolé amake kagata losi nigelego, Izesú nene lekelitoka nosánetá ma nehe.

42 Loko loká okago, keza lotó gizina lagaha makó amiake,

43 ániginago aleko namó.

44 Itó Izesú láa loko lo kimimó: Neza lekezagí minunike Mosé lo hukoko li gakokú itó Ómasímini agepagutí gakó liaká a vetini gakokú itó Ómasi agepoka liká nama liká a gakokú nenikumú epoapo gakó luhuva gizamóma nene gihila ze asú inogo ive loko lo lekemeaká umóma neve.

45 Loko loake, monó gotolaú luhuva gizikago mina gakó nene gili vevesatave loko kigika kagata ale koló oake,

46 láa loko lo kimimó: Monó gotolaú gologí oleketative loko lo mololeketa vemú nene miluma geleko heleoko gamena losive makole galegú minooko heleneitikutí otopá zeko otinogo ive liki luhuva gizinamóma neve.

47 Itó aí agulizá nene numutó namató vegeñatoka vo asú oko vokiko, vegeñá keza giliiki kigika ali viligikiko lihimáini ahuloketative loko lonoive. Itó ámina hoza nene Zelusale numutoka apí iki alimi vitave liki luhuva gizinamóma neve.

48 Ámina netá ánígakumú avetó iki li kimita vegeñáma lekelisi niave.

49* Gilinahe. Améneho Sikalahula lehizeleketatove loko lo mololeketamó nene amiselekugo liminogo ive. Lá itomó nenazo, lekeza imane apá litá iki ahulamiki ageva iki niiko velé okulumakutí zámuza lekemekiko vitave.

Izesú okulumakú itimó

(Mat 16:19-20; Apo 1:9-11)

50 Loko loake, minake, numutotí kelémoko vike Petania numuni ali alitiki viake, agizani ale otike nónohá zeketamó.

51 Nónohá nozeketake ahuloketoko okulumakú itimó.

52 Lá okago, keza mulúikú agila guluma goha igo, Zelusalega atiginá iki vake,

53 guguni giziaká zavusavegú nene gamena gamena Ómasi agepoka liki minamó.

* **24:49:** Apo 1:4

Izesu Kilstoni Gakó Lamaná Zoní Luhuva Gizamó

Ómasímini agepagú gakotó mina vema vegená loló imó

1 Netá matá apí oko utó i gamena nene, Ómasímini agepagú gakotó mina vémo nene hanuva minake, mino-loko iteko minamó. Lá noike, Ómasímini amatoka minamó. Itó agepagú gakotó mina ve nenémo Ómasi minamó.

2 Áisi nene apí oko Ómasiloka minamó.

3 Minoake nene, netá mukí ale utó o asú imó. Netá hámakoláa áisi minamigo utó osá amimó neve.

4 Eza nene alévolé oko minoakalímini amelaho loló oko minake, alévolé oko minoaká nenémo vegená hize hanatoketamó.

5 Lapaná nenémo límugusigú hize hanatokago, límugusi nenémo lapaná nene apele helemimó.

6 * Ómasímo ve makó alémo etó oake, amiselekago, voko utó imó, agulzá Zoní.

7 Áisi nene vegená mukí keza aí gakó giliiki gili alévolé itave loko lapaná nenémini gakoláa lo utó oko minamó.

8 Lá imóza, Zoní ezáa nene lapaná amelaho minamive. Eza hanuva lapaná amelahini gakoláagó lo utó oaká imó.

9 Lapaná amelaho eza numutó namató vegená hize sata okimiaká noi vémo gamena nene zupa mikasigú utó oake minamó.

10 Áisi nene mikasigú utó oakaláa nene utó imóza, mikasigú netá mukí nene áisi ale utó imó. Ale utó oake mino-loko novike lemeko mikasigú utó okago, mikasigú vegená keza aí ánigi hee hee lamamó.

11 Lá ikago, ezáa ale utó i apakú utó imóza, vegenala zuhate lelikutí noize liake alími kamatoka amamó.

12 Kigikagú aí ali gúemoláa nene Ómasímini izegipala zuha lilí itave loko gapo veleketamó nene aikumú gili alévolé ina vegená nenémini itave loko gele kemeaká noive.

13 Keza nene izóike getakutí Ómasímini vegenala lilí iki gosohá utó amave, itó lugupegú golanímini gapogú viki gosohá utó isá amave. Ómasilokatí gosohá utó iaká niave.

14 Ómasímini agepagú gakotó mina ve nenémo vegená loló oake, vogalategú minoko aleko ike, nasahilí asapulagi gakó gihilagi ale-loko limigo, ániguahá. Aí okulumakú lapaná ánigunímó nene, amelahini gipala hamokó minake amelahini lapanala lelepizigo ánigunímóma neve.

15 Ái mogonáa nene Zoní gakó napagutí láa loko lo utó imó: Nénisi ámina vemú goí oko nene neza utó amugo emane amunalotí mino-loko iteko mina ve nenazo, ámina ve alika nemegesaló noamó áisi nene není nivilegeko noave loko lo lukumumómá neve.

16 Áisi nene vegená mukitoka netá mukí asapulagi nasahilí olimikago, hagitana alekogó minoaká noune.

* **1:6:** Mat 3:1; Luk 3:1-2

17 Ómasímo lokago, Mosé eza lo hukoko li gakokó luhuva gizo limimóza, Izesú Kilistó áisi aleko iteko nasahilí nene hagítana oletake gakó gihiláa lehizeletamóma neve.

18 Ómasi nene ve makolímohe makolímohe ánigonamive. Gipala hamokó ezáa nene Ómasi noive. Eza amelahini amatoka minake, amelahini mogonáa aleloko limike lo utó oko lo lemekave.

Monó nagamí holokimiaká vémo lo utó i gakó

(Mat 3:1-12; Mak 1:7-8; Luk 3:15-17)

19 Zelusale numutokatí Zuta vegenalitini monó gizapa vete guguni giziaká vegi monó zavusavegú gelekelé ve makoki kimsilikago, Zonitoka vi anitikáe, géisi éaga noane, gologí oletative loko lo mololeta vema noape liki loká imikago,

20 ezáa mogona egamega amike lo kimike lo utó ike neza gologí oleketative loko lo mololeketa vema minamuve.

21* Loko lokago, keza miní ameke goha loká itake itó géisi éagama noane. Gologí olimiaká vema velesá anitemiko okulumakutí goha ative liki lina ve Ilaizagama noape. Liki likago, eza nene Ilaizá noamuve lokago, géisi nene Ómasímini agepagutí gakó loaká ve makó Mosekitana noi ve ageva oko nominuhá vema noape. Liki likago, eza óve lokago,

22 láa lokoma geza éahoma noane. Geitoka limisilikago uhá vegenáma voko nanave loko lo kimitune. Gezakamú nanaye loko nolane.

23* Liki likago, Zoní láa loko lo kimimó: Ómasímini agepagutí gakó loaká ve Isaíá luhuva makó láa loko gizamóma neve:

Mikasi gomopalaló ve makolímo gakó napagutí Guivahanímimi gapo nene likigikagú ali hee liki vilitalo, loko nolive
loko giza gakó nene nenitoka alévolé okave.

24 Loko lokago, Palisaio monó vete kimsilikago Zonitoka viki anite ve nenete

25 áminamú goha loká itake lamó: Geza gologí oletative loko lo mololeta vema minamane, itó Ilaizaga minamane, itó Ómasímini agepagutí gakó loaká ve ageva nominuhá vema minamanimó nenazo, nanamú vegená nene monó nagamí holokimiaká noane.

26 Liki likago, Zoní láa loko lo kimimó: Neza vegená nagamikó holokimiaká noumóza, holutikú ve makó utó oake noimó nene lekeza ánigi guni isá amave.

27 Áisi nene némegetoko ova ova noive. Ámina veloka akohemunazo, aí gelekelé otoko hoza lagasó aletatomoki akohemuve.

28 Loko li netá nene Petania apatoka Zota nagamí vola helegaloka Zoní monó nagamí holokimiaká noitó utó imó.

Ómasímini sipsip iza akaleva ánígalo

29 Akiake gó lago, Izésú nene Zoní noitoka anitekago, hotó otigí oko volane noago ánígoake, láa loko vegenáma lo kimimó: Ánígalo. Volane áisi nene Ómasímini guguni gizoakálímini sipsip iza akaleva gihila nene numutó namató vegenalitini lihimaváini aí amupiló itekago agohí geeká noive.

30 Neza aikumú nene neza utó amugo emane amunalotí mino-loko iteko mina ve nenazo, ámina ve alika nemegesaló noamó áisi nene není nivilegeko noive loko lo lukumumóma neve.

* **1:21:** Mal 4:5; Gapo 18:15,18 * **1:23:** Isa 40:3

³¹ Neza nene gozapá ái nene ánigo hee hee lamumóza, lekeza Isilae vegetalita ámina vémini gakola lo lukumugo gilitave loko aniteuke monó nagamí apí oko hololeketumóma neve.

³² Loko Zoní nene loake, goha láa loko avetó ike lo kimimó: Neza Sikalahulímo okulumakutí nama luhusigitana oko lemeko ámina vémini amupiló aleneigo ánigumóma neve.

³³ Neza gozapá ái nene ánigo hee hee lamumóza, monó nagamí hololikimí aká hozaló nimisili vémo Sikalahú limike amupiló aleneiko ánigatani ve áisi nene vegená nene není Sikalahú holoketanogo ive loko lo nimimóma neve.

³⁴ Loko litoka lemeko noigo ánigumole loko mogonamú nene áisi nene Ómasímini gipala noive, loko limó.

Izesuni ganá izegipala zuha

³⁵ Akiake gó lago, Zoní ave itó izegipala zuhagutí ve lositá ámina mikasiló minamó.

³⁶ Niago, Izesú nene apá makotoka novigo, ánigoake, izegipala losima nene láa loko lo kimimó: Ómasímini sipsip iza akaleva ánigalizo.

³⁷ Loko lokago, keza nene gakó gilikasike, Izesuni ámegetiki vasimó.

³⁸ Víkasigo, Izesú nene viligoko ánigoake, lekeza nanamú niasive loko lokago, kezáini gakokutí Lavi velemaka, lelí gakokutí nene monó gizapa velemaka, geza hí numukú minoaká noane.

³⁹ Liki likasigo, iki ánigalizo loko lokago, keza ámegetiki vasike, numunáa ánigasike, ho ale zohota okago, áminaloka makó mini milasimó.

⁴⁰ Zonini gakó gilikasike Izesuni ámegetasi vegutí nene makó agulizá Etulú, eza Saimon Pitani agunala.

⁴¹ Áisi nene litá oko uvolahini Saimoni ánigoake, láa loko lo amimó: Leza Mesiani mota ánigokune. (Mesia nene Zuta vetini gakokutí, itó Kilistó nene Kiliki gakokutí, ámina agulizálímini mogonáa nene gologí oletative loko lo mololeta ve loko neve.)

⁴² Loko loake, Izesutoka alémoko vokago, Izesú nene ánigoake, láa loko lo amimó: Geza Saimoga Zonini gipalamaka, geí gugulizá Sipásí ave loko nomuluve. (Sipásí nene Zuta vetini gakokutí, itó Kiliki gakokutí nene Pitá, agulizálímini mogonáa nene geha sepepirzámo.)

Pilipoko Natanaecko Izesuni ámegetiki vasimó

⁴³ Akiake gó lago, Izesú nene Galilaia mikasiuka vitove loko agata geleake, Piliponi ánigoake, geza némegetozo.

⁴⁴ Loko limó nene, Pilipó ave Etulú ave Pitá ave nene Petesaita apatokatikó minamó.

⁴⁵ Itó Pilipó nene Natanaeni ánigoake láa loko lo amimó: Mosé lo hukoko li gakoki itó Ómasímini agepagutí gakó liaká a vete la gakoki luhuva giza vema mota ánigokune. Nasalete apatokatí Zoseheni gipala Izesunima.

⁴⁶ Loko lokago, Natanaé nene Nasalete apatokatí nana netá lamaná makó utó itive. Loko lokago, Pilipó nene láa lokoma oko ánigozo,

⁴⁷ loko lokago, Natanaé nene Izesutoka vo anitekago, ánigoake, Ánigalo. Imane ve Isilae ve gihiláa nenazo, agikagú soza gakó minami ve noive.

⁴⁸ Loko lokago, Natanaé loká otake geza hitóma nougo ániganímó neve. Loko lokago, Izesú nene Pilipó velesá gelémoko amigo, nimuza za mogonaló noako ánigumóma neve.

49 Loko lokago, Natanaé láa loko limó: Monó gizapa venemaka, geza lamaná Ómasímini gipala noane. Isilae ve lelí gugulizaki ve noane.

50 Loko lokago, Izesú láa loko limó: Nimuza za mogonaló noako ánígumómá neve loko lo gumutó gelekanike nenikumú gele alévolé onoape. Gelezo. Oko moloko umó imane nene avevezahaváa neve. Netá gihila gohaláa nene alika ánígoko gilinogo ane.

51 * Loko loake, miní ameko láa loko limó: Neza lamaná lo likimitoze, gililo. Lekeza okulumá koló okiko, Ómasímini ageló keza okulumakutí lumu ve gihila nenitoka tigá limigá niko áníganigave, loko limó.

2

Kana numutó ve vená losima ali agizakú vizemó

1 Numuni losítá akiake, Kana numutó Galilaia mikasiuka nene ve vená losima ali agizakú vizinigi nosánetá ali vavá niago, Izesuni izolaho áminaló noigo,

2 Izesú ezagi izegipala zuhagi alesa milikimikago, viki makó miniki nosánetá ninago,

3 áminagú mina vegenalite vain nagamíma ni asú ikago, Izesuni izolaho nene vain nagamíma mota ni asú ikave loko lo amimó.

4 Loko lokago, Izesú láa loko lo amimó: Vená geza nenemú nanamú nenitoka nolane. Nene není netáma neve. Neza alévolé netá loló ito gamenaváne velesá alitonamive.

5 Loko lokago, izolaho nene gelekelé izegipalama nene netá makokumú lo nolikimikoma ilo, loko lo kimimó.

6 Itó Zuta vegenalite litá iki kugupe nogokalavó iaká amó nenazo, ámina numukú nene nagamí goni sipisi gehanitunú lilí amó nene 6-ía minamó. Ámina goni napa hamopamó vaí itikumú nene somo ligizani luga luga asú igo ihiki lekiaká amó neve.

7 Lá okago, Izesú eza gelekelé izegipala nene lekeza nagamí ihiki nagamí goni napamagú lekilo. Loko lo kemekago, keza nagamí ihimi leki leki ago ago, goni napama nene vaí oake agepagó minamó.

8 Lá ikago, Izesú nene lekeza lugáa ihiki aliki viki nosánetá gizapa vema amilo. Loko lokago, keza ihiki aliki nivago,

9 ámina ha nagamilímó vain nagamí loló okago, nosá gizapa vemámo no gilimó nene laga imóza, hikutí utó ítimini mogona gele vevesamimó. Gelekelé izegipama kezáikó gili hee hee lamó. Lá igo nosá gizapa vemámo vená alimi ame vema sele loake,

10 láa loko lo amimó: Ve mukitoka nene vain nagamí lagaváa nene goí iki kimikago, niki niki kigikauka gopa okago, alika nene vain nagamí golesáa nene ihiki kimiaká niave. Nenéminkomá nemóza, géisi nene senísim okanike vain nagamí lamaná imane halá gekanike minanike minanike alika ale utó molokanimó nene vatí sunive, loko lo amimó.

11 Izesú nene Kana numutoka Galilaia mikasigú nene ámina alévolé suni apí ike, ezáa hazana kelepizekago, izegipala zuha keza nene ánígiake, aikumú gili alévolé amó.

*Monó zavusave lo hukoketamó
(Mat 21:12-13; Mak 11:15-17; Luk 19:45-46)*

* **1:51:** Apí 28:12

12 * Lá ikago, Izesú nene Kana numutó ahuloake Kapanao apatoka lemeko novigo, izolahove agunala izegipala zuha mukí keza ámegetiki vamó. Viki neneló gamena hána minamake,

13 * Zuta vetini avóikini asenini zeketakumú gili mina holisi alitokagove loko, Izesú nene Zelusalega iteko vimó.

14 Neneló Izesú ánigamó nene monó zavusave hé numunaloka pulumaká iza itó nama luhusi nene Ómasi guguni gizi amitave liki aliki ake, haitó mikasigutí moniló ámina mikasigú moni kimiaká a ve keza moni holomaló gatiká iki niago, ánígoake,

15 lepa nagá límegeake nakahuni loló oake, vegená niamó sipsip iza pulumaká iza niamó kepeleko kimisele ahula ahula igo, nivago, haitó mikasigutí moniló ámina mikasigú moni kimiaká a vetini holoma aleko gululupa soake gatiki mina moni aleko tulu ahuloake,

16 nama luhusi miliaká a vema láa loko lo kimimó: Aménehini numuni imane ali meina numuni lilí amilo. Imane netá hatoka aliki vilo.

17 * Loko Izesú lokago, izegipala zuha leza nene geí numunimule loko mulúne gitihiná imó nenémo nepele hilitimó okave liki monó gotolaú gizikago mina gakó goha gulunimó.

18 Lá okago, Zuta vetini monó gizapa vete láa liki li amemó: Geza némini manámini noanimóma éahini gakotó nalene. Haitó suni makó ale utó moloko mogonaka lelepizemané.

19 * Liki likago, konotó aleko láa loko lo kimimó: Lekeza monó zavusave imane tele vizikiko, nénisi nene gamena losive makole oko noviko, ge lutiginogo uve.

20 Loko lo kemekago, keza lamó: Avotege keza monó zavusave imane kilisimasí 46 oko novigo gi lutiginamóma neve. Itó géisi nene gamena losive makolegó noviko ge lutigitove loko nolape.

21 Liki lamóza, Izesú nene ezáa agupémini zavusavegú lo vizike limó.

22 Minoko heleneikutí gamena losive makole minake mómká oko otekago, izegipala zuha leza ámina netakumú Izesú li gakómagi monó gotolagutí gakó nenegi mota alévolé okago gelekunike, gele alévolé unimó.

Izesú ve mukilitini mogona gelekave

23 Izesú nene avóikini asenini zeketakumú gili mina holisigú nene Zelusalega noike, ezáa mogona utó itive loko alévolé suni haitopaitolímini loló okago, mukí vegená keza ánigiake, agulizaláa gili alévolé amóza,

24 Izesú ezáa nene mukí vegenalitini mogona ánigo asú okamó nenazo, keitoka voko ale akisemimó.

25 Eza ve makolímini mogona gilinogo voko vegenatoka loká miká oketosá amimó. Ezáagó vegená kigikagu ánigo asú oaká imó neve.

3

Izesuko Nikotemoko

1 Palisaio monó vetini kigivéipo makó minamó, agulizá Nikotemó. Áisi nene Zuta vetini monó gizapa venini makó minamó.

2 Ámina ve áisi límugusigú Izesú noitoka vike láa loko lo amimó: Monó gizapa velemaka, leza mogonaka geleká noune. Géisi monó apí o lemeaká ve gihila

* **2:12:** Mat 4:13 * **2:13:** Gá 12:1-27 * **2:17:** Age 69:9 * **2:19:** Mat 26:61, 27:40

minokanike, Ómasilokatí lemenimóma neve. Ve makó nenémo Ómasi aitoka minamiko loló oaká noani suni aleko alévolé netá loló oakaláa nene nomive.

³ Loko lokago, Izesú láa loko lo amimó: Neza lamaná lo gimotoze, gelezo. Makó nenémo okulumakutí gosohá utó amitimó nenémo Ómasímo alévolé oko gizapa olíkimiaká apá ánígaminogo ive.

⁴ Loko lokago, Nikotemó láa loko limó: Íi, mota napa okatímo nana oko gosohá utó itive. Nana oko izolahini agatupagú itekiko goha getatikumú lane.

⁵ Loko lokago, Izesú láa loko lo amimó: Neza lamaná lo gimotoze. Makó eza monó nagamí holoko Sikalahulímini agikagú vo holokoko gosohá utó amitimó nenémo Ómasímo alévolé oko gizapa olíkimiaká apakú iteminogo ive.

⁶ Vegenalititokatikó utó itamó nenete vegenalitini kemetamenigi utó ini-gave. Sikalahulímítokatí utó itamó nenete Sikalahulímini ametamenigi utó inigave.

⁷ Lá onoinazo, lekeza okulumakutí gosohá utó itave loko lumó nene geza gelekako gena amino.

⁸ Hepé nene gopa aleaká noive. Lá noigo hepelímini anó giliaká niamóza, mogonáa hitotí apí oake aleaká noive itó vike hitoka lutegeaká noihe nene gelemave. Itó Sikalahulímítokatí utó ita vegenalitini mogonáá ámináminoko nene neve.

⁹ Loko lokago, Nikotemó nene gakó lanimó nene mogonaló gelemu gakó laninazo, nana oko utó itive.

¹⁰ Loko lokago, Izesú láa loko lo amimó: Géisi nene Isilae vetini gakó apí o kemeaká ve noanimó nenazo, gakó nolumómámini mogona nanamú gele gopa okane.

¹¹ Neza lamaná lo gimotoze, gelezo. Leza nene ánígoko gele nouni netá áminagó lo lekemeaká nounimóza, lekeza nene gakote gili ahuliaká niave.

¹² Neza mikasigú utó oaká noi netakumú lo lekemekugo, gili sekétigí amanazo, nenémú okulumakú utó oaká noi netakumú lo likimitomó nene, nanatitoti gili sekétigí itave.

¹³ Lekelikutí ve makolímo okulumakú iteko okulumakú noi netá nene keké ánígonamimóma neve. Okulumakutí lumu ve gihila néni Ómasilokatí lumumó nenazo, neza okulumakú noi netá nene ánígonoumóma neve.

¹⁴* Mosé nene gozapá mikasi gomopalaló gosihakitana avevezaha netá loló oake zaló ale otimó nene gosihámate kepele vegenalite áminaló ánígiiki goha lamaná itave loko lá imó nene nenémíni okulumakutí lumu ve gihila néni nene malipo zaló nilími otinigave.

¹⁵ Nilími otikiko nene, nenikumú gili alévolé itamoláa keza alévolé kemeta-menigi minanigave, loko limó.

¹⁶ Ómasímo numutó namató vegená lelikumú milumavate gilimó nene napa napa nego gipala hamokó lehizeletamó nene aikumú gili alévolé ita vegená keza latila amiki alévolé kemetamenigi minanigave loko lá imó neve.

¹⁷ Gipala nenémo mikasiuka vegená lihima kimitove loko nomive. Kelémo kugutó vizitive loko Ómasímo amiselekago limimó neve.

¹⁸ Makó keza Ómasímini gipalamú gili alévolé itamó nene, Ómasímo lihima kememinogo ive. Makó keza gili alévolé amitamó nenete Ómasímini gipala

* ^{3:14:} Nam 21:9

hamokó aí agulizá gili alemamó nenazo, nenemú Ómasímo mota lihima kiminogo ive.

¹⁹ Lihima kemeaká nenémini mogoná lá oko neve: Okulumakutí lapaná nene mikasiuka vegentalini kovogisaló ale utó okugo, keza nene netá golesa aliki miniaká amó nenazo, keza lapaná nene ahuliake, límugusímimi mututoni mini etó amó neve.

²⁰ Makó keza netá golesa aliki minatamó nenete Ómasímini lapaná ke-megesa amiikki kezáini miniki aliki amó nenémini mogoná utó okative liki Ómasímini lapanató isá amave.

²¹ Makó keza netá gihila aliki minatamó nenete Ómasímo hize lé okimikago iki miliki amó nenémini mogoná utó itive liki lapanalámini avogisaló ani-gave.

Áisi minomo iteko minatimóza néniși minomo lemeko minanogo uve

²² Lá iki miniki, Izesú nene izegipala zuha lelémoko Zelusalega ahulokunike, Zutaia mikasiloka voko minuhá. Neneloka makó minuniķe nagamí holoketoko minuhá.

²³ Ámina zupa nene Zonini nene velesá nagá numukú alími milamago, Zoní nene Salima apá agilikaloka minake, Aeno loko noi numutoka minamó.

²⁴ * Neneló nagamí mukí minokagove loko vegená anitikago, monó nagamí holoketoko minuhá.

²⁵ Lá okago, Zuta ve makolímo Zonini izegipala zuhagi nagamí holokimi-aká sunimú pelevesava zemó.

²⁶ Lá iake, Zonitoka viki láa liki li amemó: Tisalemaka geza Zota nagamí vola helegaloka noako, gezagi makó minasi ve mogoná lo utó moloko lo lemeni ve nenémo itína gamena nene vegená nagamí noholoketago, mukí vegená ahuligitiki aitoka vi asú niamole.

²⁷ Liki likago, Zoní láa loko lo kimimó; Ve makó nenémo okulumá amelaho netá matá amemikoma ezáa hagitana alitihe.

²⁸ * Neza gologí oleketative loko lo mololeketa vema minamuve loko lo lukumumóma neve. Ámina ve ale goí otoko gapova veletatane loko Ómasímo nimiselekago umóma neve.

²⁹ Vená ánígi milita ve áisi vená ve loló okoko agoliza noviziko, agivelaho gelekoko alémo vatí oko mulunagú lamaná gilinogo ive. Nenéminoko mukí vegená nene Izesutokagó nivago gelekuke mulúnegú agila gulumá itimó nenémo hutilí oko vaí oko minative.

³⁰ Ámina vémini agulizá nene minomo iteko minatimóza, néniși minomo lemeko minanogo uve.

Okulumakutí limi ve

³¹ Veletokatí limimó áisi livilegeko noive. Makó nene mikasigutí utó amó nenete mikasimini mututoni lili inigave. Lá iki mikasigutí gakó linigave. Itó okulumakutí limi ve nenémo livilege asú onoive.

³² Áisi nene netá matá geleko áníga netakumú loaká noimóza, aí gakó giliáke amegesaló mila vegená mukí niameave.

³³ Gakoláa gili alitamó keza Ómasímo lokago alévolé oaká noi veve liki nene gakó hize lé iaká niave.

* ^{3:24:} Mat 14:3 * ^{3:28:} Zon 1:20

34 Ómasímo amiselekago limi ve áisi nene Ómasímini Sikalahula gúe vaí omiake Ómasímini gakokó loaká noive.

35 * Amelaho eza gipala ánigo amu heleake, mukí netá nene gipalámini agizakú molo asú okave.

36 Makó nenete Ómasímini gipalamú gili alévolé itamó keza alévolé kemeta-meni mota alikave. Itó makó keza gipalámini gakó gili ahuliiki mihina itamó keza alévolé kemetameni aleminigave. Nenémini amupiló Ómasímini mesaha ititokó minanigave, loko limó.

4

Izesuko Samalia venako

1 Palisaio ve keza Izesukumú láa liki gelemó: Zoní nene vegenala zuha luguhakó kelémo moloko monó nagamí holokimiaká noimóza, Izesú nene vegená mukí kelémo moloake holokimiaká noive.

2 Nene gakó nene hanuva lamó. Izesú nene izegipala zuha lo lemekago lezategó monó nagamí holoketunimó. Lá okago, Izesú nene gakó geleake,

3 Zutaia mikasi nene ahuloake, Galilaia mikasigú goha vimó.

4 Novike nene, Samalia mikasiuka vo anitimó.

5 * Samalia mikasigú apá makó agulizá Sika loko neneloka anitimó. Ámina apá nene ká emane amunaló Zakopó eza mikasi makó nene gipala Zoseheni animómámini agilikaloka minamó.

6 Lá okago, áminaló nene Zakoponi nagamí gale minokago, Izesú nene áminaloka holínaka vo aniteake, gapo vike vitímo agizamuha zekago, ámina nagamí galeló minamó.

7-8 Noigo, aí izegipala zuha leza nosánetá meina hizinogo numutoka itekuko, Izesú ezágó noitoka Samalia vená makó nagamí ihitove loko amó. Oko anitekago, Izesú nene nagamíma ihe nemezo loko lokago,

9 * Zuta vegi itó Samalia vegi nene otopá ziki miniaká amó nenazo, ámina vená nenémo geza Zuta ve neneka nanamú Samalia vená nenitoka nagamikumú voká nolane.

10 Loko lokago, Izesú láa loko lo amimó: Geza Ómasímo gimiti netalímini mogona gelemane. Itó nagamí ihe nemezo loko nolu ve není mogona gelemane. Geza není mogona geletilina, itó alévolé oko mino-loko voakalímini nagamikumú loká atilina, gumuline.

11 Loko lokago, vená nenémo láa loko limó: Ve lamanámaka, gale hána nenazo, itó geí nagamí iheaká netá nominazo, alévolé oko mino-loko voakalímini nagamí hikutí iheko nimitane.

12 Avoteho Zakopó eza nagamí gale imane ligimó nenazo, ezáagi gipalagi iza galavagi keza áminagutikó niaká amó. Itó géisi nene Zakoponi avilegeko nagamí makó haitolímini ale utó inogo nolape.

13 Loko lokago, Izesú láa loko lo amimó: Nagamí imane natamóza, goha nagamikumú likivisinogo ive.

14 Není nagamí nene lakagatupa oaká nagamí neve. Makó keza nenitokatí nagamí natamó nene, goha nagamikumú kiviseminogo ive. Nénisi nene nagamí kemekugo nene kigikagú agómula minati nagamí minokiko alévolé kemetamenigi minimi itiki minanigave.

* **3:35:** Mat 11:27

* **4:5:** Apí 33:19; Zos 24:32

* **4:9:** Eze 4:1-5; Nia 4:1-2

15 Loko lokago, vená nenémo ha nagamikumú nolihe loko láa loko lo amimó: Ve lamanámaka, geza ámina nagamí nemekako, nokinake nagamikumú goha nivisemiko, imaneloka gamena gamena oko nagamí iheva iheva oaká noumó nene ahulokinake navasú vizeko minatoha.

16 Loko lokago, Izesú ezáa mogonamú gele hee litive loko láa loko lo amimó: Voko vaka nene alémoko ano.

17 Loko lokago, vená nenémo váne nomimó nena. Loko lokago, Izesú láa loko limó: Geza váne nomive loko lamaná lokanimóza,

18 géisi nene veló vanimó nene ligizani lugaloka asú igo vokanike animóma neve. Itó itínasa vonani ve nene geí vaka nomive. Nenemú geza soza lamane.

19 Loko lokago, vená nenémo láa loko limó: Ve lamanámaka, itínasa mota gelekuve. Geza Ómasímini agepagutí gakó loaká ve noane.

20 Leza Samalia vegenalitini avotege nene imaneló Gelizim agokaló Ómasi geké limiaká amó. Itó Zuta ve lekeza Zelusalega Ómasi geké lotatune liki liaká niamóma neve.

21 Loko lokago, Izesú láa loko limó: Vená geza lo gimitoze, geleko alezo. Gamena makó alitokaze. Nene alitokiko nene, aménehini imane agokalokó negopa, itó Zelusale numutokagó negopa, mukí apatoka gupá zi amiki monola litave.

22 Lekeza gili gopa iki nene gupá zi amiaká niave. Lukugutó vizeaká nene Zuta ve lelitokatí utó itinazo, Zuta ve lélishi gele hee lo nounike Ómasi gupa ze ameaká noune.

23 Gamena makó alitanogo ive. Itó imane litá oko mota alitokaze. Nenemú vegenala zuha lamaná keza kigikatunú itó gakó gihilatunú aménehini gupá zi aminigave. Améneho nenéminiki gupá zi amita vegenakumú vitágá noive.

24 Ómasi nene sikalahú nenazo, leza Ómasímini Sikalahulímimi zámuzatunú itó gakó gihilatunú gupá ze amitune.

25 Loko lokago, vená nenémo láa loko lo amimó: Gologí oletative loko lo moleta ve (leza Kilistó ave loaká nouhá ve) utó itive liki likago gelenoumó nenazo, nene mota gelekuve. Eza utó okoko netá matá muki nene lo utó o asú inogo ive.

26 Loko lokago, Izesú gakó lo nogumu ve nénisi nene noumole, loko lo amimó.

27 Loko noligo, izegipala zuha leza okunike, ámina Samalia venaki gakó lasimó nenemú sigaga lomikunike, nanetakumú nolihe itó nanamú gakó lo namihe loko loká otanogo gena livisekago ahulunimó.

28 Lá okago, vená nenémo nagamí goni nene ahuloake, ololu loko taoniloka vike mukí vegená láa loko lo kimimó:

29 Lekeza iki imane ve ánigalo. Ánigonamu ve áisi nene asugunatoka oko moloko umó nene gakó lo utó molo asú onimikave. Lá imó nenazo, eza gologí oletative loko lo moleta vema noitihe.

30 Loko lokago, numutokatí lemeke Izesú noitoka anitikago,

31 izegipala zuha leza gala vizeko monó gizapa velemaka, nosánetá nozo.

32 Loko lokuko, eza láa loko lo limimó: Nosánetá haitolímimi nenitoka nemóza lekeza gelemave.

33 Loko lokago, lezatetoka logele hagele unike makolímo nosánetá makó ale ma amekago lihe.

34 Loko lokuko, eza limó: Nimisilimó eza lititoka molatitoka oko hoza gakó lonetamó nene nalumó nenémo nosánetáne neve.

³⁵ Lekeza ikani losive makole goloko helekiko nosánetá omolanogo ive liki liaká niamóza, lo likimitoze, gililo. Lokogómula pulusiki aménehini mini nene ánígalo. Nosánetá mota omolamó nenémini iki vegená kigika mota ali vavá iki niminave.

³⁶ Loko lo nolukumu gakó nenémini hozaváa alita ve nenete meinaváa alinigave. Alikiko vegená makolite alévolé kemetameni ali luhanigave. Lá ikiko, kigikagú monó zuha atilí a vegi gihila lege vegi ali apiziiki kogoliza vizinigave.

³⁷ Lá okiko, makolímo zuhá okago, makolímo gihila lege moloaká noive liki liaká nia gakóma alévolé inogo ive.

³⁸ Lekeza ali zuhá amikima gihiláa ligitave loko likimiselekumóma neve. Vegená makolite hoza aliki ali zuhá ikago mota omolokago, lekeza hozanímimi gihila hanuva milikave.

³⁹ Loko lokago, Samalia vená nenémo netá matá oko moloko umóma lo utó molo asú onimikave loko lo kemekago, ámina apakú vegená mukilite Izesukumú gili alévolé amó.

⁴⁰ Lá iake, Izesutoka vi anitiake, makó minatune liki alesa milikago, gamena lositá kezagi makó minamó.

⁴¹ Kezagi minake monó lo kimigo, mukilite gili seketigí amó.

⁴² Lá iake, ámina vená nene láá liki li amemó: Leza ganáma nene géisi avetó okako geleháma neve. Lá unimó nemóza, itínasa nene ezáa agepagutí gakó ligo gelekunike gele alévolé okune. Áisi lamaná numutó namató ve lelí lugutó vizeaká ve noive loko mota gele alévolé okune, liki lamó.

Izesú kiapé makolímini gipala alémo zokamó

⁴³⁻⁴⁴* Izesú ganá nene Ómasímini agepagutí gakó liaká ve kezáini numuni apáitoka minikikoma nene, ma kilími napa aminigave loko likumú nene Izesú eza kezagi gamena losima minoake, Galilaia mikasiuka vimó.

⁴⁵* Galilaia mikasiuka vo anitekago, Galilaia vegená keza amunaloka Zelusalega viake avóikini asenini zeketakumú gele minoaká holisigú eza hoza aligo ánígamó nenzao, nenémú Izesuni alími milamó. Lá ikago, Kana numutoka Galilaia mikasigú nene amunaló emane Izesú lokago hanuva nagamilímo vain nagamí loló i numutoka atiginá oko vimó.

⁴⁶* Voko noigo, Kapanao numutoka kiapé makolímini gipala avisekago, noigo,

⁴⁷ Izesú eza Zutaia mikasi ahuloko goha atiginá oko Galilaia mikasiuka oko nantitive liki likago, geleake ámina kiapé nene gipala helesakosá oko noigove loko Kapanao numutoka alémoko vitove loko Izesutoka vike negénegeka limó.

⁴⁸ Negénegeka lokago, Izesú nene lekeza lu avevezaha la avevezaha nougo, ánikiye gakóne gili aliaká niahe.

⁴⁹ Loko lokago, ámina vémo limó: Ve lamanámaka, gipáne helekatize, litá oko lomano.

⁵⁰ Loko lokago, Izesú nene geza hanuva vozo. Gipaka mota zokokave. Loko lo amekago, ámina vemámo Izesuni gakó gele aleake, atiginá oko vimó.

⁵¹ Novigo, gó lokago, gelekelé vemate gapoló anitiki gipaka mota zokoake noive.

⁵² Liki likago, zoka gamenamú loká oketago, keza azozá ho luseteló nego agupegú govisi alike hakalotave.

53 Liki likago, gipámini amelaho nene mogonamú lá oko gilimó: Ámina gamenaló Izesú nimisilike gipaka mota zokokave loko limóma neve. Loko gealeake, ezáagi vená izegipalagi Izesukumú gili alévolé amó.

54 Izesú nene Zutaia mikasiukatí oko Galilaia mikasiuka atiginá ike lu avevezaha la avevezaha nene igo, losi imó.

5

Nonohulotó ve makó alémo zokamó

1 Minoko Zuta vetini holisi napa makó alitokago, Izesú nene Zelusalega itímó.

2 Neneló sipsip izatini gatetó nene nonohuló makó minamó, agulizaláa Petezata. Agilikaloka gaizopa numuni ligizani lugaloka asú igo minamó.

3 Ámina numukú nene kivisi vegená, kogómulaó ali vegená, kigisaló ali vegená, kigisa kigizani nakeseta vegená mukí aki miniaká amó.

4 Lá amó nene Guivahanímini ageló makolímo gamena makó zupa lemeaká noiko ámina nagamí ale heipeí oaká itotí ámina nonohulokú ganá lími ve nene avisi netakutí zokoaká imó nenazo, keza nagamíma heipeí itikumú gizapa iki minamó.

5 Lá iki minakú nene ve makó agisa genisi i ve izolaho getakutí kilisimasi 38 oko novigo alímiki áminaló ahulikago minamó.

6 Noigo, Izesú eza ámina ve ánigoake, gamena hána hána minokave loko gealeake, loká otake geza zokatove loko ma gelenape.

7 Loko lokago, agisa genisi i vemámo limó: Ve lamanámaka, hí ve noitímo nagamí nonohulóma heipeí noiko nagamikú nelémo molokíko zokatove. Liminogo nougo, makolímo litá oko nivilegeake lemeaká noive.

8 Loko lokago, Izesú láa loko lo amimó: Geza oteoko avilisaka geheko gapo moloko vozo.

9 Loko li agepagi agisa golesa i vemámo agisa pehe lo ahuloake, oteko avilisala geheko gapo moloko vimó.

Ámina hoza nene holisi zupa alimó.

10 * Nenemú Zuta vegenalitini monó gizapa vete ve zokamó nene itína holisimagú nenazo, avilisaka ale nogehenimó nene amosá suni alekane.

11 Liki li amikago, eza láa loko lo kimimó: Nelémo zoka vemámo avilisaka geheko gapo moloko vozo loko loake nimiselekago aleko nouve.

12 Loko lokago, keza láa loko lo gimi ve agulizá éahoma neve.

13 Liki lamóza, Izesú nene mulusi ikú holúikú legesá oko vimó nenazo, alémo zokago mina vemámo agulizaláa gelemimó nenazo,

14 gelemuve loake, monó zavusavegú iteko noigo, Izesú minoko aí ánigoake láa loko lo amimó: Gugupega mota lamaná okaze. Nenemú alika genavagi netá gizalekatanize, lihima netá goha alemo.

15 Loko lokago, ámina ve eza Izesuni ánigo hee loake, vike Zuta gizapa vema ánigoake nelémo zoka vémini agulizá Izesúma neve, loko lo kimimó.

16 Holisigú holisigú hoza nenémináa aleaká ikumú nene Zuta vegenalitini monó gizapa vete nenelotí apí iki gopoguni militake lovaga li amemó.

17 Lá ikago, Izesú láa loko lo kimimó: Améneho hoza aleaká noimó nene holisi gamenagi miní ameko aleaká nouve. Itó nezagí áminagó oko aleaká nouve.

* **5:10:** Nia 13:19; Zel 17:21

18 Loko lokago, Izesú nene Zuta vetini holisi ale gopa ikumú, itó Ómasimú nene aménehove like Ómasigi nezagi lelegí oko nousive loko likumú nene Zuta vetini monó gizapa vamate ámina netá lositakumú nene gili golesa goha ake, apele hilitune líki amuza golesa miliaká amó neve.

Ómasímini gipalámo lihimamú lo hukoketanogo ive

19 Lá okago, Izesú nene gakó láo loko lo kímitoze: Neza lamaná lo likimitoze, gililo. Neza Ómasímini gipala noumóza, nezáne nagata geleko hoza alitomoláa nomive. Améneho alímó nene ánígouke áminagó oko aleaká nouve. Améneho oko moloko noimó nene gipala neza ánígouke, áminagó oko oko moloko oaká nouve.

20 Améneho nene gipala není ánígo amu heleaká noikey, hoza nalimó nene nelepize asú oaká noive. Itó lekeza hoza nalugo ániakiá niámó nenegó nomive. Lekeza ánígiiki sigaga linitatave loko améneho eza hoza napa lekelepitizote loko neve.

21 Améneho eza hele vegená kelémo otike kelémo lamaná oaká noimó ámináminoko gipala neza aipe aipe kemetameni gosohá kímitove loko hanuva kíminogo uve.

22 Améneho eza vegenalitini lihimamú lo hukoketosá amive. Ámina hoza mukí nene gipala není nigizakú molokamó nene

23 vegená mukilite aménehini agulizá ali otiaká niámó nenémini iki gipala není nugulizá ali otitave loko neve. Makó keza gipala není nugulizá ali otéma vegenalite gipala nimisilimó aménehini agulizá ali otémamó geleaká noive.

24 Neza lamaná lo likimitoze, gililo. Makolímohe makolímohe není gakó gelekoko nimisili vemú gele alévolé onoimó nenémo alévolé ametameni mota alekave. Aliká lihimalamú goha goní aminogo ive. Heleaká ametameni nene ahuloake alévolé ametameni mota aleake noive.

Izesuni mogonala li utó a ve

25 Neza lamaná lo likimitoze, gililo. Gamena makó alitanogo ive. Itó imane litá oko mota alitokave. Neneloka helemó nenete Ómasímini gipala není nonó lupa giliiki otíiki minanigave.

26 Améneho eza alévolé oakalímini mogonáa neve. Gipala neza áminagó oko alévolé oakalímini mogonáa minatane loko nimisilimó.

27 Lá okago, neza okulumakutí lumu ve gihila nounazo, améneho nene mukí vegenalitini lihimáinimú lo hukoketatané loko lonetamómá neve.

28 Imane nolu gakó giliiki nene ininá amilo. Gamena makó molamó nene hanuva neze. Nene alitokiko, gonosi apakú akinamó keza nonó lupa giliiki,

29* galegutí otinigave. Lá iiki netá lamaná aliki minamoláa keza alévolé kemetameni otinigave. Itó netá golesa aliki minamoláa keza otikiko, lihima kíminogo uve.

30 Lá itomóza, nezáne nagata geleko hoza alitomoláa nomive. Améneho lokiko nene, lihimamú lo hukoketanogo uve. Lá inake, lihimamú hoza alekugo, etanogo ive. Ámina hoza alitomóza, nezáne nagata geleko alemoko nimisilimó áisi lítitoka molatitoka oko alinogo uve.

31 Nezáne mogonáne lo utó itomó nene, gihila zemitinazo,

32 makolímo mogonáne lo utó okiko gihila zinogo ive loko nene gelenouve.

33 * Lekeza Zonitoka ve makó kimisilikago, keza loká imikago, eza gakó gihila lo utó onoimóma neve.

34 Vegená neneta mogonáne ánígiiki hizi lé initatave loko lamuve. Hanuva giliiki alévolé lekemetameni aliiki alévolé gapogú vitave loko lekelikumú nene noluve.

35 Zoní eza lamaná liví napa loló oake, hize hanatoleketonoigo, lokogoliza viziki minamó neve.

36 Ómasímo není hize lé onimiaká noimó nene Zonini avilegeko haitolíminoko neve. Améneho haitopaitó hoza alitane loko hoza gakó lonetamó nene ámina hozámini gihila ale utó okugo, améneho nimiselekago lumumómámini mogonáa utó oaká noive.

37 * Améneho nimisilimó áisi mogonáne lo utó oaká noimóza, lekelisi nene aí anó lupa gilisá amamóma neve, itó aí ánígisá amamóma neve.

38 Lekeza améneho nimisili vemú gili alévolé amanazo, aí gakó nene likigikagú minamive.

39 Lekeza nene monó gotola mota alenoune liake, alévolé oko minoakalímini gakoláa nenegú neve liki giliaké, agizaka hiziki miniaká niave. Itó není mogona nene ámina luhuvagú utó noimóza,

40 lekelisi nene nenitoka iki gímiziiki alévolé lekemetamenigi itanazo, gopa ahulinimiaká niave.

41 Itó vegenalita nugupe aliki ititave loko losá amumóza,

42 lekelí mogonáa nene lamaná gelenouve. Likigika nene Ómasiloka milisá amave.

43 Nénisi nene aménehini gakotó moloko lekelitoka lumumopa, lekelisi nene geha zi nimisá amave. Minoko ve makó ezáa agata geleko anitekikoma nene, geha zi aminigave.

44 Lekeza nene vegenalite lilími napa itave liki giliaké, Ómasi hamokolímo lelémo napa itive liki makó lisá amave. Lá ikanazo, nana iiki Ómasimú gili alévolé itave.

45 Lekeza nenikumú nene Ómasi amelahini avogisaló goní oletatimó nehe liki lamilo. Lá oko nomive. Lekelisi nene Moseni gakotoka leheta iaká niave. Ámina ve Moseni gakó nenémo goní oleketanogo ive.

46 Áisi nene luhuva gizamó nene nenikumú gizonoimóma neve. Nenemú lekeza aí gakó gili alemó nelina nezamuki gili alévolé aline.

47 Lá onoimóza, Moseni luhuva gakó gili ahulikamó nenazo, není gakó nene nana iki guni itamó neve, loko lo kimimó.

6

Ve 5000 nosánetá kemeke namó

(Mat 14:13-21; Mak 6:30-44; Luk 9:10-17)

1 Izesú eza ámina gakó lo asú oake, Galilaia nonohuló agulizá makó Tipelia loko noi nonohuló likeko vo helega imó.

2 Voake kivisi vegená mukí kelémo zoka zoka ike, lu avevezaha la avevezaha igo, vegenalite ánígiaké, ámegetiki viki minamó.

3 Lá niago, Izesú nene izegipala zuha lelémoko agokaú iteko minunimó.

4 Gamená nene zupa Zuta vetini avóikini asenini zeketakumú gili mina holisi alitokago,

* **5:33:** Zon 1:19-27, 3:27-30 * **5:37:** Mat 3:17

⁵ Izesú nene vegená mukí aitoka nanitego, ánikogoake, Piliponi nene loká otake nosánetá hikutí meina hizeko kimitune. Láa vegená alegesá amó imanete niko vo holoma itimó neve.

⁶ Loko limó nene Izesú eza netá matá oko moloko itimó nene nego, hanuva giminivágú moloko limó.

⁷ Lokago, Pilipó nene moni gó ligizani lugaloka asú igo ahuloko nosánetá meina hizeko kimitunimóza, ma vo aleminogo ive.

⁸ Loko lokago, izegipala zuha lelitokatí makó Saimon Pitani agunala Etulú áisi nene láa loko limó:

⁹ Imaneuka izegipa makó noimó áisi peleti ligizani lugaloka asú igo itó lagaha losítá aleneimóza, vegená mukí nianazo, ánenéatunú nana itune.

¹⁰ Loko loká okago, Izesú nene lekeza vegenáma li kimikiko mikasiló mini gesá iki minino loko lo limimó. Ámina apató nene tau lamaná minamó nenazo, neneló ve 5 tausen ale alitoko nenéminiki limiki mini gesá ikago,

¹¹ Izesú nene ámina peleti aleake, Ómasi agepoka loake, alegesá iki mina vegená gona moloko kemeake, ámina oko lagahama kimimó.

¹² Kemekago, niki niki kagatupa okago, Izesú nene izegipala zuha lo limike lumamatamáa minoko latila okatize, gizaká ilo.

¹³ Loko lokago, leza peleti ligizani lugaloka asú igo kemekuko namó nenémini lumamatamáa ale nupa oko gosúveha 12 vaí okago ale mulunimó.

¹⁴ Lá okago, golivagi alévolé netá lá oko loló igo, vegená keza ániqiake, imane lamaná Ómasímini agepagutí gakó loaká ve napa makó mikasigú utó itive liki lina vema noitive.

¹⁵ Liki liake, Izesuni hizi vigiake, agulizaki venini lilí itanigi ago, ánígoko geleake, ahulokimiaké ezáagó agoka makotoka itimó.

Izesú nagamí amupiló liso liso vimó (Mat 14:22-33; Mak 6:45-52)

¹⁶ Iteko noigo, únaká molokago, izegipala zuha leza nonohuló agilikaloka lemehá.

¹⁷ Lemeko Kapanao numutoka atiginá oko vinogo nagamikú lapegú noituko, límugusi litihokago, Izesú velesá amigo, lezategó vunimó.

¹⁸ Novuko, ohuhú napa alike, nagamíma valahuká napa nozigo, vunimó.

¹⁹ Leza nene kilomita 5-ahe itó 6-ahe ahulokunike novuko, Izesú nene nonohuló amupiló liso liso vike lugupeló naligo, ánígokunike, lehelele vizimó.

²⁰ Lehelele novizigo, Izesú nene lekelegesá legemino. Nénisima nouze.

²¹ Loko lokago, sipigú alémo molanogo nouko, áminasító vitune loko luni apatoka nene vo anitunimó.

Vegenalite Izesukumú vitagá amó

²² Akunike gó lago, vegená mukí nonohuló vola helega minamoláa keza láa liki lamó: Holugú sipi hamokó imaneló nego ánígunimó. Nenegú izegipala zuha kezáikó Izesuni ahuliaké vikamó nenazo, Izesú hitoka vonoitivo.

²³ Liki kagata gululusi giliaké niago, Tipelia apatokatí vegená makó nene sipi makokú itiaké Guivahanímo Ómasi agepoka loake peleti kemekago namómáló imi anitemó.

²⁴ Anitiaké, mukí vegenalite Izesuge izegipala zuha niamago, vitagá iake, ámina sipigú itiaké, Izesukumú vitagá itune liki Kapanao numutoka atiginá iki vamó.

Izesú alévolé oko minoakalímíni nosánetá noive

25 Nonohuló imane helegaloka vitagá iki iki alími utó miliake Monó gizapa velemaka, geza nana oko ane.

26 Liki likago, Izesú lúa loko lo kimimó: Neza lamaná lo likimitoze, gililo. Lekeza lu avevezaha la avevezaha ugo ánihiaké, nenikumú vitagá niahe. Lá oko nomive. Peleti lukumugo, niki niki lakagatupa okago vitagá niave.

27 Lekeza hozaváa alilo. Haha iti nosá nenemukopa, alévolé oko minoaká nosánetá nenémimi hozaváa alilo. Okulumakutí lumu ve gihila neza Ómasí aménehini anosa alenou ve neza alévolé oko minoakálímini nosánetá lamaná likiminogo uve.

28 Loko lokago anotó aliki Ómasímo gilikó lamaná itive loko nana hoza alitune.

29 Liki loká ikago, lúa loko lo kimimó: Ómasímo hoza alitave loko loleketonoimóma nene nimisili ve nenikumú gili alévolé itave lokoma nenaé.

30 Loko lokago, lúa liki li amemó: Alévolé suni makó ale utó okako, ánigokinake, geikumú gele guni itune. Nana hoza makó alitane.

31 * Avotegé keza gozapá mikasi gomopalaló minamómalo nene mana nosákó niki minamómáma neve. Nenémimi luhuva gakó nene Okulumakutí nosá kimigo niki minamó neve liki gizinamómáma neve.

32 Liki likago, Izesú lúa loko lo kimimó: Lamaná lo likimitoze, gililo. Mosé nene okulumakutí nosá lekememímóma neve. Améneho nene likimimó. Itó okulumakutí nosá gihila lekemeaká noive.

33 Nosánetá nene okulumakutí mikasigú limimó nenémo alévolé oko minoaká nene ale utó olekemeaká noive. Nenémo nene Ómasilokatí nosánetá gihila neve.

34 Loko lokago, Guivahani geza nosánetakumú lanimó nene gamena gamena limitanize.

35 Liki li amikago, Izesú lúa loko lo kimimó: Alévolé oko minoakálímini nosánetá nénisi nene nouve. Makó keza nenitoka iki gímitamó nene gaúna heleminigave. Itó nenikumú gili alévolé itamó keza nagamikumú kiviseminogo ive.

36 Neza nene lo lekemeaká noumóza, lekeza nene gili ahuliaké, gili alévolé amave.

37 Mikasiuka vegená nene améneho nemeaká noi vegená keza mukí nene nenitoka anitinigave. Nenitoka anitita vegená nene ma kehelú aminogo uve.

38 Okulumakutí lumumó neni negepagú gakó hize lé itove loko lememuve. Nimisili vémo lititoka molatitoka oko hoza alitove loko lumumómáma neve.

39 Améneho nene nenitoka kelémo mola vegená latila ikatave loko kelémo nupa okinake gamena napaló avasavagi kelémo otekugo, otinigave. Nimisili vémini agepagutí gakó láoko neve.

40 Gipala ánigi hee li miniki aikumú gili alévolé itamó keza alévolé kemetameni alikiko, gamena napaló kelémo ote asú inogo uve. Aménehini gakó nenéminko neve.

41 Loko Izesú nene okulumakutí nosánetá nénisi nouve loko likumú nene Zuta vetini monó gizapa vete gili golesa iake géneka lake, Izesukumú lúa liki lamó:

42 Imane ve nene Zoseheni gipalama neve. Itó izolahiko amelahiko nene ánigo nouháma nenazo, neza okulumakutí lumumómáma neve loko nanamú loaká noive.

43 Liki likago, Izesú lúa loko lo kimike limó: Lekeza gilikiko golesa amino.

44 Ve makó nene kezáini kigikatunú giliiki nenitoka iki gímizeminigave. Améneho nimisilimó eza kelémoko okiko, iki anitinigave. Lá okiko, neza nene vegená nenémináa gamena napaló kelémo otinogo uve.

45* Ómasímini agepagutí gakó liaká a vete gakó láá liki luhuva gizinamóma neve:

Ómasi ezáa vegená mukí nene monó lo kemeko apí okiminogo ive. Liki gizinamó nenazo, améneho monó lo kimiko gilitamó keza nenitoka anitinigave.

46 Ve makolímohe makolímohe aménehini ánígosá amimóma neve. Ómasilokatí lumumó nénisi hamokó nounazo, nezagó ánígonouve.

47 Neza lamaná lo likimitoze, gililo. Nenikumú gili alévolé ina vegená kéisi nene alévolé kemetameni mota alikave.

48 Alévolé oko minoakálímini nosá nénisi nene nouve.

49 Avotike keza mikasi gomopalaló mana nosakó niliki nivake alika helemó.

50 Itó okulumakutí nosá nokoko helemaakálímini imane nenitoka nene neve.

51 Alévolé nosá okulumakutí limimó nene nénisi nene nouve. Nenemú makó keza nenitokatí nosánetá natamó nene, alévolé iki mini lúaló miliki viki minanigave. Mémelánemo nene nosánetá loló onoive. Numutó namató vegená lekeza alévolé lekemetameni minatave loko likiminogo uve.

52 Loko lokago, Zuta ve keza pelevesava zeke áisi nana okoko mémeláa limiko natunikumú live.

53 Liki likago, Izésú ezáa zohota zaló hilitimó nenémini gihila ali lá itakumú anzoa gakó láá loko lo kimimó: Neza lamaná lo nolukumuve. Lekeza okulumakutí lumu ve gihila není mémelagi golanigi namitamó nene, alévolé lekemetameni aleminigave.

54 Makó keza není mémelagi golanigi natamó nene, alévolé kemetameni mota alikago gamena napaló kelémo otinogo uve.

55 Není mémeláa nenémo nosá gihila neve. Itó není golani nenémo nagamí gihila neve.

56 Není mémelagi golanigi ninamó nenete neniki ali akisikave. Neza ámina oko keí ale akisekuve.

57 Améneho alévolé vémo nimiselekago, lemekumole loko aí gelegele nominuve. Ámina iki není mémeláne nata vegenalite není gelegele minanigave.

58 Okulumakutí limi nosalímini mogonáa lá oko neve. Avotike gozapá namómámino nomive. Kéisi mana nosánetakó niliki vake alika helemóma neve. Itó není nosá imane natamó nenete mini lúaló miliki alévolé kemetameni minanigave.

59 Loko Izésú eza Kapanao numutoka minake monó numukú itike, ámina monó nene lo kimi gakó neve.

Alévolé oko minoaká gakó

60 Lá okago, aí vegenala zuha keikutí mukilate ámina gakó nene giliake, kezáitoka nene gakó imane gelehá nene gena okanazo, nene éaho gele hee loko amegesa molative. Liki goseleka likago,

61 Izésú nene agikatunú geleake, láá loko limó: Gakó nene gilikago golesa okahe.

62 Okulumakutí lumu ve gihila neza goí oko minu apató atiginá oko noitugo, lekeza ánigatamó nene, nana itamó neve.

* **6:45:** Isa 54:13

63 Lugupémini mémela nenémo alévolé lemetameni ale utó oakaláa nomive. Alévolé lemetameni loló oaká nene Sikalahulímini hoza neve. Itó gakó lo nolukumumó nenémo alévolé lekemetameni ale utó oaká gakó neve.

64 Láa loko lo lukumumóza, lekelikutí lugáa nenete gili alévolé amave, loko limó. Izesú nene monola gili ahulata vegenala nene hozava apí i zupa mota geleneimó neve. Itó amimika lití ve ámina oko geleneimóma neve.

65 Nenemú ámina gakó lo kemeake, miní ameko láa loko lo kimimó: Neza nenemú láa loko lo nolukumuze, gililo: Makolímo améneho alémo vávani amiko nenitoka omo aniteakaláa nomive.

66 Loko lokago, ámina zupa nene vegenala zuha mukilite ezagi minanigi goselé kepelekago, kemegesa amiaké vikago,

67 Izesú nene izegipala zuha 12-ama loká oletake lekezagi ámina iki ahulin-imiiķi vitune liki nilahe.

68* Loko lokago, Saimon Pitá láa loko lo amimó: Guivahani geza ahulogimikinake éahitoka vitune. Geza hamokó alévolé oko minoaká gakó loaká noane.

69 Leza nene geikumú mota gele alévolé onoune. Geza Ómasilokatí apazá keké vízeko noani ve noane loko gelenoune.

70 Loko lokago, Izesú láa loko lo kimimó: Neza izegipa 12-a lekelémo etó okumóza, lekelitokatí makó nenémo Satatoka mino molokave.

71 Loko limó nene Kaliotó numutotí Saimoni gipala Zutá eza Izesuni vegenala zuha 12 lelikutí vémo minoko amimika litikumú limó neve.

7

Izesuni agunamotamolate gili alévolé amamó

1 Lá okago, Zelusalegatí Zuta vegenalitini monó gizapa ve keza Izesuni apele ahulatune liki amuza milikago, Zutaia mikasi nene ahuloake Galilaia mikasigukó vogá ogá oko minamó.

2* Lá oko noigo, avóike minumuni gekumú gili mina holisi alitokago,

3 Izesuni agunamotamolate láa liki li amemó: Vegenaka zuha keza lu avevezaha la avevezaha oaká noanimó nene ánigatave loko imane apá ahulokoko voko Zutaia mikasiloka loló okako ánigatave.

4 Makó nenémo omo utó itove lokoma asuguná minoko hozaváa ma alesá amive. Geza hoza nenémináa alitove lokoma, voko vegená kovogisaló utó okoko aliko ánigatanazo,

5 liki izegipa agunamotamola keza lamó nene, aikumú gili alévolé amake láa liki likago,

6 Izesú nene láa loko lo kimimó: Lekeza netá matá loló itune liki litá iki lilí itamóza, Zutaia apató vito gamenaváne velesá alitamive.

7 Monó gelema vegenalite mukahá lekepelemingave. Neza nene miniki aliki ago golesa imoláa lo utó oaká nou netató gasó nimiaká niave.

8 Lekeza nene holisígú vilo. Neza nene gamenáne alitaminazo, itínasa ma tovaminogo uve.

9 Loko loake, Galilaia mikasiuka minamó.

Izesú minumuni holisi minamó

10 Minokago, agunamotamolate goí iki holisi minatune liki Zelusalega tivikago, ezagó nene alika olío hizeko tovo imó.

* **6:68:** Mat 16:16; Mak 8:29; Luk 9:20 * **7:2:** Liv 23:34; Gapo 16:13

11 Notovo igo, holisi nene alitokago, Zuta ve keza aikumú lokatoká iki hiláuka voko noitive liki vitagá amó.

12 Lá iki mihina iki vitagá niago, mukí vegentalite aikumú musímusika liki nilake lugáate Izesú nene ve lamanáma neve liki likago, lugáate géneka liake ahulalo, áisi nene vegená kelémo gopa napa oaká noive.

13 Liki lamóza, Zuta vetini monó gizapa vemú kehelele vizekago, gakó napagutí lamake asugunatoka lamó.

14 Lá ikago, holisi holulagú Izesú nene monó zagusavegú itike monó apí okimike limó.

15 Lá oko noigo, Zuta ve keza sigaga lake áisi nene lelí sukulu lamimóma nemóza, monó mogona hiláukatí geleká imó nolive.

16 Liki likago, Izesú láa loko lo kimimó: Neza monó apí olikimiaká noumó nene nezáne geleko lo lekemesá amuve. Nimisili vémitokatí geleko lo leke-meaká nouve.

17 Makó nenete Ómasímo lititoka molatitoka oko alitune liki gilitamó nene, alika Ómasilokatí nehe nenitokatí nehe nene ámina monokumú gili hee linigave.

18 Makó nenete kezáini kagata gilitató litamó nene kugupe aliki itiki linigave. Makó nenete kimirisi vi hoza amelahikumukó agupe aleko ititune liki hozava alita ve nenete ve huluva, sozagi nomi vegená niave loko litune.

19 Lekelikutí Mosé eza lo hukoko lo likimi gakó amegesa mila vegená ma niamave. Nenemú lekelisi nene nanamú nipilitune liki liaká niave.

20 Loko lokago, vegená mukilite lamó: Geza matuka gopa okago nolape. Éaho gipilitove noligo nolane.

21 Liki likago, Izesú láa loko lo kimimó: Neza holisi zupa avevezaha hamokó loló umó nene ánigiake sigaga linamó neve.

22 * Nenemú gililo. Mosé nene izegipatini kugupeló Ómasímini anosa milikitatave loko lolekemamó nene, Mosé apí amimó. Avotike kezáini apí amóma neve. Lá okago, ámina hoza alita gamena alitokago, holisima neve liki lámiki ámina hoza hanuva aliaká niave.

23 * Nene Mosé lo hukoko li gakó haha okative liki Ómasímini anosa nene izegipatini kugupeló nene holisi gamenaló milikimiaká nianazo, nénisi nene holisi zupa ve gepili alémo lamaná ukumú lekeza nanamú gili golesa iaká niave.

24 Lekeza ánigi lamaná amikima gakó galinali lamilo. Mogonaló gili hee hee likigó lilo.

Ómasímo gologí oletative loko lo moleta ve

25 Loko lokago, Zelusale apá amelage luguhate láa liki lamó: Apilitune liki liaká nia vema imane nehe.

26 Nana okago gakó utó nolító imane kugulizaki vele nenete géneka litamave. Keza aí mogonáá gilikí gili vevesamó Ómasímo gologí oletative loko lo moleta vema noigo niahe.

27 Lá oko nomive. Imane vémini getamoláa mota gelenoune. Gologí oletative loko lo moleta vema utó itímómámini mogona ma gele vevesaminogo une.

28 Liki lamó nene Izesú Nasalete numutoka utó ihe like giliaké láa liki likago, Izesú monó zagusavegú nene monó apí oketoko noike gakó napagutí

láa loko limó: Íí, lekeza mogonánegi není getamó mogonáagi gelenoune liki linamóza, lumumó nene nezáne nagata geleko lememuve. Lamanalímini amelaho noive. Áisi nimiselekago lumumóza, lekeza aikumú nene gelemave.

29 Nénisi nene aí amatoka minutotí nimiselekago lemekumó nenazo, aí mogona gele vesesonoue.

30 Loko lokago, Ómasilokatí lumumó neve loko likumú nagá aminigi amóza, gamenaváa alitamigove liki kigizató gena okago ahułamó.

31 Lá ikago, keitokatí vegená mukilite aikumú gili alévolé iake láa liki lamó: Imane vémo lu avevezaha la avevezaha oaká noinazo, gologí oletative loko lo mololeta vema anititive liki lina vemámo Izesuni avilitihe. Óve, avilegeminogó ive.

Nagá numukú Izesuni alími milatave liki pilisi ve kimiselemó

32 Alegesá iki mina vegenalite láa liki nilago. Palisaio monó vegenalite giliake, keza guguni giziaká a ve napagi ligili hagili iake Izesuni nene nagá numukú alími milatave liki pilisi ve kimiselemó.

33 Lá ikago, Izesú láa loko limó: Neza gamena koma lekelitoka mininake nimisili veloka atiginá oko vinogo uze.

34 Lá okugo lekeza nenikumú vitagá itamóza, ma ánígaminigave. Voko minatotoka nene nana iki ititave. Ma iteminigave.

35 Loko lokago, Zuta vete kezátoka láa liki ligili hagili amó: Imane ve hitoka voko noiko vitagá itunikumú live. Zuta vegená Kiliki mikasiuka hutíli iki viki niamoláa keitoka voko minoko monó gakó apí o kemeko noiko vitagá itunikumú lihe.

36 Lekeza nenikumú vitagá itamóza, ma ánígaminigave loko limó itó voko minatotoka ma iteminigave loko limó nene nana itikumú live, liki lamó.

Ligikagutí nagamí lisani nenéminoko lemeko minanogo ive

37 * Zuta vegenalitini holisi napa nene asú inogo noigo, alegesá napa iki niago, Izesú oake gakó napa like láa loko lo kimimó: Makó keza nagamikumú kivisekikoma, nenitokatí iki natave.

38 * Itó monó gotolaú nenikumú gili alévolé ita vegenakumú nene kigikagutí monó nenémo nagamí lisani nenémini oko zeko minanogo ive liki luhuva gizinamóma neve.

39 Loko Izesú limó nene ezáamú gili alévolé ita vegená nene Sikalahú lehizeketatove loko limó neve. Eza okulumakú gonanalisi lapanalámini agikagú velesá itenamikeve loko Sikalahú velesá lehizeketamíke limóma neve.

Vegenalite Izesukumú hizi hoú lamó

40 Ámina gakó nene vegenalite giliake, lugáate Izesukumú nene lamaná Ómasímini agepagutí gakó loaká vele gakoláa gelekunike ageva nouhá ve imane noive.

41 Liki likago, lugáate áisi nene Ómasímo gologí oletative loko lo mololeta vema noive liki likago, lugáate Izesukumú Galilaia mikasiuka utó ihe liki giliake pelevesava ziki láa liki lamó: Gologí oletati vema nene nana oko Galilaia mikasigutí utó itive.

* **7:37:** Liv 23:36 * **7:38:** Isa 58:11; Zak 14:8

⁴²* Monó gotolaú nene gologí oletative loko lo mololeta ve eza Tevitini apá gotola Petelehe apakú itó Tevitini agapilamó zuhagutí utó inogo ive liki luhuva gizinamóma neve.

⁴³ Liki liake, aikumú mini luga luga amó.

⁴⁴ Lugáate nagá amitune liki amó nene kigizató gena okago ahulamó.

Monó gizapa vete gili alévolé amamó

⁴⁵ Lá iake, monó zagusaveló pilisi ve minamó keza atiginá iki vikago, guguni giziaká a vegi Palisaio monó vegi keza loká ikitake lekeza nanamú alímiki amave.

⁴⁶ Liki likago, pilisi vete áisi gakó nolimó nenémini iki ve makolite lisá amave.

⁴⁷ Liki likago, Palisaio ve keza láá liki lamó: Lekezagi ámina oko lokogoka vizekago nilahe.

⁴⁸ Monó gizapa ve lugáagi Palisaio ve lugáagi aikumú gelemó alévolé okago nilahe.

⁴⁹ Óve. Imane li huka gakó gelema vegená alegesá iki niamó nene usí vize kemenei vegenakó niave.

⁵⁰* Liki likago, keikutí ve makó Nikotemó nene amunaló emane límugusigú Izesutoka vi vernámó láá loko lo kimimó:

⁵¹ Lekeza lilo. Ve makó nene mogonáa gilikí lihimavala ánigamiki apilitune liki liaká niahe. Monó gotolaú lá oko nomive.

⁵² Loko lokago, agivelage gahá amiki láá liki lamó: Gezagi nene ámina oko Galilaia mikasiukatí numuká ve noape. Monó gotolaú vitagá ova ova oko Galilaia mikasiukatí Ómasímini agepagutí gakó loaká ve makó utó itive loko keké nomive loko gilitanize. [

⁵³ Liki liake, hutilí iki numúitoka vi vi amó.

8

Moko mogonaló noigo ániga vená

¹ Ikago, Izesú nene Olivi agokaú itimó.

² Akiake gó lokago, ho sikí noligo, monó zagusavegú goha iteko noigo, vegená mukí áisi noitoka alegesá ikago, mitó minake monó apí o kimimó.

³ Lainim-noketago, monó mogona apí ikimiaká a vegi Palisaio monó vegi keza vená makó moko mogonaló noigo ánigiake Izesutoka alímiki viki alími holukú miliake láá liki lamó:

⁴ Tisalemaka, imane vená mokoló noigo ánigokuniike alémoko nounimó lae.

⁵* Itó Mosé eza lo hukoko li gakkó vená nenémináá gehanitunú kipili ahulalo loko loletonoimóma nenazo, géisi nanave loko nogelene.

⁶ Liki lamó nene gakó lo gopa itihe liki gimivagú miliki lamó. Gakó nana oko litihé gelekinake neneló alémo moloko lokinake goní otatune liki agoka viziki lamó. Likago, Izesú gupá zeake mikasiló nene agizanitunú luhuva gizamó.

⁷ Nogizago, keza loká imiake goha loká itago, oteake láá loko lo kimimó: Lekelitotaká ve makó lihimavala nomiti vémo apí oko gehanitunú apelekiko apiloso.

⁸ Loko loake, goha gupá zeake mikasiló agizanitunú luhuva makó gizamó.

* ^{7:42:} Mik 5:2 * ^{7:50:} Zon 3:1-2 * ^{8:5:} Liv 20:10; Gapo 22:22-24

9 Nogizago gakola giliake, améipo ale goí oko vokago, hamopamó viká viká iki vi asú amó. Vikago, ámina venáma Izesuni amatoka noigo,

10 Izesú okena oko gonú napilike loká otake vená geza gilímiki a vegená hitoka vave. Makolímo lihimakamú goní ogetamihe.

11 Loko lokago, vená nenémo Guivahaninemaka, lá amave. Loko lokago, Izesú limó: Nezagi ámina oko lihimakamú goní ogetamuve. Nenemú voko lihima netá goha alemo, loko lo amimó.]

Izesú numutó namató vegenalitini liví noive

12* Aliko Izesú eza vegená nene gakó miní ameko láá loko lo kimimó: Neza mikasiuka vegená lekelí liví nouve. Makó není némegetata vegená keza límugusi gapogú viki minaminigave. Alévolé lapaná aliiki minanigave.

13* Loko lokago, Palisaio monó ve keza láá liki li amemó: Gezaka mogonaka lo utó moloko lanimó nene leza gelekuko gihila nomive.

14 Liki likago, Izesú láá loko lo kimimó: Nezánene mogonáne lo utó mulumó nene, neza hitokatí umó itó hitoka vitohe nenémíni mogonáa gelenouke, gakó nolumó nene gihiláa neve. Lekelisi nene nemú manamú makó gilisá amave.

15 Lekeza ha vegenalite lotuva ligiaká niató liaká niave. Neza mogonata-ganamú lotuva legeko hozaváa ítina alemumóza,

16 neza mogonatagana lotuva legeko alulina nene nezánegó alitomoláa oko minamiline. Nimisili ve améneho nelémo vatí oaká noinazo, alitomoláa oko nene lotuva legeko hozaváa alitomó nene gihiláa zinogo ive.

17 Mosé lo hukoko li gakokutí láá loko nemóma neve: Ve lositalitosa ve makolímini mogona li utó iki litái gakó nene hamó gapoló vokikoma lasi gakó nene gihiláa neve loko litune.

18 Nezáne mogonáne nolugo, nimisili ve améneho nene ámina oko lo utó molonimiaká noive.

19 Loko lokago, keza loká itiki amekaho hí noive liki likago, eza láá loko lo kimimó: Lekeza není mogona gili guni amake aménehinigi mogona gili guni amave. Lekeza není mogona gelelina, aménehini mogonagi ámina iki gili guni aline.

20 Loko Izesú limó nene eza monó zugusavegú moni miliaká a pokisi mina agilikaloka minake, monó lainim-oketoko ámina gakó limóza, gamenaváa alitamigo ve makolímo oko nagá numukú alémo molamimó neve.

Nénisi voko minatotoka ma aminigave

21 Izesú miní ameko láá loko lo kimimó: Neza ahulolikimikinake vokugo, lekeza vitagá iiki lihimatinigi ha miniko hilinigave. Lá iki hiliiki nénisi voko minatotoka ma aminigave.

22 Loko lokago, Zuta vetini monó gizapa vete neza voko minatotoka ma aminigave loko limó nene nanamú live. Ezáa agupe ale golesa oko hilinogo lihe.

23 Liki likago, eza láá loko lo kimimó: Lekelisi nene amunalokatí niave. Nénisi veletokatí nouve. Lekeza mikasiukatí niamóza, neza mikasiukatí minamuvé.

24 Lá onoimó nenazo, neza nenemú lihimatinigi ha miniko hilinigave loko lo lekemekuve. Neza imane minoko mogonáne lo nolukumumóza, lekeza

* **8:12:** Mat 5:12; Zon 9:5 * **8:13:** Zon 5:31

Ómasilokatí lemeni ve noane liki gili alévolé amitamó nene, lihimatinigi ha miniko hilinigave.

25 Loko lokago, loká itiki Olo, éahoma noane. Liki likago, Izesú láa loko lo kimimó: Apí oko mikasiuka lumutotí lo lekeme-loko voaká noumó lae.

26 Neza lekelí lihima gakó mukí alenoumóza, nimisili vémini gakó imane lo utó moloko lo lekemeaká nouve.

27 Loko amelahikum láa loko lo kemekago, keza gili hee lamamó.

28 Nenemú Izesú miní ameko láa loko lo kimimó: Lekeza okulumakutí lumu ve gihila není nene zaló nilími otiiki, lo lekemeaká noumómámini oko noive liki gili guni inigave. Itó nezáne nagata geleko alemuke, améneho lo nimitokó loaká noive liki gili guni inigave.

29 Nimisili ve eza nezagi makó noive. Neza gamena gamena netá matá oko moloko ukumú amu helekago, ma ahulonetosá amive.

30 Loko lokago, vegená mukilate Ómasilokatí limi ve noive liki aikumú gili alévolé amó.

Gakó gihiláa nenémó gologí oletanogo ive

31 Zuta ve gili alévolé iminamoláa nene Izesú láa loko lo kimimó: Lekeza není gakotokó minatamó nene, není izegipáne gihila minanigave.

32 Lá iiki gakó gihiláa gili guni ikiko, ámina gakolímo nagakutí gologí olíkimikiko, vatí iki minatave.

33 * Loko lokago, makolite láa liki li amemó: Leza Avalahani agapilamola nouko makolímo ezáa gopoguna lelémo molosá aminazo, geza gologí olímkako, vatí oko minatune loko nolape.

34 Liki likago, Izesú láa loko lo kimimó: Neza lamaná lo likimitoze, gilio. Makó keza lihima netá aliki minatamó nene lihima netalímíni gopogu izegipa minanigave.

35 Gopogunate gizapa véinímini numukú miniki aliki aminigave. Gi-palámogó nene amelahini numukú mino lúaló moloko minanogo ive.

36 Nenemú Ómasímini gipala áisi gologí olíkimikiko, lekeza lamaná na-gakutí gologí olíkimikiko minanigave.

37 Lekeza Avalahani agapilamola niave loko mota gelenoumóza, gakónémo likigikagú minamigo, nepele hilitune liki liaká niave.

38 Neza aménehini amatoka minuke ánígonou netakumukó loaká nouve. Lekeza nene lekezatini ametipitokatí ánígiki gele netakó lili iaiká niave.

39 Loko lokago, ameteho nene Avalahá noinae. Liki likago Izesú láa loko lo kimimó: Lekeza Avalahani agapilamola minalina, aí avevezahaló iki miliki minaline.

40 Ómasilokatí gakó gihiláa gulumó nene lo lekemenoumóza, nepele hilitune liki liaká niave. Avalahá nenémini osá amimole.

41 Lekelisi nene ametipo imó imó nene iaiká niave. Loko lokago, leza gapoló izegipa minamune. Ómasi nene ameteho hamokóma noive.

42 Liki likago, Izesú láa loko lo kimimó: Neza Ómasi minutotí vegená nemetamenigi loló okuke lemenouve. Neza nagata geleko lumumó ne-gopa, Ómasímo nimiselekago noumó nenazo, ametipo nene Ómasi minalina, likigíka nenitoka milaline.

43 Není gakó nana okago gili vevesamave. Neza gakó nolugo gena likivisek-agógilisá amamó, nenemú.

* **8:33:** Mat 3:9; Luk 3:8

⁴⁴ Lekelisi ametipo Satá amu hiliti netá alitune liki giliaká niave. Áisi gozapá nene kepelenó kepelenó oko mino-loko noave. Agikagú gakó gihila nomigo, amegeesa ameaká noive. Soza gakolímini amelaho eza soza saza gakó nene nosánetala loló okago, áminaló gelekelela minoaaká noive.

⁴⁵ Nénisi nene gakó gihiláa lo lekemeaká noumóza, lekelisi nene gili ahuliaká niave.

⁴⁶ Lekelitokatí makolímo není lihima ma lo utó okiko alévolé itihe. Neza gakó gihiláa lo lekemeaká noumó nenazo, nanamú gili alisá amave.

⁴⁷ Makó keza Ómasímini gipa minatatite Ómasímini gakó gilinigave. Lekeza Ómasímini izegipala minamake, aí gakó gili ahuliaká niave.

Avalahá utó oko minamigo Izesú minamó nominave

⁴⁸ Loko lokago, monó gizapa ve keza láa liki li amemó: Geza Samalia numuká ve matuka gopa okago nolape loko gelekunike gakó lamaná loaká noune.

⁴⁹ Liki likago, Izesú láa loko lo kimimó: Neza matúne gopa okago lamuve. Aménehini ale napa oko loaká nouve. Lekelisi nene není aliki mumusopa ziaká niave.

⁵⁰ Neza nugulizá vitive loko losá amuve. Nene aménehini hoza neve. Áisi nene gakó lo hukoaká ve nenémo vegenalitini mogonataganáinimú lo hukanogo ive.

⁵¹ Neza gakó lamaná lo likimitoze, gililo. Makó keza není gakó gili alitamó nene kigikáa ma heleminogo ive.

⁵² Loko lokago, Zuta vete láa liki li amemó: Matuka lamaná gopa okave. Avalahá gozapá helekamóma neve. Itó Ómasímini agepagutí gakó liaká a ve keza ámina iki hilikamóza, makó keza není gakó gili alitamó nene kigikáa ma heleminogo ive loko nolape.

⁵³ Avoteho Avalahá íteko mina ve helekamóma neve. Géisi Avalahani aviliginogo nolape. Itó Ómasímini agepagutí gakó liaká a ve keza ámina iki hilikave. Geza hí ve suka loko gugupe aleko noitene.

⁵⁴ Liki likago, Izesú láa loko lo kimimó: Nezáne nugupe aleko ititomó nene etaminogo ive. Améneho Ómasileve liki liaká nia ve áisi nene nelémo napa oaká noive.

⁵⁵ Lekeza aikumú gili vevesisá amave. Nezáne nene aikumú gelenouve. Aikumú gelemuve loko lulina nene, lekelikitana oko sozaló ve minulianomóza, lá oko nomive. Amenehikumú gelenouke gakoláa gele aleaká nouve.

⁵⁶ Avotipo Avalahá neza mikasiuka lumu gamena nene vamotoka ánigoake, agoliza vízezo minamóma neve.

⁵⁷ Loko lokago, ámina gizapa ve keza li amiki geí kilisimasi 50-a vaminazo Avalahani ma ánigonape.

⁵⁸ Liki likago, Izesú láa loko lo kimimó: Neza lamaná lo likimitoze, gililo. Avalahá nene utó onamigo, minumó nominuve.

⁵⁹ Loko lokago, gehani aliake apili hilinigi ago, Izesú nene unamaha oake monó zugusavegutí lemeko vimó.

9

Izolaho getakutí agómula lika ve alémo goloutotamó

¹ Gamena makó zupa nene Izesú eza gapoló novike, ve makó izolahini agatupagutí agómula liko vimó geta ve ánigamó.

² Nánigago, vegenala zuha leza loká otoko monó gizapa velemaka, éahini lihimámo agómula likamó getave. Ezáa lihimámo nehe itó izolahiko amelahiko lihimámo neve.

³ Loko loká omikuko, Izesú láa loko lo limimó: Nenémo amive. Itó izolahiko amelahiko lihimámogi amive. Ómasímini zámuza aitoka utó itive loko nenémináa getamó neve.

⁴ Mikasiuka vegená niamó keza holisakasanagó hoza aliake, holugú nene hoza alisá amave. Ámináminoko leza nimisili vémini hoza itína alekinake, lelí hoza asú iti gamena nene hoza aleminogo une.

⁵ * Neza mikasigú minato gohala mikasiuka vegenalitini liví minanogo uve.

⁶ Loko loake, mikasiuka gituhú oake, mikasi aleko lukená zeake agómula lika vemámini agómulaló holomiake,

⁷ láa loko nolike amisilimó: Geza voko Siloama nonohulokú golotuvaka nagamízezo. Ámina nagamí agulizálmini mogonáa nene apili mila nagamile. Láa loko lokago, ámina ve vike nagamí zeake, agómula goloutokago, atiginá oko amó.

⁸ Lá okago, agivelage ánígiake, goí oko monimú voká vokató ve minoaká imómave liki giliake, monimú voká vokató mumuzó mumuzó oko minoaká i ve imane nehe.

⁹ Liki likago, lugáate ámina vema nenaе liki likago, lugáate óve, áminagítana haitó noinogo ive. Liki likago, ámina vemámo neza ámina vema nounae.

¹⁰ Loko lokago, loká itiki nana okanike gogómula goloutane.

¹¹ Liki likago, láa loko lo kimimó: Ve makó agulizá Izesú áisi goihá loló oake nogómulaló holonimiake, Siloama nonohulokú voko nagamízezo loko lo nemekago, neza voko novogisa nagamízeuke nogómula pulusokave.

¹² Loko lokago, keza loká itake ámina ve hikuka noive liki likago, neza ma ánígamuve loko limó.

Palisaio monó vete agómula goloutamó nenémini mogonamú vitagá amó

¹³ Láa loko lokago, agómula ale goloutota vema nene Palisaio monó vegentoka alímihi vamó.

¹⁴ Itó Izesú nene goihatunú agómula ale goloutamó nene holisi zupa lá imó.

¹⁵ Lá okago, Palisaio monó ve keza ámina iki agómula goloutakumú goha loká itiki likago, láa loko lo kimimó: Izesú nogómulaló goihá holonimikago, nagamízekugo, nogómula goloutokamole.

¹⁶ Loko lokago, Palisaio ve lugáate Izesunimú nene lelí holisigú hoza lá oko alike ale golesa oaká noinazo, ámina ve eza Ómasilokatí noamive. Liki likago, lugáate lamó: Eza ve golesa minalina, golivagi hoza nenémináa nana oko aliline. Liki liake, pelevesava ziki mini luga luga amó.

¹⁷ Lá iake, agómula lika vema loká itiki gogómula ale lamaná i vemú gezaka nanave loko nolane. Liki likago, eza limó: Eza Ómasímini agepagutí gakó loaká ve noitive.

¹⁸ Loko lokago, Zuta vetini monó gizapa ve keza agómula lika ve minamóma agómula goloutokave liki gili seketigí amake, izolahiki amelahiki sele li kimiake,

¹⁹ loká ikitiki gipatini agómula liko minamó getusimole liki nilasihe. Itó ámina gipa imane nehe. Nana oake agómula goloutave.

20 Liki likago, izolahiko amelahiko láa liki lasimó: Gipatema noive loko gelenousive. Itó agómula likamó getusimómove loko gelenousimóza,

21 eza nana oake itína agómula goloutahe, itó éaho agómula ale goloutave nene gelemusive. Eza olotiva netá nenazo, ezáa loká itiko lo likimitimole.

22 Liki lasimó nene, Zuta vetini monó gizapa ve keza gozapá amunaló nene ve makolímo Izesukumú nene gologí oletative loko lo mololeta vema noive lokikoma monó mosetatune liki li hukamó nenazo, nenemú izolahiko amelahiko keza Zuta vetini gizapa vemú kelegesá legekago,

23 olotiva netá nenazo, loká italo liki lasimó.

24 Likasigo, agómula lika vema goha sele li amiaké, láa liki li amemó: Geza Ómasímini avogisaló gakó lamaná lamane. Leza ámina vemú nene lihima netá aleaká ve noive loko gelenounimó nenazo, aí agulizá ale otemo.

25 Liki likago, áisi láa loko lo kimimó: Eza nene lihima netá aleaká ve nehe nene gelenamumóza, netá hámakó gelenouve. Neza goí oko nogómula likamó minumómaha itína nogómulánema ánígokave loko lamaná gelenouve.

26 Loko lokago, goha loká itiki nana ogetave, gogómulaka nana oko ale goloutogetave.

27 Liki likago, láa loko lo kimimó: Mota lo lekemekumole. Nene gelemahe. Goha litaha gakó nanamú lugo gilinigi nilave. Lekezagi aí izegipala zuha loló itune liki nilahe.

28 Loko lokago, lekesava amiaké lamó: Géisi nene aí izegipala noane. Lélisi nene Moseni izegipala noune.

29 Ómasímo nene gakó makó Moseni lo amimó neve loko gelenounimóza, imane ve nene getamoláa nene gelemune.

30 Liki likago, ámina vémo gakó láa loko lo kimimó: Nogómula ale goloutoneta vémini getamoláa gelemahe. Neza giza lo noleketuve.

31 Ómasí eza vegená golesatini gakóini geleko kelémo vatí osá amimóza, makó nenémo Ómasí geké lotoko gakola gele alitimó nene, Ómasímo alémo vatí inogo ive loko gelekáa noune.

32 Itó ganá apí oko mikasi utó itotí ká emane ve makolímo agómula likamó getamó agómula ale golouta gakó ma lago gelemuháma neve.

33 Nenemú imane ve Ómasilokatí lemémimó nelina, hoza nenémináa ma alemiline.

34 Loko lokago, láa liki lamó: Golesa gupilizá utó animó ánenéminaka monó lo lemesaláa noape. Liki liake, ahelú i ahulamó.

Kigikámini agómula lika gakó

35 Izesú nene amisili ahula gakó geleake, koma minake ámina ve ánígoake, loká otoko geza okulumakutí limi ve gihilamú gele alévolé onoape.

36 Loko lokago, ámina vémo ve lamanámaka, lani ve nelepezekako, ánígo lamaná okinake, aikumú gele alévolé itove.

37 Loko lokago, Izesú nene geza ánígonoako gakó lo nogumu ve neza imane noumole.

38 Loko lokago, ámina vémo Guivahanínemaka, neza mota gele alévolé onouve. Loko loake, agihúna geko akamó.

39 Lá okago, Izesú limó: Neza vegenalitini mogonáini ale vevesatove loko mikasiuka lumumó nene kigikámini agómula nomimó nenete pulsuki ánígataze, itó ligikámini agómula likamimó neve liki liaká nia vegenalitini kogómula likokiko, ámináa miniliki viki minatave loko neve.

40 Loko lokago, Palisaio monó ve minamoláa lugáa keza giliake, loká itiki Olo, ligikámini agómula likamó nouko nolape.

41 Liki likago Izesú láa loko lo kimimó: Lekeza likigikámini agómula likakumú gatizá minalina, lihimatini minamilinamóza, lekeza nene ligikámini agómula goloutonoive liki liaká nianazo, lihimatini ha minanogo ive, loko limó.

10

Sipsip izatini geisamú anoza gakó

1 Izesú gakó makó láa loko limó: Neza lamaná lo likimitoze, gililo. Makó eza sipsip izatini geisagú itinogo gatekú itemoko geisa gohalaló itekikoma, gumina vaukaló ve noive loko litune.

2 Gatetó ititi vemú nene iza gizapa ve noive loko litune.

3 Áisi nene anitekiko gatetó gizapa ve nenémo gahe segetanogo ive. Itó sipsip izava keza gizapa vémini anó lupamú gilinigave. Nigiliko sipsip izavatini kugulizá oko sele noloko geisa mikutí kelémoko liminogo ive.

4 Ezáa mututoni kelémoko lemeko ale goí noigo, anó lupamú gelekune liki ámegetanigave.

5 Haitó ve makolímini anó lupamú gelemitamó nenazo, ámegetaminigave. Kelegesá legekiko, golisi inigave.

6 Loko Izesú anoza gakó láa loko lo kemekago, keza nanamú lihe liake, gili vevesamamó.

Izesú nene sipsip izatini gizapa ve lamaná noive

7 Lá ikago, Izesú eza miní ameko lo kimimó: Lamaná lo likimitoze, gililo. Sipsip izatini geisagú itiaká gateni nénisi nene nouve.

8 Nénisi noamugo soza monó liaká ve utó amó mukitó nene gumina vaukaló ve minamó. Nenémú sipsip iza keza gakóini gili alisá amamó neve.

9 Gateni nénisi nene nouve. Makó keza není nivilegemiki miniki geisagú ititamó keza latila aminigave. Némegé némegé iki minumuni lamanakú mihina inigave.

10 Gumináló ve eza voko sipsip iza vauka apeleko aleko vinogogó geisagú iteaká noive. Není sipsip izate alévolé kemetamenigi minumuni lamanakú mihina iki minatave loko lumumóma neve.

11 Nénisi nene sipsip izatini gizapa ve lamaná nouve. Gizapa ve lamanalímina sipsip izamule loko minoko aleko oakaláa ahulatimó neve.

12 Gelekelé izegipa nene iza amelaho minamive, itó gizapa lamaná oko amitimó neve. Nenémú hela gala anitekiko, ánigooko sipsip iza ahu-lokioko golisi inogo ive. Lá okiko, hela gala nenémo sipsip izama kepeleko kelémo hutilí inogo ive.

13 Eza monimukó hoza aleaká noinazo, sipsip izamú makó gelesá amike ahulokimioko golisi voaká noive.

14 Nénisi nene sipsip izatini gizapa ve lamaná nouve. Aménehiki nezagi ánigoko gelenousive.

15 * Ámina oko vegenáne zuhagi nezagi ánigoko gelenoune. Nenémú není sipsip izamule loko minoko aleko oakánéa ahulanogo uve.

16 Itó sipsip izáne mulusi makó niave. Keza imane mikasigú vegenalitini geisa mikutí niamave. Neza kelémoko okugo, nonó lupamú gilinigave. Lá

ikiko, sipsip iza mulusi hamokó minanigave, itó ámina oko gizapa ve hamokó minanogo uve.

¹⁷ Neza minoko alekóné ahulanogo noukumule loko améneho agika nemaká noive. Ahulokinake, gosohá goha alinogo uve.

¹⁸ Minoko alekónéa makolímo ipá aminogo ive. Nene nezáne nagata geleko ahulanogo uve. Neza minoko alekóné ahulatove loko itó goha alitove loko nenémini zámuza nenitoka neve. Nenémini itane loko améneho lonetonoimóma neve.

¹⁹ Loko Izesú némika loko lokago, Zuta vegená keza giliake, goha ligí ahuligí iake, mini luga luga amó.

²⁰ Lá okago, mukilite holosi makó nene agikagú minokago gakó gopa nolinazo, nanamú gilinigi nilave.

²¹ Liki likago, lugáate láa liki lamó: Holosi makolímo agikagú minatimó nene, gakó nenémináa makó laminogo ive. Itó holosi makolímo kogómula lika vegenalitini kogómula ma ale goloutoketaminogo ive, liki lamó.

Zuta vete Izesuni ánigi ahulamó

²² Zuta vetini monó zagusave lusa gemó nenémini holiváa hepé gamena alitonoigo minamó.

²³ Izesú eza monó zagusave gaizopa agika makó agulizá Salomoni nenegú olío vogá ogá oko noigo,

²⁴ Zuta vetini monó gizapa ve keza iki alími vigiake, láa liki li amemó: Geza gamena háná nanamú mogonaka ale halá gekako, gele gopa oaká noune. Geza gologí oletative loko lo mololeta vema noitanimó nene lo utó moloko lo lememané.

²⁵ Liki likago, Izesú láa loko lo kimimó: Neza lo lekemeaká noumóza, lekeza gili seketigí iki gilisá amave. Aménehini gakotó alévolé suni loló oaká noumó nenémo mogonáne lo utó moloaká noimole.

²⁶ Lekeza nene sipsip izáne lilí iki minamakeve liki gakóné gili seketigí amave.

²⁷ Sipsip izáne lilí iki nia vegenalite nonó lupamú giliaká niago, neza ánigoko geleketonougo némegetiaká niave.

²⁸ Neza alévolé kemetameni kemekugo, latila amiki mini lúaló miliki minanigave. Není nigizakutí ve makolímo keí ipá aminogo ive.

²⁹ Améneho nenitoka kelémo mola ve áisi nene netá matá mukí kivilegeko noigo, aménehini agizakutí makolímo ipá aminogo ive.

³⁰ Nezagi aménehiki leza hamokó nousive.

³¹ Loko lokago, Zuta vetini monó gizapa ve keza gehani goha aliake, apili hilinigi niago,

³² Izesú láa loko lo kimimó: Hoza lamaná haitopaitolímíni nene aménehini gakotó aleaká noumóza, lekeza hí hoza ánigamó golesa okago gehanitunú nipili hilinigi niave.

³³ * Loko lokago, Zuta gizapa ve keza anotó aliki láa liki lamó: Hoza lamaná aleaká noanikumú lamune. Geza lelikitana vema noanimóza, geza Ómasi avilegekanike gezakamú Ómasi nouve loaká noanikumú gehanitunú gipilinogo noune.

³⁴ * Liki likago, Izesú láa loko lo kimimó: Lekelí monó gotolaú Ómasímo goní hoza aliaká a vemú nene lekeza ómai netá niave loko lumole loko li gakó nene luhuva gizinamóma neve.

³⁵ Nene Ómasímini gakó utó okimi vegenakumú ómai netá niave loko limó nenazo, itó monó gotolaú luhuva gizinamoláa nene lemeko akatimoláa oko nomine.

³⁶ Nenemú améneho nelémo otopá zeake nimiselekago mikasiuka lumu ve neza Ómasímini gipala nouve loko lumó nenazo, nenemú lekeza nanamú Ómasi avilegeaká noane liki nilave.

³⁷ Hoza aleaká noumó nene ánígikiko, aménehini avotigí amikoma, gakóne gili ahulatamó nene lamaná onoive.

³⁸ Itó ánígiko, není hozagi aménehini hozagi hamó lelegító onoikoma, gakónemukopa alévolé suni loló oaká noumó nene ánígalo. Ánígi guni itamó nene, améneho není nene akiseneive, itó neza ámina oko aménehini akiseneive liki giliiki mogonáa gili lamaná inigave.

³⁹ Loko loake, goha nagá aminigi niakutí ahuloake vimó.

⁴⁰ * Vike Zota nagamí vola helega Zoní apí oko monó nagamí holoketa apató goha voko minamó.

⁴¹ Neneló noigo, vegená mukí aitoka anitiake, láa liki lamó: Zoní nene golivagi netá makó alemimóza, imane vemú gakola limóma mukí mota gihila zekave.

⁴² Liki liake neneló vegená mukilite Izesukumú gili alévolé amó.

11

Lasaló hilimó

¹ * Petania numutoka ve makó avisekago ako minamó, agulizá Lasaló. Aí atolage lositá áminaló minasimó, kugulizáini Maliako Matako.

² * Maliá nene Guivahani Izesuni nene anuva lamanaki netupa holomiaké gotola zopovatunú agisa gilatoko ale lamaná ota venalímini agunala Lasaloni avisekago,

³ keza Izesutoka gakó láa liki ahulasimó: Guivahanitemaka gelezo. Zogova vema netá napa avisekago akonoive.

⁴ Liki likasigo Izesú nene gakó geleake, láa loko limó: Monéna hilitove loko gizalemive. Ómasímini lapaná utó itive loko, itó Ómasímini gipala není luhuva gegemá itive loko aviseneive, loko limó.

⁵ Izesú nene Lasaloki atolage Mataki Maliakimú agika kemenei vegená minamó nenazo,

⁶ nenemú Lasaloni avisi gakó geleake, ako mina numutó gamena lositá miní ameko minoake,

⁷ izegipala zuha láa loko lo limimó: Alo, Zutaia mikasiuka atiginá oko vitunize.

⁸ Loko lokago, izegipala zuha leza láa loko lo amunimó: Monó gizapa velemaka, Zuta vetini monó gizapa ve keza goí okoma vanító gehanitunú gepele hilitune liki linamóma nenazo, goha vitune loko nolape.

⁹ Liki likago, Izesú láa loko lo limimó: Hoza gamena netekaki holisakaki únakaki vaí onoive. Makó keza holisakalá lapanató gapo niviko, netá matá hanuva lotohá kepeleminogo ive. Neza hoza alito gamenaváne ha neve.

¹⁰ Makó keza lapaná nomiko holugú gapo vitamó nene, lotohá kipilinogo ive.

¹¹ Loko lo lemeake, miní ameko láa loko limó: Zogole Lasaló mota ako helekamóza, neza voko alémo otinogo uve.

¹² Loko lokago, izegipala zuha leza Guivahanitemaka, avó akonoitímó nene zokanogo inae.

¹³ Loko luhá nene, Izesú eza heleakakumú anoza gakó lo limitó leza hanuva akonoikumú lihe loko gele hee lamunike lokuko,

¹⁴ Izesú lo utó moloko láa loko lo limimó: Lasaló mota helekave.

¹⁵ Neza neneloka vamuuke imaneloka nougo hilikumú nene lekelikumule loko gele alévolé oakatinímini gihila lilí itave loko mulúnegú lamaná noguluve. Nenemú áminaloka vitune.

¹⁶ Loko lokago, Tomásí agulizá makó Lopé áisi nene agivelagini láa loko lo limimó: Leza mukitoka voko ezagi hilitune.

Izesú helenosakutí oteoko alévolé oko minoaká amelaho noive

¹⁷ Loko lokago, makó vunimó. Vunike Lasaloni gale zimikago gamena losive losive oko vokago, Izesú nene Petania numutoka vo aniteake, ámina gakó gilimó.

¹⁸ Petania apá nene Zelusalegatí 3 kilomitasí minamó.

¹⁹ Nenemú Zuta vegená mukilite Matako Maliako kugunáini helekagove liki ive nama ikitanigi vamó.

²⁰ Lá ikago, Matá eza Izesú noave lamó geleake, Maliá nene numukú noigo, vike gapoló hotu lasimó.

²¹ Izesuki hotu likasike, láa loko lo amimó: Guivahanínemaka, geza imaneló minatilina, nugunáne nene helemiline.

²² Itó itínasagi nene nemú manamú Ómasiloka voká lokako, gele gimitímoma neve loko gelenoueve.

²³ Loko lokago, gugunaka nene mómká oko otinogo ive.

²⁴ Loko lokago, Matá láa loko lo amimó: Minoko gamena napaló Ómasímo vegená muki lelémo otitító nene ezagi otitimóma neve loko gelenoueve.

²⁵ Loko lokago, Izesú láa loko lo amimó: Nénisi helenosakutí oteoko alévolé oko minoaká amelahina nouve. Makó keza nenikumú gili alévolé itamónenetili hiliiki goha otiki miniki aliki inigave.

²⁶ Itó makó keza kogómulagi miniki nenikumú gili alévolé itamónenetini kigika ma heleminogo ive. Minoloko voko minanogo ive. Geza imane nolu gakó mota gele seketigí onoape.

²⁷ Loko lokago, Matá limó: oo, Guivahanínemaka, geza gologí oletatane loko lo mololeta vema Ómasímini gipala mikasigú lemenane liki lina ve noane loko niifikatunú mota gele alévolé onoueve.

Izesú ive imó

²⁸ Loko loake, mohó agunala Maliani nene sele lo ameake, musika loko monó gizapa vema oake, geikumú nolive.

²⁹ Loko lo amekago, Maliá nene geleake, litá oko oteko Izesutoka vimó.

³⁰ Novigo, Izesú nene numutoka velesá vo anitemike, Malatani gakó lo ami apatoka minamó.

³¹ Lá noigo, Maliá eza litá oko oteko nolimigo, Zuta vegená numunagú makó miniki ive nama itiki mina vegenalite Lasaloni militamómaloka ive inogo novihe liki ámegetiki vamóza,

³² Maliá eza Izesú noitoka aniteake ánígoake, agihúna geko akoake, Guivahnínemaka, imaneloka noako nelina, nugunáne helemiline.

33 Loko loake, ive imó. Ive noigo, Zuta vegená ámegetiki vamoláa keza ámina iki alími vatí iki ive niago, Izesú nene ánigoake, mulunagú miluma napa geleake, agika hizekago,

34 loká oketake hikuka gale zinave. Loko lokago, Guivahanitemaka, oko ánigatane.

35 Liki likago, Izesú nene agómulagutí leke leke lokago ive imó.

36 Ive okago, Zuta vegenalite ánigiake lamó: Ánigalo. Agika nene aí ame gikitoko amenei ve neinogo ive.

37 Liki likago, keikutí lugáate lamó: Goí oko agómula lika ve makóma ale goloutotamóma nenazo, imane ve hanuva alémo zokaline.

Lasaló heleneikutí alémo otímó

38 Liki likago, Izesú goha miluma napa geleake, matimatiló anitemó nene geha mulí minamó, itó agepaló nene gehani napa mili lí amóma nene

39 Izesú ánigoake, gehanima ali ahulalo loko lokago, hili vémini atolah Matá láa loko lo amimó: Guivahninemaka, gamena losive losive mi-nokanazo, mota anuva noinogo ive.

40 Loko lokago, Izesú láa loko lo amimó: Nenikumú gele alévolé itanimó nene Ómasímini zámuzalámini luhuva utó iko ániganogane loko lo gumu gakó mota gagatí molokahe.

41 Loko lokago, gehanima akili ahulikago, Izesú nene okena oko velekuka ánigoake, láa loko limó: Aménega, geitoka lonoumó nene gelekanikeve loko gegepoka noluwe.

42 Itó gamena gamena geitoka loaká noumó nene gelenane loko gele-noumóza, imane ali nupa nia vegenalite géisi nimiselekako limimole liki gili zagik gilitave loko láa loko lo nogumuve.

43 Loko loake, gakó napagutí sele loko Lasalo, geza oteoko lemeno.

44 Loko lokago, helenei vémo agisa agizatoka nagá likita netá akoheminago lemekago, Izesú vínasiki ali ahulitalo loko lokago, vínasiki ali ahulitamó.

Izesuni apili hilinigi gohoni milamó

(Mat 26:1-5; Mak 14:1-2; Luk 22:1-2)

45 Lá ikago, Zuta vegená Maliatoka anitemoláa keitokatí mukilite Izesú oko moloko i netá ánigiake, aikumú gelego alévolé imóza,

46 lugáate Palisaio monó vegenatoka vake Izesú oko moloko i gakó avetó i kememó.

47 Avetó iki li kimikago, kezagi guguni giziaká a vegi monó kansole kilími nupa iake láa liki lamó: Imane lu avevezaha la avevezaha mukí okanazo, leza nana itune.

48 Leza nene amanapa oko nouko, eza lá oloko vova vova noiko, mukí vegenalite lugulizaki ve napa noive liki gili zagini-gave. Lá ikiko, Loma gevenalitini ami vete iki lova ali limiiki monó zugusavele nemó vegenate niámó ali tolova inigave.

49 Liki likago, keitokatí makó agulizá Kaiapá ámina kilisimasí oko novigo guguni giziaká vetini gizapa ve loló i vémo láa loko lo kimimó: Lekelisi negi nagí niaze.

50 Leza Zuta ve mukitoka latila o asú okatuninazo, ve hamokolímo lelémo nupa napa oko helekiko nenémo netá gihila ale utó oletative liki gilisá amave.

51 Loko limó nene ezáa agata geleko ligopa, eza ámina kilisimasílo nene guguni giziaká vetini ve napa minoakeve loko Izesú eza vegená mukikumule loko hiliti gakó lo kimimó.

52 Nene Zuta vegenakumukó lamimó. Ómasímini vegenala zuha numutó namatót nia vegená kelémo nupa okiko mulusi hamokó miliki minatave loko hilitikumú limó neve.

53 Láa loko lokago guguni giziaká a ve keza ámina zupa nene Izesuni apili hilinigi apí iki lova gizamó.

54 Lá ikago, Izesú eza Zutaia apakú vegenalitini kogómulaló goha vo utó amike mikasi gomopalaló minamó. Nenémini agataloka apá makó minamó, agulizá Epalaima nenenloka izegipala zuhagi makó minunímó.

55 Nouko, Zuta ve avotegini asenini zeketakumú gele minoaká holisi alitokago, apá koma kamalokatí vegená mukilite kugupe kigikáini ali gulu-vitanigi goí iki Zelusalega tivamó.

56 Viki monó zagusave napagú itiki niake Izesú noamigo vitagá ake, ligili dagili niake lekeza nanave liki nigelevé. Áisi nene holisigú atimó nehe amítimó neve.

57 Liki lamó nene guguni giziaká a ve napagi Palisaio monó vegi keza ve makolímo Izesú minoko aleko noiti apá ánigoko geleko onoitímó nene oko lo lemekiko, gelekinake voko nagá amítune, liki amunaló li miliki lató nene ámina gakó lamó.

12

Petania numutoka Izesuni anuva lamanaki netupa holotamó (Mat 26:6-13; Mak 14:3-9)

1 Asenini zeketakumú gele minoaká holisi gamena alitokago gamena 6-a veletoka ha nego, Izesú eza Petania numutoka vo anitimó. Ámina apató nene emane amunaló Lasaloni heleneikutí alémo otimó.

2 Áminaló nene nosánetá gizi vatá ikago, Matá nene hizeko gona moloko ale nokimigo, Izesú nene Lasalogegi makó minake nosánetá namó.

3 * Niki niago, Maliá nene anuva lamanaki netupa agulizaláa nalita loko meinava iteko mina netá nene hapu lita potologú minamó nene Izesuni agisaló holomiakte, gotola zopovalatunú gilatoko ale lamaná otamó. Lá okago, numukuka anuvámo moloake minamó.

4 Lá okago, izegipala zuhagutí ligive makó Kaliotó numutotí ve agulizá Zutá eza minoko Izesuni amimika liti ve nenémo láa loko limó:

5 Anuva lamanaki netupa hanuva minatinazo. Nenémini meinava moni gó losive makole hizekoko gohogó vegená kemekuko etatinazo.

6 Loko limó nene gohogó vegenakumú geleko limó negopa, áisi nene lelí moniló gizapa oko noigo moni alimi namego, ale halá halá geko minoaká inazo, nenemú limó.

7 Loko lokago, Izesú nene limó: Ahulikalo. Helekugo gale zinitanigi anuvavagi netupa nene nugupeló hilinitatakumú geleake loló onimikave.

8 * Gohogó vegená keza nene lekezagi miniliki viki minaniganae. Neza nene lekezagi mino-loko voko minaminogo uve.

Lasaloni apilinigi lova gizamó

9 Loko lokago, Zuta ve mukilite Izesú nenenloka noive liki nila gakó giliakte áminaló anitemó nene Izesukumukó nomimó. Lasaloni emane amunaló heleneikutí alémo otí vegi ániganigi amó.

10-11 Ikago, Lasaloni alémo otikumú nene Zuta vegená mukilite Zuta vetini monó gizapa ve ahulikimiake Izesutoka viki gímiziki aikumú gili alévolé amó. Nenemú guguni giziaká a ve napa keza Lasalonigi apele hilitune liki lova gizamó.

*Sigaga litanigi ago Izesú Zelusalega vimó
(Mat 21:1-11; Mak 11:1-11; Luk 19:28-40)*

12 Akiake gó lokago, holisiló a vegená mukilite Izesú Zelusalega noave gakó giliakie,

13 * kokonasi agila letiki Izesú ati gapoló militanigi aliki vamó. Hotu liake sigaga litimi nivake agae, Guivahanímini gakotó anitelimikane. Ómasímo lusa gegetatize. Isilae ve lelí gugulizaki vele noane.

14 Liki nilago, Izesú eza toki iza akaleva makó ánigoake, amupiló iteake vimó. Nene monó gotolaú gakó láá loko minató gele minake lá imó:

15 * Zaion agokaú vegená lekeza lekelegesá legemino. Gilinahe. Agulizaki velini nene toki iza akalevámini amupiló iteake noave.

16 Ámina gakó nene izegipala zuha leza goí oko gele vevesunumízoa, alika Izesú nene okulumá lapanalagú atiginá oko itekago, nene gakó goha gelekunike, ámina gakó aikumú gizi milamómaló ámina avevezaha itake lá amó neve loko gele vevesunimó.

17 Itó Izesú nene Lasaloni sele lo amekago heleneikutí gonosi galegutí limigo ániga vegená mukilite keza ámina sunimú vegená lugáá avetó iki li kimiki minamó.

18 Ámina sunímini gakó giliakie, mukilite gapoloka hotu lanigi vamó.

19 Lá ikago, Palisaio monó vete kezáini ligili hagili niake lekeza gilinahe. Hizi lí itata hoza nalemó nene gihila nomigo, vegená mukitoka aitoka gímizi asú niave, liki lamó.

Kiliki ve makolite Izesunimú vitagá amó

20 Ámina holisigú Ómasi geké lotatune liki Zelusale numutoka tiva vegenakutí Kiliki ve lugáá minamó.

21 Keza nene Galilaia mikasiuka Petesaita numutotí ve Pilipó noitoka vake, ve lamanámaka, Izesuni ánigatune loko noune.

22 Liki likago, Pilipó nene Etuluni lo amekago, ezagi makó viki Izesuni li amikasigo,

23 ezáa hilitikumú anoza gakó láá loko limó: Okulumakutí lumu ve gihila není lapanánegi luhuváá utó iti gamena mota alitokave.

24 Lamaná lo likimitoze, gílico. Kilé zuha makó nene mikasigú hizemitu-nimó nene hanuvagó minanogo ive. Mikasigú hizékuko, lemeko nenegú helekoko mikasímini nosánetá loló okoko gihila mukí zinogo ive.

25 * Áminámini oko makó keza kigika kemeníkumú gilikiko ititimó nene, alikaloka kigika kemeni gopa inogo ive. Makó keza mikasigú miniki neniku-mule liki kigika kemeníkumú gilikiko limitimó nene alévolé kemetameni ali luhanigave.

26 Ámina Kiliki vehe itó vegená makó ahe není gelekelé izegipa minutune liki gilitamó nene némegetiki ataze. Lá ikiko neza minomo ititotoka gelekelé izegipánegi makó minanogo une. Itó nasahilí initata vegenalitini kugulizá nene améneho ale otinogo ive.

* **12:13:** Age 118:26 * **12:15:** Zak 9:9 * **12:25:** Mat 10:39, 16:25

Izesú ezáa hilitikumú lo kimimó

²⁷ Nigika ololó oake, luvolovo zekave. Lá okazo, nenemú nanave litove. Aménega, gamenaváne alitokaze, nugupeló ititi netá molo hotó onetozo litomó nene etamitinazo, láa loko lamitove. Miluma gilito netá mota numupiló itinogo noigo, gamenaváne okaze.

²⁸ Nenemú aménega, geza lokako, gugulizalímini luhuva utó itive. Loko lokago, okulumakutí gakó láa loko limimó: Nugulizalímini luhuva mota gonanalivagi utó okamóza, utó oloko voko utó okogó minanogo ive.

²⁹ Loko ligo, vegena mulusi miliki minamó keza giliake, ageló makolímo gakó lo amekave.

³⁰ Liki likago, Izesú láa loko lo kimimó: Gakóma nene nenikumule loko nomive. Lekelikumule loko utó okave.

³¹ Itína Ómasímo imane mikasigú vegeneralitini lihimáinimú meina kimiti gamena mota alitokave. Itína imane mikasigú agulizaki Satani amisilinogo uve.

³² Imane mikasigutí zaló nilími otikiko, numutó namató vegena alesa molo kemekugo, nenitoka imi asú inigave.

³³ Loko limó nene zohota zaló hilitikumú anoza gakó limó.

³⁴* Loko lokago, mukí mina vegeneralite láa liki li amemó: Leza monokú nene gologí oletative loko lo mololeta ve eza nene helemoko mino lúlalo moloko minanogo ive liki luhuva gizina gakó gelenounimó nenazo, geza okulumakutí lumu ve gihila nene zaló nilími otikiko hilitove loko nanamú nolape. Okulumakutí limi ve haitolímiminú nolane.

³⁵ Liki likago, Izesú láa loko lo kimimó: Ló liví nene gamena komáisi holutikú hanatanogo ive. Nenemú límugusí nenémo lekelitoka sinitokatize, ló livíma lekelitoka lapaná noliko aliiki minalo. Ve makó keza límugusí gapogú vitamó nene, gapo ánigi hee laminigave.

³⁶ Nenemú livíma lekelitoka miniko, ali lá ilo. Lekelisi livilímini mututoni loló itune likima nenikumú gili alévolé ilo, loko limó.

Zuta vete gili alévolé amamó

Izesú nene gakó láa loko loake vo halá geko minamó.

³⁷ Izesú eza haitopaitó suni kogómulaló ale utó okago ánigamóza, aikumú gili alévolé amamó.

³⁸* Lá amó nene Ómasímini agepagutí gakó loaká ve Isaiá li gakó nene alévolé itive liki lá amó. Eza lo goselé ike gakó láaloko luhuva gizamóma neve: Guivahaníinemaka, gakoka lokuko vegena nanakilite gili alévolé inave. Itó Guivahanímini zámuza éahitoka utó okago gele zugeneive.

³⁹ Itó Isaiani gakó láa loko luhuva gizató keza gili alévolé amamó neve:

⁴⁰* Áisi kogómula gahaga like kigika ale gopa okago, keza kogómulatunú netá matá ánigi hee lisá amave. Kigika ali viligamago, kelémo lamaná itemoláa nomive.

⁴¹ Loko Isaiá limó nene Izesuni lapaná okulumakú nego ánigoake limó neve.

⁴² Lá okago, Zuta vetini gizapa vegutí lugáa nenete Izesukumú gili alévolé amóza, lo utó itunimó nene, Palisaio monó ve nenete monó gapo hizi lí ilimikatave liki kehelele vizekago, li utó amamó.

⁴³ Keza vegena makolite legepoka litave likigó iki miliki iaká amó neve. Ómasímo lelémo napa itive liki iki miliki isá amamó neve.

* **12:34:** Age 110:4; Isa 9:7; Tan 7:14 * **12:38:** Isa 53:1 * **12:40:** Isa 6:10

Izesú lo molonoi gakolímo alika goní oletanogo ive

⁴⁴ Lá okago, Izesú nene gakó napagutí láa loko limó: Makó keza nenikumú gili alévolé itamó nenete nenikumukó negopa, nimisili ve aménehinimuki gili alévolé inamó geleneive.

⁴⁵ Makó keza není ánigi hee litamó nenete nimisili vegi ánigi hee hee linamó geleneive.

⁴⁶ Nenikumú gili alévolé ita vegenalite límugusigú minamitave loko mikasiuka vegenalitini liví minanogo lemenoumóma neve.

⁴⁷ Makó keza gakóne imane giliiki gili ahulatamó nene, nénisigó goní oketaminogo uve. Nénisi nene mikasiuka vegená lihima kimitove loko negopa, numutó namató vegená kugutó vizitove loko lumumóma neve.

⁴⁸ Makó keza není ahuli hotó inimiiki není gakó ahulatamó nene, gakó lo mulumó nenémo gamena napaló goní oketanogo ive.

⁴⁹ Nezáne nagata geleko losá amuve. Améneho nimisili vémo lo utó itane loko lonimikago loaká nouve.

⁵⁰ Lá nouke, neza agepagutí gakó nenémo alévolé oko minoaká mogona ale utó oaká noive loko gelenouve. Gakó nolumó nene améneho litokó loaká nouve, loko Izesú limó.

13

Izesú izegipala zuhatini kigisa nagamí zeketamó

¹ Avotegini asenini zeketakumú gele minoaká holisi alitokago, gamena hamokó veletoka ha nego, Izesú nene imane mikasi ahulokinake aménehitoka atiginá oko itito gamena mota alitokave loko geleake, imane mikasiuka aí mututoni lillí a vegená agika lemeneike agika limitímini mogona lelepizinogo netá makó alimó.

² Nosánetá nanogo alegesá okuko, netá makó lá oko utó imó. Kaliótó numutotí ve Saimoni gipala Zutani agikagú nene Satá iteake alémo vávani okago, Izesuni amimí inogo gilimó.

³ Lá okago, Izesú nene améneho eza netá matá mukí nene nigizakú molonoimómá neve loko, itó Ómasilokatí lumutímima goha nene Ómasiloka atiginá oko itinogo uve loko geleneike,

⁴ nosánetá noko minuhakutí oteake, luhoaká gola háná nene gololohá oake, tauli aleko gohalaló likeake,

⁵ nagamí nene lapegú leke moloake, izegipala zuhatini ligisa nagamí zelimiká taulitunú gilatolimiká oloko vike,

⁶ Saimon Pitá noítoka vokago, eza láa loko lo amimó: Guivahanínemaka, není nigisa nene géisi nagamí zenetatove loko nolape.

⁷ Loko lokago, Izesú láa loko lo amimó: Imane loló nou suni nenémini mogonáa itínasa gelemane. Alika minomo iteko gilinogo ane.

⁸ Loko lokago, Pitá nene není nigisa nagamí zenetaminogo ane. Loko lokago, Izesú nene nénisi nagamí zegetamitomó nene, gezagi nezagi apizeminogo usive.

⁹ Loko lo amekago, Saimon Pitá láa loko lo amimó: Guivahanínemaka, láa lokoma nigisagó negopa, nigizanigi gotónegi mukí nagamí zenetatane.

10 Loko lokago, Izesúanoza gakó lāa loko lo amimó: Makó keza nagamikú akiiki alika nene kigiságó nagamí zikiko nene, kugupe nene guluvito asú inogo ive. Lekeza nene áminagó iki likigika guluviti asú inamóma nemóza, lekeza mukitoka guluviti asú ikigó minamave.

11 Loko limó nene ve makó hí vémo amimika litikumú geleneike, lekeza mukitoka guluviti asú ikigó minamave loko lo limimó.

12 Ligisa nagamí zeletō asú oake, gola nene goha ale luhoake, mitó minake lāa loko lo limimó: Imane loló oleketu netalímimi mogonáa mota gili hee linahe. Olike.

13 Lekeza nenikumú nene Guivahaniteve itó tisaleve liki liaká niamóma vatí iki liaká niave.

14* Itó neza Guivahanitini itó tisalinímina gelekelé oleketuke likigisa nagamí zelikimikumó nenazo, lekezagí ámináminiki lukugupe alimi limiki likigisa nagamí eza zetiko eza zetiko iliki viki minalo.

15 Imane gelekelé olíkimiaká suni naleleketurumó nene lekezatini ámináminiki alilikivitave loko apí o nolukumuve.

16* Neza lamaná lo likimitoze, gililo. Gelekelé izegipa makó nenémo golohá veva avilegeakala nene nominazo, lukugupe aliki itikatave loko noluve.

17 Itó gakó nolumó nene gilinamó nenazo, áminama amegesaló milatamó nene Ómasímo nónohá zeleketa vegená minanigave.

18* Gakó nolumó imanémo lekelí mukitoka ale asú amive. Neza nene lekelémo etó onou vetini mogonatini gelenoumóza, monó gotolagutí gakó makó lāa loko neve:

Nosánetá noko minusi ve nenémo není nehelú okave liki luhuva gizina gakó nene ve makotoka alévolé inogo ive.

19 Itó ámina netá utó okiko, lekeza lo lekemeaká nou ve noive liki gili seketigí itave loko ámina netá velesá utó onamigo lo nolukumuve.

20* Neza lamaná lo likimitoze, gililo. Makó keza amisilito ve makó nasahilí itatamó nene, hoza amelahina neniki nasahilí initamó gilinogó ive, itó makó keza nasahilí initamó nene nimisili vegi nasahilí itamó gilinogó ive.

*Izesú aí amimí iti vemú lo utó imó
(Mat 26:20-25; Mak 14:17-21; Luk 22:21-23)*

21 Itó Izesú ámina gakó lāa loko lo asú oake, muluna gitihiná okago, lāa loko lo utó oko lo limimó: Neza lamaná lo likimitoze, gililo. Lekelikutí ve makolímo nimimika linogó ive.

22 Loko lokago, izegipala zuha leza gonú gimisi okunike nene, éahikumú live lokunike nene, gele gopa unimó.

23 Lá okuko, eza Izesú agika nemeaká i veve liki lina vémina amatoka nougo,

24 Saimon Pitá agizanitunú avevezaha ike éahikumú nolihe loká okako lo giminoloko lokago,

25 neza Izesuni amatoka nouke loká otuke Guivahanínemaka, éahikumú nolane.

26 Loko lokugo, Izesú lāa loko limó: Nosánetá nagamikú lupizeoko amekugo natí vemú noluve. Loko loake, nosánetá lupizeake, Kaliótové Saimoni gipala Zutani nene amimó.

* **13:14:** Luk 22:27 * **13:16:** Mat 10:24; Luk 6:40; Zon 15:20 * **13:18:** Age 41:9 * **13:20:** Mat 10:40; Mak 9:37; Luk 9:48, 10:16

²⁷ Amekago, nokago, Satá nene agikagú itekago, Izesú lāa loko lo amimó: Geza netá matá loló ítové loko lanimó nene litá oko loló ozo.

²⁸ Lāa loko lo ami gakó nene agivelage leza makó minuni vete gele hee lamunimó.

²⁹ Lá unike, lugáa nenete Zutá nene moni gotó gizapa oaká imó nenazo, nenemú holisigú nosánetá meina hizitive loko namisilihe loko nene gelehá. Itó lugáa nenete gohogó vegeñá nene moni gona moloko kimitive loko namisilihe loko gulunimó.

³⁰ Lá okuko, Zutá nene nosánetá noake, agupegú límugusi zekago hetoka lemeko vimó.

Gosohá lo hukoketa gakó

³¹ Hetoka lemekago, Izesú lāa loko limó: Itína okulumakutí lumu ve gihila není nugulizálímini luhuva mota gonanalivagi utó inogo ive.

³² Ómasímini agulizálímini luhuva gonanalivagi utó noiko, Ómasímo lokiko, nugulizálímini luhuva nene litá oko gonanalivagi utó inogo ive.

^{33*} Izegipánemata, gillilo. Lekezagi gamena koma mininake vitove. Vokugo, lekeza nenikumú vitágá itamóza, amunaloka Zuta vegeñá lo kumumómámini oko itínasa lāa loko lo nolukumuve. Neza voko minatotoka nene lekeza aminigave.

^{34*} Itó itínasa gosohá lāa loko lo nohukoleketuve. Likigika eza amiko eza amiko ilo. Neza nigika lekemenoumó nenémini iki likigika eza amiko eza amiko iliki vilo.

³⁵ Likigika eza amiko eza amiko itatímo nene, vegeñá mukilite lekelikumú nene néní izegipáne zuha niave liki gilinigave.

Izesú Pitá alika egamega otatíkumú limó (Mat 26:31-35; Mak 14:27-31; Luk 22:31-34)

³⁶ Lāa loko lokago, Saimon Pitá nene Guivahanitemaka, hitoka vitane. Loko lokago, Izesú lāa loko limó: Apá makotoka vitomó nene itínasa némegetanimóza, alika némegetanogo ane.

³⁷ Loko lokago, Pitá lāa loko lo amimó: Guivahanitemaka, itína neza nanamú gémegetaminogo uve. Geikumule loko minoko alekóne ahulatove loko ale vatí okumóma nena.

³⁸ Loko lokago, Izesú lo amike limó: Nenikumule loko minoko alekóne ahulatove loko nolape. Íi, lamaná lo gimotoze, gelezo. Azo neteká nene okoloho nenémo anó velesá molonamiko, nenikumú nene ámigonamuve loko egamega onetatanimó nene gamena losive makole inogo ive, loko lo amimó.

14

Izesú nene Ómasiloka voaká gapo noive

¹ Izesú gakó láa loko limó: Mulutini lepa hiziko minalo. Lá iki miniki Ómasimú gili alévolé iki nenikumuki gili alévolé iki minalo.

² Aménehini numukú numuni agika vaí oko neve. Lá oko nomilina neza voko apá makó ale vavá oleketatove loko lamuline.

³ Neza voko apá makó ale vavá olikimioko mininake, atiginá oko oko lekelémoko vokugo, nenitoka minatave. Lá niiki neza minato apakú nene lekezagi makó minanogo une.

* ^{13:33:} Zon 7:34 * ^{13:34:} Zon 15:12,17; 1 Zon 3:23; 2 Zon 5

4 Neza voko minato apalímini gapováa lekeza ániginave.

5 Loko lokago, Tomásí lo amike limó: Óe, Guivahanitemaka, geza voko minatani apaláa gelemune. Nenemú gapováa nana oko gilitune.

6 Loko lokago, Izesú láa loko lo amimó: Gapovagi itó gakó gihilagi itó alévolé oko minoakálímini amelahina néni nene nouve. Není niviligiíki aménehitoka viki anitiakala nene ma nomive.

7 Lekeza nenikumú gili vevesalina, aménehitokumaki gili vevesaline. Itína aikumú gili vevesiáke, aí mota ánígikave.

8 Loko lokago, Pilipó nene Guivahanitemaka, ametehini lelepizekako, netá makokumú loká ogetamitune.

9 Loko lo amekago, Izesú láa loko lo amimó: Pilipo, gamena háná lekezagí minumóza, geza néni velesá ánígo hee hee lamape. Ve makolímo není ánígonitoi vémo aménehinigi ánígo noimó gelekave. Nenemú geza nanamú ametehini lelepizeko loko nolane.

10 Améneho nene néni ale akiseneive itó neza nene aménehini ale akisenouve loko géisi nene gele zagemape, olo. Gakó lo nolukumumó nene neza nagata geleko lo lekemesá amuve. Alévolé suni aleaká noumó nene nigikagú noi ve aménehini zámuzaló utó oaká noive.

11 Améneho nene néni akiseneive liki, itó neza aménehini akisenouve liki gili zagitave loko nolumóza, ámina gakó nigiliki gihila zemikoma alévolé suni aleaká noumó nenemú nenikumú gili alévolé ilo.

12 Neza lamaná lo likimotoze, gililo. Nenikumú gili alévolé itamó nenete alévolé suni aleaká noumó áminagó iki alinigave. Itó nenegó nomive. Neza aménehitoka itekinake Sikalahú amisilitomó nenazo, aí zámuzatunú alévolé suni lilí itamó nene néni hoza aviligiki alinigave.

13 Itó lekelisi nene néni nugulizá ali miniki netá makokumú voká litamó nene, aménehini agulizá ale hutílítove loko gele lekemekogó minanogo uve.

14 Není nugulizá ali miniki netá makokumú voká litamó nene gele likiminogo uve.

Sikaluhula amisilinogo lo hutamó

15 Likigika nenitoka miliaká niámó nekoma nene néni gakó gili alinigave.

16 Lá niiko, néni aménehitoka lokugo, izotipo loló oko luhusatini ale kii liti ve amiselekiko, lemeko lekezagí mino lúaló moloko minanogo ive.

17 Gakó gihila gotoláa nene Sikalahukumú noluve. Nene monó gelema vegenalite aí ánígi hee hee lamamó, itó mogonalamú gili hee hee lamamó. Nenemú aí aleminigave. Lá oniomóza, lekezagí minake likigikagú lemeko minoaká noimó nenazo, mogonala nene lekelisi gilinamóma neve.

18 Neza ahulolikimikugo, megusa lilí iki minikatave loko neza lekelitoka goha anogo uve.

19 Gamena alínipa makó neize. Nene gamena asú noiko, monó gele zagemita vegená nenete néni goha ánígamitamóza, lekelisi nene áníganigave. Neza gosohá minoloko iteakálímini amelaho nounazo, lekeza áminagó iki gosohá minilíki itinigave.

20 Gamena nene zupa lekeza nene améneho néni ale akiseneive itó lekelí neza ale akiseneive itó lekelisi néni ali akisinave liki gili hee linigave.

21 Makó keza negepagutí gakó ali miniki gili aliaká nia vegená nene lamaná kigika nimiaká nia vegená niave. Itó kigika nimítamó nene, améneho agika kiminogo ive. Itó nezánegi nigika kiminake mogonáne lo utó oko lo kiminogo uve.

²² Loko lokago, Kaliotó numutotí ve Zutani apolaho loká otake Guivahan-itemaka, geza nana okoko mogonaka lelitokagó lo utó okoko monó gelema vegenatoka halá gitane.

²³ Loko lokago, láa loko lo amimó: Ve makolímohe agika nimitimó nenémo gakóné nene gele alekiko, améneho áminagó oko agika aminogo ive. Lá okoko nezagi lositá aitoka voko anitekisinake agikagú minoko aleko inogo usive.

²⁴ Makó keza kigika nememitamó nene, gakóné gili aleminigave. Itó gakó imane lo nolukumumó nene není gakó nomive. Améneho nimisili vémini gakó lo nolukumuve.

²⁵ Neza nene lekezagi minuke gakó imane lo lekemeaká noumóza,

²⁶ izotipo loló oko luhusatini ale kii liti ve Sikalahú nene améneho není nugulizató amiselekiko, lemeko netá mukikumú apí o lekemeko néni lo lukumu gakó nene ale gosohá oleketoko lo lekemeko minanogo ive.

²⁷ Není helisa nene hulu nolukumuve. Hanuva vegenalitini hulu leke-memuve. Nezáne hulu nene nolukumuve. Nenemú likigika nene ololó okoko lekehеelele vizemino.

²⁸ Neza voko nomininake lekelitoka goha atiginá itove loko lo nolukumugo gilinamóma neve. Likigika nenitoka miliiki minamó nelina nene, améneho nivilegeko noinazo, aménehitoka ititokumú giliiki mulutikú lamaná geeline.

²⁹ Imane netá utó okoko lekeza ánigiki nenikumú gili alévolé itave loko ámina netá utó onamigo goí oko lo nolukumuve.

³⁰ Neza nene gakó mukí miní ameko lo lekememitove. Imane mikasigú agulizaki ve Satá nenító oko nehelú itove loko ale vatí okave. Áisi nene okoko ma nehelú aminogo imóza,

³¹ monó gelema vegenalite nigika aménehini ameaká noumó itó hoza gakó lonetamó nene aleká noumó nene ánigi hee hee litave loko imane suni aleká nouve. Lekeza otilo. Mota vitunize, loko limó.

15

Izesú nene vain nagá mogonáa lamaná noive

¹ Izesú miní ameko láa loko lo limimó: Neza nene vain nagá mogonáa lamaná nouve. Itó améneho nene vain mini amelaho noive.

² Nenitokatí izana makolímo gihila zemitimó nene hukoko alahulanogo ive. Itó hupena makolímo gihila zekiko, gihila vauva aleko zitive loko golesa itimoláa huko ahuloaká noive.

³ Lekeza nene monó lo lukumugo gili alévolé niatímo likigikagú mota guluvitiaká niave.

⁴ Lekelisi nene nenitoka iki apiziki minatamó nene, neza lekelitoka voko apizeko minanogo uve. Izana makolímo mogonaló apizeko minamitimó nene gihila zeakaláa ma nomive. Lekeza nene nenitoka iki apizemitemamó nene, lekelitoka áminagó oko gihila ma zeminogo ive.

⁵ Vain nagá mogonáa néni nene nouve, itó lekeza nene izanáa niave. Makó keza nenitoka iki apiziki minatamó nene, neza áminagó oko keitoka voko apizekugo, keitoka gihila mukí zinogo ive. Lekeza nene nenitoka gímizemiki netá gihila lilí iakaláa ma nomive.

⁶ Makó keza nenitoka iki gímizemitemamó nene, izanagitana oko gulugulu vizekiko, hukoko alahulanogo ive. Izanáa nene gulugulu vizekago, hukiki lokú giziaká niave. Nenitoka iki gímizema vegenatoka ámina suni utó inogo ive.

7 Lekeza nene nezagi apiziki minatamó itó gakóné likigikagú minatimó nene, netá nemú manamú voká litamó nene, utó olifikimino iye.

8 Lekelitoka gihila mukí zekiko, lekeza lamaná není vegenaé zuha lilí iki minatamó nenémo aménehini lapaná nene gonanalivagi utó inogo iye.

9 Améneho nene agika nemeaká noive. Neza ámináminoko nigika ameaká nouve. Lá okago, lekeza nene nigika lekemeaká noutímimi agikagú minalo.

10 Neza améneho loneta gakó gele alekuke, agika nemeaká noitímimi agikagú noumó neve. Ámináminiki loleketonou gakó gili alitamó nene nigika lekemeaká noutímimi agikagú minanigave.

11 Není mulúnegú agila guluma oaká noi netá nene mulutikú minative loko, itó mulutikú agila guluma itimó nenémo hutilí oko vaí oko minative loko gakó imane lo lekeme asú nouve.

12* Láa loko nololeketuve. Nigika lekemeaká noumó nenéminiki lekezagí likigika eza amiko eza amiko iliki viki minalo.

13 Makó eza agivelaginimule loko minoko aleko imoláa ahulatimó nene, agika kimimómámini mogona utó inogo iye. Haitolíminoko agika kemeaká nenémo láoko agika kimi suni avilegemitímó neve.

14 Lekeza loleketonou gakó ámegetatamó nene zogone milanigave.

15 Gelekelé izegipa makolímo gizapa vevámo oko moloko i netakumú geleminazo, neza goha lekelikumú nene gelekelé izegipáneve loko lamitove. Neza nene aménehitokatí gakó gulumó nene lo utó oko lo lekeme asú okumó nenazo, itína lekelikumú zogone niave loko litove.

16 Lekelisi není nene nilími etó amave. Nénisi nene lekelémo etó okugo, lekeza viki gihila ali utó ikiko alévolé oko minova minova oko minative loko loleketumóma neve. Lá iiki není nugulizá ali miniki netá nemú manamú aménehitoka voká litató likiminogo iye.

17 Likigika eza amiko eza amiko itave loko nololeketuve.

Monóini nomi vegenalite Izesuni lova ali amiaká niave

18 Monó gelema vegenalite lova ali likimikikoma Guivahanite mikasigú noigo gói iki lova ali amemóma neve liki gili minalo.

19 Lekeza monó gelema vegenalitini mulusigutí minalina, keza kigika lekemeline. Neza nene holúikutí lekelémo etó okugo, keza iki miliki a netá nene lekeza ahulikamóma nenazo, nenemú lova ali likimiaká niave.

20* Gelekelé izegipalaló lilí itatamó nenémo gizapa véa lilí ita netá avilegeminogo iye loko lo lukumu gakó nene lakagatí molamino. Keza není gopoguni milinimiaká nianazo, lekezagí áminagó iki gopoguni mililikitanigave. Není gakó ali gúemamó nenazo, lekelí gakó ámináminiki ali gúeminigave.

21 Nimisili ve ánigi hee lamamó nenazo, nenemú není nugulizá lekelitoka minakumule liki lá ilikitanigave.

22 Neza keitoka lemeko utó oko gakó lo kememumó nelina, lihimáini minamiline. Lá okamóza, lo kemenoumó nenazo, lihimaváini nana iki ahulatamó neve.

23 Lova ali nimiaká nia vegenalite aménehinigi áminagó iki lova ali amiaká niave.

24 Neza holúikú haitó suni golivagi nene vegenalite ali utó amatímimi ale utó amumó nelina, keitoka lihima nomimó minaline. Itó imane alekuke, keza

* **15:12:** Zon 13:34; 1 Zon 3:23 * **15:20:** Mat 10:24; Luk 6:40; Zon 13:16

ániginamó ánigi ahulinake, není lova ali nimiaká niake aménehini áminagó iki lova ali nameve.

²⁵* Lá ikago monó gotolaú gakó makó láaliki luhuva gizinamó nene alévolé oko neve:

Keza nene hanuvamú není lova ali nemeve.

²⁶ Izotipo loló oko luhusatini ale kii liti ve gakó gihilámini amelaho Sikalahú nene aménehitoka noive. Áí amiselekugo, aménehitokatí lemeko mogonáne lo utó inogo ive.

²⁷ Itó lekelisi nene hoza apí ukutí nezagi miniliki itinamó nenazo, lekezagí áminagó iki mogonáne li utó inigave.

16

Sikalahlímini hoza

¹ Alikaloka netá golesa nalilikitikoma, monó ahulikatave loko gakó imane lo nolukumuve.

² Lá iiki monó numutini hizi lí ilikitani gave. Itó gamena makó alitanogo ive. Lá noiko, Ómasi nasahilí notupe liki likipili hilinigave.

³ Keza nene aménehinigi nezagi ánigi hee hee lamíki nene suni alinigave.

⁴ Neza goí oko imane lo nolukumu gakó nene alévolé okiko, ameteho gozapá lo limi gakóma gihila zekave liki gilinigave. Hoza apí u game-naló lekezagí minoko aleko ituni gamena hána ha nego lo lekememumómá nemóza,

⁵ itína nene nimisili vémitoka atiginá oko vinogo ugo, lekelikutí ve makolímo hitoka vitane loko loká onetamive.

⁶ Gakó imane lo lekemekugo miluma metalímo likigikagú vaí noize.

⁷ Lá noimóza, neza gakó gihila litoze, gilio. Neza atiginá oko aménehitoka ititomó nenémo netá gihila ale utó oleketanogo ive. Ahulolikimioko itemulina, hize lé oleketati ve izotipo nene lememiline. Itekinate amise-lekugo, lekelitoka liminogo ive.

⁸ Lemeko mikasiuka monóini nomi vegenalitini lihimáinímini mogona itó hee loko minoko aleko oakálímini mogonamú itó lihima limitítímini mogonamú lo utó okiko gili hee linigave.

⁹ Keza nenikumú gili alévolé amanazo, lihimáinímini mogonamú lo kemekiko gilitave.

¹⁰ Neza aménehitoka atiginá oko itekugo, goha není ánigaminigi anazo, hee loko minoko aleko oakálímini mogonamú lo kemekiko gilinigave.

¹¹ Imane mikasiuka agulizaki ve Satani lihimamú mota goní okamómá nenazo, goní oakálímini mogonamú lo kemekiko gilinigave.

¹² Gakó lo likimitomó mukí nemóza, itína litá oko lo lekeme asú okugo, gena lekepelekatize.

¹³ Gakó gihilámini amelaho Sikalahú áisi lemekoko gakó gihilagú lekelémoko vinogo ive. Nene ezáa agata geleko lo likimitigopa, nenitokatí itó aménehitokatí gakó geleoko lo likiminogo ive. Lá okoko alika utó iti netakumú lo lekeme lekeme oko minanogo ive.

¹⁴ Gakó nene nenitokatí alekoko lo nolikimioko není nugulizá ale napa inogo ive.

¹⁵ Aménehitokatí netá matá nene nenikó neme asú onoimó neve. Nenemú Sikalahulímo nenitokatí gakó alekoko lo likiminogo ive loko mota lo leke-mekuve.

* 15:25: Age 35:19, 69:4

Miluma gilitamóza miniiki mulúikú agila guluma inogo ive

16 Lekeza gamena koma niminiki není goha ánígaminigave. Nenémini veletó koma miniki není goha áníganigave.

17 Loko lokago, vegenala zuha lugáa leza logele hagele unike gakó imane nana gakó nolive. Gamena koma niminiki není ánígaminigave, itó nenémini veletó koma miniki není goha áníganigave, itó aménehitoka atiginá oko ititove loko nolimó nene nana gakó nolive.

18 Loko lunike, gamena komamú nolimó nene nana gamenamú nolive. Gakó limó nenémini mogona gelemune.

19 Loko lokunike, loká otanogo nouko Izesú geleake láa loko lo limimó: Gamena koma niminiki není ánígaminigave, itó nenémini veletó koma miniki není goha áníganigave loko lo lukumumómamú ligili hagili niae.

20 Lamaná lo likimitoze, gililo. Lekeza nene ive nama iki niminiko, monó gelema vegená nenete kogoliza vizinigave. Itó lekeza miluma gilikí minanigave. Lá niiko, ale viligokiko mulutikú agila guluma inogo ive.

21 Vená makolímo izegipa getati gamena alitokiko, miluma gilinogo ive. Minoko getoake, izegipala utó ikumú mulunaú agila guluma itímó miluma gilikumú agatí molanogoive.

22 Lekezagí ámináminiki itína miluma gilitamóza, goha ánígolikimikugo, mulutikú agila guluma inogo ive. Lá okiko, ve makolímo ipá oko ale ahulaminogo ive.

23 Ámina gamenaló netá matakumú není voká linitaminigave. Neza lamaná lo likimitoze, gililo. Lekeza netá nemú manamú aménehitoka voká litamó nene, áisi není nugulizató likiminogo ive.

24 Lekeza amunaloka miniliki itetó nene není nugulizá ali minake netá matakumú loká amamóma neve. Mulutikú agila guluma itímó nenémo hutilí oko napa oko minative liki voká liiki alinigave.

Mikasiuka netá mukí nene avilegeko nouve

25 Gakó imane lo lekemeva lekemeva omo iteko minumó nene,anoza gakokutí lo lukumumómá neve. Gamena makó alitanogo ive. Neneloka anoza gakó goha lo lekememinogo uve. Aménehini mogona lo utó oko lo likiminogo uve.

26-27 Gamena nene zupa není nugulizá ali miniki voká litave. Neza aménehitokatí lumu gakó mota gili alévolé iake, likigika nimikakeve loko aménehiki agika lekemekave. Nenemú lekelikumú aménehitoka voká litove loko nene lo lekememuve.

28 Neza aménehini ahulomikuke mikasiuka lumumó neve. Itó imane mikasi ahulokinake aménehitoka itinogo uve.

29 Loko lokago, izegipala zuhate leza láa loko lo amunimó: Imane anoza lamanike lo utó oko lo lemekane.

30 Nenemú itínasa geikumú nene vegená keza loká miká igitamago geza netá matá mukikumú gele asú onane loko nogulune. Geza Ómasilokatí lemenimó neve loko gele alévolé onoune.

31 Loko lokuko, Izesú láa loko lo limimó: Lekeza itínasa gele alévolé okune liki nilahe.

32 Gamena makó alitanogo ive. Alitokiko, není ahulinimiiki hutilí iki numutitoka vi asú inigave. Vilíkiko, nezánegó minanogo uve. Lá itomóza, aménehiki minanogo usive. Nenemú nezánegó minaminogo uve. Ámina gamena itína mota alitokave.

³³ Není hulu nenémo lekelitoka minative loko gakó imane lo nolukumuve. Lekeza mikasiuka niminiko gopoguni mililikitatamóza, mulutikú golesa gelemilo. Nénisi nene imane mikasiuka mukí netá avilege nou vema nouve.

17

Izesú izegipalamú Ómasiloka limó

¹ Izesú nene gakó lo asú oake, okulumakuka ánigo nomolake láa loko limó: Aménegamaka, gamena mota alitokave. Geza gipakámini lapaná ale utó molokako, gipakámina neza geí lapaná ale utó molatoze.

² Géisi numutó namató vegenalitini améipina nelémo loló animó nene nenitoka kelémo molani vegená nene alévolé kemetameni kimitove loko lá animó neve.

³ Alévolé kemetamenímini mogona lá oko neve: Ómasi gihila hamokó geí mogonaka itó nimiseleni ve gipaka Izesu Kilstó rení mogonáne giliniko, alévolé kemetameni nene utó o kiminogo ive.

⁴ Hoza nememimó nene, ale lutegekuke, mikasiuka geí lapaná ale utó okuve.

⁵ Kee, aménega, mikasi velesá utó amigo gezagi makó okulumá lapanánegi minumó nene itína govogisaló nougo ámina netá goha nemekako ale minato loko noluve.

⁶ Mikasiuka vegenakutí makó nenitoka kelémo molanimoláa nene mogonaka avetó oko lo kemenoumómá neve. Geí mututoni nenitoka kelémo molokako, keza geí gakó gili alikave.

⁷ Itó nenitoka netá nemó nene geitokatikó neve liki mota gilinave.

⁸ Itó gakó lo nemenimó nene lo kemekugo, mota gili asú inave. Itó géisi nimiselekako geitokatí lumumó neve liki mota gili seketigí ikave.

⁹ Neza keikumule loko geitoka noluve. Monóini nomi vegenakumú lamuve. Nemenimó keza geí mututoni niámó keikumú noluve.

¹⁰ Itó není mututoni nene geí mututoni niave, itó geí mututoni nene není mututoni niave. Itó iki miliki niámó nenémo není lapaná ale utó moloaká noive.

¹¹ Neza mikasiuka minato gamena mota asú noive. Kéisi nene miní amiki niko, neza geitoka mota itinogo uve. Etó keké vizeko noani aménega, geí gugulizá kumumó nenémini zámuzatunú ale gilitokimikako, nenémini agikagú avasavagi minatave. Lá okiko leza ligika hámakó nemómáminoko keza kigika hámakó minatize.

¹² * Kezagi makó minuni zupa nene, nenitoka kelémo molani vegená nene gugulizálímini zámuzatunú gizapa oketoko minugo, nenémini agikagú minamó. Lá okago, gizapa okimikugo, gopa amamómá neve. Monó gotolaú luhuva gizina gakó makó alévolé itive loko lolímini mututoni hámakó nene latila imó neve.

¹³ Itína geitoka vinogo nouke, imane mikasiuka vegenáne zuhatini mulúikú agila guluma itímó nenémo hutilí oko napa oko minative loko láo loko lo nogumuve.

¹⁴ Neza gakoka lo kemenoumómá neve. Neza mikasiuka mututoni minamuve. Kezagi ámina iki mikasigú mututoni minamanazo, monó gelema vegená nenete lova ali kimiaká niave.

* ^{17:12:} Age 41:9; Zon 13:18

15 Géisi není vegenáne zuha mikasiukatí kelématane loko lamuve. Ve golesa Satakumú geisa hizeko gizapa oketatane loko lo nogumuve.

16 Neza mikasigú mututoni minamuve. Itó ámina iki keza mikasigú mututoni minamave.

17 Gakó gihila kigikagú limitimoláatunú kelémo etó ozo. Geí gakó nene gihila neve.

18 Géisi nene mikasiuka hoza gakó lonetoko nimiselenimó nenéminoko mikasiuka hoza gakó lokimikuke nokimisuluve.

19 Geí gakó gihilámo kigikagú lemekoko kelémo etó okiko minatave loko nezáne nigikáne nugupéne ale etó oko nomuluve.

20 Itó neza keikumukó geitoka lamuve. Keza li kimikiko nenikumú gili alévolé ita vegenakumuki geitoka noluve.

21 Kigika hamokó miniko minatave loko lo nogumuve. Aménega, geza není akisenane, itó neza geí akisenoumó nene kezagi ámina iki akisikisiko, monóini nomi vegená keza nimiselekako lumumó neve liki gili seketigí itave loko noluve.

22 Leza ligikate hamokó neve. Ámina oko keí kigika hamokó miniko minatave loko lapanaka nemenimó nene ámina oko kemekuve.

23 Lá umó nene neza nemeni kumugo, itó geza gemeni nemekako, keza kigikatunú múnahiiki hamokó lilí iki minatave loko, itó lá iki niko, monóini nomi vegená kéisi nimiselekako lumumó neve liki gili seketigí itaze, itó gigika nenitoka moloaká noanimó nene ámina oko keitoka moloaká noane liki gili lamaná itave loko neve.

24 Aménega, nenitoka kelémo molani vegená nene keza néni minatotoka minatave loko noluve. Neneló niiki nene mikasi utó amigo gigika nenitoka molanike okulumá lapaná lehizenetanimó nene ánigi guni itave.

25 Aménega gehaváamaka, monóini nomi vegená keza geí mogona gili guni amamóza, néni nene gelenouve, itó vegenáne zuha nenete géisi nimiselekako lumumó neve liki gilinave.

26 Neza gigika není nemenimó ámina oko keitoka minative loko itó neza ámina oko kigilikaloka minatove loko keí holúikú nene mogonaka lo kemeko minanogo uve.

18

*Izesuni amimí okago alemó
(Mat 26:47; Mak 14:43; Luk 22:47)*

1 Izesú eza gakó láa loko lo asú oake, ezagi vegenala zuhagi leza Kitiloná nagamí gímuza vola helegaloka vunike, zazuha makokú itunímó.

2 Ámina zazuhagú Izesugegi gamena gamena alegesá oaká unímó nenazo, itó amimika lití ve Zutá ezagi ámina apakumú ánígonoimó nenazo, Izesú nelénó noinogo ive loko geleneike,

3 guguni giziaká a ve napagi Palisaio monó vegi niatoka vike Izesuni nene kigizakú molatikumú loká okago, mulusi makokú ami vegi itó monó zagusavegú pilisi ve lugáagi kimisilikago, keza ló ligiki aleke lova hiziaká netá aleke, Zutá kelémo goí igo ámina zazuhaloka Izesú noitoka vamó.

4 Vi anitikago, Izesú nene aí amupiló utó ití netá mukikumú geleake, keitoka vike loká oketake lekeza éahikumú vitágá niave.

⁵ Loko lokago, keza Nasalete ve Izesunimamú vitagá noune liki likago, Izesú nene nezama imane nouve loko lo kimimó. Loko lokago, amimika li ve Zutá nene holúikú minake,

⁶ ezagi kezagi Izesú li gakokumú kemegesalokatí nivake mikasiló pou liki akimi vamó.

⁷ Lá ikago, goha loká oketake lekeza éahikumú vitagá niave. Loko lokago, keza Nasalete ve Izesunimú vitagá noune liki likago,

⁸ Izesú láa loko lo kimimó: Nezama imane noumole loko mota lo lekemekuve. Nenemú nenikumú vitagá niikima, izegipáne zuha imane ahu likimikiko hanuva vitaze.

⁹ Loko lokago, nenitoka kelémo molani vegutí makó tolova amitive loko amunaloka li gakó nenémo alévolé imó.

¹⁰ Lá okago, Saimon Pitá eza sopolو aleneimó nene golagutí aleko segeake, guguni gizoaká vetini ve napámini gelekelé izegipala agulizá Malakusini apilike, zamagaloka agata zeko isimó.

¹¹* Lá okago, Izesú nene Pitani láa loko lo amimó: Sopolو nene goha golagú ale gúezo. Améneho miluma netá gihitane loko lonetonamóma nenazo, gehemitane loko lá noape, loko limó.

Guguni gizoaká veloka Izesuni alímiki vamó

¹² Lá okago, ami vegi monó gizapa veninigi Zuta vetini pilisi vegi keza Izesuni agizató aliake nagá alemó.

¹³ Nagá aliake, apí iki alímiki viki Kaiapani venalámini amelaho Anasí noitoka alímiki vamó. Kaiapá nene ámina kilisimasi oko novigo Zuta vetini guguni giziaká vetini gizapa ve minake,

¹⁴* amunaló emane Zuta ve kagata alike leza mukitó helekaturize, ve hamokolímo lelémo nupa napa oko helekiko nenémo netá gihila ale utó oletative loko li ve minamó.

Pitá Izesuni egamega otamó

(Mat 26:69,70; Mak 14:66-68; Luk 22:55-57)

¹⁵ Lá okago, Saimon Pitako Izesuni izegipala zuhagutí ve makó Izesuni ámegetoko vusi ve nene guguni giziaká vetini ve napa nenémo není ánígonoimó nenazo, Izesuki makó vusike guguni giziaká vetini geisa mikú nanitusigo,

¹⁶ Pitá nene geisa gatetoka oteneigo, neza vuke gatetó gizapa noi venáma lo amekuke, Pitani alémoko geisa mikú itusimó.

¹⁷ Itekusigo, ámina venalímo Pitani loká otake geza nene ámina goní nita vémini izegipa zuhagutí makó noape. Loko lokago, Pitá nezama noamuve loko limó.

¹⁸ Lá okago, hepé legekago, gelekelé vegi gimišigi vegi keza lóo lotá itune liki ló lokunusa ló gizikago, Pitá nene kezagi ote minake lóo lotá oko minamó.

Guguni gizoaká ve napa nenémo Izesuni loká otamó

(Mat 26:59; Mak 14:55; Luk 22:66)

¹⁹ Lá noigo, guguni giziaká vetini ve napa nenémo izegipala zuhamuki apí o kemeaká i gakokumuki Izesuni loká otamó.

²⁰ Loká omikago, Izesú láa loko lo amimó: Neza numutó namató vegena lo utó okogó lo kemeaká umóma neve. Neza nene lekelí monó numutikú itó

* ^{18:11:} Mat 26:39; Mak 14:36; Luk 22:42

* ^{18:14:} Zon 11:49-51

monó zagusave napagú lekeza Zuta ve alegesá iaká niató nene gakó apí o kemeaká onouve. Neza nene asugunatoka gakó makó lo kemesá amuve.

²¹ Geza není nene nanamú loká nonetane. Není gakó gilina vegená nene lo kumu gakokumú nanave loko limó neve loko loká oketozo. Lo kemeaká nou gakó nene keza gilinave.

²² Loko lokago, pilisi ve makó áminaló ote minamó nenémo agizanitunú Izesuni napilike guguni gizoaká ve napama nene geza gakó nenémínáa nanamú lo namene.

²³ Loko lokago, Izesú láa loko lo amimó: Neza gakó golesa makó lonoitomoma lo utó ozo. Gakó lamaná lo nolukumugo nanamú nonepelene.

²⁴ Loko lokago, Anasí nene nagatunú nene Izesuni agizató goha nagá zeake, guguni gizoaká vetini ve napa Kaiapá noitoka amiselekago alímiki vamó.

Pítá Izesuni goha egamega otamó (Mat 26:71-75; Mak 14:69-72; Luk 22:56)

²⁵ Lá noigo, Saimon Pítá nene lóo lotá oko oteneigo loká itake gezagi ámina vémini izegipala zuhagutí noape. Liki likago, eza egamega ike neza aí zuhagutí noamuve.

²⁶ Loko lokago, guguni giziaká vetini ve napámini gelekelé izegipala Pítá agata zeko isi vémini zuhagutí ve makolímo loká otake gezagi zazuhagú niasigo ánigo noumóma neve, olo.

²⁷ Loko lokago, Pítá goha egamega okago, áminaló litá oko okoloho nenémo anó molamó.

Izesuni Pilató noitó alímiki vamó (Mat 27:1-2; Mak 15:1-5; Luk 23:1)

²⁸ Lá okago, Izesuni nene Kaiapani numukutí alími hetó iake, alímiki agulizaki vémini numutoka vamó. Viake, neteká holugú nego, avóikini asenini zeketakumú gili mina nosá nanigi niake Zuta veta amosá suni aleko hetoka ve makolímini numukú itekinake ligika ale golotuva lokatune liki kezáini nene agulizaki vemámini numukú itemamó.

²⁹ Lá ikago, Pilató nene hetoka lemeake, loká oketake lekeza iki imane ve nanamú goní nitave.

³⁰ Loko lokago, keza láa liki lamó: Imane ve eza netá golesa aleaká ve minamilina, leza agizató aleko geitoka alémoko amutiline.

³¹ Liki likago, Pilató láa loko li kimimó: Lekezatini agizató aliiki lekezatini li huka gakotinimaló ali miliki goní italo. Loko lokago, Zuta vetini monó gizapa vete zohota zaló hilitive liki giliaké láa liki li amemó: Óe, lezatete ve makó apele helesakumú nene lekelí gamanímo óe loko lo hukonoimóma neve.*

³² Liki likago, zohota zaló vegená kepele heleaká nene Loma vetini mogona minokago, Izesú nenéminko hilitove loko amunaloka lo kimi gakó nene alévolé inogo imó.

³³ Lá okago, Pilató goha kugulizaki vetini numukú iteake Izesuni sele lo ameake loká otake geza nene Zuta vetini kugulizaki ve napa noape.

³⁴ Loko lokago, Izesú láa loko lo amimó: Gezaka gagata geleko nene gakó nolape, itó ve makolite nenikumú láa liki li gimikago nolane.

* **18:32:** Zon 3:14, 12:32-33

³⁵ Loko lokago, Pilató láa loko lo amimó: Neza Zuta ve nougo nolape. Gezaka vegenakagi itó guguni giziaká ve napagi gilímiki nenitoka iminamóma neve. Geza nana netá golesa loló okako neve.

³⁶ Loko lokago, Izesú láa loko lo amimó: Neza nugulizaki ve napa noumóza, nenémini mogona nene imane mikasigú vetini suni nomive. Imane mikasiuka netá minalina, Zuta vetini kigizakú nilími milikatave liki izegipáne zuhate lova ali utó alinamóza, nugulizaki ve minato mogona nene imane mikasigú vetini suni nomive.

³⁷ Loko lokago, Pilató láa loko lo amimó: Láa lokoma geza nugulizaki ve napa nouve loko nolape. Loko lokago, Izesú láa loko lo amimó: Nene nugulizaki ve nouve loko gezaka mota lokane. Neza gakó gihila lo utó itove loko imane mikasiuka lemekuke, izóneho getokago nouve. Gakó gihila giliaká nia vegená mukilite negepagutí gakó giliaká niave.

³⁸ Loko lokago, Pilató nene gakó gihila nene nana gakó neve.

Loko loake, Zuta vegenatoka hetoka lemeake, láa loko lo kimimó: Imane vémimi lihimavalamu vitagá umó nomive.

³⁹ Lá onoimóza, lekezatini mogona lá oko neve. Avotikini asenini zeketakumú gili mina holisigú kilisimasiló kilisimasiló nene lekezatini ve makolímini agulizá ikago, nagá numukutí ve hamopamó kimisele ahulo ahulo oaká nougo lekelitoka viaká niave. Itó imane gilikiko etokikoma, Zuta ve lekelí agulizaki velini aseva zemikugo lekelitoka vitihe.

⁴⁰ Loko lokago, keza nene negénegeka lake gakó napagutí nene Óe, aí nomive. Palapasini aseva zetamane. Liki lamó nene Palapasí nene laskoli ve nena.

19

Izesú hilitive liki goní itamó (Mat 27:15; Mak 15:6; Luk 23:13)

¹ Lá okago, Pilató lokago, segi nogosanitunú nene Izesuni apiliake,

² agulizaki vema nena e liki anosa netá lilí itiake ami vete uhenagi nagačtunú akili lilí iki gotolaló hitimiake, ginegane hána luhuvagi okohu gó luhitamó.

³ Lá iake, amatoka hizi letiki niake, ganimakilisi i ameke Oga, mokáne, Zuta vetini kugulizaki vénimavave. Nilake, kigizanitunú Izesuni agokaló zemó.

⁴ Lá ikago, Pilató nene Zuta ve niatoka goha limike láa loko limó: Ánígaló, lihimavalamu vitagá umó nene nomive liki gilitave loko lekelitoka alémoko nouve.

⁵ Loko lokago, Izesú nene uhenagi akili ki okohu gó luhoake keza niatoka lemeko noigo, Pilató nene nokelepizike imane ve ánenémináa ánígaló.

⁶ Loko lokago, guguni giziaká a ve napa keza vegenánigi Izesuni ánígiake, gakó gamoga geke zohota zaló apele helemane. Zohota zaló hilitinae. Liki likago, Pilató nene konotó alike láa loko limó: Neza nene lihimavalamu vitagá umó nomize. Nenemú lekezatini alímiki viki zohota zaló apililo.

⁷ Loko lokago, Zuta vetini monó gizapa ve keza láa liki lamó: Ezáamú Ómasímini gipala nouve loaká noimóma nena. Nenemú ve némináa nene hilitave liki lí hukilita gakokú luhuva gizinamóma nenazo, mota hilitive.

⁸ Liki likago, Pilató nene Ómasímini gipala noive liki lakumú alegesá goha ligimó.

9 Alegesá legekago, Izesuni nene goha numukú alémoko itike loká otake géisi hikutí utó animó neve. Loko lokago, Izesú nene anotó alemimó.

10 Anotó alemigo, Pilató láa loko lo amimó: Geza gakó nene lo nememane. Neza lokugo hanuva minanogo ane, itó néniši lokugo zohota zaló hilinogo ane. Nenémini zámuza niminamómá nena. Nene gelemapa.

11 Loko lokago, Izesú láa loko lo amimó: Není gakó litane loko veletokatí Ómasímo zámuza gememilina geza není gakó nana oko latiline. Nene nolan-imole. Nenemú nene geitoka nelémo mola vémini lihima givilegeko napa napa neve, loko lo amimó.

12 Pilató nene gakó geleake, Izesuni nene aseva zetatove lokago, Zuta vete ganimkilisi ake láa liki lamó: Geza nene imane ve aseva zetatanímó nene, Loma apatoka agulizaki ve napámini agivelaho minaminogo ane, itó asú igitanigave. Itó makó eza ezáamú nugulizaki ve napa nouve loko litímó nene Loma apatoka agulizaki ve napa Sisani aviligohe loko lova gizo aminogo ive.

13 Liki likago, Pilató nene geleake, lokimikago, Izesuni alímkí limikago, gakó lo hukoaká holomaló lemeko minamó agulizá nene Hipulu gakokutí nene Gapatave liaká amó, lelí gakokutí nene geha holomave loko.

14 Itó avotegini asenini zeketakumú azo holisi minutune liake, netá matá ali vatí niago, holisaká gamena noigo, Pilató nene holomavaló noike, Zuta vetini gizapa ve nene agulizaki velini imane ánigalo.

15 Loko lo kemekago, keza ganimkilisi ake zohota zaló apele helemane liki likago, Pilató láa loko limó: Íi, agulizaki velinima lekelisi likiko zohota zaló hilitive liki nilahe. Loko lokago, guguni giziaká a ve napa keza gakó láa liki li amemó: Leza nene agulizaki vele makó nomive. Loma apatoka agulizaki ve napa Sisá hámakó noive.

16 Liki likago, Pilató nene ake, Izesú nene zohota zaló nilitunú ziki apili hilitave loko kigizakú molamó.

17 Lá okago ami vemate Izesuni alímiake, zohota za amikago, gihigo, apá makó agulizá nene gotóini gonosi helisa apale loko, itó Hipulu gakokutí Goligota loko nenenoka alímkí vamó.

18 Alímkí vake zohota zaló apiliki apatemó. Lá iake, ve golesa losítá luga luga kipilikí apatemó. Izesuni nene holukú hizi otitamó.

19 Lá ikago, Pilató lokago nene, Izesuni gotolaló zaló luhuva láa liki gizikago minamó: Nasalete numutotí Zuta vetini agulizaki venini Izesú ave.

20 Nene mikasi Zelusale numuni símekaló minanazo, Zuta vegená mukí vigá igá niake ámina luhuva gatamó. Nene luhuva nene Hipulu gakokutí itó Loma gakokutí itó Kiliki gakokutí luhuva gizikago minamó.

21 Lá ikago, Zuta vetini guguni giziaká a ve napa keza Pilatoni láa liki li amemó: Zuta ve lelí agulizaki veve loko luhuva gizamoko, neza Zuta vetini nugulizaki ve nouve loko limó neve loko gizamane.

22 Liki likago, Pilató nene mota luhuva gizokutó neze, ha minatize, loko limó.

Izesuni zohota zaló apelemó

(Mat 27:32-44; Mak 15:21-32; Luk 23:26-43)

23 Lá okago, ami ve keza Izesuni nene zohota zaló apiliki apatiake, gine-ganeva gona miliake, losive losive okago, amelaho ve lili í asú amó. Lá ikago, gola háná miní amiki akotamamó mukipa gó minokago,

24 * nenemú láa liki lamó: Hukoko alesá golesa okatize, nenemú zohikú molokuko wininitímó nene amelaho ve loló itive. Liake lá ikago, monó gotolaú nene není ginegane ali gona miliki, nugupeló netá nene zohikú milikamó neve liki luhuva giza gákó nene alévolé imó.

25 Ami ve keza nene lá niago, Izesuni zohota za mogonagú nene vegená lá iki minamó: Izolahiki atolahiki itó Kolopani venala Maliaki itó Magatala numutotí Maliá makoki.

26 Neneló Izesú agika ameaká i veve liki lina ve nezagi makó nouko, Izesú nene izolahini láa loko lo amimó: Vená geza ánigozo. Ve imane gipaka loló noive.

27 Loko loake, láa loko lo nimimó: Vená imane ánigozo. Geí izokahove. Loko lokago, ámina gamenaló Izesuni izolahini alémoko vuuke numúneuka minoko aleko usimó.

Izesú hilimó

(Mat 27:45-56; Mak 15:33-41; Luk 23:44-49)

28 * Izesú nene mota hoza ale asú okuve loko geleake, gihila zitive loko monó gotolaú mina gákó makó láa loko limó: Nagamíkumú nivisekave.

29 * Loko lokago, neneló lape makokú ekesá vain nagamí lagasó ma nego, nenenegú notunigítana netá nagamí ziake, zokaitunú hiziake agepagú amikago, namó.

30 Vain nagamí nene noake, sele like mota hozane ale lutegekuve. Loko loake, gotola nene gupá zeake sikalahula ahuloake hilimó.

Izesuni alómusagú zokaitunú hizemó

31 Lá okago, Zuta vetini monó gizapa ve keza gó lokiko avóikini asenini zeketakumú gili miniaká a holisígú minanigi netá ali vatí niake, ámina holisi nene napa napa nenazo, itó Mosé ve makolímíni gonosiva nene límugusigú zaló minatimó etamítive loko lo mola gákó gili minake, Pilatoni láa liki li amemó: Ami ve makó kimiselekako, viki ámina vetini kigisa helisáíni zi letiiki ginosíni nene zalotí aliliki limiki gale zikitatave loko noune.

32 Liki likago, gele kemekago, ami ve keza golesa netá alesi ve Izesuki makó kepera vetosini kigisa helisa zi letiike,

33 viki Izesuni ánigamó nene mota helekago, ánigiake, agisa helisa nene zi letamamó.

34 Lá okago ami ve makolímó zokaitunú nene alómusagú hizekago, golanigi nagamiki nene áminagutí litá oko limimó.

35 Nene suni nene nogómula gihilatunú ánigokuke lo utó noumó nene soza nomive. Gakó gihila neve loko gelekuke lekeza ámina gákó gili seketigí itave loko gizo nolukumuve.

36 * Monó gotolaú anoza gakó makó lá oko nemó nene, gihila zitive loko ámina suni utó imó:

Lekeza nene helisa nene ma zi letaminigave.

37 * Itó monó gotolaú gakó makó lá oko neve:

Keza nene zokaitunú hiziki hokolota ve nene ániganigave.

Izesuni gale zitamó

(Mat 27:57-61; Mak 15:42-47; Luk 23:50-56)

* **19:24:** Age 22:18 * **19:28:** Age 22:15 * **19:29:** Age 69:21 * **19:36:** Gá 12:46; Nam 9:12; Age 34:20 * **19:37:** Zak 12:10; Ali 1:7

38 Lá okago, Alimataia numutotí ve Zosehé áisi Zuta vetini monó gizapa vemú ahelele vizigo minake, asuguná oko Izesuni izegipala mina vémo Izesuni gonosiváa aleko vitohe loko Pilató noitoka voko loká okago, Pilató gele amekago, gonosiváa nene zohota zalotí apasoko aleloko lemekago,

39* Nikotemó nene amunaló emane límugusigú Izesutoka vi vemámo anuva netupa meseme lamanalímimi losítá ale gopa oake, sigeliló molamó genava nene 35 kilo okago, geheko vimó.

40 Lá oake, Zosehé alémo vatí igo, Izesuni gonosiváa nene ámina netupa meseme hilimikasike, gó gizopa lamanatunú asapú itasimó nene Zuta vete goni miliaká a suni alesimó.

41 Itó Izesuni apele mikasi agilikaloka zazuha makó minamó. Nenegú geha mulí makó goló vatikago, nego, vegená nenegú gale zikitamago hanuva gosohá minamó.

42 Lá okago, holisi gamena mota alitokamómave loko hoza alita gamena asú okago, itó ámina geha mulí nene alitó minamó nenazo, nenegú Izesuni gonosiváa milasimó.

20

Izesú heleneikutí otimó (Mat 28:1-8; Mak 16:1-8; Luk 24:1-12)

1 Holisi napa Sategú nene gó lo mikasílo amigo, Magatala numutotí vená Maliá nene gonosi apató vo aniteake ánígamó nene agepaló gehani napa mili lí amóma ahelú ali ahulinago ánígoake,

2 ololu loko vike Saimon Pitáne nezagi ánígolimiake, láa loko lo limimó: Guivahanímimi gonosiváa mota aliki vikave. Itó nene hikú milamó netive. Leza gelemune.

3 Loko lokago, Pitaki nezagi gonosi apatoka makó vusimó.

4 Gapoló ololu loko novusike, neza nene Pitáni avilegeuke litá oko gonosi galeló vo anituke,

5 gava hizeko ánígumó nene, nagá like gokó nego ánígumóza, áminagú itemuve.

6 Lá okugo, Saimon Pitá nene alika oake geha mulí agikagú iteko ánígamó nene, mokoná lavolavo asapú amóma nene nego,

7 itó gotolaló asapú ita gó nene haitó gakeko nego ánígamó.

8 Lá okago, nénisi góí oko anitumóma nemóza, alika áminagú itekuke, ámina netakó nego ánígouke, lamaná otoko iteko vokave loko gele seketígí umó.

9 Amunaloka nene monó gotolaú Izesú heleneikutí otoko ititive liki gakó gizamó nene gele hee lamusimó.

10 Itó leza nene goha numutoka atiginá oko vusimó.

Izesú Magatala numutotí vená Maliatoka utó o amímó (Mak 16:9-11)

11 Vokusigo, Magatala numutotí vená Maliá eza nene gonosi galeló goha vike hetoka ive oko minatotí nene galegú áníganogo gava hizeko ánígamó nene,

12 ageló losítá Izesuni gonosiváa góí oko mina galeló gó gizopa luhiki minasike mitó niasigo ánígamó. Makolímo gotolaló minamó. Makolímo agisaloka minamó.

* **19:39:** Zon 3:1-2

¹³ Minasike vená geza nanamú ive noane liki likasigo, iza láa loko limó: Není Guivahanímini gonosiva aliki vikago, hitoka aliki vahe loko vitagá nouve.

¹⁴ Loko loake, mino viligoko ánigamó nene Izesú noigo ánigamóza, agoka agepa ánigo vevesamimó.

¹⁵ Ánigo vevesamigo, Izesú loká otake vená geza nanamú ive noane itó éahikumú vitagá noane. Loko lokago, eza nene zazuhagú hoza aleaká ve noihe loko láa loko lo amimó: Ve lamanámaka, géisi nene gonosivama aleko volko makokuka molonoitanimó nene, lo nemekako aleko vitove.

¹⁶ Loko lokago, Izesú nene Maliazo lokago, eza viligoko Zuta gakokutí laponi, lelí gakokutí nene monó gizapa venemaka.

¹⁷ Loko lokago, Izesú láa loko lo amimó: Neza nene aménehitoka velesá itemumó nenazo, nenemú nunukemo. Geza nene volko izegipa nugunamotamónema není améneho nene lekelí ametipove, itó není Ómasi nene lekelí Ómasi noitoka itinogo uve loko lo kemezo.

¹⁸ Loko lokago, Magatala numutotí vená Maliá eza atiginá oko vike Izesuni vegenala zuha nene neza Guivahani ánigokugo gakó láa loko lo nemekave, loko lo limimó.

Izesú izegipala zuha niatoka utó o kimimó (Mak 16:14-18; Luk 24:36-49)

¹⁹ Loko lokago, ámina holisi napagú límugusi zekago, izegipala zuha leza Zuta vetini monó gizapa vemú lelegesá legekago, numukú ítekunike gahe etoha oko gekunike nouko, Izesú nene holutegú utó oake ote minake hulu nene lekelitoka minino.

²⁰ Loko lo lemeake, agizani losítá nolelepizike, alómusagú hize ahúma lelepizekago, izegipala zuha leza Guivahania ánígokunike mulutegú lamaná gulune.

²¹ Lá okuko, goha láa loko limó: Hulu lekelitoka minino. Améneho nimisilimó áminagó oko lekelí nolikimisuluve.

²² Loko loake, huhu loletake, láa loko limó: Ómasímini Sikalahú alilo.

²³ * Lá iiki vegenalitini lihimáini liki ahulatamó nene, asú itive. Liki ahulamitamó nene hanuva minative, loko limó.

Tomasí Izesú goha otikumú gele alévolé amimó

²⁴ Ligiveteho makó agulizá Tomasí agulizá makó Lopé áisi nene makotoka noigo Izesú utó o limimó.

²⁵ Utó o lemekago, ve agivelage leza makó zupa Tomasini ánígokunike avetó oko leza Guivahania ánígokune. Loko lo amekuko, eza limó: Nezáne nogómulatunú agizató ahúma ánígamoko itó nigizanitunú ahúmaló ale gelemoko, itó alómusalokama ale geleko ánígaminake, gakotini nene gele alévolé aminogo uve.

²⁶ Loko lokago, holisi makó alitokago, izegipala zuha leza Tomasigegi nene numuni makokú goha ale nupa unike gahe gekunike nouko, Izesú nene ligilikagutí utó oake noike, hulu lekelitoka minino.

²⁷ Loko lo lemeake, Tomasini láa loko lo amimó: Gigizani hisukatunú nigizatoka nuhúma ale geleko ánígozo. Itó gigizani ahuloko nolómusaloka ale gelezo. Lá okoko gagata losi gelemoko gele alévolé ozo.

²⁸ Loko lokago, Tomasí nene Guivahanímakave, itó Ómasinemakave.

* ^{20:23:} Mat 16:19, 18:18

29 Loko lokago, Izesú láa loko lo amimó: Géisi ánígokanike gele alévolé okane. Není ánígamake gili alévolé iaká nia vegenakumú gulugo lamaná okave, loko limó.

Zoní giza luhuvámini mogonáa

30 Itó Izesú nene izegipala zuhatini lovogisaló lu avevezaha la avevezaha mukí loló imó nene imane luhuvagú gizo asú amumóza,

31 imane gizonoumoláa lekeza gatiki giliiki Izesú nene gologí oletative loko lo mololeta vema Ómasímini gipalave liki aikumú gili alévolé i miniki alévolé lekemetameni alitave loko gizonoumole.

21

Izesú izegipala zuha makoláloka utó o kimimó

1 Itó minoko izegipala zuha leza Tipelia nonohulotó voko nouko, Izesú nene haitó suni aleko utó o limimó.

2 Saimon Pitaki lopé izegipa Tomasiki Galilaia mikasigú Kana apatotí ve Natanaeki nezagi uvónehiko losigi aí izegipala zuhagutí makó losimagi leza alegesá oko nouko,

3* Saimon Pitá nene neza lagaha alinogo novuve. Loko lo lemekago, lezagí makó vitune loko lokunike, sipigú itekunike vunímó. Voko minunike ámina holugú lagaha alemunike lá ova ova oko nouko,

4 gokululuva notovo igo, Izesú nene getatoka melane minamóza, izegipala zuha leza Izesuni ameni ánígo guni amuko,

5 Izesú loká oletake izegipaguvo, lagaha ma alehe. Loko lokago, leza Óe, alemune.

6* Loko lokuko, láa loko lo limimó: Gotaha ali zamagaloka miliki ahulatamó nene lagaha alinigave. Loko lokago, gotaha ale zamagaloka molokunike, lagaha vauva aleko alunímó nene gelelehá unímóza, vaí okago, keé loko ale otemuhá.

7 Lá okuko, Izesú ameni nemeaká i veve liki lina ve neza nene Guivahanima nena loko Pitani lo amekugo, Saimon Pitá není gakó geleake, agupe zapakó minatotí gineganева ale luhoake, nagamikú olío lemeake, galanogosá zeko 100 mitagitana oko voko nagamí getatoka vo anitekago,

8 ve lugáa leza nagamikú lapegú lagaha gotaha gelelehá oko aleko vuhä.

9 Voko getatoka itekunike netá makó lá oko ánígunimó. Ló nokusa ale hitikakú lagahagi peleti makoki nego ánígunimó.

10 Nániguko, Izesú nene lagaha ítina alemómagutí lugáa alikaló.

11 Loko lo lemekago, Saimon Pitá nene sipigú iteake gotaha gelelehá oko getatoka ale moloake lagaha napa 153 nene gotahagú vaí iki minamóza, gotaha nene alegetá vizemimó.

12 Lá okago, Izesú nene iki neteká nosá nalo. Loko lo lemekago, izegipa leza Guivahanimave loko mota gelenounimómaló nenazo, geza éagama noane loko loká otamune. Loká otamuko,

13 Izesú oake, peletigi lagahagi aleake gona moloko limimó.

14 Lá imó nene Izesú heleneikutí oteake minake izegipala zuha lelitoka utó o limigo áníguni gamena neneló losive makole loló imó.

Není sipsip izaló nosánetá kemeko gizapa oketozo

* **21:3:** Luk 5:5 * **21:6:** Luk 5:6

15 Neteká nosá no asú okuko, Izesú nene Saimon Pitani láa loko loká otamó: Zonini gipala Pitao, gigive keza kigika nimiaká niámó nene kivilegeko gigika nemeaká noape. Loko lokago, Pitá nene Guivahanínemaka, geikumú geleaká noumó nene gelenanimole. Loko lokago, Izesú nene vegenáne zuha kigikámini nosánetá mí zeko kemeko nozo.

16 Loko lo ameake, goha lo amike Zonini gipala Pitao, geza lamaná gigika nemeaká noape. Loko lokago, Pitá nene Guivahani neza geikumú geleaká noumó nene gelenane. Loko lokago, Izesú nene vegenáne zuha lamaná oko nasahilí oketozo.

17 Loko loake, miní ameko loká otake Zonini gipala Pitao, geza nenikumú geleaká noape. Némikaloko loká otamó nene gamena losive makole imó nenenú Pitá agika hizekago lo amike limó: Guivahanínemaka, mukí netakumú gelenanimole. Neza geikumú geleaká noumó nene gelenane. Loko lokago, Izesú láa loko lo amimó: Geza nene vegenáne zuha lamaná oko gizapa oketozo.

18 Lamaná lo gimitoze, gelezo. Geza gosohá ve minanike holotaka nene gohakaló ze gilitokanike, gapo neloka manaloka vitove loko gagata gelekanike voaká animóma neve. Lá onoimóza, minoko ozaha molokoko gigizani lutooko noako, ve makolímo holotaka zegimioko vamitove litanitoka gelémoko vinogo ive.

19 Loko Izesú nene Pitá minoko nenenímini oko zohota zaló noheleko Ómasímimi agulizá alémo kegesative loko anoza gakó limó. Loko loake, miní ameko némegetoko ano loko lo amimó.

Izesuni izegipala gihiláa

20* Loko lokago, Pitá viligoko Izesú ameni nemeaká i veve liki lina ve není ánígamó. Neza amunaló nosá nuni zupa Izesuni amatoka minuke nene Guivahanínemaka, éaho gimimika litikumú nolane loko lu ve minumó nena.

21 Pitá nene nenikumú Izesuni loká otake imane ve nana itímó neve.

22 Loko loká omikago, Izesú láa loko lo amimó: Áisi hanuva agómulagi noiko nénisi atiginá itove loko lokugoma, geí netá nehe, olo. Geza nene hanuva némegetoko ano.

23 Loko li gakolímo hutilí oko vokago, vegenala zuha keza nenikumú nene helemínogo ive liki gelemóza, Izesú nene gakó némika loko lamike, áisi hanuva agómulagi noiko nénisi atiginá itove loko lokugoma geí netá nehe lokogó limó.

24 Itó Izesuni izegipala neza ámina netá ánígoko gelekuke, lo utó moloko aí mogonamú luhuva imane nogizuve. Leza mukilite nene imane luhuva gizonou gakó nene gihilave loko gelenoune.

25 Itó Izesú oko moloko imó nene nana oko gizo asú itune. Ha nenazo, gizo asú uhá minalina, nagata gulumó mikasiuka ma asú amiline.

Aposolute Iki Miliki Amoláa

Sikalahuú amisilitove loko lo hutamó

¹* Teopilo, goí okoma luhuva netá gizo gumumó nene Izesú apí oko hoza alimoláa itó apínápí o kimike aleloko vimoláa ale lutigike okulumakú itimoláagi nene gizo gumumóma neve.

² Okulumakú velesá itemike aposolo lilí itave loko kelémo etó imoláa nene Ómasímini Sikalahulámo litó hoza gakó lo kimimó.

³ Zaló itike miluma geleake heleneikutí oteake nene, hanuva agómulagi minake aleloko novive liki gili hee litave loko alévolé suni mukí loló ike gamena 40-a utó okemeká tolova oká noike, Ómasímo gizapa okimiaká gakó lo momeko minamó.

⁴* Lá oake alika nene kezagi minake, láa loko lo kimimó: Lekeza Zelusalega nene litá iki ahulamíki améneho Sikalahúne amisilitove loko lo mololikimikago lo lukumu vemú nene ageva iki minalo.

⁵* Zoní nene hanuva nagamiláa holokimiaká imóma nemóza, améneho nene gamena hána minamoko Sikalahú hololeketanogo ive, loko lo kimimó.

Izesú okulumakú itímó

(Mak 16:19-20; Luk 24:50-53)

⁶ Gamená makó zupa keza alegesá iake, Izesuni láa liki loká itamó: Guivanitemaka, kugulizaki ve goí iki lelitoka gizapa iaká amómámini oko geza itína gamena nene gugulizaki ve loló okoko Ísilae vegená lelitoka gizapa itape.

⁷ Liki likago, eza láa loko lo kimimó: Nugulizaki ve napa loló ito gamena nene améneho ezáa zámuzalaló molo gilike gamena hánahé alínipahé ezáa lo hukonoimó nenazo, lekelisi ma geleminigave.

⁸* Lá onoimóza, imane gilitave. Ómasímini Sikalahú eza lekelitoka lemeko zámuza lekemekiko, gakóne nene Zelusalega apí iki liiki nene lili ali iki Zutaia apá makokuka itó Samalia mikasiuka viiki, nenetí mikasi nekisa vokisauka vi asú itave, loko lo kimimó.

⁹ Láa loko lo kemekago, keza gonú napelego, vávani oko iteko novigo límusi nenémo molo hitokago, vo tolova imó.

¹⁰ Okulumakú teho lokago, izegipala zuhate okenava iki gonú inago, ve losítá nene gineganéini mokonaki keitoka galinali utó ikasike,

¹¹ láa liki li kemesimó: Galilaia mikasiló vese, lekeza nanamú okulumakuka gonú iki niave. Izesutipo nene ániginago ahulolikimiaké okulumakú iteka ve nene okulumakú itímómáminoko alika liminogo ive, liki li kemesimó.

¹² Lá okago, keza Olivi agokalotí atiginá iki limiaké gapo alínipa viki Zelusalega vi anitiaké,

¹³* numuni amupiló makó gikakú miniaká a numukú nene itiki minamó. Keí kugulizánía Pitá Zoní Zemusí Etulú Pilipó Tomasí Patolomaió Mataiío itó Alapaioni gipala Zemusí makó itó Saimoná eza Loma vemú giligo goselé apeleaká i ve itó Zemusí makolímini gipala Zutá.

* **1:1:** Luk 1:1-4 * **1:4:** Luk 24:49 * **1:5:** Mat 3:11; Mak 1:8; Luk 3:16; Zon 1:33 * **1:8:** Mat 28:19; Mak 16:15; Luk 24:47-48 * **1:13:** Mat 10:2-4; Mak 3:16-19; Luk 6:14-16

14 Nene ve itó Izesuni izamuha hiziki miniaká a venámagi Maliá Izesuni izolahiki itó Izesuni agunamotamolagi kigika mili hamó iki Ómasiloka liki minamó.

Zutani hoza agepaló aliti ve alími etó amó

15 Gamená nene zupa Izesuni vegenala zuha nene vegená 120 nenéminkí minikamó nene alegesá iki niago, Pitá nene oteake gakó láa loko lo kimimó:

16 Nigivénéngita, Zutá eza ale goí igo Izesuni agizató ale vemámini mogonala nene lo likimitoze, gilio.

17 Ámina ve nene monó hoza leza nolimike ezagi amimó neve.

18 * Ámina ve nene mikasi makó gomulusi gehanitunú meina hizikago, áminaloka voko minake gotolalokatí velehé limike agatupa zeko pou lokago mí aseva akúvalomó zimó.

19 Lá i gakó nene Zelusale vegená mukilite giliaké ámina apá agulizá keí gakokutí Akeletama liki milinamóma neve. Itó lelí gakokutí nene gola mikásive neve.

20 * Itó Ómasímini Sikalahulímo agulizaki ve napa Tevitini alémo vávani okago, alika Zutá nene loló ití netakumú gakó limó nene alévolé imó. Ámina netá nene Zutatoka utó itikumú nene Ómasí agepoka liká nama liká a gakokutí láa loko luhuva gizonoimóma neve:

Numuni apala nene gámé vizekiko, numutagalagú nene ve makolímo minamítive,

loko gizamó. Itó makó lá oko neve:

Aí hoza agepaló nene ve makolímo alitive.

21-22 * Luhuva láa loko gizonoimó nenazo, Guivahani Izesú nene holutegú minoko aleko noigo, ve lugáa nenete Zóní eza Izesuni nene nagamí holota gamenaló apí iki lehelukalú imi nivago Ómasímo Izesuni alémoko okulumakú itimó. Ámina vegutí nene Zutani hoza agepaló alitive loko ve makó alémo etó okuko, Izesú nene galegutí otímó nene ezagi lezagi makó ánigháma nenazo, ezagi makó avetó oko lo kimitune loko noluve.

23 Loko Pitá lo kemekago, ve losítá, makó Zosehé, agulizá koma Pasapá, agulizá makó Zustó, itó ve makó agulizá Matatiá nene kilími utó miliaké,

24-25 Ómasiloka láa liki agepoka lamó: Kee, Guivahanitemaka, ligika ánigoaká ve noane. Zutá nene aposolo hoza ahuloake heleake, Ómasímo ale vavá ota apatoka vokave. Lá okago, aí hoza agepaló aliti ve imane ve lositakutí alémo etó itanimoláa lelepizezo.

26 Liki agepoka liake, kugulizá nene luhuva giziki ali nupa iki milakutí makó ali otiki ánigamó nene Matatiani agulizá nego, aposolo hoza amemó.

2

Sikalahu línimó

1 * Zuta vetini avóikini asenini zeketakumú gili mina holisi asú okago, gamena 50 oko vokago, holisi makó alitokago, Izesuni vegenala zuha keza apá makokú alegesá iki niago,

2 okulumakutí anó makó ohuhú nenéminko moloko galinali lemeake, mina numuni agikagú nene iteko mino vaí imó.

* **1:18:** Mat 27:3-10 * **1:20:** Age 69:25, 109:8 * **1:21-22:** Mat 3:16; Mak 1:9; Luk 3:21 * **2:1:**
Liv 23:15-21; Gapo 16:9-11

3 Lá okago, ló gulumagitana netá makó utó oake mukilitini gotító hamopamó mino asú okago,

4 Ómasímini Sikalahú nene lemeko kigikagú mino vaí oake nenémini zámuza kemekago, haitopaitó konokutí apí iki gakó lamó.

5 Lá niago, gamena nene zupa Zuta vegená monónigi vegená nene vaí iki ake Zelusale numutoka minamó neve.

6 Niake guu guu loko okulumakutí limi netalímini anola giliake alegesá ake, konóikutí konóikutí gakó li kimi kimi ago giliake,

7 kegepa gahava minamigo, sigaga likitake láa liki lamó: Gakó nila ve imane Galilaia mikasigutí vegó niamóza,

8 keza nana iake gakotegutí gakotegutí likago nogulune.

9 Leza nene Patia ve nouhá, itó Mitia ve nouhá, itó Elame ve nouhá, itó Mesopotamia mikasiuka ve nouhá, itó Zutaia ve nouhá, itó Kapatosia ve nouhá, itó Potu ve nouhá, Asia ve nouhá,

10 itó Pilisia ve nouhá, Pamapilia ve nouhá, Izipi mikasiuka ve nouhá, itó Lipia mikasigutí Sailini ve nouhá, itó Loma apatotí venove nouhá Zuta veki monokumú gutá amoláagi nene,

11 itó Kiliti ve itó Alapia ve leza nene ve minunike nene, Ómasímini suni alévoletáa nene lá iki lonokutí lonokutí likago gelekune.

12 Liki liake, kigika gopa okago, gili gopa iake ligili hagili iki Agae, imane nana suni naleve.

13 Liki likago, lugáate gopoguka likitake vain nagamí gosohá niake matúini gopa okago lutuka nilave, liki lamó.

Pitá monó gakó lo kimimó

14 Liki likago, Pitá ave agivelage ileven-amagi otí minake gakó napagutí láá loko lo kimimó: Zelusale apá amelagita itó Zuta vegená lugáá neneta, neza gakó lo likimotoze, gili vevesiki gililo.

15 Lekeza lelikumú nene vain nagamí niake kigika gopa okago nilave liki nilamóza, gó izoha nolanazo, lá oko nomive. Sipaki gamena nomive.

16 Imane sunimú Ómasímini agepagutí gakó loaká ve Zoelé láá loko luhuva giza gakó nene mota gihila zekave:

17 * Minoko gamena napa asú iti zupa nene

Sikalahué numutó namató vegená mukító lehizelikimikugo, izegipatini lakagapilamolite Ómasímini agepagutí gakó li nimiliko, gosohá velinite vamómáminiki nánigiko, ozahatini keza vamó áníganigave.

18 Itó ámina zupa Sikalahúne nene lehizekimikugo, není gelekelé ve vená kezagi alikamú gakó li milanigave.

19 Lá niko, okulumatokagi mikasilokagi golivagi netá haitopaitolímini nolekelepizugo áñiganigave.

20 Guivahanímini golivagi gamena napa velesá utó amigo, mikasiuka nene golanigi loki lokilagi utó inogo ive, itó okulumató nene hómíni agómulaló hitanogo ive, itó ikani nene ámina oko golakó loló inogo ive.

21 Lá okiko, Guivahanímini agulizá iki sele li amita vegená nene kugutó vizinogo uve, loko Ómasímo lokave liki luhuva gizamóma neve.

22 Isilae mikasigú vese, lo likimitoze, gililo. Nasalete numutotí ve Izesú eza holutikú minake, Ómasilokatile liki litave loko Ómasímo hize lé otago, zámuzaaloló molo gilike golivagi netá mukí ale utó molamó nene lekeza gilinave.

23 Ámina ve nene Ómasímo gozapá molo hukake gili netá aleko likigizakú molokago, lekelisi gala vevatini kigizakú milikago alími-liki viki zaló nilitunú apilikago hilimóma neve.

24 Lá ikamóza, gonosi matimatigú minamitimó okago, miluma gilike helenekutí Ómasímo alémo otímó.

25* Agulizaki ve Tevití nene aikumú nene láa loko luhuva gizamóma neve: Neza Guivahani ánigo gisili hizekuke minoaká nouve.

Voko gopa okatove loko nigizani zamagaloka noive.

26 Nenemú nigikagú laga noikeye,

mulúnegú agila guluma noigo noluve.

Itó nugupemú nene gele hamokó oko

gegeva oko minanogo uve.

27 Není ahulonimikako nigika lamanaki nou vémina nugupéa anuva aminogiive.

Nemenía nene hele vegenalitiniuka ahulonetamitanikumú noluve.

28 Geza alévolé nemetameki mohona ito gapo nelepizenitika,

govogisaló mulúnegú agila guluma igo minanogo uve, loko limó.

29 Uvónegita aménegita, neza avoteho Tevitikumú ale akutoko lo likimitoze. Eza helekago, gale zimikago, gonosi matimati galeva itína ha nego ánigjaká niave.*

30* Eza Ómasímini agepagutí gakó loaká ve minoake, nénisi helekugo Ómasímo nene není izegipa nugunamotamokutí makolímo není hoza agepaló agulizaki ve napa alémo loló itove loko alévolé oko lo huta gakó nene geleake,

31 gologí oletative loko lo mololeta vema galegutí otitikumú geleake, agika lamanaki veva agupéa anuva okative loko hele vegenalitiniuka amenía ahulotamímó neve loko limó.

32 Itó Izesuni nene Ómasímo galegutí alémo otekago, leza logómula gihi-lutunú ánígonouháma neve.

33 Itó Ómasímo agizani zamagaloka alémo moloake, amelaho lo mololetató nene Sikalahú molomikago, ámina Sikalahú itína nene lehizelimikago, ámina netá giliká ánigiká niave.

34* Itó Tevití nene okulumakú itemimóza, eza gakó makó láa loko limó neve:

Mezaú ve eza není Guivahaníne nene není nigizani lamagaloka minoloko voko noako,

35 gala vega nene gigisa heumauka ahulokimikugo minanigave, loko lo amimóma neve.

36 Lá onoize, Isilae vegená mukí lekeza alévolé iki gililo. Ámina ve apilikago hili ve Izesú nene Guivahanite gologí oletative loko lo mololeta vema noive loko Ómasímo alémo apazá noive, loko limó.

37 Láa loko lo kemekago, miluma giliake Pitá ave itó aposolo lugáave loká ikitake ligivese, leza nana okuko lamaná itive.

* **2:25:** Age 16:8-11 * **2:30:** 2 Sam 7:12; Age 132:11 * **2:34:** Age 110:1

38 Liki likago, Pitá láa loko lo kimimó: Ómasímo lihimatini apaso ahuloleketaive liki likigika ali viligalo. Lá ikiko, leza Izesu Kilistoni agulizató monó nagamí hololikimikuko, Ómasímo Sikalahula lehizeleketanogo ive.

39 Lekezagi izegipatinigi itó hetoka nia vegenaki sele lo kemekiko ata vegená mukí nene Sikalahula lehizeleketanogo lo mololeketonoimóma neve.

40 Loko Pitá loake, mukí gakó miní ameko kagata aleko ítina gamena ve neginagi keí holúikú ahulikimiiki ikiko Ómasímo lukugutó vizitive, loko lo kimimó.

Izesukumú gili alévolé a vegenalitini suni

41 Láa loko lo kemekago, aí gakó gili alemoláa goha 3 tausen nene Ómasímo Izesuni vegenalaló miní ameketago, monó nagamí hilikitamó.

42 Lá ikago, gamena gamena amuza miliki alegesá iake gili hamó iki aposolo apí i keme gakó giliake, hanuva nosaki lepa nosaki niki Ómasiloka liki miniáká amó.

43 Lá niake, aposolomate haitopaitó alévolé suni aleke golivagi netá alikago, vegená mukí kehelele vizigo minamó.

44* Izesunimú gili alévolé iki mina vegenalite nene netá matá ali minamó nene mukító netáini ali minake,

45 henokanóiini makó ali minamó nene maketiló miliake moni aliaké netakumú vitagá a vegená nene gona miliki ali volaló imaló ake,

46 gamena gamena kigika mili hamó ake monó numuni napagú monó liká itó numúikú hanuva nosaki lepa nosaki niká iki kigika mili apiziki nosánetá gona miliki ali volaló imaló iki niake,

47 Ómasí agepoka liki miniáká niago, vegená mukilite ánigi kumu helemó. Lá noigo, Guivahanímo gamena gamena vegená makó kugutó vizike Izesuni vegenalaló miní ameketamó.

3

Monó zagusave gatetó ve gepili alími zokasimó

1 Gamena makó zupa Pitako Zoniko nene ho ale zohota noigo Ómasiloka loaká gamena nene monó zagusave napagú itinigi nivasigo,

2 ve makó izolaho getakutí gepili minamó nenémo numuni gatetó minoko monó numukú tígá liimigá a vegenáma monimú voká loko minoaká imó. Ámina ve nene gamena gamena monó zagusave gatenáa agulizá lamanapani loko netó nene alimi ahulimikago,

3 monimú voká loko minoaká imó. Ámina ve nene áminaló minake Pitako Zoniko monó zagusave napagú itinigi nivasigo, ánigoake, monimú voká limó.

4 Voká lokago, Pitako Zoniko keza gonú napelesike, Pitá nene gonú leplezo.

5 Loko lo amekago, ve gepili nenémo netáma niminigi nilasihe loko gituhú noake gonú kipilimó.

6 Lá noigo Pitá láa loko lo amimó: Moni lelitoka nomimóza, netá hamokó lelitoka nemó nene gimitoze, alezo. Nasalete numutotí ve Izesu Kilistoni gagotó oteoko gapo moloko vozo.

7 Loko lo namíke agizani lamagaloka aleko alémo otekago, litá oko agisaguki gehanaguki alévolé okago,

* **2:44:** Apo 4:32-35

8 moí oko oteake gapo moloko olío ite ite oko Ómasi agepoka lomo lomo vike Pitako Zoniko monó zagusave napagú nene makó itemó.

9 Lá okago, gapo mohona noike Ómasi agepoka noligo, vegeñá mukilite ániqiake,

10 goí oko monó numuni gateni agulizá lamanapaniveló minake monimú voká voká loko minoaká i ve noive liki ániqi hee liake, agisa lamaná ikumú ininá iake sigaga lamó.

Pitá monó zagusavegú gakó lo kimimó

11 Ámina vémo Pitako Zonikoló gímizekago, vegeñá mukí keza monó zagusaveló gaizopa makó agulizá Salomonive liki atagamó nenegú ololu liki viki alegesá iake kegepa gahava nomigo minamó.

12 Lá niago, Pitá nene ánigoake láa loko lo kimimó: Isilae mikasigú vese, ve imane ániqiake sigaga sagaga nilamóza, lelí zámuzatunú itó lelí lamanatetunú oko alémo otemusinazo, gonukonú lepelemilo.

13 * Avotege Avalahá Isaká Zakopó keí Ómasímini gelekelé gipala Izesuni zámuza utó igo nánigave. Agulizaki ve Pilató eza Izesuni aseva zetatove loko noligo lekelisi nene Pilatoni agómulaló Izesuni ániqi lá iake apilitave liake ami vetini kigizakú milamó.

14 * Lekelisi ámina vevesoko nomina ve agika lamanaki vema ániqi lá iake, ve makó kepele hili ve noimóma aseva zetative liake,

15 minoaká amelahinima apilikago hilimóza, Ómasímo heleneikutí alémo otekago, ánígonouháma neve.

16 Ámina ve Izesuni agulizá gele alévolé ominusítimo ániqina vema imane alémo lamaná usigo, eza Izesukumú giligo alévolé okago zokokave.

17 Nigive nagavese, lekezagi gizapa velinigi gili hee lamake Izesuni apilnamóma neve loko gelenoueve.

18 Ómasímini agepagutí gakó liaká a vetini kegepa ale vávani okimikago gologí oletative loko lo mololeta vema miluma geleko hilitive loko nenémini gakola lili ali vetini kegepauka lo molokago gizi mila gakóma itína mota alévolé okave.

19 Lihimavatini gilatoleketative liki likigika ali viligiuki golesa netatini ahuliuki Ómasiloka gímizilo. Lá ikiko Guivahanilokatí likigikámini nosánetá ame í liti gamena anogo ive.

20 Lá okiko, Ómasímo eza gologí oleketative loko lo mololeketa ve Izesuni alémo etó oleketonoi vema amisselekiko goha mikasiuka liminogo ive.

21 Izesú nene okulumalímo asapú okago noiko, Ómasímo lu netá la netá mukí goha ale lamaná iti gamena Ómasímini agepagutí gakó liaká a vetini kegepagú lo molokago gakó li mila gamena nene álitokiko liminogo ive.

22 * Itó Izesukumú nene Mosé gakó makó láa loko limó neve:
Guivahani Ómasímo likigivetikini holúikutí nene agepagutí gakó loaká ve makó nenikitana oko alémo etó oleketatomó nenazo, némini manámini lo likimiti gakó mukí nene ámegetalo.

23 Itó ámina monó lole ale vémini gakó gili alemita vegeñá nene, Ómasímo kehelú inogo ive, loko limó neve.

* **3:13:** Gá 3:15 * **3:14:** Mat 27:15-23; Mak 15:6-14; Luk 23:13-23; Zon 19:12-15 * **3:22:** Gapo 18:15,18,19

24 Itó Samuelé minatotí Ómasímini agepagutí gakó liaká a ve miniliki itemoláa mukilite imane gamenamú nene alika utó itive liki minamó.

25 * Lekeza ámina vete alika utó itive liki li mila vema ali lá inamó nenazo, itó Ómasímo avotikitoka lo mola gakó nene Avalahani nene gagapilamó makolímo numutó namató vegena mukí lusa geketanogo ive loko lo ami vema ali lá inamó nenazo, likigika ali viligiiki golesa netatini ahulalo loko noluve.

26 Ómasi eza gelekelé gipala alémo etó i vema lusa gelikimioko gapo golesagutí lekelémo atiginá itive loko lekeza Zuta vegenatoka amisilímoma neve.

4

Pitako Zoniko kansoletini holúikú minasimó

1 Pitako Zoniko keza vegená gakó láá liki li kimiki niasigo, guguni giziaká vegi monó zagusavegú gizapa vegi itó Satukaio monó vegenaki keitoka ake,

2 vegená nene Ómasímo Izesuni nene heleneikutí alémo otímómámini oko vegená makó kelémo otitive liki apí ikimiki lasi gakokumú gili golesa iake,

3 kigizató aliake, límugusí mota zekago, azozá goní oketatune liki kilími kalapusi numukú milamó. Lá ikago numuni hamó akasimóza,

4 gakóini gelemoláagutí gili alevolé a véa 5 tausen minamó.

5 Akiake gó lago, Zuta vetini kugulizaki vegi monó ve lunáagi monó mogona apí ikimiaká a vegi

6 guguni gizoaká i ve napa Anasí itó Kaiapá itó Zoní itó Alesaté itó guguni giziaká a zuha makoki mukí nene Zelusalega alegesá iki minake,

7 aposoloma kilími holúikú miliake, loká ikitake hí vémini zámuzaló itó hí vémini agulizató ve imane alími zokasive.

8 Liki likago, Ómasímini Sikalahulímo lemeko Pitani agikagú mino vaí onoigo, láá loko lo kimimó: Uvónegita aménégita,

9 lekeza ve gepilima nana ikasike alími zokasimó neve liki itína netá gihila alusikumú goní hoza nilememóza,

10 lekezagi mukí Isilae mikasigú vegená neneta, gakó lo likimitoze, gililo. Nasalete numutotí ve Izesu Kilstoni nene lekelisi zaló apili hilikago Ómasímo heleneikutí alémo oti vemámini zámuzaló ve imane lokogómulaló zokoake nene noive.

11 * Ái mogonamú nene monó gotolaú luhuva makó láá liki gizinamóma neve:

Numuni giaká vete gehani napa makó ánigi ahulamó nenémo gehani lapusa alevoeláa loló oake noive, liki gizinave. Lekeza ámina numuni giaká ve niave, itó Izesukumú gehani lapusa golesave liki liake ánigi ahulamóma neve.

12 Numutó namató vegenakutí lugutó viziti ve makó noamive, itó ái agulizató lamaná itunimoláa neve, ve makó imane mikasiuka minamive, loko limó.

13 Lá okago, Pitako Zoniko keza kehelele vizemigo ali akutiki gakó likasigo, sukulu lamasi vematoseve liki giliaké nene, sigaga liake Izesuni amatoka minasi vematosa lasinae liki gelemó.

14 Lá niago, alími zokasi ve nene keí kamatoka noigo, ve lositosini konotó aliki li kimita gakoláa nomigo, vitagá amó.

15 Vitagá iake, gakó numukutí kimsili hetoka iake, kezáikó láa liki ligili hagili amó:

16 Imane ve lositáma nana oketatune. Kéisi nene netá golivagi alikasive liki Zelusale numutoka vegená mukilite gili asú ikanazo, leza nana okiko egamega oko lá oko nomive loko litune.

17 Lá onimóza, ámina gakó hutilí okiko vegená gili asú ikatave liake, Izesuni agulizató gakó goha li kememítáive liki kagata alitune liki liake,

18 goha sele li kimiakie, Izesuni agulizató gakó li kimi kimi iki vegená goha apí i kememítáive liki kagata alemó. Lá ikago,

19 Pitako Zoniko keza láa liki li kemesimó: Lekeza giliki ánígalo. Vegená lekelí gakó gele alekoko Ómasímini gakó gele ahulatunimó nene Ómasímo gele lamaná itihe.

20 Leza ánígoko geleko uni netá nene hitooko minaminogo une.

21 Liki likasigo, keza goha kehelele viziti gakó li kimiakie, kipilita gapomú vitagá amó nene nomigo, hanuva kimsili ahulikago vasimó.

22 Lá amó nene ámina netá golivagi aliki alími zokasi vema nene kilismasiva 40-a alahuloko minamó nenazo, vegená mukilite ámina netakumú Ómasí agepoka liki minikago, ve losima kipilitunimó nene vegenalite nana ilitatahe liki giliakie gapomú vitagá iake ahulikimikago vasimó.

Izesuni vegenala zuhate genezáini ale vávani oketative liki Ómasiloka lamó

23 Kimisili ahulikago, limikasike kigivéike niatoka vasike, guguni giziaká ve napate itó monó ve lunáate li keme gakó nene avetó iki li kimikasigo,

24 * giliakie, kegepa hamó ake Ómasiloka láa liki lamó: Mezaú ve Guivahani geza ókulmakuka ito mikasiuka itó age nagamikú lamó lamimó molanítika,

25 * Sikalahuka nenémo gakola nene avoteho geí gelekelé ve Tevitini agepagú lo molokago, gakó láa loko limóma neve:

Hetoka vegená nene kizapaló molokago gopaga lamó neve.

Itó Zuta vegenalite netá golesa loló otatune liki gilikamóza,

hanuva geleakalágó gelemó neve.

26 Mikasiuka kugulizaki ve napa nenete ali vavá iake,

ító gizapa vete ali nupa iake,

némini manámíni iki Guivahanigi gologi oletative loko lo moleta vevagi lova ale kimitune liki gona gizamole,

loko limó.

27 * Lapanalagi gelekelé gipaka Izesúma lugutó vizeaká hozamú alémo etó ani vema lova ali aminigi Heloté ave Potiasi Pilató ave itó hetoka vegenaki Isilaeló gizapa vegi keza lamaná imane apatoka alegesá iake,

28 géisi gosohá utó itive loko lo molani netá muki alemóma neve.

29 Lá ikamóza, Guivahanitemaka geza lehelele viziti gakó gelekoko gakó ale akutoko litune loko genezate ale vávani olimioko,

30 zámuza lemekako vegená kelémo zokinake lapanalagi gelekelé gipaka Izesuni agulizató golivagi hoza alitune loko nolune.

31 Liki Ómasiloka likago, alegesá iki mina numunima guliguli oko móromoká okago, Ómasímini Sikalahú nene lemeko kigikagú mino vaí oake kelémo vávani igo, limiakie Ómasímini gakó ali akutiki li kimi kimi iaká amó.

* **4:24:** Gá 20:11; Nia 9:6; Age 146:6 * **4:25:** Age 2:1-2 * **4:27:** Mat 27:1-2; Luk 23:7-11

Netá matá nene mukitó netáni ali minamó

32* Lá niake, Izesunímú gili alévolé iki mina vegená keza kigika mili hamó iake, geí netá není netá lamake netá matá ali minamó nene mukitó netale liki ali minamó.

33 Lá niake, apsolote Guivahani Izesú galegutí otekago ángune liki gakó nene alévolé iki avetó iki li kimi kimi iki minikago, Ómasímo hize lé okimikago niave liki mukí vegenalite gili minamó.

34 Nenémíni gihila nene numunihe mikasihe zazuhahe netá amelage meinaváa aliake,

35 aliki viki apsolote kimikago, ve lugáate netakumú vitagá niago nene gona miliki kimikago, ve makolímo netakumú vitagá osá amimó.

36 Nenémi suni nene ve makó agulizá Zosehé eza apsolote agulizá makó Panapasi ave liki mila ve, nene agulizálímini mogonáa lelí gakokutí nene kelémo kii lokimiaká ve eza Livaini agávolaho Saipalasi mikasi pokolagú getamó nenémo

37 zazuha apala makó ale minamó nene meinava moni aleake aleko voko apsolote kimimó.

5

Ananiasiko Sapailako

1 Lá okamóza, ve makó agulizá Ananiasí itó venala Sapailá keza ligili hagili ikasike, zazuha apá makó salimikasike, moni alikasike,

2 lugáa nene ali halá gikasike, Ananiasí nene lugalokatí aleko voko apsoloma nene áminasí alusimó neve loko lo kimimó.

3 Lá okago, Pitá láa loko lo amimó: Ananiasio, geza nanamú Satá gigika ale gopa okago Ómasímini Sikalahú soza gakó lo amekanike mikasímini meinava lugalokatí ale halá gekane.

4 Mikasiga nene gezakaloka minatinazo, gezaka gagata geleko kemimóma neve. Itó salimokanike meinava alenimó nene geza monikama nenazo, lélisi voká logetamune. Nenelotí meinava aleokoma nenetunú netá mataka meina kona itove loko itaninazo, geza nana okago gezaka gigikámo gogoka vizekago nenémini ane. Vegená soza lo lumuhe loko Ómasi soza lo amekane.

5 Loko noli agepagi, Ananiasí nene nogilike pou loko akoake hilimó. Helekago, ániwake, kelegesá ligimó.

6 Itó lá oko helekago gosohá ve minamoláate otiki gonosiváa nene gotunú asapú iake aliki viki gale zitamó.

7 Gale zimikago, koma nominake, venalámo ámina gakó gelemike hanuva noithe loko anitimó.

8 Anitekago, Pitá nene loká otake Olo, mikasilotí meinava áminasí alesimó nehe. Loko lokago, eza oo, áminasíma nena.

9 Loko lokago, Pitá láa loko lo amimó: Lekeza nanamú Guivahanímini Sikalahulímo ánígamití liki agoka vizinigi ligili hagili ikasike asihe. Gelezo. Vakama nene gale ze vema gatetoka liti liti liki niki laze, gezagi nene áminámini iki aliki viki gale zigitanigave.

10 Loko noli agepagi nene eza galinali agisagú pou loko akoake hilimó. Helekago, ámina gosohá ve nenete iteke gonosiváa ániwake, aliki vili vana gale zitató nene gale zitamó.

* **4:32:** Apo 2:44

¹¹ Gale zikago, monó gele vegená itó gakóini gele vegená mukí keza kelegesá ligigo minamó.

Alévolé suni haitopaitolímini ali utó amó

¹² Aposolo keza alévolé suni haitopaitolímini mukí nene vegenalitini holúikú ali utó iminikago Izesuni vegenala zuha mukí nene monó zagusave napámini gaizopa numuni makó agulizá Salomonive liki atagamó nenegú kigika mili hamokó iki alegesá iaká amó.

¹³ Niago, vegená lugáate kugulizáini ali otemóza, ve vená mukilite kelegesá legekago monó gele vegenatoka viki gímizemamóza,

¹⁴ ve vená mukilite vauva aliki Guivahanimú gili alévolé iake keitoka miní amiki miniaká amó.

¹⁵ Lá iake, kivisi vegená nene gapoló kilími miliki Pitá tizokoko kugupeló ale gelekikohe itó hanuva vogunámo avutá kepelekiko zokatave liake, ukoako nene lilí iake ámina vegená nene miliki kilími-likí iki agisauka nene ahulikimiaká amó.

¹⁶ Lá niago Zelusalega alitoka miniliki va vegenalite kivisi vegenaki kigik-agú holosi golesa mina vegenaki kilímiki ikago, kilími zoki asú amó.

Aposolo gopoguni milikitamó

¹⁷ Lá niago, guguni gizoaká i ve napagi izegipala zuhagi itó Satukaio monó vegená kezagi ámina suni ánigiake, kemekugú niake kizapaló molokago,

¹⁸ aposoloma kigizató aliake kalapusí numukú kilími milamó.

¹⁹ Lá ikago, akinago, holugú akovevé nene Guivahanímini ageló makolímo kalapusí numukutí gahe segekimiaké, kelémoko limike láo loko lo kimimó:

²⁰ Lekeza viki monó zagusavegú itiki alévolé kemetamenigi minata gakó li kimi kimi iki minalo.

²¹ Loko lo kemekago, giliaké, neteká ho noitigo monó zagusavegú itiki monó li kimi kimi iki minamó.

Lá niago, guguni gizoaká i ve napa nenémo izegipa agunamotamolagi Isilae vegenalitini monó gizapa vegi monó kansolegi kilími nupa iake gakó ligli hagili iake, aposoloma kilímikatave liki pilisi ve makó nene kalapusí numukuka kimiselemó.

²² Kimisilikago, viki kalapusí numukú ámigamó nene, niamago, vitagá iake, atiginá iki ake lamó:

²³ Leza voko ániguahá nene kalapusí numuni gahe lopena alinago gizapa vema gatetó ha minamóza, leza gahe segekunike, iteko ánigunimóza, ámina vegená niamago vitagá okune.

²⁴ Gakó láo liki likago, monó zagusave gizapa vegi guguni giziaká ve napagi keza gelemó gena okago, alika netá makó utó itimó nehe liake, kagata losi gelemó.

²⁵ Nigelego, ve makolímo anitike kalapusí numukú kilími mila vamate viki monó zagusavemagú monó li kimi kimi iki nianae.

²⁶ Loko lo kemekago, monó zagusave napa gizapa ve nenémo pilisi ve kelémoko vike aposoloma kipilitunimóza ha vegenalite gehanitunú lipili hilikatave liki kehelele vizekago, hana ikisi kilímiki amó.

²⁷ Kilímiki iake monó kansoletini holúikú kilími miliakago niago, guguni giziaká vetini ve napámo láo loko lo kimimó:

28 * Leza nene ámina vémini agulizá iki li kimi kimi amilo loko lo leke-memuhá nehe, olo. Lekeza pelevesava ziake, nene gakó nene Zelusale numutoka li hutilí ikave. Lá iake, aí apili helemómámini lihima nene lelí lumupiló molatune liki nilahe.

29 Loko lokago, Pitá ave aposolo lugáa kezagi anotó aliki láa liki li amemó: Vegenalitini gakó gele aleoko Ómasímini gakó gele ahuloakala nomive.

30 Lekeza Izesuni nene zohota zaló apili hilíkago, avotegini Ómasímo alémo otekago otimó neve.

31 Ómasímo Isilae vegená lekelisi likigika ali viligikiko lihimatini apasole-
tative loko ámina ve nene agulizaki vele itó lugutó vizeaká vema alémo etó
oake, galegutí alémo otekago, Ómasímini amatoka noive.

32 Lá okago, Ómasímini gakó gili aliaká niámoláa kemeaká noi Sikalahulímo
ító lezagi ánígoko gelekunike ámina gakó lo lekemeaká noune, loko lo kimimó.

33 Loko lo kemekago, giliake, kizapaló golesa molokago, aposolo kipili
hilinigi li hukamóza,

34 Zuta vetini kansolegutí Palisaio monó ve makó minamó, agulizá
Gamalielé. Áisi nene Mosé lo hukoko li gakó lainim-okimikago vegenalite
ánigi lamaná a ve minamó. Áisi nene oteake aposoloma kilími hetó itave loko
lokago, aposolo keza olí hetó limiki niago,

35 agivelagini láa loko lo kimimó: Isilae vese, lekeza imane vemú gili hee
liiki netá matá ikitalo.

36 Gozapá ve makó minamó, agulizá Teutá ave loko mina vemámo
nugulizaki ve napa nouve loko lokago, ve 400 aitoka gímezemóza, alika nene
Teutoni apili ahulikago, vegená aitoka gímezemoláa kimisili ahulikago, hutilí
iki viake apí a hoza nene ahulamó.

37 Itó alika nene Galilaia mikasigutí ve makó agulizá Zutá eza lugulizá
aliaká a gamenaló nene oteake, vegená gala vizeko ale goí ike lova mogoka
ligo, lova apí amóza, ámina ve nene apili ahulikago, izegipa agunamotamola
hutilí iki vamó neve.

38 Nenemú gakó imane lo likimotoze, gilio. Lekeza imane ve ahulikimikiko
hanuva minatave. Keza gakó akó liki hoza nalemó nene kezáini kagata gili
nalitamó nene, gopa oko haha inogo ive.

39 Itó Ómasímo hize lé oketago nalitamó nene, lekeza Ómasímini hozava
ali golesa itiki lova ali amikatave loko lou noko likipilinogo ive. Nenemú
lakagata aleko noluve.

40 Loko lo kemekago, keza gili aliake aposoloma kilími itiake segi no-
gosanitunú kipiliake, Izesuni agulizá nene goha avetó iki vegená li kememi-
tave liki li hukikimiaké kimiselemó.

41 Kimisilikago, nivake, Guivahanimule loko lovoza hili netá aliki lep-
elemóza, Ómasímo nenemú gilimó etokave liki liake, kogoliza viziki kanso-
letini kovogisalokati límiake vamó.

42 Vake, gamena gamena monó zugusave napagú itó numúkú nene gologi
oletative loko lo moleta ve Izesuni gakó lamaná ahulamake miní amiki li
kimi kimi iki minamó.

1 Gamena nene zupa Izesuni vegenala zuha hizí hutilí niago, keikutí Zuta vegená makó Kiliki gakokutí liaká a ve nenete getó venalitini nosánetá nene gamena gamena gona miliki kememóma vo alemikumule liki Zuta gakokó liaká a ve nene gahá kememó.

2 Lá ikago, aposolo 12 keza Izesuni vegenala zuha sele li kimiake láa liki li kememó: Leza Ómasímini gakó lo utó aminake lugupémini hozagó alesá etaminogo ive.

3 Nenemú ligivetegita, lekeza lekelí holutikutí ve 7-a gotóini lamanaki itó Ómasímini Sikalahuki kigikagú mino vaí oko neiko vegenalite ánigi lamaná iaká nia ve kilími etó ikiko, leza ámina hoza kemekuko alitaze.

4 Lá ikiko leza nene Ómasí agepoka loaká itó monola loaká hoza goselekaselé aminake aleko minatune.

5 Liki likago, Izesuni vegenala zuha mukilite gili lamaná iake ve makó kilími etó amó, kugulizá Setepanó eza agikatunú gele alévolé oko minokago Ómasímini Sikalahú lemeko agikagú mino vaí oko mina ve, itó Pilipó, itó Polokoló, itó Nikanoló, itó Timoná, itó Palamená, itó Nikolaó eza Atiokia numutotí Zuta vegenatoka monokumule liki gutá a ve.

6 Nene vete aposolotini kamatoka hizi letiake niago, aposolote kigizani nene gotóító milake Ómasiloka lake kilími etó amó.

7 Lá ikago, Ómasímini gakó hutilí oko vogá ogá oko minago, Izesuni vegenala zuha nene Zelusalega miní amiká amiká ago, guguni giziká a vegutí lugáate Izesuni monokumú gili alévolé amó.

Setepanoni agizató alemó

8 Lá okago, Ómasí eza Setepanoni hize lé omiake zámuza mukí amekago, alévolé suni haitopaitolímini nene vegenatoka mohona oko aleko minamó.

9 Lá okago, monó numuni makokutí miluma hozagutí asenini zikitamoláate Sailini apatotí itó Alesatalia apakutí itó Silisia ve itó Asia ve nenete ali nupa iake, Setepanoni pelevesava zitamóza,

10 Sikalahulímo alémo vávani okago, monó limó nenémo keí gakó satamó. Satokago nene loú noko kipilimó.

11 Lá okago, vegenatoka asuguná gomulusi gihikago, Setepanoni amimika lake gakó láa liki lamó: Ámina ve nenémo Moseki Ómasigi alevo galatovo okago gelekune.

12 Liki liake, numuká vegenaki olopa napagi monó mogona apí-ikimiaká a vegi gala vizikago, galinali Setepanoni gohoni milake agizató aliake kansoletini numukú alímiki vamó.

13 Alímiki viake soza sazaló ve kilími numukú milikago, láa liki lamó: Ve imanémo lelí monó apakumú itó Mosé lo huka gakokumú alevo galatovo oko loaká noive.

14 Makó nene láa loko noligo gelenouháma neve: Nasalete numutotí ve Izesúma imane apá ale golesa okoko oko moloko oaká nouhá sunimú Mosé gizo molamó nene ale gopa napa inogo ive, liki lamó.

15 Láa liki liake ámina numukú mina ve mukitó keza Setepanoni agoka agepauka ánigamó nene, ageló makolímini agovisagítana oko lapanalagi noigo ánigamó.

¹ Lá okago, guguni giziaká a vetini ve napa nenémo loká otake gakó nilamó imane mota lamaná nilahe.

²* Loko lokago, Setepanó láa loko limó: Avónegita aménegita, gakó litoze, giliro. Avoteho Avalahá eza Halana mikasiuka velesá vonamike Mesopotamia mikasiuka noigo, Ómasí eza lapanalagi vemámo utó o amike

³ láa loko lo amimó: Numuka apaka itó vegenaka zuha ahulokimioko nénisi mikasi makó gelepizitoze, nenenlo voko minatane.

⁴* Loko lokago, nene gakó geleake, Kalatia mikasi ahuloake, Halana mikasiuka voko minamó. Neneloka noigo, amelaho helekago, gale zemiate Ómasímo litó nene ámina mikasigutí goha gá logoko léisi nouhatoka amóma neve.

⁵* Gá logoko okago, mikasi ma alemimóma neve. Ómasímo mikasi koma makó keké amemimóma neve. Izegipa geto molamike noigo, minoloko notike ezáagi agapilamoki miniliki itiki ámina mikasi alitave loko lo molamó.

⁶* Ómasímo láa loko lomiate, gakó makó láa loko limóma neve: Gagapilamoka keza mikasi makotoka gutá miniki gelekelé ikitiki miluma hoza aliki goselekaselé iki niko, kilisimasi 400 oko vinogo ive.

⁷ Loko loake, Ómasímo gakó makó miní amike láa loko limó: Lá oko noviko, miluma hoza kiminita vegená nene goní hoza kiminogo uve. Lá okugo, gagapilamoka kimisili milikiko, imane mikasiloka iki nugulizá ali otiki gupá zinimiki minanigave, loko lo amimó.

⁸* Láa loko lo ameake, Avalahani izegipa agapilamolatini kugupeloka Ómasímini anosa minative loko lo hukotamó. Loko lomikago, Avalahá eza gipala Isakaní getoake, gamena 8-a oko vokago, ámina anosa nene agupeló molotamó. Molomikago, Isaká minoloko notike Zakoponi getamó. Lá okago alika Zakopó nene izegipala 12-a getamó nene lelí avotege zuha minamó.

⁹* Lá okago, avotege keza kugunáini Zosehekumú amekugú niake, aí nene Isimaeli vegenatoka salimi iki agupelotí meina alemó. Alikago, Izipi mikasiuka alímiki vikago, nenenlo voko noigo, Ómasímo Zosehé notoka minake,

¹⁰* miluma geleko mina netá ale ahulomiake nasahilí omikago, netá mukikumú gelevévesoko minokago, Izipi mikasigú agulizaki ve Palaó ánigo lamaná oake, Izipi mikasiló itó aí numuni apá izegipa agunamotamola mukitoka gizapa ve napa minative loko alémo molamó.

¹¹* Lá okago, noigo, Izipi mikasigú itó Kenan mikasigú mukí nene gaúna napa giliro minikago, avotege ámina iki nosánetakumú vitagá amó.

¹² Minake Zakopó nene Izipi mikasiuka nosánetá neve liki lamó nene geleake, izegipala kimiselekago vamó.

¹³* Viake atiginá ikago, goha kimiselekago, goha vikago nene, Zosehé nezama noumó lae loko uvolagini nene agoka kelepizekago Palaoki ámina gakó gilimó.

¹⁴* Lá okago, Zosehé eza amelaho Zakoponi itó izegipa agunamotamolagi alo loko Izipi mikasiuka alesa molokago, ve vená 75 nene vamó.

* **7:2:** Apí 12:1 * **7:4:** Apí 11:31 * **7:5:** Apí 12:7, 15:18, 17:8 * **7:6:** Apí 15:13-14 * **7:8:** Apí 17:10-14, 21:2-4, 25:26; 29:31-35:18 * **7:9:** Apí 37:11; 37:28; 39:2,21 * **7:10:** Apí 41:39-41 * **7:11:** Apí 42:1-2 * **7:13:** Apí 45:16 * **7:14:** Apí 45:9-10,17-18, 46:27

15 * Zakopó voko Izipi mikasiuka minake hilimó. Helekago, izegipa agapilamola avotege keza ámina iki miniake hili asú ikago,

16 * gonosiváini nene Sekeme apatoka aliki ake Hamoleni agapilamó zuhagutí gonosi apá Avalahá goí oko meina hizikú nene gale zikitamó.

17 * Lá ikago, Ómasímo Avalahani gakó lo molotamó nene alévolé iti gamena alitokago, Zuta vegená keza Izipi mikasiuka hizi hutíl amó.

18 Lá iki niago, Izipi mikasiuka agulizaki ve gosohá utó imó. Áisi nene Zoseheni mogona gelemimó.

19 * Áisi nene avoteginimú lotoka hizike kelémo golesa galasa ike avotegini gipa getatamó nene hilitave loko leti ahuli ahuli ilo lokago, avotege ámina gipa koma leti ahuli ahuli iaká amó.

20 * Nene zupa nene Moseni nene izolaho getamó. Agoka agepa lamanaki utó okago, Ómasímo ánigo lamaná okago, amelahini numukú ali halakipalaki iki alinago, ikani losive makole golamó.

21 * Aliko nene apilikatave liki halá gitinago Palaoni moholámo ánigoake, gipáneve loake alémo lá imó.

22 Lá okago, Palaoni vegenala zuhate Izipi gakó li ami ami ago, gele asú oake, oko moloko ike monó anoka like alévolé oko minamó.

23 * Lá oko minake, kilisimasi 40 ale ahuloake, Isilae vegená nigivénegini voko ánigatove loko geleake, mulunagú lamaná geleko vimó.

24 Voko ánigamó nene, Izipi ve makolímo nene Isilae ve makó napiligo ánigoake, agivelahini alémo vatí oko miluma gele minamó apasoko Izipi vema apele hilimó.

25 Neza nigivénegini nene Palaoni agizakutí ipá itane loko Ómasímo nelémo etó onoimóma neve liki gili guni itahe loko Izipi vema apilimóza, keza gili hee lamamó.

26 Akiake gó lago, goha nene vimó. Voko ánigamó nene, Isilae ve losi netetosa lova nihizesigo, ánigoake alata moloketake ve loe lekeza gounama niasinazo, nanamú lova niasive.

27 Loko lo kemekago, lova apí oko agivelahini apili vemámo láa loko lo amimó: Éaho gelémo gugulizaki ve loló ogimikago gonító lelémo molanogo nolane.

28 Lá okanike azozá Izipi ve makó apelenanimóma nenazo, itína ámina oko není nipilinogo nolape, olo.

29 * Loko lokago, Mosé nene geleake ahelele vizekago golisi oko Mitiana mikasiuka voko kugupeló ve minamó. Voko minake vená aleake, gipala losima getamó.

30 * Minake, kilisimasi 40 goha ale ahuloake, vike mikasi gomopalaló Sinai agoka agisauka nene zamukutí ló guluma ikú ánigamó nene Guivahanímo ageló loló oake lemeko utó o amekago,

31 Mosé ánigoake, ininá oake nana netá utó noive loake, ánigo hee hee linogo vo alító noigo, Guivahanímini anó lupa láa loko utó imó:

* **7:15:** Apí 46:1-7, 49:33 * **7:16:** Apí 23:2-20, 33:19, 50:7-13; Zos 24:32 * **7:17:** Gá 1:7-8 * **7:19:** Gá 1:10-11,22 * **7:20:** Gá 2:2 * **7:21:** Gá 2:3-10 * **7:23:** Gá 2:11-15 * **7:29:** Gá 18:3-4 * **7:30:** Gá 3:1-10

32 Neza avokage Avalahá Isaká Zakopó keí Ómasi minumó minoloko voko nominuve. Loko lokago, Mosé geleake, ininá oake luvolovo zeko minake ahelele vizekago okenava oko ánigamimó.

33 Lá oko noigo, Guivahanímo láa loko lo amimó: Mikasi nolisanimó nene lo hutukugo etó oko nei mikasi neve. Nenemú geí suú gololohá ozo.

34 Vegenáne zuha Izipi mikasiuka niamó nene gopoguni milikitago, ive nama iki niago gelemo iteva iteva noumó mota asú okave. Itínasa nene gologí oketatove loko lemekuve. Nenemú geí nene Izipi mikasiuka nogimisuluze, vozo, loko lo amimó.

35 Itó ámina ve nene éaho gelémo gugulizaki ve loló ogimikago lelémo gonító molanogo noane liki ánigi ahula ve Moseni nene zamukutí Ómasímini agelóma utó o amekago, Ómasímo nene gizapa ve itó kugutó vizeáka ve minative loko amisilimó.

36* Amiselekago, vike vegená kelémo vike Izipi mikasiuka itó age nagamí makó agulizá golohá nagamitoka, itó mikasi gomopalaló nene alévolé suni haitopaitolímini ale utó moloko noigo, kilisimasi 40 oko vimó.

37* Ámina ve Mosé eza Isilae vegená nene Ómasímo likigivetikini holúikutí nene ezáa agepagutí gakó loaká ve makó nenikitana ve alémo etó oleketanogo ive, loko lo kimimó.

38* Itó avotege keza Ómasímini monokumule liki mikasi gomopalaló alegesá iki niago, Sinai agokaloka Ómasímini ageló itó agivelagini holúikú minake loloko vogá ogá ve minake, alévolé lemetamenímini gakó lehizeletatove loko Ómasilokatí alimó.

39 Alekago, avotege keza Moseni gakola gili ahuliake, aí nene vasá ziake Izipi mikasiuka atiginá iki vinigi kigika nenenloka minokago,

40* Moseni uvolaho Alonani nene láa liki li amemó: Geza avevezaha netá makó loló olimikako ámina netalímo ale goí iko leza atiginá oko Izipi mikasiuka vitune. Mosé nene Izipi mikasigtí lelémoko a ve eza voko gopa ihe itó hela hizihe leza gelemunize. Liki liake,

41* nene zupahé pulumaká akalevámini vogunahana avevezaha netá lilí iake, guguni gizi amiki kigizanitunú lilí a netakumú kogoliza viziki minamó.

42* Lá ikago Ómasímo viselekimikago, kigika gopa okago, okulumatoka hanatoaká netá muki goliva giliki agepoka liki minamó. Nene sunimú Ómasímo li gakó nene ezáa agepagutí gakó loaká ve makolímo láa loko luhuva gizonoiomóma neve:

Isilae vegená lekeza mikasi gomopalaló minake

kilisimasi 40 oko novigo gaha nama kipilikí guguni giziaká amóza, není makó gizi nimisá amamóma neve.

43 Lekeza soza ómasilini agulizá Molokoni seli numuni komagú lilí i miliake itó makó nene Lepanani sonohikitana makó lilí i miliake, ámina netalímini vogunahana goliva geleko agepoka litune liki soza ómai netá lilí inamó nenazo, néni lokugo, Papelonía apá hotoka likilímiki vinigave, loko luhuva gizonoiomóma neve.

* **7:36:** Gá 7:3, 14:21; Nam 14:33

* **7:40:** Gá 32:1

* **7:37:** Gapo 8:15,18

* **7:41:** Gá 32:2-6

* **7:38:** Gá 19:1-20:17; Gapo 5:1-33

* **7:42:** Emo 5:25-27

44 * Mikasi gomopalaló nene Ómasímo Moseni nene monó numuni lá oko gitane loko litokó gekago avotegitoka minamó nene seli numunigó minamó.

45 * Lá okago, ámina seli numuni nene omolelé amalelé iki aliki tiva niago, Ómasímo ale goí ike numuká ve kimisilikago, nivago, avotege nene iki ámina mikasi aliake ámina seli numuni nene Zosuagegi aliki amó. Lá iki ámina numuni aliliki viva viva iki niago, agulizaki ve Tevití utó imó.

46 * Ómasímo Tevitini ánígamó lamaná okago, Tevití nene monó numuni nene avolaho Zakoponi Ómasí getatove loko loká imóza,

47 * Ómasímo géneka loake gipaka Salomó genetative loko gele amekago eza Ómasímini numuni getamó.

48 Lá imóza, okulumakú ve napa nene vegenalite ge numukú nene mi-noko aleko osá amive. Nenémini gakola Ómasímini agepagutí gakó loaká ve makolímo lá loko luhuva gizamóma neve:

49 * Guivahanímo láa loko nolive:

Okulumá nene není numuni apá neve.

Itó mikasiuka nene nigisa liso minuke gizapa oaká nouve.

Lá oaká nounazo, numuni nanáminiki ginimikiko etative.

Itó hí holomaló navasú vizeko minutave.

50 Neza nigizanitunú okulumaki mikasigi netá mukí kelémo utó okumóma neve, loko luhuva gizamóma neve.

51 * Gínikaha golesa lekeza likigika lakagata koló amimó neneta, nénisi negopa, lekelisi nene avotike iki miliki amómáminiki niminake, Ómasímini Sikalahú nene lova ali amiaká niave.

52 Avotike Ómasímini agepagutí gakó liaká a ve gopoguni milikitamiki asenini zikitamó nehe. Ma nomive. Mosé itó ve heeváa utó itive liki gakó li miliki la ve lugáagi nene kipili asú ikago, minoko lekelisi ámina ve heeváa nene utó okago amimí iki alimiki viake apilikago hilimóma neve.

53 Ómasímini ageló nenete Ómasímo lo huka gakóma Moseni amemó nene lekelitoka anitekamóza, lekelisi ámina gakó aliake gizapa iki gili alisá amave.

Setepanoni gehanitunú apilikago hilimó

54 Setepanó láa loko lo kemekago, giliaké, mulúikú golesa okago, kizapaló golesa molamóza,

55 Setepanó nene Ómasímini Sikalahulímo lemeko agikagú mino vaí okago, ániго okulumakuka moloake, Ómasímini lapaná nego itó Izesú eza Ómasímini amatoka noigo ániгоake láa loko limó:

56 Neza okulumá koló okago ánígumó nene Ómasilokatí limi ve gihila Ómasímini amatoka noigo ániгokuve.

57 Loko lokago, keza kagataló hitinake valala ziki hitimiake viki anukemó.

58 Anukiaké ahelukalú iliki vake alími númaseloka miliaké gehanitunú apilinigi goláa vizakiaké, gosohá ve makó agulizá Sauloni agisauka milamó.

59 Lá iake Setepanoni nene gehanitunú napelego, hilinogo noike Ómasiloka noliike Guivahani Izesúnegamaka, není sikalahú alezo.

* **7:44:** Gá 25:9,40 * **7:45:** Zos 3:14-17 * **7:46:** 2 Sam 7:1-16; 1 Iki 17:1-14 * **7:47:** 1 Kug 6:1-38
* **7:49:** Isa 66:1-2 * **7:51:** Isa 63:10

60 Loko loake, alapusa hizeake sele loko limó: Guivahani geza imane lihimáini ahuloketozo. Loko loake, hilimó. Apili hilikago, Sauló nene mulunaú lamaná gilimó.

8

Sauló monó gele vegená gopoguni moloketamó

1-2 Setepanoni apili hilikago, monó ve lugáá keza Setepanoni ive nama goha itiki gale zitamó. Ámina zupa nene Zelusale numutoka monó gele vegená apí iki gopoguni napa milikitamó. Milikimikago hutilí iki nivake Zutaia mikasiuka itó Samalia mikasiuka vi asú ikago, aposoloma kezáikó Zelusalega minamó.

3 * Lá niago, Sauló nene monó gele vegená lova ale kimike numúikú iteká lemeká noike ve vená gelelehá oloko leme leme ike nagá numukú ahuloketomo vimó.

Samalia mikasiuka monó gakó li kimimi vamó

4 Lá noigo, hutilí i va vegenámate Ómasímini gakó li kimi kimi iki mihina iki minamó.

5 Minake, Pilipó nene Samalia apalímini taoni napaló lomoko anitike Ómasímo gologí oletative loko lo mololeta ve Izesuni gakó lo keme keme oko minamó.

6 Lo kemekago, vegená mukilate Pilipó lo kimi gakó gili hamó iki amegesaló miliake, Pilipó alévolé suni haitopaitolímini loló igo ánígamó.

7 Lá noike vegenalitini kigikagú holosi golesa minamoláa kepeleko kimisele ahulokago, gopaga liki vamó. Itó gepili napili itó genisi vegená mukí kelémo zokamó.

8 Lá okago ámina apakú vegená keza kogoliza vizemó.

9 Lá niago, ámina taoniló ve makó minamó, agulizá Saimon. Áisi gamena hána soza saza lusa geko minake, neza nugulizaki ve nouve like Samalia vegená mukí kogoka vizeaká imó.

10 Lá noigo, iti minamó limi minamó keza gelemó lamaná okago, aikumú nene Ómasímo zámuza amekago, netá matá loló okago gihila zeaká noive liki liaká amó.

11 Lá iake, gamena hána aí avevezaha netakumú sigaga limiake, aí gakó gili aliake aitoka viki gímizemó.

12 Lá iki niago, Pilipó eza Ómasímini gasovaló minoakalímini gakó lamaná itó Izesu Kilstoni gakola lo kemekago, gili alévolé iake, ve vená mukí nene monó nagamí hilamó.

13 Lá ikago, Saimon eza ámina oko monó gele alévolé oake nagamí holoake Pilipotoka voko gímizekago, Pilipó golivagi netá haitopaitó ale utó okago, áñigoake sigaga sagaga loko minamó.

14 Itó aposolomate Samalia vegenalite Ómasímini gakó gili alemó nene gilikago, Zelusalegatí nene Pitaki Zoniki áminaloka kimisilikago vasimó.

15-16 Neneloka anitikasike ánígasimó nene Izesuni agulizatokó monó nagamí hilinamóza, Ómasímini Sikalahú nene monó nagamí hila vegenatoka limitive liki Ómasiloka linamamó nenazo, Sikalahú nene keitoka velesá lemémigo hanuva niago ánígasimó.

* **8:3:** Apo 22:4-5, 26:9-11

¹⁷ Lá okago, aposolo keza gotító kigizani milikasigo, Sikalahú nene keitoka limimó.

¹⁸ Lá okago, Saimon nene áingoake, keitoka moni alitáihe loko aleko vike,

¹⁹ ve makolímimi gotolaló nigizani molokugo Sikalahú limitive liki zámuza lekelitoka nekoma makó nimilizo.

²⁰ Loko lo kemekago, Pitá láá loko lo amimó: Ómasímini zámuza hanuva lemeaká netá nemóza géisi monitunú meina hizitove loko nolape. Nenemú geza monikagi voko lokú latila inogo ane.

²¹ Ómasímo geí gigika ánigamó nene monó nominazo, monó hoza nalusimó nene aleminogo ane.

²² Golesa netaka ale ahulokoko gigika ale viligoko Guivahanímo gigikatunú netá golesa alitove loko nogeleni netá ahulogetative loko amuza moloko aitoka lozo.

²³ Gigikagú golesa netá ekesalagi minoake gelémo golesa okago gelekuve.

²⁴ Loko lokago, Saimon nene nenikumule liki nilasi netá nenitoka utó amitive liki Ómasiloka lilizo, loko lo kimimó.

²⁵ Aposolo nenetosa Guivahanímini gakó liki Guivahani oko moloko i gakó li kimikasike, Zelusalega atiginá iki nivasike Samalia apá mukitoka nene gakó lamaná li kimi kimi iki mihina asimó.

Pilipoko Etiopia mikasigutí agulizaki vego

²⁶ Lá niasigo, Guivahanímini ageló makolímo Piliponi láá loko lo amimó: Geza Zelusale numutoka ahulokoko ezega agilikaloka Gaza apatoka lomo noi gapoló mikasi gomopalaloka nene lomoko vozo.

²⁷ Loko lo amekago, Pilipó nene oteake lomoko vimó. Novigo, Etiopia mikasigutí agulizaki ve makó minamó. Eza Etiopia vegenalitini agulizaki vená napa Kataké ave liki liaká a vená nene gelekelé otoko minake aí moniló gizapa otoko minoaká imó. Eza Zelusalega Ómasímini monó linogo iteake,

²⁸ atiginá oko nolimike hosi izate gelelehá iaká a kaligú iteake novike, Ómasímini agepagutí gakó loaká ve Isaiá luhuva giza gakó nagatago,

²⁹ Sikalahulímo Piliponi nene voko kali volane vo agupeló vozo.

³⁰ Loko lokago, Pilipó nene ololu loko áminaloka vimó. Vike Isaiá giza gakó nagatago geleake loká otake gakó nagatanimómámini mogonáa gelenape.

³¹ Loko lokago, ve makolimo lo utó oko lo nememitimó nene, mogonáa nana oko gilitove. Loko loake, imanegú iteko minoko lo nimitane loko Piliponi lo amekago, kaligú itekago, makó minasimó.

³²* Lá niasigo monó gotolagutí gata gakó lá oko minamó:
Sipsip iza kipilinigi aliliki nivago zohenené lisá amave.

Sipsip izatini zopova nihukago gopaga lisá amave.

Ezagi ámináminoko géneka loko gopaga lamive.

³³ Miluma netá alimiakte avozagi netá lilí imiakte

aí lihima nomító hanuvamú goní hoza amemole.

Mikasigú minoko aleko i gamena nene hukitamó nenazo,

oko moloko noigo ánigi mina vegenalitini lihimáini nene ve makolímo gato asú aminogo ive.

³⁴ Loko mina gakó nene gatoake, agulizaki vemámo Piliponi láá loko loká otamó: Geza lo nemezo, gilitoze. Ómasímini agepagutí gakó loaká vemámo éahikumú nolive. Ezáamú nolihe itó ve makokumú nolive.

* **8:32:** Isa 53:7-8

35 Loko lokago, Pilipó nene ámina monó gotolaú gakó apí oko loloko vike Izesuni monó gakó nene miní ameko lo utó oko lo amimó.

36-37 Lá ikasike viki nagamító anitesimó. Anitikasike agulizaki vemámo láa loko limó: Ánígozo. Nagamí imane nenazo, hize lí ogetati netá nomikoma monó nagamí holonetatane loko noluve.

38 Loko loake, hosi izama pasimozo lokago, pasimikasike, Pilipoki agulizaki veki keza nagamikú lemesimó. Lemesike Pilipó nene nagamí holotamó.

39 Lá ikasike nagamikutí itesimó. Itikasigo, Guivahanímini Sikalahú nenémo Piliponi alémoko vokago, agulizaki vemámo goha aí ánígamimóza, gapoló novike agoliza vizitímo Pilipó legesó ikumú nene miluma gelemimó.

40 Itó Pilipó nene galinali Azoto numutoka nouve loko geleake, monó gakó nene numutó namató lo keme keme oko vike Sisalia numutoka anitimó.

9

Sauló agika ale viligamó (Apo 22:1-16; 26:12-18)

1 Lá noigo, Sauló eza Guivahanímini vegenala zuha kipilinogo lovaga lo kimike guguni giziaká a vetini ve napa noitoka vike láa loko lo amimó:

2 Izésu vi gapoló amegesaló miliki vina vegená vehe venape nániginake kalapusi kemeko kelémo-loko Zelusale numutoka atove loko luhuva netá gizokoko nemekako nene aleko vinake Tamasiko numutoka monó numukú gizapa vegená kimitove loko noluve.

3 Loko lokago, luhuva netá gizoko amekago, aleko Tamasiko numutoka vimó. Voko ámina apá ale alitokago, okulumakutí lapaná galinali aitoka limike hizekago,

4 mikasigú pou loko akoake gakó makó lá oko gilimó: Saulo, Saulo, nanamú gopoguni nomolonetane.

5 Loko lokago, eza Guivahani geza éagama nolane loko lokago, eza lo amike limó: Gopoguni molonimiaká noani ve neza Izesunama noluve.

6 Otezo, taoni napagú itekako, netá matá loló itanimó nenémini gakola li giminigi aze, oteoko aló tovozo.

7 Loko lokago, Sauloki makó va vegenalite vegenaláa agupeló ánígamamóza, gakola ligo anoláagó giliaké kegepa gahava nomigo minamó.

8 Lá okago, Sauló eza oteake ánígamó agómula mota golesa okago, netá matá ánígamimó. Lá oko ánígamigo, vegenala zuhate agizató aliki alími Tamasiko numutoka vámó.

9 Lá ikago, nenenloka gamena losive makole nene agómula pulusamigo nosánetaki nagamiki namike, hanuva ako minamó.

10 Lá okago, Tamasiko numutoka nene Izesuni gelekelé veva makó minamó, agulizá Ananiá. Guivahanímo vamotoka sele lokago, eza Guivahanímeká, imane nouve lokago,

11 Guivahanímo miní ameko láa loko lo amimó: Geza otekoko gapo makó agulizá hee lo mina gapoló voko Zutani numukú iteko Taliso numutotí ve makó agulizá Sauló loko noi vemú nene vitagá oko ánígozo. Eza Ómasiloka agepoka loko noive.

12 Áisi nene vamokitana netá lá oko ánígokave. Ve makó agulizá Ananiá ave loko noi vémo numunagú iteake goha agómula goloutative loko agizani nene gotolaló moloko Ómasiloka noligo ánígoake Ómasiloka nolive.

13 Loko lo amekago, Ananiá láa loko limó: Guivahanínemaka, ámina vemú gakola avetó iaká niago gelenou vemú nolaninae. Áisi nene Zelusale numutoka vegenaka zuhamaka kelémo golesa palasa oaká noive.

14 Itó imaneloka guguni giziaká a ve napa nenete geí gugulizá alina vegená nene nagá zeko kelémoko Zelusalega nagá numukú ahuloketative liki litina vema nenaе.

15 Loko lokago, Guivahanímo láa loko lamoko hanuva vozo loko limó. Ámina ve nenémo nigizani luhuva nene hetoka vegenaki kugulizaki ve napagi Isilae vegenaki keitoka lole ale oko minative loko alémo etó okuve.

16 Lá noiko nénisi nene nugulizakumule loko miluma netalímini amupiló iteko minative loko alapizinogo uve.

17 Loko lo amekago, Ananiá nene vike Zutani numunagú vo aniteake numukú itike Sauloni ánigoake agizani nene gotolaló moloake Sauló nigrívénega, gapoló noako Guivahani Izesú utó o gimi vemámo goha gogómula goloutokiko Ómasímini Sikalahú nene lemeko gigikagú mino vaí itive loko nimiselekago nouve.

18 Loko noli agepagi galavizakitana netá nene agómulagutí alemó zekago, agómula goloutokago oteake monó nagamí holamó.

19 Holokago, nosánetá noake amuza goha molamó.

Sauló Tamasiko apatoka monó gakó lo kimimó

Lá oake, Sauló nene Izesuni vegenala zuhagi gamena lagasó Tamasiko numutoka nominake,

20 litá oko Zuta vetini monó numukú iteko Izesuni gakola like Izesú nene lamaná Ómasímini gipala noive.

21 Loko lo kemekago, ámina gakó gele vegená mukilite láa liki lamó: Zelusale numutoka ámina agulizá noli ve amegesaló mila vegená kelémoko golesa galasa i vema nehe. Áisi ámina oko imaneloka nagá kemeko kelémoko loko Zelusale numutoka guguni giziaká a ve napa niatoka vinogo noamómá neve. Nana oake ale noviligave.

22 Liki kagata losi nigeleke lamóza, Sauló nene amuza moloko vova vova oko minake Izesú nene gologí oletative loko lo mololeta vema noive loko Tamasiko numutoka Zuta ve minamoláa ale guni oko lo kemekago, kegepa gahava nomigo minamó.

Apilinigi niago Sauló golisi vimó

23-24 * Lá iake Zuta vete Sauloni apili hilinigi li hukiake, únaká neteká numuni gatetó nene gohoni gohoni nimilago, Sauló nene gakó geleake lokago,

25 vegenala zuhate nene holugú gosúveha makó aliake lohusi iake áminagú Sauloni ahulimiake geisa hetoka ahelú i ahulikago, lemeake mikasi makotoka golisi vimó.

Sauló Zelusalega anitimó

26 Alika Sauló vike Zelusalega aniteake Izesuni vegenala zuhaloka miní amitove lokago, Izesuni izegipala loló imó nene gili guni amake aikumú kehelele vizimó.

27 Lá okago, Panapasí nene ale gímizeake alémo-loko aposolo niatoka vike Sauló nene gapoló Guivahani ániga gakó itó Guivahanímo lo ami gakó itó

* 9:23-24: 2 Koli 11:32-33

Tamasiko numutoka Izesuni gakola ale akutoko lo kimi gakó nene avetó oko lo kemekago, giliake

²⁸ kezagi Zelusale numutoka miniki aliki amó.

²⁹ Lá ake, Sauló eza Izesuni gakola nene alegesá legemigo vegená lo kemeaká imó. Lá oake, ezagi Zuta ve lugáa Kiliki gakokutí liaká a vegenaki monó ligili hagili ake pelevesa ziake ámina ve nenete Sauloni apele hilitune likago,

³⁰ agive keza giliake, alímiki Sisalia apatoka limiki ahulimikago, eza vike ezáa gotó apatoka Taliso numutoka anitimó.

³¹ Lá okago, monó gele vegená Zutaia itó Galilaia itó Samalia mikasiuka minamoláaloka nene nonagá iki minamó. Hulu utó okago minake, Ómasímo zámuza kemekago, gakola gili aliake, némini manámimi amake Ómasímini Sikalahulímo hize lé okimikago, hizi hutilí iki minamó.

Pitá Aeniasini alémo zokamó.

³² Pitá nene Izesuni vegenala zuha ániganogo mohona oko vike, Lita numutoka lomo voko anitimó.

³³ Aniteake, nenenloka ve makó ánigamó, agulizá Aeniasí. Áisi ve gepili loake, holomaló akonoigo, kilisimasi 8-ía oko vimó.

³⁴ Lá okago, Pitá láa loko lo amimó: Aeniasizo, Izesu Kilistó gelémo nozokaze, oteoko, avilisaka gakezo. Loko li agepagi oteake avilisalagi gakeko aleko vimó.

³⁵ Lá okago, Lita numutoka itó Salona numutoka nia vegená mukilite ániwake kigika ali viligiake, Guivahaniloka viki gímizemó.

Tolokasini heleneikutí alémo otimó

³⁶ Lá ikago, Zopa numutoka Izesuni vegenala zuhagutí vená makó minamó, agulizá Tapitá, itó Kiliki gakokutí nene agulizá Tolokasí. Eza netá gihila mukí loló ike vegená ámemena ámamana nasahilí oketoko minamó.

³⁷ Lá oake, nene gamenaló netá makó avisekago hilimó. Helekago, gonsiváa nene nagamí ziake, aliki itiki numuni amupiló makó ginakú nene ahulamó.

³⁸ Lá amó nene Lita numuni nene Zopa numutotí alító nego, Izesuni vegenala zuha keza Pitáma Litaga noive lamó giliake, ve lositá kimisilikago, áminaloka vasimó. Vasike Pitani nene voká liki gezagi litá oko lelí numutoka vitune loko nolusive.

³⁹ Liki li amikasigo, Pitagegi makó vamó. Viki gonosima milinakú nene alímiki itemó. Iteko ánígamó nene, getokó getokó ali nupa iake ive nama ake, Tolokasí nene agómulagi minake gó haitopaitolímini akotoketamó nene alapizi asú amó.

⁴⁰ Lá amóza, Pitá nene kimisele hetoka oake alapusa hizike Ómasiloka limó. Numuna lo asú oake, gonosima agovisa o amike Tapitazo, geza otemané. Loko lokago, agómula goloutoake, Pitani ánígoake, ote minamó.

⁴¹ Noigo, Pitá nene agizakú aleko alémo otimó. Lá oake, vená getoki Izesunimú gili alévolé a vegená lugáagi sele lo kemekago, itiki ánígamó nene heleneikutí oteake noigo ánígamó.

⁴² Lá ikago, nenémini gakola nene Zopa numutoka hutilí oko vokago, mukí vegonelite Guivahanimú gili alévolé amó.

⁴³ Lá ikago, Pitá nene ve makó pulumaká iza galupava ale lamanatamaná oká i ve Saimoni numukú voko minamó.

10**Pitako Koneliasiko**

¹ Sisalia numutoka ami vetini gizapa ve makó minamó, agulizá Koneliasi. Ezra Italia mikasigutí ami ve 100 keí gizapa véini minamó.

² Eza Ómasimú alévolé oko geleko minoaká i ve monó gizapa ve minake, izegipa agunalagi Ómasi geké litiki minake, Zuta ve ámemena hize lé oketoko minake, Ómasiloka gamena gamena loko minamó.

³ Koneliasi eza nenéminoko minokago, gamena makó zupa nene ho ale zohota noigo, Ómasímini ageló makolímō vamotoka agulizá oko sele noligo, eza ánigo hee loko ánigamó.

⁴ Gisili hizeko ánigoake, ininá oake Guivahanínemaka, nana íve loko lokago, áisi lo amike limó: Ómasiloka loaká ani netá itó ámemena hize lé okimiaká ani netáma Ómasiloka itekago gele lamaná okave.

⁵ Nenemú geza ve makó kimiselekako Zopaga viki ve makó Saimon agulizá gosohá nene Pitani alímiki atave.

⁶ Aí apolaho iza galupava ale lamanatamaná oaká vémini numuni age nagamí gahevaloka nekú noimóma alímiki atave.

⁷ Loko agelolímō lo ameake vokago, gelekelé izegipala losi itó ami vegutí nasahilí otoko mina ve Ómasimú alévolé oko geleko minoaká i ve nene sele loake,

⁸ gakó akó lo kemeake kimiselekago, Zopa numutoka vamó.

⁹ Akiake gó lokago, vake apáma ali alitanigi ago, holisaká Pitá nene numuni amupiló ginakú iteko Ómasiloka loake,

¹⁰ gaúna olokago, avonana vizekago akonoike nosánetakumú lokago, vatá iki ali vatí nitago, agómula molatohe loko noike netá makó lá oko ánigamó.

¹¹ Okulumá koló okago, netá makó lavolavo gizopa napa lohusi oake nagá alehá nene mikasigú ahelú okago nolimigo ánigamó.

¹² Áminámini agikagú nene gaha nama iza gala haitopaitolímīni Zuta vegetalite namó namamó gopánapa netá nego ánigamó.

¹³ Lá okago, áminagutí nene gakó makó lá loko utó imó: Pitazo, litá oko kepeleko namane.

¹⁴ Loko lokago, Pitá limó: Guivahanínemaka, lá oko nomive. Neza mosehá netá ligika ale golotuva loaká netá nene gopa nosá amuve.

¹⁵ Loko lokago, anotó aleko lá loko limó: Ómasímo loko nagamí zenei netá nene géisi ma moseminogo ane.

¹⁶ Loko lokago, ámina gakó nene gamena losive makole likasigo, litá oko lohuvagi gelelehá oko okulumakú iteko vimó.

¹⁷ Lá okago, Pitá nene nogómula molatohe loko nouke vamó itína ániguhe loko giligo gena imó. Lá okago, noigo, Koneliasi kimisili ve keza Saimoni numunímú lokatoká iki vake, ali utó iake, gatetó minake,

¹⁸ sele liki lamó: Saimon agulizá gosohá Pitá loko ne vema imane numukú noihé.

¹⁹ Liki loká niago, Pitá eza vamotoka gosohá netá ánigamó nene agata geleva geleva oko noigo, Sikalahulímō lá loko lo amimó: Ve losive makolete geikumú vitágá niave.

²⁰ Nénisi kimiselekugo niaze, geza lemeko Zuta ve niagopa hetoka ve niakumú gagata losi gelemoko kezagi makó vilo.

21 Loko lokago, Pitá ve niatoka lemeake nenikumú vitagá nitamó nene imane nouze, nanamú niave.

22 Loko lokago, ve keza láa liki li amemó: Ami ve 100 keí gizapa ve Koneliasí áisi agika lamanaki ve Ómasimú alévolé oko geleko minoaká i ve nene Zuta vegená mukilite ánigi lamaná nia ve noive. Ómasímini ageló makolímo gakó makó lo amekago eza limiselekago, geí gelémoko aí numutoka vokuko, gegepagutí gakó lo lemekako gilitune loko noune.

23 Liki likago, Pitá nene kelemo numunagú molokago akamó.

Akiake gó lago, Pitá nene Zopa numutokatí agivegi makó vamó.

24 Viki gapoló akiake, gó lokago goha viki Sisalia numutoka anitiake, Koneliasí nene vegenala zuhagi zogovagi kelémo nupa oake kegeva iki niago, ánigamó.

25 Lá iake, Pitá nene numunagú itimó. Itekago, Koneliasí ake agisauka agihúna geake gupá zeko gekévaké lotamó.

26 Lá omikago, Pitá alémo oteake lá amoko otezo, neza nene vegenáma nouve.

27 Loko lo amekago, ligili hagili ikasike, vegená mukí alegesá iki mina numukú itesike

28 Pitá nene láa loko lo kimimó: Lekeza Zuta ve lelí mogona mota gilinave. Lezagi Zuta vegená niamamolagi nonagá oko apizeko minamitune liki li hukinamóma nemóza, vegená makokumú móina ve loko loketamo loko Ómasímo mogona nelepirizeko lo nemekago gelekuve.

29 Nenemú lekeza nenikumú sele-sele likago, gena amuke okuve. Itína sele lamó nenémini mogonáa likiko gilitove.

30 Loko lokago, Koneliasí lo amike limó: Neza sene ho ale zohota noigo, Ómasiloka noluke ánigumó nene, ve makó ginegane agovisámo lapetapé oko minamó nenémo nenitoka omo anitekago, ániguve.

31 Nánigugo láa loko lo nimive: Koneliasizo, Ómasiloka lanímó itó vegená ámemena hize lé oketanike noanimó nene Ómasímo mota gele lamaná okave.

32 Nenemú geza vegená kimiselekako, Zopa numutoka viki Saimon agulizá gosohá Pitani alímikatave. Áisi nene apolahini numukú pulumaká iza galupava ale lamanatamaná oaká vémini numukú age nagamí gahevaloka noinogo ive.

33 Loko lo nemekago, nenemú litá oko kimiselekugo, geitoka vikago geza gakóna gelekanike okako mulúnegú lamaná gelekuve. Itínasa nene Guivahanímo logeta gakó nene lokako gilitune loko Ómasímini avogisaló alegesá oko imane noune.

Pitá Koneliasini numukú monó lo kimimó

34 * Loko lo amekago, Pitá láa loko limó: Ómasímo mukí vegená lelí lugupelokamú giligo iteká lemeká osá amive. Nene mota gelenouve.

35 Numutó namató vegenalite Ómasimú goliva giliki etati netá aliki minata vegená mukikumú giligo hamó lelegitokó neve.

36 Isilae vegenatoka gakó lamaná amisilímó nene lekeza mota gilinave. Izesu Kilistó eza vegená mukilitini Guivahani noi vemú gelekuko ligikagú hulu iti gakó nene,

37 Zoni apí oko monó nagamí hilatave loko lo utó oko lo kemekago, Zutaia mikasiloka li hutilí amóma neve.

38 Itó Ómasímo eza Sikalahula amiselekago, Nasalete numutotí ve Izesuni amatoka minake zámuza amekago, Ómasímo alémo vatí igo, Izesú nene mohona mohona ike hoza gihila alike Satá kelémo golesa galasa oko minoaká i vegená kelémo lamanatamaná oko mina gakó nene lekeza mota gilinave.

39 Itó Zuta ve lelí mikasiukagi itó Zelusale numutokagi oko moloko ike alimó nene ánígoko gelekune. Lá onouko, zohota zaló apilikago hilímóza,

40 heleake noigo, gamena losive makole oko vokago, Ómasímo galegutí goha alémo otimó. Alémo oteake alémo utó molake lelepizigo, ánígonouháma neve.

41 Mukí vegenalite Izesuni ánígamamóza, heleneikutí oteake ezagi apiziki gitigiki niki miniaká a vegená Ómasímo lelémo etó i vegenaláagó leza ánígonouháma neve.

42 Itó Ómasímo lo molató gipala Izesú nene logómulagi vegenaki hele vegenaki gona mololetati ve loló i gakó nene vegená li utó iki li kimitave loko Ómasímo loletonoimóma neve.

43 Ómasímini agepagutí gakó liaká a ve mukilité ámina vémini gakoláa luhuva gizinamó nene lá oko neve: Aikumú gili alévolé ita vegená nene Ómasímo Izesukumule loko lihimáini ahuloketanogo ive, loko limó.

Ómasímini Sikalahú hetoka vegenató limimó

44 Pitá láa loko noli agepagi giliki mina vegenatoka Ómasímini Sikalahú limimó.

45 Lá oko limimó nene Ómasímo Sikalahú nene hetoka vegenatokagi lehizekimikago,

46 haitopaitó konokutí liki Ómasí agepoka nilago, giliake Zuta vegenakutí Izesukumú gili alévolé a ve Pitaki makó a vete sigaga likitamó. Lá ikago, Pitá láa loko lo kimimó:

47 Goí oko lelitoka Sikalahú limimó ámina oko imane hetoka vegenatoka lemekave. Nenemú monó nagamí holoketamitunimó nene etaminogo ive.

48 Loko loake, lo kemekago, Izesu Kilistoni agulizató kilími milake monó nagamí hilikitamó. Hilikimiake, Pitá nene gamena luguhá kezagi minoko aleko itive liki likago, makó minamó.

11

Pitá Zelusale numutoka gakó avetó oko lo kimimó

1 Lá okago, hetoka vegenalite Ómasímini gakotó miní ame gakó nene puu loko vokago, aposolo lugáagi kigive Zutaia mikasiuka minamoláagi keza gelemó.

2 Nenemú Pitá nene Zelusalega atiginá oko tovokago, Zuta vegenakutí Izesuni nagá minamoláate aikumú gelemó gena okago, gahá nameke,

3 láa liki li amemó: Geza nanamú Ómasímini anosa kugupeloka minami vegenatoka voko kigizakutí nosá noaká noane.

4 Liki likago, Pitá nene Koneliasitoka utó i gakó nene mogonagutí apí oko ale mesamá oko lo kimike limó:

5 Goí oko neza Zopa numutoka Ómasiloka loko nougo, novonana vizekago, vamó netakutí láoko ánígumó: Netá makó lavolavo napagitana nene lohuvagi nekisaloka nagá aliake okulumakutí ahelú ikago lemeko nenitoka anitimó.

6 Anitekago, ánigo gisili hizeko ánígumó nene, agikagú gaha nama iza gala haitopaitolimini agisa agizani nemó nomimó nego ánígumó.

7 Lá okago, nenitoka gakó láa loko anitimó: Pitazo, otekoko kepeleko nozo.

8 Loko lokago, neza láa loko lumó: Guivahaníinemaka lá oko nomive. Neza ligika ale golotuva loaká netá nene gopa nosá amuve.

9 Loko lokugo, okulumakutí Ómasímo gakó makó miní ameko láa loko limó: Ómasímo loko nagamí zenei netá nene géisi ma moseminogo ane.

10 Loko gamena losive makole nene ámina gakó lokusigo, gelelehá oko okulumakú iteko vimó.

11 Ma gilinagalo. Ámina netá asú noigo, áminasító Sisalia numutokatí ve losive makole lélii nouhatoka alesa iki anitemó.

12 Anitikago, Sikalahulímo láa loko lo nimimó: Geza ámina vegi hetoka ve niakumule loko makó vinogoma gena givisemino. Loko lokago, kigive 6-a kezagi vuniike ámina ve kimisili vémini numukú itekuko,

13 gakola láa loko lo limimó: Není numukú agelolímo iteko utó oake geza ve makó kimiselekako Zopa numutoka viki Saimon agulizá makó Pitá ave loko noi ve alímiki ikiko,

14 gezagi izegipa gugunamotamoki Ómasímo lukugutó viziti gakó lo leke-mekiko, lamaná inigave, loko lo nimimó.

15 Nene gakó lo nemekago, monó nene apí oko lo nokumugo, Ómasímini Sikalahú goí oko lelitoka limimómáminoko keitoka limimó.

16* Lemekago, ánigouke, Guivahanímo Zoní nene hanuva nagamí hololeketamóza Ómasímo nene Sikalahula hololeketanogo ive loko amunaloka li gakó nene goha nagata gulumó.

17 Leza Guivahani Izesu Kilistokumú gele alévolé okuko Sikalahú lehizeletamómáminoko keitoka limimó nenazo, neza ánéamina Ómasí pelevesava zetamosala nouve.

18 Loko lo kemekago, keza giliakte, kigikaú hulu okago, Ómasí agepoka liki láa liki lamó: Oho, Ómasí eza hetoka vegenaki kigika ali viligiiki alévolé kemetameki lilí itave loko gapo velekimikamóma neve, liki lamó.

Atiokia numutoka gili alévolé amoláa

19* Setepanoni apili hilikago, Izesukumú gili alévolé a vegená nene gopoguni milikimikago, keza golisi hutilí iki vake Pinisia mikasiuka itó Saepalasi mikasi pokolaloka itó Atiokia numutoka viki Zuta vegenakó monó li kimi kimi iki minamó.

20 Lá niago, holíkú Saepalasi pokolagutí itó Sailini apatokatí gili alévolé amoláa lugáate nene Atiokia numutoka aniteke Guivahani Izesuni monola nene Zuta vegenaki hetoka vegená lugáagi li kememó.

21 Li kimikago, Guivahanímo zámuza kemekago, vegená mukilate giliakte kigika ali viligiakte Guivahaniloka viki gímizemó.

22 Lá ikago, ámina gakó nene Zelusalega vokago, monó gele vegenalite giliakte, Panapasini amisilikago, Atiokia numutoka vimó.

23 Vo aniteake, Ómasímo hize lé oketamó nene ánígoko lamaná geleake, Guivahaniloka kigika mili alévolé itave loko kagata alimó.

24 Panapasí nene agika lamanaki ve Sikalahú nene lemeko agikagú mino vaí okago, vegená mukilate giliakte, Guivahaniloka miní amemó.

* **11:16:** Apo 1:5 * **11:19:** Apo 8:1-4

25 Lá ikago, Panapasí eza Sauloni ániganogo Taliso numutoka vimó.

26 Voko ánigoake, Atiokia numutoka alémoko vokago, monó gele vegenaki ali nupa iki minikago, vegená mukí nene monó apí i kimi kimi iki niasigo, kilisimasi hamó oko vimo. Oko novigo, Atiokia numutoka Izesuni vegenala zuhamú nene Kilistoni zuhave liki apí iki kugulizá milamó.

27 Gamena nene zupa Ómasímini agepagutí gakó liaká ve makó nene Zelusalegatí Atiokia numutoka lemeke,

28* keitokatí ve makó agulizá Agaponi nene Ómasímini Sikalahulímo alémo vávani okago, oteake, numutó namató gaúna napa hilita gakó lo utó oko lo kimimó. Lo kemekago, alika nene agulizaki ve napa Loma apatoka minamó, agulizá Kalautió nene, gizapa oketonoigo, ámina gakó nene alévolé imó.

29 Lá okago, Atiokia numutoka Izesuni vegenala zuhamate ámina gakó giliake, kigive Zutaia mikasiloka minamoláaloka moni mina avotigila oko ale nupa oko kimitute liki li hukiake,

30 ali nupa iake Panapasinigi Saulonigi nene kimikago, keza aliki viki Zelusalega monó olotiva ve nene kemesimó.

12

Zemusini apili hiliake Pitani kalapusí amemó

1 Gamena nene zupa agulizaki ve napa Heloté nene Izesuni vegenala zuha lugáa nene lova ale kimike,

2 eza lokago, Zonini uvolahlo Zemusini luvana hukamó.

3 Lá ikago, Zuta vegenalitini monó gizapa vete gili lamaná ikago ánigoake, lá itave loko lokago, Zuta vetini avóikini asenini zeketakumú gili mina holisígú Pitani nene nagá numukú alími milamó.

4 Ámina holisi asú okiko Zuta vetini kigizakú molokugo goní imiiki apili hilitave loko geleake, agizató aleko nagá numukú alémo moloake, losive losive iki gizapa itatave loko pilisi ve 16 kelémo molamó.

5 Lá okago, Pitá noító nene alévolé iki gizapa iki niago, Pitá nene nagá numukú akonoigo, Izesuni vegenala zuha keza Ómasiloka alévolé iki numuna nilago, te te oko minamó.

Nagá numukutí Pitani gologí otamó

6 Lá onoigo, Heloté eza gó lokiko Pitani nene Zuta vegenalitini kigizakú molati gamena alitokago, ámina holugú Pitani agizani lugaloka pilisi vémini agizatoka seni nagatunú zemó, itó agizani lugaloka nene maga vémini agizató zemó. Lá iake akinago, gizapa ve lugáa nene gatetó gizapa iki minamó.

7 Lá niago, Guivahanímimi ageló makolímo galinali utó oake noigo, nagá numuni agikagú nene lapaná lo asú imó. Lá okago, ageló nenémo Pitani agahaisiló zeko alémo oteko litá oko otezo loko lokago, Pitá otimó nene agizakú seni nagá apasomó zekago,

8 ageló nenémo holotakama ale zekoko gigisaló suú ale luhozo. Loko lo amekago lá okago, goha lo amike limó: Goka hánama ale luhokoko némegetoko ano.

9 Loko lokago, agelolímo oko moloko imó nene gele guni amike vamó nániguhe loko nogilike ámegetamó.

10 Lá iki limiki gateni makotó pilisi ve niago kiviligikasike gateni makotó ámina iki niago kiviligikasike, apá napaló vegegisae aenitunú atagamó nene

* **11:28:** Apo 21:10

ezá gahe segeake koló okago, limikasike gapoloka nivasike, agelóma tolova imó.

11 Lá okago, Pitá nene agata kolosokago, láa loko limó: Mota gelekuve. Guivahanímo ageló makó amisselekago, limike, Heloteni agizakutí itó Zuta vegenalitini gizapa vetini mukahakutí gologí onimikave.

12 Loko Pitá nene geleake, Zóní agulizá napa nene Makí ave loko noi vémini izolaho Maliani numutó vo anitimó. Ámina numukú vegená mukí alegesá iki minake Ómasiloka liki niago,

13 Pitá nene gatetó hoko-hoko lokago, gelekelé mohó makó agulizá Loté nene éaho hoko-hoko nolihe loko lemeko

14 gatetó nene Pitani anó lupamú geleake, gahe segemike agoliza napa vizitimo ololu loko iteko Pitá nene oko gatetó noive loko lo kemekago,

15 áminagú mina vegenalite giliake gigika hize lí okago nolape. Liki li amikago, áisi nene Óe, negiga lamuve, áisima gatetó noigo noluve, loko lokago, keza vogunámo noitive.

16 Liki nilago, Pitá nene hoko-hoko lokogó noigo, gahe sigiake ánigamó nene Pitá noigo ánigiake, kegepa gahava nomigo ininá amó.

17 Ininá ikago, gakó lamitave loko agizanitunú avevezaha o kemeake, numukú itemike, Guivahanímo nagá numukutí gologí oko alemo hetó i gakó nene avetó oko lo kemeake láa loko limó: Lekeza imane gakó viki Izesui agunala Zemusini itó monó gele vegená lugáa li kimilo loake, olío hizeko apá makotoka vimó.

18 Lá okago, akiake, gó lokago, pilisi ve keza Pitakumú vitagá amó nene nagá numukú noamigo, Pitani nana itave liake, negi-nagi hizeke lova leta lava leta iki minamó.

19 Lá ikago, Heloté nene vitagá itave loko lokago, vitagá iha iha alími utó milamago, pilisi ve nagá numuni gizapa vema loká miká okimiake, kipili ahuli ahuli itave loko lo hukoketamó. Lá oake, Heloté nene Zutaia mikasi ahuloake Sisalia numutoka lemeko minamó.

Heloté hilimó

20 Nene zupa nene Tulo vegená itó Sitona vegenakumú Heloté izapaló molokago, lova ale kimimó. Lá okago, ámina apá amelage keza Heloté noitoka imi asú iake, Heloteni gizapa veva makó agulizá Pilasító ave loko noi ve agata alikílikago, eza agulizaki ve napamaloka voko gakóini nene láa loko lo amimó: Keza nosánetá ale nómónó ituni gapo hukokaninazo, gelémo hulu itune liki ikave.

21 Loko lokago, Heloté nene gakó lo kimitove loko gamena molamó nene alitokago, vegená mukí iki niago, eza kugulizaki vetini gonanalivagi gó ale luhoake, golivagi siató iteko minake, gakó hána hána like gakó lo kimimó.

22 Gakó lo nokimigo, vegená mukilite gakó napa lake vegenalitini konó lupa nomine. Ómasi makolímini anó lupa neve.

23 Liki likago, géneka lamike nenikumú gekévaké lamiki Ómasi hamokó geké litalo loko láa loko lamigo, Guivahanímini ageló makolímo galinali anitike lokago, ámina vémini agupegú ginini hizekago hilimó.

Panapasiko Sauloko

24 Itó Ómasímini gakó nenémo hutílí oko puu loko mukí apatoka vimó.

25 Lá okago, Panapasiko Sauloko keza Zelusalega goí iki moni kimiki kimisele hoza kememó nene ali asú ikasike Atiokia apatoka atiginá iki vinigi niasike Zoní agulizá napa Makini nene alímiki makó vamó.

13

1 Atiokia numutoka Ómasímini vegenala zuhatini holúikú Ómasímini agepagutí gakó liaká a vegi monó apí i kimiaká vegi minamó, kugulizá Panapasí itó Simeó agulizá makó Anupavé, itó Lukío eza Kulena apatotí ve, itó Manaé, ezagi gizapa ve Heloteki ganagana minimi niteki napa asi ve, itó Sauló.

2 Gamená makó zupa monokumule liki nosánetá mosiki minake monó numukú alegesá iki numuna nilago, Sikalahulímo gakó láa loko limó: Panapasiko Sauloko keza monó hoza alitáive loko loketumó nene nenikumule liki kilími gapo ilo.

3 Loko lokago, nosánetá mosiki minake Ómasiloka lake kigizani nene gotító milake lusa gikimiake, monó hozaló kimisilikago vasimó.

Aposolute Saepalasi mikasi pokolagú monó li kimimi vasimó

4 Ómasímini Sikalahulímo lá okimiakte kimiselekago, vasike Selusia numukú limiviki vasimó. Vi anitikasike sipigú itikasike viki Saepalasi mikasi pokolagú anitesimó.

5 Apá gotola Salamisi naneló viki Zuta vetini monó numukú itiki Zoní agulizá napa Makí áisi kelémo vatí igo Ómasímini gakó li utó asike li kemesimó.

6 Lá ikasike pokolagú mihina i asú iake Papo numutoka anitemó. Neneloka Zuta ve soza saza lusa geeká i ve soza monó lole ale ve minamó, agulizá Pala-Izesú.

7 Nene vémo kiapé makó Selegió Pauloni apolaho agata koloso mina veloka hoza aleko minamó. Kiapé nenémo Ómasímini gakó gilinogo Panapasiko Sauloko alesa molo kimimó.

8 Alesa molo kemekago, soza saza lusa geeká i vémo agulizá makó nene Elimasí eza kiapémo giliko alévolé okative loko zevo hukovo oketamó.

9 Lá okago, Sauló agulizá gosohá Pauló eza Sikalahulímo lemeko agikagú mino vaí oake alémo vávani igo, Elimasini gisili hize agupe oake,

10 láa loko lo amimó: Géisi nene Satani gipalamaka netá lamaná lova ale ameaká ve nene ka, soza saza gakolímo gigikagú vaí oko minamó geza Guivahanímini gapo hize lí okanike ale gopa napa oaká noani netá nene nanahé ahalatane, olo.

11 Nenémú imane Guivahanímini zámuzámini mogona ánigatanize. Geza gogómula likokiko gamena makotó lapaná ánigamoko minatane. Loko noli agepagi agómulagú límugusi zekago, likatiká ike akaká akaká oko mohona noike nigizató alitave loko vegená sele loiaká imó.

12 Lá okago, kiapé nenémo ámina netá utó imó nene ánígoake Guivahanímini monokumú gilimó nene goliva hizekago, gele alévolé imó.

Pauloko Panapasiko Pisitia mikasiuka Atiokia numutoka anitesimó

13 Lá okago, Pauló agivelagegi keza Papo apá ahuliake sipigú itiake viki viki Pamapilia mikasiuka Pelega numutoka anitemó. Neneló Zoní ahulokimiake atiginá oko Zelusalega vimó.

14 Lá okago, keza Pelega numutotí viki Pisitia mikasiuka nene Atiokia numutoka anitesimó. Neneló niasike Zuta vetini holisígú keí monó numukú itiki niasigo,

15 keí gizapa ve keza Mosé giza gakokutiki Ómasímini agepagutí gakó liaká a vete giza gakokutiki gati kemeke gati asú iake, alesa miliake láa liki li kememó: Ligivese, lelémo kii loletati gakó makó likigikagú netimó nene likisiko gilitue.

16 Liki likago, Pauló oteake, legesó iki minatave loko agizanitunú avevezaha ike láa loko lo kimimó:

Isilae vese, lekezagi Ómasímú goliva giliaká nia vegená lugáa lekelí nene lo likimitoze, gilio.

17* Isilae ve lelí Ómasí áisi nene avotegi keza Izipi mikasiuka niago, kelémo napa napa igo, hizi hutilí amó. Lá ikago, zámuzalaló molo gelekelé ike nenelokatí kelémoko oake,

18* mikasi gomopalaló keikumú goselé apelemimó nene hanuva geheake nasahilí oketoloko novigo, kilisimasi 40 oko vimó.

19* Oko novigo, Kenan mikasigú vegená mulusi 7-a kelémo tolova oake, mikasíni nene avotegini gona moloko kemekago, ali etó etó ake alemó. Lá ikago, kilisimasi 450 oko vokago,

20* Ómasí eza gizapa ve kelémo etó omo novigo, miniliki nivago, Ómasímini agepagutí gakó loaká ve Samuelé utó imó.

21* Utó oake mino-loko itekago, vegená keza agulizaki ve napamú loká miká ikago, Ómasímo Pezamini agapilamó keikutí Kisini gipala Sauloni alémo etó okago, kilisimasi 40-a ale nahulake gizapa oketamó.

22* Lá okago, Ómasímo Sauloni viselemiake Tevitini nene agulizaki ve napa alémo otimó. Lá oake aí gakola láa loko limó: Zesini gipala Tevitikumú lagava gelekuke ánigo mulumó. Áisi nene litotoka molatotoka oko moloko inogo ive, loko limó.

23 Itó Ómasímo utó itive loko lo molató Tevitini agapilamola zuhagutí Isilae ve lelitoka lugutó viziti ve Izesuni amisilimó.

24* Vegená holúkú omo utó itive loko Zoní nene Isilae vegená kigika ali viligiiki monó nagamí hilatave loko lo utó oko lo kimimó.

25* Lá oake, Zonini ami hoza nene ale lutegeake láa loko lo kimimó: Gologí oletative loko lo mololeta vema noape liki loká inimiaká nia ve nene neza minamuve. Áisi nene alika nemegesa moloko ova ova noize, neza ánéámina hoza makó alemioko aí gasa gó ate akisitótó vo akohemuve.

26 Nigive nagavesi, Avalahani agapilamola lekezagi itó hetoka vegená lugáa Ómasímú geké limiaká nia vese, gakó litoze, gilio. Lugutó viziti gakó nene lelitoka molonoimóma neve.

27 Zelusale numutoka kugulizaki vegi vegená lugáa mukí keza Izesuni ánigi hee lamake, Ómasímini agepagutí gakó liaká a vete gizi mila gakó holisi zupa zupa gatoaká nouháma gili hee lamake, Izesuni apilitave liki li hukitamó. Lá ikago, Ómasímini agepagutí gakó liaká a vete aikumú luhuva gizina gakó nene alévolé imó.

* **13:17:** Gá 1:7, 12:51 * **13:18:** Nam 14:34; Gapo 1:31 * **13:19:** Gapo 7:1; Zos 14:1 * **13:20:** Gon 2:16; 1 Sam 3:20 * **13:21:** 1 Sam 8:5, 10:21 * **13:22:** 1 Sam 13:14, 16:12; Age 89:20 * **13:24:** Mak 1:4 * **13:25:** Zon 1:20,27; Mat 3:11; Mak 1:7; Luk 3:16

28 * Lá okago, Izesuni apilita gakokumú vitagá iake, gakola nomigo, gopa Pilatotoka viki negénegeka lago lago gele kemekago, apili helemóma neve.

29 * Lá ikago, monó gotolaú aikumú luhuva gizi mila netá nene lilí i asú ikago, zohota zalotí vínasiki aliki viki gonosi matimati geha mulikú militamóza,

30 Ómasímo heleneikutí alémo otímó.

31 * Alémo otekago, Galilaia mikasiukatí Zelusale numutoka ezagi makó tiva vegenatoka gamena gamena utó okemeká tolova oká igo ánigiaká a vegená nenete aí gakó nene li utó iaká ve lilí iki niave.

32 Itó avotegini nene Ómasímo lehizeketatove loko lo moloketa netakumú mulutikú lamaná gilita gakó láa loko lo nolukumune: Ómasímo Izesuni alémo otitove loko li gakó nenémo kagapilamó lelitoka nene mota gihila zekave.

33 * Alémo otikumú Ómasí agepoka liká nama liká a gakokutí lakani losigú láa loko luhuva gizonoimóma neve:

Geza nene gipáne noanize,

neza itínasa gelémo utó molokuve.

34 * Itó Izesuni nene heleneikutí alémo otekago, alikaloka goha heleminogo ive. Nenemú Ómasímo láa loko lokago luhuva gizo molonoimóma neve:

Neza Tevitini lehizetatove loko lo molotu netá nene lamaná lehizeleketanogo uve.

35 * Nenemú Ómasí agepoka liká nama liká a gakokutí gakó makó lá oko neve: Neza nigika lamanaki ve nounazo,

geza lanitoka nugupéa anuva aminogo ive, loko limó.

36 Tevitini mogonáa mota geleaká noune. Aí nene Ómasímo hoza gakó lotamó nene vegenala zuhaloka hoza aleloko vike ale asú oake hilimó. Helekago, avolagini gonosíni milikimiakakú milimikago, agupéa anuva oko gelesa imó nenazo, nugupéa anuva aminogo ive loko li gakó nene Tevititoka gihila zemimóza,

37 Ómasímo alémo oti vémini agupe anuva oko gelesamimó.

38 Nenemú nigive nagavese, hehe loko lo likimitoze, gililo. Ámina vémo ale utó molokamómave loko gakolímo omo lokogovisaloka noave.

39 Lihimatini nagakutí nene Mosé lo hukoko li gakolímo gologí oletosá amimóza, Izesukumú gili alévolé itamó nene lihimavatini nagakutí gologí o asú oleketanogo ive.

40 Ómasímini agepagutí gakó liaká a vete gakó makó luhuva gizinamóma nene, lekelitoka alévolé okative loko lakagata aleko lo nolukumuze, ehe, gizapa iki minalo. Láa liki luhuva gizinamóma neve:

41 * Agae, monó gili ahuliaká ve lekeza sigaga liki liki hili minalo. Lekelí gamenavatini nene hoza haitolímini alinogo uve. Nenémini gakola li likimikiko gilitamóza, gili vevesiki geleminigave, liki luhuva gizinamóma neve.

42 Itó Pauloko Panapasiko láa liki li kimikasigo, monó numukutí limiaké alika holisigú ámina gakó goha litáihe liki loká ikitamó.

43 Láa liki liake, alegesakutí limiaké Zuta vegená mukí itó hetoka vegená keza Zuta vetini monokumú gutá iki mina vegená kezagi makó Pauloko

* **13:28:** Mat 27:22-23 * **13:29:** Mat 27:57-60 * **13:31:** Apo 1:3 * **13:33:** Age 2:7 * **13:34:**
Isa 55:3 * **13:35:** Age 16:10 * **13:41:** Hip 1:5

Panapasiko kêmegetago, Ómasímini nasahilikú alévolé iki minatave liki kagata alesimó.

44 Lá ikasigo, holisi makó alitokago, ámina apá amelage Ómasímini gakó gilinigi vóvotiki anitemó.

45 Anitikago, Zuta vete keza ánigiake, kemekugú niake, Pauloni gakola pelevesava ziake Pauloni alivi galativi amó.

46 Lá ikago, Pauloko Panapasiko ali akutiki láa liki li kemesimó: Zuta ve lekelisi ató nene Ómasímini gakó ganá apí iki gilitave liki linamóma neve. Itó imane lekezatini ahuliaké alévolé kemetamenigi itune liki lamanazo, ahulolikimioko Zuta ve niamamoláa hetoka vegenatoka vinogo usive.

47* Guivahani eza nenemú nene láa loko lo letonoimóma neve:
Kugutó vízeaká gakó nene numutó namató mohona oko lo kemeleko voko mikasi nekisaloka vo asú itane loko nénisi hetoka vegenalitini liví minatane loko gelémo etó onoumóma neve.

48 Liki likasigo, hetoka vegenalite giliaké, mulúkú lamaná okago, Ómasímini gakokumú sigaga litamó. Lá ikago, alévolé kemetameki minatave loko Ómasímo geleake kelémo gizaká i vegená keza Izesunimú gili alévolé amó.

49 Lá ikago, ámina apatoka Guivahanímini gakó puu loko vo asú imó.

50 Lá okago, Zuta vegenalite apá nene loka monó vená iti minamoláagi numuni gizapa vegi gala viziake, ali apiziake, Pauloki Panapasiki gopoguka likitake, numuni apáinigutí kimisili ahulikago, vasimó.

51* Vinigi nivasike vahé miliki kigisagutí mumusopa hopó ahulikasike, Ikonio numutoka vasimó.

52 Nivasigo, Sikalahú nene lemeko Izesuni vegenala zuhatini kigikagú mino vaí okago, mulúkú agila guluma igo minamó.

14

Pauloko Panapasiko Ikonio numutoka anitesimó

1 Lá ikago, Ikonio numutoka anitesike ámina iki Zuta vetini monó numukú itiki monó lasimó nene gihila utó imó. Lá okago, Zuta vegenaki Kiliki vegenaki mukilite Izesunimú gili alévolé amó.

2 Lá amóza, Zuta vegená lugáate monó gili ahuliaké, ámina numutó nene hetoka vegená gala viziake Izesuni vegenala zuhamú gili golesa itave liki kataga alemó.

3 Lá ikago, Pauloko Panapasiko neneló gamena háná minasike, Guivaniloka leheta inasike kehelele vizemigo ali akutiki monó li kimi-kimi iki minasimó. Lá niasigo, Guivahanímo hize lé okimiaká gakolámini mogonáa ale utó molake zámuza kemekago, golivagi netá haitopaitó alesimó.

4 Lá ikasigo, ámina taoni napaló vegená hizi hoú liake, lugáa nene Zuta vegenatoka gímizemó, itó lugáa keza aposololoka gímizemó.

5 Lá ikago, alika nene hetoka vegenaki Zuta vegenaki gizapa vegi ali nupa iake aposolo alivi letivi iki gehanitunú kepele hilitune liki li hukamó.

6 Li huka gakó nene gilikasike, golisi iki Likaonia mikasigú Listela numutokagi Telepe numutokagi apá lugáalokagi viki,

7 monó gakó lamaná lili ali iki minasimó.

* **13:47:** Isa 42:6, 49:6 * **13:51:** Mat 10:14

Listela numutoka gehanitunú Pauloni apele hilitune liki amó

⁸ Lá niasigo, Listela numutoka agisa luga luga nakeseto vi ve makó minamó. Eza nene izolaho ámináa getokago, gapo mohona osá amike húmege húmege oko minamó.

⁹ Áisi nene Pauló nene monó noligo, geleko noigo, Pauló nene gonú apeleake, minokago, Ómasímo nelémo zokative loko gele alévolé okago, Pauló nene geleake,

¹⁰ gakó napagutí like geza ote hee lokoko minozo. Loko lokago, moi oko ote hee loake gapo mohona imó.

¹¹ Lá okago, mukí vegenalite Pauló loló i netá nene ániwake, kegepagutí gakó napa lake Likaonia gakokutí nene ómasi keza vegená lilí ikasike lelitoka limiki netá imane lilí niasive.

¹² Liki lamó nene Panapasikumú nene Kiliki vegenalitini ómai netá napa agulizá Zusí ave liki milamó, itó Pauló eza gakó akó loaká imó nenazo, aikumú nene ómai netá makó agulizá Helemé ave liki milamó.

¹³ Lá ikago, taoni napa amegesaloka Zusikumule liki ge numuni minamó. Zusini guguni gizo ameaká i vémo gonanalisi netá loló oake pulumaká izatini luvákú milikimike, numuni gatetó aleloko viake, pulumaká apiliki guguni gizikitanigi niago,

¹⁴ aposolo losíma Pauloko Panapasiko keza gilikasike, ininá golesa ikasike, lihima alikataze likasike, gineganéini nene hikilikasike ololu liki vegená holúkú vasike láá liki lasimó:

¹⁵ Náa veguwo, lekelisi nene nanetá naleve. Lélisi nene lekelikitana nousive. Lekelisi nene ómailini soza sazámimi netá nene lekemegesa kimiuki alévolé Ómasiloka gímiziki minatave loko imane gakó lamaná lo nolukumusive. Ómasi nene okulumaki mikasigi age nagamiki itó áminagú mina netá mukí haitopaitolímini kelémo utó i ve noive.

¹⁶ Lá noike, omolelé amalelé iliki ite gamenaloka hetoka vegená mukí gele kemekago, kigikatunú geleke haitopaitó gapo ale utó iake miniki aliki amó.

¹⁷ Lá amóza, ánigo ahuloketamímó nenazo, límugusigú minamamóma neve. Ái mogonáa gilitave loko geha zelikimike golini gamena hogái gamena minumuni gamena likimigo, niva niva iki niake lokogoliza viziajá niave.

¹⁸ Liki li kimikasigo guguni gizi kiminigi amó nene hana iki ahulamó.

¹⁹ Lá ikago, nenetó niasigo, Atiokia numutokatí itó Ikonio numutokatí Zuta ve aniteke mukí vegená gala vizikago, ali nupa iake Pauloni nene gehanitunú apiliake, mota hilihe liki gelelehá iliki númaseloka vamó.

²⁰ Nenetó ahulimikago, akonoigo, Izesuni vegenala zuhate iki hizi vegiake niago, oteake taoni napaloka itimó. Akiake gó lokago, Panapasigegi Telepe numutoka vasimó.

²¹ Viki taoni napaloka Izesuni gakó lamaná li kimikasigo, vegená mukilite gili aliake Izesuni vegenala zuha lilí amó. Lá ikago, keza asi gapoloka atiginá iki vasike, Listela numutoka Ikonio numutoka Atiokia numutoka vi anitiká limi anitiká asike,

²² Izesuni vegenala zuhate monokú alévolé iki minatave liki kagata alimi alimi mihina asike kigikagú ali etoha ikasike láá liki li kemesimó: Gasovagi metalímimi amupiló minokogó Ómasímini avogisaló vo holatune loko loletonoimómá neve.

²³ Liki li kimikasike, monó numutó numutó ve lunáa kilími etó etó imi vasike, monokumule liki nosánetá mosiki minasike, Ómasiloka likasike

Guivahanimú gili alévolé ikanazo, áisi gizapa oleketino liki Guivahanímini agizakú ahulikitasismó.

Silia mikasiuka Atiokia numutoka atiginá iki vasimó

24 Lá ikasike, Pisitia mikasi aviligikasike viki Pamapilia mikasiuka anitesimó.

25 Neneló anitesike Pelega numutó nene monó li kimikasike, Atalia numutoka limiki vasimó.

26 Neneloka limiki sipigú itikasike, viki Atiokia numutoka anitesimó. Neneló goí iki ámina alesi hoza lumaló vinigi niasigo, Izesuni vegenala zuhate Ómasímo nónohá zeketative liki Ómasiloka lamó.

27 Itó anitesike monó gele vegenáini zuha kilími nupa ikasike, Ómasímo hize lé oketago hoza alesi gakó itó hetoka vegená gahe segekimikago gili seketigí a gakó nene avetó iki li kimi asú asimó.

28 Lá ikasike gamena hána otigí nene Izesuni vegenala zuhagi makó minamó.

15

Zelusale numutoka monokumú alegesá amó

1 * Zutaia mikasiukatí ve lugáa keza Atiokia numutoka lemeke Izesuni vegenala zuha Zuta ve minamamoláa láa liki li kimi-kimi iki minamó: Lekeza Mosé soleketamómáminiki lukugupeló Ómasímini anosa milamatamó nene Ómasímo lukugutó vizeminogo íve.

2 Liki lamó nene Pauloko Panapasiko gilikasike kezagi ámina vegenaki gakotunú lova napa hizemó. Lova hizikago, Zelusalega tivilki ámina gakokumú likiko aposolo itó ve olotivate kegepagutí gakóni gilitave liki Pauloki Panapasiki ve lugáa makoki kilími etó amó.

3 Kilími etó iake, monó gele vegenalite kilími gapo miliae, nónohá zikimikago, vamó. Viki Pinisia mikasigú itó Samalia mikasigú nene Zuta vegená minamamoláate litaha netá ahuliake, monokú viki gímize gakó li kimimi nivago, kigivéike mukilite giliaké kogoliza viziki minamó.

4 Lá ikago, viki Zelusalega anitikago, monó gele vegenaki aposologi ve olotiva napagi kogoliza vizikimikago, Ómasímo kelémo vatí igo monó hoza nalego nene gihila zi gakó nene avetó iki li kememó.

5 Li kimi asú ikago, Palisaio monó vegenakutí Izesukumú gili alévolé a ve lugáate otiki láa liki lamó: Hetoka vetini kugupeló Ómasímini anosa minosá itó Mosé lo hukoko li gakó gele alesá neve. Lá amitamó nene monokú vaminigave.

6 Liki likago, aposologi ve olotiva napagi ámina gakó litune liki alegesá amó.

7 * Alegesá iake gakó ali viligá aligá ake, Pitá nene oteake láa loko lo kimimó: Nigivénegita, hetoka ve keza gakó lamaná imane není negepagutí giliiki gili alévolé itave loko holutegutí Ómasímo gozapá likigivetipina není nelémo etó imó nene mota gilinave.

8 * Lá okago, ligikagú ánigoaká ve Ómasímo Zuta vegená lelitoka Sikalahú limimó ámina oko hetoka vegená nokimike nenémini mogonáa lelepizimó.

9 Keza aí gakó gili alévolé ikago, kigika nagamí zeketoko kelémo lamaná imó. Leza nagamí zeletamómáminoko kezagi nagamí zeketamó.

* **15:1:** Liv 12:3 * **15:7:** Apo 10:1-43 * **15:8:** Apo 10:44

10 Nenemú lekeza Ómasi gimivagú miliki genavagi netá napa aleaká unimó lezagi avotegegegi Moseni gakó ale amegesaló moloaká metalímini genavagi netá ale otunimó ligitaganí uhá nene ámina oko hetoka vegená Izesuni vegenala zuhatini kumupiló molatune liki nilahe.

11 Nenémini amitune. Leza láa loko geleká nouháma neve: Guivahani Izesú eza nasahilí olimike lugutó vizimó ámina oko hetoka vegenaki kugutó vizinogo ive.

12 Loko Pitá nene lokago, alegesá a ve mukí nene gahá lamake kegepa apiziale niago, Pauloko Panapasiko keza Ómasímo hozaló ve niasigo hetoka vegenatoka golivagi netá haitopaitó ale utó imó nene avetó iki li kemesimó.

13 Li kimi asú ikasigo, gizapa véipo Zemusí láa loko lo kimimó: Nigivénégita, gakó makó lítoze, gililo.

14 Ómasímo vegenala zuha lilí itave loko hetoka vegená gapo veleketake lugáa kelémo etó imó. Ámina gakó nene Saimon avetó oko lo lemekago geleháma neve.

15 Ámina gakó itó Ómasímini agepagutí gakó liaká a vete luhuva gizi milina gakó vo milisegeko neve. Ómasímini agepagutí gakó loaká ve makolímini luhuva gakó makó láa loko neve:

16 * Zuta vegenalite monó liaká niamó nenémo Tevitini monó seli numuni hulupa ligimokitana noigo,
nénisi minoko atiginá oko inake ámina numutagalaló agomá aleko goha ginogo uve.

17 Lá okugo, vegená lugáate Guivahanimú sele liki vitagá itave,
ító hetoka vegená nugulizá iaká nia vegená mukí áminagó itave.

18 Guivahánimini gakó nenéminá gozapakutí lo utó omo notu vémina noluve.

19 Láa liki luhuva gizinamó nenazo, neza láa loko noguluve. Hetoka vegenakutí Ómasí gili amiaká nia vegená nene genavagi netá geheketa mitune.

20 * Soza ómai netáini guguni gizi kimitakutí nene namiki mokoló netá alemiki nagá itata iza namiki iza golanigi namiki mosiki keké itave loko luhuva netá gizatune loko noguluve.

21 Ámina mosiaká netakumú nene Mosé gakó mukí gizo molokago, gozapakutí avotege omolelé amalelé iki leza Zuta vetini monó numutegú holisigú holisigú Mosé lo hukoko li gakó gatiki li limiaká niago geleká noune.

Monó kansole vetini gakó

22 Láa loko Zemusí lokago, aposologi monó ve olotivagi monó amegesaló mila vegenaki mukí keza gili lamaná iake, keitokatí ve losi kilími etó amó, makó agulizá Zutá agulizá makoláa Pasapá, itó makó Sailasi eza monokú olotiva ve. Kilími etó iake, Pauloko Panapasiko kezagi Atiokia numutoka makó vitave liki kimisili milamó.

23 Lá niake, luhuva netá makó láa liki giziaké kimikago, aliki vamó: Ligive lagavesé, leza aposologi monó ve olotivagi lekeza ligive hetoka ve lugáa Atiokia numutokagi Silia mikasigú itó Silisia mikasigú numuni apá makotó niamó nene geké lo leketoko luhuva imane gizo nolukumune.

24 Leza gelemuko, imanelokatí ve lugáate lekelitoka viki gakó li likimiki likilími gopa ikago, gili gopa amó.

* **15:16:** Emo 9:11-12 * **15:20:** Gá 34:15-17; Liv 18:6-23, 17:10-16

²⁵ Lá ikago, leza gelekunike alegesá okunike, ve makó kelémo etó okunike ve losi ligika kemenouni ve Panapasiko Pauloko kezagi kimiselekuko húnane nivave.

²⁶ Amina ve lositá keza Guivahanite Izesu Kilistokumule liki kepelemitagogitana monó hoza alesimó.

²⁷ Nenemú Zutako Sailasiko kimiselekuko, viki kegepagutí ámina gakó nene li likimikisiko gilinigave.

²⁸ Sikalahuki itó lezagi nene hoza genavagi lekememinake, lá okosí hoza gakó loleketatune loko lonoune.

²⁹ Lekeza soza ómai netáini guguni gizi kimitakutí namilo. Itó nagá itata izagutí namilo. Itó iza golani namilo. Itó mokoló netá alemilo. Nene netá lekemegesa amiiki mosi keké itamó nene lamaná iki minanigave. Ánesile.

³⁰ Luhuva netá láa liki gizi kimiaké, kilími gapo ikago, vamó. Viki Atiokia numutoka aniteke, monó gele vegená kilími nupa iake ámina luhuva netá kememó.

³¹ Kimikago, gatiki giliaké, luhuva giza gakó nenémo kelémo kii lokimikago, kogoliza viziki minamó.

³² Lá ikago, Zutako Sailasiko Ómasímini agepagutí gakó liaká ve minasnazo, gakó mukí lasike, kilími huluga liki kilími kii lasimó.

³³⁻³⁴ Lá ikasike, makó minata gamena asú okago, kimisele veloka atiginá iki vinigi mulúikú gili lamaná iminasigo, kigivete kemesosoka liki kilími gapoló amó.

³⁵ Pauloko Panapasiko keza Atiokia numutoka miní amiki minasike, kezagi ve lugáagi Guivahanímini gakó li utó miliki li kimi-kimi iki minamó.

Pauloko Panapasiko otopá zesimó

³⁶ Gamena makó oko vokago, Pauló nene Panapasini láa loko lo amimó: Leza monó gapo vusike Guivahanímini gakó lo kumusító numutó namató ligive lagave utó amó keza nana nana iki niahe voko ánigoketatiive.

³⁷ Loko lokago, Panapasí nene Zoní agulizá napa Makí makó vinigi limóza,

³⁸ * Makí goí oko Pamapilia mikasiuka gosohá hozagú aniteake ahulokimiaké atiginá imó nenazo, nenemú Pauló nene áisigi vinigi giligo goselé apilimó.

³⁹ Lá okago, Panapasiki pelevesava zikasike lova leta konó imó. Lá okago, mini ezega emega asimó. Panapasí nene Makini alémoko vike sipigú itikasike Saepalasi mikasi pokolauka vasimó.

⁴⁰ Pauló nene Sailasini alémo etó okago, Izesuni vegená keza Guivahanímo nasahilí oketative liki Ómasiloka likago, vasimó.

⁴¹ Vasike, Silia mikasiuka itó Silisia mikasiuka anitesike Izesuni vegenala zuha kilími kii lasimó.

16

Pauloko Sailasiko Timotini alímiki vasimó

¹ Pauloko Sailasiko keza Telepe apatoka vasike, Listela apatoka anitesimó. Neneló nene Izesuni vegenala zuha makó minamó, agulizá Timotí, izolaho nene Zuta vená nagamí hola vená, amelaho nene Kiliki ve.

* ^{15:38:} Apo 13:13

² Listela apatokatiki Ikonio apatokatiki monó nigele vegená keza Timotikumú gelego, itekago, Pauló nene Timotiki makó mohona itíive loko gilimóza,

³ ámina apatoka Zuta vegená mukilite Timotini amelaho nene Kiliki mikasigú ve minamó nene gakó gili asú amó nenazo, Pauló nene mukahá ikatave loko Timotini alémoko vike Ómasímini anosa nene agupeló molotamó.

⁴ Lá oake, numutó namató vake aposologi monó ve olotivagi keza Zelusale apatoka netá matá mositakumú li huka gakó nene gili alitave liki likitimi likitimi vamó.

⁵ Lá iki hoza nalego, Izesuni vegená mulusi mulusi milamó keza gili alévolé amó nene kigika okago, gamena gamena keitoka viki gímizi gímizi ago, mukí hizi hutíli amó.

Pauloge Masetonia mikasiuka vamó.

⁶ Lá ikago, Asia mikasiuka monó gakó loloko vitune liki niago, Ómasímini Sikalahulimo gapo hize lí okimikago, Pilikia mikasiukagi Galesia mikasiukagi li kimi-kimi imi vamó.

⁷ Vake Misia mikasi nekisaló anitiakte, Pitinia mikasiuka vitune liki niago, Izesuni sikalahulámo áminagó oko gele kememigo,

⁸ Misia mikasi aviliqiate limi viki age nagamí agataloka Toloa apató anitemó.

⁹ Neneló anitiakte, holugú nene Pauló agika ale viligokago vamó lá oko ánígamó: Masetonia ve makolímo áisi noitoka anitike sele like geza Masetonia mikasiuka oko lelémo vatí ozo loko lo amimó.

¹⁰ Láa loko noligo, ánigoake, keza Ómasímo gakó lamaná lo kimitune loko lolimikave, liake, vinigi ali vatí amó. Ali vatí niago, neza Lukana vo gímizekugo,

¹¹ sipigú itekunike, Toloa apá ahulokunike hee hee loko vunike Samotlake mikasi pokolaló anitunimó. Akokunike, gó lago, voko voko Neapoli apatoka age nagamí gahevaloka anitehá.

¹² Neneloka sipigutí lemekunike, mikasigú voko Pilipi numutó anitunimó. Nene Masetonia mikasigú apá gotolaló Loma ve keza apá amelaho lilí iake gizapa amó. Ámina numutoka nominuko, gamena makó oko vimó.

¹³ Oko vokago, holisi nene alitokago, vegegisagutí lemekunike nagamí napaló Ómasiloka liaká apá nehe loko gelekunike, lemeko vunimó. Neneló vená makó alegesá iki niago, kelémo utó okunike, mitó minunike monó lo kumunimó.

¹⁴ Lo kemekuko, keikutí Ómasímini gupá ze ameaká vená minamó agulizá Litiá. Eza Tiatila numutotí vená nene okohu gó molonoigo meina hiziaká vená minamó. Guivahanímo agika ale koló igo, Pauló li gakó nene gele alimó.

¹⁵ Gele aleake, ezagi vegenala zuha aí numukú mina vegenaki monó nagamí hiliake, eza láa loko lo limimó: Lekeza áninagago Guivahanímini mututoni okugoma není numukú itiki miniki aliki itave loko negénegeka ligo ligo itunimó.

Pilipi numutoka nagá numukú ahulikitamó

¹⁶ Gamena makó zupa Ómasiloka liaká apatoka nolumuko, sihele mohó makó noigo hotu lunimó. Nene moholímini agikagú holosi golesa minokago, anó lupa ale haitolímini ike kogoka vizeaká i mohó alika utó iti netakumú

lo utó ike meinava moni henokanoni alike aí agupe meina hize ve kemeaká imó.

¹⁷ Nene mohoki hotu lokunike, Pauloge leza lémegetoko noake gamoga gemo gemo vike sele like láa loko limó: Ve imane Ómasi iteko mina vémini gelekelé izegipala minake, lukugutó vizeaká gapo lekelepiziaká niave.

¹⁸ Nene gakó gó lanama gó lanama gakó napagutí loaká igo, Pauló nene holosi golesáminí anó lupa geleake goselé apelekago, viligoko holosi golesa láa loko lo amimó: Neza Izesu Kilistoni agulizató mohó agikagutí itekoko vozo loko nologetuve. Loko noligo litá oko iteake vimó.

¹⁹ Lá okago, agupémíni meinaváa aliaká a vamate aí hozalotí moni goha aleminogó uninazó liki giliakte, Pauloko Sailasiko kigizató aliake, hugumatako gelelehá iki kiapetoka kilímiки vake,

²⁰ goní ikitake láa liki lamó: Imane Zuta ve nenetosa numuteló ikasike mulutégú hizesike, liliími golesa galasa iaká niasive.

²¹ Leza Loma ve amuhá suni li hukilita netá alitave liki lagata aliaká niasive.

²² Liki likago, ve mukí mulusi miliki mina vete keza kizapaló molokago, lovaga ali kimiakte, kiapé keza góini ali alegetá vizi ahuliakte, gala vizikago, segi nakahunitunú kepelemó.

²³ Vauva aliki zivi hutivi iki kipiliakte, nagá numukú kilími miliakte, gizapa ve nene alévolé oko gizapa oketative liki litamó.

²⁴ Limikago, nagá numuni makó holukú nene kelémo moloake, kigisaló za moloko nagá alekimikago, akasimó.

²⁵ Holugú akovevé Pauloko Sailasiko keza Ómasiloka numuna liki nama nilasigo, nagá numukú mina ve lugáate konó lupamú nigelego,

²⁶ imimá napa galinali alimó. Alekago, nagá numuni lukesaváa móromoká okago, galinali gahe nene zeko apasoake koló okago, nagá numukú mina ve mukilitini nagá alikitamó nene vínasó asú imó.

²⁷ Lá okago, nagá numuni gizapa ve ako heleneikutí epenape zeko oteake, gateni koló o asú onoigo ánigoake, nagá numukú vema mota vi asú ahe loake, sopololelelahá oake ezáa agupegú galutá inogo noigo,

²⁸ Pauló nene gakó napagutí like gugupega ale golesa amo, leza avasavagi noune, loko limó.

²⁹ Loko lokago, gizapa vemámo livikumú lokago, amikago, numukú ololu loko itike luvolovo nozike Pauloko Sailasiko kei kighúna geake,

³⁰ numukutí kelémoko limike loká oketake uvónegítosa, nana okinake lamaná itove.

³¹ Loko lokago, keza láa liki li amesimó: Guivahani Izesu Kilistokumú gele alévolé itanímó nene, gezagi mina vegenaki lukugutó vizinogo ive.

³² Liki likasike, Guivahanímini gakó nene ámina numukú mina vegenaki ezagi li kemesimó.

³³ Li kimikasigo, gizapa vemámo ámina holugukó kelémoko vike segi nogosanitunú kepelemó nene, nagamí zekimiakte, ezagi vená izegipalagi monó nagamí hilamó.

³⁴ Lá iake, aí numuni agikagú kelémo moloake, nosánetakumú lokago gizi vatá i kememó. Lá ikago, ezáagi vená izegipalagi Ómasimú gili alévolé akumú kogoliza viziki minamó.

³⁵ Akiakte gó lago, kiapege keza pilisi ve láa liki kimiselemó: Ve losima gologí ikitalo.

³⁶ Liki likago, gizapa vemámo geleake, Pauloni avetó oko lo amike limó: Neza gologí olíkimikugo vitáive liki kiapege keza gakó ahulikago noaze. Nenémú lekeza limiiki viki zou liki minalizo.

³⁷ Loko lokago, Pauló nene láa loko lo amimó: Leza nene Loma vetini mulusigutí getamóma nemóza, lekeza lá amoáka netá aliki gonító lilími milamíki vegená kovogisaló lipiliake nagá numukú lilími milamó nemóza, itínasa nene asugunatoka limisilinigi nilahe. Lá oko nomive. Kezáini iki lilímiki vilkiko vitímóma neve.

³⁸ Loko lokago, pilisi vete atiginá iki vake kiapema li kimikago, kiapege ámina ve losi keza Loma vetini mulusigutí getakutí nousive liki lasi gakó giliake, ininá amó.

³⁹ Ininá iake, ve losiloka vake kilími hulu iake, kilími hetó iake, numuni apáini ahuliiki vitáive liki loká iki kagata aliake kimiselemó.

⁴⁰ Kimisilikago, keza nagá numukutí limikasike, Litiani numukú vasike, Izesuni vegenala zuha ánigikasike, monokú ali kii likimikasike vasimó.

17

Tesalonika numutoka gopaga lamó

¹ Keza viki Amapipoli numutoka itó Apolonia numutoka aviligikasike Tesalonika numutoka vi anitesimó. Neneló Zuta vetini monó numuni makó minamó.

² Pauló eza aí suni alike holisi losive makole oko novigo, monó numuíkú itíke minake, kezagi monó gotolagutí gatiki ligili hagili amó.

³ Lá iake, monó gakó luhuva gizamó lugáa nenémini mogonáa like, láa loko lo kimimó: Gologí oletative loko lo mololeta vema helekoko otitive liki monokú luhuva gizi milinamóma neve. Lo nolukumu ve nene agulizá Izesú eza gologí oletative loko lo mololeta vema noive.

⁴ Loko lokago, vegená lugáa nenete gili seketigí iake Pauloko Sailasiko keitoka viki gímezemó. Itó Kiliki ve keza Ómasi gelekelé itiki minamoláagi vená iti minamoláagi mukí kezagi viki gímezemó.

⁵ Lá ikago, Zuta vetini monó gizapa vete giliake kemekugú ninake, gohogó vegená golesa kilími nupa iake, gala vizikago, Zasoni numukutí Pauloko Sailasiko vegená kogovisaló kelémo molokinake nagá kimitune liki aí gahe zivi tele vizivi amó.

⁶ Lá amó nene ve losima numukú niamasigo ánigiake, Zasoni itó agivelagini lugáagi kigizató aliake, gelelehá iki aliki lemeke apá gizapa veloka kilimiki milake, láa liki gopaga limi vamó: Numutó namató ve kilími gopa napa iaká niasi vema anitesigo,

⁷ Zasóma kelémo guni okave. Itó keza Loma vetini agulizaki ve napámini gakó ali ahulikasike agulizaki ve gosohá makó Izesú utó okave liki liaká niasive.

⁸ Liki liake, apá amelagegi gizapa vegi gala vizemó.

⁹ Lá iake, Zasoki agivelagegi sele li kimiake, Pauloko Sailasiko vitáive liki kugupe meina hizilo likago, moni kememó. Kimikago, kimisili ahulamó.

Pelea numutoka vasimó

¹⁰ Lá ikago monó gele vegenalite ámina holugú Pauloko Sailasiko kimisili ahulikago, Pelea numutoka vasimó. Neneló anitesike Zuta vetini monó numukú itiki monó li kemesimó.

11 Lá ikasigo, ámina apató Zuta ve keza zouváá Tesalonika numutoka vegenakitana minamake, kiviligiki minake monó vávani iki giliake, Pauloko Sailasiko lasi gakó lamaná nehe soza nehe liake, gamena gamena monó gotolagutí monó mogonamú agizaka hiziki vitagá iki minamó.

12 Lá iake, keitokatí mukilite Kiliki vená iti minamoláa lugáagi ve lugáagi keza Izesukumú gili alévolé amó.

13 Lá ikago, Pauló nene Pelea numutokagi Ómasímini gakó lo hutilí okago, ámina gakó nene Tesalonika numutoka vokago, Zuta vegenalite giliake, Pelea numutoka ake gala vizeke lovaga lamó.

14 Lá ikago, monó gele vegená keza Pauloni alími gapo ikago, ámina apá ahuloake vike age nagamí agataloka anitimóza, Sailasiko Timotiko keza Pelea numutoka minasimó.

15 Niasigo, Pauloni alímiki va vegenalite Atena numutoka ahulitamó. Ahulimikago, lekeza atiginá iki viki likiko, Sailasiko Timotiko litá iki isino. Loko lokimikago, vegená keza atiginá iki vamó.

Pauló Atena numutoka monó lo kimimó

16 Lá ikago, Pauló nene Atena numutoka kegeva minake ánígamó nene soza ómai netá mukí vaí oko nego, ánígoake, agikagú ló lokago,

17 Zuta vetini monó numukú itike Zuta vegenaki hetoka vegená Ómasimú goliva giliiki minamoláa kezagi monó ligili hagili amó. Lá iake, gamena gamena maketiloka nene vegená nánigake áminagó oko monó lo kimimó.

18 Lá okago, ámina apatoka vegená makó minamó. Makolite Epikuleani monó giliaká amó itó makolite Sitoiki vegenalitini monó giliaká amó. Ámina vegená kezagi Pauloki gakó viligá aligá iake, lugáa nenete Paulokumú nene goselé gakó goha li ve imanémo nanave loko lo lemeaká noive. Liki likago, makolite láa liki lamó: Áisi nene ómai netá makolímini gakola nolímó gelekave. Liki lamó nene Pauló eza Izesunimuki helenosakutí oteakaku-muki lo utó oko lo kimikumú nene gakó lamó.

19 Láa liki liake, Pauloni agizató aleke, hugumá makó agulizá Aleopago neneló alímiki iteke lamó: Géisi gosohá gakó loaká noanimóma nene, nana gakokumú loaká noane.

20 Ma gelemuni gakó neze, mogonagi lokako gilitune.

21 Liki lamó nene Atena apakú vegenaki veno vegi keza gakó gosohá giliake ámina gakotokó miniaká amó.

22 Lá ikago, Pauló eza Aleopago gakó hugumató voko minake, vegená láa loko lo kimimó: Atena apakú vese, neza mogonatini lá oko nániguve. Lekeza ómai netá mukikumú goliva goha gilikili iaká niave.

23 Netá makó lá oko nego ánígouke noluve. Neza numutitoka vogá ogá oko ómai netatini ánígumó nene, nama holoma makotó luhuva makó nene gelemuni ómai netá makó noitikumú neve liki gizinago gatuve. Ámina ómai netá lekeza gelemiki gopa gupá zi amiaká niamó aikumú lo likimitoze, gililo.

24* Ómasimo mikasi ale utó moloake, amupiló netá matá ale utó molo asú imó. Áisi nene okulumaki mikasigi keí Guivahani noinazo, áisi nene monó zugusave vegenalite kigizatunú gekú nene minoko aleko osá amive.

* **17:24:** 1 Kug 8:27; Apo 7:48

²⁵ Áisi vegená mukitoka sikalahúinigi netá matá mukí lehizelimiaká noinazo, áisi netá matakumú vitagá osá amive, keké. Nenemú vegenalita hozava aleko netá makó ale utó o amitunimoláa oko nomive.

²⁶ Lá onoimóza, vegená zuha hamokó ale utó moloake lokago, aitokatí numutó namató hize hutilí oko utó omo vunimó. Itó hize hutilí oko minatuni gamenagi lakaníagi áisigó mololetonoimómá neve.

²⁷ Nenemú nene ligikatunú vitagá iliki viki Ómasi ezáa ánígatune loko geleake, nenémini imó. Eza hotoka minamive. Likigilikagú noive.

²⁸ Leza aí agizauka minunike, oko moloko oaká noune. Lekelitokatí nama luhuva giziaká a ve lugaáte nene leza Ómasilokatí utó unímoma neve liki lamóma neve.

²⁹ Leza Ómasilokati nouninazo, Ómasímo eza vegenalite kagata geleke golitunupe silivatunupe gehanitunupe lilí a netakitana noive loko laminogo une.

³⁰ Ómasímo aikumú gelemake netá golesa aliki mina gamena nene ánigo ahuloake, nasahilí oketoko minamóza, itína nene numutó namató vegená mukitoka kigika ali viligatave loko lokimikave.

³¹ Áisi nene numutó namató vegenalita mogonate ale utó moloko lihima limiti gamena lo moloake, lelegí oko limiti vema alémo etó imó. Lá oake, numutó namató vegená mukitoka aikumukó gilitave loko ámina ve nene heleneikutí alémo otekago noive.

³² Loko Pauló nene helenosakutí oteaká gakó lokago, lugáate goselekase-leka lamó, itó lugáate nene gamena makó zupa ámina gakó goha lako gilitune liki lamó.

³³ Liki likago, Pauló nene ahulokimiakte vimó.

³⁴ Vokago, vegená lugáate nene aitoka viki gímiziakte Izesukumú gili alévolé amó. Keitokatí Aleopago hugumató kansole makó minamó, agulizá Tionisió, ezagi vená makó agulizá Tamalí itó vegená lugáagi minamó.

18

Pauló Koliti numutoka vimó

¹ Lá ikago, Pauló nene Atena apá ahuloake Koliti numutoka vimó.

² Neneloka Zuta ve makó alémo utó molamó, agulizá Akuilá. Aí nene Potu mikasiloka getamó. Itó venala Piliskako nene Italia mikasiuka niasigo, agulizaki ve napa Kalautió eza Zuta vegená nene Loma apakú minamitave loko lo hukokimiakte kimiseleko ale ahulokago, keza ámina apá nene ahulikasike, Koliti numutoka vasimó. Izoha vi nanitesigo, Pauló nene keitoka anitimó.

³ Ezagi kezagi hamokó hoza aleke seli numuni giaká a ve minamó nenazo, kei numukú iteko minake kelémo vatí igo, makó hoza alemó.

⁴ Lá niago, Pauló eza holisígú holisígú Zuta vegenalitini monó numukú iteko Zuta vegi Kiliki vegi kagata logative loko monó lo kemeaká imó.

⁵ Lá okago, Sillasiko Timotiko keza Masetonia mikasigutí asi gamena nene Pauló monó hoza amuza moloko alike, Izesú nene gologí oletative loko lo mololeta vema noive loko aí mogonáa nene Zuta vegená lo utó oko lo kemeko minamó.

⁶ Lá okago, keza nene gakola gili ahuliakte, lova ali ameke alivi letivi ikago, Pauló nene golagutí vahé moloko mumusopa atilí o ahuloake, láa loko lo kimimó: Lekeza alika latila itamó nene, nene lihima nenitoka nomive.

Lekezatiniloka minanogo ive. Nenemú nemegesa lekemekinake hetoka vegenatokagó vinogo uve.

7 Loko loake, hetoka ve makó agulizá Titió Zustó eza Ómasi gupá ze ameko minamó. Áí numuni nene Zuta vetini monó numuni agilikaloa minamó nenazo, Pauló nene áí numukú itike minoko aleko noigo,

8 monó numuni gizapa ve agulizá Kilispó ezagi numunagú mina vegenaki Guivahanimú gili alévolé ikago, Koliti vegená mukilite monó gili alévolé iake, monó nagamí hilamo.

9-10 Lá ikago, gamena makó zupa holugú nene Guivahanímo Pauloni vamotoka utó o ameake lágloko lo amimó: Imane apakú vegená mukí není zuha lilí itaze, neza gizapa ogetonougo, ve makolímo ma gelémo golesa aminogo ive. Nenemú geza gelegesá legemiko monó noloko ahulamo. Avetó oko lokogó minozo.

11 Loko lo amekago, geleake, nenenoka nene Ómasímini gakó lo keme keme oko noigo, kilisimasí hamoki ikani 6-agí vimó.

12 Lá okago, Akaia mikasigú agulizaki ve napa minamó, agulizá Galió. Eza gizapa onoigo, Zuta vegenalite ali apiziake Pauloni lova ali amiake, goní numutoka alímiki vake,

13 imane ve nenemo li hukilita gakó pelevesava zeake haitolíminiki Ómasi gupá zi amitute loko lagata aleaká noive.

14 Liki likago, Pauló nene gakó linogo igo, agulizaki ve Galió eza Zuta vegená lágloko lo kimimó: Agae, Zuta vese, imane vémo lihimá golesa netá genavagi ale utó ilina, gakotini nene gele lukumuline.

15 Lá onoimóza, lekelisi nene gakotinimú itó ve makolitini kugulizaínimú itó li hukilikita gakokumú gakó hoza nalemó nenazo, lekeza netatinive. Není netá nomive.

16 Loko loake goní numukutí kimisele ahulokago, lememó.

17 Limiake galinali monó numuni gizapa vema agulizá Sosteneni nene aputá viziake agulizaki ve Galioni avogisaló apelemóza, Galió eza ánigoake ánigo ahulamó.

Pauló Atiokia numutoka atiginá oko vimó

18 * Lá okago, Pauló eza Koliti numutoka koma minomo noitike, monó amegesaló mila vegená kemesosoka loake, Piliskaki Akuilaki kelémoko vike sipigú itiake, Silia mikasigú vinigi Kenekela numutoka vi anitikago, Pauló gozapá Ómasímini agulizató ale moloko zopovala hukamímó nenazo, ámina gamenamú hukatove loko li gamena alitokago, nenenó hukamó.

19 Lá oake sipigú itiake vake, Epeso numutoka anitiak, Piliskako Akuilako nenenó minikasigo, Pauló eza Zuta vetini monó numukú itike, kezagi monó ligili hagili iki minamó.

20 Lá iake, kezagi minutune liki likago, óe loake,

21 kemesosoka nolike, lágloko lo kimimó: Ómasímo giliko lamaná okikoma lekelitoka goha atiginá oko atove. Loko loake, Epeso apá ahuloake, sipigú itiake vimó.

22 Vike Sisilia mikasiuka aniteake, Zelusalega iteko vike Izesuni vegenala zuha agivelagini ánigoake, gekévaké loketamó. Lá oake, Atiokia numutoka atiginá oko lomoko vimó.

* **18:18:** Nam 6:18

23 Atiokia numutoka koma minake monó hozaló goha vike Galesia mikasiuka Pilikia mikasiuka numutó namató mohona ike Izesuni vegenala zuha luhusáini kelémo kii loketomo vimó.

Apoló Epeso numutoka monó lo kimimó

24 Lá okago, Zuta ve makó minamó, agulizá Apoló, eza Alesatalia apató geta vémo Epeso numutoka anitimó. Ámina ve nene gakó heeváa loaká ve minoake monó gotolau gakó gele asú imó.

25 Eza Guivahanímini monó avetó iki li amikago, áminagó oko gilimó. Áisi Zoní nene vegená monó nagamí holoketa gakó, itó Zoní nene Izesukumú gili gakokó nene zazavagó gilimóza, ámina nene amuza moloko hee lokogó lo kemeko minamó.

26 Lá noike Zuta vetini monó numukú itike apí oko monó ale akutoko lo kimimó. Lo nokimigo, Piliskako Akuilako keza gilikasike, alími apazá zikasike, Ómasímini monó lugáa li amesike alapizi hee hee lasimó.

27 Lá ikasigo, Apoló eza Akaia mikasiuka vitove lokago, agivelage ali kii litake Izesuni vegenala zuhaloka luhuva netá nigiziki imane ve nene lekelitoka novikoma, alími lamaná ilo. Liki luhuva giziki amikago, aleko vimó. Vike Koliti numutoka aniteake, Ómasímo nasahilí oketago Izesukumú gili alévolé a vegená kelémo vatí imó.

28 Lá noiké monó gotolagutí gato kemeko, Izesú nene gologí oletative loko lo mololeta vema noive loko nenémini mogonáa vegenalitini kovogisaló lo utó ike, Zuta vetini gakó aleko limike lo kimimó.

19

Pauló Epeso numutoka monó lo kemeko minamó

1 Apoló eza Koliti numutoka noigo, Pauló nene mikasi holutó mohona noike Epeso numutoka anitimó. Neneló vike Izesuni vegenala zuha makó ánígoake,

2 loká oketake lekeza nene monó gili alévolé iake, Ómasímini Sikalahú alemó nehe. Loko loká okimikago keza láa liki lamó: Óe, Sikalahú noive loko gelemunimó nenaе.

3 Liki likago, goha loká oketake lá ikamóza, lekelisi nene éahini gakó lamanató monó nagamí hilamó neve. Loko lokago, leza Zonini monó nagamí huluhá nenaе.

4* Liki likago, Pauló láa loko lo kimimó: Zoní eza nene vegenalite kigika ale viligakumú nagamí noholoketake nemegesaloka némegetoko ati ve agulizá nene Izesú anogo ize, aikumú gili alévolé itave loko lo kimimó neve.

5 Loko Pauló lo kemekago, giliaké, Guivahani Izesuni agulizató monó nagamí hilamó.

6 Nagamí hilikago, Pauló nene gotító agizani moloko Ómasiloka loiká loiká noigo Sikalahú keitoka lemekago, haitopaitó konokutí monó li utó iká Ómasímini agepagutí gakó liká amó.

7 Ámina vegená 12-a minamó.

8 Lá ikago, Pauló eza Zuta vetini monó numuíkú itike monó ale akutoko Ómasímini gizapaló minoakalímini gakó lo keme keme oko kagata aleko noigo, ikani losive makole golamó.

* **19:4:** Mat 3:11; Mak 1:4-8

9 Lá okago, vegená lugáate gínikaha iake Izesuni monó nene kemegesa amemó. Kemegesa amiake, mukí vegenalitini kovogisaló Izesuni monokumú alivi letivi ikago, Pauló ahulokimiake aí vegenala zuha kelémoko vike kelémo nupa oake, gamena gamena ve makó agulizá Tilanó aí gakó apí o kemeaká numukú miniki monó ligili hagili iki minamó.

10 Niago, Asia mikasiuka vegená nene Zuta vegenaki Kiliki vegenaki mukító keza Guivahanímini monó gili asú niago, kilisimasi losítá oko vimó.

Sikevani gipalatini gakó

11 Lá noigo, Ómasímo Pauloni hize lé omikago, golivagi netá haitolímini mukí ale utó imó.

12 Lá okago, nenemú vegená nenete akisipi taulíinitunú nene Pauloni agupelotí vemo iliki vake kivisi vegenalitini kugupeló milikago zokamó, itó kigikagutí holosi golesa itiki golisi vamó.

13 Lá niago, Zuta ve lusaló ve lugáa numutó namató vigiki mihina amó nenete vegenalitini kigikagutí holosi golesa kepeleko kimisilitune liki Guivahani Izesuni agulizató láa liki avevezaha iki lamó: Izesuni agulizá lamaná Pauló mohona oko loaká noi vémini agulizató golisi vitave loko nololeketune, liki lamó.

14 Nene Zuta vetini guguni gizoaká ve napa makó agulizá Sikevá aí gipala 7-a keza ámina netá aliaká amó.

15 Itó gamena makó zupa láa liki likago, holosi golesa nenémo láa loko lo kimimó: Izesuni mogonamú mota gelenouve, itó Pauloni mogonamú mota gelenoumónza, lekelisi nene hí ve niave.

16 Loko loake, holosi agikagú mina ve nenémo alegétá vizevo oko kepelekago, golanímo alemó ze ze igo, kugupa zapakó numukutí limiake golisi vamó.

17 Lá ikago, ámina gakó nene Epeso numutoka Zuta vegenaki Kiliki vegenaki keza gili asú iake kegepa gahava nomigo, Guivahani Izesuni agepoka lake sigaga litamó.

18 Lá ikago, Izesuni monola gili alévolé iki minamoláa mukilite aniteke keza litaha kemetameki minake netá golesa ali minamó nene li utó i asú amó.

19 Lá iake, gozapá lusa hoza aliaká a ve lugáate lusa giaká a puku nene gita iki aliki ake vegená kovogisaló lokú gizamó. Lá iake, ámina puku nenémini meinava ale nupa iki gatamó nene, 10 tausen kina okago,

20 muki vegená keza nenémini ikago, Guivahanímini gakolímo hutilí oko vike gihila zeko alévolé imó.

Epeso numutoka gopaga lamó

21 Lá okago, Pauló eza Masetonia mikasiuka itó Akaia mikasiuka vomo vomo Zelusalega vitove loko agata geleake Sikalahulímo alapizító nene neza Zelusale numutoka anitekinake, nenelotí goha voko voko Loma apatoka vitove loko gele hamokó oake,

22 alími vatí iaká asi ve Timotiko Elastoko kimiselekago, Masetonia mikasiuka goí iki vasimó. Ezáa nene Asia mikasiuka koma makó miní ameko minamó.

23 Nene zupa Epeso numutoka Izesuni monokumú lova napa utó imó nene lá oko neve.

24 Neneló silivatunú gonanalivagi netá loló oaká i ve makó minamó, agulizá Temetelió. Áisi nene soza ómai netáini agulizá Tianani numunáamini

amenía koma koma loló oake, ezáagi izegipa agunalagi ámina hozalotí moni napa aliaká amó.

²⁵ Lá ikago, Temetelió eza izegipa agunalagi agive agave kelémo nupa oake láa loko lo kimimó: Náavegúe, lekeza hozale nenémo moni henokanoni ale utó olemeaká noimóma nene gilinave.

²⁶ Itó ve makó amó agulizá Paulóma nene, lekeza aí mogona giliki ániginave. Áisi nene Epeso numutokatí itó Asia mikasi lugalokatí vegená mukí kagata hizeko kelémo gopa ike vegená kigizanitunú lilí amó ómai netá nene, netá gihila nomive loko lo kemeaká noive.

²⁷ Láa lomo mohona iko iko, lelí hoza nene liminogo ive, itó lelí ómai netá napa Tianani zugusavemú nene vegenalita gilikiko liminogo ive. Lá okiko nene, Asia mikasiuka vegenaki numutó namató vegenaki Tianakumú goliva gilikilí iki niminamóma nenaizo, agulizá haha itihe loko nehelele vizekave.

²⁸ Loko lokago, giliake, kigikagú ló loake, kizapaló molokago, gakó napagutí láa liki lamó: Epeso vegenalita izoteho Tianá nene agulizaki vená napama nenaes, liki lamó.

²⁹ Liki likago, ámina apató vegená gopa napa iake alegesá hugumatoka ololu liki vake alegesá iake, Masetonia apakutí Paulogegi makó mihina iaká a ve lositá, kugulizá Gaioki Alistakoki nene kigizató aliake gelelehá iki iliaki vamó.

³⁰ Lá ikago, Pauló nene geleake, vegenalitini alegesakú vitove lokago, aí vegenala zuha keza géneka lamó.

³¹ Lá ikago, Asia mikasiuka kugulizaki ve lugáa Pauloni zogova minamó keza vegenalitini alegesakú vamitive liki gakó ahulikago, vimó.

³² Vokago, alegesá hugumató nenenó vegená keza gakó gopa napa lake, haitopaitó gakó liki minamó. Lá niago, lugáate nene netakumú nilaze liki gelemake, gopa minamó.

³³ Lá iki niago, Zuta vetini kigivéipini makó agulizá Alesateni nene alími etó iake gala viziake, ámina gakó li ami ami ikago, eza holomaló itike Zuta vegenalitini mogonáini hize lé inogo agizanitunú alata molamóza,

³⁴ áisi nene Zuta vema nenaes liki giliake, kegepagutí kegepagutí li hamó ake gakó napagutí nene Epeso vegenalita izoteho Tianá nene agulizaki vená napama nenaes, liki nilago, gamena aowa lositá oko vimó.

³⁵ Lá okago, kanoletini gakotó gizapa vémo kelémo zou loake, láa loko lo kimimó: Epeso apakú vese, Tianate napámini zugusave napa imaneló nemó itó okulumakutí aí vogunahana netá makó limimó nenémini gizapaváa amelagita noune. Ámina gakó nene numutó namató mota gili asú inave.

³⁶ Hí vémo nenéminoko nomive loko litive. Ma nomive. Nenemú lekeza likigika ali hulu iiki netá golesa alemilo.

³⁷ Imaneloka kilímiki a ve netenosa ómai netatémini monó zugusavegutí netá makó ali halake halake oaká nehe itó Tianani alivi galativi ahe ma amasimóma neve.

³⁸ Lá okago, Temetelió itó hozaló agive agave keza ve makokumú gelego golesa noigoma lihimaváinimú goní numutoka kiapagitoka kilímiki vikiko, nenenó goní gakó litave.

³⁹ Itó gakó makó minokikoma nene, kanoletini alegesakú aliki vikiko gakó hoza aliki gilitave.

⁴⁰ Lekeza itína nene gopa lova hizikamó ha akokave. Ámina gakó nene kugulizaki vemate gilitamó nene nanave loko lo kumuko gilikó lamaná itive.

Ma nomive.

⁴¹ Loko gizapa vemámo loake, kimisele ahulokago vamó.

20

Pauló Masetonia mikasiukagi Kiliki mikasiukagi vimó

¹ Epeso numutoka gakó vivi vovoga lamó nene asú okago, Pauló nene Izesuni vegenala zuha sele lo kemeake, kagata aleake, ale kii lokimiakte ahulokimiakte, Masetonia mikasiuka vimó.

² Vigeko ánigo asú ike, monó amegesaló mila vegená minamoláa monokú ale kii lokimiakte, sipigú vike Kiliki mikasiuka anitimó.

³ Neneló ikani losive makole minoake, age nagamí agataloka lomoike, sipigú Silia mikasiuka vinogo igo, Zuta vete giliake gohoni milamó. Pauló nene geleake, Masetonia mikasiuka ale atiginá oko mikasigú vinogo limó.

⁴ Loko lokago, Pelea numutotí Piloni gipala Sopaté itó Tesalonika mikasigutí Alistakó ave Sekutó ave itó Telepe numutotí Gaió ave Timotí ave itó Asia mikasigutí Tikikó ave Tolopimó ave ve nenéate Paulogegei

⁵ goí iki vase Toloa numutoka legeva iki minamó.

⁶ Zuta vegenalitini avóikini asenini zeketakumú gili mina holisi asú okago, nezagi vegená makoki Pilipi numutotí sipigú itekunike gamena ligizani lugaloka asú igo oko novigo voko voko Toloa numutoka anitekunike, holisi hamó minuhá.

Toloa numutoka Pauló monó lo kimimó

⁷ Minunike, leza nene holisi gamena Sategú holugú nene lepa nosá natune loko alegesá okunike, Pauló nene gó lokiko vitove loko noike, monó lo keme keme oko noigo, akovevé loló imó.

⁸ Numuni amupiló agika makokú minuhakutí nene liví mukí guluma oko minamó.

⁹ Lá onoigo, gipa makó agulizá Eutikó áisi nene Pauló monó háná háná lokago, hépé gatetó minake ahihí imó. Ahihí okago, avó ako heleake, miní amiki giliiki ite numuni hépé gatetotí velehé limike mikasigú akoake helekago, ali otiki ánígamó nene, mota helekago,

¹⁰ Pauló limike hitoko akoake aputá novizike, vegená láa loko lo kimimó: Lekeza ive nama amilo. Hanuva noike, sikalahú nomolave.

¹¹ Loko loake, numukuka itike lepa nosá kemeake, nosá koma namó. Niake, gamena háná monó ligili hagili iki niago, gó lamó. Gó lokago, Pauló nene ahulokimiakte vimó.

¹² Novigo, vegená keza ámina gipa nene agómula gizoake otikumú mulúikú lamaná giliake, numunauka alímiki itemó.

Pauló Epeso numutotí monó gizapa ve ikago gakó lo kimimó

¹³ Lá ikago, Pauló áisi mikasigú gapo vitove loko lokago, leza sipigú itekunike Aso numutoka voko nouko, áisi mikasigú vimó.

¹⁴ Vike Aso numutoka aniteake ánígolimikago, sipigú alémo molokunike, makó vuhá. Voko mikasi pokola makotoka Mitilena apakú vo anitehá.

¹⁵ Nenelotí sipigú goha novuko, gó lokago, Kio mikasi pokola agilikaloaka avilegeko vunike, gó lokago, Samo pokolagú anitehá. Nenelotí goha vunike gó lago, Miletó apatoka anitekunike,

¹⁶ Pauló nene Sikalahú limi holisi nekú Zelusalega voko minanogo uve loko limó. Nenemú Asia mikasi nekisaloka noigo, Epeso numutoka vitomóza,

vegenalite pasiminimiiko gamena hána vitihe loko Epeso apá avilegeake, sipigutí lemeake,

¹⁷ mikasigú víke Mileto numutoka anitimó. Aniteake, alesa kimiselekago, Epeso numutoka vake monó gizapa ve lugáa kilímiki amó.

¹⁸ Iki anitikago, Pauló láa loko lo kimimó:

Neza Asia mikasiuka aniteuke ganá lekelitoka oko moloko minumó lekeza mogonalotí gililikí itiki minamóma neve.

¹⁹ Nénisi nene ánéámina ive nama okuke miluma guluke Guivahaníloka gelekelé otoko minumó.

²⁰ Lá uke, lekelémo vatí iti gakó nene ma hitoleketosá amumóma neve. Monó gakó nene vegená ali nupa iki minakú itó numutikú numutikú etó etó oko lo lekemeko minoaká umóma neve.

²¹ Zuta vegenaki Kiliki vegenaki kigika ali viligiki línhaha netá ahuliiki Ómasiloka viki gímiziki Guivahani Izesu Kilistokumú gili alévolé itave loko lakagata aleko minumóma neve.

²² Itó itína nene Sikalahulímo litó Zelusalega novuve. Elaneloka vo antekugo, nenitoka nana netá utó itihe, nene gele vevesamumóza,

²³ Sikalahulímo numutó namató vetitoka mohona oko nougo, kalapusi nagalímo itó miluma metalímo negeva oko noive loko lo nemeaká noive.

^{24*} Lá oniomóza, neza minoko aleko oko moloko ukumú gelekugo, itemive. Guivahani Izesú gapo velenimiaké monó hoza nimimó nene aleko ale nolutiginake Ómasímo nasahilí olimiaká noimómámini gakó lamaná lo hutilí itove loko nigikatunú gelenouve.

²⁵ Itó makó nenegi litoze, gililo. Neza Ómasímini gasovaló minoakalímini gakó lo utó omo holutikú minoko aleko ugo, lekeza ániginamó nemóza, goha nogokaló ma ánigaminigave.

²⁶ Nenemú ale akutoko lo nolukumuze, gililo.

²⁷ Nénisi golisi gelemuke Ómasímo agata geleneimoláa lo lekeme o asú onoumó nenazo, lekelikutí makó nenémo latila itimó nene, nenémini lihima nenitoka minaminogo ive.

²⁸ Lekezatitini gizapa niiki Sikalahulímo gizapa veve loko leleketa vegená keza Guivahanímini vegenala zuha aí golanímo meina hizi vegená nene lamaná iki gizapa ikitalo.

²⁹ Neza ahulolikimikugo, soza monotó vegenalite hela galagitana iki lekelitoka anitiki lekemeni apili hilinigave.

³⁰ Lá ikiko, lekelikutí ve makó utó iiki Izesuni vegenala zuhate ahulilikimi-iki keitoka viki gímizitave liki monó ale gopa inigave.

³¹ Nenemú lekezatini gizapa alévolé iki ilo. Kilisimasí losive makole oko novigo, gamena gamena gó lanama gó lanama ive nama uke lakagata alumó etó etó oko lo lekemæká umó nene, ahulosá amumóma neve. Nenemú lekeza giliki minalo.

³² Itína nene Ómasímo hize lé oleketative loko lekelémo aí agizakú nomuluve. Áisi nene alévolé gakolatunú lekelémo kii linogo ive. Lá okiko, gosohá kigika kelémo loló i vegená mukitoka mini amelikimikiko apiziki minanigave.

³³ Neza moni henokanonimú mesahakosaha oleketosá amumóma neve.

* ^{20:24:} 2 Tim 4:7

34 Nezánemuki vegenáne zuhamuki není nigizánitunukó lugupémini netá ale utó moloaká umó nene mota gilinave.

35 Neza haitopaitó netá loló nouke hoza amuza moloko alinake kee lamamoláa nasahilí oketatune loko nenémimi gapováagi lekelepizenoumómá neve. Nenemú lekeza ámina gapogú niviki Guivahani Izesú nene ale nómónó nenémó gihila nomine, hanuva nasahilí oaká nenémó gihila neve loko limómá nene gili minalo.

36 Loko Pauló lo ahulokago, ezagi kalapusa hiziki Ómasiloka lamó.

37 Ómasiloka liake, ive nama ake kuputá kapatá vizeke kogoka kegepa namó.

38 Lá iake, lekeza nogoka goha ánigaminigave loko amunaloka li gakokumú ive nama goha iake, sipigú itekoko vitive liki alimiki getatoka lemémó.

21

Pauló Zelusale numutoka vinogo límó

1 Itó lezagi kezagi vo ezega emega unike, sipigú hee loko voko voko Kosi mikasi pokolagú anitehá. Gó lokago, goha voko voko Lota pokolagú anitekunike, voko Patala numutoka anitehá.

2 Aniteko sipigutí lemekunike sipi makó Pinisia mikasiloka vinogo ali vatí niago ánigokunike, nenegú itekunike,

3 voko Saepalasi pokola ánigokunike sogaloka nego avilegekunike, voko voko Silia mikasi liginaloka Tulo numutó anitehá. Neneló sipigutí nene henoni nahulago,

4 leza Izesuni vegenala zuhatini numúitoka iteko nouko, holisi hamó oko vimó. Oko novigo, Sikalahulímo kigikagú hoza alekago, Zelusalega vamitive liki Pauloni agisa agizató amó.

5 Lá ikago, neneló nouko, vituni gamena alitokago, keza vená izegipagi numu getatoka lilími-liki vikago, getatoka lemeko lalapusa hizeko Ómasiloka lunimó. Lokunike, ligizakú ale lomala okunike,

6 sipigú noituko, keza numúitoka atiginá iki vamó.

7 Lá ikago, Tulo numutokatí voko Tolemai numutoka anitekunike, neneló Izesuni vegenala zuhagi gekévaké lokunike numuni hamokó akunimó.

8 * Akokunike gó lokago, voko Sisalia numutoka aniteko Izesuni gakó lamaná lo kemeaká i ve Piliponi ánigokunike, aí numukú iteko minunimó. Eza amunaloka ve 7-a monó hozaló kilími etó amómagutí ve makó minamó.

9 Aí mohó getola losive losive nenete Ómasímini agepagutí gakó liaká a mohó minamó.

10 * Neneló miní ameko nouko, Zutaia mikasiukatí Ómasímini agepagutí gakó loaká ve makó agulizá Agapó nene

11 lelitoka oake, Pauloni holotani aleake ezáa agisa agizató nozike láá loko limó: Ómasímini Sikalahulímo ámina holotanímini amelahini nene Zelusalega vo anitekiko, Zuta vete imanémimi imiuki hetoka vetitoka amisili miliko, mogona golesa alapizinigave loko nolive.

12 Gakó láá loko lokago, lezagi ámina apá amelagegi Pauló nene Zelusalega vamitive loko negénegeka lotunimó.

* **21:8:** Apo 6:5, 8:5 * **21:10:** Apo 11:28

13 Lokuko, Pauló láa loko limó: Lekeza nanamú ive nama goha niago milumatini noguluve. Neza Zelusalega nagá numukukó vitove loko nene-mukopa, Guivahani Izesukumule loko hilitokumuki nigikámo vávani onoize, ahulikalo.

14 Loko lokago, agata aleko luhá nene gelemigo, ahulokunike Guivahanímo giliko alévolé ino loko lunimó.

Pauló nene Zemusí noitoka vimó

15 Loko lokunike, gamena lugáagi asú okago, Zelusalega tovo itune loko ale vatí unimó.

16 Ale vatí nouko, Sisalia numutokatí Izesuni vegenala zuha lugáa keza lilími viki Saepalasi mikasi pokolagutí ve makó eza Izesuni vegenala minamó, agulizá Manasó, aí numukú lilími milikago, iteko minuhá.

17 Minokunike, nenenotí Zelusalega tovo unimó. Neneló ligivetegi lilími miliake, nasahilí ilimikago,

18 akokunike gó lokago, Pauló eza monó gizapa ve napa Zemusini numukuka lelémoko itimó. Iteko nouko, monó ve olotiva imi asú amó.

19 Imi asú ikago, kigizakú aleake, Ómasímo hize lé otago hetoka vegenatoka monó hoza aligo gihila zi gakó nene miní ameko avetó o kimimó.

20 Nene gakó avetó o keme asú okago, giliake, Ómasí agepoka liake, Pauloni láa liki li amemó: Ligivetega Paulo, Zuta vegená tausen tausen mukí nene Izesuni vegenala zuha lilí iki niamole. Keza mukító Mosé lo hukoko li gakó amuza miliki hizi lé iaká niave.

21 Lá okago, geí gakó lá oko ago giliaká niave: Zuta vegená hetoka vegenalitini kigilikaguí minimi vinamoláa keza Moseni gakó ali ahulatave loko kagata ale ale oaká noane. Itó izegipáinitini kugupeló Ómasímini anosa milikitamitave loko itó Zuta veta mogonataganate ahulatave loko lokimiaká noane.

22 Liki imane apató vegenalite geikumú láa liki giliaká nianazo, itó géisi imaneló noani gakó gilinigi nianazo, kegepauka hulu itive loko nana itune.

23* Nenemú leza gakó makó lo gimitunimó nene itanize. Lelitoka ve losive losive niamó keza Ómasímini agulizató netá makó loló itune liki li hukake, gotóini zopova hukamake hanuva nianazo,

24 leza keitoka gelémo gímizekuko, kezagi Ómasímini avogisaló likigika vihelé aheletoko minative loko leza aleaká nouni suni alitaze. Lá ikiko, Ómasí guguni gizi amita netá meina hizekimikako, gizi vatá niuki zopováini hukatave. Geza lá itanímó nene, ánígíiki geikumú gakoka gelemó soza gakó gelekago, geza Mosé lo hukoko li gakó gele aleaká noane liki gilinigave.

25* Itó hetoka vetitokatí gili alévolé amoláa keitoka luhuva netá gizoko lo hukuni gakó láa loko gizunimóma neve: Soza ómai netáini guguni gizi kimitakutí namitave loko, itó iza golani namitave loko, itó nagá ita izagutí namitave loko, itó mokoló netá lili amitave loko lo hukoketunimóma neve.

26 Liki likago, Pauló eza gakóini geleake, ámina ve losive losiveló gímizekago, akiake gó lokago, kugupe kigika nagamí ziki ali vihelé ahelé lake, Zuta vetini monó zugusave napagú itemó. Itiake, Pauló kugupe kigika nagamí ziki ali vihelé ahelé liaká a gamena lutigití gakó itó Ómasí guguni gizi amita gamenamú nene lo kimimó.

* **21:23:** Nam 6:13-21 * **21:25:** Apo 15:29

Monó zugusavegú Pauloni agizató alemó

²⁷ Lo kemekago, netá matá ali guni a gamena 7-ama asú inogo noigo, Pauló nene monó zugusave napagú iteko noigo, Asia mikasiukatí Zuta ve makolite aí ánígiake, vegená muki galá vizemó. Gala vizikago, Pauloni agizató aliake,

²⁸ gamoga giki lamó: Eé, Isilae vese, iki lilími vatí amave. Imane vémo numutó namató mohona ike Zuta ve lelí lova ale limike Mosé lo hukoko li gakokumú itó lelí monó zugusavemú alevo letovo oko loaká noi vema nena. Itó lelí monó zugusavelegú Kiliki vegená kelémoko itekago, keza lelí monó numuní napa ali mumusopa zikave.

^{29*} Liki lamó nene Pauló nene Epeso numutotí hetoká ve makó Tolopimó áisigi niasigo, ánígiake, Pauló nene monó zugusavegú alémoko itihe liki ámina gakó lamó.

³⁰ Láa liki likago, ámina apá amelage mukilite giliaké, ololu liki iki alegesá iake, Pauloni agizató aliake, monó zugusave napagutí gelelehá iliki lemémó. Nilemego, litá iki gahe gemó.

³¹ Lá iake, Pauloni alímkí apili hilinigi niago, gakóma nene Loma Amitini gímisiги vetini gizapa ve napa aitoka vokago, láa loko gilimó: Zelusale vegená mukilite lovaga nilave,

³² loko gakó geleake, ami ve iti minamó limi minamó kelémoko vike ololu liki keitoka lemémó. Lá ikago, keza Pauloni napeletotí nene gizapa ve napamagi ami vevagi anitikago, ánígiake, ahulamó.

³³ Ahulikago, gizapa ve napa nenémo anitike Pauloni aleake, goní itane loko loake, seni nagá lositatuń zitalo loko loketamó. Loketake, áisi hí ve noive itó nana netá golesa nalive loko loká oketamó.

³⁴ Loká okimikago, vegená lugáate ganimakilisi ake vivi vovoga nilakú gakó mogonáa gele hee lamike, ami vetini numukuka alímkí viro loko loketamó.

³⁵⁻³⁶ Loko lokimikago, alímkí vake numuni akaló iake itinigi niago, vegená keza kêmegetiki vake ganimakilisi iki vake imane ve asú itive liki likago, Pauloni apili hilinigi ago, ami vete aputá viziki ali milamó.

Pauló ezáa mogonagamú lo kiminogo limó

³⁷ Ami vetini numukú nene Pauloni alímkí itinigi niago, Pauló eza lova gizapa ve napama Kiliki gakokutí loká otake gakó lo gimitohe. Loko lokago, gizapa ve nenémo láa loko limó: Olo, geza Kiliki gakó gelenape.

³⁸ Gozapá Izipi ve makolímo gamani vegená lova ale kiminogo izegipa agunamotamola 4 tausen lovámini galaváa mikasi gomopalaló kelémoko vimó nenazo, geza ámina ve noape itó haitó ve noane.

³⁹ Loko loká omikago, Pauló láa loko lo amimó: Óe, nénisi nene Silisia mikasiukatí Taliso numutoka getamó nouve. Ámina taoni napa amelahina nouve. Itó geza gele nemekako, vegená imane gakó koma lo kimitohe.

⁴⁰ Loko lokago, kiapé nenémo gele amekago, Pauló nene akaló ote minake agizanitunú alata molokago, gakó hilinago, Hipulu gakokutí láa loko lo kimimó:

22

Pauló ezáa agika ale viligakumú lo kimimó (Apo 9:1-19; 26:12-18)

* **21:29:** Apo 20:4

¹ Uvónegita aménegita, nezáne mogonáne lo likimitoze, gililo.

² Loko kezáni konóikutí lo nokimigo, giliki laga laga hiliake niago, miní ameko láa loko lo kimimó:

³* Neza Zuta ve Silisia mikasigú Taliso numutoka getamó noumóza, imane apatoka Gamalielé lainim-olimiaká numukú iteko minoko napa umole. Lá okuke, monó lo neme-neme igo, avónegini aménegini gakó legesó oko minuke gele asú umó. Lá okuke, itína lekezagi ámina oko Ómasímini agulizá ale ititune lokoamuza moloaká noune.

⁴* Itó lá okago, Izesuni gapoló viaká nia vegená nene gopoguni moloketuke, ámina vegená asú itave loko lova ale kumuke ve niamó vená niamó mukitoka nagá kemekuká nagá numukú kelémo moloaká umóma neve.

⁵ Guguni giziaká a vetini ve napagi monó gizapa vegi není mogonáa mota gilinamole. Keza ligive lagaveloka Tamasiko numutoka aleko vitane liki luhuva netá nimikago, elaneloka vinake Izesuni vegená nene nagá zeko kelémo Zelusale numutoka okugo nogosani kipilitave loko lokuke, aleko vumóma neve.

⁶ Gapoló novuke, Tamasiko apá ale alí nolugo, holisaká nene okulumakutí lapaná napa galinali gulugulu loko limike, osá o nugupe imó.

⁷ Osá o nugupe okago, viligoko pou loko mikasigú akonougo, anó lupa makó láa loko gulumó: Saulo, Saulo, nanamú gopoguni nomolonetane.

⁸ Loko lokago, neza Guivahani geza éagama ve. Loko lokugo, láa loko lo nimimó: Gopoguni molonimiaká noani ve Nasalete numutotí Izesunama noluve.

⁹ Loko lokago, ve makó nezagi minamoláa keza liviláagó ánigamóza, gakó lo nimimoláa gelemamó.

¹⁰ Lá okago, neza loká otoko Guivahaníinemaka, nana ozo loko nolonetane. Loko lokugo, Guivahanímo láa loko lo nimimó: Geza otekoko Tamasiko numutoka vokako, Omasímo netá itane loko logetamó nene li giminigave.

¹¹ Loko lokago, ló lapanalámo nogómula hize likokago, goloutamigo nene límugusi zekago, vegenáne zuhate nigizató aliki Tamasiko numutoka vamó.

Pauló nene Ananiá lo ami gakó lo kimimó

¹² Neneló ve makó minamó agulizá Ananiá. Áisi nene monolagi ve minake Mosé lo hukoko li gakó nene ale amegesaló moloko agizaka hizeko minokago, Zuta ve mukilite aikumú gelego lamaná oaká imó.

¹³ Ámina ve nenémo nenitoka oko noutó ote minake nigivénega Saulo, geza gogómula goloutozo. Loko noli agepagi nogómula goloutokago, aí ánigumó.

¹⁴ Nánigugo, gakó láa loko lo nimimó: Avotegini Ómasí áisi gilitimoláa nenéminoko loló itane loko, itó aí ve heeváa ánigatane loko, itó aí gakola gilitane loko gelémo etó okave.

¹⁵ Geza aitokatí netá matá ánigoko geleko animó nenémini gakó nene numutó namató vegená lo kimitanize.

¹⁶ Itó itína imane hanuva nanamú minatane. Litá oko otekoko Izesuni agulizá okoko, monó nagamí holokako, lihimaka asú inogo ive.

Pauló hetoka vegenatoka viti gakó lo kimimó

¹⁷ Láa loko lo nemekago, Zelusale numutoka atiginá oko vuke, monó zagusave napagú ituke Ómasiloka nolugo, nigika viligokago, Izesuni ánigumó.

18 Ánigokugo, láa loko lo nimimó: Apá imaneloka keza geí gegepagutí gakóné giliuki gili ahulanigi aze, nenemú géisi Zelusalegatí litá oko ahuloko vozo.

19 Loko lokago, neza láa loko lumó: Guivahanínemaka, není mogonatagana mukí vegenalite gili asú ikave. Neza nene geikumú gili alévolé a vegená nene nagá kemekuke monó numukú numukú itegá lemegá uke, segi nogosanitunú kupulumóma neve.

20* Lá okuke, geí gakó lo utó oaká ve Setepanoni apilinigi niake gineganéini gololohá iki milikago, gizapa noketugo, Setepanoni apili nihelego golani limimó. Golani lemekago, gelekugo, lamaná imóma nenazo, Zuta vegená monó lo kimitomó nene nigika ale viligu gakó giliuki ininá iniganae.

21 Loko lokugo, Guivahánimo láa loko lo nimimó: Neza mikasi gohauka hetoka vetitoka nogimisuluze, vamane.

Ami vetini gizapa vémo Pauloni gizapa otamó

22 Vegená keza gilinago, Pauló nene gakó lugáa lo kimimóza, hetoka vetitoka vitove likumú nene anotó aliake, ganimakilisi niake ve nenémínáa asú itive. Heleliko lamaná oko minutune.

23 Liki ganimakilisi iake, kizapaló molokago, gineganéini vizakiake, usilí nizeke mumusopa gitiki nahulago,

24 ami vetini gizapa ve napámo lokago, numukú alímiki itemó. Lá ikago, vegenalite nene ganimakilisi itamó nenémimi mogonáa lo utó okiko gilitove loake, segi nogosanitunú apilitave loko loketamó.

25 Lokimikago, agisa agizató nene nagá alikago, Pauló nene gizapa venini makó láa loko loká otamó: Loma ve nounazo, goníne asú amító segi nogosanitunú nipilitamó etatihe.

26 Loko lokago, gizapa venini nenémo gizapa ve napa noitoka voko láa loko lo amimó: Ámina ve Loma ve gihila nenazo, nana otatune loko nogelene.

27 Loko lokago, gizapa ve napa nenémo Paulotoka vike loká otake Olo, geza Loma ve noape. Loko lokago, Pauló oo lokago,

28 gizapa ve napa nenémo láa loko limó: Neza haitotokatí vémina moni napa molokuke Loma ve loló umóma neve. Loko lokago, Pauló nene lá okanimóza, neza Loma mikasi amelaho getamóma nouve.

29 Loko lokago, Pauloni apilitune liki amó nene litá iki ahulamó. Ahulikago, ami gizapa ve napa nenémo Pauló nene Loma veve loko likumu geleake, nagá alitakumú ahelele vizimó.

Kansoletini holúikú Pauló gakó lo kimimó

30 Lá okago, gó lokago nene lova gizapa ve napa nenémo Zuta ve keza Pauloni nene nanamú goní nitamó nehe nenémimi mogonáa gilitove loko guguni giziaká a ve napagi keí monó kansolegi sele lokago, mukí iki alegesá ikago, Pauloni vínasimiake alímiki hetoka lemeke kovogisaló alími milamó.

23

1 Pauló eza kansole kivi holo minake, gakó láa loko lo kimimó: Nigivénérita, neza Ómasimini avogisaloka nigika vihelé ahelé ligo, minoloko iteko minútima noluve.

2 Loko noligo, guguni giziaká vetini ve napa Ananiá nene Pauloni amatoka minamoláa nene lekeza agepaló zemave.

* **22:20:** Apo 7:58

^{3 *} Loko lokimikago, Pauló láa loko lo amimó: Gigikagú guha holamó geza Ómasímo gipilinogo ive. Géisi Mosé lo hukoko li gapomaló nelémo gonító molatove loko nolanimóza, ámina lo hukoko li gakó nanamú avutá okanike nipilitave loko gala novizene.

⁴ Loko lokago, amatoka mina vegenalite láa liki li amemó: Geza Ómasímini guguni giziaká vetini ve napama nanamú ale letoko nolane.

^{5 *} Liki likago, Pauló láa loko limó: Nigive nagavese, monó gakó makó láa liki luhuva gizi milamóma neve: Geza agulizaki ve makó aleko letamo. Liki gizikago nemóma nenazo, áisi nene guguni giziaká vetini ve napama noive loko gululina, láa loko lamuline.

^{6 *} Loko loake, kansole vegutí lugáa nene Satukaio monó ve itó lugáa Palisaio monó ve minakumú ánígonoike, gakó napagutí láa loko lo kimimó: Nigivénegita, neza Palisaio monó ve nouve, itó asizónge avónige Palisaio monó ve minamóma neve. Heleakakutí goha oteaká neve loko nene gakó gelenoukumú gonító nilími nimilave.

⁷ Loko lokago, Palisaio monó vegenaki Satukaio monó vegenaki liká ahuliká ake ake kogoka hotopotó imó.

^{8 *} Lá amó nene Satukaio monó vegená nenete helenosakutí oteaká itó ageló itó vogúnigi ve nenémini netá nomive liki liaká niago, Palisaio monó vegená nenete nenémini netakumú netá gihila neve liki liaká niave.

⁹ Lá okago, alegesá ikú vivi vovoga liake, Palisaio monó vegenalitini kigilikagutí monó gelemoláa lugáate otiake gakó lolagi láa liki lamó: Imane vémini lihimamú gelehá nomive. Ageló niámó vogúnigi ve niámó makolímó gakó lo ameneitimóma nene nanave loko litune.

¹⁰ Liki liake, gopa napaga likago, ami vetini gizapa ve napa nenémo Pauloni gitigi ahulatahe loko alegesá legekago, ami veloka lokago, ake alími-likí limiake numúikuka alímiki vamó.

Pauloni apili hilinigi gohoni milamó

¹¹ Lá ikago, akiake gó lokago, makó holugú nene Guivahanímo Paulotoka utó oake láa loko lo amimó: Geza gelegesá legemino. Zelusalega není gakóno lo utó okane. Ámina oko Loma apatoka lo utó molanogo ane.

¹² Loko lokago, akiake gó lokago, Zuta ve lugáagi ali apiziale, lova gizake láa liki Ómasímini avogisaló li hukamó: Nosá naminake mose keké o noinake, Pauloni apelekinake zahí nagamí natune.

¹³ Liki la ve 40-a minake ámina gakó lova gizamó.

¹⁴ Gona giziake, guguni giziaká a ve napagi monó gizapa vetitoka viake láa liki li kememó: Leza nosánetá naminake mose keké onoinake Pauloni apelekinake nosá natune loko Ómasímini avogisaló lo hukokune.

¹⁵ Nenemú kansolegi lekezagí ami vetini gizapa ve napa noitoka gakó láa liki li milikiko, vino: Geza Pauloni lelí mulusiuka amiselekako, ino. Lá okako gakoláa lo lamaná itunize. Lekeza láa liki likiko, gakotini gelekoko lá okiko, leza Pauló nene gapoloka noiko gohoni molonoinake apele hililune.

¹⁶ Liki likago, Pauloni vegimivámo gohoni milata gakó nene geleake, voko ami vetini numukú iteake, amolahini Pauloni lo amimó.

* **23:3:** Mat 23:27-28 * **23:5:** Gá 22:28 * **23:6:** Apo 26:5 * **23:8:** Mat 22:23; Mak 12:18; Luk 20:27

¹⁷ Lo amekago, Pauló nene ami vetini gizapa ve napa makó noitoka alémoko vike láa loko lo amimó: Geza imane gipa nene gizapa ve napa noitoka alémoko vokako, gakó makó lo amitive.

¹⁸ Loko lokago, ámina ve nenémo gizapa ve napa noitoka alémoko vike láa loko lo amimó: Nagá numukú noi ve Pauló sele loake gipa imane gakó lo gimitive loko lokago alémoko nouve.

¹⁹ Loko lo amekago, gizapa ve napa nenémo gipama agizató aleake, amegeza vizitoka alémoko novike loká otake gakó nanave loko lo nimitape, lozo.

²⁰ Loko lokago, gipa nenémo láa loko lo amimó: Zuta ve keza Pauloni azo nene kangoletitoka alémoko lomokako, aí mogona goha vitagá itune liki loká igitani gi li nihukaze.

²¹ Láa liki nilikoma gele kememo. Keí vegenakutí ve 40-a nosá naminake mose keké onoinake Pauloni apelekinake nosá natune liki lova giziake, gohoni nimilake geí gakokumú gegeva iki gizapa iki niave.

²² Loko gipa nenémo lo amekago, gizapa ve napa nenémo lá loko nolike amisilimó: Geza gakó lo nemenimó nene vegená makó lo kememo, keké.

Pauló kiapé napa Pelikí noitoka vimó

²³ Láa loko loake, ami vetini gizapa ve losima sele lo kemeake, láa loko lo kimimó: Lekeza viki likisiko, ami ve mikasigú vitamoláa 200, itó hosi iza kemegesaló vitamoláa 70, itó zokaitó alitamoláa nene ámina oko 200 nenémináate ali sekele viziki holugú alímiiki Sisalia numutoka vitave.

²⁴ Itó Pauloni nene hosi alími miliiki legesó iki gizapa iki kiapé napa Pelikinimaloka alímiiki vilo.

²⁵ Loko lo kemeake, luhuva netá láa loko gizamó:

²⁶ Neza Kalautiò Lisiana kiapé napa Pelikitega, geké nologetuke luhuva netá imane gizo nogumuve.

²⁷ Gugulizaki venemaka, ami ve kezate ve makó nene alímiiki nivaze. Aí nene Zuta vete agizató aliake, apilinigi ago, nénisi nene Loma ve noive loko gelekuke, ami ve kelémo-loko vuve, kigizakutí ipá unimó.

²⁸ Ipá okunike, gonító alími milamó nenémini mogonáa gilitove loko keí monó kangoletini alegesá ikú alémoko lumumó.

²⁹ Alémoko lomokuke, neza láa loko gulumó: Kezáini vili milina gapomú gonító alími milamóza, heleaká netakumupe nagá numukú voko minoaká netakumupe nene ma lamave.

³⁰ Láa loko gelekuke, vegená lugáa keza gohoni miliake ámina ve apele hil-tune lamó gelekuke, geitoka litá oko amiselekugo, núane novive. Itó gonító alími nimila ve ámina oko kimiselekugo, geitoka viki gakoláa li gimitaze.

³¹ Luhuva netá láa loko gizokago, ámina holugú nene ami vete gizapa venini gakó gili aliake, Pauloni nene Atipatili numutoka alímiiki lemémó.

³² Limi nanitego, gó lokago, ami ve lugáa keza hosi amegesaló minamoláate Pauloni alímiiki viki

³³ Sisalia numutoka anitemó. Anitiakte, luhuva netáma kiapé Pelikini nameke, Pauloni nene agulizaki vemámini agizakú milamó.

³⁴ Lá ikago, kiapé eza luhuva netá gatoake mikasivamú loká otamó. Neza Silisia mikasigutí ve nouve lokago,

³⁵ kiapé nenémo láa loko lo amimó: Gonító gilími nimila ve keza ikiko, geí gakó litune. Loko loake, ami ve kemekago, Helotení numuni napagú ahulimiakte gizapa itiki minamó.

24

Pauloni goní itamó

¹ Numuni ligizani lugaloka asú igo akiake, guguni giziaká vetini ve napa Ananiá ezagi monó gizapa ve lugáagi vegená mukilitini kegepa aleko loáká ve agulizá Telutulómági Sisalia numutoka lememó. Limiki kiapetoka Pauloni goní itata gakó linigi vi anitemó.

² Anitikago, kiapé eza Pauloni sele lokago, okago, Telutuló nene goní otake láa loko limó: Kiapetega Peliki, geza vatí oko gizapa oletako, nonagá oko minoaká noune. Imane nouni ve lelí lelémo vatí oaká noako,

³ numutó namató vegená mukí lélisi geikumú gelekuko, etoaká noive.

⁴ Gakó háná lokugo goselé gepelekatize, nenemú gakó lagasó lo gimitomó nene geza hulu oko gele nimítame loko noluve.

⁵ Áimane vemú lizapaló moloaká i ve noive. Áisi Zuta ve numutó namató vegená lelémo golesa ike lova hitzavé loko gala vizeko loaká noive. Lá noike, Nasalete numutotí vemámini monó liaká a vetini améipo napa noive.

⁶⁻⁷ Lá noike lelí monó zugusave napa ale mumusopa zinogo noigo, aleko noune.

⁸ Géisi gonító alémo nomulunimó nenémini mogonáa vitágá oko gezaka loká otoko mogonáa ale utó molanogo ane.

⁹ Loko lokago, Zuta ve keza alími vatí ake gakola hizi lé itamó.

Pauló Pelikini avogisaló ezáa mogonámú lo kimimó

¹⁰ Lá ikago, kiapé nenémo hanuva litive loko agizanitunú avevezaha o amekago, Pauló láa loko limó: Geza imane mikasiloka kiapé loló oko gizapa oletoko noako, kilisimasi mukí oko vokave. Nenemú geleneinake, gakó litove loko gena aminake linogo uve.

¹¹ Neza Zelusale numutoka Ómasi gupá ze amitove loko iteko minutotí nene gamenáa 12-así oko vonoimole. Itó geza nenemú gagata losi gelekokoma vegená imane loká oketako li giminigave.

¹² Neza nene monó zugusave napagú itó monó numúikú itó numuni apáikú monokumú géneka háneka loko vegená keza lova hitzakumú kelémo alító mulugo ánígisá amave.

¹³ Imane vete li negú managú iake gakóne nene li nigemenazo, nenémini gihiláa ma gelepizeminigave.

¹⁴ Itó makó lo utó oko lo gimitoze, gelezo. Izesú veleleta gapo gosohakumú goselé kepeleaká noimóza, ámina gapoló mohona nouke avotegini Ómasi gupá ze ameaká nouve. Itó Mosé lo hukoko li gakoki Ómasímini agepagutí gakó liaká a vete giza gakoki mukí gele zageaká nouve.

¹⁵ Minoko vegená lamanaki golesagi nene Ómasímo helenosakutí kelémo otinogo ive loko ve imane kezagi nezagi gele zageko noune.

¹⁶ Lá unike, Ómasímini avogisaló itó vegentalitini kovogisaló nigika vihelé ahelé liko minatove loko gizapa okogó nominuve.

¹⁷ * Lá okuke, kilisimasi mukí nene mikasi mulaloka minokuke, vegená makolite moni ale nupa ikago Zelusale numutoka nigivénegini kimitove loko aleko umó. Okuke, guguni gizatomoláa ale etó okuke,

¹⁸ monó zugusave napagú iteko nigika nugupe ale vihelé aheletoko nougo, ánígamó. Nenegú vegená mulusigú minoaká nehe itó vegená vivi vovoga

loko minoaká nene nomimóza, Asia mikasigutí Zuta ve lugáa keza neneló minamó.

¹⁹ Kéisi nene není lihima ániginamó netimó nene geitoka iki goní initatanzo.

²⁰ Keí kansonletini alegesató nougo, není lihima makó ániginitamó nene imane nia vete li gimitave.

²¹* Gakó hamokó holúkú minuke lumó nenemú gili golesa ahe. Gakó napagutí láa loko lo kumumó: Heleakakutí oteaká neve loko gele zagenoukumú gonító nilími nimilago itína nene gonító nilími nimilago nouveloko lo kumumó neve.

Pauló nagá numukú minamó

²² Láa loko lokago, kiapé Pelikí nene gosohá monolá gele hee hee lo vi ve minake, Pauloni gakó lo asú amike gohalaló ale molokago, ha minamó. Lá okago, láa lokogó lo kimimó: Ami vetini gizapa ve napa Lisiá nene Zelusalegatí lemekiko, gakotini lo asú itove.

²³ Loko loake, ami vema láa loko loketamó: Lekeza Pauloni gizapa itiki némini manámini itamiki agivelage iki nasahilí otatune nilikoma, géneka lamilo.

²⁴ Hoza gakó láa loko loketake, gamena luguhá minoake, Pelikí eza Zuta vená Tulusilani alémoko itike makó niasike, Pauloni sele lo amekago, eza Izesu Kilistokumú gele alévolé i mogonamú lo kimimó.

²⁵ Vevesoko oko moloko minoakakumú itó ale hee hee loko aleakakumú itó gamena napaló goní oletati gakó nenemú lo kemekago, Pelikí nene ahelele vizekago, láa loko limó: Itína mota áminasí nenazo, nagató goha voko noako, gamena makó zupa sele lokugo, atane.

²⁶ Loko lo ameake, kiapé nenémo Pauló nene asene zenetatane loko moni nimitihe loko gele molo moloko minoaká ike, gamena gamena alesa moloake, gakó ligili hagili iki miniák asimó.

²⁷ Lá iki niasigo, kilisimasí losítá oko vokago, kiapé makó agulizá Polokió Pestó áisi Pelikini hoza agepaló alimó. Lá noigo, Pelikí eza Zuta ve muluíkú ale lamaná ike Pauló nene nagá numukú noigo, ahuloake vimó.

25

Pauló agulizaki ve napámō gakola gilitive loko limó

¹ Pestó nene kiapé loló oake, gamena losive makolegó minoake, Sisalia numutoka minatotí mota Zelusalega itimó.

² Iteko noigo, guguni giziaká a ve napagi Zuta ve iti minamoláagi anitiake, Pauloni gakola li amemó.

³ Lá iake, gapoló gohoni molonoinake apele hilitune liki lova giziaké, kiapé Pestoni láa liki gala vizemó: Mulutegú ale lamaná oko Pauloni nene Zelusalega amisilitane loko lo nogumune.

⁴ Liki likago, Pestó láa loko lo kimimó: Pauló nene Sisalia numutoka nagá numukú noive. Itó neza áminaloka litá oko lomoinogo uve.

⁵ Nenemú Pauloni mogonatagana gilitamó nene lekelitokatí gizapa ve makoki nezagi makó liminake goní itatave.

⁶ Loko loake, gamena 8-íá nehe 10-íá nehe Zelusalega minoake, Sisalia numutoka lomoko vimó. Lá oake, gó lokago, goní numukú iteko Pauloni alímiki alo loko lokago, alímiki amó.

* ^{24:21:} Apo 23:6

⁷ Alímiki itikago, Zuta ve Zelusalegatí lememoláa keza hizi vigiake vauva aliki li negú managú itiki goní itamóza, gihiláa ali utó milamamó.

⁸ Ali utó milamago, Pauló eza gakóini aleko limike láa loko limó: Neza Zuta vetini li huka gakotini neha, itó monó zagusavelini neha, itó Loma ve agulizaki ve napama neha ma aleko mumusopa zessá amuve.

⁹ Loko lokago, Pestó nene Zuta ve mulúikú ale lamaná inogo Pauloni lo amike limó: Geza Zelusalega gelémo-loko tovoko gakoka lo asú ogetatohe.

¹⁰ Loko lokago, Pauló láa loko limó: Loma agulizaki vémini goní numuni imane nemole. Nenemú není gakó imaneloka lo asú itunimó nene lamaná itive. Geza není mogonáne gelenanimole. Neza Zuta vegená netá golesa makó aleketamuve.

¹¹ Neza nipili hilita netá makó aleko ve golesa minutó nipilitove loko latilina, nugupe nehelele vizemilinamóza, keza sozagi lake gonító nilími nimilanazo, makolímo nene mulúikú lamaná gilitave loko keí kigizakú ma nelémo molamitimó neve. Nenemú Loma apatoka agulizaki ve napamámo není gakó gilikó asú itive loko noluve.

¹² Loko lokago, Pestó eza kansole vevagi ligili hagili iake, Pauloni láa loko lo amimó: Agulizaki ve napamámo gakóne gilitive loko lokanize, agulizaki ve napa Sisá noitoka vitane.

Agilipako Pelenikeko Pauloni gakó gilingi lasimó

¹³ Loko lokago, gamena makó oko vokago, mikasi gahevalokatí agulizaki ve napa makó Agilipá itó mohó agunala Peleniké keza Pestoni agizakú alitíve liki Sisalia numutoka asimó.

¹⁴ Asike, keza gamena luguhá ezagi miniki aliki niago, Pestó nene Pauloni gakoláa agulizaki vema avetó o amike láa loko lo amimó: Pelikí nene nagá numukú ve makó ahulomiake vokago, noimó nene,

¹⁵ neza Zelusalega itekugo, guguni giziaká a ve napagi Zuta vetini gizapa vetegei aí gakola makó li nimiaké ámina ve nene apele ahulatune liki voká linimató.

¹⁶ Voká linimikago, neza láa loko lo kumumó: Loma ve lelí suni lá oko nomive. Leza vegená gopa kepele ahulosá amune. Ve makó nene gakola minokikoma, ámina vegi goní itata vegenaki kelémo nupa okuko, goní itata vete likiko, ámina vémo keí gakó gelekoko uve amuve loko ezáa linogo ive.

¹⁷ Nenemú keza aí golesa netá litune liki imaneloka ikago, neza gamena hána minamuke gó lokago, goní numukú itekuke lokugo, ámina ve alímiki itemó.

¹⁸ Alímiki itikago, aí lihimavalamú ma litahé loko umóza,

¹⁹ gonító alími mila ve keza otiake kezáaini monónimú itó Pauló nene hili ve makó agulizá Izesú nene heleneikutí oteake noive likumú lova kogoka amó.

²⁰ Lova kogoka ikago, neza gakó némináamú nagata losi gelekuke, Pauló nene Zelusale numutoka itekiko gakoláa lo asú itupe loko lo amumó.

²¹ Lo amekugo, Pauló eza Loma vetini agulizaki ve napámo gakóne lo asú onetative loko limó. Loko lokago, Pauló imaneloka nagá numukú ageva oko noiko, Loma apatoka agulizaki ve napaloka amisilito gamena alitokiko vitive loko lotumó.

²² Loko Pestó lo amekugo, Agilipá lo amike neza ámina vémo gakó makó liko gilitove loko noluve. Loko lokago, Pestó nene azo gilitanize loko limó.

²³ Loko lokago, akiaké gó lokago, Agilipá ave mohó agunala Peleniké ave keza sekele mamusi ikasike, alegesá numukú itikasigo, ami vetini gizapa ve

napagi ámina apató ve iti minamoláagi kêmegetiki itemó. Iti asú ikago, Pestó lokago, Pauloni alímiki itemó.

24 Alímiki itikago, Pestó nene gakó láá loko lo kimimó: Gugulizaki ve Agilipagama itó vegénáe lugáa, gakó lo likimitoze, gílilo. Ve imane nánigamó aikumú nene Zuta ve mukilite Zelusale numutokagi imanelokagi nivi níviga lake minamitive liki negénegeka likago,

25 neza nene hiliti lihimavalamú vitagá okuke, Loma vetini agulizaki ve napámó gakóné gilitive loko likumule loko aitoka amisilitove loko lo hukokuve.

26 Lá oko lo hukumóza, imane vémini lihimavalamú vitagá okuke, agulizaki ve napaloka luhuva netá gizatove loko gulugo, gena okave. Nenemú imane ve lekelitoka itó gugulizaki ve Agilipaga geitoka aí mogonáa vitagá oko gelekinake luhuva netá gizatove loko alémo nouve.

27 Neza nagá numukú ve makó lihimavalamú vitagá oko ale utó molamoko luhuva gizaminake Loma apatoka hanuva amiselekugo vitive loko gulugo gena okave, loko limó.

26

Pauló Agilipani avogisaló ezáa mogonáamú lo amímó

1 Láa loko lokago, Agilipá eza Pauloni láa loko lo amimó: Gezaka mogonaka lokako gilitune. Loko lokago, Pauló nene agizani hisú oko gakola láá loko lo kimimó:

2-3 Zuta vete gonító nilími mili mili niave. Gugulizaki ve Agilipaga, géisi nene Zuta vetini monokumú lova logoka unike oko moloko oaká nouni mogonate géisi geleaká noanimó nenazo, geí govogisaló litove loko mulúnegú lamaná gelekuve. Nenemú geza gelekako mulukagú hulu okiko, gakóné litoze.

4 Nénisi nene umaki ve komalotí Zelusalega ve nigivénéngini holúikú minuke napa uke, oko moloko umó mogonáa nene Zuta vegenalite gilinave.

5 * Neza Palisaio ve monolímini izolahini lilí iki mina vetini holúikú minumó neve. Minugo mogonáne ániginamóma nenazo, kéisi litune likima hanuva linigave.

6 Neza Ómasímo avotegini lo moloketa gakómá gihila zitive loko gele molo moloko noukumú imane gonító nilími nimilago noluve.

7 Nene gihila zitive loko Isilae vegená lelí mulusi 12 leza únaká neteká Ómasí gupá ze ameko minoaká noune. Gugulizaki venemaka, hanuva lá oko gakó lamaná nene gele zugukumú Zuta vete gonító nilími nimilave.

8 Ómasímo hele vegená kelémo oteaká zámuzagi noikumú lekeza nanamú gilikago lá osá amimó neve liki giliaká niave.

9 * Itó neza Nasalete numutotí ve Izesuni monó ale golesa itove loko hoza napa alitove loko nagata geleaká umóma neve.

10 Gelekuke, Zelusalega ámina hoza apí umó. Guguni giziaká a ve napaloka lokugo, luhuva netá nimikago, Izesukumú gili ame vegená mukí numutó namató nene nagá kememo mohona oko minumó. Lá okuke, kipilikiko hilitave liki likago, gakóini hize lé okimiaká umóma neve.

11 Zuta vetini monó numúikú numúikú nene Izesuni vegenala zuha keza agulázá alivi letivi itahe loko nogosani kemeaká umóma neve. Lá okuke,

nénisi nene lovámini galaváa minuke, apá hotokagi gopoguni moloketoloko vumóma neve.

*Pauló ezáa agika ale viliga gakó lo kimimó
(Apo 9:1-19; 22:1-16)*

¹² Lá oko nominugo, guguni giziaká ve napa nenete luhuva netá nimikago, keí gakotó nene Tamasiko numutoka vitove loko novugo,

¹³ holínaka lokó okago, agae, gugulizaki venemaka, lapaná makolímó ho nene avilegekago ánígumó. Nánigugo, ámina lapaná nenémo okulumakutí limike, nezagi vegenáne zuhagi nouhatoka hize sata olimikago,

¹⁴ mikasigú hupatoko akunimó. Akonouko, Ómasímini anó lupámo lelí Hipulu gakokutí láa loko lo nimigo gulumó: Saulo, Saulo, nanamú gopoguni nomolonetane. Sisi loaká nogosani nene eza hosímo agisatunú zitimó nene miluma gilinogo ive. Geza hosi izatini suni aleaká noanimómámo nene miluma nogelene.

¹⁵ Loko lokago, Guivahani geza éagamave. Loko lokugo, láa loko lo nimimó: Gopoguni molonimiaká noani ve Izesunama noluve.

¹⁶ Geza ote minozo. Neza gelekelé izegipáne loló itane loko utó o nogumuve. Nene itína netá áníganímó itó minomo iteko netá matá gelepizugo ánígatanimó nenémini gakó lo utó oko minatane loko gelémo etó nouve.

¹⁷ Zuta vegená imane itó hetoka vegenalitini kigizakutí gelémo ahulo ahulo ogetoko minatove.

¹⁸ Lá okinake, hetoka vegenatoka gimiselekugo, kigika kagata kolosiko, netá golesa nene kemegesa amiiki lapaná nene alitave. Lá iiki Satani agizakutí ahulimiiki Ómasímini agizakú minataze. Lá ikiko, lihimaváini ahulokimikugo, nenikumú gili alévolé inakumule liki vihelé ahelé liki ni-amoláatini mulusigú vi hiliiki minanigave, loko lo nimimó.

Pauló monó hozavamú lo kimimó

¹⁹ Gugulizaki ve Agilipaga, neza okulumakutí vamokitana netá ánígumóma gele alekuke,

²⁰* ganá apí oko Tamasiko amelage itó alika Zelusale amelage itó Zutaia mikasigú amelaho ve itó hetoka vegená niamó keza kigika ali viligiiki Ómasiloka viki gímiiki kigika ale viligoakalímini gihila ali utó itave loko nene monó lo kemeko minumóma neve.

²¹ Nenémini umómave liki Zuta ve makolite monó zugusave napagú nígizató aliake, nepele hilitune liki niago,

²² Ómasímo alata moloake nelémo vatí omo vova vova noigo, monola nene vegená iti minamó limi minamó mukí lo kemeaká nouve. Lá uke, Ómasímini agepagutí gakó liaká a vegi Moseki alika utó iti netakumú li mila gakó nene láa loko lo kemeaká nouve:

²³* Gologí oletative loko lo moleta vema nene miluma geleko hilitive liki itó helemoláatini ale goí oketoko oteoko Zuta vegenaki hetoka vegenaki keitoka lapanalímini gakó ale utó oketative liki li hukita gakó lo kemeaká nouve.

Agilipá monokumú gele alévolé itive loko agata alimó

* **26:20:** Apo 9:20, 28:29 * **26:23:** 1 Koli 15:20; Isa 42:6, 49:6

24 Pauló ezáa mogonala láa loko lo nokimigo, Pestó nene gakó napa like láa loko limó: Pauló, geza itínasa negi hizekane. Gamena gamena luhuva netá mukí gatoko minoaká anitímo itínasa negi nohizene.

25 Loko lokago, Pauló láa loko lo amimó: Gugulizaki venemaka Pesto, negi gakó lamuve. Gakó lamaná gihila noluve.

26 Gakó nolumó nene, agulizaki ve napa Agilipá geleneive. Aitoka nene vávani oko litove. Nolu netá imane nene asugunatoka utó amimó nenazo, agulizaki ve Agilipá gele asú onoimó neve.

27 Gugulizaki ve Agilipaga, geza Ómasímini agepagutí gakó liaká a vetini gakóma mota gele alevolé onoape. Mota gele zagenane loko gelenouve.

28 Loko lokago, Agilipá nene Pauloni láa loko lo amimó: Láa lako lako mino hána aminake Kilistoni vegenala loló itane loko nolape.

29 Loko lokago, Pauló láa loko limó: Gamena hána nominoko loló itape itó mino hána amoko loló itape neza gelemuve. Gezagi ve lugáagi itínasa imane gakó nolugo nigelemó mukitokagi Ómasímo lekelémo vatí iko nenikitana lilí itave loko noluve. Nigizató nagá zinamó nenemú lamuve. Monokumukó noluve.

30 Loko lokago, agulizaki ve napa Agilipá ezagi kiapeki mohó agunala Pelenikeki ve lugáagi otiake,

31 hetoka nilemeke ligili hagili niake ve imanémo hiliti netá ahe nagá numukú minati netá ahe ma alemive.

32 Liki likago, Agilipá nene Pestoni láa loko lo amimó: Ve imanémo Loma vetini agulizaki ve napámó není gakó lo asú itive loko lamilina, gologí omikuko, hanuva viline, loko limó.

27

Pauló Loma apatoka vinogo sipigú itímó

1 Pauló nene Italia mikasigú Loma apatoka vitive liki li hukikago, Loma ami vetini gizapa ve makó minamó, agulizá Zulió. Áisi ami vetini mulusi makó agulizá Agustonive liki lamó nene mulusiló gizapa oko minamó. Lá noigo, kiapé eza nagá numukú mina ve makoki Paulonigi nene Zulioni agizakú milikago, kelémoko vike sipigú nezagi makó itunimó.

2 Ámina sipi nene Atalamito apatokatí okago, Asia mikasi age nagamí agilikaloka numuni apá mukí minató vitive liki likago, áminagú itekunike, Masetonia mikasigú Tesalonika numutotí ve makó agulizá Alistakó ezagi makó vuhá.

3 Akokunike gó lokago, sipi nene Sitona numutoka vo anitekago, Zulió nene Pauloni alémo lamaná oake gele amekago, numutoka aniteake agivelagini ánígokimikago, nasahilí itamó.

4 Lá ikago, goha sipigú itekunike novuko, vuni gapolokatí una napa alekago, Saepalasi mikasi pokola sogaloka nego una napa alemi liginaloka avilegeko vunike vunike,

5 Silisia mikasi itó Pamapilia mikasi agilikaloka letoko vunike vunike, Mila numutoka Likia mikasigú anitehá.

6 Neneló sipigút lemekunike Alesatalia apatokatí sipi makó oko minamó nene Italia mikasiuka vinogo noigo, ami vetini gizapa ve nenémo lelémago, ámina sipigú itekunike,

7 aka molo moloko silipa oko hana hana oko vunike vunike, Kinito apá liginaloka anitekuko, unámo lelémago gopa okago, numuni apá ahulokunike,

Kiliti mikasi pokolámini agilikaloka una alemi liginaloka vunike, Salomone apá avilegehá.

⁸ Silipa oko vunike vunike, Lasea apá agilikaloka apá makó agulizá sipi lamaná oko minoaká i apá nenenoka génopa génopa oko vo helega unimó.

Ohuhú napa alímó

⁹ Age nagamikú gamena háná vova vova oko nominuko, golini gamena alitokago nene, Pauló nene helekatune loko geleake,

¹⁰ kagata aleko limó: Náavegúe, goha vitupe loko gulumóza, vamitunimoláa onioive. Sipi ategekiko, henonigó golesa amitive. Vegenaki mukitoka age nagamikú limitupe loko gulumó, gena okago, noluve.

¹¹ Loko lokago, ami vetini gizapa vemámo Pauló li gakó gele ahuloake, sipiló aleaká i vegi itó sipi amelahi ki keí gakó gele alímó.

¹² Lá okago, age nagamí ohuni ánígamó nene golini gamenagú nene sipi áminaloka minamitimó okago, renemú Kiliti mikasi pokoláló ohuni makó minamó agulizá Poeniki nene ho nolimi agilikaloka, neneló voko nouko golini gamena asú itihe liki mukilite kagata aliki lamó.

¹³ Likago, sogalokatí una makó hana hana oko alekago, mota sipigú vitune liki giliaké, lukesava akilíki ali milíkago, Kiliti pokola agilikaloka novuko,

¹⁴ vo háná amuko, ámina pokolagutí ohuhú napa agulizá ezega agilikalokatí ohuhú nene amuzavagi utó oake,

¹⁵ lape ale viligatimó okago, lizamuha zekunike ahulokuko, sipima gopa gapo veleko vimó.

¹⁶ Voko pokola koma makó agulizá Kauta loko nene helegaloka nego ohuhú alemi liginaloka novuko, sipi koma makó gelelehá unimó nene nagamikú holatimó okago, génopa hoza aleko,

¹⁷ gelelehá oko sipi napamagú ale molokunike, sipi napama atigitihé loko lepa nagatunú vótotoko alunimó. Lá okunike, getanímogó o mina apá agulizaláa Silita loko netoka vokatune loko seli nene ohuhulímo aleko akúvasokative loko vínasoko ale molokuko, sipima gopa gapo veleko vimó.

¹⁸ Lá okago, ohuhúma amuzavagi aleva aleva oko minamó. Aleko noigo, gó lokago, henoni lugáa nene age nagamikú ali ahuli ahuli amó.

¹⁹ Lá iake, gó lokago, sipímini netá mata lugalokatí ámina oko ali ahuli ahuli amó.

²⁰ Lá iki mina gamena luguháma ohuhú napa aleva aleva oko noigo, ho ikani sonohí loko lapaná lamigo, vita gapo ánígamake voko gopa itupe liki kagata giliaké kelegesá ligimó.

Pauló kelémo huluga limó

²¹ Lá iki niakte nosánetá mosiaké, gamena háná minikago, Pauló nene holúkú oteake láá loko lo kimimó: Vegúe lekeza gakóné geleliná nene, itó Kiliti pokola ahulamutilina, henokanoni nene gopa amiline.

²² Itína nene lekelisi lekelegesá legemino. Vegená nene golesa aminogo une. Sipigó golesa inogo ive.

²³ Holugú není gupá ze ameaká nou Ómasímo gelekelé izegipala noutoka ageló makó amiselekago,

²⁴ lemeake láá loko lo nemekave: Paulo, geza gelegesá legemino. Geza Loma vetini agulizaki ve napama noitoka hanuva voko anitinogo ane. Gelenape. Ómasímo geí asega zegimikoko gezagi sipigú nia vegi asenini zeketanogó ive.

25 Loko lo nimimó nenazo, nenemú nigivénegita, mulutikú lamaná gililo. Ómasímo li gakó nene haha amoakalímini nenazo, gakó imane lo nimimó nene áminaló molative loko gelenoueve.

26 Lá onoimóza, sipi nenémo mikasi pokola makotó voko hizeko lolosa ginogo ive.

Nagamikú sipima zeko atigimó

27 Láa loko lokago, Atalia age nagamikú gopa gapo veleko nouko, holisi lositá oko vokago, holugú akovevé nene sipi amelage keza mikasi makó ale alitokune liki kagata gelemó.

28 Giliake, nagá ahulikago, limimó nene, ve makolímo agizani alémo sipi-toko molo geleko ánigamó nene 20-a voko alekago, komama nivake goha mili giliiki ánigamó nene 15-así voko alekago,

29 sipi nene gehani amupiló iteko zeko ategekative liake, kehelele vizekago, sipi agasalokatí lukesava losive losive ahulikago, lemekago, gó la la liki niago,

30 minake sipi amelage keza sipi nene ahulokinake golisi itune liki giliake, sipi komama vínasi ahulikago, nolimigo, soza lake leza sipi agokalokatí lukesava makó ahulokuko limititive.

31 Liki nilago, Pauló nene ami vetini gizapa vegi vegenala zuhagi láa loko lo kimimó: Ámina ve nene sipi napagú minamitamó nene, lekeza age nagamikú simá nanigave.

32 Loko lo kemekago, ami ve keza sipi komámini nagala huki ahulikago, sipi koma nene age nagamikú gopa gapo veleko vimó.

33 Lá okago, gó latihe liki ageva minikago, Pauló nene ve mukító láá loko lo kimimó: Lekeza nosánetá namake miniliki nitiki gizapa iki niago, holisi lositá oko novigo, lukugupe ahulikave.

34 Nenemú nosá natave loko noluze, pelevesava zemilo. Nosá nikí kii likiko, lekegepa vamiko, avasavagi hanuva vinogo une.

35 Loko loake, mukító ániginago, nosánetá makó aleake, Ómasí agepoka loake, gitegeko namó.

36 Nokago, ánigiaké, mulúikú lamaná okago, ámina iki nosánetá namó.

37 Ámina sipigú minuhláá 276 vegená minoko,

38 nosá noko lagatupa ahulokunike, sipigutí laisi gó nene hilulú iki ali ahulikago, sipi nene vávani oko itimó.

39 Lá noigo, gó lo vesamá noigo, mikasi ánigamóza, ánigi hee lamake gopa iake, ohuni makotó getani gunula ánigiaké, lapema nenenloka voko getatoka ititive liki giliaké,

40 lukesava akiliake, nagala huki ahulikago, age nagamikú lemekago, iha nagalaló vínasiki gelelehá iake, seliváa ali otikago, hepelímo alike hilulú o-loko getani netoka novike,

41 senató voko hize zagekago, sipi agokáa nene mikasigú hize gilitoake minokago, age nagamilímo valahuká zeake sipi agasaloka zeko atigimó.

42 Zeko ategekago, lapema ategesá okago, kalapusi vegená keza galanogosá ziki golisi vikatave liki ami ve keza kepele hilitune liki lova gizikago,

43 gizapa venini nenémo Paulokumule loko lo hukoketake, galanogosá ziaká amoláa keza apí iki nagamikú olí mili mili iiki galanogosá ziki viki getatoka ititave loko,

44 itó galanogosá zemamoláa keza nene za gatapatoki sipi zevo ategewe imoláagi ali mili mili iiki neneló hilulú iiki viká viká itave loko loketamó. Láa loko lokimikago, leza ámina netá alekunike mikasiló avasavagi ite asú unimó.

28

Pauloge Melita pokolaló itemó

1 Getatoka o asú okunike, mikasi pokola agulizá Melitave likago, guluhá.

2 Ámina pokolagú nene numuká ve keza lilími lamaná ake nasahilí ilitamó. Golini zekago, hepé lepelekago, ló gizi limikago, lotá nouko,

3 Pauló nene ló mosanakasana ale nupa oake, lokú nogizago, lokutí gosihá makó lokumú golisi epenape zeake, Pauloni agizató akoheake zoleme minamó.

4 Lá okago, mikasi amelage keza agizató nene gosihá akeheake zuuto minakumú láa liki ligili hagili iki lamó: Vegená kepele ahulo ahulo ve noitinazo, age nagamikú lemeko helemike, gunahatoka itekago, lihima naminazo, hilinogo ive.

5 Liki nilago, Pauló nene gosiháma aleko atohe ahulokago, lokú lemekago, gosihalímo apelemimó geleake minamó.

6 Lá noigo, keza lulu vizitihe itó pou loko akooko hilitihe liki ageva minamó. Gamena hána ageva minamó nene némini manámini amigo, ánigiake, genezáini ali viligiake imane ve ómai netá netive liki lamó.

7 Itó minuni apá agilikaloka agulizaki venini eza agulizá Pupilioni mikasi minamó. Áisi nene lelémo moloake, lamaná ike nasahilí oletago nene, aí numutó minunimó nene gamena losive makole minuhá.

8 Nouko, Pupilioni amelahini avisekago, matuna mesamá oká ase izapa vizeká okago, Pauló nene geleake, numunagú itike agizani nene gotolaló nomolake Ómasiloka like alémo zokamó.

9 Lá okago, ámina mikasi pokolaló kivisi vegená mukí lelitoka ikago, kelémo zokusimó.

10 Nenemú vegená mulíikú lamaná giliake, netá mukí lehizilitamó. Lá ikago, ikani losive makole goloake helekago, vituni gamena alitokago, gapolokamú nosánetá ali vatí ilimiake, sipigú ali mili mili ilitamó.

Pauló Loma apatoka anitímó

11 Ámina pokolaloka nouko, Alesatalia apatotí sipi gosohá nene golini golisi ámina pokolaloka minamó. Ámina sipímimi agokaló kei ómai netáimi lopé izegipave liki avevezaha netá lili amó. Leza nene áminagú itekunike,

12 vunike nene, Silakusa numutoka anitumimó. Neneloka gamena losive makole minokunike,

13 goha sipigú itekunike, unamú zová zeko vunike, Lekio numutoka anitehá. Neneló gó lokago, lemegesalokatí una aleake, lehelú oloko vigo, akokunike gó lokago gamena lositakó vunike Puteoli numutó anitehá.

14 Anitekunike, áminaloka monó gele vegená ánigokimikuko, lilími milamó. Lilími milikago, gamena 7-a kezagi minunimó. Nenelótí otekunike, mikasigú vunike Loma apatoka novunike,

15 Izesuni vegenala zuhate gakote giliake, lugáa ake Apio hugumatoka hotu lunimó. Lugáa nene ake apá makó agulizá Hoteli Numuni Losive Makole

netoka hotu luhá. Pauló nene ánigokimiake, mulunagú lamaná gilike Ómasi agepoka limó.

16 Nenelotí voko Loma numutoka anitekuko, kiapé makolímo gele amekago, itó gizapa ve makolímo gizapa otago, hanuva numukú minasimó.

Loma apakuka Pauló monó lo kimimó

17 Neneló numuni losive makole akoake, Zuta vetini monó gizapa venini sele lo kemekago, ikago, Pauló nene gakó láa loko lo kimimó: Nigivénérita, neza Zuta vegená nigivénegini netá golesa ma aleketamuve, itó avónegini mogonatagana ma ale golesa amumóza, keza gopa Loma vetini kigizakú nilimi milikago, Zelusale numutoka kalapusi nememó.

18 Lá ikago, Loma vamate není mogonamú vitágá iake, hilitape liki amó nene hilito netá utó amigo, vínasinitanigi lamóza,

19 * Zuta ve keza géneka likago, není nigivénegikumú gakó imaneloka alekoko litove loko amumóza, keza alévoleta liake, nipilitahe loko Loma vetini agulizaki ve napámo gakóne lo hukative loko lumó.

20 Nenemú nene ángolikimikinake lekezagi logele hagele itune loko sele lo lekemekugo, ikave. Neza Isilae vegenalite ageva iki miniaká nia vemule liki nigrizatón nagá zikago nouve.

21 Loko lo kemekago, keza láa liki lamó: Elaneloka Zutaia mikasiloka nia vete geí gakó luhuva netá lemемave. Itó vegená makolite nenelotí iki geí mogonamú gakó golesa lago ma gelemune.

22 Nenemú geza gakó aleneitanimó nene, gezaka lokako gilitune loko nolune. Lá onoimóza, numutó namató vegenalite ámina monó gakó goso-hakumú alivi letivi niago, gelenoune.

23 Liki liake, alegesá itune liki gamena milamó nene alitokago, Zuta ve mukí nenete Paulo akoaká i numukú vauva aliki alegesá amó. Lá ikago, Ómasímo gizapa okimiakálímini gakó lamaná nene neteká apí oake lo-loko vova vova noigo, límugusi zimó. Lo nokimike, Mosé lo hukoko li gakoki Ómasímini agepagutí gakó liaká a vetini gakoki luhuva giza gakó gato nokimike, Izesukumú gili alévolé itave loko kagata alimó.

24 Lá okago nene, lugáa nenete gakola gili alikago, lugáa nenete gili ahulamó.

25 Lá iake liká ahuliká iki liminigi niago, Pauló nene gakó hamokó láa loko lo kimimó: Ómasímini Sikalahulímo agepagutí gakó loaká i ve Isaiani alémo vávani okago, gakó gihila nene avotikini láa loko lo kimimóma neve:

26 * Geza voko vegená mulusigú imane láa loko lo kemezo:

Lakagataturú giliakaláa hanuva gilitamóza, gili hee laminigave.

Lokogómulatunú hanuva ánígatamóza, ánigi hee laminigave.

27 Imane vegená keza kigika hize lí okago,

kagata molokago, kogómula likokago,

kogómulatunú netá matá ánigi hee hee lisá amave.

Kagataturú netá matá ma gili hee lisá amave.

Kigikataturú netá makó gili hee lisá amave.

Lá iake, kigika ali viligisá amago, neza nana oko kelémo lamaná itove

²⁸ loko luhuva gizamóma nenazo, nenemú gakó makó lo likimitoze, gililo. Ómasímo lugutó vizeaká gapo vilimó nene hetoka vegenalitini mututoni neve. Kéisi vatí iki gili lamaná inigave.

²⁹ Loko Pauló lo ahulokago, keza limiake vamó.

³⁰ Pauló nene kilisimasi losítá nene Loma apatoka minake, ezáa netá matalatunú oko moloko oko minamó. Vegená keza iki viki iki minamó nene vatí iki ikave loko lo kemeake,

³¹ Ómasímini gasovaló minoakalímini gakó lo utó oko lo kimike, Guivahani Izusu Kilistoni gakó ale akutoko lo keme keme oko noigo, néminí manámini itamago netá makó agupeló utó amimó.

Loma Vegenalitini Luhuva Pauló Gizo Kimimó

Loma vegená nónohá kimike gizo kimi gakó

¹ Neza Paulona Izesu Kilistó eza gelekelé veva nelémo moloake aí aposolo minatane loko sele lo nemeake, Ómasímini gakó lamaná lo utó oko ale hutilí itané loko nelémo etó imó.

² Ámina monó nene Ómasímo alika nene utó itive loko gozapá lo moloake aí agepagutí gakó liaká a ve gala vizekago, monó gotola apazá pukugú luhuva gizamóma neve.

³ Ámina luhuva gizamó nene Ómasímini gipala Guivahanite Izesu Kilistokumú luhuva gizinamóma neve. Helegaloka áisi nene hanuva agupegí utó imó nene agulizaki ve Tevitini agapilamó keí holúikú utó imóma neve.

⁴ Itó helegaloka eza sikalahula gizopa lo minatímo Ómasímini zámuzagi gipala gihila minamó nenémini mogona nene heleake otikú nene utó o lamaná imó.

⁵ Izesu Kiliototoka gímizumómave loko Guivahanímo nasahilí onetake aposolo hoza lehizenetamó nene, monó lo kemekugo numutó namató vegéná keza Ómasímu gili alévolé iki gili alitave loko nelémo etó imóma neve.

⁶ Lekelisi nene keí kigevékitá niave. Izesu Kiliotoni vegenala zuha lilí itave loko sele lo lekemeneimóma neve.

⁷ Loma numutoka Ómasímini vegenala zuha lekeza mukitoka Ómasímo agika lekemeake apazá vegenala zuha lekelémo etó i vegená nene luhuva imane gizo nolukumuve.

Ameteho Ómasí itó Guivahani Izesu Kilistó aitokatí nasahilí itó hulu leketotka mino moloko minino.

Loma vegená ánígatove loko Ómasiloka limó

⁸ Gakó láa liki apí iki gili. Lekeza mukító Izesukumú gili alévolé inamó nenémini gakola nene numutó namató vegená keza gilikago lamaná imó nenemú lekelikumú Ómasí agepoka linogo Izesu Kiliototoka loaká nouve.

⁹ Neza nene gipalámini gakó lamaná noluke, nigikatunú Ómasí gelekelé omiaká noumó nene Ómasímo geleneive. Aí avogisaló gakó imane lokugo giló:

¹⁰ Neza nene numuna loaká nou gamena nene lekelikumú geleká nouve. Lá nouke, Ómasímo geleneitó netimóma nene gapo nelepizekiko, lekelitotka vitohe lokomú Ómasiloka loaká nouve.

¹¹ Láa loko nolumó nene eza nene lekelí voko ánígoleketanogo geleká nouve. Vokinake, monolímini zámuzá lehizenetamó nene gona moloko lekemekugo monokú alévolé iki minatave loko noluve.

¹² Gakó lo nolukumumó nenémini mogona lá onoive: Neza lekelitoka vokugo, Izesunímú gele alévolé unímó nenémini gihiláa eza ánígiko eza ánígiko okinake, luhusate ale kii loko minatave loko noluve.

^{13 *} Nigivénegita, není mogonamú gili guni itave loko láa loko lo nolukumuve: Hetoka vegená lugáaloka oko moloko oaká noumó áminagó oko lekelitoka vinake, monó hozámímini gihila makó ale utó itohe loko geleká

* **1:13:** Apo 19:21

noumóza, vitove loko nougo nene, netá makolímo gapo hize lí onimikago minoaká nouve.

¹⁴ Neza numuká vegenaki matúini koló o mina vegenaki, itó sukulu la vegenaki sukulu lama vegenaki monó lainim-oketatane loko lonetamó nenazo, ámina genaváa nenitoka ha minokave.

¹⁵ Nenemú Loma vegená lekelitoka áminagó oko Izesuni gakó lamaná lo likimitove loko nigikámo vávani okave.

Gakó lamanalímini zámuza

¹⁶* Ámina gakó lamaná nene Ómasímini zámuza nego Izesukumú gili alévolé ita vegená kugutó viginogo ive. Zuta vegená apí oko lá okimioko hetoka vegenaki lá oketanogo ive. Nenemú neza ámina gakó lamaná lo utó itokumú novoza helesá amuve.

¹⁷* Ámina gakó lamanakú nene Ómasímini avogisaló lihimate asú olimikago minutuni mogoná utó oaká noive. Aí avogisaló lihimate asú olimikago minoaká nenémo gele alévolé oakakukó neve. Nenemú monó gotolaú gakó makó láa liki gizinamóma neve:

Gili alévolé ikamómove loko Ómasímini avogisaló lihimáini asú okimikago minutamó nenete alévolé iki miniki aliki inigave.

Vegená mukitoka lihimategi noune

¹⁸ Nenémini mogonáa lá oko nene. Vegená kigikagú nene monó nomigo, haitopaitó netá golesa aliki minake, Ómasímini monó gihila ali gopa napa iki miniaká niave. Lá niakumú Ómasímo izapaló molamó nenémini mogona okulumakutí ale utó okave.

¹⁹ Ómasímini mogona lugáa nene ezáa ale utó oketamó nenazo, kigikagú hanuya utó oaká noive.

²⁰ Ómasí áisi nene vegenalita ánigamoakalímini mogona nene apí ike mikasi ale utó i gamenalotí ale utó imó nene aí alévolé zámuza itó ametameni haitó apazá nemó nene utó o lamaná okago, vegenalite ezáa ale utó i netalímini luhuva ánigiake, aí mogonamú gili vevesiaká niave. Nenemú vegená lugáa keza gili gopa iki Ómasímini mogonamú gele vevesamune liki litamoláa nomíve.

²¹* Keza Ómasímini mogona gilinamóza, gilitígí gelemotígí iake, noamím gelekago, agepoka lisá amave. Lá iake, kagata gelemó nene gopá napa okago, kigikagú límugusi zekago, negi hiziki mihina iaká niave.

²² Lá niake, lagatagi noune liki liaká niamóza, negi hiziaká niave.

²³* Lá iake, Ómasí alévolé ve nenémini lapaná ali otiki gupá zi aminakutí kemegesa amiake, gaha namatini, itó gosihakahalitini, itó tolova iaká vegenalitini vogunahanáini lili iake, gupá zi kimiki miniaká niave.

²⁴ Nenemú Ómasímo ahulo taiza okimiakte kiviholo ahulokago, kezáini kugupetunú sihana netá ali utó iake, kigika kagatámó kumu hili netá ali minake, gumesisi mokoló mogona haitopaitó ali utó ake iki miliki iki minake,

²⁵ Ómasímini gakó gihila kemegesa amiake, soza gakó ali gúaiká niave. Lá iake kelémo utó i ve améipini nene ahulimake, netá matá ezáa ale utó i netá nene gupá zi amiki agepoka liki gelekelé imiaká niave. Kee, Ómasí agepoka loko mino lúaló moloko minutatumíno nene etanogo ive. Lamaná.

* **1:16:** Mak 8:38 * **1:17:** Hip 2:4 * **1:21:** Epe 4:17-18 * **1:23:** Gapo 4:16-18

26 Nenemú Ómasímo ahulo hotó okimikago, kumu hilitó hilitó sihana netá ali utó amó. Lá ake, vená keza gapo Ómasímo kelepizimó nene ahuliake, haitó gapoló vake kezáini kugupetunú alemoaká suni ali utó amó.

27 Ámináminiki ve keza nene ve vená oko minoaká nene ahuliake, kigikagú gumesi mokoló mogonamú ló napa lokago, kezáikó mihina ake sihana netá haitolímini ali utó iki minamó. Lá iake, ali gopá napa amó nenémini meinaváa ámina avotigitó alemó.

28 Itó lá iake, Ómasímini mogona gilitígí gelemotígí amómave loko Ómasímo ahulo hotó okimikago, kigika kagata nene gopa oakalímini nagakú minake netá alemoakalímini ali utó iki minamó.

29 Lá ake nene, netá golesa haitopaitolímini ali kumupiló miliake, henokanonimú molo hukahuka oaká, mukahá, kemekugú noaká, vegená kepele heleaká, lova ale utó oaká, kogoka vizeaká, aleko mumusopa zeko loaká, notuni mohona oko kemegeka loaká,

30 alevo galatovo oaká, Ómasi mukahá apeleaká, kugupemú gelego iteaká, kezáini netá matáninimú kogoliza viziki kugupe ali otiaká, golesa netá nenémini gapováa gosohá ali utó iake, izóikini améikini gakó gili ahuliake,

31 kigika kagata nomimó keza gakó lamó nene ha oaká noigo, kigikatunú nasahilí amake milumaváini gilikí kigika hizi kemema vegená niave.

32 Ómasímo vegená nenémináate nogosani natave loko lo hukoko li gakó gillinamóza, gili ahuliake, ámina netá golesa gopa ali minamóza, nene netakó alemave. Vegená lugáate ámina netá alikago, etokave liake, keikumú gilikago, iteaká noive.

2

Ómasímo lihimatemú ale vevesoko goní olimiaká noive

1 * Nenemú vémage, Zuta ve noanitika itó hetoka ve noanitika, geza mogonakamú hize lé oko gakó litanimolá nomive. Vegená lugáa keza lihima ali utó niago mogonáini lotuva legeaká noanimóza, gezagi áminagó oko golesa netá aleaká noanímó nene gezakamuki lokane.

2 Ómasímo nenémini iaká nia vegenalitini lihimánimú ale vevesoko goní okimiaká noive loko gelenoune.

3 Lá oniomóza, vémage, vegená lugáa nenete netá golesa aliaká niago mogonáini lutuva legekanike nene gakó loaká noanimóza, gezagi áminagó oko golesa netá alekanike Ómasímo asene zenetative loko gelenape, olo.

4 Ómasi eza nene nasahilagi huluvagi vaí o nego, litá oko nogosani gemesá amive. Nenemú gelekako ha netá loló okahe, olo. Geza nene gigika ale viligatane loko Ómasímo asega zike hulu zou gemicaká noimó nene gelemapé.

5 Geza negi nagí hizeko gigika hize lí okago gigika ale viligamanike, ló lónogó anike, Ómasímini izapaló molati netá ale nupa oaká noane. Gamena napaló Ómasímo nogosani limiti gamenaló nene eza lihimatemú ale vevesoko lo hukati gakó utó o lamaná noiko, nogosani giminogo ive.

6 * Ómasímo vegenalita oko moloko unitímini meinava liminogo ive.

⁷ Vegená lugáa keza Ómasímini lapaná alitune liki, itó Ómasímo lugulizá ale otitive liki, itó alévolé apá lehizeletative liki goselé kepelemigo amuza miliki mogona lamaná lilí itamó nene, alévolé kemetameni lehizeketanogo ive.

⁸ Itó Ómasímini gakó gihila gili ahuliaká vegená gínikaha, netá golesa palasa ali minatamó keitoka Ómasímo izapaló molokiko mukahá netá ale utó moloko nogosani kiminogo ive.

⁹ Lá noiko, gasovagi netá miluma netá nene netá golesa aliaká nia vegená mukitoka kumupiló itinogo ive. Zuta vegenatoka utó okoko nene, hetoka vegenatokagi utó inogo ive.

¹⁰ Itó vevesiki miniki mogona lamaná lilí iki minatamó nene, Zuta vegennaki hetoka vegenaki mukító lapaná itó hulu lehizekimikoko kugulizá ale otinogo ive.

¹¹ * Ómasi nenémo vegenakumú gilimó iteká lemeká osá amive. Hamolímimi okogó gona mololetanogo ive.

¹²⁻¹³ Mosé lo hukoko li gakó kagataturukó giliaká nia vegená Ómasímo ánígamó nene vevesosá amive. Mosé lo hukoko li gakó gili alita vegená keza vevesiki minanigave loko linogo ive. Nenemú Mosé lo hukoko li gakó gelemake golesa netá aliki miniaká niámó keza mukitoka gili vevesamiki miniki gopa tolava inigave. Itó Mosé lo hukoko li gakó gilinake golesa netá aliaká nia vegená nene Mosé lo hukoko li gakokutí gona moloko goní oketanogo ive.

¹⁴ Hetoka vegená Mosé lo hukoko li gakó gelema vegená nene, kezáini kagata gilikí lo hukoko li gakó nene hanuva ámegetikago, lo huka gakó kigikagú minamó nenémini mogona utó oaká noive.

¹⁵ Mosé lo hukoko li gakokú nenéminiki iki miliki itave loko Ómasímo li gakó nene kigikagú molonoimóma neve. Nenémini mogona ali utó iaká niave. Lo hukoko li gakó nene kigikagú molokamole liki kigika nenémo ale viligá aligá ike, lugaloka géneka loaká noive, itó lugaloka ámina mogona ha lilí ilo loko loaká noive.

¹⁶ Gamena napaló ale vevesoko gona mololetanogo ive. Ómasímo Izesu Kilistoni amiselekíko, lemeko kigikagú asuguná minoaká noi gakó ale utó inogo ive. Neza Izesuni gakó lamaná loaká noutó noutó nene, áminagó oko lo utó oaká nouve.

Zuta vegená Ómasímo lo hukoko li gakoki

¹⁷ Gezakamú Zuta ve nouve loko lanitika, Mosé lo hukoko li gakó nenémo gotokaló za loló okago, leheta okanike minoaká noane. Lá okanike, neza Ómasímini mogona gele vevesonoueve loko lokanike gugupe aleko iteaká noane.

¹⁸ Lá okanike, Ómasímo oko moloko itane loko gili netá nene gelekane, itó lo hukoko li gakokú apí igimikago gelekane.

¹⁹ Itó lá okanike gezakamú láa loko loaká noane: Nénisi nene monó gelemiki gatizá mina vegená nene hanuva gapo vitave loko kelémo lolo inogo uve loko loaká noane. Itó límugusigú niámó hize hanatokimiaká nouve loko loaká noane.

²⁰ Vegená kigika gopa imó nene kelémo hee litove loko loaká noane. Monó gelemake izegipa namunigitana iki mina vegená nene apí okimitove loko

* ^{2:11:} Gapo 10:17

loaká noane. Neza Mosé lo hukoko li gakó alenoumó nenazo, nenegú gelaakalímini itó gakó gihilámini ametamenia alekuke nouve loko loaká noane.

²¹ Geza láa loko loaká noanitika, vegená lugáa monó apí okemeaká noanike, gezaka gigika nene alémo hehe losá amane. Geza vegenakumú gumina alemilo loko lo kemeaká anike, géisi nene gumina alesá amape.

²² Geza nene vego venako huki ezega emega amilizo loko loaká noanike, géisi goha ze huko ezega emega oaká noape. Geza nene soza ómai netakumú aleko letoaká noanimóza, soza ómai netalímini zugusavegutí gumina aleaká noape.

²³ Geza nene Ómasímo lo huka gakó gelenouve lokaanike, gugupe aleko iteaká noanimó nenazo, lo huka gakó nene gele ahulokanike, géisi nene Ómasi goihá giligili omiaká noane.

²⁴* Nenemú lekeza Zuta vegenakumú monó gotolaú luhuva láa liki gizinamóma neve:

Hetoka vegená nenete lekelisi iki miliki a suni ániqiake, Ómasi aliki letiaká niave.

²⁵ Mosé lo hukoko li gakó gele alitanimó nene gugupeló Ómasímini anosa milititamó nenémo gihila zinogo ive. Lo huka gakó avutá itanimó nene, gugupeló Ómasímini anosa milititamó nemóza, milititamamó gilinogo ive.

²⁶ Lá onoimó nenazo, gakó nenémini lugaloka lá oko neve: Hetoka vegená makó keza Mosé lo hukoko li gakokú vevesoaká gakó gili alitamó nenete kugupeló Ómasímini anosagi minamitamóza, Ómasímo keikumú gelekiko anosagi minamó gilinogo ive.

²⁷ Lá okiko, Ómasímini anosagi nomi vegená keza Mosé lo huka gakó ámegetoaká noani ve Zuta ve geí mogonaka lotuva liginigave. Geza nene monó pepa ale minanike Ómasímini anosa gugupeló minago minanike, Mosé lo huka gakó nene gele ahuloaká noanikumú geí mogonaka lotuva liginigave.

²⁸ Makó keza hanuva kugupetunú Zuta vegená kemetameni iko minatamó nene Zuta vegená gihila niamave. Itó Ómasímini anosa kugupelokagó minatímó nenémo netá gihila nomive.

²⁹* Kigikagú Zuta ve kemetameni iki minatamó nene, Zuta vegená gihila minanigave. Lo huka gakolímini anosa nene lugupetunukó ale minoaká nenémo netá gihila nomive. Ligikagú emane Sikalahulímini anosa ale minoaká nenémo netá gihila neve. Ve nenémináamú vegenalita guluko lamaná oakaláa nomive. Ómasímo giligo lamaná oakaláa neve.

3

¹ Nenemú Ómasímini agómularló Zuta vegená leza hetoka vegená kivilegeko noupe. Itó lugupeló Ómasímini anosa nemó nene ha hetá nehe.

² Lá oko nomive. Nenémo haitopaitolíminoko netá gihila neve. Ómasi eza Zuta vegená haitopaitó netá lehizeletonoikutí nene Ómasímini gakó lehizeletamó nenémo iteko neve.

³ Itó Zuta vegená lugáa keza Izesukumú gili alévolé amakumú nene nanave litune. Gili alévolé amatímo nene Ómasi eza nónohá zeletative loko lo mola gakó ale ahulokahe.

⁴* Óve, lá oko nomive. Vegená mukitó keza sozaló ve minatamóza, Ómasímo eza lokago alévolé oaká ve noive loko gilitune. Nenemú monó gotolaú Ómasimú láa liki gizinamóma neve:

Gakó makó nolako, gelekinake, nene gihilave loko gelekinake hize lé itune.

Mogonakamú lotuva ligikíkoma nene, géisi kiviliginogo ane.

⁵ Zuta vegená leza oko moloko nounímó nene hee lamítimo Ómasímini mogona hee limó nenémíni mogona ale utó oaká noinazo, nenemú nanave litune. Ómasímini mogona lá oko minokanazo, nenemú eza nogosani limitímó nene etaminogo ive loko litupe. Mikasiuka vete láa liki liaká niamó nenéminko gakó láa loko nolumóza,

⁶ mogonáa lá oko nomive. Ómasímini mogona hee loko minamilina, mikasiuka vegená nana oko goní oletoko nogosani limiline.

⁷ Loko lokugo ve makolite láa liki litave: Soza mogonate nenémo Ómasímo gakó lokago alévolé oaká noitímíni mogona ale utó okago Ómasímini lapaná ale oteaká noinazo, Ómasímo lihimatemú nanamú goní oletative.

⁸ Geí gakó nene gihila netimó nene lihima netá golesa loló oloko vosakutí Ómasímo miluma geleletátimo lelitoka vaí okiko agepoka lituni netá lamaná goha utó itive liki litave. Nenikumú nene láa loko loaká noane liki lotoka hiziki avetó iki lili ali iaká niave. Némika liki liaká nia vegená nene Ómasímo hee loko goní oketanogo ive.

Hehe liki nia vegená ma niamave

⁹ Nenemú nana ive. Ómasímini agómulaló Zuta vegenalita hetoka vegená kivilegeko noupe. Nenémíni oko nomive. Zuta vegenaki hetoka vegenaki leza mukitó lihima netalímíni gelekelelápou noune loko lo utó oko lo leke-mekuve.

¹⁰* Nenémíni mogonamú monó gotolaú gakó makó lá oko neve:
Ve makolímo hee hee loko minamive, keké.

¹¹ Makolímo gele vevesoko minamive.

Makolímo Ómasimú sele loko vitágá osá amive.

¹² Mukitó Ómasímini kemegesa amikave.

Pisila nomimokó niave.

Makolímo hee loko oko moloko osá amive. Ma nomive keké.

¹³* Kigikagutí gakó golesa iteaká noimó nenémo gonosi anuva nenéminko neve.

Genezáini nenémo ali viligá aligá ikago, kogoka kagaka vizeaká gakó iteaká noive.

Kegepagutí nene gipe lakegusa gakó utó oaká noive.

¹⁴* Kegepagú nene usí vizeaká gakó, ekesá gakó vávani oko utó oaká noive.

¹⁵* Lova ali utó iki kipilinigi kigisa agilaló lisiaká niave.

¹⁶ Mihina atoka vauna hizeaká noive.

¹⁷ Hulu gapo lamaná nene gili vevesisá amave.

¹⁸* Ómasimú lelegesá ligitive liki kagata gilisá amave.

¹⁹ Itó láa loko geleaká noune: Monó gotolaú gakó gizinamó nenémo Ómasímo lo huka gakó amelagitoka vo aleaká noive. Lá okago nene, vegená mukitoka

* [3:4: Age 51:4](#) * [3:10: Age 14:1-3, 53:1-3](#) * [3:13: Age 5:9, 140:3](#) * [3:14: Age 10:7](#) * [3:15: Isa 59:7-8](#)

* [3:18: Age 36:1](#)

mogonate lotuva legekago, gakó litunimoláa nomive. Itó Ómasímini avogisaló mikasigú vegená mukitoka lihimategi noune.

20 * Ómasímo lo huka gakó nenémo lihimavate lelepizeaká noimó nenazo, nenemú ve makolímo Ómasímo lo huka gakó gele alekiko nenémo lihimavala asú omiakaláa nomive.

Gele alévolé unikumule loko lihimate asú olimikago minatune

21 Lá oko noimóza, itínasa nene Ómasímo lihimate asú oletati gapo ale utó onoimóza, Ómasímo lo huka gakó ámegetoaká gapogutí nomive. Nene gapomú nene Moseki Ómasímini agepagutí gakó lili ali vete luhuva gizi miliake hizi lé amóza, itína utó o lamaná okave.

22 * Lá oko neve: Izesu Kilistokumú gili alévolé amómave loko lihimáini asú okimikago niave loko loaká noive. Gili alévolé a vegená mukitoka lá okimiaká noive. Zuta vegenaki hetoka vegenaki mogonate haitopaitolíminko nomive. Hamolímini oko neve.

23 Mukitoka netá golesa alunikeve loko gonanalivagi lapanakú vo holosá amune.

24 Izesu Kilistó eza lelí lihima meina hizeletamómave loko Ómasímo hagitaná oka nasahilí oletatímo lihimate asú olimikago minanogo une.

25 Ái nene ale utó oko lelepizekago, Izesú eza golani lepike Ómasi guguni gizo amike, golesa retate nene nagamí zelimikago, aíkumú gili alévolé ita vegená mukitoka nenémini gihiláa utó oaká noive. Itó lá imó nene Ómasímo golesa netá nene gamena hána ale-loko voko minuhá gamena zou loko minake asele zelimiaké nogosari lememike mino-loko voko noitímini mogona nene vevesave loko lelepizimó.

26 Lá noiike Izesukumú gili alévolé itamó keza lihimáini asú okimikiko minata mogona itó ezáa vevesoko oko moloko oaká noi mogona imane gamenaló utó itive loko lá olimiaká noive.

27 Mosé lo huka gakó gele aleakakú negopa, Izesukumú gele alévolé oakakú lihimate asú olimíkago minatune. Nenemú lugupe aleko iteakaláa nene asú okamóma neve. Ámina gapo nene Ómasímo hize lí okamóma neve.

28 Nene gakokumú láa loko gilitunize: Izesukumú gele alévolé osatímo Ómasímo gelekiko, lihimavate asú olimikiko minanogo une. Ómasímo lo huka gakó gele aleakakú nomive.

29-30 * Ómasi aí mogona nene hamokó nenazo, Zuta vegená itó hetoka vegená mukitoka Izesunimú gele alévolé unikumule loko lihima molole-taminogo ive. Lá onoinazo, Ómasi eza nene Zuta vegená lelí Ómasigó nomive. Ómasi nene Zuta vegenaki hetoka vegenaki mukitó Ómasile noive.

31 Nenemú gele alévolé oaká gakó ale otekunike lo huka gakó pelesa zeaká noupe. Lá oko nomive, keké. Lo huka gakó nene hize lé oaká noune.

4

Avalahá lihimate asú olimikiko minatuni gapogú ale goí imó

1 Lihimate asú olimikiko minatuni netakumú avoteho Avalahani mognamú lo moloko lo likimitoze.

* **3:20:** Age 143:2; Gal 2:16 * **3:22:** Gal 2:16 * **3:29-30:** Gapo 6:4; Gal 3:20

² Áí oko molokogú nene netá lamanakó oko moloko ikumule loko Ómasi eza lihimavala asú omikave loko lilina, Avalahá ezá agupe aleko itilinamóza, nenéminoko nomive. Ómasímini avogisaló ezá agupe aleko itemive.

³* Nenemú monó gotolaú gakó láa liki gizinamóma neve:
Avalahá eza Ómasimú gele alévolé okago, nenemule loko Ómasímo gelekago, lihimavala asú omikago minamó neve.

⁴ Ve makó eza hoza alekiko, meinaváa amitakumú nene hanuvamú namive liki laminigave. Hoza alítímini meinaváa namive liki litave.

⁵ Makó eza mogona lamaná ale-loko vitímó nenegú voko leheta amoko Ómasi eza ve golesatini lihimaváini asú okimiaká noi vemú gele alévolé itímó nene Ómasímo lihimavala ale ahulomikuve loko linogo ive.

⁶ Tevití eza nene áminagó oko Ómasímo ve makó mogona lamaná ali-likí vitakumú gelemoko lihimaváini asú okimikuve loko loketa ve makolite nene kogoliza vizitakumú láa loko luhuva gizamóma neve:

⁷* Lihimaváini ahuloketakumú, itó golesa netáini gilatoketakumú giliakte kogoliza viziaká niave.

⁸ Vegená makó nene Ómasímo lihimáini moloketonamimoláa keza kogoliza viziaká niave.

⁹ Ámina logoliza vizeaká netá nene Ómasímini anosagi nominuni ve Zuta vegená lelikó nomive. Hetoka vegenaki mukító neve. Avalahakumú láa loko geleaká noune: Eza nene Ómasimú gele alévolé imómave loko lihimavaka asú ogimikuve loko lotamó neve.

¹⁰ Nana gamenaló lá imó neve. Agupeló Ómasímini anosavagi noigo nehe, itó nomigo noigo nehe. Nomigo noigo lá omikamó nenazo, nenemú ámina anosa alítimo lihimala asú otamimó neve loko gelenoune.

¹¹* Áisi nene agupeló Ómasímini anosavagi nomimó minake, Ómasimú gele alévolé okago, Ómasímo gelekago, lihima asú otamó nenéminí mogona alapize asú oake, alika nene ámina anosa amimó. Avalahá eza lá ike, kugupeló Ómasímini anosa nomi vegená keza Ómasimú gili alévolé ita vegenalitini améipo loló onoimóma neve. Kezamuki Ómasímo gelekago, lihimáini asú okimíkiko minatave loko lokimikave.

¹² Lá okamóza, anosagi nounimoláa lelí ametehogi noive. Zuta vegená leza lugupeló Ómasímini anosagi nounikumule loko nomive. Gele alévolé oaká gapo nene avoteho Avalahá eza agupeló Ómasímini anosa velesá molamike apí oko veleleta gapogú vunike gele alévolé unikeve loko anosagi nounimoláa lelí ameteho noive.

Gele alévolé unikumú Ómasímo lo moleta netá aleaká noune.

¹³* Ómasímo Avalahanigi agapilamolagi mikasi ali lá itave loko lo moloketamó nene, Mosé lo huka gakó ámegetakumú nomive. Ómasimú gele alévolé ikumú Ómasímo lihimavaka asú ogimikugo vesesoko minokane loko lo amimó.

¹⁴* Mikasi ali lá itave loko lo moloketamó nene lo huka gakó ámegeta vegenalitini mututoni loló ilina, gili alévolé amó nenémo pisila minamimó loló iline, itó lo moleta gakó nene ha netá loló iline.

* **4:3:** Apí 15:6; Gal 3:6 * **4:7:** Age 32:1-2 * **4:11:** Apí 17:10 * **4:13:** Apí 17:4-6, 22:18-19; Gal 3:29 * **4:14:** Gal 3:18

15 Lo huka gakokú nene Ómasímo gili alemita vegená nene goní oketanogo ive loko lonoinmóma neve. Lo hukoko li gakó nene vegenatoka nomitimó nene ámina gakó gele ahuloakaláa minaminogo ive.

16 * Nenemú netá mololetamó nene alitune loko gele alévolé unimómave loko ámina netá lelitoka utó inogo ive. Nene nanamú. Áisi nasahilí olimikakeve loko, Avalahani agapilamó lelí mukitoka nene lo mola netá voxo alévolé inogo ive. Lo huka gakó ámegeta vegená keikó nomive. Avalahá nene Ómasímini avogisaló lelí mukító avoteho minake, gele alévolé oaká gapo veleletamó nene, ámina gapogú voaká nouni vegená Zuta vegenaki hetoka vegenaki leza mukító netá neve.

17 * Nenemú Ómasímo Avalahani láa loko lo moloko lo ami gakó nene monó gotolaú láa liki gizinamóma neve:

Nénisi nene geza numutó namató vetini améipo minatane loko loló nogetuve.

18 * Avalahá helenosakutí lelémo otitove loko hanuva lelémo oteaká noi vemú, itó utó ami netá nene aí gakotó utó oaká noi vemú gele alévolé imó neve. Itó agapilamó zuha hizi hutilí itave loko láa loko lo molota gakolímo gihila ziti mogona nomigo, Avalahá gopa gele alévolé oko agata losi gelemike gizapa oko minamó. Gagapilamó nene sonohí nenéminiki utó iki minanigave loko li gakotó numutó namató ve mukilitini avóipo loló oko minatikumú agata losi gelemike ageva oko minamó.

19 * Lá oake, Avalahani kilisimasiva nene 100 minake, ozaha molokago, Salá nene gelehosi moloake izegipa getati gamena asú okamóza, itó ezáa agupe gisulupa molokamóza, lá okamómave loko Ómasímú gele alévolé imó nene gologolo samimó.

20 Ómasímo agapilamó zuhamú lo moloko lo ami gakó nene gelekago, haha animó. Hanuva gele alévolé oakakú amuza moloko minake, Ómasí agepoka loko minamó.

21 Eza Ómasímú giligo, itekago, Ómasímo netá makó loló itove loko nogómulaló lo molonetamó nenazo, gihila zinogo ive loko gilimó.

22 Nenemú Avalahá gele alévolé imómave loko monó gotolaú Ómasímo gelekago lihimavala asú omikago minamó neve liki luhuva gizinamó neve.

23 Itó Ómasímo gilimó nene lihimavala asú otamó neve loko li gakó nene Avalahakumukó nomive.

24 Lezamuki luhuva gizamó neve. Guivahani Izesú heleneikutí alémo oti ve Ómasímú gele alévolé okuko, lelí nene ámináminoko lihimate asú olimikave loko loletanogo ive.

25 * Izesuni nene lelí lihimamule liki heleaká gapoló alími milamóma neve. Itó lihimate asú olimikamole loko Ómasímo alémo optimóma neve.

5

Lihimate asú olimikago nominuhatímíni gihiláa

1 Leza Izesunimú gele alévolé unimómave loko Ómasímo lihimate asú olimikave loko gelekago, Guivahani Izesu Kilistotoka voxo gímizekunike Ómasímini hulugú nouné.

* **4:16:** Gal 3:7 * **4:17:** Apí 17:5 * **4:18:** Apí 15:5 * **4:19:** Apí 17:17 * **4:25:** Isa 53:4-5

² Izesú áisi nene gahe segelimikago gele alévolé unikeve loko Ómasímini nasahilikú nominune. Lá oko nounike, Ómasímini lapaná alitune loko lagata losi gelemoko ageva oko logoliza vizeko noune.

³ Itó nenegó nomive. Gasova netalímini agikagú minoko aleko nounike logoliza novizune. Lá nounike, láa loko geleaká noune: Gasovagi netakú minoko aleko nouhá nenémo lagele loló okiko goselé lepelemiko minanogo une.

⁴ Goselé lepelemitimó nenémo alévolé okuko, Ómasímo mogonatemú gele lamaná inogo ive. Itó mogonatemú gele lamaná itímó nenémo okulumakú henonimú lagata losi gelemoko ageva oaká netá ale utó oaká noive.

⁵ Itó Sikalahú lehizeletamó nenémo Ómasímo agika lemeaká noi netá ligikagú leke vai imó nenazo, nenémú ageva oko minoaká nouhá netakumú nene hanuva ageva osá amune.

⁶ Ómasímo mola gamena alitokago, leza zámuzate nomigo gámemé onouko, Kilstó eza vegená golesa lelikumú hilimó.

⁷ Ve hee loko minati vemule voko vávani oko heleakaláa nomimóza, ve lamanakumule loko heleakaláa gena otigi oko utó ilinamó nemóza,

⁸ Ómasi áisi nene agika limi mogona lelepizimó nene golotuva netá ale-loko novuko Kilstó lelikumule loko nohiligo agika lelitoka mola mogona nene ale utó imóma neve.

⁹ Lá noike, Kilstó eza golani lepikeve loko lelí lihima ahulo asú oletamó nene gihila nenazo, gamena napaló Ómasímo lihimatémini meinava limítikutí gologí oletati gakó nene lamaná gihila neve.

¹⁰ Lélisi nene Ómasímini gala veva nouko, gipala hilike lezagi Ómasigi goha lelémo apizimó nene gihila nenazo, lelémo apizekago, Izesú nene gosohá ametamenigí minoko aleko noitímo lugutó vizekago noune loko gele alévolé onoune.

¹¹ Itó nenegó nomive. Guivahanite Izesu Kilstó lugutó vizike itína Ómasigi lelémo apizekago leza Ómasimú logoliza vizeaká noune.

Atako Kilistoko

¹²* Nenemú láa loko gilitune: Ve hamó Atakumú lihima netá nene mikasigú utó imó, itó golesa netá alimó nenémo heleaká netá utó imó. Lá ago, vegená mukilite lihima alinatímo heleaká netá nene vegená mukitoka puu loko vo alimó.

¹³ Mosé lo hukoko li gakó velesá utó onamigo lihima netá golesa hanuva mino-loko iteko minamóza, lo huka gakó makó nomitimó nene lihimáinimú loakaláa nomive.

¹⁴ Lá onoimóza, heleaká netá nenémo Atatokatí apí oake vegená hizi hutíl iki minimi itemó keitoka agulizaki ve loló oketoko minamó. Loló oketoko noigo, Mosé utó imó. Atá nene Ómasímo lo hukota gakó pelevesava zimó nenéminkí alemake haitolíminiki lihima netá ale vegenatoka heleaká netalímo agulizaki ve loló oketoko minamó.

Atá eza alika utó iti vémini avevezahaváa imóza,

¹⁵ lelegí iki minamasive. Ómasímo nasahilí oletake lihimate asú olimiaká netá hagitana lehizelimiaká noimó nenémo Atá lihima netá alimó nene avilegeneive. Ve hámakolímo lihima alekago vegená mukitoka heleaká netá utó o asú imó. Lá onoimóza, Ómasi eza nasahilí amelaho minoake Atá

* ^{5:12:} Apí 3:6

lihima alimó nene avilegeake, ve hámakó Izesu Kilistoni nasahilila vegená mukitoka lehizeletamó.

16 Itó Ómasímo nasahilí lehizeletamó nenémo Atá lihima netá alimó nene avilegeake iteko neve. Hamolíminoko nomive. Ve hamolímo lihima netá alimó nenémo puu likumule loko Ómasímo lihima lemeaká mogona utó okamóza, vegená mukilite lihima netá alikago, Ómasímo aí avogisaló lihimate asú olimikiko minutuni netá mukí hagitana lehizeletonoimóma neve.

17 Ve hamó nenémo lihima netá alekago heleaká netá lelitoka utó oake agulizaki ve loló imóza, ve hamó Izesu Kilistokumule loko alévolé apakú lugulizaki ve loló okinake aí lapaná izá moloko alituni netá nenémo avilegekave. Leza Ómasímini nasahilí itó aí avogisaló lihimate asú olimikiko minutuni netá ale lá ituni vegená neneta lá inogo une.

18 Nenemú ve hamó Atá lihima netá alekago, Ómasímo lihima lemeaká mogona nene vegená mukitoka utó imó. Ámináminoko ve hamokolímo hee lo mina netá alikumule loko lihimate asú olimikago minoko alévolé lemetameni minutuni netá hagitana lehizeletamóma neve.

19 Ve hamolímo Ómasímini gakó pelevesava zekago vegená mukitoka golesa o asú unimó. Ámina oko ve hamolímo amelahini gakó gele aleko ámegetokago mukitoka lihimavate asú olimikiko minanogo une.

20 Itó Mosé lo hukoko li gakó miní amekago, golesa netate holutegú puu loko vikumú gelenounimóza, golesa netá nene hutilí oko nego, Ómasímini nasahilí nenémo avilegeko iteko neve.

21 Lá oake, gihila lá oko utó itive loko lihima netá nenémo heleaká netá utó itive loko amakuka vike agulizaki ve loló imó. Áminámini oko Ómasímini nasahilí nenémo Ómasímini avogisaló lihima asú olimikago noinake, alévolé lemetameni Guivahanite Izesu Kilistotokatí alinogo une.

6

Lihima netá aleakakumú huluhá itó Kilistogegei otenouhá geleneive

1 Nenemú nanave litune. Ómasímini nasahilí nenémo utó oko napa oko hutilí itive loko lihima netalímini hozaváa aleloko vitupe.

2 Eé, lá oko nomive, keké. Lihima netá aleakakumú helehá gilimó nenazo, nenemú goha nana oko miní ameko lihima netá alitune.

3 Lekeza láa liki gilisá amahe: Monó nagamí nohulunike Izesu Kilistotoka voko miní amunimó nene hilikú miní amuháma neve.

4* Nenemú ametehini lapaná nenémo Kilistoni heleneikutí alémo móromoká okago otimóma neve. Áminagó oko lezagi oteko gosohá lemetameni minutune loko leza monó nagamí nohulunike nene, Kilistogegei heleko galegú nakuhá loló oaká noive.

5 Leza nene Kilistogegei apizekunike eza otimó nenéminoko lezagi otinogo une.

6 Láa loko geleaká noune: Lugupeloka ligikaloka lihima netalímini zámuza asú itive loko, itó lihima netalímini gelekeleláp minamitune loko litaha ligika nene Izesugegi zohota zaló apilinamó neve.

7 Makó eza helekiko, lihima netakumú mumuzó oakakutí akagá omikiko minanogo ive.

⁸ Kilstó hilitíminoko lezagi helekunike ezagi minoko aleko inogo une loko gele zagenoune.

⁹ Itó Kilistoni mogona geleaká noune. Heleneikutí alémo otimó nenazo, goha heleminogo ive. Heleaká netalímo goha Izesu Kilistoni avilegeminogo ive.

¹⁰ Hilímó nene lihima netakumú gamena hamó helekago, mota asú okave. Lá oake, itína minoko aleko noimó nene, Ómasímini agulizá ale otitove loko geleneive.

¹¹ Lekezatinimú áminagó iki láa liki gililo: Lihima netá aleakakumú helehá gilimó nenazo, nenemú Izesu Kilistogegi otekunike apizekunike Ómasímini agulizá ale otitune likigó gililo.

¹² Lugupe nene latila oaká lugupeló nene lihima netá nenémo není gelekeleláa minatane loko oko nogímizikoma nene, gili amemilo. Itó lukugupémo nene mokoló mogonamú nogilikoma nene, gili amemilo.

¹³ Likigisa likigizani nene lihima netalímini gelekeleláa minative liki lihima aleaká gapoló amiselemilo. Lekemeni hele minakutí otinamó nenazo, nenemú lukugupegi likigikagi Ómasi lehizitalo. Lá iiki likigisa likigizani nene Ómasi monéna lehizimikiko, netá hee lo minati netalímini gelekeleláa minatave.

¹⁴ Lekeza nene Mosé lo huka gakolímini gelekeleláa minamave. Ómasímini nasahilímimi agikagú niave. Nenemú lihima netalímo agulizaki ve loló oleketamino.

Vevesoko minoakalímini gelekeleláa minatune

¹⁵ Nenemú nana itune. Lo huka gakkó minamunike Ómasímini nasahilikú minunikeve loko nene golesa netá hanuva aliture. Eé, lá oko nomive, keké.

¹⁶ Lekelisi láa liki makó gilisá amahe. Agulizaki ve makolímini gelekelé izegipa minatune liki likigika lukugupelini lehizimiiki aí gili amitamó nene, gili amita vémini gelekeleláa lilí inigave. Lugaloka nene lihima netá nenémo agulizaki ve loló olíkimikikoma, aí gelekelé itiki miniki hiliuki lapuluva inigave. Itó lugaloka nene Ómasi gili amiiki miniki lekeza lihimavatini nomitimó minanigave.

¹⁷ Lekeza nene goí iki lihima netalímini gelekelé itiki minamó mota asú okave. Imane gamenaló nene gakkó apí ilekemeke lehizilikitinamóma neve. Áminagú likigikatunú gili aliaká niave. Nenemú Ómasi agepoka lilo.

¹⁸ Lekeza nene lihima aliakakutí gologí olíkimikago, vevesoko minoakalímini gelekeleláa niave.

¹⁹ Litaha likigika keé lamimómove loko vegentalita oko molokogú emane ale moloko gakkó imane lo nolukumuve. Lekeza nene gozapá lukugupe likigika likigisa likigizani ahulikago, gumesímini mokómimi itó mukí lihima netalímini gelekeleláa omikago, gopa napa minamóma neve. Imane gamenaló nene ámináminiki lukugupe likigika ahulikiko, vevesoko minoakalímini gelekeleláa omikiko, likigika gizopa lo miniko miniki aliki ilo.

²⁰ Lekeza lihima netalímini gelekeleláa mina gamenaló nene, netá lamanalímini gelekeleláa minamamóma neve.

²¹ Lá niake, netá iki miliki amó nenémini gihiláa zesá amimóma neve, Itó imane gamenaló ámina netakumú giliaké lokovoza heleaká noive. Nenémini amupiló heleaká netá utó imóma neve.

²² Lá onoimóza, itínasa nene lihima netakumú mumuzó oakalímini nagá vínasokago, lekeza Ómasímini gelekeleláa niave. Nenémini gihiláa etó iki miniki nene, alika alévolé apá alinigave.

²³ Lihima netalímini meinava nene heleaká neve. Itó Ómasilokatí nasahilí hagítana lehizelihiaká noimó nenémini gihiláa Izesu Kilistotoka miní ameko alévolé lemetameni alinogo une.

7

Ve aleve minoaká mogonamú lo moloko limó

¹ Nigivénérita, gamanímo lo huka gakó giliaká nia vegená lekelikumú nene noluve. Lekelisi láa liki gilisá amahe: Lo huka gakó nene geleva geleva noinake, hulukogó asú inogo ive.

² Nenemú nene vená makó nenémo vana agómulagi noiko ahulomiakaláa nene nomive liki li huka gakokú nene láa liki linamó neve. Vana helekiko nene, li huka gakokú ve vená minoakakumú li hukikita gakó nene asú omiaká noive.

³ Nenemú vená makolímo vana nene agómulagi noiko, ve makotó voko gímizitimó nene, aikumú nene mokoló vená noive loko litunimóza, vana helekiko nene, li hukikita gakó nene asú omikiko, ve makotó voko gímizitimó nene, mokoló vená noive loko laminogo une.

⁴ Nenemú nigivénérita, lekelí mogona ámináminoko neve. Kilistó hili agupeló viki gímiziakeve liki Mosé lo huka gakó ámegetiakakumú helemó gelekave. Lá niake, itína gamenaló nene Izesutoka voko gímizekunike, aí vegenala loló oko noune. Ómasímini agulizá ale otinake hehe loko oko moloko itune loko heleneikutí oteko noi ve Izesuni mututoni loló okune.

⁵ Goí oko minoko aleko uni gamenaló litaha ligikámo litó minoko aleko unike, li huka gakolímo alémo vatí igo lumu heleaká netá nenémo loláa minoake, lugupeloka ligisa ligizatoka hozaváa aleko minake sikalahute heleaká netá ale utó imó.

⁶ Lá imóza, imane gamenaló nene hulunimó nenémini okuko, lo huka gakó ámegetoakalímini nagakutí nene Ómasímo gologí oletamole loko li huka gakolímini gizapaló minamunike, gosohá gapoló Sikalahulímo veleleta gapoló vinake Ómasi gelekelé otatune.

Ómasímo lo huka gakó itó lihima netá

^{7*} Nenemú nanave litune. Mosé lo huka gakolímo gapo golesagú lelémo moloaká nehe. Nenéminoko nomive. Lo huka gakó minamilina, netá golesa aleaká noumó nenémini mogona gele vevesamuline. Mosé lo huka gakó nenémo geza molo hukamo loko lamilina, neza molo hukahuka oakalímini mogona nene gele vevesamuline.

⁸ Lá okamóza, lihima netakumú mumuzó oaká nenémo lo huka gakolímo gapo velemiaké litó litó nene, molo hukahuka oaká haitopaitolímini nigikagú ale utó oaká imó. Lo huka gakó minamilina nene lihima netakumú mumuzó oaká nenémo amuza moloko minamiline. Heleaká nenéminoko minaline.

⁹ Neza gozapá nene lo huka gakó gelemuke, nigika helemihe loko gatizá minuke, gopa lamaná minoko aleko umóza, alika nene lo huka gakó nenémo nelémo utó okago, lihima netá nenémo nigikagú amuza moloko ote vevesokago,

* ^{7:7:} Gá 20:17; Gapo 5:21

10 nigika helekave loko gulumó. Lá okago, lo huka gakó ámegetatomó nenémo alévolé nemetameni alitohe loko nogulugo ámina netalímo nigika hili netá ale utó imó.

11* Lihima netá nenémo lo huka gakolímo gapo velemikago, nigika agoka vizeake nigika apele hilimó.

12 Lá okago, Ómasímo lo huka gakó nenémo etó oko keké vizeko neve, itó hamopamó lo hukamó nene apazá etó oko vevesoko lamaná neve.

13 Nenemú lo huka gakó lamaná nenémo nigika hili netá ale utó onetamó nehe. Nenéminko nomive, keké. Lá oko neve. Lihima netá aleaká noumó nenémini mogona utó itive loko lihima netakumú mumuzó oaká nenémo gakó lamanatunú nigika hili netá ale utó onetamó. Lá onimikago, Ómasímo lo hukoko li gakó nenémo hozaváa alekago, lihima netakumú musi nizapa oaká noive.

Lihima netá nenémo ligikagú neve

14 Leza láa loko gelekáa noune: Ómasímo lo huka gakó nene Sikalahulímini nekisa neve. Itó nénisi nene litaha nigikámini nekisa nouve. Nénisi nene lihima netalímini gelekeleva nouve.

15* Neza oko moloko u netakumú gelekugo atigino vatigino oaká noive. Neza nene nivisi netá lamaná alitove loko gelekáa noumóza, alesá amuve. Alevo letovo oaká nou netá nene gopa aleaká nouve.

16 Lá oaká nouke nene, Ómasímo lo huka gakó nene lamaná noive loko hize lé oaká noumó nenémini mogonáa utó oaká noive.

17 Nenemú netá golesa aleaká noumó nene nezáne hanuva lá osá amuve. Lihima netakumú mumuzó oaká nenémo nigikagú noikeye nogoka vizekago lá oaká nouve.

18 Neza mogonáa láa loko gelekáa nouve: Litaha nigika nugupeló nene netá lamanalímini numuni apá aleko minoko aleko osá amive. Netá lamanakumú nogulumóza, gihláa ale utó ito zámuza nenitoka nomive.

19 Neza mogona lamaná alitohe loko nogulumóza, alesá amuve. Itó lihima netá alemitohe loko gelekáa noumóza, gopa aleaká nouve.

20 Lihima netá alemitohe loko nagata nogulu netáma aleaká noumó ne-nazo, nenemú nezáne lá osá amuve. Lihima netá nenémo nigikagú nego, ámina netá aleaká noumó nenémini mogonáa mota utó okave.

21 Nenitoka mogona lá oko utó oaká noive: Mogona lamaná alitohe nogulugo, lihima netakumú mumuzó oaká nenémo nogómulaloka omo alitoaká noive.

22 Neza nigikatunú nene Ómasímo lo huka gakó nene gele laga oaká noumóza,

23 lá nougo, nigisa nigizani nugupeloka haitó sunímo hozaváa aleaká noive. Nene sunímo nagata nogulu netá nenémo nigisa nigizató noinazo, lihima netá aleakalímini nagakú nouve.

24 Utó oká helekáa o yumoláa neza muhelé ahelelímini mututoni loló o vumó nounazo, nenegutí éaho gologí onetative.

25 Guivahanite Izesu Kilistó lá onetatikumú Ómasi agepoka loaká nouve. Nenemú nagataturú nene Ómasímo lo huka gakó gelekelé omiaká noumóza, litaha nigikatunú nene lihima netá gelekelé omiaká nouve.

8

Sikalalahulámo ligikagú minoko aleko oaká noive

¹ Nenemú Izesu Kilistotoka miní ameko nouhá vegená lelitoka lihima netá aleakakumú lihima limitimoláa nomive.

² Izesu Kilistotoka voko gímizunikeve loko alévolé lemetameni lehizelimi-aká noimó nene Sikalahulímo lehizelimiaká noive. Sikalahulímo gapo veleletamó nenémo lihima aleakakutí itó ligika heleakakutí gologí olimikave.

³ Litaha ligikámo nene Ómasímo lo huka gakó ámegetoakalímini zámuza nene aleko limigo, hoza alemigo, lelitoka Ómasímo alimó. Lá ike, Ómasímo hozaváa alike, litaha ligikámini golesa netalímini zámuza apelekago, limimó. Lá noike, gipala amiselekago, lihima netató minuhá vegená lelí lemetameni ale luhoake, lelí lihima asú itive loko limimó.

⁴ Nene litaha ligikámini gapoló negopa, Sikalahulímini gapoló novuni vegená Ómasímo lo huka gakokú hee hee loko oko moloko ituni gakó ámegetatune loko lá olimikave.

⁵ Litaha gapogú viaká nia vegená keza litaha kigikámo litokó iki miliki iaká niave. Itó Sikalahulímini gapoló viaká nia vegená keza Sikalahulímo litokó iki miliki iaká niave.

⁶ Litaha ligikámo litító oko moloko itunimó nene, latila inogo une. Itó Sikalahulímo litító oko moloko itunimó nene, alévolé lemetameni ale luhokinake hulu oko minanogo une.

⁷ Litaha ligikámo litó oko moloko itunimó nenémo Ómasímini gala veva minanogo une. Lá nounike Ómasímo lo huka gakó ámegetosá nene ma nenémini aminogo une.

⁸ Litaha kigikámo litó iki miliki iaká nia vegená nene Ómasímo ánigo amu hilí netá lilí isá amaye.

⁹ Lá onoimóza, Ómasímini Sikalahulímo mulutikú minoko aleko noigo, litaha likikámini gizapaló niameve. Sikalahulímo lonoitó iki miliki iaká niave. Makó keza Kilistoni Sikalahula mulúkú niamamoláa Izesuni vegenala zuha niameve.

¹⁰ Kilistó nene mulutegú minoko aleko oaká noinazo, lugupe nenémo lihima netakumú hilitító onoimóza, ligika lemeni nenémo lihimate asú olimikago minunikumule loko helemike agómulagi noive.

¹¹ * Lá okago, Izesú heleneikutí móromáká oko alémo oti ve Ómasímini Sikalahulímo nenémo mulutikú minoko aleko oaká noikoma nene, Kilistó heleneikutí alémo oti vémini Sikalahulímo nenémo mulutikú minoko aleko oaká noitimo heleaká lukugupe nene ámina oko alémo otinogo ive.

¹² Nenemú nigivénérita, litaha ligika nenémo litó oko moloko itunimó negopa, Sikalahulímo litó oko moloko itunimó nenémini genaváa lelitoka minokave.

¹³ Litaha ligikámo litó oko moloko itunimó nene, latila inogo nounimóza, Sikalahulímini zámuzatunú lukugupémo amu heleaká noi netá golesa apili ahulatamó nene, alévolé lekemetamenigi minanigave.

¹⁴ Ómasímini Sikalahulímo gapo kelepizigo mihina iaká nia vegená keza Ómasímini izegipala zuha miniaká niave.

¹⁵ * Ómasímo Sikalahulímo likimimó nene goha lekelegesá legeaká netalímini gelekelela lilí iki minatave loko nomive. Ómasímini izegipala zuha lilí iki

* ^{8:11:} 1 Koli 3:16 * ^{8:15:} Gal 4:5-7; Mak 14:36

minatave loko lekelémo lá oaká Sikalahú nene lehizeleketonoimóma neve. Sikalahulímini zámuza nenémo hize lé olimigo, ahóno aménegave loko sele loaká noune.

¹⁶ Lelí sikalahutémo Ómasímini izegipala niave loko lo lemekago Sikalahulímo ámina gakó hize lé oko ligikagú ale hutilí okago geleká noune.

¹⁷ Itó izegipala zuha nouninazo, nenemú Ómasímini helisa henoni ale lá unike Kilstioni helisa henonigi ale lá oaká nouháza, Izesú imó nenéminko gasovagi netalímini agikagú minoko miluma gilitunimó nene, aí lapaná alika ale lá inogo une.

Ómasímo lapaná ale utó oletative

¹⁸ Ómasímo okulumakú lapaná ale utó oletatimó nenémo itekave. Nenemú mikasigú miluma geleká nounimó neneló ale moloko lokugo etaminogo íve.

¹⁹ Ómasímini izegipala zuha minunimómove loko lapaná lagámini ale utó oletatikumú nenemú kigika nomimó ha netá keza gituhú niki ageva iki miniajáka niave.

²⁰* Ómasímo ale utó i netá nene kigika nomimó heleakálímini mututoni niave. Nene kezáini kagata geletó nomine. Ómasímo lokago utó okave.

²¹ Aлиka gamenaló kigika nomimó ha hetá nene hulupa loko anuva oaká nagakutí vínasokimikiko, kezagi itó Ómasímini izegipala zuha lezagi nagakutí lakavasú vizeaká lapaná alitakumú kagata losi gelemiki ageva iki minatave loko lo hukoletamóma neve.

²² Leza láa loko geleká noune: Kigika nomimó ha hetá mukító keza ká emane gamenalotí venalite izegipa getanigi miluma giliaká niamó nenéminko iki miluma giliiki miniaká niave.

²³* Itó nene kéisigó lá isá amave. Ligika lemenigi vegená lezagi lá oaká noune. Anosa mololetake lapaná alitunimó nenéminko zazaváa minative loko Sikalahú lehizeleta vegená léisi nene ligikatunú miluma geleká nouhá nene Ómasímo lelémo lá okoko lugupémo keé lamitíminko nagakú minakutí vínaoletatikumú gizapa onoune.

²⁴ Leza nene lugutó vizekago nenéminko agikagú minunike lapaná alitune loko lagata losi gelemoko ageva oaká nounimóza, ámina netá ánígutilina nene miní ameko gizapa oko minamutiline. Ámina netakumú vitagá nouniko nene gizapa oaká noune.

²⁵ Ámina netá velesá utó amigo ánígamunike legesó oko gizapa oko minoaká noune.

²⁶ Sikalahú nenémo ámináminoko keé lamuko lelémo vatí oaká noive. Leza nemú manamú Ómasiloka lokuko etative loko gelemuinazo, Sikalahulímo mulutegú minake vegenalite lamamó nenéminko lelikumú geleko Ómasiloka loaká noive.

²⁷ Lá okago, Sikalahulímo Ómasímo litoka oko Ómasímini vegenala zuha lelikumú geleko Ómasiloka lo ameaká noinazo, ligika ánígoaká ve Ómasímo eza Sikalahulímo agata gili netá geleake lelémo vatí oaká noive.

²⁸ Itó leza láa loko geleká noune: Ómasímo ligika ameaká nouhá vegená leza netá matá mukító nene hize lé oletoko lelémo vatí itive lokogó ale utó olimiaká noive. Ómasímo sele lo kimitove loko gili vegená nene lá okimiaká noive.

29 Ómasímo sele lo kimi vegená nene goí oko ánigo amu heleake, gipalámini ametameni lilí itave loko, itó agunamotamola lilí itave loko sele lo kimimóma neve.

30 Itó Ómasímo ganá sele lo kimimoláa kelémo etó imó neve. Itó kelémo etó imoláa nene lihimáini ale ahulokimikugo niave loko loketamó. Itó lihimáini ale ahulokimikugo niave loko loketa vegená nene gonanalivagi lapaná lehizeketamóma neve.

Netá makolímo lelémo ahelú ahulaminogo ive

31 Ómasímini mogonáa lá oko nenazo, miní ameko nanave litune. Ómasímo lelitoka mino moloko noikú nene makó éaho lovaga lo lemeko liviligitive.

32 Gipala hamó nene aseva zeko géneka lamike lelí mukikumú lova vetini kigizakú molamó nenazo, nenemú aikumule loko netá matá mukí hagitana lehizeletamitihe.

33 Ómasímo ezáa lihimate asú olimikave loko loletamó nenazo, eza lelémo etó i vegenala zuha lelikutí ve makolímo goní hoza ameminogo ive.

34 Izesu Kilistó ezáa hilimóza, hilimokó nomive. Mómoká oko oteake okulumakú iteko Ómasímini agizani lamagaloka noike, lelikumú negénege óko Ómasiloka loaká noinazo, éaho lihimate limitive.

35 Kilistó eza agika lemeaká noikutí éaho lelémo otopá zitive. Miluma netalímohe, itó gasovagi netalímohe, itó gopoguni moloakálamohe. Gaúna gamenámohe. Gígnegepánegekumú vitagá oakakumupe. Golivagi netá utó itikumupe. Luni leko sopolotunú lugupe hukatakumupe.

36* Ámina netakumú monó gotolaú gakó láa liki luhuva gizinamóma neve:

Geikumule liki gamena gamena gopoguni mililitiki lipili hiliaká niave. Sip-sip iza apeleko hukoaká nouhá nenémini ilimiaká niave.

37 Gakó lá oko nenazo, lá ilitatamóza, netá nenéminámmove loko lelémo akaminogo ive. Agika limi ve Izesuni zámuza hize lé olimikago netá mukí avilegekunike alévolé okogó nominune.

38 Nenemú láa loko gele seketigí onouve: Heleaká netalímohe, logómulagi minoaká netalímohe, agelolímohe, holosímohe, okulumakú alévolé oko minoaká netalímohe, itó itína utó iti netalímohe,

39 itó veletokatí limiti netalímohe, amunalokatí ititi netalímohe, némini manámini netalímo Ómasímo agika limike nasahilí olimiaká noikutí lelémo otopá zeminogo ive. Ámina agika lemeaká netá nene Guivahanite Izesu Kilistokumule loko lehizelimiaká noive.

9

Isilae vegená Ómasímo kelémo etó imoláa

1 Neza Kilistoni vegenala nounazo, gakó imane soza laminake lamaná litoze, gililo. Ómasímini Sikalahú nenémo nigika ale vávani okago nigikagú gakó nenémo hize lé onetago láa loko lo nolukumuve:

2 Neza Zuta vegenakumú miluma napa geleaká nouve. Zuta vegená mukí keza Izesuni ánigi ahulakumú nigikagú ahuu ahuu loaká noive.

3 Gapo koló ilina nene, Zuta vegená nigive nagave kelémo vatí itive loko Ómasímo usí vizenimitoki nezáne Kilistoni geisa mikutí liminogo vávani uline.

* **8:36:** Age 44:22

4 * Kezagi itó nezagi Isilae ve noune. Ómasímo vegenala gihila lelémo etó imó. Lá ike, mikasi gomopalaló aí lapanala lelepizimó, itó lo múnahæká gakó itó Mosé lo hukoko li gakó lo limike, aí avogisaló minoko agepoka liliki minatave loko gapová lelepizike gakó lamaná lo moletamó.

5 Lá okago, leza avotege Avalahage Isakage monó ali mina ve keí ka-gapilamó zuha noune. Kilistó nene lelí vegená lugupe aleake utó imó nene Zakoponi mulusigutí utó imó neve. Nenemú Kilistokumú gili alévolé itanazo. Kilistó eza netá matá mukilímíni Guivahani noimó nene Ómasímo noive. Nenemú agepoka loko mino lúaló moloko minatunize. Lamaná.

6 Lá onoimóza, Ómasímo netá matá ale utó oketatove loko limó nene haha amive. Zakoponi agapilamó zuha utó amó keza Ómasímo kelémo etó i vegená gihila lili i asú amamó.

7 * Itó Avalahani agapilamola noune liki linamoláate Ómasímini vegená gihila lilí i asú amamó. Nenemú Ómasímo Avalahani láa loko lo amimó: Gipaka makó negopa, Isakaní agapilamola kéisigó geí mututoni inigave.

8 Gakó nenémini mogonáá lá oko neve: Hanuva kugupegutí utó amó keza Ómasímini vegenala zuha lilí i asú amamó. Ómasímo netá ali lá itave loko lo moloketa gakó gili zagiaká nia vegená nene není vegenáne zuha gihila niave loko geleaká noive.

9 * Ámina netakumú Ómasímo Avalahani agómulaló láa loko lo molotamó: Kilisimasi makó oko vokiko nene, veletó nene imane ikató goha okugo Salá eza izegipala getanogo ive.

Loko lo amimó nenazo, Avalahani lo molota gakolímíni gihila nene gipala makó Isimaeletó gihila zemitive loko gilimó neve.

10 Itó nenegó nomive. Alika Lepekatoka ámina mogona utó imóma neve. Áisi nene avoteho Isakatoka lopé izegipa losítá geto molamó.

11-12 * Ámina izegipa nenetosa utó ikasike netá lamaná ahe golesahe velesá alinamasigo, Ómasí eza getati lopé izegipamú Lepekani láa loko lo amimó: Uvolaho nene agunalámíni gelekelé otatize. Láa loko limó nene, Ómasímo vegená kelémo etó itove loko agikatunú gilimó nenémo kezáini iki miliki a netakú nene leheta oaká noimó negopa, ezáa sele lo kimi netatoka leheta oaká noi mogona lelepizimóma neve.

13 * Itó Lepekani láa loko lo ami gakolímó gihila zikumú nene Ómasímo li gakó nene monó gotolagú láa liki gizinamóma neve:

Neza Zakopokumú numu helekave. Uvolaho Esaukumú goselé nepelekave.

14 Nenemú nanaye litune. Ómasímo lá oko oko moloko oaká noimó nenémo ma zová zeneihe. Íi, lá oko nomive.

15 * Ómasímo Moseni láa loko lo amimóma neve:
Neza nene ve makó agutó vizitove loko nene hanuva agutó vizitomó neve.

Ve makó nigika hize amitove loko nene nigika hize amitomóma neve.

16 Nenemú Ómasímo sele nolítimo vegenalita amuza moloko oko moloko oakakú voko alemive. Ómasímo agika hize lemeaká noikukó voko aleaká noive.

17 * Palaoni nene Ómasímo lo ami gakó nene monó gotolaú láa liki gizinamóma neve:

* **9:4:** Gá 9:4 * **9:7:** Apí 21:12 * **9:9:** Apí 18:10 * **9:11-12:** Apí 25:23 * **9:13:** Mal 1:2-3
* **9:15:** Gá 33:19 * **9:17:** Gá 9:16

Nénisi nene není zámuzatunú gelémo golesa okugo, není nugulizá numutó namató puu loko vitive loko gelémo etó onoumóma neve.

18 Nenemú Ómasímini mogonamú láa loko gilitunize: Áisi nene ve makó nigika hize amitove loko nene agika hize amitimóma neve. Itó Ómasímo ve makó agika hize lí itove loko nene hanuva hize lí itimóma neve.

Ómasímo izapaló moloaká itó agika hize lemeaká mogonáá

19 Lá noiko, lugaloka láa loko lo nimitanimó nehe: Nenemú Ómasímo lihimatemú giligo nanamú golesa oaká noive. Ómasí eza netá matá makó alitave loko nololetikovo, vegenalite gapo hizi lí itamoláá nomive.

20* Loko litanimóza, vémage, nanakalotí Ómasímini gakó pelevesava zitane. Mikasi somogitana noane. Mikasi somo nenémo loló onoi vema ale viligoko geza volane nenéminoko loló onetataninazo loko lo amitihe. Lá oko nomive.

21 Mikasi somo loló oaká vémini mogona lá oko neve: Ezáa agata gilike mikasitunú somo loló oaká noimó nene etoaká noive. Hamó mikasitunú nene lugáá nene vegenalitini mututoni loló oaká noimó nene lamanalímimi loló oaká noive. Itó lugáá nene galatini mututoni itive loko golesámini loló oaká noive.

22 Lá onoimó nenazo, Ómasí eza somo nenéminiki nia vegená lugáá nene izapaló moloakalímimi mututoni itó vo tolova oakalímimi mututoni nia vegená keí nogosani kimitove loko geleake, alika kipilitikumú asenini zeke-toloko vimó. Eza lihimáikumú izapaló moloaká noimó itó zámuzagi noimó nenémini mogona kelepirinogo lá oaká imó neve.

23 Itó somogitana oko minatuni vegená lugaloka nene aí lapanala ale lá ituni vegená ale vatí oletonoive. Lá oletake, agika hize limi vegená nene aí lapaná ohunagi noimó nenémini mogona lelepizeaká noive.

24 Nene Zuta vegená lelikó nomive. Hetoka vegenakutí sele lo kemeaká noi vegenaki lá okimiaká noive.

25* Hetoka vegenaki sele lo kemeakakumú Ómasímo li gakó nene monó gotolaú Ómasímini agepagutí gakó lo utó oaká ve Hoseani gakola láa loko neve:

Vegená kelémo molamimoláá nene není vegená niave loko litoze. Vegená lugáá nigika kememumoláá nene nigika lekemenouve loko litoze.

26* Ómasímini vegenala zuha niamate liki litatoka nene Ómasí alévolé vémini izegipala zuha niave liki linigave.

27* Itó Isaiá eza Isilae vegenakumú gamoga geko láa loko limó: Isilae vegená keza nene age nagamí agataloka getani nemó nenémini iki hizi hutíli itamóza, Ómasímo luguhákó kugutó vizinogo ive.

28 Guivahani eza mikasigú vegená goní ita hozaváá alitove loko litáoko ale hukoko ale asú inogo ive.

29* Itó Zuta vegená mukító asenini zeketamikumú nene Isaiá amunaloka emane anoza gakó láa loko limó nene alévolé okave:

Guivahanímo okulumakú netá matá mukító gizapa ve eza lagapilamó zuha lugáá asenini zeketamilina, leza Soto apakú Gomola apakú mina vegenakitana oko hele asú utiline.

Isilae vegenaki Izesuni gakó lamanaki

* **9:20:** Isa 29:16, 45:9 * **9:25:** Hos 2:23 * **9:26:** Hos 1:10 * **9:27:** Isa 10:22-23 * **9:29:** Isa 1:9

30 Nenemú láa loko gilitune: Hetoka vegená keza lihimate asú olimikiko minatune liki amuza milamamoláa nene Izesunimú gili alévolé ikakeve loko lihimáini asú okimikago minikave loko loketamó.

31 Isilae vegená keza Ómasímini avogisaló lihimate nomitimó minatune liki li huka gakó ámegetoaká gapomú vitagá iliki vamóza, ali utó amamó.

32 Nene nanamú. Keza nene Izesú veleleta gapomú gili alévolé amatímo nene lá amó. Hanuva oko moloko nouhatímo Ómasímo giliko lamaná itive liki lakumú lá amó. Lá iliki nivake nene, gapoló gehani makolímo lotohá kipilímó.

33 * Ámina gehanimú nene Isaiá li gakó nenémo voko alévolé imó. Eza láa loko luhuva gizamóma neve:

Ánigalo, Zaion apatoka gehani makó nomulumó nenémo lotohá kipilinogo ive. Itó monu gehani nomulumó neneloka kepeleko molanogo ive.

Lá onoimóza, áminamú gili alévolé itamó nenete gizapa iki mina netakumú nene hanuvamú gizapa iki minaminigave.

10

1 Nigivénegita, Zuta vegená Ómasímo kugutó vizitive loko nigikatunú lamaná gelekuke keikumú Ómasiloka loaká noumóza,

2 keza nene Ómasi gelekelé otatune liki amuza miliki niago, ánigokuke lamaná noluve. Lá niamóza, gapováa gili hehe lisá amave.

3 Ómasímitoka lihimáini asú okimikiko minata mogonáa gili vevesamave. Itó Ómasímini avogisaló lihimate nomitimó minatune liki kezáini iki miliki ita gapoló viake, lihimáini asú okimikiko minata gapo Ómasímo veleletamó neneló visá amave.

4 Leza Kilistokumú gele alévolé okuko, gili alévolé amake Ómasímo lo huka gakó ámegetokuko lamaná itune liki lina vegenalitini gapováa hize lí okave. Lá okago, aikumú gili alévolé ina vegená mukitoka nene lihimáini ale ahulo asú okimikago niave.

Guivahanimú sele lita vegená mukitoka kugutó vizinogo ive

5 * Nenemú Mosé láa loko luhuva gizamóma neve:

Ve makó keza lo hukoko li gakó nenémini hozaváa alilikí viva viva iki ali asú itamó nenete alévolé iki minanigave.

Loko Mosé limó nene Ómasímo lo huka gakó gele alekoko lihimavate asú olimikiko minatuni mogonamú limóma neve.

6 * Lá onoimóza, Izesunimú gele alévolé inake lihimate asú olimikiko minatuni mogonamú nene monó gotolaú láa liki luhuva gizinamóma neve:

Gigikauka nene éaho okulumakuka ititive,

7 itó éaho galegú limitive loko lamo.

Nenémini mogona nene itína Kilistoni aleloko limitive loko okulumakuka itesaláa nomive, itó Kilistoni nene hele vegenatokatí lugutó viziti gakó aleloko ititive loko galegú lemesaláa nomive.

8 Lá oko nomive. Nenemú monó gotolaú láa liki luhuva gizinamóma neve: Monó nene hotoka nomive. Gemetoka neve. Gegepaló neve. Itó gigikagú neve.

Kilistokumú gili alévolé ita gakó lo utó oko lo lekemeaká nouhá gakó nenemú noluve.

⁹ Láa loko lo utó oaká noune: Izesú nene není Guivahaníne noive loko gegepatunú lo utó itanimó, itó Ómasímo nene Izesú heleneikutí alémo otimó neve loko gigikatunú gele alévolé itanimó nene, Ómasímo gugutó vizinogo ive.

¹⁰ Ligikatunú gele alévolé itunímó nene, lihimate asú olimikiko minanogo une, itó legepatunú nene Izesuni agulizá lo utó itunímó nene, Ómasímo lugutó vizinogo ive.

¹¹* Nenemú monó gotolaú luhuva gizinamó nene láa loko neve:
Aikumú gili alévolé itamó nenete hizeko kememikumú kovoza heleminogo ive.

¹² Zuta vegenaki hetoka vegenaki etó iki niamave. Hamó lelegító loló olimiaká noive. Hamokó Guivahani nenémo ve mukilitini Guivahani noike, aí sele li amiaká nia vegená mukitoka nene vauva aleko nónohá zekimiaká noive.

¹³* Guivahanimú sele liaká nia vegená mukitoka kugutó vizitimó neve liki monó gotolaú luhuva gizinamóma neve.

¹⁴ Lá oko nemóza, aikumú gili alévolé amitamó nene, nana iki sele li amitave. Itó aí gakó gelemitamó nene, aikumú nana iki gili alévolé itave. Itó makolímo lo utó oko aí gakola lo kememitimó nene, aí gakó nana iki gilitave.

¹⁵* Itó Ómasímo gakó liaká ve kimiselemitimó nene, nana iki li utó iki li kimitave. Liki loká inimikikoma neza láa loko litove: Izesuni gakó li kimita vegená mota kimiseleneimóma neve. Nenemú monó gotolaú gakó makó lá oko neve:

Gakó lamaná li utó iaká nia ve keza gapo niago, kigisagutí liti liti ligo, ikago, gelekunike, ligika vávani okave.

¹⁶* Lá onoimóza, Zuta vegená mukitó ámina gakó lamaná gili alemakumú nene Isaiá luhuva láa loko gizamóma neve:

Guivahaníinemaka, gakó lo kumunímó nene ma gili alévolé inamamóma neve.

¹⁷ Nenemú láa loko gilitune: Ómasímini gakó gelekunikegó gele alévolé oaká noune, itó Kilistoni agepagutí gakó li utó niagogó gakola geleaká noune.

¹⁸* Geza nene Zuta vegenalite monó gelemamó nehe loko loká itanimó nene, neza lá oko nomive loko litoze. Monó gotolaú láa liki gizinamóma neve:
Kegepagutí gakó nenémo numutó namató vo alimó. Itó gakóini nenémo mikasisa nekisa vokisauka vo alimó neve.

¹⁹* Lá onoimóza, geza nene Isilae vegenalite gili vevesamamó netihe loko goha loká itanimó nene, neza lá oko nomive loko litoze. Mosé nene Ómasímo Zuta vegená lo kimi gakó láa loko luhuva gizamó nene apí oko gelezo:

Lekeza hetoka vegenakumú gelemó nene ha netá lili inamoláa kelémo molokugo, lekeza kemekugú nanigave. Ve lugáa negi hizi minamó nene sele lo kemekugo, keikumú mulutikú golesa gilinigave.

²⁰* Itó Isaiá ahelele vizemigo Ómasímo li gakó láa loko limó neve:
Nenikumú vitágá amatite není ániganigave. Nenikumú loká amake minamó keitoka anitinogo uve.

²¹* Itó Isilae vegenakumú Ómasímo li gakó láa liki luhuva gizinamóma neve:

* ^{10:11:} Isa 28:16 * ^{10:13:} Zoe 2:32 * ^{10:15:} Isa 52:7 * ^{10:16:} Isa 53:1 * ^{10:18:} Age 19:4
* ^{10:19:} Gapo 32:21 * ^{10:20:} Isa 65:1 * ^{10:21:} Isa 65:2

Neza nene giliki amanapa iki miniaká nia vegená gili ahuliaká nia vegená gínikaha iki miniaká nia vegená gamena hána nigizani gumí zeko alo loko sele lo kumumóma neve.

11

Isilae vegená luguhalite Ómasímini nasahilí ali alemó

¹* Nenemú geza nene Ómasímo aí vegenala zuha Zuta vegená monéna ahuloketamó nehe loko loká itanimó nene, neza óe, lá oko nomive, loko litove. Nénisi nene Isilae ve nouve. Neza nene Avalahaní agapilamó nouve. Neza nene Pezamini mulusigutí noumóza, Ómasímo viselenetamive.

² Ómasi nenémo goí oko giliké kelémó etó i vegená viseleketamímóma neve. Lekeza nene Eliani gakó nene monó gotolaú nemó nene gatiki gilisá amahe. Isilae vegená goní noketake negénegeka loko Ómasi láa loko lo amimó:

³* Guivahanínemaka, keza geí monó lili ali ve kipili hili asú iake, lónogó iki guguri giziaká a ita tele viziki ali golesa ikave. Lá ikago, imane nezagó nounazo, nezagi nipilinigi nilave.

⁴* Láa lokago, Ómasímo gakó láa loko lo amimó:

Géisigó negopa, není vegenáne zuha minatave loko neza vegená 7 tausen soza ómai netá Pealini gupá zi amema vegená nene asenini zekimikuve.

⁵ Loko limó nenazo, ámináminoko itínasa gamenaló Ómasi eza nasahilí amelaho noikeye loko Zuta vegená luguhá lelémo etó okago minokune.

⁶ Ómasímo lelémo etó oaká noimó nenémo leza oko moloko oaká nouhakú voko alemive. Ái nasahilikú nene voko aleáká noive. Leza oko molokogú voko alilina nene, soza saza nasahilí minaline.

⁷ Nenémini gihiláa láoko neve: Isilae vegená mukító keza lihimáini minamítive liki vitagá a netá ali utó amamó. Ómasímo kelémó etó i vegená kéisigó ali utó amó. Lugáa keza nene kigika hize lí okago, negi nagi hiziki minamó nene

⁸* monó gotolaú luhuva láa liki gizinató utó imó neve:

Ómasímo kigika ale gopa oká itó kogómula ale gopa oká, kagata hize lí oká okago minamó ámináagi itína ha niave.

⁹* Itó Tevití láa loko luhuva gizamóma neve:

Lova ve galinali atakumú gelemíki nosánetakumú gelego ititimó nenémo kipilitimó neve.

Lotohá kepelekiko pou liki akiiki lihimáinímini meinava alinigave.

¹⁰ Keza nene kogómula likokiko likatiká iki mihina itave.

Kemegesaló agohí gihiki guni guni miliki mihina mihina iki mini lúaló miliki minanigave, loko limó.

Hetoka vegená kugutó viziti gakó

¹¹ Geza nene Isilae ve keza lotohá kepelekago monéna pou liki akamó nehe loko loká itanimó nene, neza láoko nomive loko litoze. Keza netá golesa aliki minamómave loko Zuta vegená keza ániiki kemekugú niuki Izesutoka viki gímitavé loko Ómasímo kugutó vizeaká netá nene hetoka vegená lehizekikimikave.

* **11:1:** Pili 3:5 * **11:3:** 1 Kug 19:10,14 * **11:4:** 1 Kug 19:18 * **11:8:** Gapo 29:4; Isa 29:10

* **11:9:** Age 69:22-23

¹² Zuta vegená keza lihima aliki minikago monó nene numutó namató Zuta vegená minamamoláaloka puu loko vimó. Itó Zuta vegenalite Izesukumú gili gopa amómave loko Ómasímo nene hetoka vegená kelémo lamaná oko nónohá zeketamó. Lá onímó nenazo, nenemú Ómasímo Zuta vegená gihila kelémo atiginá o asú okiko, hetoka vegenatoka gihila haitolíminko golivagi zinogo ive.

¹³ Hetoka vegená lekeza lo likimitove. Lekelí aposolo nouke hozanemú gulugo itekago, nogoliza novizuve.

¹⁴ Vegenáne zuha lugáa monokumú kumu helekiko giliiki lamaná itave loko ámina hoza aleloko novuve.

¹⁵ Ómasímo Isilae vegená ahuloketatímini gihila nene hetoka vegená nene mikasí vogalaló numutó namató viki minakutí kelémo atiginá imó. Nenemú Ómasímo Isilae vegená goha kelémo molatímo nene hilinakutí atiginá itamó gilinogo ive.

¹⁶ Sikoni vatá niake, ganá nosá nene Ómasíminive liki amikago, etó oko nego, mukitoka hutíli oko etó okogó minanogo ive. Eza luhusa nenémo avasavagi etó oko noikoma, izana hazana ámináminoko etó okogó minanogo ive. Ámináminoko leza Zuta vetini avotege goí iki monokú etó iki minikago, kagapilamó zuha ámináminiki Ómasímini vegenala minanigave.

¹⁷ Zuta vegená keza olivi za lamaná nenéminiki minamó, itó avóike Ómasímo nónohá zeketa ve nene za luhusa nenéminiki minamó, itó hetoka vegená nene ekesá olivi za nenéminiki minamó. Lá ikago, Ómasímo nene za lamanalímíni izana makó hukoko ale ahuloake, ekesá zagutí izana makó hukoake za lamaná huko ahulakú nene miní ameko hizekago, luhusámini nozoa nenémo aminí ameaká noive.

¹⁸ Nenemú hetoka vémage, goí oko huko ahula izanagitana Zuta vegenakumú gele golesa amo. Géisi nene luhusa hize lé otamane. Luhusa nenémo géi hize lé ogimiaká noinazo, nenemú gugupe aleko itemo.

¹⁹ Loko lokugo, géisi láa loko linogo ane: Ómasí nenémo není nene miní amenetanogo goí oko mina izana nene hukokave.

²⁰ Loko gakó gihila litanimóza, Zuta vegenalite monó gili alévolé amamómave loko huko ahulonoimó neve. Gele alévolé anikumukó kei numutagató noane. Nenemú geza gugupe aleko itemoko gehelele vizikominozo.

²¹ Ómasí nenémo Zuta vegená olivi za lamanakitana mina vegená asenini zeketamímó nenazo, gezagi Ómasí viselettanímó nene ámináminoko asega zegetaminogo ive.

²² Nenemú géisi nene Ómasímini nasahililamú itó amuza molatikumú gagatí molamino. Amuza molamó nenémini gihiláa nene monó kemegesa ame vegenatoka utó oaká noimóma neve. Itó aí nasahilikú alévolé oko minanitimíni gihiláa nene aí nasahilí lamaná geitoka utó oaká noive. Miní ameko nasahililagú minamitanímó nene, gezagi hukoko ale ahulanogo ive.

²³ Itó Ómasí nene miní ameaká zámuzagi noinazo, Zuta vegená keza Izesukumú gili alévolé ama mogona ahulatamó nene, Ómasímo miní ameketatoive loko hanuva goha miní ameketanogo ive.

²⁴ Hetoka vegená lekeza ekesá olivi za nenéminiki minamómá neve. Ómasímo ekesá olivi zagutí izana makó hukoake, gosohá suni alike za lamanakú miní ameko hizimó nenazo, nenemú Zuta vegená kelémo atiginá

itove loko vávani oko kezáini numutagá ikú kelémo atiginá okiko, iki minangiave.

Isilae vegená mukitoka kelémo atiginá itive

25 Nigivénérita, lekeza nene Zuta vegenakumú gili gopa iki lezatete kivilgeko gele vevesoaká noune liki lukugupe aliki itikataze. Nenemú asuguná gakó makó lo lekemekugo gilitave loko geleaká nouve. Isilae vegená lugáa gínikaha iki minakú miniliki niviko hetoka vegená keza monó agikagú vi asú itamó nene,

26 * alika nene Isilae vegená mukitoka kugutó vizekiko lamaná iki minangiave. Nenemú monó gotolaú gakó makó láa liki luhuva gizinamóma neve: Zaion agokalotí lugutó vizeaká ve lamaná utó oko, Zakoponi agapilamó keitoka anuva oko ne netá nene giteko ale ahulanogo ive.

27 * Itó lo munaheaká gakó láa loko lo hukoketanogo uve: Neza nene lihimáini nagamí zekinake apizeko minutune loko Ómasímo limóma neve.

28 Isilae vegená keza Izesuni gakó lamaná gili ahuliaká niakumú Ómasímini gala ve lilí niatímo hetoka vegená lekelémo vatí oaká noive.

29 Lá onoimóza, Ómasímo nónohá zelimiaká noikumú itó sele lo lemeaká noikumú genezala ale viligá aligá amitimó nenazo, Zuta vegená gozapá kelémo etó oake avóikini gakó lo moloketamole loko Ómasímo agika kemeaká noi vegená niave.

30 Hetoka vegená lekeza gozapá gínikaha iake nene minamóza, itína Isilae vegená keza gínikaha ikago, Ómasímo agika hize lekemeake lekelémo lamaná imóma neve.

31 Áminagó iki Zuta vegená itína gínikaha iki niago, Ómasímo agika hize nolikimímo nene ámináminoko goha agika hize kiminogo ive.

32 Zuta vegená niamó minamamó mukitoka nene alika agika hize kimitove loko pelevesava ziaká niamómámini nagakú ahulokimikago niave.

Ómasí agepoka li gakó

33 * Agae, Ómasímo gele asú oko minumuni lisolimiaká amelaho noive. Gele vevesoaká ohuni aitoka neve. Lo hukoakala nene vegenalita gelemunitíminoko neve. Hoza aleakalímíni gapová nene vegenalita vevesoakaláa nomive.

34 * Nenemú monó gotolaú luhuva makó láa loko neve:

Guivahanímíni agikagú gakó nemó nene, ve éaho geleneimó neve.

Gakó akó noligo nene, éaho alémo vatí igo limó neve. Ma nomive.

35 * Éaho goí oko netá makó lehizetatító apasoko amitive. Nenéa nomive.

36 * Loko limó nene netá mukí aitokatikó utó oaká noive. Itó áisígó lokago utó oaká noive. Itó netá matá mukí nene aí gelegele nenazo, ámina monó gotolaú gizina gakó nene gihila neve loko gelenoune. Nenemú nene agepoka linake miní ameko mino lúaló moloko minutune. Lamaná.

12

Ligikagi lugupegi Ómasí lehizetatunize

* 11:26: Isa 59:20-21 * 11:27: Zel 31:33-34 * 11:33: Isa 55:8 * 11:34: Isa 40:13 * 11:35:

Hio 41:11 * 11:36: 1 Koli 8:6

¹ Nenemú nigivénegita, Ómasímo agika goha hize lekemeaká noimó nenemule loko lekelémo mómoká oko gakó lo likimitoze, gililo. Ómasímo mukí loló oleketonoi netakumú gili niminiki Ómasímini monola ali otitamó nene lamaná itive liki giliniki likigika lukugupe nene guguri gizoaká netá alévolé oko minoakalímini itó etó oko minoakalímini Ómasímo ánigo amu heleakalímini minatave liki Ómasi lehizitalo.

² Itó iki miliki itamó nenémo monó gelema vegenalitini avevezahaló loló amino. Lekeza nene Ómasímo likigika ale viligokiko haitó lakagata gilikiminalo. Lá ikiko nene, Ómasímo lititoka molatitoka iti netá nene, netá lamaná itó Ómasímo laga avisiti netá itó vihelé lo minati netá nene ali lekelí itaze.

³ Ómasímo nasahilí lehizenetakumú mukít láa loko lo nolukumuze, gililo: Lekezatinimú lakagata gilikiko etati lelegító áminalokó minino. Avilegeko goha itemino. Ómasimú gili alévolé ikago monolímini zámuza lehizeleketamó nenemú gili miniki mogonatini etó etó iki lotuva ligitaze.

⁴* Lugupe nene hámakó neve, itó lugupémini gelekeleláa mukí minake, haitopaitó hoza aliáká niave.

⁵ Ámináminoko vegená nene mukí nounimóza, Kilistotoka voko gímizekunike mulusi hamokó noune, itó leza keikumú gelegele nouko keza lelikumú gelegele nianazo, lugupe aleko iteakaláa nomive.

⁶* Ómasímo nasahilí haitopaitolímini oko lehizelimidago, lelí monó zámuza haitopaitó alenoune. Nenemú limi avotigí oko hoza alinogo une. Nenémini agikagú makó eza Ómasímini agepagutí gakó lo utó itimó nene, Ómasímo gakó gihiha alapizi avotigitó lo utó itize.

⁷ Makó eza monokú gelekelé oketatove loko litimó nenémo ezáaloka zámuza minati avotigitó gelekelé itize. Makó eza gakó lainim-oketati hoza alitove loko ezáaloka zámuza minati polosanava nenémini itize.

⁸ Makó eza kagata aleaká gakó litimó nene, ezáaloka zámuza minati avotigitó kagata alitize. Makó eza Ómasímini hozaló moni ahulatove loko litimó nene, mulunagú lamaná geleko ahulatize. Makó eza monó gele vegenatoka gizapa okimiaká hoza alitove loko nene amuza moloko gizapa itize. Makó eza gohogó vegená nasahilí oketatove loko nene agoliza vizeko nasahilí oketatize.

Gosohá oko moloko ituni gakó

⁹ Likigika hizi kimiki nasahilí ikimiaká nene lukugupetunukó lá amilo. Netá golesamú nene musi likizapa ino. Netá lamaná nene ali gikitiki ali minalo.

¹⁰ Lekeza zuhaloka aliaká niamómámini iki likigivetikini likigika kimiiki nene apiziki minatamó nenémo lukumu hilino. Ve makolitini kugulizá ali otiki golómeni giziki eza aviliko eza aviliko okogó ale otitune liki gililo.

¹¹ Monó hoza alinigi nene, goselekaselé amiki amuza milikigó alilo. Guivahani gelekelé itiki mulutikú ahuu ahuu liko minalo.

¹² Ómasímo likimiti netakumú lakagata losi gelemiki ageva iaká niakumú lokogoliza viziki minalo. Miluma metalímini agikagú niminiki hulu iki minalo. Ómasiloka loaká nene ali gikitiki ali minalo.

13 Ómasímini vegenala zuhate netakumú vitagá niikoma, kilími vatí iki kimilo. Veno vegená niikoma nene, kilími miliki nasahilí ikitalo.

14 * Gopoguni mililikitata vegená nene Ómasiloka likiko nónohá zeketatize. Kelémo golesa itive loko negopa, nónohá zeketative liki lilo.

15 Mulúikú lamaná gilita vegená nene lekezagí lilími vatí iki mulutikú lamaná gilio. Ive iki miluma gilita vegená nene lekezagí kilími vatí iki miluma gilio.

16 * Lekezatini vitagá iaká nia netá nene likigivetitokagi utó itive liki amuza milalo. Lekezatinimú giličko itemiko, limíki mina vegenaki iki miliki mihina ilo. Lekezatinimú giličko, gele vevesoaká vegená loló amino.

17 Golesa netá eza amupiló molokiko eza amupiló molokiko amilo. Vege-nalite giličko etati netakumukó gilio.

18 Nenémini gapováa utó neikoma, itó lekelí netá neikoma nene, numutó namató vegená mukitoka gouna ziki minalo.

19 * Nigivénegita, lihimavatini mililikitatamó nene lekezatini apasikita-milo. Ómasímo mukahá olimiti gamenalokumú milalo. Nenemú monó gotolaú luhuva makó láa liki gizinámóma neve:

Guivahanímo láa loko lokave: Lihima apasoaká nene není hoza neve. Lihima apasoaká hoza nene nezáne alitove,
loko lokave.

20 * Lekelisi nene monó gotolaú láa liki gizina gakó nenazo, nenémini ikgó minalo:

Gala velini nene gaúna hilikikoma nosánetá kimilo. Nagamikumú kivisekikoma nagamí kimilo. Lekeza lá itamó nene, kovoza hiliko miluma gilitaze.

21 Golesa netá nenémo lekelí lekelémo-loko lememino. Nenéa nomive. Lekeza mogona lamaná nene lilí iki miniki golesa netáini nene ahulataze.

13

Gamani vegenalitini gakó gele alitune

1 Vegená mukitoka nene gamani vegenalitini gakó gili alitave loko noluve. Gamani hoza nene Ómasímo litokó naleve, itó gamani vegená nene Ómasímini gakotó amegešaló miliki naleve.

2 Nenemú makó keza gamanitini gakó gili ahulatamó nene, Ómasímo ale utó i netá pelesa zinigave. Itó gamani vegenalitini gakó pelesa zita vegená nene kezáini iki miliki ita mogonáini meinava alinigave.

3 Iki miliki ago lamaná i vegená nenete gamanimú kelegesá ligitive loko negopa, netá golesa aliki miniaká nia vegená nene kelegesá ligitive loko kelémo etó onoimómá neve. Nenemú geza nene gelegesá legemitimó minatove loko mogona lamanakó loló ozo. Mogona lamanakó loló oko minatanimó nene, geikumú giličko lamaná inogo ive.

4 Gamani vegená keza nene geikumule liki Ómasímini gelekelela niave. Gizapa nigitiko vatí oko minatane liki hoza naleve. Geza golesa netá nalekoma gehelele viziko minozo. Keza nene hanuvamú kalapusi limiaká zámužagi minamave. Keza Ómasímini gelekelela nianazo, golesa netá aliaká nia vegenakumú Ómasímo izapaló moloaká noi netá lelepizinigi gamani

vegená nene Ómasi alími vatí iki kezagi kizapaló molokago kalapusi limiaká niave.

⁵ Nenemú gamani vegenalitini gakóini gili alitave loko noluve. Gakóini gele ahulokako Ómasímo miluma hoza gimitikumukó negopa, gigikámo etokave loko lititokó itanize,

⁶* Itó gamanite Ómasi gelekelé itiki gizapa hoza naleve. Nenemú lekeza gamanite litatoka litatoka iki takisi moni kímilo.

⁷ Nenemú limitave liki lita netá nene vegená mukító kimitaze. Takisi moni aliaká nia vegená nene takisi moni kimitaze. Itó haitó mikasiukatí netá makó atító áminaló meinava iteko mina moni nene kimitaze. Kilími otiki kugulizá ali otita vegená nene kilími napa ilo.

Ligika kemeakalímini mogoná lá oko neve

⁸ Lekeza netá gimiiki nimilo liki linita gamena avilegemilo. Tinamule liiki likigika kimiiki netá matá kimiilki viaká nenémini mogonámogó lekelitoka minatize. Makó keza kigikatunú nasahilí iki kigika kimitamó nenemú Ómasímo lo huka gakó mukí gili aliaká nia veve litune.

⁹* Mosé lo huka gakokú láá loko lonoimóma neve:

Vego venako lekeza huki ezega emega amilizo. Geza vegená makó apele helemo. Geza gumina amo. Geza vegená makolitini netakumú ángigo lamaná amo.

Nene gakó ale nupa oko gotoláa nenémini oko neve:

Gezakamú geleaká noanimó nenémini oko gigivekaginimú geleko gigika kemezo.

¹⁰ Nasahiliki ve minatamó nenete kigivéítoka kigika miliki netá golesa alikitaminigave. Nenemú vegená makotoka kigika milata vegenalite Ómasímo lo huka gakó gili ali asú iaká niave.

Kilistó atikumú gámémé o minatuni gakó

¹¹ Lekeza itína imane gamenámini mogona gilinamó nenazo, lá itave loko loleketonoumóma neve. Lovokutí ininá oko otituni gamena mota alitokave. Monó apí oko guluni gamena nene, netá golesagutí gologí oletati gamena háná otigí oko minamóza, itínasa nene mota gamena alitokave.

¹² Límugusi mota asú inogo noive. Gó lanogo okululuva notovo ive. Nenemú límugusímini netá ahuliikki lekemeni apele helekative liki lapanalímini gimisi magé ali vatí iki minalo.

¹³ Lapanató minatunimoláa nene etó oko minatune. Nosánetalímini lagaváá giliikki nagamí niiki meleketakeni iki gumesisi mokoló mogona haitopaitolímini ali utó iki lova iki lova leta lava leta iki kemekugú niki amilo.

¹⁴ Guivahani Izesu Kilistotoka viki gímizemó nenémo gineganetini loló iko ali luhiki minalo. Lukugupémo amu heleko laga aviseaká noi netá alikataze, Ómasimukó giliiki minalo.

14

Likigivetikini gakó li hukikitamilo

¹ Monokú hoe lamiki netá makó loló uko Ómasímo giliiko golesa itihe liki kagata losi gilitamoláa vasá zemiki kilími milalo. Lá iki ha netakumú kagata losi giliikki lova leta lava leta itave loko nomive.

* ^{13:6:} Mat 22:21; Mak 12:17; Luk 20:25

* ^{13:9:} Gá 20:13-17; Gapo 5:17-21; Liv 19:18

2 Makó eza monokú alévolé oko minatímo nosánetá mukí gopa noaká noigo, makó eza monokú hoe lamike, haitopaitó nosánetá nonake, Ómasímo gele golesa okative loko izámini mémela nosá amive.

3 * Nenemú haitopaitó nosánetá gopa noaká noi vémo agivelaho nosánetá makó moseaká noi vemú gele golesa amino. Itó iza mémela moseaká noi vémo agivelaho gopa noaká noi vemú nene aleko letoko lamino. Eza geí gelekelé izegipa negopa, Ómasi gelekelé omiaká noinazo, ezagi Ómasímini izegipala loló onoive.

4 Nenemú ve makolímo Ómasi gelekelé otoko monó geleneitimó nene, geza nanakalotí ái mogona lotuva legeko gilitane. Áisi monokú alévolé itímó nehe hoe lamitimó nehe nene gizapa vevámini netá neve. Itó Guivahani eza hize lé olimiaká zámuzagi noinazo, hize lé omikiko, alévolé oko minanogo ive.

5 Makó eza nene haitopaitó gamenamú gilimó nene iteká leméká oaká noive. Makolímo gamenamú gilimó nene iteká leméká oko nomigo, hamolímini oko neve. Makó eza némini manámini itove loko nene gele alévolé onoko lá itize.

6 Gamená makokumú giligo ititi ve nenémo Ómasimule loko lá oaká noive. Itó nosánetá mukí gopa noaká noimó nenémo Ómasimule loko noaká noive. Lá noike nene, nosánetakumú Ómasi agepoka loaká noive. Itó nosánetá makó mosé mosé oaká noimó nenémo Ómasimúgilike lá oaká noive. Lá noike, ezagi nosánetakumú Ómasi agepoka loaká noive.

7 Lelikutí makolímo ezáagó gilikó lamaná itive loko minoko aleko osá amive. Itó ezáagó gilikó lamaná itive loko helesá amive.

8 Minoko aleko oaká nouhá nene Guivahanímini gelegele minoko aleko oaká noune. Heleaká nouhá nene Guivahanímini gelegele heleaká noune. Nenemú nene logómulagi minoko aleko itunímó itó hilitunímó nene Guivahanímini mututoni nounike áisi gilikó lamaná itive loko lá itune.

9 Kilistó logómulagi nouhaki helemoláágí Guivahanite minanogo heleake otímó neve.

10 * Nenemú nanakalotí gigivekahinimú aleko letoko litane, itó gigivekahinimú nanakalotí gelekako limitive. Leza mukító Ómasímini avogisáló utó o asú okuko, áisi lelí gákó lo hukanogo ive.

11 * Nenemú láa liki monó gotolaú luhuva gizinamóma neve:
Guivahanímo láa loko lokave: Neza minoloko voko nou vémina alévolekutí noluve. Vegená mukító kalapusa hiziki gupá zi nimiki kegepagutí Ómasímina nugulizá ali otinigave.

12 Nenemú leza mukitoka Ómasímini avogisáló mogonate lo utó itune loko lonoimóma neve.

Némini manámini oketokuko ligivetegi lihima alikataze

13 Nenemú eza lá igo eza lá igo niamó nene mogonataganamú lo hukoaká nene ahulatune. Imanémini itune liki li hukalo: Ligiveteginimú monolimini agikágú viniko, gapo hizi lí ikimiká lihima netakumú gala viziká oaká suni ale utó amitune.

14 Guivahani Izesuki nousitímána láa loko gele alévolé onouve: Nosá némini manámini nonunike, ligika lemeni ale gopa iti netá ale utó oaká netá nomive.

* **14:3:** Kolo 2:16 * **14:10:** 2 Koli 5:10 * **14:11:** Isa 45:23

Lá onoimóza, makó eza netá makó nonoko lá oko nehe loko golotuva netá natimó nene, agika ale gopa inogo ive.

15 Geza nene nosánetá makó gopa nokoko gigivekaho agata gululusi geleko ininá iti netá ale utó omikakoma, oko moloko oaká noanímó nene gigika kemeakalímini gapogú vaminogo ive. Gigivekahikumú nene Kilistó aiku-muki heleneimóma nenazo, geza nenemú gelekoko nene, nosánetakumule loko gigivekahini alémo golesa amo.

16 Lekeza mogona lamaná lilí itamó nenémó gigivekaho lihima aleaká gapogú alémo molokiko vegená lugáate aliki letikataze, gizapa iki minalo.

17 Ómasímini gizapaló minoakalímini mogonáa nene nosánetá makó natupe mositupe loaká nenenú nomine. Hee loko minoko aleko oaká itó hulu itó mulutegú lamaná geleaká nene Sikalahulímo ale utó moloaká noimó nenémó Ómasímini avogisáló voakaláa neve.

18 Makó keza ámina gapoló viki Kilistoni gelekelé imikiko, Ómasímo ánigokiko laga avisinogo ive, itó vegená lugáate giliko lamaná inogo ive.

19 Nenemú leza hulu utó itive loko itó ligika lemeni eza hize lé otiko eza hize lé otiko itune loko amuza molatue.

20 Geza nosánetakumule loko Ómasímini hoza ale golesa amo. Nosánetá mukí nene noakakó nenazo, ligika lemeni ale gopa aminogo ive. Lá onoimóza, hanuva nanogo upe lokoko gopa nokuko ligivetehini agikagú golesa itímó nenémó lihima alinogo une.

21 Geza gigivekahini lihima alekative loko gala vizekatanize, aikumule loko goula nosá ahe vain nagamí ahe namitanimó, itó némini manámini amitanimó nene lamaná inogo ive.

22 Geza nuvanémini manámini netakumú gakó napa nolokoma nene, Ómasigi gezakagigó ali minalizo. Makó keza kigikámo laga kivisigo gili lamaná iki minata netá alitamó nene, kogoliza vizinigave.

23 Itó makó keza Ómasímo gele golesa itihe liki kagatagú losi pasi noiko netá makó gopa natamó nene, lamaná neve liki gili zagiki namamó nenazo, lihimavagi loló inogo ive. Ne netá mana netá lamaná itive loko gele zage minoko loló amitunimó nene, lihimavagi netá loló inogo ive.

15

Lezategopa ligivetegi gili laga itave loko oko moloko itune

1 Monokú alévolé nouhá vegená leza nene kagata losi pasi gili gili guni ama vegená gena kivisiti netá nene geheko legesó oko kelémo vati oko aliture. Lezategó laga livisiti netá loló amitune.

2 Leza ligiveteginimú geleko lamaná itave loko, itó monokú alévolé itave loko kelémo vati itune.

3 Kilistó eza ámina oko ezáa gele lamaná i netá alenamimóma neve. Monó gotolaú ve makolímo Ómasi lo ami gakó láa loko nemó nene Izesutoka alévolé oko minamó neve:

Geí alivi galativi amó nenémó není numupiló itekave.

4 Itó gozapá monó gotolaú gakó makó luhuva gizinamó mukí nene lagata ale kolosiko gele guni itune liki gizinamó neve, itó ámina luhuva nenémó lelémo vávani okoko lelémo gilí noliko goselé lepelemiko Ómasímo ale vavá

* **15:3:** Age 69:9

oleta netakumú lagata losi gelemoko gizapa oko minatune liki gizinamóma neve.

⁵ Itó Ómasímo lelémo zou loaká itó lelémo vávani oaká amelaho eza gala vizekago, lekeza Izesu Kilstó veleleta gapogú lakagata hamokó gili miniki minatave.

⁶ Lá iiki likigika itó lekegepa mili hamó iiki, Guivahanite Izesu Kilstoni amelahini agulizá ali otitave.

Izesuni gakó lamaná nene hetoka vegenakumuki neve

⁷ Nenemú Ómasímini lapaná utó itive liki Kilstó lekelémo molamó áminámimi iki lekezagí likigivetikini kilími miliki likigika eza amiko eza amiko iki apizi lamaná iki minalo.

⁸ Neza láa loko lo nolukumuve: Ómasí eza avotegini gakó lo hukoko lo kemenei gakó nene gihila zitive loko Ómasímo gakó gihila lamanakó loaká noimó nenazo, ámina gakó ale alévolé itove loko Kilstó eza Zuta ve lelí gelekelé oletamó.

⁹* Lá imó nene, hetoka vegená kezagí nene Ómasímo agika hize lemeaká noikumú agepoka litave loko lá imóma neve. Nenemú monó gotolaú ve makolímo Ómasí lo ami gakó láa liki luhuva gizinamóma neve:
Hetoka vegenalitini holúikú gegepoka linake geí gugulizá sigaga loko nama linake gegepoka loko minanogo uve.

¹⁰* Itó gakó makó láa loko neve:

Hetoka vegená lekezagí nene Ómasímini vegenala zuhagi lokogoliza viziki agepoka lilo.

¹¹* Itó gakó makó láa loko neve:

Hetoka vegená lekeza nene Guivahani agepoka liki geké litalo.

Numutó namató vegená lekeza sigaga sagaga liki agepoka lilo.

¹²* Itó Isaiá nene gakó makó láa loko luhuva gizamóma neve:

Zesini gipala Tevitini agapilamó makolímo anogo ize.

Áisi nene hetoka vegenalitini agulizaki ve loló inogo utó inogo ive.

Lá okiko, hetoka vegená keza aikumú kagata losi gelemiki ageva iki minanigave.

¹³ Lagata losi gelemoko ageva oaká amelaho Ómasí eza nene gili alévolé akumú mulutikú lamaná giliaká itó hulu ale utó olekemekiko, lekelitoka vaí oko miniko nene, Sikalahulímini zámuzatunú hize lé olíkimikiko, lakagata losi gelemiki aikumú ageva oko minoaká netá lekelitoka utó o vaí oko minative.

Pauló vávani oko luhuva gizatímini mogoná

¹⁴ Nigivénéngita, lekeza nene vatí iki iki miliki niave, itó monolímini mogonagi gili vevesinave, itó eza lainim-otiko eza lainim-otiko itave loko nene lekelikumú gele alévolé onouve.

¹⁵ Nenemukopa, neza Ómasímo monó lehizeneta gakokumule loko monó makokumó goha gili vevesinave loko lokovogisaló nelegesá legemigo vávani oko imane luhuva gizo nolukumuve.

¹⁶ Izesu Kilstó eza hetoka vegená lekelitoka monó hozaló nimisilimó. Neza Ómasímini gakó lamanakumule loko guguni gizoaká hoza aleaká noumó nene, Sikalahú nenémo lekelémo otopá zekiko, hetoka vegená lekeza

* **15:9:** 2 Sam 22:50; Age 18:49 * **15:10:** Gapo 32:43 * **15:11:** Age 117:1 * **15:12:** Isa 11:10

Ómasímini miguhala lilí iki minikiko, Ómasímo ánígo amu hilitive loko aleaká nouve.

¹⁷ Neza Ómasímini hoza aleaká nou vémina Izesu Kilistokumule loko hoza aleaká noukumú gelekugo iteaká noive.

¹⁸ Ámina hoza nene nana zámuzalotí aluline. Nomive. Izesu Kilistó hize lé onetago hetoka vegená keza monó gili alitave loko hoza aleko minumó nememú vávani oko lo likimitoze, gililo. Neza nene monó lo utó oko lo nokumuke,

¹⁹ osá amosá suni alévolé netá aleko oko moloko minuke, Sikalahutokatí zámuza alekuke, Zelusalegatí apí okuke, Kilistoni gakó lamaná mukí lo utó o-loko vuve vuve nene mikasi ale vigeko vuve vuve alika Ililikó mikasiuka vo anitumó.

²⁰ Lá nouke, litahagú goha ale gosohá okatove loko Kilistoni gakó vo anitemimó gosohá mikasigú gakó lamaná lo utó oko lo kimitove loko amuza molqaká umómá neve.

²¹* Monó gotolaú gakó makó láa liki luhuva gizinató nene námegetuve: Áí gakó lo kememuhá vegená nenete gilinigave.

Gakó gelemamó nenete gili guni inigave.

Pauló Loma apatoka vitove loko gilimó

²²* Lekelitoka vitove loko umóza, ámina hoza nalugo gamena gamena gapoma lí okago, gena niviseaká imóza,

²³ minoko aleko utoka kilisimasi mukí oko novigo lekelitoka vitohe loko nigikatunú geleko minoaká nouve. Itó imane gamenaló apá lugaloka hoza makó alito apá nominazo,

²⁴ Sipena mikasiloka vinogo noumóza, ganá lekelitoka vo anitekinake áminauka vitohe loko geleko nouve. Lekelitoka anitekugo nene, neza ámigiko nene, Sipena mikasiloka vitokumú gamena koma logoliza vizinake nilími gapoló milatave loko noluve.

²⁵* Mota vitove loko geleaká noumóza, imane gamenaló nene Zelusale numutoka Ómasímini vegenala zuha nasahilí oketoko moni aleko kimitove loko novuve.

²⁶ Masetonia mikasiuka itó Akaia mikasiuka Ómasímini vegenala zuha kezáini kagata geleke láa liki li hukinamóma neve: Zelusalega monó gele vegená gohogó niámó nene moni ale nupa okinake hize lé oketatune loko lo hukonouháma neve liki lamó.

²⁷* Keza nene mulúikú lamaná geleke lá ikamó nene etokave. Itó hetoka vegená keza Zuta vetitokatí kigikámini netá gihila alemó nenazo, nenémimi genaváa keitoka neve. Ámina lihima apasoko kimitune liki kugupémimi netá gona miliki Zuta vegenakutí Izesuni vegenala zuha kimikiko etanogo ive.

²⁸ Lá onoinazo, nenémimi gihila utó okago neza nene moni aleko voko avasavagi keme asú okinake Sipena mikasigú vinogo noinake lekelitoka vo anitinogo uve.

²⁹ Itó neza nene láa loko gele alévolé onouve: Zapakó lekelitoka vaminogo uve. Kilistoni nónohá nenitoka vaí okiko lekelitoka vinogo uve.

³⁰ Nigivénegita, leza Guivahanite Izesu Kilistokumú itó Sikalahutokatí eza agika amigo eza agika amigo oaká nounikeve loko negénegé oko lo nolukumuze: Lekeza nenitoka miní amiki nenikumú amuza miliki Ómasiloka lilo.

³¹ Zutaia mikasiuka Zuta vegená lugáá Ómasimú gili alévolé ama vegenalitini kigizakutí Ómasímo gologí onetative liki Ómasiloka lilo. Itó Zelusalega monó gele vegená monima aliiki mulúkú lamaná giliiki laga kivisitive liki lilo.

³² Lá okiko, alika Ómasímo gilikó, etokikoma, mulúnegú agila guluma noiko lekelítoka vinake navasú vizeko hulu nivisitive liki lilo.

³³ Ómasi hulu amelaho eza lekeza mukitó minatímo minoloko voko minino.

16

Vegená mukí geké loketamó

¹ Vená ligiveteho Piopé eza Kenekelea numutoka Izesuni vegenala zuhaloka monó hoza aleáká noi vená áisi vo anitekiko nene, monokú nasahilí itatavate loko mogonala hize lé oko noluve.

² Ómasímini vegenala zuhate alikiko etatímó nenémini iki Guivahanimule liki alími vatí itaze. Ámina vená nenémo nezagi itó vegená lugáagi gelekelé oletoko minamó nenazo, nemú manamú navisiko alími vatí ilo.

^{3*} Itó vanago venalago Akuilako Piliskako keza nene Izesu Kilistoni monó hozagú nilími vatí iaká niasive. Keí nene geké noloketuze, li kimilo.

⁴ Kéisi nene nenikumú kugupe latila inigasimó neve. Lá asimó nene nenikumukó nomive. Numutó namató hetoka vegená Izesuni vegenala zuha miniliki vinamó kezagi keikumú mulúkú lamaná giliiki kegepoka liaká niaive.

⁵ Keí numukú monokumú alegesá iaká nia vegenaki geké noloketuze, li kimilo. Asia mikasiuka ganá apí oko Kilistoni vegenala loló i ve Epainetó nigika amenou ve aikumuki geké nolotuze, li amilo.

⁶ Maliá eza lekelikumú miluma geleko monó hoza alimó. Aí geké nolotuze, li amilo.

⁷ Atolonikoki Zuniaki Zuta ve není zuha niasi ve kezagi nagá numukú makó minuháma neve. Keikumuki geké noloketuze, li kimilo. Keza aposolo vetini holúkú kugulizaki ve niasive, itó neza hanuva nougo keza goí iki Kilistoni izegipala lilí asimóma neve.

⁸ Monokú noi ve Apiliatoni geké nolotuve. Nigika aitoka neze, li amilo.

⁹ Kilistoni hozagú nelémo vatí i ve Ulupanó itó nigika amenou ve Sitáke keikumú geké noloketuze, li kimilo.

¹⁰ Kilistó mogonalamú giligo lamaná i ve Apeleni geké nolotuze, li amilo. Alistupuloni numukú nia vegenakumú geké noloketuze, li kimilo.

¹¹ Zuta ve nigivéneho Helotíó itó Nalisisoni gelekelé vegenala keza Guivanímini vegenala zuha monokú nia vegenakumú geké noloketuze, li kimilo.

¹² Vená losítá Tilipaenaki Tiliposaki keza Guivanímini hoza napa aliaká niasive. Itó Peasí áminámimi oko Guivanínumiluma hoza aleáká igo nigika nagata aitoka neve. Keikumú geké noloketuze, lo kimilo.

^{13*} Lupú eza Guivanímini vegenala zuhagutí iteko mina ve, itó izolaho nelémo vatí ike izóneho loló imó. Keikumú geké noloketuze, li kimilo.

¹⁴ Asikilitó itó Pilegon itó Helemé itó Patopá itó Helemá kezagi kigivéikinigi geké napa noloketuze, li kimilo.

¹⁵ Pilologoki venala Zuliaki itó Neleo itó atolahlo Olipá itó monokú ve vená mukí kezagi makó niamó keikumuki geké noloketuze, li kimilo.

* **16:3:** Apo 18:2 * **16:13:** Mak 15:21

16 Lekeza nene monokú eza aputá viziko eza aputá viziko iki minalo. Kilistoni vegenala zuha numutó namató mini-liki vinamó nenete geketini nilave.

Gakó loketo asú imó

17 Nigivénegita, lekelémo mómoká uke lakagata aleko láa loko noluve. Likilími gopa napa iaká nia vegenakumú gizapa ilo. Keza hizi hou líta gakó ali utó iki monokú vita gapo hizi lí iake monó lainim-oleketunimó nene pelevesava ziaká niámó nenazo, lekemegesa kimilo.

18 Vegená nenémínáa nenete Guivahanite Kilistoni gelekelé itamake, kezáini kugupémo amu hili netá gelekelé nitake, kigika kagata gopa i vegená giminikú miliki kilími gopa niago, gakó lamaná nilahe lago, kogoka kagaka viziaká niave.

19 Lekeza monó gili aliaká niámómámini gakoláa numutó namató vokave. Lá okago, neza lekelikumú gelekuke nogoliza novizuve. Lá noumóza, imanémíni iki minatave loko noguluve: Netá lamanakumú gili vevesiki gili minalo. Netá golesamú gilikó gena ino.

20 Lá itamó nene Ómasi hulu amelaho áisi nene mini háná amiko Satani nene likigisa heumauka zeko lana inogo ive. Guivahanite Izesu Kilistoni nasahilí lekelitoka minino.

21* Hamó hoza aleáká nousi ve Timotí itó Zuta ve nigivénege Lukió Zasó Sosipaté kezagi geké nililikitave.

22 Neza Teletiona pepa imane Pauló lo neme neme noigo luhuva gizo nolukumu vémina áminagó oko Guivahanímini avogisaló lekelikumú geké nololeketuve.

23-24* Gaió eza nasahilí onimiaká noigo, nezagi itó Ómasímini vegenala zuhagi aí numukú alegesá oko monó loaká noune. Eza geké nololeketave. Elastó nene kansoletini moniló gizapa oaká ve itó ligiveteho Kuatoki ámináminiki geketini nilasive.

Ómasi agepoka like gizo asú imó

25 Izesu Kilistoni gakó li utó iki li likimiaká niámó, itó Ómasímini asuguná gakola gozapá ká ela halá geloko voko minamó nene hámakó lelegítokó neve.

26 Ámina gakó lamaná Ómasímo nigizakú molamó nene lo utó oko lo nokumuke ligikámini luhusala ale gíkitoaká zámuzagi noi amelahinimú lo kemeaká nouve. Lá onoumóza, imane gamenaló Ómasímini agepagutí gakó li utó iaká a vete luhuva giziki Izesukumú lina gakó li utó ikave. Ómasi nene alévolé helisagi noi vémo lo hukonoitó nene numutó namató vegená keza gili alévolé iki Ómasi gili amitave loko ámina monó gatoko lo kemeaká noune.

27 Izesu Kilistó lelémo vatí noiko Ómasi ezáagó gele vevesoko noi ve sigaga sagaga loko agepoka loko mino lúaló moloko minatune. Lamaná.

Koliti Vegenalitini Luhuva Nampa 1 Pauló Gizo Kimimó

Lusa gakó

¹ Neza Ómasímini gakotó Izesu Kilistoni aposolo loló itane loko nelémo etó i ve Paulona ligiveteho Sostené ezagi makó nousike

² * Koliti numutoka Ómasímini vegenala lekelitoka luhuva netá imane gizo nolukumuve. Lekezagi vegená lugáagi numutó namató hamokó Guivahanite Izesu Kilistoni sele li amiaká niago Ómasímo lusa geleketoko Izesu Kilistotoka gímezó nenémini agikagú nene apazá minatave loko alesa molo likimi vegená niave.

³ Ómasi ameteho aitokatí itó Guivahanite Izesu Kilistó aitokatí nasahilí itó hulu lekelitoka mino-loko voko minatize.

Keitoka monolímini zámuza utó ikumú Ómasi agepoka limó

⁴ Ómasi eza Izesu Kilistokumule loko nasahilí lehizeleketakumú neza geleku ke lekelikumú gamena gamena Ómasi agepoka loaká nouve.

⁵ Eza monó vávani oko loaká itó geleaká haitopaitolímini hagitana lehizeleketonimo nene,

⁶ Kilistoni gakolámo likigikagú luhusa alekago,

⁷ lekeza Guivahanite Izesu Kilistó atiginá oko atikumú ageva iki minake monolímini zámuza makokumú vitágá isá amave.

⁸ Eza Guivahanite Izesu Kilistó anititi gamenaló lihimatini nomitimó minatave loko gizapa oleketoko noiko, gamenatini asú itive.

⁹ Ómasi eza gipala Izesu Kilistó Guivahanite nene aitoka miní amitave loko sele lo likimi vémo lokago alévolé oaká ve noive.

Koliti vegená keza monokumule liki hizi hoú lamó

¹⁰ Nigivénegita, neza Guivahanite Izesu Kilistoni agulizató lakagata aleko litoze, gilio. Lekeza gakó haitopaitó liki hizi hoú lamilo. Monokumú nigiliki likigikatini mili hamó iki minalo.

¹¹ Ná vegúe, neza likigikagú lova leta gakó utó oko nemó nene Koloeni vegenalate líkago gelekuve.

¹² * Nenemú gakó láa loko noluve. Lekelitokatí makolite leza Pauloni vegenala noune liki likago, makolite leza Apoloni vegenala noune liki likago, makolite leza Pitani vegenala noune liki liaká niave. Itó makolite leza Kilistoni vegenala noune liki liaká niave.

¹³ Nenemú nana ive. Kilistó eza hize hoú loleketahe. Itó Paulona neza lekelikumule loko zohota zaló huluhe. Itó není nugulizálimo avutá okago monó nagamí hilahe. Íi, lá oko nomive.

¹⁴ * Neza lamaná monó nagamí hololeketamumóma nenazo, nenemú mulúnegú lamaná noguluve. Ve losítá Kilispoko Gaioko kezagó holotumóma nene

¹⁵ lekelikutí ve makolímo Pauloni agulizálimo avutá nepelekago, monó nagamí hulumóma neve loko lokative loko lá umó neve.

* **1:2:** Apo 18:1 * **1:12:** Apo 18:24 * **1:14:** Apo 18:8; Lom 16:23

16 * Itó gakó makó noguluze. Setepaná aí vegenala kezagi holoketumó. Lugáa monó nagamí holoketuhe nene ma gelemuve.

17 Kilstó eza vegená monó nagamí holoketatahe loko nimiselemimóma neve. Aí gakó lamaná lo keme keme itane loko lonetonoimóma neve. Itó Kilistó eza zohota zaló hili gakolámini zámuza lemekative loko lekelí likigilikagú apikulú aleko gele guni oaká gakó losá amumóma neve.

Kilstó eza Ómasímini helisa itó geleakaláa noive

18 Zohota zaló hili gakola nene gapo golesagú viaká nia vegenalite gelego ha netá loló oaká noimóza, gapo lamanató novuni vegená nenete guluko, Ómasilokatí zámuza lagi gakó neve loko gelenoune.

19 * Nenemú monó gotolaú Ómasímo li gakó makó láa liki luhuva gizinámóma neve:
Leza gele guni oko matute koló onoive liki liaká nia vegenalitini gakóini ale golesa inogo uve.

Itó sukulu napa lokunike gele vevesoaká noune liki liaká nia vegenalitini geleakáini nene gele ahulatove.

20 * Ómasímo monó gelema vegenalitini geleakáinimú nene ha gakó neve loko gelekamó nenazo, nenemú gili guni iaká nia vegenalitini gakóini hí neve. Itó monó mogona apí ikimiaká nia vegenalitini gakóini hí neve. Itó itína gamenámini mogonamú gakó hoza lita vetini gakóini nene hí neve.

21 Itó Ómasímini gele vevesoakalímini zámuza utó noigo, vegená kezáini geleká nenetunú Ómasímini mogona ániganigi ánigi vevesamamó. Nenemú Ómasímo giligó etokago, monó gakola lo kemehá nene vegená makolite gelego ha netá loló noimó nene vegená makó lo kemekuko, gili alévolé niago, Ómasímo kugutó vizeaká noive.

22 Zuta vegená není zuha keza haitó suni utó iko ánigatune liki amuza miliaká niave. Itó Kiliki vegená keza netá mogonamú giliñigí gumonó hiziki mihiaká niamóza,

23 leza nene Kilistoni nene zohota zaló apili hele gakó lokuko, Zuta vegená keza gelego gena oaká noive, itó Kiliki vegená keza gelego, negi gakó loló oaká noimóza,

24 Ómasímo kelémo mola vegená Zuta ve niamó Kiliki ve niamó keza nene Kilistó zohota zaló hili gakokumú gelemó nene, Ómasímini helisa itó Ómasímini gele vevesoakaláa nene áminagutí utó oaká noive.

25 Vegená keza Ómasímini hozamú negi netá neve nilago, ámina negi netalímo vegenalitini gelekáini avilegeaká noive. Itó Ómasímini mogonamú zámuza nomive nilago, ámina zámuza nomi netalímo vegenalitini zámuza avilegeaká noive.

26 Nigivénegita, Ómasímo ve nanámini sele lo likimimóma neve. Nenegú ánigiki giliilo. Monó gelema vegenalite lekelikumú láa liki giliaká niave: Gili vevesi minamoláa mukí minamave. Itó zámuza minamoláa mukí minamave. Itó getakutí itiki minamoláa mukí minamave.

27 Liki linamóza, vegená kovogisaló negi niamoláa leza Ómasímo lelémó etó imó nene, gele guni onoune liki liaká a vegená kovoza hilitive loko alesa molo limimó neve. Itó vegená kovogisaló keé lamunimoláa leza Ómasímo

* **1:16:** 1 Koli 16:15 * **1:19:** Isa 29:14 * **1:20:** Hio 12:17; Isa 19:12, 33:18, 44:25

lelémo etó imó nene, zámuzáinigi vegená keza kovoza hilitive loko alesa molo limimó neve.

²⁸ Itó vegená kovogisaló gohogó vegená nounimoláa itó vegená kovogisaló guhalehale oko nounimoláa lezagi Ómasímo sele lo limimó nene kovogisagi vegenalitini lukesaváini akilitave loko sele lo limimó neve.

²⁹ Lá okago, mikasiuka ve makolímó Ómasímini avogisaló agupe aleko iteminogo ive.

³⁰ Ómasí eza Izusu Kilištotoka miní ameleketonoimóma neve. Kilištoni nene gele vevesatunitímimi mogona minative loko, itó lihimate asú olimikiko minatunitímimi mogona minative loko, itó lihimate ale ahulolimikiko ligika avova liko minatunitímimi mogona minative loko, itó lelí lihimagutí gologí oletative loko amiseleletamó.

³¹ * Nenemú gakó makó monó gotolaú láa liki luhuva gizinamó nene alévolé itive:

Vegená makó nenete sigaga liki agepoka linigima Guivahanimukó litaze.

2

Pauló Kilištioni apele gakokó lo kimimó

¹ Nigivénérita, neza lekelitoka anitumó nene, Ómasímini asuguná gakó lo likimitove loko nene, vegenalite sigaga lita gakó negopa, itó není gele vevesoakaláa negopa,

² neza láa loko lo hukouke yumóma neve: Neza lekelitoka vinake gakó lugáa laminake, Izusu Kilištioni zohota zaló apelemó nene gakokó lo likimitove loko yumóma neve.

³ * Itó lekelitoka voko minumó nene keé lamuke nehelele vizigo luvolovo zeko minumó neve.

⁴ Lá oko nouke, monó gakó lumó nene lakagata alitove loko mikasiuka vegenalite gili vevesina gakokutí lo lekememuve. Ómasímini zámuzámo itó Sikalahulímó není gakó hize lé okago, gihila zeaká imole.

⁵ Lá umó nene lekeza Ómasimú gili alévolé itamó nenémo vegenalite gili vevesiakakú negopa, Ómasímini zámuzagú leheta itive loko lá umóma neve.

Ómasímini asuguná gakó Sikalahulímó lo utó oaká noive

⁶ Neza lamaná monokú olopa iki mina vegená nene gele vevesoaká gakokutí lo kemeaká noumóza, imane mikasiuka monó gelema vegenalite gili vevesiaká gakó itó kugulizaki ve hiliki haha ita ve nenete gili vevesiaká gakó liaká niámó nenéminko losá amuve.

⁷ Neza Ómasímini asuguná gakó halá geko minamó nene lo utó oaká nouve. Ámina gakó nene vegená leza gonanalivagi loló oko minatune loko gozapá netá matá ale utó amike mina zupa Ómasímo ale vavá oko mololetamó.

⁸ Mikasiuka kugulizaki ve nenete ámina gele vevesoaká gakó mogona gili vevesamamó. Gili vevesalina nene, lelí Guivahani lapaná amelahini nene zohota zaló apelemaline.

⁹ * Lá oniomóza, gakó makó láa liki luhuva gizinamóma neve:
Vegenalite ánígama netá, itó kagatatunú gelema netá, itó vegenalitini kigikáamo gelemi netá nene, Ómasímo kigika aminita vegená nene ale vavá oketonoimó neve,

10 liki luhuva gizinamómáminoko Ómasímo Sikalahuni amiselekago, ámina netakumú lo utó o lemeaká noive. Sikalahulímo netá matalímíni mogona itó Ómasímini mogona halá geko minamolagi geleká noive.

11 Hí vémo nene agivelahini agikámíni mogona geleneive. Ezáa agikámíni amelahogó geleká noive. Ámináminoko Ómasímini agikámíni mogona nene Ómasímini Sikalahulímo hamokó eza geleká noive.

12 Itó Sikalahú nene monó gelema vegenatokatí alemuháma neve. Leza Ómasímo monó asapulagi lehizeletamó nene gele vevesatune loko Ómasímini Sikalahula aluháma neve.

13 Leza monó asapulagi aluhá nenemú logele hagele oaká nounimó nene, hanuva vegenalite kezáiini gelekáinitunú li limikago negopa, Sikalahulímo lo lemekago lo kemeaká noune. Itó Sikalahulímíni anó lúpamú giliaká nia vegená nene monó lo kemekugo giliaká niave.

14 Ve makó Sikalahuki minamita vegená keza Ómasímini Sikalahulímíni gakó ma geleminigave. Keza nana netáinigutí gilitave. Nomive. Sikalahú alina vegenalite gilitamoláa oko nenazo, Sikalahuki minamita vegenalite gilikó negi gakó loló inogo ive.

15 Sikalahuki minata vegenakó netá mukilímíni mogonamú hanuva gili vevesanigi niamóza, ve makolímo keí mogonataganamú lotuva legeminogo ive.

16* Nenemú gakó láa liki luhuva gizinamó nene gihila neve:

Guivahanímini agikagú gakó nemó nene éaho gilitimó neve.

Gakó akó noligo nene hí vémo alémo vatí igo limó neve. Ma nomive. Ma nomimóza, leza nene Kilistoni geleakaláámini oko nominune.

3

Koliti vegená keza Ómasímini hozaló vegená lili iki minamó

1 Nigive nagavese, neza lekelitoka vuке, ve Sikalahúnigi lo kemeaká noumola nenémínoko lo lekememuve. Lekeza monokú nene alévolé amake Kilistoni izegipa namunitana iki niago, neza ve Sikalahunigi nomi vegená lo kemeakáláa nene lo lukumumó.

2* Neza likigikámíni nosá alévoletáa lekememuve hanuva aminíma luku-mumóma neve. Likigikámíni nosá alévoletáa nene nana iki naline. Lekeza litaha lekemetamenigi ha nianazo, itínasa nene nosá alévoletáa nata avotigí iki minamave.

3 Lekeza nenémínáa miniki kemekugú niki lova leta lava leta iki hanuva vegenakitana nenémíniki litaha lekemetamenigi miniaká niave.

4* Lekeza Pauloni vegenala noune itó Apoloni vegenala noune liki liaká nianazo, ve nenémínáa lekeza numuká veginana niave loko loleketanogo uve.

5 Lekeza lelikumú nanamú hizi hoú liaká niave. Apoloki nezagi hanuva Ómasímini gelekelé izegipalatosa Guivahanímo hoza gakó loletatímíno monó lo lekemeko nousigo, aikumú gili alévolé inamóma neve.

6* Nénisi lekelitoka hoza aleko ale zuhá umó. Apoló nene liliha aleaká imóza, Ómasímo nene lusaváa gekago gihila zeaká noive.

* **2:16:** Isa 40:13 * **3:2:** Hip 5:12-13 * **3:4:** 1 Koli 1:12 * **3:6:** Apo 18:4-11,24-28

7 Nenemú ale zuhá oaká noi vemú lamitune, itó liliha aleaká noi vemú litunimó negopa, lusa gekago gihila zeaká noi ve Ómasimú hamokó litune.

8 Hoza aleko ale zuhá oaká nou ve itó liliha aleaká noi ve leza hamokó lelegító nousive. Meinaaváa nene hoza alusi lelegító etó etó oko alinogo usive.

9 Leza Ómasímini hozaló veva nousive. Ómasímini minía nene lekelisi niave. Itó lekeza Ómasímini numuni apala niave.

10 Ómasimo hoza lehizenetamole loko neza numuni geeká ve gihilámina simeni lapusa ale hizumó. Itó nenémini amupiló ve makolite miní amiki numuni giaká niave. Nenémináate gili hee li miniki gitaze.

11 Lapusa hizenoumó nemó nene Izesu Kilstoni aí akeleko makó hizeakaláa nomive.

12 Itó lapusa nenémini amupiló makolímo goli silivá nenetunupe itó meinava iteko mina gehanitunupe itó zasiha lónohani ménihá nenetunu gitimó nene, minoko numuni gimó nenémini mogonáa utó inogo ive.

13 Minoko gamena napaló mogonala utó noitó nene ló napa guluma inogo ive. Itó ló nenémo numuni nigeka hoza alemó nenémini mogona ale utó molanogo ive.

14 Ve makolímo lapusa amupiló numuni gimó nene lolímo lo lamaná amitímó nene eza meinava alinogo ive.

15 Itó ve makolímo numuni gitó lolímo lo asú itimó nene, Ómasimo aseva zetoko lokutí agutó vizitimóza, eza meinava aleminogo ive.

16 * Lekeza nene Ómasímini monó zavusave niave, itó Ómasímini Sikalahú nene mulutikú minoko aleko oaká noimó nene gelemahe.

17 Ómasímini monó zavusave nene etó keké vizeko neve, itó aí zavusave lekelisi niave. Nenemú makó keza Ómasímini monó zavusave ali golesa itamó nene, Ómasimo ámináminoko ámina vegená kelémo golesa inogo ive.

18 Lekeza likigikatini agoka vizemilo. Lekelikutí makolímo monó gelema vegenalitini kovogisaló gele vevesoaká ve nouve loko agata gilitimó nene, ámina gakó gele ahulokoko monó gelema vegenalitini kovogisaló negi ve loló oko minatímó nene Ómasímini agómulaló gele vevesoaká ve minanogo ive.

19 * Mikasiuka monó gelema vegenalite vevesonoune liki lita gakó nene Ómasimo gelekiko negi gakó loló inogo ive. Nenemú monó gotolaú Ómasimú gakó makó láa liki luhuva gizinamóma neve:

Monó gelema vegenalitini kogómulaló gili vevesiki mina vegená keza gele vevesonoune liki netá nalemó nene gelehusi gekimikago, áminámini agepagú viki apiliaká niave.

20 * Itó makó lá oko neve:

Guivahanímo gele vevesonoune liki liaká nia vegenalite kagata nigele gakó nene ha netá neve loko geleneive.

21 Nenemú lekeza vegenalitini kugupe alimi iti iti amilo. Netá matá mukí nene lekelikumule loko mololikimikago neve.

22 Paulona itó Apoló itó Pitá leza nene lekelikumule loko gizapa ahulolimikago noune. Itó mikasiuka netá matá mukí itó minoakape heleakape itó itinasa minati netape itó alika utó iti netá mukí nene lekelí mututoni neve.

23 Itó lekeza nene Kilstoni mututoni niave, itó Kilistó nene Ómasímini mututoni noive.

4

Aposolute monó hoza alemó nenémini mogona

1 Lekeza lelikumú gilikiko, Kilistoni gelekelé ve itó Ómasímini henonímimi gizapa ve itó Ómasímini asuguná gakó lole ale ve loló ino.

2 Itó henonímimi gizapa ve keza hoza amelaho litokó hoza alitave liki linamómá neve.

3 Lá onoimóza, nezánemú litoze. Lekelisihe itó vegená lugáte iki miniki není gakó litamó nene gelekugo gihila loló aminogo ive. Itó nezáne mogonánemú lotuva legeminogo uve.

4 Není lihimáne netímó nene gelenamuve. Lá onoimóza, není mogona nene Guivahani hamolímo ale utó inogo inazo, nenemú lihimáne nomimó nouve loko laminogo uve.

5 Nenemú lekeza vegenalitini mogonáinimú loakakumú nene litá iki lamilo. Guivahani ezáa atiginá oko ati gamena nene ligikagú asuguná ne netá nene ale lapanató molanogo ive. Itó vegená ligikagú geleká nouni gakó nene ale utó o asú inogo ive. Lá okoko vegenalitini mogonáimi ánígokoko etatitokó kelémo napa inogo ive.

6 Nigivénegita, lekeza lelí mogoná lá iki nánigiki gili hee litave loko gakó nolumó nene Apoloki lezateloka lo moloko nouve. Monokú lá iki minalo loko lo moleta gakó nene avilegemiki vegená lugá kilími napa iká itó lugáa alivi letivi iká amilo.

7 Eaho lokago lukugupe alimi itiaká niave. Lekelitoka netá matá mukí vaí oko nemó nene Ómasímo lekememihe. Óe, Ómasímo netá matá mukí lekeme asú onoimó nenazo, lekeza nanamú gelego Ómasímo netá lekememimó gelekago lezatete ale utó okune liki lukugupe alimi itiaká niave.

8 Lekeza lekezatinimú láa liki giliaká niave: Lagatupa okago, monolímini netate vaí oko neve. Pauloge niamago lezategó lugulizaki ve loló oko minoaká noune liki liaká niamóza, Ómasímini avogisaló lamaná lukugulizaki ve lilí itanazo. Lá iki miniki lelí limimí iki lilímiki vikiko, lekelitoka miní ameko lugulizaki vegó loló oko minatuninazo.

9 Neza láa loko nagata noguluve: Ómasímo aposolo leza vegenalitini kigliaká lelémoko lemeko moleta tamó gelekave. Lá okago, goní ilimikago lipili ahulatakumú ageva geko nominuhá ve gelekune. Mukitoka ageloge niamó itó mikasiuka vegená niamó keza lelí ánígi goselé ikago nouhá gelekavé.

10 Leza nene Kilistokumule loko vegenalitini kogómulaló negi ve loló oko nounimóza, lekelisi nene Kilistotoka miní ameko gelekate vai oko neve liki giliaká niave. Leza keé lamunimóza, lekeza alévolé oko lugulizaki ve noune liki nigelehe. Vegenalite lamaná lelí nene alivi letivi iaká niamóza, lekelí lukugupe alimi itiaká niave.

11 Leza nene nosánetakumú zahí nagamikumú gaúna heleko nominune. Lipiliaká niago, gineganete nomimó numute nomimó minoaká noune.

12 * Lugupémini netá utó itive loko lezate ligizanitunú hozaváa alunike ale utó oaká noune. Lelikumú alivi letivi ikago, nónohá zekimiaká noune. Gopoguni mililimikago mukahá osá amune.

13 Lugulizá ali mumusopa zikago, kelémo hulu oaká noune. Leza izahuza netá loló okunike, vegená mukilitini pipizakitana minoaká noune.

14 Neza lokovoza hilitive loko gakó imane gizamuve. Neza nigika lekemenu gipáne mohóne lakagata aleko luhuva imane nogizuve.

15 Kilistoni monokú apí ikimita ve nene vaí iki nitamóza, ametike mukí niamaeve. Nénisi Izesu Kilistoni monó lo lukumuke ametipina loló oko nouve.

16 * Nenemú nene není nigizakagú lisiki némegetatave loko lakagata aluke noluze, gililo.

17 Neza lá itave loko Timotini amiselekugo, lekelitoka novive. Eza nigika amenou ve Guivahanímini monokú gipáne loló oko minake, mukí netá ale gapoló molokogó aleaká noive. Eza voko neza Izesu Kilistotoka gímizeuke gosohá gapoló mohona oaká noumó nene numutó namató aí vegenala zuha lo kemeák nou gakó goha lo lekemekiko gilitaze.

18 Itó lekelikuti lugáá nenete nemikumú nene aminogo ive liki hokolizá iki gopa miniaká niámóza,

19 Guivahanímo gelekiko, lamaná okikoma, mino háná aminake lekelitoka vinake, ámina hokolizá iki mina vegenalitini gakoláá gelekinake, zámuzáini netihe nomitihe nenémíni mogona ale utó inogo uve.

20 Ómasímini gizapalo minoakalímini gapo nene gakokú nomive. Ómasímini zámuzagú nene utó oaká noive.

21 Itó lekeza nemikumú nanave liki liaká niave. Mukahaki ano liki nilahe, itó nigika lamanaki hulu oko ano liki liaká niave.

5

Gumesisi netakumú goní oketamó

1 * Lekelikumú láá liki lamaná likago gelekuke ininá okuve: Lekelitoka moko netá haitolímini numuká vettitoka utó amoakalímini utó onoimó nene gipalámo amelahini venalagi mihina iaká niasive liki lakumú noluve.

2 Itó lekeza netá nenémináa utó onoimó nene lokovoza hiliki lukugupeló gilisá amahe. Lá niake monó vegená noune liki lukugupe aliki otiaká niámó nene etamive. Lekeza miluma gilihi lokovoza heleaká noi netá aleaká noi vema nene ali ahulitatanzo.

3 Neza nugupetunú hotó nouke nigika lekelitoka nego ámina netá loló i vemú nene vogalatikú noukegitana láá loko lo hukumó:

4 Lekeza alegesá iki niiko, itó neza nigikatunú gele nolukumugo, Guivahani Izesuni agulizató itó aí zámuzaló ámina ve nene holutikutí amisili ahulataze.

5 Lá niiki ámina ve nene agupegú miluma geleoko eza litaha agika ahulikiko Guivahani Izesuni gamena alitokiko ámina vémini amenia aseva zetatihe liki Satani agizakú milatave loko nololeketuve.

6 * Monotegi vegená noune liki lukugupetini aliki itiaká niámó nenemú gulugo golesa oaká noive. Iza ekesaláa nene netá komámo izavagú holokago gizi vatí amó nene ekesá o asú oaká noimó nene gelemahe.

7 * Nenemú ekesalagi ve nene gizaká iki alími ahulikiko, noviko, gihila lagámini lilí ilo. Lekeli ekesá netatini mota gilato asú okamóma neve. Leza Zuta ve avotegini asenini zeketakumú gele minoaká holisi nene sipsip iza nanogo numutegutí ekesá netá ahulo asú okunike ekesá netá nomi peleti noaká nouháza, lelí asele zelimiaká sipsip iza Kilistoni nene lelí lihimamule liki apilinamóma nenazo,

8 * nenémini holisiváa minatune loko musi netá hokolizá nenémini ekesá netala ahulo asú okinake, mokoná netalímini gihiláa itó gakó gihila lagáminigó ekesá netala nomimó nene ale mininake holisiváa minatune.

Mokoló vegená ahuloketatune

9 Neza luhuva netá makó gozapá láa loko gizo lukumumóma neve: Lekeza mokoló vegenaki nosá gitigi nímaní iki apiziki minamilo, loko loleketonoumómá neve.

10 Láa loko lumó nene monó gelema vegenalitini mokoló vehe itó makolímini netató ánigo lamaná oaká vehe, itó guminaló vehe itó gipe lakegusani lugeha netá ale miniaká nia vehe, keikumú lamumómá neve. Keí nene mikasi ahulatuni zupahé ahuloketatunitó niave.

11 Neza néminokomú gizo lukumumómá neve: Monó nogili ve likigivetipo makolímo mokoló mohona itihe itó makolímini netató ánigo lamaná oaká ve noitihe, itó gipe lakegusani lugeha netató minatihe, itó vegená ke-megeka kamagaka litihé itó negi nagamitokó mohona itihe, itó gumina vaukalokó mohona iti ve nenémináagi apiziki miniki nosánetá namitave loko loleketonoumómá neve.

12-13 * Leza monó gelemiki hetoka mina vegenakumú gakó lo hukoketosá nene lelí hoza nomive. Lekeza holutikú monó nigele vegená keí lihimáinímini gakolamú litamó nene lamaná inogo ive. Itó hetoka nia vegenalitini lihimáinímini gakoláa nene Ómasímo linogo ive. Nenemú monokú gakó láa liki luhuva gizinamó nene gili minalo:

Vegená golesa ahulikimikiko holutikú minamino.

6

Monóini nomi vegenalitini kovogisáló goní gakó lamilo

1 Lekelitokatí makolímo nene agivelahini lihima ale minatimó eza gakó nene monó vegenatoka lamoko monóini nomi vegenatoka noloko goní omi-aká noimó nenemú lokovoza helemihe.

2 Monó vegená leza minoko monóini nomi vegenalitini gakó lo hukanogo une. Nene ma gelemahe. Itó minoko hoza nenémináa alitave loko loleketonoimóma nenazo, lekelí gakotini hutuva utó okikoma, li hukata avotigila iki minamahe.

3 Leza minoko ageló vegenalitini gakoki lo hukanogo une. Nenemú ha netá utó okikoma, vávani oko hanuva lo hukanogo une.

4 Ha netá nenémini gakoláa utó okagoma, lekeza nanamú monó guluhá vegená leza guluko lemeaká noi vegená nenémináa keitoka aliki vikago, li hukilikimiaká niave.

5 Lekeza gakó imane gilikiko, lokovoza hilitive loko lo nolukumuve. Leke-litokatí ve makó agatagú hee hee lo mina vema noamihe. Itó lekelitoka gakotini utó noikoma, aitoka aliki vikiko, ale hee loleketatimóza,

6 lekeza nenémini isá amave. Izesuni zuhagutí makolímo agivelahini lihima utó okagoma, monóini nomi vegenatoka aleko vokago li hukimiaká niave.

7 Lekelisi eza goní omikago eza goní omikago iáká niamó nenémo monotini aleko lemeaká noive. Likigive lugáate netá golesa aleketatatune liki nilikoma, helegalokagó minatinazo.

* **5:8:** Gá 13:7; Gapo 16:3 * **5:12-13:** Gapo 13:5, 17:7

⁸ Lekeza nene lekezatinigi netá ali gopa iake, gumina vauka niaká niave. Lá niake, monokú ve likigivetikinigi ámina ikimiaká niave.

⁹ Netá golesa aliaká nia vegenalite Ómasímini avogisaló vi hiliakaláa nomive. Nenema gelemahe. Lekeza likigikatini agoka vizemilo. Gumesisi mokoló vegená itó gipe lakegusani lugeha netató vegená itó ve vená huki ezege emega iaká vegená itó vémohe venálímohe agivelahitoka gímizekiko akáa nia vegená nenehe.

¹⁰ Itó guminatamina vegená itó makolitini netató ánigi lamaná iaká nia vegená, itó negi nagamító mihina iaká nia vegená itó kemegeka kamagaka liaká nia vegená, itó laskoli, vegená nenémináate Ómasímini avogisaló vi hilaminigave.

¹¹ Itó lekelikutí vegená lugáa gozapá nenéminiki minamóma nemóza, itína nene likigika nagamí zelikimiake itó ale guluvitolikimiake, Guivahanite Izesu Kilistoni agulizató itó lelí Ómasímini Sikalahulímini agulizató lihimatini asú olikimikago niave.

Lukugupémo Ómasímini agulizá ale otino

¹²* Lekeza mukí netá nene gakola nominazo hanuva alesá neve liki liaká niámóza, mukí netá nenémo ma lelémō vatí aminogo ive. Itó lekeza mukí netá nene gakola nominazo hanuva alesá neve liki liaká niámóza, netá makolímo agulizaki ve loló o liminogo noiko gele amemitune.

¹³ Lekeza nene goula nosá nene lagatupámini netale itó lagatupa nene nosánetakumú neve liki liaká niámóza, minoko Ómasímo nene áminagi áminagi gizo lí nokiko haha inogo ive. Lukupémo nene moko netá aleakakumule loko nomive. Guivahanimini luhuva utó itive loko neve. Itó Guivahani eza lugupémini amelaho noive.

¹⁴ Itó Ómasímo Guivahani nene heleneikutí alémo otimó ámina oko zámuzalatumú leza lelémō otinogo ive.

¹⁵ Lukugupetinímo Kilistoni gelekelé oaká noimó nene gilisá amahe. Itó Kilistoni gelekelela eza goha ale viligokoko mokoló venálímini gelekelé otatihe, olo. Íí, lá oko nomive.

¹⁶* Lekeza láa liki gilisá amahe: Ve makolímo mokoló vená makotoka gímizekikoma, keza kugupenini kigikáini mili hámakó iiki minatáimó neve. Nenémini luhuva gakó láa loko nemóma neve: Keza lositató kugupe kigika hamokó loló okiko apiziki minatáive.

¹⁷ Lá oko nemóza, makó eza Guivahani loka gímizekiko ezagi kigikáini hamokó loló inogo ive.

¹⁸ Lá onoimó nenazo, mokolú netá golisi italo. Ve makolímo netá golesa lugáa alitimó nenémo ezáa agupeló gímizemitimóza, mokoló netalímo netá nenémo ezáa agupe ale golesa inogo ive.

¹⁹* Itó lekeza láa liki gilisá amahe: Lukugupe nene Sikalahulímini monó zavusave neve. Ómasímo lekelí lukugupémini agikagú minoko aleko itive loko mololeketonoimóma neve. Lekeza nene likigika lukugupémini amelage minamanazo,

²⁰ Itó lekelí meina hizekamóma nenazo, nenemú lukugupémo Ómasímini agulizá ale otino.

Ve aleve keí gakó

¹ Lekeza luhuva netá gizi nemeke loká inita netakumú lo utó molatoze, gililo. Ve makolímo vená alemoko hanuva minatove litimó nene lamanale.

² Itó lá onoimóza, moko netakumú gimilegú moloaká netá nenémo vái oko minokanazo, nenemú ve nene etó iki vená aliiki venáinigi minatamó nene vatí oko neve. Itó vená keza ámina iki etó etó iki veló viiki váinigi minatamó nene vatí oko neve.

³ Itó ve neneka gugupenekisa nene venaka mosetamo. Itó ámina oko venalika gugupenekisa nene vaka mosetamo.

⁴ Vená geza gugupémimi netá nene geí nomine. Vakámini netá neve. Itó ve geza gugupémimi netá nene geí nomine. Venakámini netá neve.

⁵ Vego venako lekeza lukugupetini ali amanapa amilizo. Hanuva Ómasiloka linigi goí iki ligili hagili iiki gamena miliiki mini hotó itái gamenamú litáimó nene, lamaná inogo ive. Milatái gamena asú okiko goha ali apiziki minalizo. Milatái gamena avilitáimó nene, Satá eza gimilikú molokatíve loko noluve.

⁶ Ve aleve lilí iki minatave loko lo hukoleketugopa, hanuva gele lukumuke noluve.

⁷ Nezáne noutíminkigoohuna minatave loko geleká noumóza, Ómasímo zámuza haitopaitó lehizeletamó nenazo, makó keza ve aleve lilí itamó, itó makó keza gohuna minatamómámini zámuza alinamóma neve.

⁸ Getó venaki itó gohuna vegi itó gevóna venaki keí gakó nene láa loko noluve. Keza není suni aliki veló vamiki vená alemiki minimi ititamó nene, vatí inogo ive.

⁹ Lá itamóza, gumesisi lakagata nene ve vená huko ezega emega oaká lakagata gilitamó nene, ámina netalímini loláa nenémo lekelémo golesa okatize, ve aleve lilí iki minata sunímo vatí oko neve.

¹⁰ Ve aleve lekelí gakó lítoze, gililo. Nene není gakokó nomine. Guivahanímini agepagutí gakó noluve. Vená keza váini ahulikitamino.

¹¹* Itó váini ahulikitinitamó nene, goha veló vamiki hanuva minino, itó lá amiki váinigi goha apiziki minino. Itó ve keza venáini ahulikitamino.

¹² Vegená lugáatini gakó lítoze. Gilikiko, Guivahanímo lokago alika geleake nolihe liki gelemilo. Negepa ale vávani okágó nololeketuve. Izesukumú gele alévolé onoiti ve makolímini venala eza monó gelemi vená minatimó nenémo vanagi apizeko minatiive loko gelekikoma, vanámó amisele ahulotamino.

¹³ Itó Izesukumú gele alévolé onoiti vená makolímini vana eza monó gelemi ve minatimó nenémo venalagi apizeko minatiive loko gelekikoma, venalámo amisele ahulotamino.

¹⁴ Monó gelema ve nene venánilokatí lusa nenémo kezalokagi voko aleneive. Itó monó gelema vená nene vánilokatí lusa nenémo kezalokagi voko aleneive. Lá noigo, gipa mohóini nene lusaninigi lilí iki niave. Keitoka lusa minamilina, izegipáini nene monó gelema vegená minaline.

¹⁵ Lá onoimóza, monó gelemiti vémohe itó monó gelemiti venálímohe vanahe itó venalahe ahulotoko vitove loko nolikoma, géneka lamilo. Ómasímo geha ziki apiziki minatave loko sele lo limimóma nenazo, nagá zeko ale minatunimó nomine.

¹⁶ Vená geza vakagi apiziki minatáimó nene, monó gapogú nene vaka alémoko atape, amitané. Nenéa gelenape, olo. Itó ve geza venakagi apiziki

* ^{7:11:} Mat 5:32, 19:9; Mak 10:11-12; Luk 16:18

minatáimó nene, venaka nene monó gapogú alémoko atape, amitane. Nenéa gelenape, olo.

Guivahanímo iki miliki minatave loko loletamó nenegukó minatune

¹⁷ Lekeza etó etó iki nene Guivahanímo iki miliki minatave loko loleketamó itó Ómasímo sele lo likimi zupa iki miliki miniaká a mogonaló nenegukó monokú minino. Neza numutó namató Izesuni vegenala zuha gakó lo kemeko nénika loko lo hukoaká nouve.

¹⁸ Vegená makó nene Ómasímini anosa kugupeló milikimikago niago Guivahanímo sele lo kemekago imi nitamó nenete ámina anosa ahulata gapomú vitagá amitaze. Itó vegená makó nene kugupeló Ómasímini anosa nomimó niago Guivahanímo sele lo kemekago imi nitamó nenete ámina anosamú voká lamitaze.

¹⁹ Ómasímini anosa aliki minatamó itó anosa nomimó minatamó nenémo netá gihila nomive. Ómasímini agepagutí gakó gili aliki minatamó nenémo gihila neve.

²⁰ Vegená lekeza nanámini mogonaló iki miliki niago Ómasímo sele lo likimimó nehe. Ámina mogonalokó minalo.

²¹ Geza megusa izegipa loló oko noako Ómasímo sele lo gemeneitimó nenemú gagata losi gelemoko áminagukó minozo. Itó megusa izegipa loló oko minoko hoza aleaká noanikutí gologí ogetatune liki nilikoma, géneka lamo.

²² Vegená makó nene megusa izegipa lilí iki niago Guivahanímo sele lo kemeneitimolá keza Guivahanímo lihimáikutí apasoketa vegená niave. Itó ámináminoko vegená makó nene hanuva niago Guivahanímo sele lo kemeneitimolá keza Kilistoni megusa izegipa lilí iki niave liki gili minalo.

²³ Izesú eza lekelí meina hizeneimóma neve. Nenemú mikasiuka vegenalitini gopoguni miliki gelekelé ikitamiki Izesunigó gelekelé itiki minalo.

²⁴ Nigivénérita, lekeza etó etó iki gozapá nanámini mogonaló iki miliki niago Omasímo sele lo likimimó nehe, ámina mogonalokó itína gamenagi Ómasiloka gímiziki minalo.

Mohoki getó venaki keí gakó

²⁵ Itó veló vama venakumú nene Guivahanímini agepagutí gakó alena-mumóza, Guivahanímo agika hize nemekago monónegi loló oko nouke, nezáne nagata nogulu gakó lo likimitomó nelén lekeza leheta itave loko noguluve.

²⁶ Itína gamena nene golesa netalímini agikagú nounike lugupe gasova okago noune. Nenemú ve makó keza vená alemiki gohuna minatamó nenemú gelekugo lamaná inogo ive.

²⁷ Vená aleneitanimó nene, ahulatove loko gelemo. Itó vená alemoko hanuva noitanimó nene, venakumú gelemo.

²⁸ Itó vená alitanimó nene golesa aminogo ive. Itó hanuva noiti vená makolímo veló vitimó nene golesa aminogo ive. Lá onoimóza, ve aleve keza lugupémini netakumukó giliki miluma giliki minanigave. Itó neza nenémini gelehusigutí akagá oleketatove loko noluve.

²⁹ Nigivénérita, gakó imane lo nolukumumó nenémini mogona lá oko neve: Ómasímo mola gamena mota alitokave. Itó gelekelé otatuni gamena mota alínipa okanazo, venaki ve lekeza Guivahanímini hozagú iki miliki itamó nene ve aleve lilí amamó gilikó minalo.

³⁰ Itó ive nama iaká nia vegena lekeza iki miliki itamó nene ive nama amamó giliko minalo. Itó lokogoliza viziaká niamó lekeza iki miliki itamó nenémo lokogoliza vizemamó giliko minalo. Itó netá matá meina kona iki miniajá niamó nenémo henokanotini nomimó giliko minalo.

³¹ Itó nosá molosaka liaká niamó nene lá amamó gelekiko minalo. Mikasi imane luhuvagi nego ánigoko geleká nouháza, mota vo tolova inogo ive. Nenémú gakó imane noluve.

³² Lekeza nene ha netakumú mulutini itemiko minatave loko gelenouke noluve. Gohuna ve nenete Guivahanímini hozamú giliki minanigave. Miniki Guivahanímo gelekiko lamaná itive likigó iki miliki inigave.

³³ Venaki ve nenete lugupémini netakumú gilinigave. Lá niiki venáinite giliko lamaná itive likigó iki miliki inigave.

³⁴ Lá iake kagata losi giliki miniajá niave. Itó áminagó iki vená mohó getó keza Guivahanímini hozamukó giliki minanigave. Lá niiki kigika kugupe Guivahanímini loló itive likigó iki miliki inigave. Itó vegi vená nenete kugupémini netakumukó gilinigave. Lá iiki váinite gili lamaná itave likigó gilinigave.

³⁵ Lekeza vatí iki minatave loko gakó imane lo nolukumuve. Lekelí gapo hize lí ugopa, lekeza gopa amiki likigikatini mili nupa ikiko, Guivahaniloka mukipa miniko geleké itatave loko noluve.

³⁶ Itó ve makó eza mohola nene veló viti gamena asú inogo noikoma, itó amelaho nene ale minanogo goselé apelekikoma, veló amisilinogo nookoma, amisilitímó nene lihima aleminogo ive.

³⁷ Lá itímóza, ve makó nenémo agikatunú mohóne nene hanuva minative loko gele hamó oko gilikoma, gena amiko, veló vamitive loko lo hukatímó nene etanogo ive.

³⁸ Nenémú ve makó eza mohola veló vitive loko gele amitímó nene, etanogo ive. Itó makó nenémo mohola amiselemoko ale minatímó nenémo iteko neve.

³⁹ Vená makolímohe makolímohe vanámo oko moloko ititoka ititoka oko ezeló apizeloko voko minatize. Vana helekiko nene, ve makotó vitove lokoma hanuva vitize. Lá onoimóza, gopa napa minoko nomive. Guivahanímu geleneiti veló vitive. Lá onoimóza,

⁴⁰ nagata gulumó veló vamoko hanuva minatímó nene, agoliza vizeko minanogo ive. Nene není gakó nemóza, nagata gulumó Ómasímini Sikalahú nenitoka nego noluve.

8

Ómai netalímini miguhala noaká

¹ Itó soza ómai netalímini miguhala niaká niamó nenémú lo likiminogo uve. Leza mukító nene netá mogonatagana geleká noune liki liaká niamóza, mogona gelekákalágó gelekunike lugupe aleko iteaká noune. Ligika kemeko nasahilí oketoko minatunímó nenémo luhusate ale gilitolimikiko lamaná oko minanogo une.

² Makó keza gelekate napa neve liki litamó nene geleká gihila makó alinamave loko litune.

³ Makó keza kigika Ómasiloka mili gikí litamó keí nene Ómasímo giliko lamaná inogo ive.

⁴ Nenemú soza ómai netalímini miguhala noakakumú nene láo loko geleaká noune: Ómai netá eza netá gihila nomive. Ómasi eza hamokó gihila noive.

⁵ Ómasi mukí nene okulumakú itó mikasigú niave liki liaká niave. Itó ómai netá guivahani sozámini mukí niamó gelekamóza,

⁶ leza nene Ómasi ameteho hamokó noive loko gelenoune. Aitokatí netá matá mukí utó o asú onoimó, itó leza aí mututoni loló itune loko noune. Itó Guivahani hamokó Izusu Kilstó aí agizakutí netá matá mukí utó onoimó itó leza aí agizakukó noune.

⁷ Lá oko nemóza, vegená lugáa keza nene mogonáa lá oko noimó nene gili guni isá amave. Itó nenémináate ómai netá eza netá gihilave liki minake, sigaga litiki minake, kigika okamóma nenazo, miguhala nake goliva gelego, genavagi loló noigo, nake kigikáini ali golesa iaká niave.

Ligivetegini kigikáini ale gopa oketamitune

⁸ Ómasi eza nosánetá noaká namoakakumú giligo golesa aminogo ive. Miguhala noaká mositunimó nene gele golesa itihe. Itó nokuko gele lamaná itihe. Lá oko nomive.

⁹ Hanuva lugáa lekeza lagava giliki niaká niamoláate likigivetikini kigika losi pasi i vegená kigikáini ali gopa ikimikataze, nenemú giliko gena likivisino.

¹⁰ Geza matuka koló ominamó neneka, ómai netalímini numukú miguhala noko noako, gigivekaho makolímo giliko gena oaká noito vémo ánígokoko láa loko linogo ive: Nonamole. Neza natomole. Loko lokoko nanogo ive.

¹¹ Natimó nene, gigivekaho monó lagasó alenei ve Kilstó nohilike meina hizenei vema geí gigikaloka vokoko hoipa loko golesa amitímó nehe.

¹² Lekeza nenémini iaká niake, likigivetikini kigika kemeni alévolé ami vegená goihá giligili nikitake, kigika ali gopa ikimiaká niave. Kigika ali gopa ikitatamó nene, Kilstoni goihá giligili itamó gilinogo ive.

¹³ Nenemú neza iza mémela nonugo, nigivéneho nenemule loko gele gopa oko lihima alekatinazo, aikumú gulugo, gena okikoma, iza mémela mose oko mininake hilitoze.

9

Aposolomate avevezaha a netá

¹ Neza nagá makokú minamuve. Nénisi vegenalitini megusa minamuve. Nénisi nene aposolo nomive liki nilahe. Nénisi nene Guivahanima ánígamuhe. Hozanémini gihiláa Guivahanímini nasahilikú utó oaká noimó nene lekelisi nene lá isá amahe.

² Nénisi nene vegená lugáatini aposolo minamugoma, aposolo hozanémini gihiláa Ómasímini lusaló utó amoláa nene lekelisi nianazo, lekelí aposolo lamaná nouve.

³ Aposolo hoza aleaká nou mogonánemú loká iaká nia vegená nene gakó imane ale viligoko láa loko lo kemeaká nouve.

⁴ Aposolo lugáa keza lekelitokatí nosánetá zahí nagamí aliki niki minikago, lelikumú nene namitáive liki li hukilitatahe.

⁵ Pitá itó Guivahanímini agunamotamolagi itó aposolo lugáa keza venáinigi monó hozaló nivago nosánetá kimiaká niave. Lá niago leza áminámini okogó venategi monó hozaló vitínazo, nosánetá mosilitatamó nene etatihe, olile.

⁶ Nezagi Panapasiki lezagó ligizanitunú hoza aleaká nousimó nene ali ahulatáive liki gili limitamó nene etamitihe.

7 Gililo. Pilisí ve keza lova hizita netá kezáini moníinitunú meina hiziaká niahe. Itó ve makolímó hoza aleko zuhá itimó nene omolokiko aleko namitihe. Itó ve makolímó pulumaká iza gizapa onoitotí keí aminí namitihe.

8 Gakó láa loko nolumó nene imane mikasiuka vegenalitini gakó nolumóza, monó gotolaú gakó makó ámináminoko utó noive.

9* Mosé lo hukoko li gakó makó láa loko lonoimóma neve:
Pulumaká nenémo hoza alegetoko ménihā gihisi nanogo noikoma géneka loko agepa viseletamo.

Loko Ómasímo limó nene pulumakakumukó lamive.

10 Vegená lelikumuki lo moloko limóma neve. Hozagaza aliaká niamó nenete gihila utó iko natune liki kagata losi gelemake, zuhaina iaká niamó nene etokave.

11* Leza nene lekelitoka likigikámini netá gihila nene zuhá oaká unitó meinaváa lekelitokatí lugupémini netá alitunikumú gilikago gena okahe.

12 Lugáa keza lekelitokatí moni henkanoni aliaká niamó nenémo etokamó nenazo, lamaná lezagí nene áminámini oko lekelitokatí alitunimó etative.

Lá onoimóza, leza apí oko hoza alunikutí emane lugupémini netá ale-muháma neve. Kilistoni gakó lamanalímini gapo hize lí omikatune loko lekelitokatí moni henoni alitave liki gili liminamóza, lá amunike ahulokunike gena aleko mohona oaká noune.

Pauló meina nomi hoza aleko minamó nenémo gonanalivagi utó imó

13* Monó zavusave napagú hoza alemoláa keza monó zavusavegú Ómasímini avogisaló milita nosakutí niaká niave. Itó ló lónogó iake Ómasí gu-guni gizi amiaká nia ve keza vegenalite Ómasímini avogisaló milita netakutí ali nímaní iaká niave. Nenéa lekeza gilisá amahe.

14* Itó monó gakó lole ale ve leza ámina gakó giliaká nia vegenakutí lugupémini lukesava alitave loko Guivahanímo lo hukoletonoimóma neve.

15 Lá onoimóza, nénisi ámina vililita gapoló vosá amuve. Itó lekeza nene ámina suni alinitatave loko gelekuke luhuva imane gizamuve. Itó ve makolímó nene neza hagitana oko monó lo lekemeaká noukumú nogoliza vizeko nugupe ale oteaká noumó nene aleko lemekative loko nenemú gulugo gena okanazo, heleaká netalímo není alitihe loko nenemú gulugo, vávani noive.

16 Gakó lamaná lo hutilí oaká nouve. Lá noumóza, ámina hozaváa nene není numupiló molonoimóma nenazo, nenemú nugupe aleko iteko sigaga loko litomóma lamaná aminogo ive. Izesuni gakó lamaná lo hutilí amulina, nagataló nagataló igo minuline.

17 Hoza nene nezáne nagata geleko ale utó oko alulina nene, minoko meinaváa alulinamóza, nezáne nagata geleko alemumóma nenazo, mogonáa lá oko neve. Ámina hoza nene Ómasímo nemekago numupiló itekago aleaká nouve.

18 Nenemú meinaváa aleaká noumó nene lá oko neve. Neza monó hozaló novuke, Izesuni gakó lamanáma meinaváa nomimó vegená lo keme keme oaká nouve. Lá uke gakó lamaná loaká nenémini meinaváa lugupémini lukesaváa alitave liki linamó nene ale ahuloaká nouve.

Pauló eza haitopaitó vegenalitini gelekeléini minamó

* **9:9:** Gapo 25:4; 1 Tim 5:18 * **9:11:** Lom 15:27 * **9:13:** Gapo 18:1 * **9:14:** Mat 10:10; Luk 10:7

19 Neza vegená makolitini megusáini minamumóza, vegená mukí nene Kilistotoka kelémo molatove loko gopa mukí vegenalitini gelekeléini loló oko nouve.

20 Zuta vegená Kilistotoka kelémo molatove loko kezagi makó minunike, Zuta vetini kemetameki loló oaká nouve. Itó nezánmú Mosé lo hukoko li gakolímini nagakú minamumóza, lo hukoko li gakolímini agizakú nia vegená nene Kilistotoka kelémo molatove loko keitoka minuke, ámina lo hukoko li gakotó gelekelé izegipa nemetamenigi loló oaká nouve.

21 Itó Zuta vegená minamamoláa keza Mosé lo hukoko li gakó minami vegenaki makó minunike Kilistotoka kelémo molatove loko Mosé lo hukoko li gakó minami nemetameki loló oaká nouve. Nene Ómasímini avogisaló eza lo mola gakó nomive lukopa, neza Kilistó lo mola gakó gele aleaká noumole.

22 Itó vegená monó kigika amimoláa Kilistotoka kelémo molatove loko ve nenémináagi makó minunike vegená monó kigika amimoláa kemetameki loló oaká nouve. Lugáate latila inigi niago, némini manámini oloko vinake Ómasímo lugáa kugutó vizitive loko haitopaitó vegenatoka minuke, haitopaitó kemetameki loló oaká nouve.

23 Mukí netá nene hanuva Izesuni gakó lamaná utó oloko vitive loko loló oaká nouve. Lá nouke Ómasímo nónohá nozeketoko nezagi nónohá zenetative loko aleaká nouve.

Amuza moloko gonanalisi netá alitune

24 Lekeza láliki gilisá amahe. Zohí oaká apató nene izegipa keza mukitó ololu liaká niamóza, netala nene hámakolímo goí oko vo anitike aleaká noive. Lekeza ámina iki Ómasilokatí gonanalisitini alitune liki ololu lilo.

25 Lesis ita izegipa keza amuza molatune liki apínapi iki haitopaitó avevezaha iaká niave. Keza gonanalisi netá ha netakumú nenémini iaká niamóza, leza nene gonanalisi netá alévoletáamú nenémini itune.

26 Nezánegi nene ololu loaká noumó nene anosa netá alitove loko ánigo hee lo minuke ololu loaká nouve. Itó neza hoza alumó nene ale satosá amuve.

27 Neza vegená nene monó lo keme keme oko minoko nezáne latila okatoove loko nugupéne aleko lemeko nigikámo litító ámegetative loko gizapaváa minoaká nouve.

10

Soza ómai netá gupá zi amiki gelekelé itamilo

1* Nigivénegita, leza avotege iki miliki amó nenemú gilitave loko lo likimitoze, gililo. Mosé eza Izipi mikasiukatí kelémoko novigo, keza mukitoka límusímo molo hitokimikago vamó, itó mukitoka age nagamí likiki vamó.

2Lá niake, Moseni vegenala zuha lilí itave loko límusímo itó age nagamilímo monó nagamí loló okago hilamó.

3* Itó Sikalahulímo nosá ale utó okimikago, mukitó niki minamó.

4* Itó Sikalahulímo nagamí ale utó okimikago, mukitó namó nene Sikalahulímini zámuzaló gehani nenémo kêmegetoko novigo ámina gehakutí nene nagamí lemekago namó. Ámina gehani nenémini agulizá Kilistó.

5* Lá okamóza, Ómasímo ámina Zuta vegená lugáamú gele golesa okimikago, mikasi gomopalaló hili gesá amó.

* **10:1:** Gá 13:21-22, 14:22-29 * **10:3:** Gá 16:35 * **10:4:** Gá 17:6; Nam 20:11 * **10:5:** Nam 14:29-30

6 * Itó Zuta vegenatoka netá lá oko utó imó nenémo lelí lagata alinogo utó imóma neve. Keza nene golesa netakumú mumuzó ikago, leza áminámini okatunize.

7 * Keikutí lugáa nenete soza saza ómai netá gupá zi amiake, némini netalímini gelekelé itiki minamó. Lekelisi nenémini amilo. Nenemú monó gotolaú nene luhuva láa liki gizinamóma neve:

Vegená keza mitó minake, nosánetá niki niki iake, otiake ómai netalímo ánigo guni itive liki melekeni amó neve.

8 * Lá iake, mokoló netá haitopaitolímimi ali utó iki minamó nenémini okatunize. Keikutí lugáa nenete ámina netá golesa ali utó iki minake, ámina zupagó vegená helemó nene 23 tausen hili gesá amó.

9 * Itó keikutí lugáate Ómasimú agika lamanaki ve nenazo, nosánetakumú géneka litunímó nene gahá lememitihé liki liake gimivagú milikago, gosihá agulizá guimalite kipilikago, hili gesá amó. Lezagi lá okatune.

10 * Keikutí lugáate Ómasimú gahá litigí ikago, vegená kepeleaká ageló makolímo anitike kepele gesá imó. Lezagi lá okatune.

11 Keitoka netá utó imó nenémo lelí mesaha loló okaze, nene ánigatune. Mikasigi okulumaki gamenaváini asú itító noune. Gakó imane lagata aliki nene gakokumú avetó iki luhuva gizinamóma neve.

12 Nenemú nene ve makolímo ezáamú giligo monokú alévolé oaká noitimó nenémo voko golesa okatize, nenemú legesó oko minatize.

13 Lekelitoka gimirlikú moloaká nenémo utó omo itimó nene, numutó namató vegená mukitoka áminagó oko utó oaká noive. Lá onoimóza, Ómasímo lelémo vatí itove loko lokago alévolé oaká ve nenazo, gimirlikú moloaká netá makolímo utó okoko lekelí zámuza avilegekoko lekehelú itimó okikoma, Ómasímo lekelémo vatí oko zámuza nolekemeko zukatoni lekelepizekiko, hanuva alévolé iki minanigave.

14 Nenemú nene, nigivénérita, lugeha netá soza saza ómai netakumú mosiiki etó iki minalo.

15 Lekeza likigikagi lakagatagima niave. Nenemú gakó imane litoze, lekezatini giliki ánigi hee lilo.

16 * Gonigú nene vain nagamí Ómasímo lusa geko molamó nene nonunike, Kilistoni golanímini lusa molamó nene izá moloko aleaká noune. Itó peleti lusa geko molamó nene nonunike Kilistoni mémelámini lusa molamó nene izá moloko aleaká noune.

17 Lepa nosá nene hámakó peletigutí noaká noune. Ámináminoko leza monó guluhá vegená nenete apizeko hámakó loló oaká noune.

18 * Lekeza nene Isilae vegenalitini sunimú gilio. Guguni giziki nosánetá niaká nia vegenalite guguni giziaká italó viki Ómasiloka gímiziaká niave.

19 Gakó nolumó nenémini mogona láoko neve. Ómai netalímini miguhala niaká niamó nenémo netá gihila nomive. Itó ómai netá ezagi gihila nomimóza,

20 * monó gelema vegenalite miguhala niaká niamó nene Ómasíminimú nomive. Holositini miguhala niaká niave. Nenemú nénisi nene lekezagí holosigi apizitave loko gelemuve.

* **10:6:** Nam 11:4 * **10:7:** Gá 32:6 * **10:8:** Nam 25:1-16 * **10:9:** Nam 21:5-6 * **10:10:** Nam 16:41-49 * **10:16:** Mat 26:26-28; Mak 14:22-24; Luk 22:19-20 * **10:18:** Liv 7:6 * **10:20:** Gapo 32:17

²¹ Lepa nosató Guivahanímini gonigutí niiki itó holositini gonigutí niiki itamó nene, etamitive. Ámina goni lositakutí noakaláa nomive. Itó Guivahanímini italotí niiki holositini italotí noakaláa nomive.

²²* Guivahanímini izapaló molative liki niahe. Ehe, lelí zámuzámo aí nene avilegenamive.

Némini manámini inigi Ómasímini agulizá vitive liki lá itaze

²³* Lekeza nene netá matá mukí nene ligika ale golesa iti netá nomigo hanuva alekaláa neve liki liaká niamóza, mukí netá alekuko nenémo lelémovatí aminogo ive. Netá matá mukí nene gakola nomigo hanuva alekaláa nemóza, nene netá mukí aleloko novinake luhusate ale gilitolimiakaláa nomive.

²⁴ Makó eza ezáamukó gelemoko agivelahinimú gilino.

²⁵ Lekeza nene lekezatikó maketilotí iza goula nosá meina hizitune likima hanuva hizitaze. Lá níukima soza saza ómai netalímini numukutí nehe liki giliko, gena okative liki loká miká amilo.

²⁶* Nenemú monó gotolaú luhuva láá liki gizinamóma neve:

Mikasigú netá matá mukí nemó nenémini amelaho Guivahani áisigó noive.

²⁷ Liki gizinamó nenazo, mikasiuka netá mukí nene noaká netakó neve loko gilinogó une. Nenemú monó gelemi ve makolímo nosánetakumú alesa molo lekemekiko nene, numunagú ititune likima ititaze. Itlikiko, nosánetá lekemekiko nene, lakagata giliko, gena amiko, gopa nalo. Gopa niniki nene holositini miguhala nehe liki loká miká amilo.

²⁸ Lá onoimóza, gopa niniko nene ve makolímo imane iza nene ómai netalímini miguhala neve loko lo utó o lekemekiko nene, ámina vemú nene giliko, gena okikoma, ahulalo.

²⁹ Lekezatini likigikatiní golesa itikumú nomive. Likigivetipini agika golesa okative loko noluve. Nezáne nigikamú gulugo gena ami netakumú ve makolímo ezáa agikatunú ale moloko nenikumú lokatize, nenemú ahulatoe.

³⁰ Neza Ómasi agepoka lokinake nosánetá natomó nenazo, Ómasi agepoka loko nato netakumú ve makolímo gele golesa oko gahá nimitimó nene etaminogo ive.

³¹ Nenemú lekeza nosánetá nanigi itó zahí nagamí nanigi itó némini manámini inigi Ómasímini agulizá vitive liki lá ilo.

³² Lekeza Zuta vegená ahe itó Kiliki vegená ahe itó Ómasímini vegenala zuha keí kovogisaló gili golesa ita netá nene ali utó amilo.

³³ Neza ámináminoko vegená haitopaitó keza ánginimikiko etative loko minuke, nezáne netá matáne lamaná itive loko nomive. Ómasímo vegená mukí kugutó vizitive loko némini manámini oaká nouve.

11

¹* Neza Kilstó lisoko vi gapoló lisuke, ámegetoaká nouve. Lekeza ámináminiki není nigizakagú lisiki némegetalo.

Venalite gotító netá hitata gakó

² Lekeza nene oko moloko umómaloka mili giliki neza lo hutu gakó lainimoleketumó nene ámegetiki miniaká niave. Nenemú gulugo lamaná okago lekegepoka loaká nouve.

* **10:22:** Gapo 32:21 * **10:23:** 1 Koli 6:12 * **10:26:** Age 24:1 * **11:1:** 1 Koli 4:16; Pili 3:17

³ Itó gakó makó lokugo gilitaze, gililo. Ve nene venalitini napáa niave, itó Kilistó nene vetini napáa noive, itó Ómasi nene Kilistoni napáa noive.

⁴ Nenemú ve makolímo ezáa gotolaló akilí hitonoko Ómasiloka litimope itó Ómasímini agepagutí gakó lo utó itimó nene, Guivahani avoza hiliti netá alinogo ive.

⁵ Itó vená makolímo gotolaló netá hitamoko Ómasiloka litimope, itó Ómasímini monó gakó lo utó itimope nene, vana avoza hiliti netá alinogo ive. Lá itimó nene, mokoló vená lugáate gotóini zopova huki asú iki miniaká nia vená gilinogo ive.

⁶ Nenemú vená makó nene gotolaló netá hitamoko lá okikoma nene, gotola zopova huki alínipa italo. Itó vená makó nenemú avoza helekikoma, gotola zopova aseva zekoko gó ale hitooko Ómasiloka lino.

⁷* Itó ve keza nene Ómasímini nekisa itó Ómasímini gonanalisiva lili inamole. Itó vená keza nene vetini gonanalisi niave. Nenemú ve keza monó lita gamenaló gotóító netá ali hitiiki minatamó etaminogo ive.

⁸* Ómasi eza ve nene venakutí aleko loló amive. Vená nene vegutí aleko loló imole.

⁹ Ve nene venakumule loko alémo utó amive. Vená nene vemule loko alémo utó imole.

¹⁰ Nenemú monó liki niago, ageló vegenalite ánigi miniaká nianazo, vená keza vetini gizapaló niamó nenémini anosa nene gotóító gó ali hitiki minatamó nene etanogo ive.

¹¹ Lá oko nemóza, Guivahaniló gímizekunike ve nene venalitini zámuza nianazo, itó vená nene vetini zámuza nianazo, nenemú Guivahanímini avgisál nene ve vená keza haitopaitolímini minatamó nene etaminogo ive.

¹² Vená nene vegutí aleko loló onoimóma neve, itó itína gamena ve nene venakutí utó oko ve hize hutilí oko minoaká noune, itó netá mukí nene Ómasilokati neve.

¹³ Lekezatini gilikí ánigi hee lilo. Vená makolímo gotolaló netá hitamoko Ómasiloka litimó nene, etatimó nehe.

¹⁴ Itó ve makó nene gotola zopova hánagi minatimó nene etaminogo ive. Nenémini mogona nene gozapá monó gelemake mina zupa hanuva gilinamóma neve.

¹⁵ Itó venalitini gotóini zopova hánagi nenémo netá hitinamó gilinogo inazo, keza zopova hánagi minatakumú nene gili lamaná iaká niave.

¹⁶ Makó nenémo imane gakó gele ahulanogo nookoma, láa loko gilino: Haitó suni nene lezagí Ómasímini vegenala zuha lugáagi ma ale minamune.

Lepa nosató ali nupa iake ali gopa iki miniaká amó

¹⁷ Netá makokumú gulugo golesa oaká noimó nenemú lekegepoka laminekake lakagata alinake lo likimitoze, gililo. Lekeza monokumú ali nupa iake likigika mili hamó amake hizi hoú liaká niave.

¹⁸ Itó monokumú ali nupa niago, lekelí likigika hoú loaká noive liki li nimikago lamaná lahe loko gelekuve.

¹⁹ Itó hizi hoú lamó nene hanuvamú nomive. Lekelikutí hí vegenalite monokumú amuza miliaká niave. Keza mini utó itave loko ámina suni utó oaká noimó netive.

* **11:7:** Apí 1:26-27 * **11:8:** Apí 2:18-23

20 Itó lepa nosá nanigi ali nupa iki minake, nosá niaká niamó nene Guivahanímini nosá nomive.

21 Lekeza nosánetá aliki ake nelaga amake, lekezatini litá iki etó etó nikago, vegená lugáa gaúna hiliki miniaká niave, itó vegená lugáa nagamí niki niki kigika kagata gopa oaká noive.

22 Lekeza numutini nomigo lá iaká niahe. Lekeza nosánetá natune likima numutukó nalo. Lekeza Ómasímini vegenala zuha makó ánígago lemekago, gohogó vegená keza golesa gele netá alikimiaká niave. Nene sunimú nanave loko lo likimitove. Lekegepoka litohe. Óe, lekegepoka laminogo uve.

Lepa nosalímini gakó

23 Neza Guivahanilokatí gakó aleko lukumumóma nene lá oko neve. Guivahani Izesú nene Zutá amimí i holugú nene peleti aleake,

24 Ómasí agepoka loake, gitegeko nokimike limó: Není mémela imane lekelikumule loko nolukumuve. Nenikumú gili miniki niki minalo.

25* Itó nosánetá niake, vain nagamígoni ámináminoko aleake, láa loko limó: Imane gonigú nene lo múnaheaká gakó gosohá ale alévolé oaká golaníne neve. Nata zupa zupa nene nenikumú gili miniki niki minalo.

26 Guivahani velesá atiginá oko amiko nene lekeza imane peleti nosaki vain nagamiki nata zupa zupa nene Guivahani hili gakó li utó utó iki li kimiaká niave.

27 Nenemú vegená makó keza Guivahanímini peleti nosaki vain nagamiki ali gopa iki natamó nene, Guivahanímini mémelagi golanigi ali gopa inatímini lihima alinigave.

28 Nenemú peleti nosaki vain nagamiki nanigi niikima, goí iki likigikagú gakó netikumú vitagá iiki nalo.

29 Itó vegená makó nenémo Guivahanímini agupe loló uhatímini mogona gele hee lamoko gopa natimó nene, Ómasímo lihimalamú goní otati netá nene ezáa ale utó inogo ive.

30 Lekelikutí lugáate lepa nosá gopa nikago, netá kiviseaká noive, itó lugáa mota hilikave.

31 Leza mogonatemú vitagá oko lo utó moloko minutilina, Guivahanímo nene lihima lemémiline.

32 Itó Guivahanímo mogonatemú lotuva legeaká noi zupa nene lelí mogona ale utó oko lagavutó zeaká noive. Monó gelema vegenaki gopa miniki golesa ikatave loko nenémini olimiaká noive.

33 Nenemú nigivénegita, lekeza lepa nosá natune liki niikima, ali nupa iki miniki vegená lugáamú kegeva iki niiko, imi asú ikiko, apí iki nalo.

34 Makó nenémo nosánetakumú gaúna napa helekocoma, numunauka minoko goí oko nino. Alegesá iki ali gopa ikiko lekelitoka lihima utó okatize. Itó gakó lugáa nezáne lekelitoka vinake ale hee linogo uve.

12

Sikalahlímo monolímini zámua lehizeliaká noive

1 Nigivénegita, Sikalahulímo zámua haitopaitolímini lehizeliaká noimó nenémini mogonamú gili gopa ikataze, lo likimitoze, gililo.

2 Lekeza gozapá monó gelema vegená niago, lakagata hizego, negi hiziaká netá ómai netá sozáaló viki gímiaká amó. Nene mota gilinamó nenazo,

3 nenémini lugáa lokugo gilitaze, gililo. Ve makó nene Ómasímini Sikalahulímo alémo vávani iko Izesuni aleko letoko laminogo ive. Itó Sikalahulímo alémo vávani amiko nene, Izesú nene Guivahaníne noive loko laminogo ive.

4* Itó monolímini zámuza haitopaitolímini nemóza, Sikalahú hamokó nenémo lehizelimiaká noive.

5 Monolímini gelekelé hoza haitopaitolímini nemóza, hoza amelaho Guivahani nene hamokó noive.

6 Itó monolímini zámuza haitopaitotunú hoza aleaká nounimóza, Ómasi hamokó nenémo lelémó vávani igo aleaká noune.

7 Sikalahú nenémo monokú lamaná iki minatave loko monolímini zámuza mukí nene gona moloko leme asú oaká noive.

8 Ve makó nene Sikalahulímo alémo vávani igo gakó gele hee lo minake loaká noive. Makó nene ámina Sikalahulímogó alémo vávani igo, asuguná gakolímini mogona loaká noive.

9 Itó vegená makó nene ámina Sikalahulímogó alémo vávani igo, Ómasimú gele alévolé onoikeve loko alévolé suni ale utó oaká noive. Makó nene ámina Sikalahulímogó alémo vávani igo kivisi vegená kelémo zokoaká noive.

10 Itó makó nene alévolé suni alitive loko zámuza ameaká noive. Makó nene Ómasímini agepagutí gakó litive loko agika agata ale koló omiaká noive. Makó nene netá matá nene Ómasilokatí nemó nomimó nenémini mogona ánigo hee hee litive loko nene agika agata ale koló omiaká noive. Itó makó nene haitó vetini konokutí monó galinali litive loko agepa ale vávani omiaká noive. Makó eza haitó konokutí lina gakolímini mogona ale viligoko lo kimitive loko agepa ale vávani omiaká noive.

11 Nenémini zámuza mukí nene Sikalahú hamolímogó ezáa agata gilike etó etó oko gona moloko lemeaká noive.

Lugupe hamó nego gelekeleváa mukí neve

12* Vegená leza lugupe nene hámakó neve, itó lugupémini gelekelé nita netá ligisa ligizani logoka legepa logómula lagata nene mukí neve. Keza ali nupa ikago, lugupe hámakó loló oko neve. Leza Kilstotoka gímizuni vegenatoka ámináminoko neve.

13 Sikalahú hamolímo lelitoka limike monokú lelémo nupa okago, lugupémini suni aleko hamó loló oko nominune. Zuta vegená itó Kiliki vegená itó sihele vegená nouhaki itó minamuhaki leza mukító nene hamó Sikalahú ale mulutegú molo asú unike, hamó loló okune.

14 Lugupémini gelekelela nene hamó nomine. Mukí niave.

15 Nenemú ligisa nenémo neza agizani noamuve, nenemú agupémini nekisa minamuve loko litikumule loko lugupe ahuloake ezágó minoakeve loko laminogo une.

16 Itó lagata nenémo neza agómula minamuve, nenemú agupémini nekisa minamuve loko lugupe ahuloake ezágó minoakeve loko laminogo une.

17 Lugupeló nene logómula minalina, lugupe nenémo agatamú vitagá iline. Itó lagatagó minalina, agokamú vitagá iline.

18 Lá onoimóza, lá oko nomine. Ómasímo ezáa agata gele hee lo minake, lugupémini gelekelela mukí nene hoza gakó haitopaitolímini loketamó.

19 Lugupémini nekisa hamokó minalina, lugupe nene golesa oko haha ilinamóza,

20 itínasa nene gelekelé netá mukí niago, lugupe nene hamó neve.

21 Nenemú logómula nenémo geza lelí luhusate minamanize, ahulokoko vozo loko ligizani lo ameminogo ive. Itó gotote nenémo geza lelí luhusate minamanize, ahulokoko vozo loko ligisa lo ameminogo ive.

22 Lá oko nomive. Lugupémini nekisa lugáa keé lama netá nene minamina, leza lamaná oko minamutiline.

23 Itó lugupémini nekisa makokumú guluko limiki niamó nene gizapa okimiaká noune. Itó lugupémini lovoza hili netá nene asapú oko gonanalisi oaká nounimóza,

24 lovoza helemi netá nene utó iki miniaká niave. Ómasímo nene lugupe ale utó ike, lugupémini nekisa limiki minamoláa nene hoza napa kimimó.

25 Lugupémini nekisa keza hoú liki haitopaitó minamiki lelegí iki eza gelekelé otiko eza gelekelé otiko minatave loko hoza kimimó.

26 Nenemú lugupémini nekisa makolímo gotá apelekiko miluma gilitímó nene, lugáa mukí keza miluma gili asú inigave. Itó lugupémini nekisa makó ali otitamó nene, lugáa mukí keza kogoliza vizi asú inigave.

27 Monokú nominuhatímimi mogona ámináminoko neve. Lekeza mukí ali nupa ake Kilistoni agupegitana iki minake aí vegenala zuha lilí iki niave. Itó etó etó nene aí nekisa lilí iki minake, gelekelé iki niave.

28* Ómasímo nene vegenala zuha lelitoka lá oko lelémo etó okago noune: Aposolo lelémo etó okago, lelí hoza itekave. Nenetotí lemeko Ómasímini agepagutí gakó li utó iaká ve. Nenetotí lemeko monó lainim-ilimiaká ve, itó nenetotí alévolé suni haitopaitolímimi aliaiká ve kelémo etó imó. Nenetotí lemeko kivisi vegená kilími zokiaká vegi, nasahilí ikimiaká ve, gizapa ve, itó haitó konokutí galinali li utó iaká ve kelémo etó imó.

29 Leza aplosologó lelémo etó imó nehe. Itó Ómasímini agepagutí gakó li utó utó vegó kelémo etó imó nehe. Itó monó lainim-ikimiaká vegó kelémo etó imó nehe. Itó alévolé suni haitopaitolímimi ali utó iaká vegó kelémo etó imó nehe.

30 Itó kivisi vegená kilími zokiaká vegó kelémo etó imó nehe. Itó haitó konokutí galinali li utó iaká vegó kelémo etó imó nehe. Itó haitó konokutí lina gakolímimi mogona ali viligiki li kimiaká vegó kelémo etó imó nehe. Nenéminoko nomive.

31 Lekeza monolímimi zámuza iteko minamoláa alitune liki amuza milalo. Itó neza monolímimi zámuzatunú miniki aliki ita gapováa lamaná lekelepizoze, gililo.

13

Ligika kemeko nasahilí oaká gakó

1 Neza vegenalitini konokutipe itó agelogini konokutipe monó litomóza, nigika nene vegená kememoko hanuva lá itomó nene, hoko-hoko netá pelo anó nenémini oko ha netá loló inogo ive.

2* Itó neza Ómasímini agepagutí gakó loakálímini zámuzagi ve loló oko mininake, Ómasímini asuguná gakolímimi mogona nene gele asú oko, itó mukí asuguná gakó mogonamú gele asú oko minoko, itó neza gele alévolé onoko

* **12:28:** Epe 4:11 * **13:2:** Mat 17:20, 21:21

agoka makó akutoko alemó zittímini zámuzagi minoko nigika kememinake hanuva lá itomó nene, ha netá loló inogo ive.

³ Itó netá matáne mukí gohogó ve nasahilí oketoko itó nugulizá ale otitove loko nugupe lokú ahulokoko nigika kememinake hanuva lá itomó nene, ha netá nenazo, nenémo nelémo lamaná aminogo ive.

⁴ Kigika kimita vegená nenete gínikaha amiki hulu iki minanigave. Keza kemekugú namiki kezáinimú gilikó itemiko kezáini kugulizá ali oteminigave.

⁵ Keza sihana netá alemiki letenaha minamiki mukahá amiki vegenalitini lihima ali minamiki,

⁶ netá golesámo hutilí noiko kogoliza vizemiki monó sunímo hutilí noiko mulúkú lamaná gilinigave.

⁷ Kigika kimiaká vegená nenete genavagi netá hanuva gihinigave. Mukí netá matakumú gili alévolé ikigó minanigave. Kigikatunú Ómasimú kagata losi gelemiki ageva iki miniki monokú alévolé iki minanigave.

⁸ Ligika kemeaká suni nene lutegeminogo ive. Ómasímini agepagutí gakó loaká nene asú inogo ive. Itó haitó konokutí galinali loaká nene asú inogo ive. Itó asuguná gakó mogona geleká nenegi asú inogo ive.

⁹ Asuguná gakó mogona geleká itó Ómasímini agepagutí gakó loaká nounimó nene veletó agilaló neve.

¹⁰ Minoko alika nene vové avetoko avasavagi netá utó noiko, veletó agilaló ne netá nene tolova inogo ive.

¹¹ Neza izegipa namuni minuke, namu gakó loko minumó, itó namunite giliaká kigika kagata geleko minumó. Itínasa nene olopa ve loló okuke, izegipa namunitini suni ahulokuve.

¹² Itínasa gamena geleká noumú nene, gapokapolímo logoka legepa ale viligokago, ánígo hee hee losá amunímó nenéminoko neve. Alika nene gihila lamaná logómulaló utó iko, Ómasímo lelí mogoná ánígoko gele asú oaká noimó nenéminoko leza ánígokoko gele hee hee loko gilinogo une.

¹³ Itó miniva miniva ita netá nene Ómasimú gele alévolé oaká itó lagata losi gelemoko ageva oaká, itó ligika kemeaká nene netá losive makole nemóza, ligika kemeaká nenémo iteko neve.

14

Ómasímini agepagutí gakó lo utó o kemeaká nenémo iteko neve

¹ Nenémú lekeza vegená likigika kimiki nasahilí itune liki amuza milalo. Itó monolímini zámuza makó alitune liki amuza milalo. Lá iki miniki Ómasímini agepagutí gakó li utó iakakumú gilikiko itino.

² Haitó konokutí galinali liaká nia vegenalite vegená li kememake Ómasi li amiaká niave. Keza nene Sikalahulímo kelémo vatí igo Ómasímini asuguná gakó nilago, vegená lugáate gili gopa iaká niámóza,

³ Ómasímini agepagutí gakó li utó iaká niámó keza vegená monokú kilími olotiva iaká niave, itó ali kii likimiaká niave, itó kilími hulu iaká niave.

⁴ Haitó konokutí liaká nia vegenalite kezáini kigikáini hizi lé imiaká niámóza, Ómasímini agepagutí gakó li utó iaká nia vegenalite Izesuri vegenala zuha mukí nene monokú kilími alévolé iaká niave.

⁵ Lekeza haitó konokutí galinali li asú itave loko geleká noumóza, Ómasímini agepagutí gakó li utó itakumú gulugo itekave. Ómasímini agepagutí gakó li utó iaká nia vegená nenete haitó konokutí liaká nia vegená nene

kiviligikave. Lá onoimóza, ve makolímo haitó anokutí lokikoma, Izesuni vegenala zuhatini luhusáini ale gilitoketative loko makolímo ámina lonoi gakolímimi mogona ale viligoko lo kimitimó nene hamó lelegító minanigave.

⁶ Nigivénegita, neza lekelitoka vinake Ómasímo lo utó oko lo nimi gakó itó monó mogona itó Ómasímini agepagutí gakó itó lainim-oleketati gakó lo utó oko lo lekememinake haitó konokutikó gakó lo likimitomó nene, nenémo nana oko hize lé oleketative.

⁷ Hanuva netá hololopani itó gotilisa nene lamaná iki zemitamó nene, anó lupamú nana oko gilitune.

⁸ Itó ami vémo pikuli nene lamaná oko huhu lamitimó nene, lova hizitave loko sele nolive liki viki ali vatí aminigave.

⁹ Ámináminoko lekeza haitó konokutí gakó asapulagi litamó nene, vegená lugáate mogona nana iki gilitave. Hanuvamú likago, gakotini nene hepelímo ale gopa okiko tolova inogo ive.

¹⁰ Nagata gulumó numutó namató haitopaitó konó komasí nomive, itó gilituni gakokó nemóza,

¹¹ hanuva neza haitó konokutí lina gakolímimi mogonáa makó gele gopa itomó nene, ámina gakolímimi amelaho nenikumú gelekiko, haitó apatotí ve loló inogo uve, itó neza ámináminoko aikumú gelekugo haitó apatotí ve loló inogo ive.

¹² Itó lekelitoka mogona ámináminoko neve. Sikalahulímini zámuza lekelitoka utó itive liki amuza miliaká niámó nene vatí oko nemóza, Izesuni vegenala zuha monokú kilími miliko, monokú luhusatini ali alévolé itave liki amuza milalo.

¹³⁻¹⁴ Neza haitó konokutí Ómasiloka litomó nene nigikatunukó linogo uve. Nagata nenémo netá gihila ale utó aminogo ive. Nenemú haitó konokutí gakó galinali lita vegenalite mogona ali viligiki vegená li kimitatímini zámuza alitune liki Ómasiloka lino.

¹⁵ Nenemú nana itune. Nenémini uko etanogo ive. Makó zupa nene Sikalahulímo legepa ale vávani okiko haitó konokutí Omasiloka litune, itó makó zupa nene lagatatunú gele hee noloko Ómasiloka litune. Makó zupa nene Sikalahulímo legepa ale vávani okiko haitó konokutí nama litune, itó makó zupa nene lagatatunú gele hee lonoko nama litune.

¹⁶ Lá amitanimó nene, Sikalahulímo gegepa ale vávani okiko haitó konokutí Ómasi agepoka litanimó nene, geza lokako, nene sunimú gele vevesamita vegenalite geí gakó gelemitamó nenazo, keza nana iki lamanale liki litave.

¹⁷ Geza Ómasi agepoka gihila litanimoki, gigivekaho nene gele gopa noiko, nana oko monokú alémo alévolé itive.

¹⁸ Haitó konokutí gakó loaká nene nénisi likivilegeko loaká nouve. Nenemú Ómasi agepoka loaká noumóza,

¹⁹ neza nenemú gulugo, gihila loló amive. Monokumule liki alegesá niko haitó konokutí gakó hána hána litove lokoma hanuva litomóza, neza nenemú gelekugo lemekave. Nigika nagatatunú gele hee hee linake vegená lainim-oketanogo nene monó gakó luguhasí lo kemeakakumú nene gulugo, itekave.

Monokú linigima izegipa komatini suni alemilo

²⁰ Nigivénegita, izegipa komate izahuza netakumú giliaká niámó nenéminiki likigika lakagatámo izegipa komatini suni alemilo. Izegipa

komatini suni alinigima nene netá golesa alemilo. Itó gakó giliki ali hee hee linigima nene, olotiva vegenalitini suni alilo.

21* Monó gotolaú gakó makó láa liki luhuva gizinamóma neve: Guivahanímo láa loko nolive: Neza haitó apatotí vegená kelémoko okugo, keza iki imane vegená nene haitó konokutí není negepagutí gakó li kimitamóza, není gakó geleminigave.

22 Nenémini lugáa litoze, gililo. Haitó konokutí gakó galinali loaká nenémo monó gilina vegenakumule loko haitó suni utó osá amive. Monó gelema vegenalite ininá itave loko neve. Itó Ómasímini agepagutí gakó lo utó oko lo kemeaká nenémo monó gelema vegenakumule loko utó osá amive. Monó gakó gilina vegenalitini luhusáini neve.

23 Nenemú Izesuni vegenala zuha ali nupa iki miniki mukító nene haitó konokutí gakó ganagana niliko, nene sunímú gelema vegená ahe itó monó gelema vegená ahe itiki giliiki nene, negi hizikave liki gilinigave.

24 Itó lekeza mukító nene Ómasímini agepagutí gakó li utó iki niliko, monó gelemi vehe itó hetoka ve makolímohe lekelitoka iteko monó gakó gilinogo ive. Lá itimó nene, lekeza mukitoka lina gakolímo lihimálámini mogonala ale utó oko goní otanogo ive.

25 Lá okiko, agikagú netá halá geko nemó nene utó okiko, eza pou loko mikasigú agoka hizeko aka minoko, Ómasi gupá ze ameko, Ómasi lamána lekelitoka noive loko linogo ive.

Monokú netá mukí iki miliki itamó nene vo gunigó ino

26 Nigivénegita, nemú nana itune. Lekeza monokumú alegesá inigi niükima, lukugupegó anitisá amave. Makó nenémo monó nama aleko oaká noive. Itó makó nenémo lainim-oleketati gakó aleko oaká noive. Makó nenémo Ómasímini agepagutí gakó haitolímini aleko oaká noive. Makó nenémo haitó konokutí gakó galinali loaká nene aleko oaká noive. Makó nenémo haitó gakokutí lonoi gakolímini mogona loaká nene aleko oaká noive. Nene suni mukí alitamó nene, monokú luhusatini ale alévolé itune liki nenémini ilo.

27 Haitó konokutí gakó litamó nene mukilate lamilo. Losihe losive makolehe nenéminiki hamopamó niliko, makolímo nene mogona ale viligoko lo kimino.

28 Monokumú alegesá iki niiko, ve makolímo haitó konokutí linogo nookoma, mogona ale viligoko lo kimiti ve makó nomikoma ezáagó nene makotoka minoko ezáaloka itó Ómasiloka lino.

29 Itó Ómasímini agepagutí gakó nene vegená losihe losive makolehe keza li utó iki niiko, lugáa keza nigiligli gona milatave.

30 Makó nenémo noliko, Sikalahulímo nene ve makolímini agikagú monó gakó molomikiko, linogoma, goí oko li ve nene hanuva noiko lino.

31 Lá iki Ómasímini agepagutí gakó litune likima, lekeza mukító hanuva li asú itave. Lá iki hamopamó likiko, lugáa keza monó giliki kigika vávani itive.

32-33 Ómasi nene ale gopa oaká netakumú amu helesá ami Ómasi noive. Netá ale hee loaká nemú amu heleaká noi Ómasi noinazo, Ómasímini agepagutí gakó li utó ita ve nenete kezáini li utó ita gakotó gizapa iki minatave liki linamole.

Izesuni vegenala zuha lugáa nenete monokumú ali nupa niago nene,

* **14:21:** Isa 28:11-12

³⁴ vená nenete gakó lamake hanuva miniáká niave. Lekezagi áminámini ilo. Vená nenete monó gakó litave loko gele kemesá amune. Vená keza nenéminiki limiki minatave loko Mosé lo hukoko li gakokú nene neve.

³⁵ Vená makolímo monokumú alegesá niiko gakó litimó nene, lovoza heleaká netá nenazo, vená keza netá makokumú loká inigima, hanuva numúikuka miniki váinigi kezainigó loká ikitiko, ligili hagili itave loko noluve.

³⁶ Nolu gakokumú géneka litamó nene, Ómasímini gakó lekelitokatí utó okago nilahe. Itó lekelisigó Ómasímini gakó gelemó nehe loko litove.

³⁷ Lekelitokatí makolímo ezáamú gelekiko, Ómasímini gakó loaká ve gihila loló itimó itó Sikalahulímini zámuzagi mina ve loló itimó nene, gakó luhuva gizo nolukumumó nene Guivahanímo lo hutamó neve loko gilino.

³⁸ Vegená makó nenémo imane gakó gele ahulatímó nene, aí gakó gele ahulatune.

³⁹ Nenemú nigivénegita, láa liki gililo: Ómasímini agepagutí gakó li utó itakumú amuza milalo. Haitó konokutí galinali loaká nenemú géneka likitamilo.

⁴⁰ Itó monokumú alegesá iki miniki netá matá mukí iki miliki itamó nene vo lamanakó oko vo gunigó ino.

15

Izesú heleneikutí oti gakó

¹ Nigivénegita, Izesuni gakó lamaná lo lekemekugo gilinamóma goha lo likimitove. Lo lekeme lekeme ugo, alikago, lukesatini loló onoimóma neve.

² Ámina gakó ali gilitiki alinitamó nene, gili zagiaká netatini alemó zeko gopa onamitimó nene, lukugutó vizinogo ive.

^{3 *} Monó gakó iteko mina gakó lo nimimokó nene lo lukumuke, láa loko lo lukumumóma neve: Kilistó nene monó gotolaú alika lá oko utó inogo ive liki li milató lelí lihimatemú hilimó.

^{4 *} Helekago, gale zimikago, monó gotolaú li milató gamena losive makole galegú minoake, otopá zeko otimó.

^{5 *} Oteake, goí oko Pitani utó o amimó. Nenetotí izegipala zuha 12-a keitoka utó o kimimó.

⁶ Nenetotí vegenala zuha 500 keza alegesá iki niago neneló utó o kemekago, ánigi astú amó. Itó keikutí mukí kogómulagi ha niamóza, lugáa mota hilikave.

⁷ Nenetotí agunala Zemusini utó o amimó. Nenetotí aposolo mukí utó o kimimó.

^{8 *} Alika nene neza guhalehale oko nougo utó o nimimó.

^{9 *} Neza aposologutí lemeko nouve. Neza Ómasímini vegenala zuha go-poguni moloko kepeleko nougo, aposolo loló itane loko nugulizá molokago, okeha nipiligo nouve.

¹⁰ Lá onoumóza, neza aposolo loló uke, není mogonáne haitolíminoko nemó nene Ómasi agika lamanakímo lokago loló okuve. Itó agika lamanakímo nenitoka satamive. Neza hoza alumó nene aposolo lugáa kivilegeko alumole. Itó hoza neza nanánetunú aluline. Ómasi agika lamanakímo nenitoka minokago alumole.

* ^{15:3:} Isa 53:5-12 * ^{15:4:} Age 16:8-10; Mat 12:40; Apo 2:24-32 * ^{15:5:} Luk 24:34; Mat 28:16-17

* ^{15:8:} Apo 9:3-6 * ^{15:9:} Apo 8:3

11 Itó neza hoza alumoki itó aposolo lugáate hoza alemoki nenémo gihila nomive. Leza monó nenéminoko lo lekemekuko, lekeza gili alévolé inamó nenémo gihila neve.

Izesú heleneikutí oteneimóma nenazo, lezagi otinogo une

12 Kilstó nene heleneikutí otopá zeko otimó. Monó láa loko lo nolukumuko, lekelikutí lugáate helenosakutí oteminogo une liki nanamú liaká niave.

13 Heleneitunikutí otituni gakó nene gihila minamilina, Kilstó heleneikutí otimoki nene gakó gihila minamiline.

14 Itó Kilstó nene otAMILINA, monó noluhá nene hanuvamú lokuko, lekeza hanuvamú gili alévolé aline.

15 Itó nenegó nomive. Leza Ómasimú lo nouhá nene eza Kilstoni heleneikutí alémo otimó neve loko loaká nounimóza, helenosakutí otemoaká netá nelina, Kilstoni nene Ómasímo alémo otAMILINA. Itó nene gakó lunimó nene Ómasiloka lo mulunike sozaló ve loló oko nounimó gililine.

16 Hele vegená otemitave liki liaká niamó nene gakó gihila minalina, Kilstonigi alémo otemive lokogi gakó gihila minaline.

17 Itó Ómasímo nene Kilstoni heleneikutí alémo otemive liki liaká niamó nene gakó gihila minalina, gili alévolé iaká netatini nene ha netá loló iline. Itó lihimatini nene hanuya minaline.

18 Itó Kilstonimú gili alévolé iake hele vegená nene viki latila aline.

19 Leza mikasiukagó imane hanuvamú Kilstokumú lagata losi gelemoko ageva oko minutilina, vegená lugáa mukilite muhelete geleline.

Helenosakutí otitunimó nene ganagana otinogo une

20 Itó nenéminoko nomive. Kilstó nene lamaná heleneikutí otopá zeko otike, hele vegená ale goí o kimike otimó noive.

21 Ganá ve Atá eza heleaká netá ale utó o limike hilimó ámináminoko haitó ve makolímó helenosakutí otituni netá ale utó o limike otimó.

22 Atagegi lugupe apizekoma nouninazo, nenemú hele asú oaká noune. Ámináminoko Kilstogegi lugupe apizekoma nouninazo, galegutí ote asú inogo une.

23 Hizi letiki otitave loko lonoitokó otinogo une. Kilstó ale goí o limike oteneive. Ati gamenaló nene aí vegenala zuha leza otinogo une.

24 Nenelotí alika nene Izesú eza kugulizaki ve haitopaitolímini itó Satani amuza ve keí zámuza aleko leme asú okoko, aí gizapaló nia vegená nene Ómasí amelahini agizakú molokiko, gizapa oletoko noiko, gamena lutiginogo ive.

25 * Itínasa nene Guivahanímo hozaváa aleko gizapa oletoko minoloko noviko, Ómasímo nene lova ve gala veva kelémo agisa heumauka molokiko, hozava ale asú inogo ive.

26 Lá okoko, lova ve gala ve makó kepele asú okoko lova ve gala vetini améipini napa nene alika apele hilinogo ive, agulizá nene heleaká netá.

27 * Izesú lá iti netakumú monó gotolaú láa liki luhuva gizinamóma neve: Ómasímo mukí vegenaki itó netá matá mukí nene agisauka molo asú inogo ive.

Liki lina gakó nene giliiki Ómasimuki lonoi gakó nehe liki gelemilo. Ómasímo mukí netá nene Kilstoni agisauka kelémo nupa oaká noive. Eza nene Kilstoni agisauka minaminogo ive.

28 Ómasímo vegená itó netá matá mukí nene gipala aí agisauka lelémo nupa okiko nouko, gipala nenémo amelahini gelekelé otanogo ive. Lá okiko, amelaho livilege asú inogo ive.

Helenosakutí oteakakumule loko genavagi hoza aleko nominune

29 Lekelikutí lugáate hele vegenakumule liki monó nagamí hiliaká niave. Helenosakutí oteaká netá nomitimó nene, nanamú nihilave.

30 Itó helenosakutí oteaká nene soza gakó minalina, neza nene gasovagi netalímini amupiló genavagi minoaká noumó nene hanuvamú minaline.

31 Nigivénérita, Guivanahite Izesu Kilstó eza není gonanalisi minatave loko lekelémo molamó. Nenemú gelekuke, Ómasímini avogisaló láa loko noluve: Neza gamena gamena heleaká netalímo omo ávatiha okago nominuve.

32* Neza Epeso numutoka gasova galagitana vegená kezagi lova hizeko minuhale nene, hanuva vegenalitini gakotoka leheta onoko onoitomó nene, nana netá gihila utó o nimitive. Helenosakutí oteaká netá nomitimó nene, láa loko luko etaline: Azo hilinogo unize, itínasa nosánetá iza goula apeleko lavalona nature loko lutiline.

33 Gopa napa mihina nia vegenatoka viki gímizemilo, likilími gopa ikataze. Itó lamaná iki iki miliki ita netatini nene gopa okative.

34 Lekeza nene likigika otopá ziko etó iki miniki golesa netá nene leke-megesa amilo. Lekelikutí vegená lugáate Ómasimú gilisá amave. Nenemú gelekuke, lokovoza hilitive loko noluve.

Helenosakutí haitolíminoko gileleko otinogo une

35 Itó lugáate nene hele vegená keza nana iki otitave. Itó kugupe kovogisagi nanagitana ominamó utó itave.

36 Liki loká ita gakó nene negiga linigave. Lekeza netá matá ali zuhá iaká niamó nene hanuva ma golosá amive. Sikú zapava hulupa legekago, goloko iteaká noive.

37 Zuha netá nene haitó agupegí neve. Itó gulúvila nene haitó agupegí neve. Gihiláagó kilé ahe itó netá lugáahé zuhá oaká noune. Itó zuhá okuko, goloakaláagi agilagi nene alika utó oaká noive.

38 Itó Ómasi eza gele vevesoake lotamole loko ametameni amímó áminaló goloko iteake o moloaká noive. Itó gihila ámina oko kemetameni haitopaitolímini utó oaká noive.

39 Lugupémimi mogonáá ámina oko hamokó minamive. Vegená lelí lugupe haitó, itó iza galatini kugupe nene haitó, itó namatini nene haitó, itó lagahatiní nene ámina oko haitó.

40 Itó okulumatoka netá matá mukí neve, itó mikasiloka ámina oko netá mukí nemóza, okulumatoka netá mukí nemó nene gonanaliváá haitó, itó mikasiuka netá nemó nene ámina oko gonanaliváá haitó.

41 Ho nene lapanaláá haitó, ikani eza lapanaláá haitó, sonohí keza ámina oko lapanáaini haitopaitó neve.

42 Helenosakutí oteakalímini mogonáá ámina oko neve. Gale zeaká lugupe nene haha oakalímini neve. Goloaká nenémo haha aminogo ive.

* 15:32: Isa 22:13

43 Gale zeaká lugupe nene hutuváa neve. Goloaká nene gonanalivagi neve. Gale zeaká lugupe nene keé lamimó neve. Goloaká nene zámuzalagi neve.

44 Gale zeaká nene mikasi lugupéa neve. Goloaká nene okulumakú lugupegi golanogo une. Mikasi lugupe nemó nene ámina oko okulumakú lugupe neve.

45* Monó gotolaú láa liki luhuva gizinamóma neve:

Ganá ve Atá nene sikalahulagi loló oko minoaká nenémini amelaho loló oko minamó neve.

Itó alika Atá agulizá Izesú eza alévolé oko minoakálmini amelaho loló oko minamó.

46 Okulumakú lugupe ale goí osá amive. Mikasigú lugupe nene ale goí okago, okulumakú lugupe nene alika utó inogo ive.

47 Ganá mikasigú ve eza nene mikasitunú loló imó, nenemú mikasigú ve minamó. Alika ve eza nene olulumakutí vema minamó.

48 Mikasiuka vegená leza mikasiukatí ve Atá mina avevezaha oko noune. Itó okulumakutí limi ve mina avevezaha oko gosohá vegená minanogo une.

49 Itó mikasiukatí vémini ametameni alunímó ámina oko alika okulumakutí limi vémini ametameni alinogo une.

Izesú anititi zupa okulumakú lugupe ale luhanogo une

50 Náa vegúe, gakó makó imane litoze, gililo. Mikasi lugupémo Ómasímini avogisaló vaminogo ive. Itó anuva oko haha iti lugupetunú netá alévoleláma aleminogo une.

51* Gililo. Neza asuguná gakó makó lo likimitoze. Leza Izesunimú gele alévolé uni vegená mukító hilitunimó negopa logómulagi nouni vegenaki hilina vegenaki ale viligokinake gosohá lugupe nene mukító ale luho asú inogo une.

52 Alika pikulima noziko, helemoláate galinali gó melevezakitana oko otiiki anuva iki haha amitamó minanigave. Itó logómulagi minatunimoláagi ale viligokinake, haitó lugupe ale luhanogo une.

53 Lugupe imane anuva oko haha oaká lugupe nene gololohá oko ale ahulokinake alévolé oko minoaká nene ginegane nenéminoko ale luhanogo une. Itó heleakalímini mututona leza alévolé lugupe ale luhanogo une.

54* Itó anuva oakalímo alévolé oko minoaká ale luhati zupa, gakó láa loko monó gotolaú luhuva gizonoimóma alévolé inogo ive:

Alévolé oko minoaká nenémo heleaká nene avilegeneimóma neve.

55* Avilegeake, heleaká geza lepeleaká zámuzaka hí neve. Heleaká geza gasovaka hí neve loko limó.

56 Lihima netalímo nene heleaká netalímini gasovala loló onoive. Itó Ómasímo lo huka gakokutí lihima netalímo helisalagi loló onoimóza,

57 Ómasi eza Guivahanite Izesu Kilistoni lomikago, netá golesa avilegeaká zámuza lemeaká ve noinazo, nenemú agepoka litune.

58 Nenemú náa vegúe, imane lo lekemenou gakó gili miniki alévolé iki oti vevesiki minalo. Lá niiki Guivahanimule liki hozaváa naliki, ámina hozáminí gihila volo sata aminogo ive liki gili miniki Guivahanímini hozaló gamena gamena amuza miliki aliliki vilo.

* **15:45:** Apí 2:7 * **15:51:** 1 Tes 4:15-17 * **15:54:** Isa 25:8 * **15:55:** Hos 13:14

16

Izesuni vegenala zuhate moni ali nupa itave loko lo kimimó

¹* Itó Zelusale apatoka Ómasímini vegenala zuhate alitave liki moni ali nupa itakumú lo likimitoze, gililo. Galesia mikasiuka monó vegená lo kumumómáminiki ilo.

² Lekeza moni nalemómámini avevezahaló gili miniki, holisi zupa zupa Sategú nene lugáa gona miliki ali etó etó iki mili-likí viki minalo. Hanuva moni ali nupa amiki gatizá niiko, vo anitekugo, moni ali nupa inigi ligitagani ikataze.

³ Lekezaloka vokugo, vegená makó kilími etó inita ve nene ámina hozamú gilitave loko luhuva netá kemekoko kimiselekugo, ali nupa initiatotí nene Zelusalega aliki vitaze.

⁴ Itó lekeza giliko, etokikoma, nezagi makó aleko vitune.

Pauló keitoka vinogo gakó lo molamó

⁵* Neza Masetonia mikasiuka vinogo nounazo, neneloka vinake gamena koma minokinake lekelitoka vinogo uve.

⁶ Lekelitoka vinake, nenelotí nenelokahe nenelokahe vitokumú gapoló nilími vatí itave loko lekezagí gamena koma minatohe, itó hepé gamena asú itihe loko nagata noguluve.

⁷ Neza itína gamena hanuva gopa novinake lekelí ánigomo vitomó nene etaminogo ive. Nenemú Guivahanímo gelekiko, lamaná noikoma lekelitoka voko gamena koma mininake vitove loko noluve.

⁸⁻⁹* Neza nene imaneloka Epeso numutoka Guivahanímo monolímimi gapováa velekago, hoza nalugo gihila zeaká noinazo, itó monolímimi gala veva mukí nianazo, Sikalahú limi holisi velesá alitamigo imaneloka miní ameko minanogo uve.

¹⁰* Timotí lekelitoka vo anitekiko, Guivahanímini hoza aleaká noumó nenéminoko aleaká noinazo, agupeló gelegele okatize, lamaná oko minative liki geha zi amilo.

¹¹ Lekeza gosohá ve noive liki aikumú giliko lememino. Nezagi ligive lagave lugáagi ageva oko nounimó nenazo, lekeza legesó iki gizapa itiiki amisilikiko, geha zeko gapoló oko oko atiginá oko nenitoka atize.

¹² Itó ligiveteho Apoloni gakó litove. Ligive monó ve lugáa kezagi lekelitoka vitive loko agata aleko amiseleháza, eza itínasa vinogo vávani amive. Itínasa gopa gamena makó nene viti gapo koló okikoma, lekelitoka vinogo ive.

Pauló gekéini loketake luhuva gizo asú imó

¹³ Lekeza gizapa iki monokumú gili alévolé iki minalo. Lá niiki, lekehelele vízemiko amuza miliki minalo.

¹⁴ Itó netá matá mukí lilí inigima likigika kimiiki lilí ilo.

¹⁵* Itó nigive nagavese, gakó makó lo likimitoze, gililo. Lekeza Setepanani vená izegipala keza Akaia vegenakutí ali goí iki monó giliaké, kigika ali viligamó neve liki mota gilinave. Itó monó gele vegenatoka gelekelé hoza alekogó minutane liki kagata giliaká niave.

* **16:1:** Lom 15:25-26 * **16:5:** Apo 19:21 * **16:8-9:** Apo 19:8-10 * **16:10:** 1 Koli 4:17 * **16:15:**
1 Koli 1:16

¹⁶ Nene lekelisi nene nenémini vegená itó lilími vatí iki monó hoza aliki miluma giliaká nia vegená lugáagi ali lakamatoka milatave loko lakagata naluve.

¹⁷ Setepanaki Potunatoki itó Akaioki keza nenitoka ikago, Koliti vegená lekelikumú miluma geleko noutoka mulúnegú lamaná gelekuve.

¹⁸ Lá okuke, nezagi lekezagí mukító keí ánigo lomala unike, mulutegú geha zimó. Lekeza ve nenémináamú giliko lamaná ino.

¹⁹* Asia mikasiuka monó gilina vegená keza lekelikumú geké nililik-itago noluve. Itó Akuilako venala Piliskako itó keí numukú monokumú alegesá iaká nia vegená keza Guivahanimule liki lekelikumú geké nililik-itago noluve.

²⁰ Lekezatitini monokú eza aputá viziko eza aputá viziko iki minalo.

²¹ Neza Paulona itínasa luhuva nogiza vémini agizakutí luhuva gizoaká nogosanima alekuke geketini loleketuke luhuva imane gizo asú nouve.

²² Makó eza Guivahani agika amemitimó nene, Ómasímo usí vize amekiko meikú mututoni loló itize. Guivahanite geza ano.

²³ Guivahanite Izesuni nasahilí lekelitoka mino moloko minino.

²⁴ Nigikámo Izesu Kilistonimule loko lekelitoka minoaká noive.

Koliti Vegenalitini Luhuva Nampa 2 Pauló Gizo Kimimó

Koliti vegená nónohá kimike gizo kimi gakó

^{1*} Neza Ómasímini agepagú gakotó Izesu Kilistoni aposolo loló u ve Paulona itó ve ligiveteho Timotí ezagi makó minusike Koliti numutoka Ómasímini vegenala zuha itó Akaia mikasi lugálaloka monó gele vegená miniliki viki iki inamó lekeza luhuva netá imane gizo nolukumuke láa loko noluve:

² Ameteho Ómasi itó Guivahani Izesu Kilistó aitokatí nasahilí itó hulu nene lekelitoka minoloko voko minino.

Pauló milumámini amupiló minake Ómasi agepoka limó

³ Guivahanite Izesu Kilistoni amelahini Ómasi agepoka litunize. Eza hulu ameteho itó lelémo geha zeaká ameteho minokave.

⁴ Eza milumámini mogonáa haitopaitó utó noigo lelémo guni oaká noive. Lá okago, Ómasímo lelémo hulu oaká noi hulu nenémo leza ámina oko ligive lugáa miluma malumámini amupiló niminikoma kelémo geha zitunímó onoive.

⁵ Kilistó eza miluma gilimó nenémini nekisáa lelitoka vaí oko miní amekago, ámina oko Kilistoni huluváa genavagi ale utó moloaká nousive.

⁶ Helegaloka lelitoka miluma maluma utó oaká noimó nene lekelitoka geha utó itive loko itó lekelémo lamaná itive loko utó o lemeaká noive. Itó helegaloka hulu nenémo utó o lemeaká noimó nene lekelikumule loko utó o lemeaká noive. Itó hulu nenémo lekelitoka mino moloko hize lé noleketiko, miluma maluma lelitoka utó oaká noimó ámina oko lekelitoka utó noiko nene siti viziki miniki alitave loko neve.

⁷ Itó leza lekelikumú lagata losi gelemoko minoaká nounímó nene alévolé okago láa loko geleká noune: Leza miluma geleká nounímó nene lekezagi izá miliki miluma maluma gilikí niminiki hulúmini gehava monéna alitave.

^{8 *} Nigivénérita, nenémini gakola makó láa loko neve: Asia mikasigú milumámini amupiló minomo iteháma neve. Nenemú lakagatí molokative loko litoze, gililo. Neneloka nene genavagi netá golivagi lamaná lumupiló iteake lelémo akatímó okago, miní ameko logómula gizative loko ma gelemuháma neve.

⁹ Itó imane heleaká netá ale alitokune lokunike ligikate golosasa gimó nene lá imóza, ma utó o lememimóma neve. Leza zámuzatemú gelekuko lemeko ha netá loló okiko, Ómasímo heleakakutí lelémo oteaká ve aitokagó leheta itune loko ámina golivagi netá utó o limimóma neve.

¹⁰ Itó áisi nene heleakakutí alata moletoko minamó. Itó áisi minoko goha alata moletoloko vinogo ive. Nene gakó gele seketigí o minoko aitoka leheta okune.

¹¹ Itó lekeza Ómasiloka litatímo lelémo vatí iko, Ómasi eza agika lamanaki vémova loko lokonotó aleko lugutó vizekiko, vegená mukilite kegepagutí kegepagutí lelikumú Ómasi agepoka liki geké litiki minatave.

Pauló Koliti vegenatoka vinogo noike haitó agata gilimó nenémini mogonáa

* **1:1:** Apo 18:1 * **1:8:** 1 Koli 15:32

12 Lezatemú gulusigo lagasó iteaká noimó nene lá okomú neve: Ligika lamanatotí itó monokú nene imane mikasiuka nominuko ligikámo netá makokumú lehelú osá amive. Leza monóini nomi vegená keí kovogisaló nenémimi oko minunike monó gilina vegená lekelí lokovogisaló etó oko vesesoko minoaká noune. Itó monóini nomi vegenalite gili hee likakató leheta o minoko nomive. Ómasímini nasahilitó voko leheta oko minoaká noune.

13-14 Neza gakó soza sazagi loko nomive. Gakó mogonatagana ma hitosá amuve. Luhuva gizo lekemekugo gatiki gili guni itave lokogó gizoaká nouve loko gelenouve. Itó lekeza není mogona lugáa mota gilinamómáminiki lekeza alika gili hee liki gili asú itave loko noguluve. Lá ikiko, lekelikumú neza gulugo iteaká noimó nenémimi oko lekeza Guivahani Izesuni gamena napaló nenikumú giliko ititze.

15 Gakó láa loko nolumó nene gele alévolé okuke goí oko gamena losítá lekelitoka vitomó nenémo mulutikú lamaná gilitave loko ale vavá umó.

16 * Itó voko ángolikimikinake Masetonia mikasiuka voko minokinake goha nene atiginá oko lekelitoka okugo nilími gapo iki niko Zutaia mikasiuka vitohe loko gulumole.

17 Itó neza láa loko lokugo, vávani oko haitolímini imómave liki nilahe, olile. Itó neza nene monóini nomi vegenakitana oko nene negepatunú vitove loko lo muluke ámina gamenaló nene nigikatunú óe vamitove loko lumó nene hutuya loló okahe.

18 Ómasí eza lamanalímini amelahnáa minoakeve loko gakó lo hukoko lo lekemekugo hutuváa itó gihiláa nene gamena hámakó utó onamive.

19 * Ómasímini gipala Izesu Kilistoni mogonáa nene nezagi itó Sailasí itó Timotí leza lo lukumuhá vemámo gakó lo molokago lugáa nene gihiláa loló oaká noigo lugáa hutuva loló osá amive. Mukí gihilágó loló oaká noive.

20 Ómasímo lo moleta gakó haitopaitolímini nene aitokágó gihila zeaká noive. Nenemú Ómasímini luhuva gegemá oko minative loko Izesú lelémo vatí noigo Ómasí agepoka lokusike lamanale loko loaká nousive.

21 Ómasímo lekezagí Kilistotoka lelémo molokago alévolé okune. Itó Ómasímo lelémo etó onoimóma neve.

22 Itó áisigó nene ligikágú anosa moleta tamóma neve. Itó netá mukí alika lehizeletatímini izaina ike nene Sikalahú mulutegú molokago noimóma neve.

23 Neza numutitoka voko gahá lekemeko lekelémo gopa okatove loko gulugo, gena okago, lekelitoka goha vamumóma neve. Gakó nene nigikagú ánoogaaká ve Ómasímo gele kago lamaná lo nolukumuve.

24 Itó lekeza gili alévolé iakanigú alévolé iki niamó nene gelenousimó nenazó, leza monokú lugulizaki ve loló itíive loko ma lamuve. Hanuva lekelitoka mulutikú lamaná gilitave loko lekelémo vatí oko hozaváa aleaká nousive.

2

1 Miluma gilita netá goha ale utó mololikimikatove loko gulugo, gena nivisekago, lekelitoka vamitove loko nigikatunú lo hukokuve.

² Nénisi miluma netá lekemekugoma, makó éage mulúnegú ali lamaná initatave. Lekelisigó nianazo, mulutikú golesa gilikiko lá amitamó ikatave loko nenémini aminogo uve.

³ Itó lekezatini netá matá aliajá amó ali hee litave loko luhuva netá makó gozapá gizo lukumumó nene lekelitoka vokugo, lekeza mulúnegú ali lamaná inimiaká niámómata goha mulúnegú ale golesa gilito netá alinimikatave loko nene ámina luhuva gizumóma neve. Lezatemú láá loko noguluve: Není mulúnegú lamaná gilitótimo monéna mulutikú lamaná geleká netá ale utó mololeketanogo ive.

⁴ Itó mulúnegú ale golesa gelekugo itó mulúne gitihiná okago, lekelikumú ive napa napa uke luhuva netá gizo lukumumó nene mulutikú golesa oleketatove loko negopa, nigikáne lekelitoka alévolé oko mulumó nenémini mogonáa lekelepitovet loko ámina luhuva gizumóma neve.

Golesa netá ali vémini lihima ahulitata gakó

⁵ Ve makokumú luhuva netá gizumó áisi nene mulutegú golesa guluni netá alimó nene nenikó ma onetamive. Lekelikutí lugáagi mulutikú golesa gele netá alimóma neve. Ale nupa oko lokugo gena okative loko mukí vegena nenémini oletamóma neve loko lamuve.

⁶ Lekeza mukilita ámina ve nene nogosani amiki netá matá ali hee liki lilí itamó nene mota ámináló asú ino.

⁷ Itína nene mulunagú golesa gelekoko monéna golesa okative loko lihi-mavala ahulitiki alími hulu ilo.

⁸ Nenémú alími vatí iki nasahilí i amiiki likigikámini mogona alapizitave loko lakagata aleko noluve.

⁹ Neza nenemule loko goí oko luhuva netá gizo lekemenoumóma nene gakónéa mukí gili alitahe loko nenémini mogonáa utó itive loko gimilikú moloko gizo lekemenoumóma neve.

¹⁰ Lekeza ve makolímíni lihimala ahulimikago, neza ámina oko ahulomiaká nouve. Áisi lihima ale utó molamó nene nezagi ale utó molonetamó negoma nene nezagi nahulotuve. Satá nene netá golesa aleletatove loko nogilimoláa mota gelenounimó nenazó, nenémú lekelikumú guluke Kilistoni avogisaló nene

¹¹ Satá eza logoka vizeko livilegekative loko ámina vémini lihima ahulomíaká nouve.

Pauló Toloo apatoka minake agata gululusi gili gakó

¹²* Neza Kilistoni gakó lamaná litove loko Toloo numutoka nanitugo, Guivahanímo gapova ale lologa molonimikago, gelekuke,

¹³ nigivéneho Taetasí eza lekelitokatí litá oko atiginá oko amigove loko vitagá okuke nagata gululusi geleuke lekeza mota minalo lokuke Masetonia mikasiuka vumóma neve.

Kilistoni anuvaváa noune

¹⁴ Kee, Ómasi eza Kilistotoka lelémo gímiteakeve loko aí gala veva gamena gamena kivilegeká noikumú agoliza vizeko ganini hizeaká noive. Lá oake gala vizekago, aí mogonámini anuva lamaná lagámini nene sénava segekuko hutílí oko numutó namató hutílí oko novimó nenémú geké lotinake logoliza vize amitune.

* ^{2:12:} Apo 20:1

15 Leza Kilistoni anuvaváa lamanakitana nouhatita Ómasi guguni gizo amekago vegená kugutó vizeakalímini mututoni itó lapuluva oakalímini mututoni nene anuva kepeleaká noive.

16 Lapuluvámini mututoni lilí inamó keza gelelehá i ahulikago limiki hiliaká nenémini anuváa kepelekago hiliaká niave. Itó lugutó vizeakalímini vegenala leza gelelehá okuko lemeko alévolé oko minoakalímini anuváa lepeleake lelémo mómoká okago, gosohá lemetameki loló oko minoaká noune. Lelí hozámímini mogonáá lá oko nenazo, hoza nenémináá éagema kezáini zámuzáinitunú alikiko hee hee litive.

17 Lelikitana minata vegenalitegó lá itamó neve. Leza vegená lugáate iki miliki iaká niamó nenémini osá amune. Vegená lugáa mukilite Ómasímini gakokumú gelego, moni ale utó oketati netá loló okago, hozaváa aliaká ni-amóza, leza nene Ómasímo limiselekago ligikagú vové avé lo minago minoko Ómasímini avogisaló voko Kilistotoka gímizekunike monola loaká noune.

3

Gosohá lo múnaheaká gakolímini hozaváa aleaká noune

1 Láa loko nolumó nene lelí lugulizate ale otitíive loko gakó nenémináá goha apí usimó nehe. Itó lekeza lelí mogonatemú gilitave loko vegená lugáate luhuva netá makó giziki lelí lugulizá ali otiki lekelepizitahe. Itó lelí mogonamú ali otiiki lekeza makó giziiki vegená luhuva netá makó lekelepizitahe.

2 Nenéminoko nomive. Není hozanémini luhuva nene lekelisi niave. Itó luhuva gizoaká netá nene ligikagú luhuva gizokago, vegená mukitoka ánigiki gatiki giliakalímini nene neve.

3 * Leza lekelitoka hoza alekusigo lekeza Kilistotokatí luhuva netá lilí ikago, nenémini mogonáá utó oko neve. Itó luhuva gizoaká netá nene nagamitunú gizamive. Alévolé oko minoaká Ómasímini Sikalahulímo luhuva gizamó nene Mosé lo mola gakó gehaniló luhuva gizamómámini oko negopa, likigikagú luhuva gizokago alévolé oko neve.

4 Lelí mogonatemú gakó némináá nene Kilistokumule loko Ómasiloka leheta nousike lo lekemeaká nousive.

5 Hoza gihiláa makó lezatelokatí utó oaká noive loko itó lezate zámuzatelotí neve loko nomive. Netá matá loló okusigo lamaná oaká noimó nene Ómasilokatikó nene neve.

6 * Omasi áisi nene lelémo vatí okago gosohá lo múnaheaká gakolímini hozaváa aleaká nousive. Li huka gakó luhuva gizamó nene gele aleakalímini hozaváa negopa, Sikalahú gele ameakalímini hozaváa neve. Li huka gakó luhuva gizamó nenémo lemeni heleaká netá ale utó mololimiaká noive. Itó Sikalahú nenémo alévolé lemetameki minoaká netá nene ale utó mololimiaká noive.

7 * Itó Mosé lo hukoko li gakó nene litaha ligika lapuluva oaká ale utó moloko voakalímini nene gatapa geható luhuva gizamó nenémo gopa Ómasímini lapanalagi utó imole. Itó ámina lo hukoko li gakolímini lapaná nene minoko tolova imóza, Moseni avogisaló ámina lapaná nenémo napaló nego, Isilae vegená keza neneló anitiki agoka agepaló ánigamitamó imóma neve.

⁸ Monó litahámini lapanaláa nenéminoko minamó nenazo, Sikalahulímo monó gosohá lehizeliaká noimó nenémini lapanaláa aleko iteko sipisi minanogo ive.

⁹ Ligika lapuluva oakalímini mututonáa voaká nenémini lo múnacheaká gakolímini lapanaláa nene lemekosí neve. Itó lihimate asú olimikago mi-noká nenémini hozavámini lapanaláa nene iteko neve.

¹⁰ Itó litaha lo múnacheaká gakolímini lapanaláa nene Moseni agoka agepaló utó imóza, gosohá lo múnacheaká gakolímini lapanala napa nenémo zemikago lovoza helekave.

¹¹ Netá voko haha inogo itímini lapanala nene napa otigí utó imó nenazo, netá minoloko voko mino lúaló moloaká nenémini lapanaláa nenémo iteko sipisi neve.

¹² Lagata losi gelemoko ageva oaká nouni netá nenéminoko minokanazo, monó gakómá lehelele vizemigo vávani oko lo kemeaká noune.

¹³* Lá nounike Mosenigitana minamune. Aí avogisaló Ómasímini lapaná sata ominamó nene asú inogo noigo, Isilae vegenalite iki ánígikatave loko agoka agepaló gánoni ge hitoake minoaká imóza, gosohá lo múnacheaká gakolímini lapaná nene ze hitosá amune.

¹⁴ Itó kigikáini hize lí okago, minoloko voko itína lo múnacheaká gakó litaha nenémo goha asapulagi loló okago, keza nagatiki gili hee liki gilisá amave. Itó asapú nene ezáa hanuva ma vínasaminogo ive, Kilistó hámakó vínasoko ale vesamá oaká noive.

¹⁵ Keza itína gamena nene Moseni luhuva gakó gatiaká niago kigikagú asapulagi ha minoaká noimóza,

¹⁶ kigikáini ali viligiki Guivahaniloka kovogisa i amitamó nene asapúma vínasoketanogo ive.

¹⁷ Guivahanimú nolumó nene Sikalahukumú noluve. Itó Guivahánimini Sikalahulámo minoaká noitoka netá makolímo nagá oletosá amive.

¹⁸ Leza nene lovogisate aitoka asapuláa minamitimó neve. Nenémú Guivahánimini lapanalámo hize hanatolimikoko lelémo viligokago, Ómasímini ametamenigí aleloko novunimó nene Guivahánimini Sikalahulímo lá oaká noive.

4

Lugupe nene mikasi somogitana neve

¹ Guivahani eza nasahilagímó hoza nenémináa loletamó nenazo, nenémú goselekaselé amitunize.

² Láa nounike, avozavagi netá itó asugunatoka aleaká netá nene lemegesa amekunike, makó sozámini amupiló minoko Ómasímini gakó ale gopa oaká nene ma osá amune. Leza Ómasímini avogisaló monó ale akutoko lo utó moloko lo nokumuko vegená mukilite lelí mogonate gilikago hee lokogó neve.

³ Itó monó gakó lamaná loakká nounimó nene asapulagi nolumó geleká noikoma, lapuluvámini mututoni lilí ina vegenatokagó asapulagi nolumó geleká noive.

* ^{3:13:} Gá 34:33

4 Monó gili ahuliaká niamó kéisi nene imane mikasigutí agulizaki ve nenémo kigikáini hize lí okago, nana iki gakó lamanalímini lapanalímo kigikagú lemekiko Kilistó eza Ómasímini avevezahaló oko nomina vémini luhuváá ánígi hee liki ánigatave.

5 Leza monó nolunike lezatemú lo lekemesá amusive. Izesu Kilistó eza lelí Guivahane itó Izesukumule loko gelekelé izegipatini mukitoka loló oko minatíve loko lo lekemeaká nouise.

6* Omasi eza gozapá mogonaloka límugusi zeake nego gó lozo loko lokago gó lamó. Itó áisigó nene lokago ligikagú monolímini lapaná utó okago Kilistoni avogisaló Ómasímini lapaná utó o lamaná okago ánigoaká noune.

7 Itó ámina monó meinaváá iteko minamó ale minoaká nouni vegená leza nene ámina monó lo nokumuko lugupémo nene mikasi somogitana alévolé onamigo ámina monolímini zámuza lelitoka negopa, Ómasilokatí noimó nenémini mogonáá utó oaká noive.

8 Miluma malumámini amupiló nominuko nenémo lelémo zeko lana osá amive. Itó lagata losi gelenourike gopa nene guluko gopa osá amive.

9 Gopoguni netalímini amupiló nominuko, gopa nene ameteho taiza ole-tosá amive. Galaná millilitik lá niago, gopa ma heleko lapuluva osá amune.

10 Nenéminoko Izesú minoko aleko oakalímini agikaváá ámina oko lugupeloka utó itive loko lugupeloka Izesuni apili hele ametameni nene aleko mohona oaká noune.

11 Vegená keza Izesukumule liki lelí gamena gohalagú imi aniti aniti iki lilími gopa napa iki heleakákú lilími miliaká niamó nene Izesú minoko aleko oakalímini zámuza nene heleaká lugupeloka utó o lamaná itive loko nenéminoko utó o lemeaká noive.

12 Lá okago, lelitoka heleaká netalímo hozaváá aleaká noive, itó lekelitoka alévolé oko minoaká netalímo hozaváá aleaká noive.

13* Monó gotolaú luhuva gakó makó nene neza Guivahanímú gele alévolé oaká nounazo, monó loaká nouve loko gizonoiomóma neve. Itó leza ámina lelegító Sikalahulímo lelémo vávani igo Guivahanímú gele alévolé oaká nounike monoláá loaká noune.

14 Lá unike Guivahani Izesuni heleneikutí alémo otí vémo lezagi ámina oko Izesugegi helenosakutí lelémo otekoko lekezagi monéna aitoka lelémo molanogo ive loko geleaká noune.

15 Ámina genavagi netá nene lekelikumule loko geheaká nounimó nene Ómasímini nasahilí ohunavagi nenémo hutilí oko noviko, vegená mukilite giliiki Ómasi agepoka liki niviki kogoliza vizi namiko, Ómasímini lapaná utó oloko voko minative loko neve.

Gutá apató minoko aleko oaká gakó

16 Leza nenemú láá loko gelekunike goselé ma osá amune. Lugupete gisulupa moloaká noimóza, gamena gamena ligika nene ale gosohá oaká noive.

17 Mikasiuka miluma maluma koma geleaká nounimó itó alika monéna asú itímó nenémo gonanalisi napa itó genavagi itó alévolé oko minoakalímini nene ale utó moleta-nogo ive.

18 Itó ánigoaká nouni netá nene asú itímó neve. Ánigamuhá netá nene alévolé oko mino lúaló moloko minatimó nenazo, netá genavagi alilimiaká

niamó nenémo negopa, asuguná netá utó o limiti netatoka gonú ominoaká noune.

5

¹ Leza láa loko geleaká noune: Mikasi lugupe sikalahutémini gá numunáa lukokikoma Ómasímo okulumakú alévolé numuni makokitana gosohá lugupe ale utó mololetonoimó nene kigizanitunú gemamó hanuva alévolé oko minati numuni apá neve.

² Itó leza nenemú okulumakú numuni hize lelepizitive loko lagaváa gelekunike amuza nomulunike hanuva lugupegi minoaká nounikeve loko lege zeko minoaká noune.

³ Sikalahute zapakó minokative loko okulumakú lugupe ale luhokuko lamaná itive.

⁴ Imane mikasiuka gó numukú noinake miluma geleko gena liviseká liviseká noigo, lege zeko minoaká noune. Leza luhoaká gote litaha nene monéna vizako ahulatune loko gelesá amune. Litaha gó ha neiko amupiló gosohá netá ale luhatune lokogó geleaká noune. Lá okunike heleakalímini mututoni loló unimó nene alévolé oko minoakalímo mikilí itive loko geleaká noune.

⁵ Ámina netá lamaná utó o limitive loko ale vavá oletamó nene Ómasí áisi nenégo noive. Ámina netá lehizeletatimómámini izaina nene Sikalahú lehizeletamó neve.

⁶ Leza gosohá lugupe alitunikumú guluko mulutegú ale gilitolimikiko minatunize. Lá noinake láa loko nene gilitunize: Mikasi lugupegi minoaká nouni gamena nene Guivahanimú vitagá unike gutá mikasiloka minoaká noune.

⁷ Itína gamena nene gele alévolé okogó minoko aleko oaká noune. Gihiláa nene velesá ánigonamune.

⁸ Láa noinake gopa mulutegú ale gilitolimikago minoaká nounike lugupetunú gutá mikasiló minoaká nene ahulokinake gotó apatoka Guivahanigi makó minosakumú lagaváa geleaká noune.

^{9-10*} Nenemú láa loko gelenoune: Lugupegi minoko netá matá oko moloko unimó lamaná nehe itó golesa nehe nenémini lelegí oko etó etó oko apasoko limitive loko leza mukító minoko Kilistoni lo hukoaká holomaló vo anitinogo unimó nenazo, nenemú minoaká nene imane mikasiloka gutá lugupegi minoaká ahe itó mezane gotó mikasiloka minatunimó ahe nene Guivahanímo gilikó lamaná itive loko legesó oko minoko aleko oaká noune.

Ómasímo ale geha zelimikiko ezagi apizituni gakó

¹¹ Guivahanimú lehelele vizigo minoakalímini mogonamú gelekunike vegená keza kigika ali viligatave loko kagata aleko lo kemeaká noune. Ómasí eza mogonate ánigoaká noive. Itó lekeza áminámini iki mogonate nene likigikatunú giliaká niave loko noguluve.

¹² Leza láa loko lokuko, gilikiko, leza nene miní ameko lugulizá ale otinogo gakó lo nolukumuhá gelemimo. Lekeza hanuva lelikumú gilikó, itekiko, lekeza vegená lugáa kigika otopá zemíko miniki kugupémini netakumukó hokolizá iki miniáká niamoláa nene není mogonamú li kimikiko gili lamaná itave loko noluve.

* ^{5:9-10:} Lom 14:10

13 Lelikumú negi ve liki nilamóma nene Ómasímini hozavamule loko loló ino. Itó ligikate hee lokogó neve liki nilamó nene lekeza monotinigi itave loko loló ino.

14 Ve hamó eza vegená mukikumule loko helekamó nenazo, leza mukitó monéna ezagi helenouhá geleneive loko gele zugunikeve loko Kilistó eza agika lemeaká noitímo lelémo gikitokago lezate lugupe aleko itesá amune.

15 Itó vegená mukikumule loko hilimó nene logómulagi nomininake lezatemuékó minoko aleko aminake lelikumú heleake otí vemule loko minoko aleko itunize.

16 Nenemú lá oko logómulagi minatuni gamenaló vegená kugupegi kemeta menigigó ánígokinake mogonataganánimú lo hukoketaminogo une. Itó Kilistoni ámina oko gozapá aguipegí ametamenigi ánígokunike eza lelikitana ve noive loko gulunimóza, ámina avevezahaló itínasa nene goha ma lá aminogo une.

17 Nenemú vegená makó Kilistotoka gímizinitamó kéisi nene haitolímini lilí iki ninigave. Litaha netáini nene asú okimikago gosohá mogonáa utó o kemekave.

18 Ámina netá matá gihiláa nene Ómasilokatí neve. Áisi nene Kilistoni zámuzaló lelémo apizekago nonágá okunike vegená lugáa nene ámina kelémo nonágá iti gakó li kimitave loko loletamóma neve.

19 Ámina gakó láa loko neve: Ómasí eza Kilistotoka minake mikasiuka vegená lezagi ale geha zeletamó. Lá oake lihimate ahulolimiaké goha gatoáká nene gatosá amive. Itó ale geha ze limiaká gakó nene holutegú hize oteletamóma neve.

20 Nenemú leza Kilistoni gakó lole ale ve minusike Ómasímini gakó lamaná nene mololimikago, lo lekemeaká nousi gakó nene Ómasímo lo likimimó gelekago nene, Kilistokumú gelenousike lakagata aleko láa loko lo leke meaká nousive: Ómasímo ale geha zelikimikiko ezagi apizilo.

21 Kilistó eza lihima ma alemi ve nene Ómasímo lelikumule loko golesa netategi loló otamó nene leza Kilistogegi apizekinake Ómasímini avogisaló hee loko minatune loko nenémini imó neve.

6

1 Ómasí alémo vatí vatí ve leza lakagata aseva aleko láa loko lo lekemeaká nousive: Ómasímini nasahiláa lehizeleketamó nene voko haha amino.

2 * Nasahilá oleketakumú Ómasímo li gakó makó láa loko neve:
Neza gamena lamanató geí gakó gele minumóma neve.

Itó gugutó vizeaká gamenaló gelémo lamaná umóma neve.
Giliñahe. Gamena lamaná itínaságó neve, itó lugutó vizeaká gamena nene ámina oko itína nene neve.

3 Leza ámina oko vegená keza hoza aleaká nounikumú goseleka likatave loko monokutí velehé limita netá loló osá amune.

4 Leza mukí netá oko moloko oaká nounike Ómasímini gelekelé ve nouni mogona ale utó moloaká noune. Milumámini agikagú minunike, itó gasovagi netalímini amupiló minunike, itó galana netalímini amupiló minunike, geha zeakálímini agikagú minoaká une.

5 * Segi nogosanitunú zi gilikilí niago, nagá numukú minoaká unike makilisi hiziki lipilinigi akú minoaká unimóma neve. Miluma hoza aleaká unike,

lovó akamunike ote minunike nosánetá ma ale ligikagú vizeko namunike minoaká unimó neve.

6 Ligika gizopa lo minago minunike, netá mogona geleakalímini minunike, mulutegú geha zigo minunike, ligive nasahilí okimiaká unike, Sikalahuki minunike ligika lamaná oko kemeaká unimó neve.

7 Gakó lamanakó lokunike Ómasímini zámuza ale minoaká unimó neve. Lihimate asú olimikago minoaká nounimó nenémo gimi magete itó lagele loló okago ale minoaká noune.

8 Lugulizá ali otiakakú itó lovozámíni holulagú minoaká noune. Itó legepoka loaká itó alivi letivi ilimiaká nenémini holukú noune. Sozaló veve liki nililitago soza lamunímó minoaká noune.

9 Mognatemú vitágá niamóza, Ómasímo mogonate gele asú onoimole. Itó heleakalímini agepaló minunitita gopa logómulagi minoaká noune. Itó lipilikago hele vunimó neneta voko haha amune.

10 Itó mórinata mulutegú lamaná geleko minoaká noune, itó gohogó nouhá nene gopa vegená mukí kelémo monokú henóiki vegená loló oaká noune. Sívosávo ovunitita ligikámini henonite vaí ominamó minoaká noune.

11 Kee, Koliti vegenáise, nigika nene lekelitoka napaló neve. Itó negepatunú nene gákó lo koló oko lo nolukumuve.

12 Nénisi nene nigikatunú alévolé oko hize lé olíkimiaká noumóza, lekelisi nene likigika nimiaká niamó nene lagasó neve.

13 Lekelikumú gulugo mohóné gipáne lili ikago, gákó imane lo likimitoze. Nenémini helega apasíki ámina iki likigikatini ali napa iki nenitoka milikiko minative loko noluve.

Ómasímini zavusave noune

14 Monó gelema vegená keza apizeko minatune liki nilikoma, lekeza lelegí oko noune liki kilími vatí iki gehemilo. Gilinahe. Lamanálímini itó golesámini keza nana iki apizitáive. Itó lapanaki itó límugusigi nana iki apizitáive. Ma apizeminigasive.

15 Itó Kilstó ezagi gala veva Sataki nene nana oko kigika hamó minative. Itó monó gele alévolé uni vegenaki monó gelema vegenaki nana oko nonagá oko minatune.

16* Itó Ómasímini zavusavegi soza ómai netalímini zavusavegi keza nana iki apizitáive. Gilinahe. Ómasí alévolé oko minoaká vémini zavusave nene lélisi nene noune. Nenemú Ómasímo láa loko lonoimóma neve:
Neza mulúku minoko aleko inake
holutikú mohona inogo uve.

Ómasinini loló o kemekugo,
keza vegenáne zuha minanigave.

17* Nenemú Guiyahánimo láa loko lonoimóma neve:
Monó gelemamoláá ámigikimiiki apazá minalo.

Itó musi netató nene ali gelemilo.

Lá ikiko, nénisi nene gizapa oleketoko lekelémo guni inogo uve.

18* Lá okinake ametipina nene minatove,
ító lekeza nene mohóné gipáne lili iki minatave.

Guivahani osá amosá ve áisi gákó nene láa loko lonoimóma neve.

* **6:16:** 1 Koli 3:16, 6:19; Liv 26:12; Izi 37:27 * **6:17:** Isa 52:11 * **6:18:** 2 Sam 7:14; Isa 43:6; Zel 31:9

7

¹ Nigika lekemenou nigivese, netá nenémináámini mututoni lelémo molonoimóma neve. Nenemú musi netá nenémo ligikate itó lugupete ale golotuva loaká noi netakutí nene Ómasimú lehelele viziko ligika nagamí zeko ale mokoná lokoko gizopa lo asú iko etó oko minatunize.

Pauló kigika ali viligakumú agoliza vizimó

² Lekezatini likigikatunú gahe sigilitalo. Leza lekelitoka minusike netá golesa aleleketosá amusive, itó ve makó alémo gopa otonamusive, itó mulutikú hizeko netá matatini ma ale gopa amusive.

³ Neza gakó imane mulutikú hizitive loko loleketa muve. Neza itínasa áimane lekezagí makó minoko aleko inakehe itó hilinakehe nigika lekelitoka minamó minanogo ive loko mota lo lekemekuve.

⁴ Nigikatunú lekelitoka voko nogímizigo lekelémo napa oko loaká nouve. Lekeza nigikáne ali geha zi asú ikago milumáámini amupiló nogoliza sipisi novizuve.

⁵* Itó Taetasinimú vitagá oko Masetonia mikasigú omo anitekunike ma lavasú vizeko minamune. Neneloka lugupémini lovaváá itó ligikáámini lelege-saváá nenémo utó oake lelémo vénehekánehé ligo minonouháma neve.

⁶ Megusa siheleni mulúini kelémo kii lokimiaká ve Ómasi áisi nene Taetasini alémo atiginá oake mulute ale gilitoletamó.

⁷ Lá oake, atiginá imó nenemukopa, lekeza mulunagú geha ziti gakó li amemó nene aleko okago, gelekusike mulutegú geha zekago nousive. Není áníganigi giliiki miniaká niámó itó golesa netá utó ikumú miluma giliiki miniaká niámó itó nenikumú hizi lé initiki amuza miliaká nia gakó lo nemekago, itínasa mulúnegú lamaná aleko iteko gelekuke nouve.

⁸ Neza gozapá luhuva netá makó gizo lukumugo mulutikú golesa gelemó nenemú gelekuke itínasa mulúnegú golesa gelemuve. Luhuva gizu gamena nene gamena alínipáisí mulutikú golesa gilikago gelekuke, lamaná mulúnegú golesa gulumó neve.

⁹ Itó itína nene mulúnegú lamaná geleko noluve. Mulutikú golesa gelemó nenemukopa, mulutikú golesa geletímo likigika ali viligakumú mulúnegú lamaná noguluve. Lekeza miluma gelemó nene Ómasímo giligo lamanalímini loló okago, gilikamole loko gakotémo ma lekelémo golesa onamive.

¹⁰ Nenémini mogonamú láá loko gilitune: Monokú miluma geleká nenémo ligika ale viligoaká netá ale utó molokiko vegená lugutó vizekiko minatune. Nenemú miluma geleká nenémináá ale utó molatítimo alika nenemú giliko golesa aminogo ive. Itó hanuva miluma geleká nenémo negi nagi netá ale utó molokago lapuluva iaká niave.

¹¹ Ánígalo. Miluma geleká lapa nomimó nenémo lekelitoka gihilá lagasó ale utó molamive. Monokú lekelémo vávani oaká itó mogonatini lamaná ale utó moloaká itó golesa netá ahelú oaká sipisi itó Ómasímini mesahamú lekelegesá legeaká itó nenikumú gili guni iminiki amuza moloaká itó golesa netalímini helegáá kemeaká nene netá nenémináá ale utó molamó nene lekelitoka utó okago, lo lukumu netakumú lekelí lihima nomimó nenémini mogonáá utó okave.

¹² Gozapá luhuva netá láá loko gizo lukumumó nene golesa netá ali vema aikumule loko nomive. Itó golesa netá ale utó molota vema aikumule lokogi

nomive. Gakó lo lekemekuko Ómasímini avogisaló lekeza lelitoka mulutini milatímini mogonáa utó itive loko nenemú gizo lukumumóma neve.

¹³ Itó lekeza áminámini iake mulutegú ali geha zemóma neve.

Itó mulutegú ali gilitamó nenemukó nomive. Taetasí nene lekelikumú agata gululusi nogiligo lekeza Taetasini muluna ali geha zikago, eza mulunagá agila guluma noigo, ámina gakó nene geleko lagaváa gulunimóma neve.

¹⁴ Neza gozapá Taetasí nene lekelitoka vinogo noigo lekelémo napa oko gakó lo amumó neve. Itó lekelikumú gakó lo amumó nenémimi gihiláa utó o asú imó neve. Neza Taetasini gakó nene sozagi ma lo lekemesá amuve. Ámina oko lukugulizá ale oteko Taetasini lo amumóma nene ma gihiláa loló onoimóma neve.

¹⁵ Taetasí nene lekelitoka vokago, lekehelele viziki ininá iki mulutini milake nasahilí itamó itó gakoláa gili alemó nenemú geleake agika lekelitoka molamó nene napa neve.

¹⁶ Neza lekelikumú gulumó netá matatini hee lokogó nego, mulúnegú golesa amigo vatí oko minanogo uve. Nenemú mulúnegú lamaná geleko luhuva imane gizo nolukumuve.

8

Monokumule loko moni ali nupa ita gakó

¹ * Nigivénegita, Masetonia mikasiuka monó gele vegenatoka Ómasímini nasahilí nenémo gihila ale utó imó nenemú lo likimitoze, gilio.

² Keza miluma maluma nenémimi agikagú minake gohogó minamó nenémo ha netá loló okago, gopa nene monolímini kogolizaváa nene itiki alinake mulúikú lamaná geleká netá nene vegená makó kimitune liki moni ali nupa amó nene komásí nomive.

³ Neza kei mogonatagana gele hee loko gelenouke nolumó nene lá oko neve: Kezáini kagata gilikí vávani iake moni ali nupa amó nene kezáini moni milamó nenémimi lelegító milamake aviligiki milamó.

⁴ Lá iake neza kagata aleko lá amugo, kezáini geleke gala vizilitake Zelusale numutoka Ómasímini vegenalatini mulúikú lamaná gilita netá ali utó miliki kilími vatí inigi moni aleko voko kimitane liki negénegeka lamó.

⁵ Lá iake, netá lagasó inigi lahe loko noguluko ganá nene Guivahaniloka kigika mili gilitiaké Ómasímo lititoka molatitoka itune liki liake lezalokagi kigika mili gilitiki minamó.

⁶ Keza nenémimi ikago, Taetasí nene ámina hoza apí i ve nene lekelitoka vooko lekeza likigika kimita hoza nenémináa ali asú itave loko gala vizunímó.

⁷ Itó gele alévolé oakatini itó monó loakatini itó gakó mogonáa gele hee loko gelekatiini itó monolímini hozavamúamuza moloakatini itó likigika lemeaká nene netá nenémináámini gihila mukí ali utó miliakeve loko ámina mulutikú lamaná geleká hoza aliiki moni ali nupa itakumú lekeza ámina iki vávani itave loko noluve.

⁸ Neza moni ali nupa itakumú gala vizeleketoko loleketamuve. Monó geleká vegená lugáaloka ámina hozamú vávani ikave. Nenemú lo lekemekugo lekelí nasahilímini lelegíláa nana oko neve, nenémimi mogona utó itive loko noluve.

⁹ Lekeza Guivahanite Izesu Kilistoni nasahilamú mota giliaká niave. Eza minumuni izolaho lekelikumule loko gohogó ve loló imó nene lekeza

áminatunú monokú minumunavagi lilí itave loko nenémini imó nenazo, Izesuni agizaka hiziki mihina itave loko noluve.

¹⁰ Itó gakó makó láá loko nogulumó nene lo lekemekugo, gili alikiko, gihila utó itize. Lekeza nene litaha meleketó lekezatini litá iki moni ale nupa itune liki liake vávani iki ámina hoza apí inamóma nene itína ámina lelegító ali asú itamó nene lamaná inogo ive.

¹¹ Nenémú vávani iki apí amómáminiki miní amiki aliliki niviki vávani iki ali lutigitamó nenémini gihiláa nene moni milinita lelegító ali utó milalo.

¹² Mulutikú lamaná giliki moni milatamó nene Ómasímo gelekiko lamaná inogo ive. Leza molonamuni lelegító negopa, netá molunouni lelegító molokuko Ómasímo ánígago lamaná oaká noive loko noluve.

¹³ Lugáate mulúikú lamaná gilitave loko moni ale nupa oakakumú nene lekeza mikasi lukugupegi miniki lukugupeló gilitave loko nomive.

¹⁴ Lekelí minumunímo itínsa gamena nene keí gohogó amiselekiko, netá matáini nomi vegenalite netá makokumú vitagá amitave. Itó minoko gamena makó zupahé keí minumurímo lekelitoka gaúna gamena amisilitive. Lá okiko nene kezagi lekezagi hamó lelegító mini miliki minatave.

¹⁵* Gona miliki kimimi vakumú nene monó gotolaú gakó lá oko nemóma neve:

Mukí netá gizaká a vegenalitini minumuniíni napa nomimó neve.

Itó lagasó ali nupa amoláate gaúna helemamóma neve.

Taetasige monó moni aliki vita gakó

¹⁶ Ómasí eza lekelémo vatí itikumú nene Taetasini alémo zaú okago, lekeklikumú nagata geleká umó ámina avevezahaló aitoka utó okago, Ómasí agepoka loaká nouve.

¹⁷ Neza lo amekugo geleneive loko nomive. Ezáa agikámo vávani o lamaná okago núane lekelitoka vinogo ive.

¹⁸ Guivahanímini vegenala zuha mukitoka keza Izesuni gakó lamanaku-mule loko hoza aleaká noi vemú gili lamaná iki giliaká nia ve ezagi makó amiselekugo núane nivasive.

¹⁹ Itó ámina vémini gakola makó lá oko neve: Guivahanímini vegená keza ámina ve nene mulúikú lamaná gilitave loko ali nupa ina moni aleko novuko, neneló kelémo vatí iko, makó vitave liki alími etó amó. Ámina hoza nene Guivahanímini agulizá otitive loko, itó mulutegú vávani igo hoza nalunímó nenémini mogona utó itive loko alinogó noune.

²⁰ Nenémú gopa gakó makó utó okative loko sipisi moni nene legesó iki gizapa itave loko kimiselekugo nivasive.

²¹ Lá nounimó nene leza netá loló okuko Guivahanímo ezagó gelekiko lamaná itive loko negopa, mukí vegenalite gilikiko lamaná itive lokogi nalune.

²² Neza nene ámina ve lositaki itó ligive makoki nene kimiselekugo núane nivas. Ámina ve eza nene mukí zupa gimivagú moloko ánígokuko vegená kelémo vatí itikumú amuza moloakálímini mogonáa utó okave. Áisi nene lekelikumú giligo, alévolé okago, amuza napa nomolave.

²³ Itó Taetasini mogonamú gilitune liki nilikoma, lekelikumule loko ezagi nezagí hoza aleaká ve losi nene nousive. Itó Taetasigegi makó nivasi vetini mogonáinímú gilitune liki nilikoma, keza monó gele vegenáini zuha nenete

kimisilikago núane nivasive. Itó keza Kilistoni lapaná ali utó iaká nia ve nivasive.

²⁴ Neza lekelémo napa oko lo nokumumó nenémini gihiláa utó itive liki lekeza ámina ve nene viki anitikiko nasahilí ikimikiko, monó gilina vegena lugáa numutó numutó keza gili guni itave.

9

Zelusalega monó vegena kumule liki moni ali nupa a gakó

¹ Zelusalega Ómasímini vegena nasahilí ikitiki moni kimita gakó nene mota gilinave. Nenemú nanave loko goha gizo likimitove.

² Ámina hozamú mulutini hukili okago, gelekuke, lekelémo napa oko lekelí mogonamú láa loko lumó: Akaia mikasiuka monó nigele vegena lekeza litaha kilisimasiló litá iki vávani iake moni ali utó moloaká gapo ali utó amó nenémini gakó nene Masetonia vegena lo kemekugo, vegena lugáate keza amuza miliki gakotini giliake, ámina hoza alitune liki mulúikú lamaná gelemó.

³ Neza ámina hozamú lekelémo napa oko lo kumu gakó nene voko hetagá okative loko neza lumómaló nene áminaló miliki vávani iki moni ali nupa itave loko ámina ve losive makole kimiselekugo nivave.

⁴ Nezáne alika Masetonia vegena kovo, lekeza moni moloakumú ligitaganí ikikoma lekelémo napa oko lo kumu gakóne alemó zekiko, nezagi itó lekezagí lovoza helekative loko

⁵ nenemú neza gulumó etokago, nigive nagave imane gala vizeko kimiselekugo, goí iki lekelitoka núane nivave. Vi anitikiko, lekeza moni ma kimitune liki emane amunaló gakó li hukinamóma neve. Nenemú ganatilisi ali nupa ikiko minatize. Lá ikiko, neza lekelitoka vo anitekinake gala vizé vizé ugo moni milatamó negopa, mulutikú lamaná gili minake moni milinamó nenémini mogona lamaná utó okiko ánigátove.

⁶ Itó moni ali nupa itakumú anzoa gakó imane láa loko noluze, gili minalo: Leza zuha netá koma zuhá itunímó nene minoko komagó alinogo une. Itó zuha netá mukí zuhá itunímó nene minoko mukí ale minanogo une.

⁷ Nenemú imanémini itaze. Lekeza etó etó iki likigikatunú giliaki gili guni iniki gilita avotigiláminiki nene moni ahulataze. Itó kogoliza viziki monó moni ahuliaká nia vegena kumú nene Ómasímo ánigo amu heleaká noinazo, gínkahavagi neiko vegentalite gala vizí vizí agogopa, mulutikú lamaná giliaki ahulataze.

⁸ Ómasi eza minumunavagi ve noinazo, vávani oko lusa nene lukumupiló molokiko minumuni utó o likimitize. Lá okiko, lekezatini ni lakagatupa niiki vegena nasahilí ikitata hoza haitopaitolímini alitune likima netá makokumú ma vitágá aminigave.

^{9 *} Monóinigi vegentalite lá itakumú nene monó gotolaú gakó makó láa loko nemóma neve:

Keza gona miliki gohogó vegena nasahilí ikitake kimiaká niave.

Keí nasahilíni huko vamitimó minoloko voko minanogo íve.

^{10 *} Ómasi eza zuha netá ale utó mololimikago zuhaina oaká noune. Itó gihiláa ale utó mololimikago minoko aleko oaká noune. Lá oaká noinazo,

eza nene lekezagi minoko zuhaváa ale utó mololikimioko lusa geko ale napa okiko, nasahilitinímini gihiláa mino hutilí oko minanogo ive.

11 Itó haitopaitolímíni oko minumunitinígi vegená lilí iiki áminatunú vegená makó nasahilí ikimikiko, nasahilitinímini gihiláa utó okiko, keza lelikumú Ómasi agepoka litamómámini mogona lá oko neve:

12 Lekeza Ómasímini vegenala zuha mulukú lamaná gilita netá lilí iki moni kimikiko, nenémo gohogóini amisele ahuloketative lokogó negopa, nenémo Ómasi agepoka loko geké lomiaká nenémini minumuníagi ale utó molotative.

13 Lekeza Kilistoni gakó lamaná giliake ali gikitiki ali miniaká niamó nenémini mogonáa, itó lekeza Zelusalega monó gele vegená itó likigive lugáa mukitoka kezagi nene mulutikú lamaná giliki napa iki nasahilí ikitamó nenémini mogonáa utó okiko, Ómasímini lapaná utó o lamaná oko minative liki ali otinigave.

14 Lá ikiko, Ómasímo nasahilí haitolímíno lekelitoka ale utó imómave liki kigika lekelitoka miliki lekelikumú Ómasiloka linigave.

15 Itó Ómasi eza nasahilí oletoko gipala lehizeletamómámini mogona lo asú oko lo utó o asú amoakalímini nenemú hanuva sigaga lotoko agepoka litune.

10

Pauló ezáa mogona hize lé imó

1 Neza Paulona imane Kilistoni zou nagamilagi itó nasahililagi noukeve loko lakagata aleko lo likimitoze, gililo. Lugáate nenikumú láa liki liaká niave: Lelitoka oko minake ezáa amuzavagi ve minamike, gakó nagamilagi lo lemeaká imó. Lá oake, voko minake agokagutí gakó lo lemeaká noive liki liaká niave.

2 Nigive nagavesé, lekelitoka voko mininake vegenalite litaha kigikatunú aliaká niamómáminoko hozava aleko minoaká noive liki nenikumú liaká nia vegená nene nogokagutí gakó lo kimitove loko nene vávani oko lo kimitomóza, lekeza lugáa ámináminoko nogokagutí lo lekemekatoze, gala vizemilo.

3 Lelí mogona láoko neve: Mikasiuka netá matate ale minunike litaha lugupegi lamaná mohona nouhá nemóza, monokumule loko lova hizeaká nouhá nene monó gelema vegenalite litaha kigikatunú lova hiziaká niamó nenéminko nomive.

4 Gimisi magé ale minunike monolímíni lovavagú hoza aleaká nounimó nene mikasiukatí monó gelema vegenalitini netatunú negopa, Ómasímini zámuzalagi nounike netenunú gala veletini ha gakóinímímini vegegisa tele vizeaká noune. Itó keí zámuza zeko letokuko niiko,

5 Ómasímini mogonáamú gele guni oaká gapo hizi lí inigi govisi aliki letiaká gakóini apelekuriike, vasá zeaká netá ali utó iaká niamó nene avilegeaká noune. Itó Kilistoni gelekelelágó utó itive loko haitopaitolímíni lagata geleaká netá nene nagá ameaká noune.

6 Lekeza není gakó gili aliakatini vávani i asú ikiko, leza vegená lugáa gakó pelesa ziaká niamoláa nene nakuhuni kimitune loko gizapa onoune.

7 Není mogona lokovogisaló utó noimó nene ánígaló. Lekelitokatí ve makolímoho makolímoho ezáamú gelekiko Kilistoni vegenala zuha loló okamó áisi láa loko gilitize: Ezáagó Kilistoni vegenala ma nomive. Lezagí Kilistoni vegenala nene nousive.

⁸ Guivahanímo hozavamú gilike zámuza nimimó nene lekelémo lapuluva oakakumú negopa, hize lé olikimiakakumú nenazo, neza ámina zámuzamule loko nugupe aleko iteko lo likimitomó nene novoza heleminogo ive.

⁹ Itó luhuva netá imane gizo nolukumumó nene, nenemú giliko lekelegesá ligiti gakó gizo nolukumumó gelemino.

¹⁰ Nenikumú láa liki liaká niakumú noluve: Luhuva netakú gakó golivagi itó alévolekutí gizoaká noimóza, lovogisaló nene amuza ve minamive. Itó hutuváa gakó loaká noimó nene nagamilagi loaká noive liki liaká niave.

¹¹ Némika liki liaká nia vegená keza hotó minuke luhuva gakó gizo leke-meaká noumá nene áminámini gihiláa hamó lelegító nene holutikú minoko ale utó molokugo áníganigave liki gilitaze.

¹² Neza vegená kugupe aliki iti iki miniajá nia vegenatoka gímizekinake lelegí noune loko litohe. Íi, keza není lelegító ma minamave. Vegená nenémináa keza Ómasímo oko moloko oaká nounikumú nanave loko nogilive liki lamake, gakó gona miliki liaká niamó nene kezáini mogonáinimukó gili minake gakó gopa kezáini mogona lotuva ligiaká niave.

¹³ Neza Ómasímini hoza alitane loko lehizeneta lelegító nelémo etó imó nene ámina oko aluke, lekelitoka anitumó nenemú gelekuke alemo ite ite gakó losá amuve. Itó lehizeneta lelegító gopa avilegeko ma losá amuve.

¹⁴ Neza hozanégó lelegí oko aleaká nouve. Hoza lakanite nene lamaná lekelitoka neimó nenazo, leza nene lekelitoka anituko lelí legepagutí Kilistoni gakó lamaná ganá apí iki gilinamóma neve.

¹⁵ Leza vegená lugáatini hozagú lagakilimó oko moloko leza alunimole loko lugupe aleko iteaká gakó loaká nene ma osá amune. Gele alévolé oakatini nene agizani alekiko leza lekelitoka voko hoza lakanite ale napa itune loko nenemú ligika nego minoaká nouve.

¹⁶ Lá okinake lekegemesaloka mina mikasigú vegenatoka gakó lamaná lo utó oko lo kemekinake, ve makolímini hoza lakanivagú ezáa ale utó ikumú lugupe aleko iteaká gakó loaká nene ma amitune.

¹⁷* Lugupe aleko iteakakumú nene monó gotolaú gakó makó lá oko nemó neve: Makó eza netá matakumú aleko ite ite gakó litove loko nookoma, Guivahanímo oko moloko i netakumú gele minoko lino.

¹⁸ Makó ezáa agupe aleko iteko nolikoma nene, monó hoza lamaná alekave loko lamitune. Guivahanímo alémo napa okago gihiláa loló okave loko litune.

11

Paulogegei soza aposolo vegi keí gakó

¹ Gakó lagasó makó lo nolukumugoma negi gakó lokave liki goselé leke-pelemimo. Hanuva legesó iki gililo.

² Neza lekelikumule loko Ómasímo lekemekugú noaká noimómáminoko amuza moloaká nouve. Lekeza ve aleve suni ánígonami mohó vové aveláa nenéminiki niko, ve hamotokó vitave loko anosa mololeketumó nene Kilstó noive.

³* Lá onoimóza, gosihalímo logoka vizeakalímini mogonamú gele hee lo minake Evani nene soza gakotunú agoka vizimó ámina oko lekezaloka ve lugáate lokogoka vizitakumú geleakatiní golosasa gekiko, vové avé liki

* **10:17:** Zel 9:24 * **11:3:** Apí 3:1-5,13

Kilistonimukó giliaká niamó nene ahulikatave loko gulugo, gena noigo noluve.

⁴ Nenémini mogona lá oko neve: Lekelitoka vegená makolímo aniteko Izesuri mogonáa lélisi lo lekemeaká nouhalímini negopa, ametameni haitolímini makó lo lekemekago nene, itó gozapá lelitokatí alemó nenegopa, haitolímini gosohá gakó lo lekemekago nene, itó Izesuni gakó lamaná lelitokatí gelemóma nenegopa, monó haitolímini makó lo lekemekago nene, géneka li amemíki hanuva gili amiaká niamó nene lamaná noihe.

⁵ Nezáne mogonamú gelekugo ve napa noune liki liaká nia aposolotini sepenauka nominumó gelesá amive.

⁶ Neza negepa gúmusi muluke lo lekemeaká nouhe loko gelenamumóza, monolímini mogonáa geleká nene gelenouve. Itó nenémini mogonáa haitopaitolímini oko ale vesamá oko lokovogisaloka ale moloko lo lekemeaká nouve.

⁷ Itó lekelí lekelémo napa itove loko nezáne lemeko minuke Ómasímini gakó lamaná lo lukumutó meinaváa ma alesá amumó nenémo golesa ihe lamaná ive.

⁸ Lekelitoka monó hoza aleko gelekéle noleketuke Ómasímini vegenala zuha lugáate moni henoni nimikago aleaká umó nene hagítana ipá oaká umó gelekeave.

⁹* Itó lekelitoka minuke netá makokumú vitágá uke voká makó loleketamumóma neve. Neza vitágá oko mohona nougo, Masetonia mikasigutí nigive makolite aniteke netá nimiki ali negepa miliaká amó. Lá niago lekelitoka nene hanuva minuke genavagi netá geheleketonamumóma neve. Itó minoloko iteko gohagi geheleketamitove loko noluve.

¹⁰ Kilistoni gakó gihiláa nigikauka nego lamaná noluve. Ámina suni aleaká noukumú nugupe ale napa otigí oko loaká nou gapo nene Akaia mikasigú lekeza nia mikasiuka hizi lí aminigave.

¹¹ Nene nanamú noluve. Nigika lekememuke lá oaká nouhe. Nenémini oko nomive. Nigika lekemeaká noumó nene Ómasímo geleneigo noluve.

¹² Netá aleaká noumó nene ale-loko voko minanogo uve. Itó nene hanuva-mukopa, vegená lugáa keza Pauló hoza aleaká noimó nenémini lelegító oko hoza nalune liki kugupenini aliki itikatave loko nene lukesaváini akeleaká nouve.

¹³ Ve nenémináate aposolo sozámini itó monó hoza sozámini aliki minake, Kilistoni aposolo lelí lemetamenigitana lili íaká niave.

¹⁴ Lá ikago netá haitolímini makó alikave loko litupe. Lá oko nomive. Satá ezagi nene ageló vegená lapanáiki loló itove loko ali tolova oaká noinazo,

¹⁵ nenémú Satani hozaváa aliaká nia vegená keza ámina iki netá lamaná aleakalímini gelekeleláa loló itune liki kezáini kogoka kegepa vávani iki ale tolova iaká niakumú ininá amitune. Keza miniki hoza golesa aliaká niamó nenémini helegáa alinigave.

Pauló aposolo hoza alike miluma gili gakó

¹⁶ Gakó nolumó nene goha litoze. Nenikumú gelego negi ve liki loló amino. Gopa nenikumú láa liki niglikimá gili nimikiko nugupe lagasó ale napa otigí oko litoze.

17 Neza gakó láa loko litomó nene Guivahanímo lonetamómámini oko litogopa, hanuva nugupe aleko iteko gakó apí okumole loko gopa nene negi gakó linogo uve.

18 Vegená mukilite lugupémini netakumú ali napa napa iki gakó liaká nianazo, neza ámina oko litove.

19 Agae, lekeza netá mogonáá geleká nouni vegená noune liki likamó nenazo, lugáate negi gakó li likimikago, vávani iki giliaká niave.

20 Itó likilími gelekelé izegipatini milanigi niake, itó netá matatini ipá iki nanigi niake, itó gelehusiikú apilitave liki niake, itó kugulizaki ve lílí i likiminigi niake, itó lokogoka lekegepaló zinigi niago, nenemú lekeza gahá kememake gili kimiaká niave.

21 Neza nene sunimúamuza molamugo lekeza lovoza heleká netá nalive liki nilahe.

Makó keza netá nemupe manamupe ahuu ahuu liiki nene alune liki ma niko, nezagi nene negi veginata oko nehelele vizemigo nugupe aleko iteko litoze.

22 Ámina aposolo sozámini nene kezánimú Hipulu ve noune liki liaká niamóza, nezagi ámina oko Zuta ve nouve. Kezánimú Isilae vegená noune liki liaká niamóza, neza ámina oko loaká nouve. Keza goha ámina iki kezánimú Avalahani agapilamola noune liki liaká niamóza, neza áminaló kemegetoko loaká nouve.

23* Keza Kilistoni gelekelé veva noune liki liaká niamóza, neza imane gopa negi nagi gakó litoze. Neza kivilegeko Kilistoni gelekelé veva haitolímini nouve. Neza hozámini milumaváá geleká noumó nene haitolíminoko neve. Itó monokumule loko nagá numukú minoaká umó, itó segi nogosanitunú nipilikago nagavú geaká imó, itó lapuluva itove loko geleká umó nene haitó avevezahaló iteko neve.

24* Zuta ve keza gamena ligizani lugaloka asú igo uheni nakahunitunú nepelemó nene 39 igo nepelemó.

25* Gamena losive makole Loma vete segi nogosanitunú nepelemóma neve. Itó gamena hamó nene gehanitunú nipilikago hilinogo umóma neve. Itó gamena losive makole nagamikú lapegu nougo ámina sipi zeko ategokego age nagamikú lemesá umóma neve. Itó gamena hamó nene sipima golesa okago límugusi zeko gó loko imóza, simá namoko hanuva age nagamí amupiló minumóma neve.

26* Itó gamena mukí nene gapo hána hána vova vova oko mohona oko nominugo, golinímo nagamilímo okago lapuluva osá oko minoaká nenémimi amupiló iteko minumóma neve. Itó laskoli vetini holúkú heleakalímimi amupiló minumóma neve. Zuta ve nigivénegini holúkú itó Zuta ve minamoláatini holúkú heleakalímimi amupiló minumóma neve. Taoni napagú itó gihisigú heleakalímimi amupiló minumóma neve. Age nagamikú nene sumizá noaká avevezahaló, itó monó sozaló ve ligivetegini holúkú heleakalímimi amupiló mohona oko minumóma neve.

27 Génopa hoza alekuke nigizamuha nagavú gigo mohona uke, novoki ako lamaná amumó mohona uke, gaúna heleko zahí nagamikumú nivisigo, hepé heleko minumóma neve. Gineganemú itó avilisakumú vitagá oko minumóma neve.

28 Itó nene gó ma nomive. Gamena gamena mulúne gitihiná igo numutó namató Guivahanímini vegenala zuha gizapa okimiaká hozamú gulugo, gema nivisigo minoaká nouve.

29 Makó keza monokú ipú zemagoma, nezagi miluma gelekimiaká nouve. Itó makó keza monokutí olí hizikagoma, milumaváini geleaká nouve.

30 Itó neza netá makokumú nugupe ale napa itove loko nookoma, keé lamumó nenemú ale napa oko nolugo lamaná inogo ive.

31 Guivahani Izesuni amelaho Ómasía luhuva gegemá oloko voko mino lúaló molati ve áisi nene nenikumú lamaná nolive loko geleneive.

32* Neza Tamasiko numutoka nougo, agulizaki ve napa Aletani kiapelímo nagá numukú nelémo molanogo lokago, numuni gatekú gohoni akamó.

33 Lá niago, nigive nagave keza nene gosúvehagú lohusi iake vegegisa koló o minakú nehelú i ahulikago, olío hetoka lemekuke golisi vumó neve.

12

Pauló agika ale viligokago ániga gakó

1 Lugupe ale napa ituni gakó losá nene ma lelémo vatí amitimóza, gopa nene lítoze. Nigilka ale viligokago netá ánigumó itó Guivahanímo lo vesamá oko lo nimimó nenemú itínasa avetó oko lo likimitoze, gililo.

2 Neza Kilistoni vegenala makó gelenoueve. Eza nene netá makó ániga gamenalotí kilisimasi 14 oko vokave. Ve eza nene Guivahanímo galinali alémoko okulumakú itekago velé amupiló agika nekú nene itimó. Neza aguapegi nehe itó agupe gileleake nehe nene gele hee lamuve. Ómasímogó geleneive.

3-4 Itó Guivahanímo ámina ve galinali alémoko itekago, Palatisi zazuhagú nene iteko gakó legepatunú lamosá itó mikasiuka veta lo utó moloko lamosá nene gilimó. Neza gelenoumóza, aguapegi minake itihe itó gileleake itihe nene nénisi gelemuve. Ómasímogó geleneive.

5 Ámina vemule loko nugupe ale napa oko gakó litove loko nene nezáne mogonamú hize lé oko laminogo uve. Nezánemú litove loko nene keé losá amumó nenemukó ale napa oko linogo uve.

6 Nugupe ale napa oko gakó litove loko nelina nene, gakó lamaná lulinamó nenazo, negi nagí ve minamuline. Lá onoimóza, nenikumú gelego itekative loko nene ma laminogo uve. Netá matá lokugo itó oko moloko nougo, lekezatini ánigiki mota giliaká niamó nenémini lelegító minanogo ive.

7 Okulumakú netá gosohá ánigoko moloko umó nenemú nugupe aleko itekatove loko nugupéne mémelagú emane uhenagi netá makó hizimó nene, Satani gelekelé izegipala makó eza nigikatunú gulugo itekative loko agizani lapuva nimitive loko loniomóma neve.

8 Lá okago, ámina netalímo ahulonetative loko Guivahaniloka gamena losive makole lumó neve.

9 Voká lokugo, láa loko lo nimimó: Není helisánémo keé losá amanikú nene napaló hize lé ogimiaká noinazo, neni nasahilínémo geitoka veleko voaká noigo, netá makokumú voká litanimoláa nomive loko lo nimimó. Nenemú Kilistoni zámuza lámo nenitoka nelémo gilí lítive loko keé losá amumó nene-mukó ale napa oko noluke nogoliza vizeaká nouve.

* **11:32:** Apo 9:23-25

10 Lá onoinazo, neza keé losá amutó nene aitoka leheta nouke amuza moloaká nounazo, Kilstokumule loko keé lamugoma, itó alivi letivi ninitagoma, itó miluma malumámini amupiló nominugoma, itó gopogunímíni itó galáinímini amupiló nominugoma, gopa nenemú mulúnegú golesa gelesá amuve.

Pauló Koliti vegenakumú miluma gilimó

11 Imane negi nagí gákó lumó nene lekelisi iki miliki amó nenémo nelémo zaú okago noluve. Lekezatini nilími napa ikiko lamaná itinazo. Neza hanuva ánéamina noumóza, lekelí aposolo iteko noune liki nila vetini kamakuka lemeko ma minamuve.

12 Neza lekelitoka hoza huluváa alugo, alévolé suni itó gosohá netá zámuzagi ale utó oaká umó nenémo aposolo mogonáne ale utó moloaká imó.

13 Itó lekeza nanetá vitagá iake Ómasímini vegenala zuha mulusí lugáatini avevezahaló minamave. Lekeza netá hamotunukó lekelémo alínipa okuve. Netá matatini visele nómón nene ma oleketatumómá neve. Ámina suni nene lihima napagi nego ahulinalto loko litohe.

14 Neza lekelitoka gamena losítá vumómá neve. Itó itína nene goha vitove loko ale vatí nouve. Vinake goí oko vuke nugupémini lukesaválaloka umómáminoko miluma hoza lekememinogo uve. Izegipa koma nenete izóikini améikini hizi lé ikitanigi moni ali nupa isá amave. Kéisi izóike améike hizi kegepa itakumukó giligilí miniaká nianazo, neza lekelí moni henonimú negopa, lekelikumule loko amuza moloaká nouve.

15 Neza nene lekelikumule loko moni henokanóne itó minoko aleko oakáne nenegi nuvane ahalatove loko vávani oko nouve. Nenemú nigikatunú lekelikumú geleká noumó nenémo aleko iteko noiko, lekeza likigikatunú nenikumú giliaká niámó nenémo aleko lemeko minatihe.

16 Vegená lugáate nenikumú láa liki liaká niave: Ezáa netá utó ezo azoga loko ipá oaká nene ma osá amimóza, asugunatoka vegená kogoka vizeko netá matáini ipá oaká onoitihe liki liaká niave. Olile, neza lá umó nehe.

17 Nenemú lekeza lilo. Není gakotó nene vegenáne zuha kimiselekugo, viki netá makó lekelitokatí ipá ikahe.

18 Taetasini nene vitive loko lotumó, itó monokú ligive makó amiselekugo makó vikasigo nene, Taetasí nene voko lekelitokatí netá matá ma ipá ihe. Leza ligika molo hamó usike gapo hamotó lisoko makó vamusihé.

19 Gákó akó loaká noumó nene lekeza gelego ezáa mogona hize lé oaká nolive liki nilahe. Nenéminoko nomive. Neza Kilstoni izegipala minuke Ómasímini avogisaló gákó loaká nouve. Itó nigive nagavese, gihila nenikumule loko lamuve. Monokú lekelémo kii litove loko loaká nouve.

20 Neza lekelitoka voko ánigoleketatomó nene lekelikumú gulugo hehe lamitive loko, itó lekeza nenikumú ámina iki gilikó hehe lamitive loko gulugo, gena nonivisive. Itó lekelitoka lova leta lava leta itó lekemekugú noaká, mesaha kosaha, itó molo alata alata oaká, itó alevo letovo oaká, lotoka lataka hizeaká, vegená kugupe aleko iteaká, ale gopánapa oaká, netá nenémináa neko voko ánigokatove loko gulugo, gena nonivisive.

21 Lekelitokatí lugáate emane amunaloka likigika golotuva lamó mokoló netá itó musi netá likigika napaló nego, némini manámini ake likigikatini makó ali viligisá amiki nenéminiki niko, lekelitoka vo anititonó nene lokovogisaló Ómasinémo nelémo-loko lemekiko, lekelí lihimamú mulúne gitihiná okative loko gulugo gena niviseaká noive.

13

Kagata alike geké loketake gizo asú imó

¹* Itína lekelitoka goha vokugo gamena losive makole inogo ive. Goní oaká gamenaló nene ve losítá ahe itó losive makolehe keza ve makolímimi lihimamú likiko utó o lamaná oko vevesanogo ive liki monó gotolaú gizina gakó nene, lekelitoka vo anitekinake ámina gakó gele mininake gakó linogo uve.

² Amunaló emane lihimatinigi minamolá itó vegéná lugáa nene lekelitoka gamena losi vu zupahé lakagata aleko lu gakó áminama nugupe hotó onoigo goha imane noluve. Aliko goha nene voko aselini ma zeleketaminogo uve.

³ Kilistó nene nelémo vávani igo loaká noutímini mogonamú lekeza vitagá niamó nene áníganigave. Kilistó eza lekelitoka hozaváa nalimó nene nekisáa nomimó neve. Zámuzalagi aleaká noive.

⁴ Gozapá nene lamaná migelelé onoigo zohota zaló apelemóma nemóza, itína nene amelaho Ómasímini zámuzalagi aleake otimó neve. Neza ámina oko eza imómáminoko migelelé ovumóza, aitoka gímizekuke Ómasímini zámuzaló voko leheta oko minoaká noumó nenémini mogona lekelitoka voko ale utó molanogo uve.

⁵ Lekelisi nene lamaná monokú niahe niamahé nene likigikatini loká iki vitagá iiki nenémini mogonáa ali utó milalo. Itó Izesu Kilistoni mulutikú alími milikago nominamó nenémini mogona mota gilinahe, olile. Itó lukugupémo monó avevezaha oaká noihe.

⁶ Nénisi nene hetó nugupetunukó monó ve ma minosá amuve. Lá nougo ánígatave loko geleká nouve.

⁷ Ómasímo gizapa olíkimikiko lihma ali utó milamitave loko Ómasiloka loaká nouve. Lekeza ánígikiko monó ve gihiláa loló oko minatove loko nomive. Lekeza monó gakó gili alitamó nenémo utó o lamaná itive loko noluve. Itó nenikumú nene agupetunukó monó ve noive liki gilitamó nene ha netá neve.

⁸ Leza nenémináate nana oko gakó gihila lova ale amítive. Hanuva hize lé otatíive loko nousive.

⁹ Leza zámuzamú vitagá okoko nousigo, lekelisi zámuzatiki minatamó nene mulutegú lamaná gilinogo usive. Lá nousike likigika gizopa lative loko Ómasiloka loaká nousive.

¹⁰ Guivahanímo zámuza nimimó netunú lekelí lekehelú itove loko negopa, lekelí lekelémo alévolé itove loko nemeneimóma nenazo, neza lekelitoka voko alévolé gakokutí lo lekemekatove loko ganatilisi hotó nouke lakagata aleko luhuva imane gizo nolukumuve.

¹¹ Itó nigivénegita, gakó lo asú oko láa loko litoze: Lekeza mulutikú lamaná gilihi minalo. Itó lakagata aleko gakó imane nolumó gilihi likigika ali guni iki alími lamanatoka milalo. Lá niiki lekeza likigikatini mili hamó iki hulugú minalo. Lá ikiko, Ómasí eza ligika kemeaká itó hulu amelaho lekelitoka minanogo ive.

¹² Lekeza monokú eza aputá viziko eza aputá viziko iki minalo.

¹³ Imaneloka monó gilina veganalite mukitó geketini lilikimiaká niave.

¹⁴ Guivahani Izesu Kilistoni nasahilila nenémo itó Ómasímo agika leke-meaká noimó nenémo itó Sikalahulímo lekelémo apizeaká noimó nenémo lekelitoka minoloko voko minino.

* ^{13:1:} Gapo 17:6, 19:15

Galesia Vegenalitini Luhuva Pauló Gizo Kimimó

Galesia vegená nónohá kimike gizo kimi gakó

¹ Neza Paulona aposolo nene ve makolímo nimiselemimó itó vegenalite hoza gakó ma linitamamó, Izesu Kilistó itó heleneikutí alémo oti ve Ómasi ameteho nene aí gakotó aposolo loló utímína,

² itó nigivénege lugáagi imaneló niamó kezagi makó nounike nene Izesuni vegenala zuha Galesia mikasiuka niató niató lekelí luhuva imane gizo nolukumuve.

³ Ómasi ameteho itó Guivahanite Izesu Kilistó aitokatí nasahilí itó hulu lekilitoka minino.

⁴ Izesú eza ameteho Ómasímini gakotó nene itína gamena golesa netatémo lelémo golesa inogo ikutí gologí oletanogo lelí lihimamule loko minoko aleko imoláa nene ezáa ahulamó.

⁵ Nenemú Ómasímini lapaná ale ote-loko voko minatune. Lamaná.

Gakó lamaná haitó makó nomive

⁶ Lekeza nene Kilistoni nasahilikú miní amitave loko sele lo likimi veló mini háná amake lekemegesa amiake haitó gakó lamanakú viki lakagata miliki giliaká niakumú nene oho loko nololeketuve.

⁷ Gakó lamaná nene makó nomimóza, hanuva vegená lugáá nenete Kilistoni gakó lamaná nene ale gopa itupe liki haitó monó li likimiki likigika ali gopa ake nenémini iaká niave.

⁸ Lá niamóza, nezahe itó okulumakutí ageló makolímohe Izesuni gakó lamaná amunaloka lo lukumuhá nene lo lekememoko ale gopa oko haitó lo lekemesá nene lolímini mututoni loló osató neve.

⁹ Ámina gakó nene gozapá lunimó áminagó nene goha noluve. Makolite nene gakó lamaná amunaloka lo lekemekugo gilinamó nene ali gopa iki haitolíminiki li likimitamó nene lolímini mututoni lili itamó neve loko goha nene noluve.

¹⁰ Gakó nolumó nene vegenalite ánigi kumu hilitave loko lamuve. Ómasímo ánigoamu hilitive loko noluve. Neza nene vegenalite nenikumú giliko ititive loko hoza alulina, Kilistoni gelekelé ve minamuline.

Pauló aposolo loló imómámini mogona

¹¹ Nigivénegita, neza gakó lo likimitoze, gilio. Izesuni gakó lamaná lo lukumumó nene vegenalite kagata giliiki ali utó amó nomive.

¹² Itó vegenalititokatí nomive. Itó vegenalite lainim-initamave. Izesu Kilistó ezáa lo utó oko lo nimimó neve.

¹³* Neza gozapá Zuta ve minuke holíukú minokuke, netá matá oko moloko umó li likimikago nene gilinave. Neza Ómasímini monó gele vegená nene gopoguni moloketuke kepeleko kimisele kimisele moloko, kelémo golesa galasa oaká umó nene,

¹⁴* izegipa nahalúnegini kivilegeko izotegini ametegini itó avotegini mogona nene haha amitive loko ámina gakolímo alévolé oko minative lokuke nene, amuza moloko lá oaká umóma neve.

* ^{1:13:} Apo 8:3, 22:4-5, 26:9-11 * ^{1:14:} Apo 22:3

15 Lá oaká umóza, Ómasi nenémo amunaloka izónenhini agatupagú nougo, ámigoake, nasahilí onetake nelémo etó oake sele lo nimimó.

16 * Sele lo nimimó nene, giligo, etokago, gakola nene Zuta vegená minamoláaloka ale hutíli itane loko gipalámini mogona lo utó oko nelepirizimó. Itó lá imóza, ámina gakokumú gele vesonouhe loko vegená makotoka loká oketatumomóma neve.

17 Itó aposolo goí iki lilí iki minamoláa keza ámina gakó lamaná nene hee liki li nimitave loko Zelusale numutoka itemumomóma neve. Ánigosá ugopa, litá oko Alapia mikasigú mikasi gomopalaló voko minuke atiginá oko Tamasiko numutoka vo anitumó.

18 * Neneloka nougo, kilisimasí losive makole oko vokago, Pitani ánigatove loko Zelusalega itekugo, holisi losítá makó minusimó.

19 Neneló nousike, aposolo lugáa makó ánigamumomó. Guivahanímini agunala Zemusinigó ánigumomó, áisi monó gizapa ve napa minamomó nenazo.

20 Itó gakó imane luhuva nogizumó nene soza gakó nomive. Ómasímini agovisáló lamaná noluke luhuva nogizuve.

21 Lá okuke nene, Silia mikasigú itó Silisia mikasigú nene voko minumomó.

22 Itó Zutaia mikasigú Kilistoni vegenala zuhate není nogokaló ánigamamomó.

23 Keza vegená lugáate nenikumú gakó makó likago láa liki gelemó: Gopoguni moletake lepeleko limiseleko monó ale golesa itive loko vi vémo goha ale viligoake vegená nene monó lo nokimive.

24 Láa liake, nenikumú Ómasi agepoka liki miniaká amó.

2

Aposolote Pauloni hozamú gelego lamaná imó

1 * Lá okago, kilisimasí 14 oko vokago, Panapasiki Zelusalega goha atiginá oko itekusike, Taetasini nene ale gímizekusike makó itunimó.

2 Nene hanuva lá amumomó. Ómasímo gakó lo utó oko lo nimitó nene itumomó. Itumomó nene Zuta vegená minamoláa Izesuni gakó lamaná lo utó oko lo kemeaká noumú nene monokú kugulizaki ve kezagó alegesá iki niago avetó oko lo kumumomó. Není hozamú géneka likikoma hoza goí oko aleko minumoki itó hoza itína aleko nominumoki nene hanuvamú alumomó gelekative loko lá umomá neve.

3 Lá okugo, ve lugáahé itó nezagi minusi ve Taetasí ahe eza nene Kiliki ve nenazo, nenemomú Zuta ve loló itive loko agupeló nene Ómasímini anosa molotatune liki li hukitatahe loko nougo lamamomáza,

4 emane amunaloka ve lugáahé nene soza sazaló monó ve iki holutegú asugunatoka anitemomó. Keza Izesu Kilistotoka voko apizeko minunike netá makolímini nagakú minamuhá nenemini mogona ánigatune liki Mosé lo hukoko li gakolímini gelekelé ve lelémo molatune liki ánigi loló itune liki halá giki amó.

5 Nene vete lelí ale limitune liki likago, leza Izesuni gakó lamaná nenémo lekelitoka ale gilitoko alitive loko Taetasini agupeló anosa milatave liki likago keké gele kememuháma neve.

6 Lá okago, vegenalite gelego monó kugulizaki ve minamomó nenete lelí gapo hizi lí inigi néminí manámíni initamamomáma neve. Itó keikumú gulugo

* **1:16:** Apo 9:3-6, 22:6-10, 26:13-18 * **1:18:** Apo 9:26-30 * **2:1:** Apo 11:30, 15:2

haitolímini iki minamamó neve. Ómasímo ámináminoko lugupeló ánigamó nene itetigí lemetigí osá amive. Zelusale numutoka itu zupahé nene ámina monó gizapaló vete haitó gakó makó lo utó oko lo kimitane liki miní amiki li nememamó.

⁷ Keza láa liki li nememake láa likigó gelemó: Ómasímo Pitani nene Zuta vegenatoka Izesuni gakó lamaná lo utó oko lo kimitive loko lotamó. Áminámini oko není nene hetoka vegenatoka gakó lamaná lo utó oko lo kimitane loko lonetamó neve liki gelemó.

⁸ Pitá nene Zuta vetini aposolo loló imó áminagó oko neza nene Ómasímini zámuzałó hetoka vegenalitini aposolo loló umó.

⁹ Lá okago, Zemusiki Pitaki Žoniki monokú kugulizaki ve niahe liki gele ve nenete nenikumú nene Ómasímo apazá hoza lehizemikave liki gelemó. Giliake, ligiveteve liake, Panapasiki ligizakú alemó. Lá iake, lekeza hetoka vegenatoka monó hoza nalisiko, lezate Zuta vegenatoka naluko, oko minature liki li hukamó.

¹⁰ Gohogó vegená limiki niamláa nasahilí ikitatáive likigó li nememó. Itó ámina hoza amuza moloko alitohe loko gele minutó lave.

Atiokia numutoka Pauló Pitani gahá ami gakó

¹¹ Itó Pitá eza Atiokia numutoka okago, aitokatí netá golesa utó onoigo, ánigokuke, aí agómulałó pelevesava zeko gakó lo amumó.

¹² Nenémini mogonáa lá oko neve: Goí oko nene hetoka ve monó gele ve makó Zemusí kimiselekago aka Pitagegi makó minake nosánetá nene hámakokutí ninago, alika nene Zuta ve makó ikago, ánigoake, hetoka vegi kugupeló Ómasímini anosa minatave liki amuza miliaká a vema nianazo loko keikumú alegesá legekago hetoka ve nene ahulo hotó okimiake, kezagi makó minoko nosánetá namimó.

¹³ Lá oake, voko aleko oko aleko noigo, Zuta ve monokú agivelage ámináminiki genezáini losigi vegenalitini suni aleke Pitani alími vatí ago, Panapasí eza keitoka miní ameko kei suni alimó.

¹⁴ Lá iki minake, Izesuni gakó lamanalímini gapogú hee liki vamago nene ánigokuke, vegená lugáatini kovogisaló nene Pitani láa loko lo amumó: Geza nene Zuta ve noanimóza, Zuta ve lelí avotegi li huka gakó nene ahulokanike hetoka vete iki miliki iáká niakú nene novane. Nenémú hetoka ve keza Zuta ve lelí oko molokogó vitave loko nolanimó nene etamive, loko lo amumó.

Zuta vegi hetoka vegi gili alévolé akumule lokogó kugutó vizeaká noive

¹⁵ Leza nene hetoka ve gopa napa miniaká nia vegenakutí utó amune. Zuta ve gihila utó unimóza,

¹⁶* láa loko geleká noune: Mosé lo hukoko li gakó emane gele alekinake hozava ale-loko voko mininake lihimate asú olimiakaláa nomive. Izesu Kilistonimú gele alévolé okukogó lihimate asú olimikiko minanogo une. Láa loko gelekunike, lo hukoko li gakolímini hozava aleko nominukopa, lihimate asú olimikiko minature loko Izesu Kilistonimú mota gele alévolé okune.

¹⁷ Kilistotoka voko gímizekoko lihimate asú itive loko nouháza, lá oloko novinake hetoka vegitana oko golesa netá aleaká vegená loló noukomá nenémú nanave loko litune. Kilistó golesa netá alilo loko lelémo vatí oaká noihe. Óe, lá oko nomive, keké.

* **2:16:** Age 143:2; Lom 3:20-22

¹⁸ Lihimate asú itive loko Mosé li gakotó amegesaló mololoko vituni suni mota gale zunimó nene goha apatitunimó nene, lamaná lo hukoko li gakó pelevesava zeaká nounimó nenémini mogonáa utó inogo ive.

¹⁹ Mosé lo huka gakó nenémo áminama gele alekinake alévolé nemetameni alito gapo hize lí oake nemeni apele hilimó gelekamóza, Ómasimule loko minatove loko otekumó neve. Itó Kilistoni apili nihelego nezagi zohota zaló nipili hilikamó gelekamóza,

²⁰ itínasa minoko aleko noumó nene, nezánegó minamuve. Kilistó eza mulúnegú minoko aleko noigo, nugupetunú minoko aleko noumó nene Ómasímini gipalamú gele alévolé onouke minoko aleko oaká nouve. Eza nene agika nenitoka moloake minoko aleko imoláa nene nenikumule loko ahulamó neve.

²¹ Lo hukoko li gakó emane gele alekoko lihimate asú olimikago minoaká imó nelina nene, Kilistó nene hanuvamú hilimó loló ilinamó nenazo, Izesú nohiliike Ómasímini nasahilí lehizeletamó nene ale gopa oko ahulosá amuve.

3

Lo hukoko li gakó gele alesá nehe Izesukumú gele alévolé osá neve

¹ Kee, Galesia vegená negi nagi neneta, lekeza nene éahoma lekelémo gopa napa ive. Izesu Kilistoni nene zohota zaló hili mogonáa lo lekemeko nolekelepirzuko, lokogómulatunú ánigi akutiki ánigamóma neve.

² Netá hamokumú loká oleketatoze, giliki li nimilo. Lekeza Ómasímini Sikalahú alemó nene, nana iake alemóma neve. Mosé lo hukoko li gakóma gili aliaké alemó nehe, itó Izesukumú gili alévolé iake alemó neve.

³ Nanamú negi nagi hiziki niave. Sikalahulímini gapogú apí iki li-liki nivakutí nene ali viligiki litaha mogona ali miniki alévolé apakú anititune liki nigelehe, olile.

⁴ Monó lekelító minamómave liki gopoguni mililikimikago, golivagi netá nene hanuvamú lukumupiló itímó nehe. Óe, lá oko nomive.

⁵ Ómasi eza Sikalahú lehizelikimiká itó alévolé suni lekelitoka ale utó oká noimó nene, Mosé lo hukoko li gakóma gili alikago lehizelikimiaká noihe, itó Izesuni gakó lamaná gili alévolé ikago lehizelikimiaká noive.

⁶* Monó gotolaú Avalahani mogonamú luhuva láa liki gizinamóma neve: Ezra Ómasimú gele alévolé okago, nenemule loko lihimavaka asú ogimikave loko lotamó.

⁷* Nenémú láa liki gililo: Gili alévolé iaká niamoláa keza nene Avalahani agapilamó zuha gihila niave.

⁸* Zuta vegená minamamoláa keza Ómasimú gili alévolé ikiko nene, lihimáini ahuloketatkumú gozapá geleake, monó gotolaú Ómasímo gakó lamaná Avalahani lo amimó nene láa liki luhuva gizinamóma neve: Geí lusa nenémo hetoka vegená mukitoka vo ale asú inogo ive.

⁹ Nenémú Avalahá gele alévolé oake lisoko vi gapoló lisiki vitamoláa keza aílusagú vi hilanigave.

¹⁰* Itó Mosé lo hukoko li gakokú leheta iake ámegé ámegé iaká nia vegená keza lolímini mututoni lilí inigave. Nenémú monó gotolaú láa liki luhuva

* **3:6:** Apí 15:6; Lom 4:3 * **3:7:** Lom 4:16 * **3:8:** Apí 12:3 * **3:10:** Gapo 27:26

gizinamóma neve: Mosé lo hukoko li gakokú hize letoko gizoloko vonoi gakó mukító gili alemítamó nenete usillímini mututoni minanigave.

11 * Nenemú monó gotolaú gakó makó lá oko neve: Gili alévolé iakeve liki Ómasímini agovisaló lihimáini asú okimikago minatamó nenete alévolé iki miniki aliki inigave liki luhuva gizinamó nenazo, Mosé lo hukoko li gakó gele alekinake Ómasiloka lihima nomitimó minoakaláa nomive. Nenémini mogonáa mota utó okave.

12 * Itó lo hukoko li gakó gele alekinake alévolé ituni mogona haitolímini neve. Gele aleloko vova vova oko alévolé itunimoláa neve. Nenemú monó gotolaú láa loko luhuva gizonoimóma neve: Lo hukoko li gakolímini hozzává alilíki viva viva iki ali asú ita vegena alévolé iki minanigave loko neve.

13 * Itó monó gotolaú nene vegena zaló nagá ziki saína iki apatemó keza lolímini mututoni niave liki luhuva gizinamóma neve. Itó Kilistoni ámina iki zaló saína iki apatikago, lelikumule loko usí alimó. Aleake, Mosé lo hukoko li gakolímini nagakutí guluholetamó.

14 Lá imó nene Izesu Kilistó hoza alikumule loko Avalahatokatí lusámo numutó namató vegena taka puu loko vo asú itive loko lá oletamó. Itó lá okiko Sikalahú lehizeletatove loko lo moleta nene Ómasimú gele alévolé okinake alinogo une.

Mosé lo hukoko li gakoki Ómasímo lehizeletatove loko lo moleta gakoki

15 Nigivénegita, neza hanuva gilina netá makotó lo moloko litoze, gililo. Ve makó netetosa keza netá matá makokumú li múnahiki luhuva gizatáimó nene, makolímo senismoká itó velé amupiló gakó makó miní ameko lokáoko luhuva gizatimoláa nomive.

16 * Itó Ómasímo nene Avalahani itó agapilamola lehizeleketatove loko lo moloketoko limó nene, agapilamó zuha mukikumú lamimóma neve. Hamó Kilistokumú limómáa neve.

17 * Mogona lá okomú noluve: Ómasímo gozapá monó helisa henoni lehizeletatove loko lo moleta take limó. Lá okago, kilisimasi 430 oko vokago, Mosé lo hukoko li gakó nene alika utó imó. Itó ámina lo hukoko li gakó nenémo Ómasímo lo molota gakó avutá apeleminogo ive.

18 * Monolímini lusa henoni nene lo hukoko li gakó gele aleakakú nelina nene, Ómasímo gakó lo moloketoko likutí alemutiline. Lá onoimóza, nene ma nomive. Ómasímo monolímini helisa henoni nene lo molata lonoikeve loko Avalahani hagitana lehizetamóma neve.

19 Lá onoimó nenazo, lo hukoko li gakóma nene nana netakumú neve. Pelevesava zekoko netá golesa aleaká nenémini mogona lo utó itove loko Ómasímo miní ameko molamóma neve. Itó minoloko vova vova oko noiko nene, lehizegetatove loko lo molota ve Avalahani agávolaho Izesú utó okiko asú itive loko lonoimóma neve. Itó lo hukoko li gakóma nene ageló makolite limiki holutegú mina ve Moseni agizakú milikago limimó.

20 Lá onoimóza, ve makolímo holutó ve minatimó nene, ve hamokumú minaminogo ive. Vegená mukikumú minanogo ive. Lá onoimóza, Ómasí áisi ve hamokó noinazo, eza Avalahani nene netá makó lehizegetatove loko

* **3:11:** Hip 2:4 * **3:12:** Liv 18:5 * **3:13:** Gapo 21:23 * **3:16:** Apí 12:7 * **3:17:** Gá 12:40
* **3:18:** Lom 4:14

agómulaló lo molotamó nene holúikú minati ve makokumú vitagá amike ezágó lotamó.

Mosé lo hukoko li gakó utó itímini mogoná

21 Itó Mosé lo hukoko li gakó nenémo Ómasímo lehizeletatove loko lo mololeta gakó lovaga lo ameaká noihe. Lá oko nomive. Mosé lo hukoko li gakó nenémo alévolé lemetameni ale utó oakaláa nelina nene, lamaná lo hukoko li gakokutí lihimate asú olimikago minoaká gapováa utó iline.

22 Lá onoimóza, vegená mukitoka golesa netalímini nagakú nounimó nenémini mogonáa monó gotolaú li utó iki milinamóma neve. Lá okago, nenemú nene Izesu Kilistokumú gele alévolé okuko lehizeletatove loko lo mololeta netalímini gihila alitunimoláa oko neve.

23 Zuta ve leza gozapá nene gele alévolé oaká gapo utó amigo, Mosé lo hukoko li gakó nenémo nagá lemekago, nagakú minoloko novuko, gele alévolé oakalímini gakó utó o lamaná imó.

24 Itó Mosé lo hukoko li gakó nenémo lelémo vevesoaká gapo loló oko gizapa oletoloko vitó nouko, Kilistotoka lelémo molokago nene Izesunímú gele alévolé okunike lihimate asú olimikiko minanogo une.

25 Lélisi nene gele alévolé oaká gapováa utó okago, neneló ámegetoko novuko, ámina lo hukoko li gakolímini gizapavaló minamune.

26 Itó lekeza mukító nene Izesu Kilistokumú gili alévolé atímo itínasa Ómasímini vegenala zuha lilí iki niave.

27 Monó nagamí hiliake, Kilistotoka miní amiake, mukitoka Kilistoni ametameni ali luhikave.

28 Nenemú Zuta vegená niamó itó hetoka vegená niamó, megusa lilí iki muhelé ahelé iki minamó itó hanuva miniaká niamó, ve niamó vená niamó haitopaitó miniaká amó nene ha netá loló okago, lekeza mukitoka Izesu Kilistotoka viki gímižiake mulusi hamó lilí iki niave.

29 * Lekeza Kilistoni mututoni lilí inamó nenazo, nenemú Avalahani agapilamó zuha gihila lilí iki niake, Avalahani helisa henoni Ómasímo lehizetatove loko lo molotamó nene mukító lekelí netá loló inogo ive.

4

1 Nenémini mogona makó láa loko litoze, gililo. Izegipa namuni eza amelaho helekiko minoloko iteko helisa henoni ale lá itímóza, izegipa noinazo gopa nene megusa izegipa ametamenigi loló oko minanogo ive.

2 Lá noiko, uvolagehe amelagehe keza helisa netaláa gizapa itiki minanigave. Gizapa itiki nikó eza napa okoko amelaho mola gamena nene alitokiko, helisa henoni nene ale alinogo ive.

3 Ámináminoko leza gozapá monokú olopa vegetana oko minamunike, mikasímini amupiló ha netá mogonamú li huka gakolímini gelekelela otoko minuháma neve.

4 Lá okago, alika nene gamena molamó nene alitokago, Ómasímo eza gipala amiselekago, vená makolímo getokago, utó imó. Utó oake, eza Mosé lo hukoko li gakolímini gelekelé oko minamó.

5 * Leza nene lo hukoko li gakolímini nagakutí gologí olimikiko Ómasímo lelémo lá itive loko Ómasímini gipala utó imó neve.

* **3:29:** Lom 4:13 * **4:5:** Lom 8:15-17

6 Itó lekeza Ómasímini izegipala lilí iki niamómave loko Ómasímo gipalámini Sikalahú nene mulutegú amiselekago, lemeko noigo, aí zámuzatunú ahóno aménegeve loko sele loaká noune.

7 Nenemú geza megusa izegipa noakopa, Ómasímini izegipala noane. Itó aí izegipala minanikeve loko Ómasímini nasahililáló aí helisa metalímini amelaho ve loló oko minoaká noane.

Pauló Galesia vegenakumú miluma gilímó

8 Hetoka vegená lekeza gozapá Ómasimú gili guni amake soza saza ómai metalímini agihúna giki minake keí nagakú minake, gelekelé ikitiki minamó.

9 Itó itínasa lekeza Ómasimú vitagá iake alími utó ikave. Itó lá onoimóza, lamaná Ómasímo lekelikumú vitagá ike lekelémo utó okamó nenazo, ha netá pisila nomimó helisa nomi netá nene nanamú goha lokovogisa amiki gelekelé nitiki nilave.

10 Lá iki niminake, Ómasímo giliko lamaná itihe liki Zuta vete haitopaitó gamena itó haitopaitó ikani itó haitopaitó kilisimasi mili etó amó nenémini holisi miniaká niave.

11 Lá niago hozane nenémo lekelitoka gihila zemitihe loko gulugo gena niviseaká noive.

12 Nigivénérita, neza voká loleketoko litoze. Neza lekelilímini oko Mosé lo hukoko li gakolímini nagakutí nelémo otopá zekago nouve. Lekeza není suni aliki minalo. Lekelitoka minoloko novugo, lekeza netá golesa makó lilí intamamómá neve.

13 Neza gozapá miluma netá gizalekuke, ganá apí oko Izesuni gakó lamaná lo lukumumóma neve.

14 Itó nugupegú keé lamigo, gena likivisegetigí imóza, není gopa goselé lekepelemimóma neve, itó mu likizapa onamimóma neve. Lekeza áninginiimiake alesa mili nememó nene, Ómasímini ageló ahe itó Izesu Kilistonihe keikumú alesava mili kememó gilímó neve.

15 Kee, gamena nene zupa lokogolizágó ma viziki miniaká amóma nene itínasa hikuka vokave. Lekelí mogonatini lamanakumú láa loko lo likimitoze, gilio. Lekeza lokogómula gologí itune likima, hanuva gologí iki není nilími vatí iki nimitune liki nelina, hanuva nemeline.

16 Itó itínasa gamena nene gakó gihiláa lo nolukumukumú nene gala velini loló okuhe, olile.

17 Ve lugáate amuza miliki lekegepoka liaká niamó nene netá lamanakumú nomive. Lilími ezega emega ikiko, lekeza golisi inimiiki keí kugulizáini ali otitave liki amuza miliaká niave.

18 Netá lamanakumule loko lekegepoka loaká nene netá gihila nemóza, lekelitoka voko minu zupahékó negopa, gamena gamena lá iaká niko lamaná inogo ive.

19 Izegipánemata, neza lekelikumú miluma sipisi goha noguluve. Venalite izegipa getanigi miluma giliaká niamómáminoko miluma sipisi noguluve. Kilistoni ametameni lekelitoka utó o lamaná itive loko lekelikumú gulugo gena niviseaká noive.

20 Lekelikumú nagata gululusi geleuke lekelitoka litá oko voko lokovogisaló haitolíminko gakó lo likimitove loko geleaká nouve.

Hegako Salako keí anoza gakó

21 Mosé lo hukoko li gakó nenémini gelekelé otatune liki liaká niamó neneta, loká oleketatoze, li nimilo: Lekeza lo hukoko li gakolímini luhuva metaláa nagatamóza, mogona gili hee lisá amahe.

22* Aminagú nene láa liki gizi milinamóma neve: Avalahá nene gipala lositá getamó. Makó nene gelekelé mohó megusa Hegá getamó, itó makó nene alimi ame vená Salá getamó.

23 Itó gelekelé mohó megusámo geta izegipa agulizá Isimaelé nene hanuva utó imó. Itó alimi ame venalímo geta izegipa agulizá Isaká nene Ómasímo alika getatane loko Avalahani lo molota gakotó getamó.

24 Itó nene gakolímini agikagúanoza makó láa loko neve: Ámina vená losi keza lo múnahi gakó lositalitini avevezahaváa lilí asimó. Lo múnahi gakó makó nene Sinai agokaú utó imó nenémini gizapaló nia vegená nenete lo hukoko li gakolímini gelekelelää miniaká niave. Nenémini avevezahaváa nene gelekelé mohó megusámo Hegá eza loló imó.

25 Itó Alapia mikasiuka Sinai agokamú Hegani agokave liki liaká niave. Itó Hegá eza Zelusale apá itína hanuva nemómámini avevezahaváa noive. Zelusale apá nene Mosé lo hukoko li gakó ámegetoko minatunimó nene Ómasímini agómulaló hee loko minutune liki ámina gakolímini megusáa lilí iki nia vegenalitini gotó apá neve.

26 Itó Zelusale apá okulumakuka nemó nenémo alimi ame vená Salani avevezahaló neve. Neneló miniki aliki nia vegená nene nagá makokú minamave. Nenemú ámina apá nenémo izoteho loló onoive.

27* Nenemú monó gotolaú luhuva makó láa liki gizinamóma neve:
Vegi vená geza gagapilamó lagasó getokako

gohuna vená nenémo alika izegipala gululusi nene getatimó nenazo,
gohuna vená geza izegipa getamanike minoaká noanitika geza mulukagú lamaná gelezo.

Miluma gelemanitika géisi nene gogoliza vízeko gigisa zezo.

28 Nigivénegita, leza Isakaníminoko Ómasímo lo moleta gakotó utó unimó.

29* Hanuva utó i izegipa nenémo Sikalahulímini gakotó utó i ve Isakaní gopoguni molotake lovaga lo amimó. Ámina suni itínasa nene utó okago lo hukoko li gakokú ámegé ámegé iki hoza nale ve nenete leza Sikalahutokatí utó uni vegená gopoguni mililimiaká niave.

30* Lá oniomóza, monó gotolaú gakó nana oko neve. Gelekelé moholímini gipala nenémo helisa henoni ale lá aminogo ive. Alimi ame venalímini gipalámo ezagó alitimó nenazo, gelekelé mohó megusagi gipalagi nene kimisele ahulokiko visino loko Ómasímo Avalahani lo amimó neve liki luhuva gizinamóma neve.

31 Nenemú nigivénegita, leza nene Mosé lo hukoko li gakolímini nagakú minoko gelekelé mohó megusámini agapilamó minamune. Izesukumú gele alévolé unikeve loko alimi ame venalímini agapilamó nouninazo, Ómasímini helisa henoni ale lá inogo une.

5

Nagakú goha ma minamituni gakó

* **4:22:** Apí 16:15, 21:2 * **4:27:** Isa 54:1 * **4:29:** Apí 21:9 * **4:30:** Apí 21:10

¹ Nagá nomimó minatave loko Kilstó eza gologí oletamóma neve. Lá okanazo, nenemú vegená lugáa nenete Mosé lo huka gakolímini nagakú goha lekelémo molokuko gelekelé ilitatave liki nilikoma géneka liki alévolé ilo.

² Neza Paulona lo likimitoze, gililo. Lekeza Ómasímo lugutó vizitive liki lukugupeló Ómasímini anosa milatamó nene, Kilstoni nasahilí nene lekeli-toka ha netá loló inogo ive.

³ Itó goha miní ameko lo lekeme lamaná itoze, gililo: Makó keza alévolé lemetameni alitune liki kugupeló Ómasímini anosa milatamó nenete lo huka gakó lugáa monéna kumupiló itekiko ámina gakó nene ámegé ámegé iki hoza aliliiki vinigave.

⁴ Lo huka gakó gele alinake lihimate asú olimikiko minatune nilamó lekelisi Kilstogegei apiziki múnahemó nene hukiake otopá zikago aí nasahilí nene ahlilikave.

⁵ Itó lélisi nene Sikalahulímini zámuzaló gele alévolé uhakumú lihimate asú olimikiko minatune loko nenémimi gelegele minoaká noune.

⁶ Izesu Kilstotoka voko gímizitunimó nene Ómasímini anosagi lugupeló minoaká itó Ómasímini anosa nomimó minoaká ale nupa napa okoko monéna gihiláa nomimó hutuváave loko litune. Izesukumú gele alévolé oaká netalímo ligikágú minokiko ligika ligivetegini kimitunimó nenemukó gihilave linogo une.

⁷ Lekeza monolímini gapogú vatí iki ololu liki nivago ve makolímo nana oko gapo hize lí olikimikago gakó gihiláa lekemegesa amiaké gili alisá amave.

⁸ Sele lo likimi ve nenémo gala vizeko lá ilo loko lolekotosá amive.

⁹ * Izámini ekesaláa lagasó makó nenémo nosá netakú vo alekiko mukí ekesá o asú itimó neve.

¹⁰ Itó lekeza není nigikagukó vitave loko gulugo gena amigo lo noluku-muve. Guivahaniló voko gímizunimómave loko Ómasímini anosa lukugupeló netikumú neza nogulútiminoko lekeza gilitamó nene vo mili sigitive loko noguluve. Itó lekelémo gopa oaká noi ve nene Ómasímo goní otanogo ive.

¹¹ Nigivénérita, neza vegenalitini kugupeló Ómasímini anosagi minamitimó nene Ómasímo kugutó vizemitive loko lainim-oleketumó nelina, gopogu galatakalatá nene initamaline. Ómasímini anosa kugupeló minative loko lo kemekogó minulina nene, Izésu zohota zaló hilimó nenémimi gakó lo nokumukumú mu kagata oaká noimó nene asú iline.

¹² Likilími gopa iaká nia ve kezáini kugupeló Ómasímini anosagó negopa, kugupenini zíví hutivi i asú itanazo.

¹³ Nigivénérita, nagakú ma minamitave loko Ómasímo sele lo likimimóma neve. Itó nagakú minamave liki lukugupémo amu heleaká noi netalímini gelekeleláa minamilo. Likigika kimiiki eza nasahilí otiko eza nasahilí otiko iki mjinalo.

¹⁴ * Mosé lo hukoko li gakó ale nupa oko gotola lá oko neve: Gezakamú geleaká noanimó neneminoko gigivekaginimú geleko gigika kemezo.

¹⁵ Lekeza lá amiki izámi suni aliki eza akohú apilikó eza akohú apilikó iiki latila ikatave loko lakagata naluve.

Litaha ligikámini gihiláa itó Sikalahulímini gihiláa

* **5:9:** 1 Koli 5:6 * **5:14:** Liv 19:18

16 Itó nenémini itave loko noluve. Lekeza Sikalahulímo lititoka lititoka iki miliki ilo. Lá iiki litaha likigikámo amu heleaká noi netalímini hozzává alemilo.

17* Litaha ligikámini lagavámo Sikalahú nene lovaga lo ameaká noive. Itó Sikalahulímini lagavámo litaha ligika nene lovaga lo ameaká noive. Lá okago, kéisí nene lova sava ikasigo, lekeza netá matá oko moloko itune liki amó nene vávani iki isá amave.

18 Itó Sikalahulímo lekelémo lolo ikoma Mosé lo huka gakolímo agulizaki loló o leketaminogo ive.

19 Litaha ligikámini hozzáváa nene, asuguná netá negopa, utó oaká noive. Lá oko utó oaká noive: Mokoló netá, golotuva netá, lugupémini avoza heleaká netá,

20 itó soza ómai netá agepoka loaká, gipe lakegusani, mukahá kepeleaká, lovasava, kemekugú noaká, gulu guluga loaká, lova leta lava leta, kizapaló moloaká, lugulizaki ve loló itune liki kezáinimú gelego itekago amuza miliaká, itó mini ezega emega iki otopá ziki miniaká,

21 lelí itive loko molo hukoaká, itó piá nagamító minoaká, itó nosánetá go-liva gililikilí iki niaká, itó netá lugáa nenémináa aliaká niamó nene ámina netá matakumú gozapá lo lekemenoumómá neve. Itó imane goha lakagata aleko lo nolukumuve. Ámina golesa netá alitamoláa nenete Ómasímimi avogisaló vi hilaminigave.

22 Itó Sikalahulímini gihiláa nene lá oko utó oaká noive: Nasahilí oketoko ligika kemeaká, mulutegú agila guluma oaká, hulu oko legesó oko minoaká, lekelémo lamaná oaká, ligika lamanaki minoaká, hozagú alévolé oaká,

23 lemeko zou loko minoaká, itó lizapaló molamoaká nene, netá nenémináa pelevesesava zekoko gapo lotokogi nomive.

24 Itó Izesu Kilistoni vegenala zuha leza litaha ligikámo amu heleaká netá, itó golesa netakumú mumuzó oaká netá nene apele helekuko haha onoimómá neve.

25 Sikalahulímini zámuzalaló minoko aleko nouninazo, nenemú Sikalahulímini gapogukó liso liso vitune.

26 Lugupémo itekoko eza ahelú okiko eza ahelú okiko nouko mulúükú golesa gililitata netá alemítune. Itó eza amiko eza amiko kemekugú nami-tune.

6

Genavagi netató eza hize lé otiko eza hize lé otiko itune

1 Nigivénérita, lekelikutí makolímo monokú migelelé onoko lihima ale utó molokikoma, lekeza Sikalahuki minamó neneta mulutikú hulu o minoko alíma hehe lalo. Lá niuki lekezatini gimilikú milatakumú limiki akikataze, gizapa ilo.

2 Gena lekepeleaká noi netá nene eza hize lé omikiko eza hize lé omikiko iki miniki Kilistó lo huka gakó nene vatí iki gili alilo.

3 Vegená makó kugulizáini nomiti vegenalite kezáikumú gilikó ititimó nenete kezáini kigikaváini agoka vizikiko lá inogo ive.

4-5 Nenemú lekeza etó etó iki mogonataganatini ánigi vevesalo. Monokú keé lamoko gopa aleaká nouni netalímini genaváa mota gona molokago leza mukító ámina netalímini amelahove etó etó oko loló onounimó nenazo, lekelí hozzámini mogonamú etó etó iki vitágá iki ali utó ilo. Lá ikiko lokogoliza

* **5:17:** Lom 7:15-23

vizeaká gakó utó itimó nene, ve makolímini mogonamú negopa, lekezatini iki miliki itamó nenémo ale utó inogo ive.

⁶ Monó giliaká nia vegená lekeza monó lainim-ilikimiaká nia vegená nene netá matá gona miliki kimilo.

⁷ Lekezatini likigikatini agoka vizemilo. Ómasi agoka vizeakaláa nomive. Ve makó keza hoza alitamó nene miniki ámina netalimini gihiláagó alinigave.

⁸ Makó keza litaha kigikatunú hozaváa alitamó keza miniki litaha kigikámini gihiláa latila nene ali utó inigave. Itó makó keza Sikalahulímini hozava alitamó keza miniki Sikalahulímini gihiláa alévolé kemetameni nene alinigave.

⁹ Netá lamanakumú nene goselekaselé aminake amuza moloko oko moloko itunize. Voko akamitunímó nene Ómasímo mola gamenaló minumuni ale utó inogo une.

¹⁰ Lá onoinazo, nemémú gamenavate noiko vegená mukitoka nasahilí oketatune. Lá noinake monokú ligive lagave nene netá aleko iteko nenémini oketatune.

Kagata alike gekéini loketamó

¹¹ Itínasa nene luhuva gizoaká nogosani nene luhuva gizoaká vémini agizakutí aleko luhuva napámini imane nezáne nigizanitunú nogizumó nene ángalo.

¹² Vegená lugáa keza kugupéinímo monó kemetameni okago lekezatini lukugupeloka Ómasímini anosa minative liki amuza golesa miliaká niave. Keza Kilstó zohota zaló hili gakolímogó lugutó vizitive loko lo utó oko lo kimitunímó nene gopoguni milititatahe liki gelego gena okago, nenémini iaká niave.

¹³ Kugupeló Ómasímini anosa milikimikago nia vegená keza Mosé lo hukoko li gakó lugáa gili alemake lekezagi anosagi miniiki keitoka miní amikiko kezááni kugupenini aliki itinigi giliaká niave.

¹⁴ Nénisi nene nemupe manamupe nugupe aleko iteko lamuve. Guivaníte Izesu Kilstó zohota zaló hilimómámini gakó nene hámakokumú sigaga lomiaká nouve. Izesú zohota zaló hilikumule loko mikasiuka netá matá hulupa loko anuva oaká netató hulumó gelekago goha gala vizemitive. Itó ámina oko monó gelema vegenalite nenikumú gilikago mota helenoumó gelekave.

¹⁵ Lugupeló Ómasímini anosagi minoaká nenehe itó minamoaká nenehe nenémo gihila nomive. Gosohá lemetamenigi minoaká netá hámakó gihiláa neve.

¹⁶ Ámina lakanigú miniki aliki iaká niamoláa lekelitoka Ómasilokatí hulu itó agika lamaná lehizeleketatímó mino-loko iteko minatímó nene Ómasímini vegená mukitoka minino.

¹⁷ Láa loko lo nahuluve: Gopoguni milinitake nipilikago nuhú imane nego neza Izesuni megusava noumó nenémini mogonáa utó oaká noimó nenazo, gakó imane lo nolukumumó nenémini velé amupiló ve makolímo silipa hoza goha nememino.

¹⁸ Nigivénérita, Guivaníte Izesu Kilistotokatí nasahilíimo likigikagú mino-loko voko minino. Lamaná.

Epeso Vegenalitini Luhuva Pauló Gizo Kimimó

Epeso vegená nónohá kimike gizo kimi gakó

1* Neza Paulona Ómasímini gakotó Izesu Kilistoni aposolo loló utímina Epeso numutoka monó gele vegená Izesu Kilistoni monokú alévolé iki mini-aká nia vegená lekeza luhuva netá imane gizo nolukumuve.

2 Ameteho Ómasi itó Guivahanite Izesu Kilistó aitokatí nasahilí itó hulu lekelitoka mino moloko minatize.

Kilistotoka gímizunímómove loko monó lusa haitopaitolímini lehizeletamó

3 Guiyahanite Izesu Kilistoni amelaho Ómasi áisi nene nónohá zeletake okulumakutí monó lusa haitopaitolímini Kilistotoka voko gímizunímómove loko lehizeletamó. Lehizelimikumú geké lotatunize.

4 Áisi nene gozapá ká eláa mikasímini guhaiváa utó onamigo ezáa avogisaló apazá etó iki keké vizikigó minatave loko Kilistotoka miní amitave loko lelémo etó imó. Lá ike, agíka limike,

5 ganatilisi gelekago minakumule loko Izesu Kilistoni nasahilí oletake kelémo lá okugo aí izekipala minatave loko lo hutamó.

6 Eza gipala gihila áisi lapanalagi nasahililágimo hagitana oko lehizeletamó. Nenemú geké lotoko minatune.

7* Izesú eza golanivatunú meinavate hizelimiake gologí oletake golesa netate gilatoletamó. Nenémini nasahililáa lelitoka ohunagi minokave.

8 Nene avevezahaló ohunagú ligikagú luhuvagi itó geleaká gihiláa napa oko leke vizeletamó.

9 Lá ike ezáa agikatunú gele minamómámini asuguná gakó ganatilisi geleake láa loko lo hukoletake ale vesamá okave:

10 Eza gamenamú giliigo minamó nene alitokiko Kilistó nene netá matá mukí okulumakú neha itó mikasiuka neha ale nupa napa nenémini gotoláa loló itive loko lo molamó.

11 Itó netá matá mukí nene Ómasímo ezáa agikatunú giliike lo hukató aleaká noi ve áisi gozapá ganá agata giliike lo hukoletató monó helisa henoni ali alitave loko lelémo etó imó.

12 Nenemú ganá apí oko Kilistokumú lagata losi gelemoko ageva oaká uni vegená leza Ómasímini lapaná ale oteko minatune.

13 Itó lekeza ámina iki gakó gihiláa lukugutó vizi gakó lamaná nene giliake, Kilistokumú gili alévolé ikago, lo moletačtató nene Sikalahú ganatilisi lehize-likimikago Ómasímini anosagi lilí inamóma neve.

14 Okulumakú Ómasímini monó helisa henoni ali lá itave loko gozapá lo huko moletačtómámini zazaváa nene Sikalahú lehizeletamó. Itó aí vegenala zuha lelí meina hizelimiaká hozaváa apí imó nene aleloko voko ale lutiginogo ive. Nenémini mogonáa gele vevesatune loko Sikalahulímini anosagi nominune. Nenemú Ómasímini lapaná ale oteko minatune.

Epeso vegenakumú Ómasiloka limó

15 Nenemú lekeza Guivahani Izesukumú gili alévolé iake monó vegená likigivetikini likigika kimiaká niamómámini gakola gelekukeve loko,

* 1:1: Apo 18:19-21, 19:1 * 1:7: Kolo 1:14

16 lekelikumú Ómasi agepoka loaká noumú nene ahulosá amuve. Leke-likumú láa loko Ómasiloka loaká nouve:

17 Guivahanite Izesu Kilistoni amelaho lapanalímini amelaho Ómasi áisi nene Sikalahú lehizeleketoko likigika alémo vávani okoko Guivahanímini mogonáa lo lekemekiko gili guni iki netá mogonamú gili vevesiki gilitaze.

18 Lá niiki likigika lakagata ale koló okiko, Guivahanímo lekelémo otopá zimómave loko okulumakú gonanalisímú lakagata losi gelemíki ageva iaká nia netakumú gilitave. Itó vegena la zuha lekeza monó helisa henoni asaivagi ali lá itakumú gilitave.

19 Itó leza gele alévolé uhatoka amuza sipisi alévolé helisatunú hoza aleaká noimó nenémimi napavamú gilitave loko Ómasiloka loaká nouve.

20* Ámina alévolé zámuza sipisitunú nene Kilistó hilikutí mómomoká oko alémo oteake okulumakú agizani lamagaloka alémo molokago,

21 kiapege itó gamani itó ve napa itó amuza ve iti minamó haitopaitolímini kei ve uvóipo ahulokimikago mina vegentalitini kugulizá nene lemeko noigo, aí agulizalá mino veletó oko neve. Itó itínasagó nomive. Aliku utó iti gamenaló iteko minanogo ive.

22* Itó Ómasímo netá matá mukí nene Izesuni heumauka mulisi moloke-take ámina netalímini gotóini loló itive loko hize otemiaka vegena la zuha lelitoka alémo molamó.

23 Itó monó guluni vegena la Izesuni agupe makó loló okuko lelitoka gizapa noletago, netá matá mukilímini agikagú mino vaí oko noi vémini agikagú minoko aleko oaká noune.

2

Lemeni heleneikuti lelémo mómomoká imó

1* Lekeza gozapá nene hokolizá pakalizá iki lihimatinigi minikagove liki lekemeni hele vimó minamole.

2 Nene gamenaló nene lekeza mikasímini gapo golesagú nivake, vogalaló zámuzagi netá matalímini gizapa ve golesaló gímiziaké ámegetiaká amó. Aí ametamenímo itína gamena nene Ómasímini gakola pelevesava ziaká a vegena la zuha aleaká noive.

3 Leza gozapá kezagítana oko minunike, litaha ligikámini lagaváá ámegetoko loló oko lugupémini itó geleakalímini gakoláa gele alekunike, vegena lugáá minamó nenéminoko Ómasímini mesahaváámini mututoni loló unímó.

4 Lá oko minuháza, Ómasi áisi nasahilila mukí minokagove loko nasahilí sipisi oletake agika limimó.

5 Lihimategi minunitímo lemeni heleloko vimó nominuko, Kilistogegi lelémo mómomoká okago, otunimó. Gilinahe. Ómasímini nasahilatunú lugutó vizimó.

6 Itó Izesu Kilistotoka lelémo gímizekago ligikáá lemeniatunú áisigi mota okulumakú minoko aleko oaká nounimó gelekave.

7 Nene alika gamenaló utó omo omo iti gamenaló nene agika hize limike Izesu Kilistoni nasahilila ohunagi limimó nene ale vesamá oletanogo lá imó neve.

* **1:20:** Age 110:1 * **1:22:** Age 8:6; Kolo 1:18 * **2:1:** Kolo 2:13

8 Gilinahe. Eza lugutó vizimó nene aí nasahilitunú neve, itó Izesunímú gele alévolé unimómave loko neve. Nene lelí amuzatunú nomive. Ómasímo hagítana lehizeletamó.

9 Nana hoza ale minuko nenémini oletamó neve. Nene ma nomive. Nenemú lugupe aleko iteakaláa nomive.

10 Leza Ómasímini agizani luhuva nouko, ezáa Izesu Kilistotoka miní amunikeve loko mogona lamaná lilí itave loko lelémo utó molamó. Itó neneló lisí lisí iki vitave loko gozapá ámina gapo veleletamóma neve.

Kilistotoka miní amunikumule loko lelémo hamó onoimó

11 Lekeza gozapá hetoka vegená minamó. Itó Zuta vegená keza kugupéító Ómasímini anosagi minamó nenete lekelikumú alikí mumusopa ziki anosagi nomi vegená niave likí liaká amóza, ha kugupémini anosamú linamóma neve.

12 Nene gamenaló lekeza Kilistogegi apiziki minamake otopá ziki minamó neve. Itó Isilae vegená lelí mulusigú minamake, lekeza hanuva gutá minamó neve. Itó Isilae vegená kelémo molokago keza lo múnahi gakó lo moloketamó nene ali minikago, lekeza amegesaloka minamó. Imane mikasiuka nene netá gihilamú ageva gemake Ómasigi minamamóza,

13 nene gamenaló lekeza hotoka gihisigú minakutí itína gamena nene Izesutoka miní ameke Kilistoni golanímo geisa mikú lekelémo molokago imi anitiki niave.

14 Ezáa nene nonagá itave loko lelémo apizeaká ve noive. Itó leza Zuta vegenaki lekeza hetoka vegenaki holutegú logoka hotopotó okago minuhálímini geisa nene aleko tele vizeake lelémo hamokú molamó neve.

15 * Itó Mosé lo hukoko li gakolímini agikagú nene alilo alemilo likí haitopaitó gakó linamó nene ezáa agupe ahulake mukitó ipá oko ale ahulokamóma neve. Lá oake, Zuta vegenaki hetoka vegenaki mulusi losítá lelí holutegú minoko aitoka gímidumímave loko ezáa lelémo gosohá vegená hamokó loló oake minake nonagá ale utó imó.

16 * Eza zohota zaló nohilike, vegená mulisi losítá lelí lovasava oko minunímó nene apele heleake, Ómasigi lelémo mukipa imó.

17 * Lá oake, gihisigú minamó hetoka vegená lekeza itó geisa mikú minumím Zuta vegená leza mukitoka hulúmini gakó lo lemekago gelekune.

18 Lá oake, gapo velelimikago, leza Zuta vegenaki itó lekeza hetoka vegenaki Sikalahú hámakolímo gapo velelimikago, ameteho noitoka vo anitesá neve.

19 Nenemú itínasa gamenaló nene lekeza hanuva hepelaloka gutá ve minamave. Lekezagi monó vegená lugáagi Ómasímini apá amelage noune. Itó Ómasímini vegenala zuha loló oko noune.

20 Aposolo itó Ómasímini agepagutí gakó loaká ve leza lukesava loló oko nouko, nenetini lumupiló hize lé olíkikmíkago miniliki viki niave. Itó Izesu Kilistó nene numuni lapusaváa loló oko noive.

21 Numutó namató vegená Guivahaniloka miní amekuko, aí apazá zagusave utó oloko voko napa oaká noive.

22 Sikalahú nenémo lekezagi ámina oko aitoka lekelémo miní amekago, Ómasímini numuni apá lilí ikago mulutikú minoko aleko oaká noive.

3***Pauló hetoka vegenakumule loko monó hoza alímó***

¹ Itó neza Paulona nenemú hetoka vegená lekelikumule loko Izesu Kilistoni gelekelelzá minuke nagá numukú nouve.

² Lekeza nenikumú nene Ómasímo nasahilatunú oko lekelitoka monó hoza alitane loko lonetonoimóma neve liki gilinave loko gelenouve.

³ Eza asuguná gakó amegezá lo utó moloko lo nimimó neve liki mota gilinave. Ámina netakumú goí oko gakó alínipásí gizo lukumumóma neve.

⁴ * Lekeza ámina gakó gatiki nigiliki neza Izesu Kilistoni asuguná gakó amegezá nene nigikatunú gele vevesoko gelekuke ánigoaká umoláa lekeza gilitave loko vesamá oko ámina luhuva gizo lukumumóma neve.

⁵ Ámina asuguná gakó amegezá nene gozapá miniliki va vegenatoka utó amimóma neve. Apazá aposolo itó Ómasímini agepagutí gakó liaká ve lelitoka alika Sikalahulímo lo utó moloko limimó nene láa loko neve:

⁶ Gakó lamaná lo molamó nenémini gihiláa nene Zuta vegená minamamolaloka itó Zuta vegená lelitoka hámakó avevezahaló mulusi hámakó loló oko mininake Izesu Kilistokumule loko lehizeleketatove loko lo mololeta netá izá moloko alekuko lelí mututoni itive loko lonoimóma neve.

⁷ Itó ámina gakó lamanalímini gelekelelzá loló itane loko Ómasímo nasahilatunú oko aí zámuzañó moloko gele minake nenitoka ale utó molonoimóma neve.

⁸ Monó gele vegená limiki minakutí neza lemeko minumolámina Kilistotokati minumuni gatoko gato asú amoakalímini noimó nenémini gakó lamaná nene Zuta vegená minamamoláa lo utó moloko lo kimitane loko nenémini hoza gakó lonetonoimóma neve.

⁹ Ómasímini asuguná gakó amegezá nenéminoko hozaváa aleko ale asú itove loko agata gili mogona nene neza lo utó molokugo vegená mukitoka gilitave loko lonetonoimóma neve. Nene Ómasí eza netá matá mukí ale utó onoi vémo ámina asuguná gakó amegezá nene ezáa agikagukó halá geloko voko minamó.

¹⁰ Láa loko Ómasímo agikatunú gilimó gihiláa nene Ómasímini vegenala zuha leza itína ale vesamá okuko, Ómasímini gele vevesoakaláa haitopaitolímini nene okulumakú agelóini kugulizaki ve niámó itó amuzáiki ve niámó keza ánigiiki gili guni itave loko halá geloko voko minamó nene,

¹¹ Ómasímo eza gozapá netá matá ale utó onamike agikatunú lo huko mololoko iteko minamó nenémini gihiláa nene Guivahanite Izesu Kilistoni amiselekago ale utó molamó.

¹² Aikumú gele alévolé okuko gapo veleko lovolovo zeletamó nenemú lelegesá legemiko Ómasímini avogisaló vitune.

¹³ Nenemú láa loko lo likimitoze, gililo. Neza lekelikumule loko gasovagi netalímini amupiló nominugoma, likigika lememino. Lekeza nenemú gilikó gonanalisi netatini loló ino.

Kilstó agika limitímini mogona gilitave loko Ómasiloka limó

¹⁴⁻¹⁵ Nenemú nene okulumakú miniliki vamó itó mikasiuka minoloko vunimó mukilitini ameteho gihila aí nalapusa hizeko gupá ze ameko lekelikumú numuna láa loko loaká nouve:

16 Ómasímo eza ohunagi lapanalatunú Sikalahutoka lokago lemeko zámuza ale utó mololikimikiko, likigikatini napa alévolé itive loko,

17 itó Kilistokumú gili alévolé iminatímo eza mulutikú minoko aleko itive loko, itó agika likimitímo luhusatini ale gilitoko lukesalini loló okiko,

18 lekezagi itó monó *gilina* vegená lugáá mukitoka kezagi Kilistó agika limimó nenémo livilege zaká maká oaká noikumú gili guni iki gilitave loko,

19 itó Kilistó agika limimó nenémini mogonáá nenémo vegenalita geleaká nene avilege zaká maká oko nemó nenemú hanuva gili guni ikiko, Ómasímini agikagú laga netá vaí oko noimó nene lekezatini likigikagú vaí oko minative loko Ómasiloka loaká nouve.

20 Ómasi eza ligikagú hoza aleaká noi zámuzalatunú eza oko moloko oaká noitímo loká oaká nouni netá itó lagata geleaká nouni netá avilege zaká maká oko golivagi netá loló iti vémini luhuva hutilí ino.

21 Ái vegenala zuhalita oko moloko itunimó itó Izesu Kilistó oko moloko noimó nenémo Ómasi geké lotatunimó nene omolelé amalelé oko lagapilamotoka minoloko iteko minino. Lamaná.

4

Sikalahlímo lelémo hamó ikú minatune

1 Neza Guivahanimule loko nagá numukú noutímina lakagata aleko lo likimitoze. Ómasímo iteko mina netató sele lo likimimó nenémini sisihetokó miniki aliki ilo.

2* Lá niiki likigika aliliki limiki mulutikú geha ziko hulugú miniki goselé likipiliti netá alilikitatakumú goselé lekepelemiko legesó iki likigika kimiki minalo.

3 Itó hulúmini nagalatunú múnaheleketamóma neve. Nenemú ámina nagá hukikataze, eza gizapa otiko eza gizapa otiko iki Sikalahulímo lekelémo hamó ikú nene minalo.

4 Ómasímo okulumakú helisa henoni hámakokumú lakagata losi gelemiki ageva iki minatave loko sele lo lekemeneimómáminoko mulusi hámakó nouhá itó Sikalahú hámakó neve.

5 Guivahani hámakó noive, itó monó hámakokumú gele alévolé oaká nouhá, itó monó nagamí hámakó holoaká noune.

6 Itó mukító ameteho Ómasi hámakó noive. Áisi monéna mukitoka livilege zaká maká oko noive. Itó etó etó oko zámuza limike hize lé olimikago aí hozaváá aleaká noune. Itó eza mulutegú etó etó oko minoko aleko oaká noive.

7 Kilistó eza lehizeleta polosava monolímini zámuza etó etó oko ale minoaká noune.

8* Nenemú nene monó gotolaú luhuva gakó makó láá loko neve: Eza veletoka mezane noitiķe nagá numukú minamoláá kigizató alike kelémo otímó neve. Itó monolímini zámuzala nene vegená lehizeletamóma neve.

9 Veletoka itímó nenémini mogonáá lá oko neitive. Eza mikasi agikagú lemeneikutí atiginá oko itímó.

10 Itó ámina limi ve nenémo atiginá oko okulumá avilegemo avilegemo itímó nene aí ametamenímo okulumakuki itó mikasiguki mino gíki oko minative loko iti ve noive.

11 Itó monolímini zámuza lehizeletamó nene vegená lugáa nene aposolo lelémo molamóma neve. Itó lugáa nene Ómasímini agepagutí gakó liaká ve itó lugáa nene Izesuni gakó lamaná li hutili iaká ve itó lugáa pastoli ve itó monótisa,

12 keza monó gilina gevená mukitoka kelémo vatí ikiko keza monolímini gelekelelápia minatave loko itó Kilistoni mulusi leza monokú voko napa itune loko vegená nenéminoko lelémo molamóma neve.

13 Lá oká lá oká oko hozaváa aluko gele alévolé oakate itó Ómasímini gipalámini mogonáa geleakate nene hutili iko ligika hámakó miniko monokú alévolé oko Kilistoni ametamenigitana ale luhokinake napa oloko ititune loko ámina zámuza lehizeletonimoáma neve.

14 Itó lá okiko leza namuni molokoko minaminake amuza moloko nouko logoka viziaiká ve keza soza sazagi lí limikiko, soza saza gákóinímini hepelaámo lelémo móromoká okiko nenenó gímizitupe nenenó gímizitupe lokatunize.

15 Leza ligika kemeko gakó gihiláa loloko vinake matute loló oko noi ve Kilistotoka gímizekinake alévolé itune.

16* Aitoka miní amekuko amelaho vémo munahe lamaná olimikiko apize lamaná oko mininake aí agupémimi gelekelela mininake agisa agizani loló itunize. Lá noinake zámuza limi avotigí alenounimó nenenó moloko lamaná oko hozaváa alinake ligika kemeakalímini nasahilikú napa oloko vitunize.

Litaha lemetameni ahulokinake gosohá lemetameni ale luhatune

17 Nenemú neza Guivahanímini avogisaló lakagata aleko lo likimitoze, gilio. Hetoka vegená lugáa keza kagata giliaká niámó nene ha netakumukó giliaká niave. Keikitana iki miniki aliki amilo.

18 Keza nene kigika kagata koló amigo negi nagí hiziki kigika hize lí okago niakumú Ómasilokatí alévolé kemetameni alita netá kemegesa amikave.

19 Itó kigikáini hize lí okago netá golesamú kovoza ma helesá amigo, mokoló netalímini agikagú niáke, golotuva netá haitopaitolíminimú kumu helekago goselé kepelemigo lilí iaká niave.

20 Lekelisi nenéminiki minatave loko Kilistoni mogona lo lekemesá amuháma neve.

21 Aí mogonáa lo lekemenouháma neve. Itó Kilistotoka viki gímizikago aitokatí gakó gihiláa lainim-oleketuko gilinamóma neve.

22* Litaha lekemetamenigi miniki aliki iaká ago itó lukumu hilimó nenémo soza lokoko lokogoka vizekego lapuluva oaká imó nenazo, ámina litaha likigikama gololohá ilo.

23 Itó likigika lakagata alémo gosohá lilí ikiko minino.

24* Ómasímo gosohá lekemetameni ale utó imó nene ezáa ametamenigi miniiki hee hee loko minoaká itó etó oko keké vizeko minoaká netá ali utó milata lekemetameni nene ali luhalo.

25* Nenemú lekeza soza saza ahulalo. Leza apize lamaná unike aí nagá loló okuháma nenazo, nenemú gakó lamanakó eza lo amiko eza lo amiko iki minalo.

26* Mesahagú miniki lihima alikataze. Mesaha oká likizapaló moloká iki nikó ho nene lémemino.

27 Lá itamó nene Satani nene gahe sigitaminigave.

28 Gumina aliaká a vegenalita ámina netá ahuliiki likigizanitunú hozaváaamuza miliki aliiki nosánetatini henokanotini ali utó miliki vegená ámemena nasahilí okekatune liki ámina zámuzagi minalo.

29 Ulínaka gakó lekegepagutí makó lamilo. Gakotini gilita vegená kelémo lamaná itune liki gakó lamanakó liki eza hize lé otiko eza hize lé otiko oaká gapomú vitagá ilo.

30 Ómasímini Sikalahú nene nemú manamú liki ahelukalú amilo. Ái nene gamena napaló nene asele zeletatimó nenémini zazaváa minative loko lehizeletonoimóma neve.

31 Ekesá gakó mesaha gakó mukahá gakó itó vivi vovoga aleko letovo oaká gakó nuvane giliki gili ahulalo. Itó lova likigika amino. Itó likizapaló molamino.

32* Lekeza likigika geha ziko likigika eza amiko eza amiko iki apizi lamaná iki minalo. Ómasímo Kilistokumule loko lihimavatini ahuloleketamómáminiki eza lihimavala ahulotiko eza lihimavala ahulotiko iki minalo.

5

Lapanalímini luhuva loló inake nenémini avevezahaló minatune

1 Lekeza Ómasímini izegipa gihila minatita ái avevezahaló minalo.

2* Lá niiki likigika kemeakalímini agikagú miniki aliki ilo. Kilistó eza ámina oko agika limike lelikumule loko agupéa latila imó nene Ómasi guguni gizo amigo Ómasímo anuva giligo lamaná imó neve.

3 Lekeza monó vegená nianazo, mokoló netá itó musi netá itó mulutikú nihunihu nene lekelí holutikú utó amino.

4 Itó ulínaka negi gakó giza zohí gakó golesa litamó nene etaminogo inazo, ámina netá ahuliiki Ómasi agepoka liki minalo.

5 Lekeza láa liki gili alévolé iki gili minalo: Mokoló vehe itó musi netató vehe itó mulúkú nihunihuló ve mulutikú nihunihu nenémo soza ómai netá ámegetoakaláa geleneimó nenazo, ve nenémináa keza Kilistoni itó Ómasímini avogisaló miniki aliki ita netakumú nene vitagá itamóza, ma aleminigave.

6 Golesa netá nenémináamú nene Ómasi gili amema vegenatoka Ómasímini mesaha utó inogo inazo, lokogoka viziki lekelitoka soza saza gakó li likimikikoma, giliko gihiláa loló amino.

7 Nenemú lekeza vegená nenémináagi mini apiziki minamilo.

8 Lekeza gozapá límugusígú minamóma nemóza, itína nene Guivahaniloka gímiziakelapanatinigi lilí iake niave. Nenemú lapanalímini luhuvaváa lilí iiki nenémini avevezahaló minalo.

9 Lapanalímini gihiláa lá oko utó oaká noive: Ligika lamanaki minoaká itó hee loko minoaká itó gakó gihila loaká,

10 nene netá matá oko moloko itune loko Guivahanímo giliko lamaná iti netakumukó vitagá ilo.

11 Lugáate límugusímini netala itó hutuváa lilí nikoma kezagi mini apiziki minamilo. Lekeza ámina netá golesáini nene ali hanatalo.

12 Netá asugunatoka aliaká niámó nene lovoza heleaká netá nenazo, nene gakó lamitune.

13 Netá nenémináa ale hanatokuko, lapanalímo hize hanatokiko, utó o lamaná inogo ive.

14 Itó utó oaká netá nenémináámo nene lapanaki loló itimó neve. Nenemú monó gakó makó láa loko nemóma neve:

Lokovó akina ve lekeza otilo.

Itó hilinita ve lekeza mómoká iki otilo.

Kilistó nene hize hanatoleketanogo ive
liki luhuva gizinamóma neve.

15 Nenemú lekeza miniki aliki itatoka nene gizapa etoha iki minalo. Itó negi nagi hiziki minamiki gili vevesiki minalo.

16 * Itína gamena nene golesa netalímo hutilí onoinazo, nenemú netá lamaná aleaká gamena utó olíkimitímó nene ma likivilegemino. Gamena ha okatize.

17 Negi nagi netá lilí iki minamiki, Guivahanímo lititoka molatitoka iti gapomú vitagá ilo.

18 Piá nagamikumú lekemeni zemilo. Nenémo nene likigikatini ale gopa okatize. Ómasímini Sikalahú nene likigikagú mino vai ino.

19 * Ómasí agepoka lili iki ipá apá nama itó monó nama itó Sikalahulímo lekelémo vávani iko gosohá nama eza lo amiko eza lo amiko iki likigikagú Guivahani agepoka li amiki nama liki lokogoliza vízí vízí iki minalo.

20 Lá niiki Guivahanite Izesu Kilistoni agulizá iki mukí netakumú gamena gamena Ómasí ametehini agepoka lili iki minalo.

Ve aleve iki miliki ita gakó

21 Lekeza Kilistoni goliva gilitiki eza gelekelé otiko eza gelekelé otiko ilo.

22 * Vená lekeza vatinitini kagahaisiuka niminiki Guivahanímini agahaisiuka niminamó loló ino.

23 Kilistó eza vegenala zuhatini gotóini minake ale nupa oko gizapa olimiaká noive. Agisa agizani agupéa leza nene nouko eza lugutó vizeaká ve noive. Vená keza ámina iki váinitini kiginaló niave.

24 Nenemú Ómasímini vegenala zuhate Kilistoni aginaló niamó ámináminiki venatini nenete minimi limiki váinitini kagahaisiuka minataze.

25 * Ve lekeza venatini nene likigika kimitamó nene Kilistó monó gele gevenakumule loko agika limike agupe latila ike hilimómáminiki likigika kimilo.

26 Kilistó lá imó nene vegenala zuha kelémo etó okiko golotuva netá keitoka minokative loko itó monó gakolatunú nagamí zekoko lusa gekiko

27 ezáaloka ale akolotake likigika gizopa lo minikogó lihimá nomimó etó ikigó minatave loko hilimó neve.

28 Itó ve lekeza lekezatini lukugupemú miluma giliaká niamó ámináminiki venatinimú milumáimi giliiki likigika kimilo. Lekelikutí makolímohe makolímohe venalamú miluma geleko agika amitímó nene ezáa agupemú nene miluma giliti netá loló inogo ive. Ve makolite kugupenini mukahá apilisá amave.

29-30 Leza lugueva gizapa lamaná otunike nosánetá amekogó minoaká noune. Leza Kilistoni agupe agisa agizani nekisáa nounimómave loko ái vegenala zuha ámináminoko gizapa olimiaká noive.

* **5:16:** Kolo 4:5

* **5:19:** Kolo 3:16-17

* **5:22:** Kolo 3:18; 1 Pit 3:1

* **5:25:** Kolo 3:19; 1 Pit 3:7

31 * Nenemú monó gotolaú gakó makó lá oko neve: Ve makolímohe makolímohe izolahiko amelahiko ahulokimioko venalaloka voko gímizekiko keza kugupe kigika mili hámakó iki minatáive.

32 Itó ámina gakó amegezá halá ge minamó nene Kilistó itó vegenala zuhaloka voko alekative loko noluve.

33 Nenemú ve lekeza mukító nene lukugupelinimú giliaká niamó ámináminiki venatinimú giliki likigika kimilo. Itó vená lekeza mukító nene vatiní kugulizáini ali otíki kilími napa ilo.

6

Izegipagi izóike améike iki miliki ita gakó

1* Mohó gipa lekeza Guivahanimule liki izotikini ametikini gelekelé ikitiki kei gakóini gili alilo. Nenemo nene lekelí gapo loló onoive.

2* Geza izokahiko amekahiko kugulizá ale otezo loko li gakolímo gapo lota gakokutí nene ámina gakotó ganá miní ameko lo moletamómági neve. Láa loko lo moletamómá neve:

3 Lá itanímó nene mikasigú mino lamaná oko gamena háná mino-loko voko minanogo ane, loko lonoimómá neve.

4* Itó izóikita améikita lekeza nene mohotini izegipatini keza kizapaló molati netá lilí ikitamilo. Guivahanímíni monokú kagata alikí kilími hee hee liki gakó gilitave liki kagavutó zilo. Lá iki gizapa nikitiko monó gapogú viki napa itaze.

Gelekelé vegenaki kugulizaki vegi iki miliki ita gakó

5 * Gelekelé izegipa lekeza mikasiuka kugulizaki velini gelekelé ikitiki gakóini gili alíiki likigika lamaná ominiko lá ikitalo. Lá niükoma Kilistoni gelekelé nitamó nene gilinogo ive. Itó keikumú giliko gena noikoma legesó iki miniki gakóini gilio.

6 Lekeza nene kugulizaki velini lukugupe lekememi kimiikki gelekelé nikitiko hanuva lelí ánigi lamaná itave likigopa, leza Kilistoni gelekelé nenémínáa minatune liiki Ómasímo lititoka molatitoka iki lá ilo.

7 Vegenakumú hoza nalune likigopa, Guivahanímú nalune liiki mulutikú lamaná giliiki hoza goselekaselé amíki alilo.

8 Lá niiki gelekelé izegipa niamó itó kugulizaki ve lilí iki niamó keza mogona lamaná lilí iki minatamó nene, Guivahanímó nenémíni helegáa ámináminoko meinaváa kiminogo ive liki gili minalo.

9 * Itó lukugulizaki ve lekeza gelekelé izegipatini nene ámina iki kilími lamaná iiki gamuni iki ahulikitalo. Lá niiki láa liki gilio: Gelekelé izegipatini iki lekezagí nene okulumakú Guivahani ametipo hamokó noive. Eza itiki minamó limiki minamó mukikumú gilio hamó lelegitokó niave.

Ómasilokatí gimisi magé lova netá ale ligizakú molatune

10 Lo asú oko litoze. Guivahniloka viki gímiziiki aí zámuza napa lekelitoka neiko nenémíni agikagú miniliki viki alévolé ilo.

11 Satá nene asugunatoka logoka vizeaká suni alinogo noiko nene helisa alíiki nitatotí nene amisele ahulatune liki Ómasilokatí gimisi magé lova netá ale likigizakú miliiki gizapa iki minalo.

* **5:31:** Apí 2:24 * **6:1:** Kolo 3:20 * **6:2:** Gá 20:12; Gapo 5:16 * **6:4:** Kolo 3:21 * **6:5:** Kolo 3:22-25 * **6:9:** Kolo 4:1

12 Leza hanuva lugupegi vegenači lovasava osá amune. Kugulizaki ve napa itó guivahani alévoletáa imane límugusi gamenaló gizapa ve niámó kugupe nomimó ánígamoaikalímini golesa netá okulumá sepenauka niámó kéisí lova ali limiaká niave.

13 Lá niámó nenazo, nenemú lekeza Ómasilokatí gimisi magé lova netá ali asú iki miniiki lova golesaló amuza miliki niko gala ve keza iki loú niiki vikiko lova hizi asú itató nene lekeza áminaló alévolé iki minanigave.

14* Lekeza lá iki otíiki minatave loko noluve: Gakó giháláa getelini loló noiko, Ómasímini avogisaló lihimatini asú olikimikago minatamó nenémo apitiniló geha sioti loló okiko ali luhiiki minalo.

15* Hulúmini gakó lamaná ali guni iki ali minatamó nenémo likigisa suú loló okiko lisi gikitíiki minalo.

16 Lá niiki izolahináa napa nene Ómasimú gele alévolé atímo lagelini loló okiko, gamena gamena likiginagú miliiki niko, golesa netalímini amelahóa gimisivagutí magelámo satokiko magelímini loláa lihatize.

17* Lá noiko, aenitunú akilitini agulizaláa lekelémo lukugutó vizeaká netá nene ali hitiiki Sikalahutokatí Ómasímini gakó nenémo sopolo hánalini loló okiko ali minalo.

18 Lekeza gamena gamena Sikalahulímo lekegepa ale vávani noiko Ómasiloka miní ami amiki liki voká liki minalo. Itó zogozogo vizemíki goselé lekepelemiko gizapa iki minalo. Lá niiki monó gele vegenači mukitoka keikumú numuna hoza alilo.

19 Lá niiki nenikumú nene Guivahanímo negepáne ale vávani okiko Izesuni gakó lamaná góí oko asuguná oko minamó nene negepa atilinake vávani oko lo utó molative liki lekeza numuna lilo.

20 Neza ámina gakó lamanakumule loko gakó lo utó utó ve nagá numukú noutímima Ómasímo lonetatíminoko nelegesá legemiko lo utó molative liki nenikumú Ómasiloka lilo.

Gekéini loketamó

21* Minoko aleko noumó nenémini mogonáa itó hozaváa aleaká noumó nenemú gilitave loko Tikikó nene voko gakó lo likiminogo ive. Eza ligiviteho gihila Guivahanímini gelekelé izegipala hozagú alévolé oko mina ve

22* áisi lelí gakoláate lo lekemeko mulutikú ale lamaná itive loko amiselekugo núane novive.

23 Ómasí ameteho itó Guivahaní Izesu Kilistó áisi nigive nagave hulu ale utó mololeketoko gele alévolé oakatini ale hutíli olikimikiko likigika eza amiko eza amiko iki minatave loko noluve.

24 Guivahanite Izesu Kilistotoka gímizi lamaná iki likigika amiaká nia vegenači lekelitoka Ómasímini nasahilí nenémo mino moloko minino.

Pilipi Vegenalitini Luhuva Pauló Gizo Kimimó

Pilipi vegená nónohá kimike gizo kimi gakó

1* Neza Paulona itó Timotiki makó nousike Izesu Kilistoni gelekelelá leza Pilipi numutoka vegená Izesu Kilistokumú gili alévolé iake Ómasímini vegenala zuha lilí ina vegená itó pastoligi itó monolímini gelekelé vegi lekelí pepa imane luhuva gizo nolukumuve.

2 Ómasi ameteho itó Guivahani Izesu Kilistó aitokatí nasahilí itó hulu lekelitoka minoloko voko minino.

Pilipi vegenakumú Ómasiloka limó

3 Neza lekelikumú gele-loko novuke Ómasine agepoka loaká nouve.

4-5 Lekeza Izesuni gakó lamaná ganá apí iki giliake áminasító monó hoza aleloko vutó itó itínasa nalutó nene nilími vatí iaká niakumú guluke lekelikumú Ómasiloka loaká noumó nene mulúnegú lamaná geleko Guivahani agepoka lomiaká nouve.

6 Itó hozaváa lamaná likigikagú apí i ve Ómasímo aleloko voko ale nolutigiko Izesu Kilistó anititi gamenaváa alitanogo ive loko gele seketigí oko nene gelenouve.

7 Neza imaneloka nagá numukú nougo itó gakó lamanakumule loko gakó hoza aleko hize lé oko nalugo lekezagi nezagi Ómasímini nasahilí izá moloko ale minoaká nounikumú lekeza nigikagú minamóma nenazo, neza lekelí mukikumú nagata gele lekemeaká noumó nene lamaná onoise.

8 Izesu Kilistó eza agika lemeaká noimómámini agikagú minuke neza lekelikumú milumavatini geleká noumó nene Ómasímo giligo lamaná noluve.

9 Itó likigika kimitatímo itó netá mogonamú gelekatinímo itó giliki ali guni iakatinímo napa oloko vitive loko numuna loaká nouve.

10 Itó lá okiko netá gohaláa ángiki miliki ikiko Izesu Kilistó anititi gamenaló likigika gizopa lo miniko lihima nomitimó miniki

11 Izesu Kilistoni ali gikitiki aliniko áisi nene hize lé oleketiko, hehe liki minatamó nenémini gihiláa itó minumunáa ali utó milikiko Ómasímini luhuva lapanala utó o lamaná oko minative loko Ómasiloka loaká nouve.

Kilistó nenémo minoko alekóné loló okave

12 Nigivénégitá, gili gopa ikatave loko lo likimitoze. Neza netá golesa utó o nimímo nenémo Izesuni gakó lamanalímini gapo hize lí itigopa, vo guni oko vo alitive loko utó imóma neve.

13* Neza Kilistokumule loko nagá numukú nou gakolímo imaneloka agulizaki ve napámíni pilisi ve itó vegená lugáa keí kagataló holo asú onoise.

14 Itó nagá numukú noumómove liki imanelokatí ligive lagave lugáa keza Guivahanímú giliake vávani ake Ómasímini gakó kelegesá legemigo li utó iaká niave.

15-17 Lugáa Kilistoni monoláa nene eza avilegekago eza avilegekago iki liaká niave. Keza sozagi pevisá ziki nené nemekugú niake kezáini kugulizáini alilikí itinigi Kilistoni agulizá liaká niámó nene nagá numukú nominumómámini amupiló miluma hoza niminigi lá iaká niave. Itó lugáa

* 1:1: Apo 16:12 * 1:13: Apo 28:30

nenete mulúikú lamaná giliki aí gakó liaká niave. Keza nene Ómasímo imaneloka minoko Izesuni gakó lamaná hize lé itane loko loake nelémo molamó neve liki giliake kigika nimiake lá iaká niave.

¹⁸ Itó némini manáminoko monó nene soza kigikagutí itimoki itó kigika lamanakutí ali miliki litamó nenemú lova sava amitune. Hanuva Kilistoni gakolámo hutíl oaká noikumú mulúnegú lamaná noguluve.

¹⁹ Itó lekeza nenikumú numuna liaká hoza alikiko itó Izesu Kilistoni Sikalahulímo nelémo vatí iko nagá numukutí gologí initatave. Mulúnegú láa loko gelekuke lamaná gelekogó minanogo uve.

²⁰ Itó minoakakumupe itó heleakakumupe nigika vávani ominiko nugupe nigikagi Kilistoni lehizemikugo nenémo guhekaheláa loló itive loko oloko voko minumóma neve. Itó lá oloko voko minatove loko novoza heleaká netá nene ma ale utó molaminake gele lamaná okoko nigikatunú nagata losi gelemoko ageva oko minanogo uve.

²¹ Kilistó nenémo minoko aleko netáne loló okave. Itó heleaká nenémo iteko mina netá ale utó molonetanogo ive.

²² Itó mikasiuka miní ameko minatomó nenémo není hozámini gihiláa goha ale utó molanogo ive. Nenemú nana netakumú vávani itohe lokuke nagatagú losi pasi onioive.

²³ Neza makokumupe makokumupe niviseaká noive. Mikasi ahulokinake Kilistoni ale utó molokinake áisigi minoakakumú laga nivisekago nenémo nene netá iteko neve.

²⁴ Itó lekeza siheleni minikatave loko lekelikumule loko mikasiuka goha miní ameko minokugo lamaná itize.

²⁵ Itó nenemú nene gele seketigí oko gelenoumó nenazo, neza heleminake lekezagí mininake lekelémo vatí ugo lekelí gele alévolé oakatini itó mulutikú agila guluma noimó nenémo napa oloko vitize.

²⁶ Itó lekelitoka goha voko minugo nenikumule liki Izesu Kilistoni geké limiaká niatita gohagi miní amiki geké litatave loko gelenouve.

²⁷ Lá onoimóza, likigika mili hamó iiki múnahiki miniki gakola lamanalámini hozaváa alévolé iki naliko gihiláa ali utó nimiliko lekelitoka vinake ánígatove, itó hotó mininake gakotinía gilitove loko lekeza iki miliki itamó nenémo Kilistoni gakó lamaná nenémini avevezahaló minino.

²⁸ Gala velinimú lekelegesá ma legemiko alévolé iki miniki zámuzatini golosasa gemino. Ómasímo ámina anosa kelepizekiko keza simá noakalímini mogona ali utó inigave. Itó Ómasímo lukugutó vizitimó nenémini mogona ali utó inigave.

²⁹ Lekeza Kilistokumú gili alévolé itave lokogó nomive. Aikumule liki miluma maluma netalímini amupiló minatave loko monéna gele lekemeneimóma neve.

³⁰ * Itó neza monokumule loko lovagú alévolé hoza gozapá nalugo áníginamóma neve. Itó itínasa nene nalugo gakóné giliaká niave. Itó monokumule liki ámina lovagú alévolé hoza lekezagí áminámini iki aliaká niave.

2

Kilistó ezáa agupe aleloko lemekago Ómasímo alémo oti gakó

* **1:30:** Apo 16:19-40

¹ Lekeza Kilstotoka miní amekumule loko lekelémo munahekago miniaká itó likigika kimiakeve liki hulu iki miniaká itó Sikalahugegi apiziki miniaká itó mulutikú hizigo miluma giliaká netá mukí lekelitoka nehe.

² Nekoma, mulúnegú lamaná iteko geleko minatane liki geleakatini ali nupa ino. Lá niiki likigika kimiaká itó likigika lakagata munaheaká nene hamó lelegító iteko minino.

³ Lekezatinimukó giliki lukugupe alimi iti iti netá matá makó alemilo. Lekeza likigikáa aliliki limiki miliiki likigive lakagavemú gilikó itino.

⁴ Itó makolímohe makolímohe ezáa hoza lamaná itive loko gelemoko agive lugáagi lamaná itave loko gilino.

⁵ Izesu Kilstó eza lá oko geleaká imoláa ámina oko lekelitoka minino.

⁶ Eza Ómasímini ametamenigi minoko aleko oko minamóza, Ómasigi lelegí oko nousitotí nanamú ahulatove loko lamike ale gikitamike,

⁷ eza gonanaliváa ahuloake gelekelé ametameni ale luhoake, vegená lemetamenigi utó imóma neve.

⁸ Oko molokoa nene vegená lelí avevezaha oko moloko noikeyezaa agikáa aleloko limike moloake, Ómasímo litokó ámegé ámegé ike heleaká netá ale alitamó nene lovoza heleakalímini itó mulizapa oakalímini geheake zohota zaló heleneimóma neve.

⁹ Lá imóma loko amelaho Ómasímo alémo ká mezaneló agulizaki ve sipisi alémo loló okago, aí agulizá nenémo iteko minokiko vegená lugulizá lemeko minative loko lotonoimóma nene,

¹⁰* okulumakú itó mikasiuka itó mikasiuka minamoláa keza mukító Izesuni agulizá iki kalapusa hiziki agepoka litave loko,

¹¹ itó kegepagutí kegepagutí nene Izesu Kilstó eza Guivahani noive liki li gululutiki litamó nenémo iteko miniko Ómasi amelahini lapaná utó itive loko lotonoimóma neve.

Sata netató nia vegená hize hanatoketatune

¹² Nenémú nigika lekemenou izegipa páne, lekeza gamena gamena gakóne gili alekalímini minamó nenéminiki miní amiki minalo.

¹³ Ómasi ezáa nene likigikagú hozaváa nalike ezáa lititoka molatitoka nikó alévolé oaká zámuza itó gihiláa ali utó miliaká zámuza lehizelikimiaká noinazo, lekezagí nougogó negopa, hotó nougogi nene lukugutó vizimó nenémini gihila ale utó itune liki gopa okatune liki Ómasimú goliva giliaká ininá iki amuza milalo.

¹⁴ Lekeza netá mukí naliki gulu-guluga liká pelevesava ziká amilo.

¹⁵ Lá niiko, lihima nomimó likigikagú gololó o minatimó minataze. Lá niiki vegená mulusi ali zová zavá ziki itó ali golesa palasa iaká nia vegenalitini límugusí kigilikagú nene lekeza Ómasímini mohola gipala likigika lamanakigó lílikí iki miníkí sonohí nenéminiki hizi hanatataze.

¹⁶ Lá niiki, Kilstó anitekiko nene lekelikumule loko oko moloko umó itó hozaváa gena oko alumó nene hanuvamú nomimó nenémini mogona utó okiko nogoliza vizeko mulúnegú lamaná gilitove loko hizi hanatiki alévolé kemetamenigi minoakalímini gakó ali utó mili kimiki minalo.

¹⁷ Gili alévolé iakatinímo Ómasiloka guguni gizoaká netakitana nego, nenémini amupiló nipili nihilikó golaníne lekitomó nenémo Ómasi gizo

* ^{2:10:} Isa 45:23

amumó gelekiko nenemuki lokogoliza viziki lekezagi mulutikú lamaná nigilikó nezagí lamaná gilinogo uve.

¹⁸ Itó lekeza ámina iki lokogoliza viziki lekezagi nezagí mulutegú gilitune loko noluve.

Timotiko Epapolotaetasiko

¹⁹ Guivahani Izesú gelekiko, vatí okikoma, Timotini litá oko lekelitoka amiselekugo voko lekelí gakó makó ale atiginá oko lo nemekiko gelekinake mulúnegú lamaná gilitove loko noluve.

²⁰ Ve nenémináa aikitana makó imaneloka niamave. Áisi lamaná lekelikumú gilike agikatunú hize lé olikimiaká noive.

²¹ Ve lugáá kezánimukó giliki Izesu Kilistoni hozaváamú ma gilisá amamóza,

²² Timotí nene minoko aleko oaká noimó nenémini mogona lamaná nego mota gilinave. Gipa makolímo amelahini alémo vatí oaká noimó nenémini oko eza Izesuni gakó lamanalímíni hozaváamú nelémo vatí oaká imó neve.

²³ Itó nenitoka netá néminoko manáminoko utó itikumú nene gele guni okinake aí nene litá oko lekelitoka amiselekugo vitive loko gelenouve.

²⁴ Lá okiko, Guivanáimo gele nemekikoma, nezánegi mino háná aminake lekelitoka vinogo nene gelenouve.

²⁵ Neza netá makokumú vitagá oko nougo, lekeza Epapolotaetasini amisi likago ake nelémo kii like nelémo vatí oaká ve itó monokú ve galaváá nigivénehini loló oko minoaká noimó nene nagata nogulumó nene goha ale atiginá oleketatove loko noluve.

²⁶ Eza avisekago nenémini gakó gilinamóma neve. Eza lekelikumú miluma geleake avisi netakumú giliki mulutini itekative loko lekelikumú giligo gena noigo noluve.

²⁷ Itó netá avisekago helesakosá imóza, Ómasímo agika hize amimó nene aikó nomive. Nenitoka mulúne gitihiná imó nenémini amupiló miní amekative loko eza agika hize nimike alémo zokamó.

²⁸ Nenémú lekeza aí ánigiiki mulutikú lamaná gilitave loko itó neza ámina oko gulugo gena amiko minatove loko ale gikitamuke itínasa nene vávani oko amiselekugo núane novive.

²⁹⁻³⁰ Eza Kilistoni hozaváamule loko helesakosá ikutí nene lekeza hotó minake nilími vatí amisá niago gelekelé onetatove loko agupéa latila itikumú giligo gena amimó nenazo, nenémú mulutikú lamaná giliki Guivaniloka voko gimizi ve noive liki alími lamaná ilo. Lekeza ve nenémináa mukí kilími napa iki nasahilí ikitalo.

3

Ómasímini agovisaló hee loko minoaká gihiláa

¹ Nigivénegita, gakó makó láa loko lo asú inogo uve: Guivaniloka gímiziki niatímo mulutikú lamaná giliki minalo. Ámina gakó gohegeva gizoko goha lo likimitove loko gulumó nene gena amive, itó lekelitoka nene mino moloko minoko ale gikitoleketatove.

² Lekeza gala kemetameki vegenakumú gizapa iki minalo. Keza netá golesa galasa aliki Ómasímini anosa kugupenító nomulupe liki kugupenini gopa hukiaká nia vegenakumú gizapa iki minalo.

3 Sikalahulímo hize lé olimikago, Ómasi gupá ze ameaká nounimó itó Izesu Kilistotoka gímizekunike logoliza vizeaká nounimó leza lugupetunú oko moloko uni netató ma leheta osá amuhá vegená nene Ómasímini izegipala gihila noure. Kéisi negopa lezatete Ómasímini anosagi minoaká gihiláa alenoune.

4 Ómasímo nugutó vizitive loko nezáne nugupetunú oko moloko u netató leheta oko minatove loko hanuva leheta oko minuline. Itó ve lugáa keza kugupelokó leheta iaká alina nene, neza ámina itove loko aleloko iteko kivilegeko leheta uline.

5 * Lá okomú noluve: Neza utó okuke nougo, gamena 8 oko vokago, nugupéneló Ómasímini anosa milamóma neve. Neza Isilae vetini mulusigutí Pezamini agapilamola neza Zuta ve gihila utó umóma neve. Mosé lo hukoko li gakolímini gelekeleláp Palisaio monó ve loló oko minumó.

6 * Zuta vetini monokumúamuza golesa muluke Izesuni vegenala zuha lova ale kemeaká umóma neve. Mosé lo huka gakó geleko ámegetugo vegená lugáate lihimánemú vitagá amó nomive.

7 Lá onoimóza, neza gozapá netá ale minumó nenemú gulugo gihiláa loló oko minamóza, alika nene Kilistokumule loko ámina netakumú gulugo ha netá loló imó.

8 Itó nenegó nomive. Neza Guivahaníne Izesu Kilistoni mogonataganá ánígoko gulumó nenémíni meinaváa itekago, netá lugáa mukitoka nene lamaná gulugo ha netá loló okave. Neza Kilistoni ale lá itove loko aikumule loko netá matáne mukí ánígugo, hutuváa loló okago, vo tolova o asú okave.

9 Neza aitoka gímizekuke minuke, Mosé lo hukoko li gakó gele alekuve, nezáneamuza moloko Ómasímini agovisaló hee loko minosá amuve. Kilistokumú gele alévolé okuke Ómasímini agovisaló lihimáne asú onimikago minoaká nenemú nivisekago gele alévolé oakalímini lolóoko minatove loko Ómasímo lihimánemú giligo asú itímini agikagukó minoko aleko oaká nouve.

10 Itó neza Kilistoni mogonáa gele guni itove loko itó eza galegutí oteakalímini zámuza nenitoka utó itive loko itó eza miluma gilitó miní ameko nezagí gilitove loko hilinogo igo iki miliki ita mogona alitove loko,

11 itó lá okinake voko heleneitokutí oteaká netá ale utó itohe loko geleaká nouve.

Anosa ánígo hehe lonouke ololu loaká nouve

12 Neza ámina netá mota ale lutegekuve loko losá amuve. Itó nigikáne gizopa vové avé lokogó neve loko losá amuve. Hanuva Izesu Kilistó nelémo lá imómave loko aitokatí ámina gonanalisi netá alitove loko amuza moloko nouve.

13 Nigivénérita, nezánemú gulumó nene ámina gonanalisi lamanáma mota alekuve loko lamuve. Imanémigó oaká nouve. Ahulokuke u gapo nene nemegesaloka nego, nenemú gelesá amuve. Nogómulaloka ne netá alitove loko nigizani vatá oaká nouve.

14 Lá nouke Ómasímo Izesu Kilistó hoza alimómave loko okulumá gapoló nelémo molake makiló ahulonimikago, gonanalisi netá alitove loko ánígo vevesonouke hee loko ololu loko novuve.

15 Monokú napa unimoláa leza mukitoka ámina gonanalisi netakumukó gele zageko minatunize. Itó gakó nolumó nenemú giliko, gapóa haitolímini noikoma, Ómasímo likigika ale hanatokiko gili vevesanigave.

16 Lá onoimóza, monokú vonouni gapolokó vitunize.

17 * Nigivénegita, lekeza mukitoka nénisi ale goí oko novugo ánigiiki áminalokó némegetiki alo. Vegená lugáa keza áminagó iki ali goí iki viaká niaze, keí nene ánigiiki nene ámina kigizakaló vilo.

18 Lá niiki láa liki gili minalo: Neza vegená lugáamú lo lekememo ova ova umóma neve. Itínasa imane ivedutí nene goha lo nolukumuve. Keza iki miliki niamó nenémo Kilistó zohota zaló hilímó nene lova ali amiaká niamó geleneive.

19 Vegená nenémínáa keza kugupémo amu heleaká noi netá nenémo ómasinini loló oaká noive. Itó haitopaitó netá kovoza hiliti netakumú golómeni giziaká niave. Itó mikasiuka netakumukó giliaká niave. Lá niamó nenémo vo tolova oakalímini mututoni lilí niave.

20 Lá iki niago, leza nene okulumá apálímini amelahove nounike, lugutó vizeaká ve Guivahani Izesu Kilistó eza okulumakutí limitikumú ageva oko minoaká noune.

21 Eza netá matá mukí ale nupa napa oko ale agahaisiuka molokiko aí agisa heumaukagó kelémo moloaká zámuzatunú nene keé lami lugupe ale viligokiko, ezáa lapanalagi agupegitana loló inogo ive.

4

Kagata aseva alike loketa gakó

1 Nenemú nigika lekemenou nigivénegita, mulúnegú geleuke lekelikumú goha nonivisive. Lekeza hozanémini gihiláa lilí ikago, lekelikumú nogoliza vizeaká nouve. Lekeza amuza miliki Guivahaniloka gímizi salakiki aí mututoni lilí iki minalo.

2 Itó Izuotiako Sitikako lekeza Guivahanímini mohola lilí ikasinazo, likigika mili hamó iki minatáive loko lakagata naluve.

3 Itó hozagú ve nigivénega gihiláa geza ámina vená losi kelémo vatí ozo. Kezagi itó Kelemetó itó nigivénega lugáagi Izesuni gakó lamaná nenémimi miluma hozavamú hizi lé initinamóma neve. Kugulizá nene alévolé kemetameki nia vegenalitini kugulizá giza pukugú neve.

4 Lekeza Guivahaniloka gímizemó nenémimi agikagú miniki lokogoliza viziki minalo. Neza goha lakagata aleko litoze. Mulutikú agila guluma iko minalo.

5 Guivahani mota omo lovogisaloka inogo inazo, gevená mukí nene hu-lugutí némini manámini iaká niamómámini mogona kelepizilo.

6 Nemupe manamupe gilikó mulutini itemino. Netá matakumú vitagá niiki Ómasiloka liki netakumú voká liki nene, netá mota lehizeketakumú agepoka liki minalo.

7 Lá iki niko, Ómasímini hulu nenémo vegená geleaká nene avilegeko nemó nenémo likigikatiní lakagatatiniló gizapa okiko Izesu Kilistotoka alévolé iki minataze.

8 Itó nigivénegita, gakó makó láa loko lo nahuluve. Netá gihiláa gelekelé o ameakaláa itó netá lamaná itó hee loko minoaká netá itó gizopa vové avetoko mina netá itó ánigoakalímini lagaváa itó gele lamaná oaká netá nene,

* **3:17:** 1 Koli 4:16, 11:1

etovi netá nekoma itó agepoka loaká netá nekoma, ámina netá mukikumú lakagata gili minalo.

9 Neza oko moloko uke lainim-oleketuke netá matá voko ale nupa oko lekelepizeko nougo ánigiki gelemó áminamalokó nene minalo. Niko, hulu amelaho Ómasímo lekezagi minanogo ive.

Agupémini netá lehizitakumú gakó lo kimímó

10 Lekeza gamena háná hanuva miniliki iteke likigikagú lamaná okago, itína nenikumú goha giliakte ali lamaná initanigi nilago, nenemú gulugo Guivahaniloka vo anitekago mulúnegú lamaná napa noguluve. Lekeza goí iki nenikumú giliakaláa gilikamóza, netá mukí alenetatupe liki gapo vitagá iake nenemú gena likivisimó.

11 Neza netá némini manámini agikagú minuke goselé nepelemigo minatomó nenémini mogonamú vitagá oloko vuke mota gelenoumó nenazo, neza oko molokóné itína nomigo vitagá nouke lamuve.

12 Neza ali-liki itíki itó ali-liki limjíki initatamóza, hanuva lá oakaláá lá niko vatí oko minanogo uve. Itó netá no gelekelé oko minoaká itó hukonopakonó oko minoaká itó minumuni amupiló minoakape itó gaúna gamenámini amupiló minoakape nenémini agikagú vávani oko minoakalímini mogonamú vitagá uke uke mota gelekuve.

13 Kilstó zámuza nemekago ámina zámuza ale minuke haitopaitó netá golesámini lamanálímini amupiló ale vatí okuve.

14 Lá oniomóza, lekeza nene miluma maluma geleko nougo nilími lamaná iaká amó nenemú gulugo etoaká noive.

15* Pilipi numutoka ve vená lekeza není gakó mota gilinave. Neza Izesuni gakó lamanalamú hozaváa apí u gamenaló nene Masetonia mikasi ahuloko novugo, Izesuni vegenala zuha lugáa hanuva niago lekezagó monó lusa lukumugo moni nemego oko minunímó neve.

16* Itó Tesalonika numutoka nougo, nugupémini netakumú hizi lé initiki minamóma neve.

17 Neza nene henokanonimú ma lamuve. Monolímini gihiláá lekelitoka utó okoko minoloko ititive loko noluve.

18 Itína imane netá matá ali utó miliniti asú amó vaí oko nego nenemú gilitave loko luhuva imane gizo nolukumuve. Epapolotaetasí nene lekelitokatí netá aleloko oko nemekago, henónegi ve loló okuke nouve. Lekeza lehizinta netakumú gelekugo Ómasi guguni gizi amikago anuva lamaná imó gelekave. Itó Ómasi laga avisi netá gelekave.

19 Ómasine eza minumuni ale utó oaká amelaho nene Izesu Kilistotoka miní amemómove loko netá matá lamaná avilisá olíkimikiko netá makokumú ma vitagá aminigave.

20 Ómasi ameteho aitoka nene agepoka loo loo nenémo mino-loko iteko alévolé oko minino. Lamaná.

Gekéini loketamó

21 Izesu Kilistotoka viki gímiziaké Ómasímini vegenala zuha lilí iki nia vegená nene gekéini noloketuze, li kimilo. Itó nigive nagave nezagi miniaká nia vegenalitegi geketini nililikitave.

²² Monó gele vegená imane mukilite geketini lilikimiaká niamóza, agulizaki ve napa Sisani gelekelé imiaká nia vegenalite aliki itiki lá ilikimiaká niave.

²³ Guivahani Izesu Kilistoni nasahilí nenémo lekemetamekú vo holoko minino.

Kolosa Vegenalitini Luhuva Pauló Gizo Kimimó

Kolosa vegená nónohá kimike gizo kimi gakó

1 Neza Paulona Ómasímini gakotó Izesu Kilistoni aposolo ve loló utímina neza itó ligiveteho Timotiki makó nousike

2 Kolosa numutoka monó gele vegená ligive lagave Kilistotoka alévolé iki gímiziki nimina vegená nene luhuva netá imane gizo nolukumuve. Ómasi ameteho aitokatí nasahilí itó hulu lekelitoka mino moloko minino.

Kolosa vegenakumú Ómasiloka limó

3-5 Lekeza Izesuni gakó gihila lamaná nene lekelitoka gozapá utó okago okulumakú monó helisa henoni lekeza ali lá itave loko gozapá mololeketakumú giliaké alitune liki lakagata losi gelemake ageva iki miniaká niamole liki Izesu Kilistokumú gili alévolé iaká niamó itó monó gele vegená mukitoka likigika kimiaká niamó nenémini gakó likago gelekusike leza Guivahanite Izesu Kilistoni amelaho Ómasi nene lekelikumú gamena gamena agepoka loaká nousive.

6 Ámina gakó lamaná nenémo numutó namató hutilí oloko vova vova oko gihilá ale utó oaká noimómámini oko lekelitoka ganá apí oko anitekago Ómasímo nasahilí olimiaká noi gakó nene lamanatotí gili guni iake, nene gamenalotí lekelitoka ámina oko gihilá utó oloko voaká noive.

7 * Ligiveteho ligika amenousi ve Epapalá lelikumule loko Kilistoni gelekelé izekipala lamaná áisi mota ámina gakó gihila lo lekemekago gilinámoma neve.

8 Áisi nene Sikalahulímo lekelémo vávani igo likigika eza amigo eza amigo iaká nia gakó geleake mota oko lo lemekave.

9 Leza gakotini lamaná gelekusike ámináló apí oko Ómasímo geleakatini ale napa okiko eza geleko moloko imoláa giliiki Sikalahulímini gele vevesoaká gakola gili guni iki gilitave loko Ómasiloka loko nominusive.

10 Itó lekeza miniki aliki iki miliki itamó nenémo mogonatini ale utó molokiko Guivahanímo ánigokiko lamaná itive loko, itó monokú hoza haitopaitó naliki nenémini gihilá ali utó itave loko, itó láa niiki Ómasímini mogona gili guni iki giliiki minatave loko numuna loaká nousive.

11 Itó Ómasímini zámuba nene sigagavagi netá olío ititimó nene viki akamiki legesó iki ali giliiki mulutikú agila guluma iko minatave loko numuna loaká nousive.

12 Itó ameteho eza veletoka lapanalagi apakú helisa henoni moletamó nene monó gilina vegená lekezagi izá miliki alitave loko ale vavá oko mololeketamó nenemú mulutikú lamaná giliiki agepoka lilo.

13 Ómasi eza límugusi amelahini zámuzalotí gologí olimiaké ánigo amu hili gipalámini gizapaló nominuhákú lelémo molamó.

14 * Gipala áisi nene lihimate ahulolimiaké gologí oletake meinavate hizimó neve.

Kilistoni ametamenigi hozavagi

¹⁵ Gipala áisi ánigamoaká ve Ómasímini ametamenigi utó ike netá mukí avilegeko mina vémo nominave.

¹⁶ Lá oake minoakató netá mukí okulumató itó mikasiló ale utó o asú oko ale utó imó nene ánigoakalímini itó ánigamoakalímini, vegená ahe itó ageló ahe zámuzalagi lelege loko mina netá nene helisa iteko minamó nenehe itó kugulizaki ve minamó mukí nene aízámuzaló utó amó neve. Itó aí mututoni itave loko utó amó neye.

¹⁷ Itó netá mukí utó amigo amunalotí emane gipala eza mino-loko volo minamó. Itó netá matá mukí nene aízámuzaló apize lamaná okave.

¹⁸* Itó áisi nene agisa agizani loló oko nouhá vegená nene lelí gotola loló oko noive. Lá noike apí oaká itó vegená helenosakutí ale goí oko mómkoká oko oteaká amelaho minake netá mukí nenémini lapusaváa loló imó.

¹⁹ Ómasímo ezáa ametameni nene gipalaloka mulusi moloko minative loko gelekago etamó.

²⁰* Itó netá mukí nene okulumatoka itó mikasiloka Ómasi ezáagi goha lelémo apizitive loko lomikago, áisi nene zohota zaló golania lekike ale geha zike nenémini imó neve.

²¹ Lekeza gozapá Ómasigi otopá ziki minake gala veva lilí iki minake leke-megesa amiake netá golesa haitopaitolímini alíki miniaká amómá nemóza,

²² itína Kilistoni agupe hilimó nenémo hulu lekemekago, likigika gizopa lo miniko apazá keké viziki Ómasímini avogisaló lihimá nomimó minatave loko goha aitoka lekelémo apizimóma neve.

²³ Itó nenémú lekeza gele alévolé oakakú alévolé iki miniki luhusatini ali kii lominago Izesuni gakola lamaná giliáke monó helisa henonimú lakagata losi gelemiki ageva iaká niámó nene gopa olíkimikatize, gelelele huzá giliíki minamilo. Ámina netakumó gakó lamaná li likiminamómá nene lekezagó ma nomive. Numutó namató vegená li kimiliiki vinamómá neve. Itó neza Paulona nenémini gelekelé izegipala loló oko nouve.

Pauló monó gele vegenalitini gelekelelápá minamó

²⁴ Neza lekelikumule loko miluma netalímini amupiló nominuve. Nenémú imane gelekugo lamaná onoise. Kilistoni agupémini agisa agizani lilí iki nia vegená lekelikumule loko Kilistó miluma maluma gilimómá neve. Ámina milumámini nekisaloka miní ameko geleká netá nene není numupiló itekago ale asú ito hoza naluve.

²⁵ Neza Ómasímini gakó hize hutilí oloko vitive loko monó gele vegenalitini gelekelelápá mininake lekelítoka Ómasímini gakoláa lo lekeme-loko novoko ale lutigitane loko nelémo etó imómá neve.

²⁶ Vegená omolelé amalelé iki mini-likí nitego ámina asuguná gakó amegesáa nene vegenalite gelemítave loko halá geko minokago gelemunike hanuva minuháza, itína gamena nene monó guluhá vegená ale vesamá oko lo lemekamómá neve.

²⁷ Itó hetoka vegenatoka gakó amegesáamú minumuni lamaná minamó nene monó gele vegenala nene asuguná gakolímini gihiláa lo utó moloko lo limimó nene lá oko neve: Kilistó eza mulutikú minoaká noikumule liki okulumakú helisa henonimú lakagata losi gelemake ageva iaká niave.

* **1:18:** Epe 1:22-23 * **1:20:** Epe 2:16

28 Áí mogona lo utó moloko numutó namató vetitoka lo kemeaká noune. Gele vevesoakatunú kagata aleko lainim-olikimiaká nounimó nene Kilistoni vegenala gihila lilí iki aitoka gímiziiki likigikámo monokú napa omo iteko alévolé oko minative loko

29 aí zámuza sipisi nenémo hize lé onimikago hozaváa nene amuza moloko aleaká nouve.

2

1 Neza lo likimitoze, gilio. Lekeza niamó itó Lautisia numutoka vegená niamó itó vegená lugáa nogoka ánigama vegená lekelikumule loko hoza aleloko vonoumó nene lagasó nomive.

2 Lekezagi likigikatunú amuza miliki likigika eza amiko eza amiko iki múnahi lamaná iiki netakumú gili vevesiiki Ómasímini asuguná gakolímini mogonáa itó Kilistokumú gili guni iki nenenoka viki gímiziki minatave loko hoza aleaká nouve.

3 Aitoka nene likigikagú luhuva utó oakalímini gele vevesoakaláa nenémini ohunáa halá geneimó neve.

4 Ve makolímo laga likivisiti gakó lo lekemekiko likigika gopa okative loko gakó imane lo nolukumumó nene

5 nezáne nugupetunú hotó minuke nigikatunú lekezagi nominuke lekeza Kilistokumú gili alévolé iake múnahi lamaná iake alévolé iki niminamó nenemú gelekuke mulúnegú lamaná geleaká nouke luhuva imane gizo nolukumuve.

Kilistotoka gímizitunimó nene ligikámini netá makokumú vitagá aminogo une

6 Lekeza Izesu Kilistoni nene Guivahanite loló o limitive liki ali mulutikú milamómámini lelegító nene aitoka gímizi lamaná iiki iki miliki ilo.

7 Lá niiki aitoka luhusatini alekiko mini gikitiki minalo. Itó monó gapo lekelepirzinamóma nene áminamalokó lisi lisi niviki lehizeleketa netakumú agepoka lii liiki minatamó nenémo likigikagú vaí oko minino.

8 Ve makolímo vegenatokatí geleaká gakó itó logoka vizeaká gakó hutuváa lo lekemekikoma, nenegú viki nagá ikataze, gizapa iki minalo. Gakó nenémináa nene avotegini kigikagutí utó okago omolelé amalelé iki minilikí itetoka itó mikasímini amupiló gihiláa nomi netakumú li mila gakotó gímizi minake liaká nia vegutí neve. Kilistoni gakó nomive.

9 Gilinahe. Ómasímini avevezahaváa mukító nene Kilistoni agisa agizatok-agi agupeló mukí mino gíkí oko neve.

10 Lekeza aitoka gímiziaké likigikámini netá makokumú vitagá aminigave. Áisi nene gizapa oaká netá itó kugulizaki niamó mukilitini gotoláa noive.

11 Aitoka gímizikago nene likigikauka Kilistoni luhuva neve. Vegenalite kigizanitunú lukugupeló luhuva zeakaláa nene nomive. Miniki aliki iki miliki iaká amó litahá nene gololohá i ahuliaké Kilistotoka vake nene gosohá lílí injamóma neve.

12* Monó nagamí hililikitate áisi hilikú miní amilikitinamóma neve. Lá ikago eza zámuza latunú Kilistoni alémo oti zámuza málá gili alévolé ikago gosohá lekemetameki miniki aliki itató miní ameleketatove loko lekelémo otimóma neve.

* **2:12:** Lom 6:4

13 * Lekeza gozapá likigikaló itó lukugupeló Ómasímini anosa nomimó minake golesa netá gopánapa aliki minamómave loko likigika hele vimó niago, Ómasi eza lihimavatini ahuloake Kilistoki lekelémo otímó neve.

14 * Lá imó nene gakó pelevesava zeaká unikumú goní oletati luhuva gizo molamó nene gilato nahulake nenémini lihima ale nupa okoko zohota zaló apatekago haha okamóma neve.

15 Lá noike kugulizaki itó amuza mili mina ve lovagú kivilegeake zámuzáini gologolo soketakumú vegená kovogisaló kovoza helepelé imó nenémini mogona ale utó molamóma neve.

16 * Nenemú nosánetá makokumú ahe itó soza saza holisimupe itó ikanímini holiváhe itó holisi ale etó oko minoakakumupe itó minamoakálíminimupe ve makolímo ámina netakumú lihima alikave loko nolikoma gili amemilo.

17 Netá nenémináamú hanuva hutuváave loko litune. Gihiláa nene alika utó itive loko samapala noave loko litune. Itó gihiláa nene Kilistotoka utó oko neve.

18 Ve lugáate likimimí lakamamá iki lekezatini alilikí limiki minata gakó li likimiki iki ageló vegená gupá zi kimitave liki lakagata hiziki itó ligikate mino viligokago netá ánigo vevesoaká une liki li likimikikoma, nenemú gili kiko gihila loló amino. Hanuva kagata giliakaláa nemóza, kugupéini nene hanuvamú aliki itiaká niave. Ve nenémináate monó gihiláatini ipá ilikimikataze.

19 * Keza nenémináa Kilistotoka viki gímezémota gologolo sokave. Áisi nene gotote noigo lélisi nene agisa agizanía noune. Agisa agulúnaha nenémo limike luhusate ale gikiioletamó. Lá oake múnaheletoko hizevo lé ovo oletake noigo zámuza Ómasilokatí alekunike utó o napa oloko voaká noune.

Kilistó hilító miní amekunike ligika heleneikutí otekune

20 Kilistó hilimó nenenó lekeza miní amiki lukugupémini netakumú li hukina gakó gele aleakakumú mota hilikamó geleneimóma nenazo, imane mikasímini amupiló gihiláa nomi netakumú li huka gakoláa nanamú gelekelé iaká niave.

21 Li huka gakóma láa loko neve: Nene ale gelemo. Volane namo. Imane no gelemo. Gakó nenémináa livi hukivi iaká niámó nenemú noluve.

22 Ale geleko nokuko asú oaká netakumú li hoipa iaká niave. Itó vegenalite hanuva kagataturú gelemó vevesoakago ali nupa napa iki liaká niave.

23 Ve nenémináate ha vegená nenémináate kezáini kagata geleke monó nenéminiki lilo liká itó lukugupelini ali limilo liká itó lukugupe apiliki zivi hutivi ilo liká nia gakó nene gele vevesoaká gakó gihilagítana loló okamóza, netá nenémináamo gihiláa nomive. Nenémináa nene lugupémo amu heleaká netalímini gahe ma getaminogo ive.

3

1 * Kilistó móroká oko otímómáminiki lekeza likigika heleneikutí otinamó neneta, veletoka Ómasímini zamagaloka Kilistó noitoka ne netakumú nene gili minalo.

2-3 Lekeza netá golesa alitakumú hele vegená lilí inamó gelekago, miniki aliki ita netalímo Kilistogegi lekeza monéna Ómasímini amatoka voko halake

minamó nenazo, mikasigú netá matá nemó nenemukupa, veletó netakumó giliki minalo.

⁴ Kilstó eza miniki aliki atímini mogona noinazo, eza goha utó noiko lekezagi nene aí lapaná hugepavagi izá miliki alinigave.

Litaha likigámo oko moloko imó gololohá okunike ligika gosohá ale luhokune

⁵ Nenémú netá lá okomú nene etó iki miniki lukugupémo mumuzó iti netá nene musi netá, golotuva netá, mulutini gitihiná oaká netá, mokoló mogona, itó mulutikú nihunihi loaká netá, nenémo sozaló ómai netá ámegetoaká suni nenazo, netá nenémináa apili hilikiko helegelesino.

⁶ Ámina netá mukikumú nene Ómasilokatí mesaha utó inogo ive.

⁷ Itó lekeza gozapá ámina iki netá nenémináa ali minago likigika loló imóza,

⁸ itína nene ahulalo. Mukahá pakaha, hokolizá, mesaha, hokolizá, ulínaka gakó, itó golatalaka gakó netá nenémináa nene ahuli asú iki ahulalo.

⁹ * Litaha likigikámo oko moloko i netá nene gololohá iki ali ahuliake likigika gosohá ali luhikamó nenazo, soza gakó eza lo amiko eza lo amiko amilo.

¹⁰ Aí mogonamú gili vevesatave loko gosohá lekemetameni nene ezáa ametamenigitana oko lelémo utó itímo ale lamaná ova ova oaká noive.

¹¹ Nenémú haitopaitó minuháma nene asú okamóma neve. Hetoka ve- gená minuhá itó Zuta vegená minuhá, lugupeló Ómasímini anosa nemó nomimó, zauka vegená itó gihisigú vegená, megusámini nagakú niamoláa minamamoláa monéna minamuko, Kilstó ale nupa oko lelí ve napa loló oake mulutegú mino vái oko noive.

¹² * Ómasímini vegená lekeza ezáa agika lekemeake lekelémo etó okago apazá niamó nenazo, nenémú lekeza likigika hize kimiaká itó nasahilí ikimiaká itó likigika lamanaki minoaká itó lukugupe alili ki limiki miniaká itó likigika ale geha zekago legesó oko minoaká nenémo gineganetini loló okiko ali luhiki ali minalo.

¹³ * Lekeza hulu vegená miniki itó holutikú gakó utó noikoma Guivahanímo lihimatini ahulamó nenéminiki lekezagi lihimatini eza ahulotiko eza ahulotiko iki minalo.

¹⁴ Itó netá mukí nenémini amupiló likigika kimitamó nene mukí netá ale nupa oko múnahekago mino hamó oake avasavagi minoaká netá nene ali luhiki minalo.

¹⁵ Lá okiko Kilistoni hulúmo likigikagú gizapa oleketino. Ámina hulu lekeza ali lá itave loko Ómasímo lekelémo etó okago aí agupe hamó lilí inamóma neve. Itó lekeza lehizelikimiaká noi netakumú agepoka liki minalo.

¹⁶ * Kilistoni gakolímo likigilikagú hize hutilí oko minino. Itó Ómasímini gele vevesoaká gakó haitopaitolímimi eza lo amiko eza lo amiko iki lekezatiní lakagata aseva aliki lainim-ilikitalo. Lá niiki likigikatunú Ómasi geké litiki monó nama itó ipá apá nama itó Sikalahulímo lekelémo vávani iko gosohá nama liki likigikatunú lokogoliza vizé iki Ómasi agepoka lii liiki minalo.

¹⁷ Itó lekegepatunú ahe itó likigizanitunú ahe netá iki miliki inigima nene Guivahani Izesuni agulizá iki netá mukikumú Ómasi ametehini agepoka liki minalo.

Lezatete izolaho amelaho gelekelé izegipa kugulizaki ve gosohá iki miliki ita gakó

18 * Vená lekeza vatinitini kagahaisiuka limiki minalo. Guivahanímini mututoni lili ikatita nenémini ikiko lamaná inogo ive.

19 * Ve lekeza venatini likigika kimilo. Itó alévoleka li kememilo.

20 * Itó gipa mohó lekeza izotike ametike mukí gakó litamó nene gili alilo. Lá itamó nene Guivahanímo giliko lamaná inogo ive.

21 * Izókita amékitá lekeza izegipatini kizapaló moloko goselé kipiliti netá lili ikitamilo.

22 * Itó gelekelé ve lekeza mikasiuka kugulizaki velinitini gakó nene netá matá mukikumú gili alilo. Itó keza lugupeló ánigikiko lamaná itive liki gili minikigopa, likigikágú lovaleta minamiko Guivahani Izesukumú goliva gili miniki lá ilo.

23 Hozalini mukí nene vegena Kumule likigopa Guivahanimule liki likigikámo vávani iko iki miliki ilo.

24 Lá niiki lekeza Guivahani Kilistoni gelekelé imiaká nianazo, lekelí hozámini meinaváa okulumakú helisa henoni nemó nene Guivahanilokatí alitunímó neve liki gili miniki hoza alilo.

25 * Makó keza hozaváa makó ali golesa iki alitamó nenémini helegáa alinigave. Itó Ómasímitoka iteko lemeko negopa, hamó lelegító liminogo ive.

4

1 Lukugulizaki ve lekeza gelekelé izegipatinitini netá makó ali gopa ikitamilo. Ali hehe likitiki kimilo. Itó lekelí Guivahani okulumakú noinazo, alika lelí hozámini mogona ale utó inogo ive liki gili minalo.

Kagata aseva aleko loketa gakó

2 Lekeza goselé lekepelemiko Ómasiloka liki minalo. Itó gizapa iki niiki lehizeleketa netakumú agepoka lii lii iki minalo.

3 Itó Ómasímo monólímini gahe segelimikiko, Kilistoni asuguná gakoláa lo utó oko lo lamaná oko lo kimitune liki numuna lilo. Nene gakokumule loko nagá numukú nominuve.

4 Itó numuna loakatunú hizi lé inimikiko, neza gakó nenémini lokugo etatitó nenéminoko lo utó oko lo kimitoze.

5 * Ómasímini geisa hetoka mina vegena hotu li lomala iiki keza mikuka ititave liki netá matá ali guni iki lili ikitalo. Netá lamaná aleaká gamena utó olíkimitimó nene ma likivilegemino.

6 Gakotini nene age hilimikiko lagaváa loló ino. Lá okiko vegena makolite gakó némini manámináamú nana oko ale viligoko lo kimitune liki ligitagani aminigave.

Geké loketamó

7 * Není avetó gakó nene Tikikó lo likiminogo ive. Eza ligiveteho nigika amenou ve Guivahanímini gelekelé izegipa gakó gele aleakalímini noive.

8 * Eza nene minoko aleko nouhatimini gakoláa lo lekemekiko likigika ale hulu itive loko lekelitoka amiselekugo núane novive.

* **3:18:** Epe 5:22; 1 Pit 3:1 * **3:19:** Epe 5:25; 1 Pit 3:7 * **3:20:** Epe 6:1 * **3:21:** Epe 6:4 * **3:22:**
Epe 5:6-8 * **3:25:** Epe 6:9 * **4:5:** Epe 5:16 * **4:7:** Apo 20:4; 2 Tim 4:12 * **4:8:** Epe 6:21-22

9 * Itó Onesímo monokú alévolé oko nomina ve ligiveteho nigika amenou ve lekelí numutokatí vema ezagi itína amiselekugo makó viki imane numutotí gakoláa li likimi asú inigasive.

10 * Nagá numukú ahulilimikago nousi ve Alistakó itó Panapasini aholaho Makí itó Zosuá agulizaláa makó Zustó keza geketini nililikitago noluve. Makini gakoláa goí oko lo lukumumóma nenazo, áisi vo anitekikoma ali lakamatoka milalo.

11 Zuta vegenakutí Izesuni gakotó ámegeta vegenakutí ámina ve losive makole nenete kezagó Ómasímini gizapaló minoakalímini hozaváamú nilími vatí iaká niave. Lá ake mulutegú ali lamaná iaká niave.

12 * Itó lekelí numutokatí ve makó Epapalá eza Izesu Kilistoni gelekelé izekipala makolímo nene geketini nololeketago lo nolukumuve. Áisi nene Ómasímo hize lé oleketiko lekeza Ómasímo lititoka molatitoka gili hee liki monokú lakagata gululusi gelemiki olopagó minatave loko amuza moloko Ómasiloka loaká noive.

13 Neza aí mogonáa mota gelenouke lo nolukumuve: Lekelikumupe itó Leotisia numutoka itó Hielapolí numutoka monó gele vegenakumupe miluma hoza sipisi aleaká noive.

14 * Lelí lusa ve tota nigika amenou ve Luká itó Temá keza geketini nililikitasigo lo nolukumuve.

15 Neza Leotisia numutoka monó gele vegená itó monó vená Nimipá itó Ómasímini vegenala zuha aí numukú monokumú alegesá iaká nia vegenakumú gekéini noloketuze, li kimilo.

16 Lekeza luhuva netá imane vegená mukí gati kimikiko gili asú iki gilikiko, Leotisia numutoka monó liaká nia vegenatoka milikiko vokiko nene gatatave. Itó keitoka luhuva makó gizumó nene áminámini iki likimikiko lekeza gatataze.

17 * Alikiponi nene monó hoza Guivahanímo lehizegetamó nene legesá oko minoko ale lutegeko alezo liki li amilo.

18 Neza Paulona itínasa luhuva nogiza vémini agizakutí luhuva gizoaká nogosanima alekuke nezáne nigizanitunú nugulizáne imane nogizuve. Nagá numukú noumó nene lakagatí molokatize, nenemú gili minalo. Ómasímini nasahilí nenémo lekelitoka mino moloko minino.

Tesalonika Vegenalitini Luhuva Nampa 1

Pauló Gizo Kimimó

Tesalonika vegená nónohá kimike gizo kimi gakó

¹* Neza Paulona itó Sailasiko Timotigegi makó nounike Tesalonika numutoka Ómasímini vegenala zuha Ómasi ameteho itó Guivahanite Izesu Kilistoni vegenala zuha lekeza nene luhuva netá imane gizo nolukumuve. Nasahilí itó hulu lekelitoka mino moloko minino.

Tesalonika vegenalite Ómasimú gili alévolé ake monó gapoló vamó

² Leza gamena gamena lekelikumú Ómasi agepoka lova lova oaká noune. Itó numuna nolunike lekelikumuki geleko loaká noune.

³ Lekeza Ómasimú gili alévolé iaká nenémini gihila ali utó iaká niave, itó vegená nasahilí ikitake likigika kimiaká niave. Guivahanite Izesu Kilistokumú alévolé iki lakagata losi gelemiki ageva iaká niave. Nenemú gelenounike ameteho Ómasímini avogisaló agepoka loaká noune.

⁴ Ligivetegita, Ómasímo agika lekemeake lekelémo etó imó nenémini gihila nene

⁵ Izesuni gakó lamaná aleko voko lo lekemekuko, ha gakó loló imó negopa, amuzavagi nego, Sikalahulímo nene gihiláa neve loko lo likimímoma neve loko gelenoune. Lekelitoka minunike lekelikumule loko oko moloko unike monó hoza alunimó nene mota gilinave.

⁶* Lá okuko, oko moloko unitó nene lekeza iki miliki iake, Guivahani oko moloko itoki nene iki miliki niave. Lá ake nene, monokumule liki gopoguni nimililikitago, Ómasímini Sikalahulímo lekelémo vatí igo, gakó lamanáma gili alikago, mulutikú agila guluma lamaná imó neve.

⁷ Lá iake, lekeza goí iki monó gapoló nivago Masetonia mikasiuka itó Akaia mikasiuka monó gili alévolé a vegená lekeza atímini iki iki miliki amó.

⁸ Lekelitokatí nene Guivahánimini gakó lamaná puu loko vike Masetonia mikasiukagi Akaia mikasiukagi vimó. Lá imóza, nenegó nomive. Lekeza nene Ómasimú gili alévolé amó nenémini gakó nene numutó namató vokago, nenemú lezate lo kimitunimoláa makó nomive.

⁹ Holutikú hozaváa alekuko nenémini gihiláa utó i gakola nene kezáini li limiaká niave. Lekeza nene soza ómai netá lekemegesa amiake Ómasi alévolé ve gihilaloka gímiziki gelekelé imiake,

¹⁰ gipala heneneikutí alémo oti ve Izesú minomo iteko okulumakutí limitikumú ageva iki niave liki li limikago gelenoune. Áisi nene gamena napaló mesaha olimioko nogosani limitikutí nene lugutó vizeaká ve noive.

2

Pauló Tesalonika numutoka monó hoza alimó

¹ Nigivénegita, lekelitoka vunike hoza alunimó nene ha amimole liki lekezatini gilinave.

* **1:1:** Apo 17:1 * **1:6:** Apo 17:5-9

²* Ganá nene Pilipi numutoka gopoguni milititake alivi letivi ilitamó nene lekeza mota gilinave. Lá ikamóza, Ómasímo lukesate hize lé olimikago lova vetini holúkú lelegesá legemigo minunike Ómasímini gakó lamaná lo utó oko lo lukumuháma neve.

³ Lakagata aleko lo lekemeaká nounimó nene gele gopa napa oko, soza ligikagi nouhakutí utó osá amive, itó lokogoka vizeko lo lekemesá amune.

⁴ Ómasímo ánígoletago, etokago, Izesuni gakó lamaná geleko ale gúekinake lo kimitune loko lelémo etó okago, ámina gakó nolune. Vegenalite giliko lamaná itive loko nomive. Ómasi eza ligikagú ánígoaká vémo gelekiko lamaná itive loko lo lekemeaká noune.

⁵ Lekelisi nene lelí mogona gilinave. Leza lekelitoka minunike, asugunatoka moni henonimú voká linogo lekegepoka loaká gakó itó lukugupe aleko iteaká gakó ma lo lekememune. Ómasímo gelekago noluve.

⁶ Lekelisihe itó numutó namató vetehe lelikumú giliko itekiko lugulizaki ve loló itune loko lamune.

⁷ Leza Kilistoni aposolola nouninazo, nenémú netá matá makokumú voká lokuko lemelinamó nene lamaná ilinamóza, lá oko nomive. Izóike keza izegipái kilími kava ziajá niave. Áminagó oko leza nene lekelitoka minunike lekelémo kava zeaká unimó.

⁸ Nenémíni lagaváa nene ligika lekelitoka minokago Ómasímini gakó lamaná lo likimitune lokogó lamune. Ligika lemeni lekelitoka lekeme gikitatune loko ligika lekelitoka nego luháma neve.

⁹ Nenémú ligivetegita, moni henonimú nagá zeko ale minuko goselé lekepelekatve loko únaká neteká lugupémíni hoza amuza moloko itó vauva aleko minunike, Ómasímini gakó lamaná lo lekemehá mota gilinave.

¹⁰ Leza ligika hanato minago hee hee loko lihimate nomigo minunike, monó gele vegená lekelitoka oko moloko unimó lekezagi itó Ómasímogi mogonate mota gilinave.

¹¹ Lá iake, ve makolímo izegipa palaloka oko moloko oaká noimó nene leza lekelitoka áminámini oleketunike, etó etó oko gakó lo lekeme asú unimó.

¹² Lá unlike, lakagata aleko lekelémo kii loleketunike Ómasímini avogisaló itiiki aí lapaná ali lá itave loko sele lo lekemeaká noi ve Ómasímo gelekiko lekeza iki miliki iko etative loko lo lekemeaká uháma neve liki lekeza mota gilinave.

¹³ Leza nene Ómasímini gakó lo lekemekuko, vegenalitini gakó loló amimó. Lekeza nene Ómasímini gakole liki giliaké ali gúinamóma neve. Itó lamaná lá oko neve. Ómasímini gakó nenémo monó gili alévolé ina vegená lekelitoka hoza aleaká noive. Nenémú lélisi nene Ómasi agepoka lokogó nominunue.

¹⁴* Ligivetegita, Ómasímini vegenala zuha Zutaia mikasigú Izesu Kilistotoka víki gímize vegenakí lekezagi hamolímini iki iki miliki niago gasovagi netá lilí ilikitamó. Keí nene Zuta vete gopogu galatakatalá ikitamómámini iki likigivetike lugáate gopoguni mililikitatamó.

¹⁵* Zuta ve keza Guivahani Izesuni itó Ómasímini agepagutí gakó liaká a ve ámina iki kipili helemó, itó leza lipiliki limiselemóma neve. Keikumú Ómasímo giligo lamaná amigo, numutó namató vegenalitini lova ve lili iaká niave.

* **2:2:** Apo 16:19-24, 17:1-9 * **2:14:** Apo 17:5 * **2:15:** Apo 9:23,29; 13:45,50; 14:5,19

16 Lá niake, hetoka vegená monó lo kemekuko, lamaná ikatave liki gapo hize lí itupe liki lovaga li limiaká amó. Keza lá iva iva ikago, keí lihima nene amupiló amupiló oko iteko minokago, Ómasímo izapaló molokago, nenémini lovaváa mota keitoka anitekave.

Pauló Tesalonika numutoka goha vitove loko gilimó

17 Ligivetegita, gamena koma ahulo hotó oleketunimó nene ligikatunú nomive. Lugupetunú lá unimó. Lekezagi minamuniike, lekelí ánitatope loko amuza moloko minoaká une.

18 Nene voko ánitatope loko lokunimóza, neza Paulona gamena gamena ánitatope loko nougo, Satá nene lelí gapo hize lí goha olimikave.

19 Lekelikú lagaváa geleaká nounimó nene lá oko neve:

20 Guivahanite Izesú anititi zupa nene hí vegenakumú mulutegú agila guluma noiko minutune. Hí vegenakumú lagata gopa gelesá amune. Lekelisigó nene lelí hozámini gihila lilí inamó neve. Itó lamaná lekelikumú agepoka loaká nounimó, itó mulutegú lamaná geleaká nounimó nenazo, nenemú lekelikumú logoliza vizeko minanogo une.

3

1 * Lekelikumú miluma geleaká nouke, minoko aleko umó netamigo, nezagó Atena numutoka mininake,

2 Timotini amiselekugo, ahulonimioko lekelitoka vitive loko lo hukumó. Eza nene ligiveteho noike Ómasímini hozaló ve minake, Kilistoni gakó lamaná loaká noi vémo monokú lekelémo vávani itive loko, itó ale kii solektative loko,

3 itó lekelisi nene gopoguni mililikimikiko monó ahulikatave loko nene amiselekuve. Gopoguni mililimiaká niamó nenémo Ómasímo litó utó oaká noive liki lekeza mota gilinave.

4 Leza nene lekelitoka minuniike goí oko lova nene lumupiló itinogo ive loko lo lekemenouháma neve. Ámina gakó nene alévolé okave liki mota gilinave.

5 Lá okago, ámina gasovagi netakumú nene gimilegú moloaká vémo giminlikú molahe, itó monó ahulahe, itó ali minahe, itó lelí hozámini gihiláa haha okahe, monó alinamó nenémini mogonáa gilitove loko lekelikumú miluma napa geleuke minoko aleko umó netamigo, Timotini amiselekugo vimóma neve.

6 * Itó Timotí nene lekelitokatí atiginá oko ake, gakó avetó oake lekeza gili alévolé amó itó likigika kimiake nasahilí ikimiaká niamó itó lekeza nene nenikumú lagaváa giliaká niamó itó neza lekelí ánitatope loko geleaká noumómámini iki není ánitatope liki giliaká niamó nenémini gakola lo leme asú okave.

7 Nenémú nigivéne gitá, gopogu galatakatalá nenémini agikagú itó miluma geleaká nenémini agikagú nouke, lekeza Izesukumú gili alévolé iaká niamó nenémini gakó geleuke mulúnegú geha zekave.

8 Itína lekeza nene Guivahaniloka viki gímiziiki alévolé initakumú geleinake, ligikagú lamaná okiko, minoko aleko inogo une.

9 Itína Ómasímini avogisaló lekelikumú mulutegú agila guluma noimómave loko lekelikumú Ómasí agepoka loaká noune.

* **3:1:** Apo 17:15 * **3:6:** Apo 18:5

10 Guivahanímo gele lemekiko, lekelitoka vinake, eza ánígiko eza ánígiko inake, monó lugáa minoloko vonoimó nene miní ameko lo likimitune loko únaká neteká vauva aleko Ómasiloka loaká noune.

11 Ameteho Ómasi ezáa itó Guivahanite Izesú gapo velelimikiko lekelitoka vituninazo.

12 Itó lekelitoka vokuko nene, Guivahanímo hoza alekiko, eza agika amiko eza agika amiko ita metalímo hutíl ino, itó ligika lekelitoka mulunímó áminámini iki likigika mukí vegenañatoka milatamó nenémo puu loko hutíl oko napa ino.

13 Lá okiko, Guivahanímo likigika nene ale kii lolikimikiko, Guivahanite Izesú eza vegenañala zuha mukí kelémoko ati zupa nene lekeza nene Ómasi ametehini avogisaló vihelé lo miniko etó keké viziki lihimatini nomiko minatave.

4

Oko moloko nouko Ómasímo giliko lamaná iti gakó

1 Nigivénérita, Guivahanite Izesuni agulizató lakagata aleko gakó makó lo likimitoze, gililo. Monokú miniki aliki itamó nenémo Ómasímo giliko lamaná itímó nenémini mogonáa lo lekemekuko giliaké monokú minoakalímini iki mota niámó nene ámina iki amuza miliki minalo.

2 Guivahanite Izesuni gakotó gakó lo lukumuhá nene mota gilinave.

3 Ómasímo gili agiká nene lá oko neve: Mokoló netá ahuliiki likigika nene gizopa lo miniko minataze.

4 Itó etó etó iki likigika lamanatotikó hee hee liki vená alitaze.

5 Moko netakumú lukugupegú ló guluma iko nomive. Numuká vegenañ keza Ómasímini mogona gili hee hee lamatite lá iaká niave.

6 Ámina netá alita ve nene Guivahanímo áminámini meinaváa kimitive loko goí oko lakagata aseva aleko lo lekemouháma nenazo, ve makolímo ámina suni alekoko agivelahini nene lihimavagi netá loló otamino.

7 Likigika golotuvagi minatave loko nomive. Likigika vové avetiko minatave loko sele lo likimímó neve.

8 Nenemú makó keza gakó imane gili ahulatamó nenete vegenañ ánigi ahulatagopa, Ómasi eza Sikalahú lekemeaká noi vema ánigi ahulanigave.

9 Lekeza Izesuni vegenañala zuha lugáa nene likigika kimitave loko nanamú luhuva netá lekemeva lekemeva itune. Ómasi ezáa likigikatunú eza amiko eza amiko itave loko lo likimike lekelepizeneimóma neve.

10 Itó lekeza lamaná Masetonia mikasigú numutó numutó Izesuni vegenañala zuha minimi vinamó nene likigika kimiaká niave. Lá iaká niamóza, goha napa iki nenémini itave loko lakagata aleko lo nolukumune.

11 Itó lo lukunímó nenéminiki gakó vivi vovoga lamiki, numutikú legesó iki miniki, lekezatini netakumukó gili miniki, lekezatini likigizanitunú hoza alitakumú nene amuza milalo.

12 Lá ikiko nene numuká vegenañalite lekelikumú gili lamaná itave, itó ve makokumú gelegele minamiki minatave.

Guivahani atiginá iti gakó

13 Nigivénérita, lekeza nene hele vegenañakumú nene monó gelematite okulumákú monolímini helisa henoni alitune liki gizapa isá amamó nenéminiki miluma napa giliki ive nama ikatave loko lo likimitoze, gililo.

14 Leza Izesú heleake goha oti gakó nene gele alévolé onoune. Ámináminoko Ómasi eza Izesuni alémo atiginá iti zupahé nene, Izesukumú gili alévolé iake hele vegenaki ezagi kelémoko anogo ive.

15 * Guivahanímini gakola makó lo likiminogo uve. Mikasiuka logómulagi nouko Guivahanímini anititimó nene, leza nene hele vegená kivilegeminogo une.

16 Guivahanímini ezáa okulumakutí limitove loko gamoga geko sele lolimioko ageló vegenalitini agulizaki venini anó lupa itó Ómasímini pikuli anó nomiliko liminogo ive. Lemekiko, Kilistokumú gili alévolé inake helemó keza goí iki otinigave.

17 Otikiko, logómulagi ha minunimoláa nene Ómasímo lelémo otopá zekiko, keitoka límusi amupiló noitinake Guivahanímini hotu lanogo une. Guivahanímini mininake mino lúaló moloko minanogo une.

18 Nenemú lekeza gakó imane ligili hagili iki eza alémo alévolé otiko eza alémo alévolé otiko iki minalo.

5

Guivahaní atikumú gizapa oko minatune

1-2 * Ligivetegita, guminaló ve keza holugú litá iki anitiaká niave. Áminagó oko nene Guivahanímini gamena nene galinali alitanogo ive liki mota gilinamó nenazo, nenemú Guivahanímini gamenavamú nanamú luhuva gizoko lo lekemeva lo lekemeva itune.

3 Nene gamenaló vegená keza mota hulu okave liiki legesó iki niiko, golivagi netá oko aniteko kumupiló itekiko golesa inigave. Izegipa agatupagi vená makolímo litá oko galinali miluma geleko ininá oaká noimó nenemíni oko vegenatoka anitekiko, nana iki golisi itamó neve.

4 Lá onoimóza, ligivetegita, lekelisi nene límugusigú minamave. Nenemú Guivahanímini gamena nene guminaló ve nenemíni oko litá oko galinali anititimó nene lekeza gatizá niiko ininá itató niamave.

5 Lekeza lapanalímini itó livilímini mututoni niave. Límugusímini mututoni minamune.

6 Nenemú ve lugáa nenete kovó akiaká niamó nenemíni iki akamilo. Matutini gopa amiko lekezatini gizapa alévolé iki minalo.

7 Kovó akiaká nia vegená keza límugusigú kovó akiaká niave. Itó nagamí niaká vegená keza límugusigú nikake kigika gopa oaká noive.

8 * Lá onoimóza, lapanalímini mututoni loló unimó nene ligika gopa amiko gizapa oko minatune. Lá inake Ómasímo gele alévolé itunimó itó ligika eza amiko eza amiko itunimó nenemó lagele loló itive. Ómasímo lugutó vizitikumú lagata losi gelemoko ageva oaká nouhá netá nenemó lelí geha akilí loló itive.

9 Nenemíni mogonáá lá oko neve: Ómasímo mesaha olimikoko nogosani limitove loko lelémo etó amimóma neve. Eza Guivahanímini Izesu Kilistoni lugutó vizeaká netá ali lá itave loko lelémo etó onoimóma neve.

10 Guivahanímini lelikumule loko hilimó nene leza helekinakehe itó logómulagi noinakehe ati gamenaló ezagi minatune loko lá imóma neve.

11 Lekeza nenemú itína aliaká niamó nenemíni ikigó eza hize lé otiko eza hize lé otiko iki eza luhusava aliko eza luhusava aliko iki aliliki viki minalo.

Kagata alike gekéini leketamó

12 Ligivetegita, netá makokumú amuza moloko nololeketuve. Lekelitoka monó hoza aliki lakagata aseva aliaká nia ve keza Guivahanimule liki ali goí nilikitake likilími hee liaká nia vemú gliko lamaná ino.

13 Lá iki kilími napa iki likigika kimiiki hozaninimú gilikiko itino. Itó lekeza nene hulu iki minalo.

14 Ligivetegita, lakagata aleko gala vizeko láa loko lo nolukumuve: Hoza alisá ama vegená nene kagata alilo. Itó kovoza helepelé iaká nia vegená kilími mómoká iki kilími kii likitalo. Kigika alévolé ami vegená hizi lé ikitalo. Lá iiki vegená mukikumú legesó iki hulu iki minalo.

15 Golesa netakumú pekimiiki eza apiliko eza apiliko ali volaló imaló amilo. Lá okatune liki lekezatitokagi vegená mukitoka netá lamaná oke-tatune likigó amuza miliki minalo.

16 Mulutikú agila guluma ikogó minalo.

17 Ómasiloka gamena gamena numuna liki minalo.

18 Netá matá mukikumú Ómasi agepoka lilo. Nene Izesu Kilistoni mututoni lilí inamómave loko Ómasímini agikalokágó neve.

19 Ómasímini Sikalahulímini loláa zi lihamilo.

20 Ómasímini agepagutí gakó lo lekemeakumú gliko lememino.

21 Li likimita gakó mukí nene giliiki gona miliki minalo. Lamaná nehe golesa nehe liki giliiki lamaná neko nene ali minalo.

22 Netá golesa haitopaitolímini nene lekemegeesa amilo.

23 Ómasi eza nene hulu amelaho ezáa likigika nagamí zeko lekelémo guluví lo asú okiko likigika lekemeni avasavagi niminiko Guivahanite Izesu Kilistó anititi gamenaló lihimavatini nomitimó minataze.

24 Sele lo lekemeaká noi ve eza lo hukokago alévolé oaká noi vémo ámina hoza aleloko voko ale asú inogo ive.

25 Ligivetegita, lelikumú Ómasiloka liki minalo.

26 Izesuni vegenala zuha mukí nene monokú eza aputá viziko eza aputá viziko iki minalo.

27 Neza Guivahanímini avogisaló luhuva netá imane Izesuni vegenala zuha mukí gati kimikiko gili asú itave loko nololeketuve.

28 Guivahanite Izesu Kilistoni nasahilí lekelitoka minoloko voko minino.

Tesalonika Vegenalitini Luhuva Nampa 2

Pauló Gizo Kimimó

Tesalonika vegená nónohá kimike gizo kimi gakó

¹ * Neza Paulona itó Sailasiko itó Timotiko makó nounike Tesalonika numutoka monó gele vegená ameteho Ómasi itó Guivahani Izesu Kilistó aí vegenala zuha nene luhuva netá imane gizo nolukumuve.

² Ómasi ameteho itó Guivahani Izesu Kilistoni hulu itó nasahilí lekelitoka vo aleko minino.

Izesú atiginá oko ati zupa goní ita gakó

³ Ligivetegita, lekelikumú Ómasi agepoka loaká nouni hoza lumupiló itekago aleákounimó nene lekeza Izesukumú gili alévolé iaká niamó nenémo napa oloko novigo itó likigika eza amigo eza amigo niamó nenémo napa oloko novigo ámina hoza etokave.

⁴ Lekelí gopoguni mililikitate gasova netá nimililikitagó, miluma gili miniake gili alévolé iki likigika gologolo samigo alévolé iki hanuva niave. Nene gakó gelekunike, Ómasímini vegenala zuha miniliki vamó keitoka nene lukugupe aleko iteaká noune.

⁵ Itó lukumupiló miluma netá utó noikumú láa loko litune: Ómasímo lihimatemú gona mololetati zupa nene hee loko gona moloko limitimó nenémini mogona lá oko utó okave. Ómasímo lekelikumú gilio etokago, aí avogisaló vi hilatakumule loko gasovagi netalímini amupiló lekezagí niave.

⁶ Nenemú minoko Ómasímo gilio, etokago, gasovagi netá ali likimiaká nia vegenatoka áminagó oko miluma netá nene ámina vegená kiminogo ive.

⁷ Lá ooko Guivahani Izesú nene amuzagi agelogegi okulumakutí limita zupa nene gopoguni mililikitagó miluma gili miniaká nia vegenaki itó lezagi mino geleká apakú lelémo molanogo ive.

⁸ Lá nooko nene ló gulumagú lemeko Ómasímini mogona gelema vegená itó Guivahanite Izesuni gakó lamaná gili alema vegená miluma hoza kiminogo ive.

⁹ Lá nooko ezáa avogisalotí itó zámuzalalotí itó lapanalalotí kehelú ahulokiko, mini golesaló iliki viki minanigave. Ómasímo miluma hoza lá oko nokimiko,

¹⁰ Izesú atiginá oko ati zupa nene aí vegenala zuhate aí gonanalivagi lapaná ali otinigave, itó monola gili alévolé ina vegenalite sigaga litanigave. Lekeza ámina gakó lo lekemekuko gili alévolé ina vegená nianazo, nenemú lekelisi ámina vegenaki minanigave.

¹¹ Nenemú leza gamena gamena lekelikumú Ómasiloka loaká nounimó nene Ómasi eza sele lo likimimó nenémini lelegító iki miliki itave loko, itó aí zámuzatunú hize lé olifikimikiko, netá lamaná loló itune liki gili miniaká niamó itó gili alévolé iaká niamó nenémini hozaváa aliliki vitave loko loaká noune.

¹² Itó lekeza lá ikiko, Ómasile itó Guivahanite Izesu Kilistó nasahilí olimiaká noimó nenazo, Guivahanite Izesuni agulizá lekelisi ali otitaze, itó ámináminoko aí lapaná lekelitoka utó noiko, eza lekelí lukugulizá ale otitive.

* **1:1:** Apo 17:1

2*Lo huka gakó gele ahuloaká vema utó iti gakó*

1 * Nigivénegita, Guivahanite Izesu Kilistó ati gamena itó aitoka lelémo nupa iti gamena nenémini gakoláa lo likimitoze, gililo. Neza lakagata aleko láo loko lo likimitóve:

2 Vegená keza Ómasímini agepagutí gakokumupe itó gakó makokumupe itó luhuva netá makokumupe Pauló gizamole liki niliki Guivahanímini gamena mota okave liki nilikoma, lekeza litá iki gili gopa iiki mulutini itemino.

3 Gakó némini manámini lilikitiki likilími gopa ikataze, nenemú láa liki gililo: Apí oko Ómasi lova ali amiaká vegená utó ikiko, itó lo huka gakó gele ahuloaká ve lolímini mututoni loló inogo i vema utó okiko, Guivahanímini gamena alika utó inogo ive.

4 * Lo huka gakó gele ahuloaká ve nenémo vegenalite gelego ómai netá loló oaká noi netá itó vegenalite gupá zi amiaká nia netá nene lova ale amekoko keí holúkutí nene ezáa agupe aleko itinogo ive. Lá okoko Ómasímini monó zagusave napagú iteko minokoko ezáamú nénisi Ómasi nouve loko linogo ive.

5 Nénisi lekelitoka minuke, gakó láa loko lo lekemeva lekemeva umó nene lakagati molokahe.

6 Itó imane gamenaló ámina vémini gapova lí oaká netá nene gilinave. Ómasímo mola gamenaló eza utó inogo ive.

7 Imane gamenaló netá golesa aleaká vémo asugunatoka hoza aleaká noimóza, Ómasímo ámina ati vémini gapo hize lí oaká noi vema ale ahulomikiko, eza utó inogo ive.

8 * Ómasímo lo huka gakó gele ahuloaká vema utó okiko, Guivahani Izesuni agepa múnizámo apele hilinogo ive. Guivahani anititi zupa nene lapanalagi zámuzagi nooko alémo golesa inogo ive.

9 * Lo huka gakó gele ahuloaká vemámo Satani zámuzagi aniteoko haitopaitó suni alévolé netá mukí nene soza moloko ale utó inogo ive.

10 Lá okoko vegená lugáa latila oakálímini mututoni nene haitopaitó suni golesa aleko kogoka vizinogo ive. Keza gakó gihila lamanakumú kumu helemiko gili ahulatamó nenemú Ómasímo kugutó vizeminogo ive.

11 Vegená keza lá iaká nitakumú Ómasímo lokiko, kogoka vizeaká izolahanáa utó okiko nene, aí soza gakó gili zaginigave.

12 Lá ikiko gakó gihila nene gili ahuliiki, netá golesamú laga kivisiti vegená mukitoka nene lihima napa kumupiló itinogo ive.

Lugutó vizitove loko Ómasímo lelémo etó imó

13 Ligivetegita, Guivahanímo agika likimi vegená lekeza Sikalahulímo likigika nagamí zelikimikakeve loko itó gakó gihila gili zagikakeve loko lekelí nene apí oko lukugutó vizitove loko Ómasímo ezáa lekelémo etó ikumú nene gamena gamena Ómasi agepoka loaká hoza lumupiló itekago aleaká noune.

14 Lekeza lá itave loko gakó lamanáma lo lekemekuko giliiki Guivahanite Izesu Kilistoni gonanalivagi lapaná ali lá itave loko Ómasímo lekelémo etó imó neve.

¹⁵ Nenemú ligivetegita, lekeza likigika mili alévolé iiki legepagutí gakó loká itó luhuva netá ze lekemeká unike lainim-oleketunimó nene ali gikitiki ali minalo.

¹⁶ Guivahanite Izesu Kilistoki itó Ómasi ameteho eza agika lelitoka moloake nasahilí oletakeve loko lelémo huluga loaká netá mino lúaló moloko minoakalímíni itó netá lamanakumú lagata losi gelemoko ageva oaká nouhá netá ale utó oleta ve

¹⁷ áisi nene likigika nagá zeko hize lé olikimikiko, gakó gihila loaká itó hoza gihila aleaká nene lekelitoka lemeko akamino.

3

Lelikumú Ómasiloka lilo

¹ Nigivénegita, gakó makó lo asú oko lo likimitoze, gililo. Guivahanímini gakó nene puu loko vitive loko, itó lekelitoka utó okago gihila zimó nene áminagó oko vegená makotoka gihila zitive loko lelikumú Ómasiloka lilo.

² Itó vegená makolite monó nene avasavagi gili asú isá amanazo, kigika golesagi vegená lihimáinigi vegenalitini kigizakutí akagá oletative liki Ómasiloka numuna lilo.

³ Guivahanímo lokago alévolé oaká i vémo luhusatini ale kii loleketoko ve golesámo lekelémo golesa okative loko lekelémo vatí oko alata mololeketanogo ive.

⁴ Lekeza nene gakó loleketunimó nene gili aliaká niakumú itó gili aliiki ámegetiki minatakumú Guivahaniloka gímezekamole loko lekelikumú lagata losi geleminogo une.

⁵ Guivahanímo likigika ale vávani iko, Ómasímo agika lekemeaká noikú itó Kilistó alévolé oko oko moloko ikú miní amitave loko Ómasiloka noluve.

Hoza alemoko zogozogo vizeaká gakó

⁶ Nigivénegita, Guivahani Izesu Kilistoni agulizató nene hoza gakó láa loko nololeketune: Izesuni vegenala zuha luguhá nenete gakó lo lukumuható iki gímezemake, hoza alemake, gopa miniaká niave. Nene vegenaki apiziki minamilo.

⁷ Leza lekelitoka vuni zupa nene gapo veleketoko hoza aleaká unimó nene mota gilinave. Lekeza ámináminiki lémegetalo. Leza lekelitoka nene hanuva minosá amuháma neve.

⁸ Lekelitokatí nosánetá meinaváa nomimó hanuva noloko vova vova amuháma neve. Nagá zeko ale nominuko goselé lekepelekative loko lugupeló netá meina hitzitune loko únaká neteká miluma hoza aleaká unimóma neve.

⁹ Itó lekelitokatí nosánetá alitave loko lo hukoletonoimóma nemóza, mogonáa lekelepizunike lelí ligizakagú lisatave loko hoza lá oko aleaká unimó neve.

¹⁰ Lekelitoka minunike ve makolímo hoza alemoko zogozogo vizitimó nene, nosánetá mosimikiko namino loko lo lekemenounimóma neve.

¹¹ Itó imane lekelitokatí gakó makó aliake vegená lugáate kezáini hozanini ahuliaké zogozogo viziki ve makolitini hozagú gavakavató mihina iaká niave liki likago gelekune.

¹² Vegená nenémináa keza Guivahani Izesu Kilistoni gakotó kagata aleko láa loko noloketune: Keza legesó iki hozáini alikiko, gihila utó iko nataze.

¹³ Nigivénérita, lekeza mogona lamaná loló oakakumú goselé leke-pelemíno.

¹⁴ Imane pepagú gakó gizo nolukumumó nene makolímo gele ahulokikoma, aí mogonamú giliiki nene ahulikiko, ezágó minoko avoza hilitize.

¹⁵ Nene lova ali amitave loko lamuve. Ligivetehove liiki agata aliki alími vevesalo.

Nónohá zeketa gakó

¹⁶ Guivahani eza hulu amelaho gamena gamena haitopaitó suni aleko hulu ale utó oleketino. Guivahani nene lekelitoka minoloko voko minino.

¹⁷ Neza Paulona itínasa luhuva nogiza vémini agizakutí luhuva gizoaká nogosanima alekuke nigizanitunú luhuva imane nogizumó nene není anosave loko nene nogizuve. Neza gamena gamena není luhuva lá okogó gizoaká nouve.

¹⁸ Guivahanite Izusu Kilistoni nasahilí lekelí mukitoka mino moloko minino.

Timotini Luhuva Nampa 1 Pauló Gizo Amimó

Timotini nónohá amike gizo ami gakó

¹ Neza Paulona Ómasi lugutó vizeaká vémini gakotó itó Izesu Kilistokumú lagata losi gelemoko ageva oaká nouni vémini gakotó neza Izesu Kilistoni aposolo noutimina,

²* Timotiga monó gapogú gelémo muluke gelémo lá uke gipáne noane loko noluve. Geí luhuva imane gizo nogumuve. Ómasi ameteho itó Guivahanite Izesu Kilistó agika hize gemeko nasahilí ogetoko hulu ale utó ogetino.

Soza saza monokumú gizapa itive loko agata alímó

³ Neza nene Masetonia mikasigú vinogo nouke gagata aleko lo gumumómámini ozo. Lá oko nene Epeso numutoka goha miní ameko minozo. Minoko vegéná lugáá nenete soza saza monó apí i nikememó nene ahulatave loko lokimikako ahulataze.

⁴ Makó nene gitene gakó itó vegéná hizi hutilí iki minimi ite gakó nenémini mogona likago, nenémú iteká leméká okago, li volaló imaló goha ikave. Lá ikago, Ómasimú gili alévolé iki gelekelé itata gapo nene utó amive.

⁵ Monó loakalimini gihiláá lá oko utó okiko etanogo ive: Ligika nagamí zeko minoko, ligikagú gakó golesa makó minamiko, ligikatunú gele alévolé oko minoko ligika eza amiko eza amiko oaká nene utó itive.

⁶ Ve lugáá nenete monó gapo imane ámigi ahuliki kemegesa amiake, ha gakó gihila nomimó nene ligili hagili iaká niave.

⁷ Lá iake, kezáinimú nene Mosé lo hukoko li gakó lainim-oketatune liki amuza miliaká niamóza, gakó nilamó nenémini mogona itó gakó makó alévoleka liki nilamó nenémini mogona gili vevesamave.

⁸ Leza nene lo hukoko li gakokumú nene lāá loko gelenoune: Nene gakó lamaná nemóza, Mosé lo hukoko li gakó itó haitopaitó li hukina gakó nene mogona lamanatokó ámegetatunimó nene lamaná onoive.

⁹ Leza lāá loko gelenoune: Vegenalite li hukina gakó nene lihimáini nomi vegenalitini mututoni nomine. Li hukina gakó gili ahuliaká nia vegéná, itó gínikaha ita vegéná, monóini nomi vegéná golesa, kigika golotuva latimó, monokumú gelema vegéná, izóikini améikini itó haitó vegénaki kipili hiliaká a vegéná,

¹⁰ mokoló vegéná, vémohe venalímohe agivelahitoka voko gímizekiko akiaká, vegéná gumina aleaká, sozaló vegéná, hakupá gakó li kimiaká vegéná, itó netá lugáá nenémo monó gakolímimi gala veva nene netá nenémináa aliaká nia vegenalitini mututoni neve.

¹¹ Ámina monó gakó nenémo Ómasímo gakó lamaná lehizenetamó nenegú noiike lelí Ómasi lagámini lapanala lo utó oaká noive.

Ómasímo agika hize amikumú agepoka limó

¹² Zámuza lehizenetake luhusáne ale gilitoneta ve Guivahanite Izesu Kilistoni agepoka loaká nouve. Áisi nenikumú gilio, aí gakotó amegesaló moloaká ve loló nougo, gelekelé onetatane loko nelémo etó okave.

¹³* Goí oko nene alevo letovo uke gopoguni nomolotuke agulizá ale

mumusopa zeaká umó nene neza aí monó gele guni amuke gatizá minokuke, lá ukumú agika hize nemeake,

¹⁴ Guivahanitémo nasahilí napa onimiake, Izesu Kilistotoka voko gímizumómave loko gele alévolé oaká itó agika nemeaká netá nene lehizenimikave.

¹⁵ Izesu Kilistó eza lihimáinigi vegeán kugutó vizitove loko mikasiuka limi gakó nene lamaná neve. Mukitó gele alesató neve. Itó netá golesa aliaká a vetini guivahani nénisi nene noumóza,

¹⁶ Izesu Kilistó eza asene zenetoloko vova vova imó nenémini mogona nelepizitove loko Ómasímo agika hize nimimó nene hanuvamú nomive. Vegená nenete alikaloka není mogona ániiki gili alévolé iki alévolé kemetameni alitave loko lá imó neve.

¹⁷ Alévolé Guivahani napa, helemoakalímini, itó ánigamoakalímini, Ómasi hamokó aí agulizá ale otekuko, aí lapaná nenémo mino lúaló moloko minatize. Lamaná.

¹⁸ Gipáne Timotio, goí oko Ómasímini agepagutí gakó geikumú utó imó nenemú gelekuke láa loko nologetuve: Ámina gakolímo gelémo vávani okiko, lovagú iaká niamó nenéminoko monó hoza alévolé oko alezo.

¹⁹ Lá okoko, gele alévolé o minoko gigikagú némini manámimi gakó golesa minamiko, monó hoza alezo. Vegená lugáa nenete kigika lapanaki minoaká gakó nene gili ahuliake, Ómasimú gele alévolé oakatini nene ahuliake, kigika gologolo sokago,

²⁰ latila inigi amó keikutí ve losi Haimeniaisiki Alesateki niasive. Satani agizakú vi hiliki Ómasimú alivi letivi amitái mogona gilitáive loko kimisele ahulokuve.

2

Ómasiloka lituni gakó

¹ Gakó imane goí oko iteko alévolé itive loko neza gagata aleko noluve. Lekeza vegeán mukikumú voká voká liki Ómasiloka liki eza hize lé oketative liki keikumú Ómasi agepoka liki minatave loko nologetuve.

² Itó lekeza legesó iki hulu iki monokú lamaná iki minikiko, vegeán nenete nemú manamú giliko lamaná itive liki kugulizaki ve napamú itó mukí gizapa vegenakumú Ómasímo hize lé oketative liki numuna hoza alilo.

³ Nenémo lamaná inogo ive. Itó lugutó vizeaká Ómasi eza nenemú giligo etoaká noive.

⁴ Eza nene vegeán mukitoka kugutó vizitove loko itó gakó gihila ali lá itave loko geleká noive.

⁵ Ómasi hamokó noive, itó Ómasi leza vegenakai agata helega helega nouko ve hamokó Izesu Kilistó holutegú ve loló i ve nene

⁶ vegeán mukitoka lihimate meina hizko gologí oletatove loko minoko aleko imoláa nene ahulamó. Ómasímo nenémini itove loko ezáa mola gamena nene alitokago vegeán mukitoka kugutó vizitove loko nogilimó nenémini avevezahaváa utó okago gelekune.

⁷* Ámina gakó lo utó oaká ve itó aposolo loló itane loko Ómasímo nelémo etó okago nouve. Zuta ve minamamolaloka gakó gihila gele alévolé oaká

gakó mogona lainim-oketatane loko nelémo etó okave. Nene soza lamuve. Lamaná noluve.

⁸ Nenemú numutó namató monó gilina vegená keza kizapaló moloko itó lova leta lava leta nomitimó kigika gizopa lo miniko kigizani ali otiki numuna litave loko noluve.

⁹* Itó vená keza gineganéini ali lamaná iki luhiiki ali hita hita iki mihina itave loko noluve. Itó ve kumu hilitune liki gotóini zopova haitopaitó gonanalisi amitave. Gonanalisi netá golivagi itó luhuaká gó luhuvagi nene luhamitamó neve.

¹⁰ Monó gilina vená nenete etati lelegító minatamómámini iki lamaná iki iki miliki itatímo gineganéini loló ino.

¹¹ Vená keza legesó iki limiki miniki kagata gili vevesi miniki gakó gilitaze.

¹² Vená neneta monó tisa lilí itamope itó ve kivilegeko gizapa oketatune litamope nenemú gele kemesá amuve. Monó litakú nene keza gakó lamiki legesó iki minataze.

¹³* Lá itakumú nene Atani nene goí oko alémo utó okago Evani nene alika alémo utó imó.

¹⁴* Itó Atani nene Satá gimivagú molamimó neve. Evani nene gimivagú molokago, gele ameake pelevesava ale utó ikumú noluve.

¹⁵ Lá okamóza, vená keza monó gili alévolé itamó itó vegená makó kigika kimitamó itó kigika gizopagi minatamó nenémini agikagú miní amiki némini manámmini osá nene netá golesa okatune liki kugupe gizapa iki minatamó nene, izegipa nigetiko Ómasímo kugutó vizinogo ive.

3

Pastoli hozaló minoaká gakó

¹ Makolímohe makolímohe pastoli minatove loko litimó nene, hoza gihilamú linogo ive. Nene gakó gihila lamaná neve.

²* Itó pastoli loló iti ve nene, lihimavala nomitimó minoko ganakutí vená hamokó aleneiti vémo minatize. Némini manámmini osá golesa okatove loko aguveva gizapa oko minatize. Legesó oko zou loko minatize. Veno vegená ikikoma nasahilí oketoko kelémo molatize. Lainim-okimiaká hoza nene gele vevesesoko ale hee loko alitize.

³ Negi nagamí mukí nokoko negi hizemitive, itó negi nagamí nokoko lovaga loko lova ale utó amitize. Eza legesó oko hulu oko minoko, moni henoniló agika molamitize.

⁴ Ezáa vená izegipala legesó oko lamaná oko gizapa oketoko kagata aleko kelémo vevesokiko, limiki miniki gelekelé itataze.

⁵ Ve makó ezáa vená izegipala lamaná oko gizapa oketamitimó nene, Ómasímini vegenala zuha nana oko gizapa oketative.

⁶ Itó monó nagamí izoha holati ve makolímo pastoli loló amitive. Nenémo ezáa aguve aleko itekiko, Satá eza amimika lokiko, lolímini mututoni loló okatize.

⁷ Ómasímini vegenala zuha lilí ama vegená keza ve makolímimi mogonamú gilikó, etokiko nene, áisi nene pastoli loló itive. Aí amé zikiko nene, Satani gelehusigú apelekatize.

Monó gelekelé ve minoaká gakó

* **2:9:** 1 Pit 3:3 * **2:13:** Apí 2:7 * **2:14:** Apí 3:1-6 * **3:2:** Tae 1:6-9

⁸ Ve makó keza monó gelekelé ve loló itune liki áminagó iki ve zouváa minataze. Keza genezáini lositaki minamitave. Negi nagamító ve minamitave. Moni henonímumumuzó amitave.

⁹ Lelí monó imane asuguná oko minatotí mota utó okamó nene ali gikitiki miniki, kigikagú gakó golesa minamiko minataze.

¹⁰ Keí nene goí iki mulúkú hiziki mogonáini ánigikiko, etokiko, monó hoza nene kimikiko monó gelekelé ve lilí itave.

¹¹ Ámináminiki venáini keza zou liki minataze. Netá nemú manamú osá golesa okatune liki kugupeló gizapa itave. Venáini iki miliki itamó nenémo gihila loló onoi vete monó gelekelé ve lilí itave.

¹² Keza ganakutí vená hamokó alinita ve nenete ámina hoza alitave. Vená izegipáini zuha vati iki gizapa ikitatave.

¹³ Lá iiki monó hoza alitamó nene lamaná okikoma kigikámini henoni lamaná nene keitoka minanogo ive. Izesu Kilistotoka viki gímiteakakumú gakó vávani iki li utó inigave.

Lelí monolímini asuguná gakó

¹⁴ Neza nene noanitoka litá oko vitove loko gelekumóza, imane luhuva gizo nogumumó nene,

¹⁵ netá makolímo nagá zekiko nominugoma geza láa loko gilitane loko luhuva imane gizo nogumuve. Léisi nene alévolé ve Ómasímini vegenala zuha aí lapusava lili iiki aí gakó gihila hizi lé ita vegenalitini holúikú mininake, oko moloko itunimó nenémini mogonamú luhuva imane gatokoko gilitane.

¹⁶ Lelí monolímini asuguná gakola halá geko minamó nenémini gihiláa Izesuni mogonamú láa liki li utó iaká niamó nene, golivagi neve:

Áisi nene lelí lugupe ale luhoake utó imó.

Sikalahlímo aí mogonáa ale utó igo hee loko minamó.

Ageló vegenalite aí ánigamó.

Numutó namató vete aí gakola gili asú amó.

Mikasiuka vegenalite aikumú gili alévolé amó.

Okulumá lapanalaló alémoko itimó.

4

Sozaló monó ve alika utó itakumú limó

¹ Sikalahulímo lo utó oko láa loko loaká noive: Minomo noiteko alikaloka ve lugáate monó ahuliuki kilími gopa napa iaká nia holositini gakó gili alinigave. Itó ámina holositini soza saza gakotó viki gímizitave.

² Ámina soza sazaló ve nenete kigikámini gakola gili ahuliaká niago mota lí okagove liki vegená kogoka vizeke láa liki li kimiaká niave:

³ Vená alemiki gohuna minalo, itó nosánetá lugáa namiki mosiaká ilo liki liaká niave. Ámina nosá nene Ómasímo gili alévolé iki minata vegenalite itó aí gakó gihila gili zagita vegenalite agepoka liki hanuva natave loko ale utó imóma neve.

⁴ Ómasilokatí utó onoi netá nene lamanakó neve. Nenemú nene agepoka loko ámina nosánetá aleko noaká noune. Nenemú moseakaláa nomive.

⁵ Ómasímo ezáa gakoláamule loko itó agepoka loko noaká nounikumule loko lusa genei netá nenazo, óe loko lonoi netá nomive.

Kilistoni gelekelé veva lamaná minoaká gakó

6 Gele alévolé oaká nouni gakó itó monó gakó gihilaló voko gímizenimó nenémo gigikámini nosánetá loló oko noiko, geza nene monó gele vegená gakó imane lo nogumumómá nene lo kemeko kelémo lamaná itanimó nene, Izesu Kilistoni gelekélé izegipala lamaná minanogo ane.

7 Gitene gakokú monola nomive. Nene gakó gemegesa amezo. Geza nene monokú voko gele alévolé oko moloko itove loko, gigika alémo vávani oaká hoza alezo.

8 Lugupe ale vávani oaká hoza nenémo lamaná otigí nemóza, monó gakkumú ligika alémo vávani oaká nenémo itína gamenaló nemó alika gamenaló nemó Ómasilokatí alévolé lemetameni lehizeletati netá nenazo, nene gihila lamaná neve.

9 Nenémo gihila nenazo, vegená mukitoka nenémini gihila ali lá itave loko amuza moloko hozaváa aliture.

10 Ómasi eza numutó namató vegená mukitó kugutó viziti ve noimóza, keikutí gele alévolé unimoláa lamaná lugutó vizeaká noi ve noinazo, nenemú Ómasi alévolé ve atikumú lagata losi gelemoko ageva oaká noumómave loko miluma hoza lumupiló itekago hoza napa aleaká noune.

11 Gakó mukí lo nogumumó nene gili alitave loko monoka gele vegená lainim-oketozo.

12 Gézi nene izegipa gosohá ve noane liki vegenalite geikumú gilikó lemegino. Geza gele alévolé o minoko gigika gizopa lo miniko, gigika kemekoko oko moloko itanítimo itó monó litanítimo gili alévolé a vegená gapo kelepizeko geí gémegetatave loko lá itanize.

13 Monó gotolaú gakó gato kemeaká hoza itó monó mogona lo utó oaká hoza itó monó lainim-okimiaká hoza nene hozaló gigika ame gikitoko amezo.

14 Goí oko nene monó olotiva vete kigizani nene gotokaló miliki lusa nigitiki Ómasímini agepagutí gakó makó geikumú linató nene Sikalahulímo monolímini zámuza lehizegetamó nenémini gihiláa gopa okatize, alévolé oko gizapa oko minozo.

15 Vegená mukilite monokú oko moloko anitímo napa omo novimó nene ánígikiko, laga kivisitive loko, nénisi lo nogumu gakó nene gigika molo gikitoko ale minozo.

16 Gezaka gugupe gizapa oko itó monó lo kimitani gakó avasavagi gizapa oko gakó lo gumumó nene alévolé oko ale minozo. Lá itanimó nene, gezagi geí gakó giliaká nia vegenaki alévolé apá alinigave.

5

Monó gilina vegená nasahilí oketatuni gakó

1 Ozaha makó gakó lo amitove loko nene, gahá ameko lamo. Aménegave loko alémo geha zeko lo amezo. Gosohá ve nene nugunamotamóneve loko némini manámini oketoloko voko minozo.

2 Gelehosí nene izóngeditave loko gizapa oketoko némini manámini oketoloko voko minozo. Vená gosohá nene mohó nugunamotamóneve loko némini manámini oketoloko novoko nene, gezaka gugupe gigikaloka gizapa ozo.

3 Itó gevóná vená nene kezáikó niiki muhelé ahelé iki niminikoma, kelémo lamaná oko hize lé oketozo.

4 Gevoná vená makolímini izegipagi agapilamoki keza nene goí iki kezáini numúikú nene monó hoza alitiki alími lamaná itave. Lá iki nene emane amunaloka izóipiki améipiki gizapa ikitató nene, ámina lihima apasiki gelekelé itataze. Nenemú Ómasímo gilikó lamaná inogo ive.

5 Gevoná vená gihila nene kezáikó miniki Ómasimú gili alévolé iake, gamena gamena únaká neteká Ómasiloka liki voká voká lake kagata losi gelemake ageva iaká niave.

6 Itó gevoná vená makolímo mokoló minokikoma nene, aikumú nene agómulagi noihe liki lamiki ameni mota heleneive liki gilio.

7 Gevoná venalitini lihimáini minamitimó miniko keitoka gakó minamitive loko gakó imane lo hukoko lo kemezo.

8 Makó keza keí vegenaíni zuha itó keí vená izegipáini nene gizapa lamaná ikitiki nasahilí ikitamítamó nene, lelí monó ahuliake monó gelema vegena kiviligiki limiki minanigave.

9 Gevoná vená makolímohe makolímohe ve hámakoki mino-loko noitiiko kilisimasiva 60 minatímó nene, monó hoza koma naliko nosánetá koma ale utó oko native loko agulizá nene ámina venalitini kugulizá mina pepagú gizo molokako minino.

10 Áisi nene oko moloko igo vegenalite gili lamaná inamó noitihe, itó izegipala getokoko lamaná oko gizapa oketoko nasahilí oketamó noitihe, itó aitoka veno vegena ikago nasahilí oketoko kelémo molamó noitihe, itó áisi lemeko minake Ómasímini vegena lama zuha lugáa nasahilí oketamó noitihe, itó vegena miluma maluma gilikago kelémo lamaná imó noitihe, itó vegena nasahilí oketoko némini manámini oketonoitihe. Mogonáini nene loká miká okako, lá okogó neikoma, kugulizá gizatanize.

11 Gevoná vená gosohá nenete lugulizá nene pepaló gizatane likikoma, óe loko gizamo. Veló goha vita netakumú kumu helepelé okiko, goí iki Kilstototka viki gímezomá ahuliake atiginá iki viaká niave.

12 Lá iake nene, kezáini apí iki monokumú ale amegetsaló molatune liki li huka gakó nene gili ahulikago, lihimáini íteko minokave.

13 Lá iake nene, numukú numukú itigá limigá iki hanuva gakó liki miniaká niave. Itó nene negó nomive. Keza notuni mihina ake hanuva gakó gopa napa gakó golesa liva liva ake, vegena makolitini netá matakú gavakavató mihina iaká niave.

14 Nenemú nénisi láa loko noluve: Vená gevoná gosohá keza veló goha viiki izegipáini geti miliiki, kezáini numukú makó miniki aliki ita vegena gizapa lamaná ikitatave. Lá iki niiko, lelí gala ve nenete kegepa zikiko, lelikumú gakó golesa lamitave.

15 Gevoná vená lugáa keza litá iki latila oaká gapoló vake, Satani ámegetiki viaká niave.

16 Izesukumú gele alévolé onoiti vená makolímini zuhagutí gevoná vená makó nitamó nene, áisi nasahilí oketative. Lá noiko, monó gele vegenalitini mukító netáikutí alemiko, monó gele vegenalite keza gevoná vená kezáikó minamoláa nene hizi lé ikitatave.

17 Monokú olotiva ve keza hoza alikiko, lamaná okikoma nene, monó vegenalite meinaváa miní amiki napa iki kimitave. Monó li kimiki lainim-ikimiaká hoza alévolé iki alita vete nenéminkí aliki itikí alitave.

18 * Meinava alitakumú nene monó gotolaú luhuva láa liki gizinamóma neve:

Pulumaká nenémo hoza aleloko novike nosánetá natove loko noikoma, agepaló gahumá itamilo. Hanuva natize.

Itó gakó makó láa liki luhuva gizinamóma neve:

Ve makolititoka hoza alita ve nenete ámina vegutí meinava alitaze.

19 * Ve hámakó nenémo monó olotiva ve makó gonító alémo molatove loko nolikoma, litá oko gele amemo. Vegená losihe losive makolehe lá ive liki likikoma, gelekoko gakó gilitanize.

20 Ve makolímo lihima alekikoma, lugáa keza giliiki kelegesá ligitive loko monó gele vegenalitini kovogisaló gahá amezo.

21 Neza Ómasímini itó Izesu Kilistoni avogisaló itó Ómasímo kelémo etó okago aí amatoka ageló niamó keí kovogisaló láa loko lo nohukogetuve: Gakó imane lo hukoko lo nogumumó nene gele alekoko gizapa okako lemeko akamino. Ve vená gakóini litove loko vegená lugáamú gelekako, iteko lemeko lamoko kelémo lisihé okogó noloko néminí manámíni loló oketozo.

Monó hoza alita ve kilími etó ita gakó

22 Ve makó keza monó hoza alitave loko litalilá oko lusa geketamo. Keí lihimáinímo geí gumupiló itekatize. Gezaka gugupe gigika gizapa okako gizopa lo minatize.

23 Itó Timotiga, geza mulukagú akohú oká giviseká oaká noimó nene nagamikó namoko vain nagamí koma ma natane loko noluve.

24 Itó ve lugáatini golesa netáinímini lihima nene Ómasímo nogosani kimiti gamena velesá alitamigo litá oko utó oaká noive. Ve lugáatini lihima nene itína asuguná nemóza, alika utó inogo ive.

25 Ámináminoko vegená makolitini nasahilí hoza nene itína utó oaká noive. Itó lugaloka lá amitimó nene, asuguná halá geko minoloko voko minaminogo ive. Alika utó inogo inazo, nenemú monó hoza alita ve nene litá oko kelémo etó amitané loko noluve.

6

1 Megusa izegipa lilí iki hagitana hoza aliki miniaká nia vegená keza nene ve napáinimú láa liki gilitaze: Vegenalite Ómasímini agulizá alilikí limiki monó aliki letikatanazo, nenemú ve napatémini kugulizá ale oteko gelekelé lamaná oketatune.

2 Láa liki giliiki, ve napáinimú nene kezagi lezagi hamó monó gele alévolé okunike, lisihé oko minokune liiki keikumú giliko lememino. Gelekelé izegipáini hozalotí meinaváa aliaká nia vete Ómasimú gili alévolé ina ve ni-anazo, itó gelekelé izegipáini nene Ómasímo agika kemeaká noinazo, nenemú lamaná iki gelekelé ikitatamó nene etanogo ive.

Moni henonimú mumuzó oaká gakó

Geza nene kelémo oteko gakó imane lainim-oketozo.

3 Makó keza gakó gihila gili ahuliiki haitó monó lainim-ilikitatamó nene, itó Guivahanite Izesu Kilistoni gakó gili ahuliiki monó gapómini gakoki kemegesa amitamó nene, keikumú láa loko gilitune:

* **5:18:** Gapo 25:4; Mat 10:10; Luk 10:7 * **5:19:** Gapo 17:6, 19:15

⁴ Kezáini kagata gili ki kugupe aliki itiki gakoláa ma gili vevesamave. Gakó miní amiki liva liva iki miniáká niamó nenémo kumu helekago, kemekugú niká lova leta lava leta iká itó alivi letivi iká, itó hanuva kemegeka liki gopa gakó liká,

⁵ itó ligí ahuligí iki miniká ita netá ali utó iaká nia vegená nene kigika kagata gopa okago, gakó gihila ahuliake, monó nenémo moni henoni ale utó itihe liki giliaká nia vegenalitini holúikú ali utó iaká niave.

⁶ Moni henonimú lugupeloka ale akalatuni netakumú mumuzó amoko mota alenouni netakumú lepa hizeko kii lo minatunimó nene monokú henonigi vegená minanogo une.

⁷ Leza láa loko gelenoune: Izotege getikago utó uni gamenaló nene, netá matá henoni ma alekamune. Itó minoko hilituni gamenaló nene lugupe zapakó vinogo une.

⁸ Nenemú nosánetá ginegane lelitoka ma nekoma nene, áminasí lelitoka neve loko hanuva zou loko minatune.

⁹ Moni henoni sipisimú kumu heleaká noi vegená keza Satá giminikú molokiko, Satani gelehusigú apilinigave. Lá niiki, ha netá negi netá kelémo gopa iti netá haitopaitokumú kumu helekiko, nenegú limiki latila iki golesa inigave.

¹⁰ Moni henonimú mumuzó oaká nenémo haitopaitó golesa netalímini mogonáa neve. Vegená lugáate ámina gapoló viake, monó gele alévolé oakáini ahuliake kemegesa amiáká niave. Lá ikago, keitoka miluma netá mukí utó oaká noive.

Gele alévolé oakakumú amuza moloko hozaváa alitune

¹¹ Omasímini hozaló ve geza netá nenémináa gemegesa kemezeo. Lá okoko nene, hee loko lamaná minoko oko moloko oaká, monolagi minoaká, gele alévolé oaká, gigika kemeaká, itó gopoguni miligimiaká utó noiko amánapa oko ote minoaká, kelémo hulu oaká, nenéminoko minatove loko amuza molozo.

¹² Lá nooko, Izesukumú gele alévolé oakakumú amuza moloko hozaváa alezo. Aleloko voko alévolé gemetameni nene ale gikitoko alinogo ane. Itó gezaka lá itove loko vegená mukilitini kovogisaló monó ale lá nouve loko lo nohukako, Ómasímo ámina alévolé gemetameni ale luhatane loko sele lo giminomá neve.

¹³ * Netá matá mukí ale utó i ve Ómasímini avogisaló itó kiapé Potiasí Pilatoni amatoka ezáa mogonamú lo utó i ve Izesu Kilistoni avogisaló láa loko lo hukoko lo nogumuve:

¹⁴ Guivahanite Izesu Kilistoni gamena velesá alitamigo gilími etó a zupa lo hukogetu gakó nene gigika gizopa lo miniko lihimaka nomitímó ámegetoloko voko minozo.

¹⁵ Ái gamenava alitatimó nene, Ómasímo lokiko, utó o lamaná inogo ive. Ómasí eza mino lúaló moloko minoaká lagámini gizapa ve hámakó minake, kugulizaki vetini agulizaki venini, itó gizapa vetini gizapa venini hamokó noive.

¹⁶ Ezágó heleakovagi nomive. Áisi lapanató minoko aleko noitó nene, leza hanuva voko aniteakaláa nomive. Ve makolímo aí agupe ánígosá amimomá neve, itó ánígamitímó okave. Sigaga lomiaká zámuza itó alévolé oko minoaká zámuza aitoka minino. Lamaná.

* **6:13:** Zon 18:37

¹⁷ Geza imane mikasigú netá moni henoni mukí ali miniaká nia vegená láa loko lo hukoko lo kemezo: Kugupe aliki itiki holomaló milamitave. Tolova oaká henonimú giliko, alévolé amino. Neneloka viki leheta amilo. Ómasi eza loko lisolimiaká noi veloka voko leheta itunize.

¹⁸ Geza láa loko lo hukoko lo kemezo: Netá lamaná alitakumukó giliki aliki minalo. Mogona lamaná iki miliki itamó nenémo lekelí henoni loló ino. Nasahilí iki miniki, netá matatini gona miliki ali laga laga iki aliki minalo.

¹⁹ Lá iki monó gihila ali utó itamó nenémo luhusáini loló okiko, alikaloka minoloko voko minatimó neve. Lá noiko, keza alévolé kemetameni gihila nene ali lá itave loko lo kemezo.

²⁰ Kee, Timotiga, helisa netá Ómasímo gimimó nene gizapa oko ale minozo. Itó ha gakó pisila nomimó nene vegená lugáa keza ali minake, lelí monó pelevesava ziake, mukí netá matá mogona gele asú noune liki, soza gakó liaká niave. Géisi ámina gakó gemegesa amezo.

²¹ Vegená lugáate ámina gakotó viki gímiziake, lelí monó ánigi satiake ahu-likave.

Ómasímini nasahilí nene lekelitoka mino moloko minino.

Timotini Luhuva Nampa 2 Pauló Gizo Amimó

Timotini nónohá amike gizo ami gakó

^{1*} Neza Paulona Izesu Kilistotoka voko gímizekugo alévolé lekemetamenigi minatave loko lo mololeta gakóma lo utó itove loko Ómasímini gakotó imane Izesu Kilistoni aposolo loló oko noutímina,

² Timotiga, monó gapoló gelémo muluke gelémo lá uke nigika gemenou ve luhuva imane gizo nogumuve. Ómasi ameteho itó Guivahanite Izesu Kilistó eza nasahilí ogetoko agika hize gemeko hulu ale utó ogetino.

Timotinimú Ómasi agepoka like agika ale kii lota gakó

³ Avónege kigika lamanaki minake, omolelé amalelé iki Ómasi gelekelé itiki minamómáminoko nénisi nigikagú gakó nomigo Ómasi gelekelé otuke agepoka loaká noumó nene, gamena gamena únaká neteká geikumú gele minuke Ómasiloka loaká nouve.

⁴ Makotoka vinogo nougo nenikumú ive nama animó nene gele minuke, voko ánigogimikinake mulúnegú agila guluma napa itive loko geleaká nouve.

^{5*} Ómasimú gele alévolé oaká gihila nene geitoka nemó nene gele nominuve. Itó atekaho Loisí itó izokaho Zunisí goí iki Izesukumú gili alévolé inasigo geza ámináminoko gele alévolé onane loko gele guni onouve.

⁶ Nenemú gelekuke, lokugo, gakó imane goha gilitanize. Neza gotokaló nizizani molokugo Ómasímo monolímmini zámuza lehizegetamó nene, gizapa lamaná oko ale otenako, ló guluma ino.

⁷ Lá nooko, láa loko gelezo: Ómasímo nene nemú manamú lelegesá leg-eakalímmini lemetameni lehizeletamímoma neve. Amuza moloko ligikatunú nasahilí oketoko ligika lugupe gizapa itave loko lemeneimóma neve.

⁸ Nenemú Guivahanitémini gakó lamaná lo utó itanikumú govoza helemimo. Lá nooko aí hozamule loko kalapusi numukú noumómove loko nenikumú govoza helemimo. Ómasi eza zámuza gemeneimó nene ale minoko, Izesuni gakó lamanakumú gopoguni miligitikoma, gezagi nenémini amupiló hanuva minozo.

⁹ Ómasi eza lugutó vizike otopá ziki etó iki keké viziki minatave loko sele lo limimó nene oko moloko uhá ma lamaná nego lá amimó. Ezáa agikatunú geleake nasahilí hagitana lehizeletamó nene eza gozapá mikasi ale utó amike Izesu Kilistoni mututoni lílít itakumule loko lehizeletake,

¹⁰ gihila zitikú nene imane gamenaló lugutó vizeaká amelaho Izesu Kilistó lemekago ámina nasahilí nene utó o lamaná imó. Áisi nene heleaká netá apele heleake, alévolé oko minoaká netá helemoaká nene aí gakó lamanatunú ale utó oletamó neve.

^{11*} Neza ámina gakó lamaná lo utó utó ve, itó aposolo itó tisá minatane loko Ómasímo nelémo etó onoimóma neve.

¹² Itó neza nenemú miluma geleaká netá nene numupiló itekago kalapusi numukú noumóza, nenemú novoza helesá amive. Neza gele alévolé onou vémini mogona gelenouve, itó nagata losi gelemoko noinake eza amuza

amelaho noinazo, nigika amenoumó nene gizapa onetoloko noviko, aí gamenava alitanogo íve loko gele guni onouve.

¹³ Gakó gihila geza ámegetatane loko lainim-ogetonoumó nene áminagú ale minoko Izesu Kilistotoka voko miní amenikeve loko aikumú gele alévolé oaká itó gigika kemeaká nenémini agikagú minozo.

¹⁴ Ómasímini Sikalahú mulutegú minoko aleko oaká noimó áisi izokaho loló iko Ómasímo gemenei netá nene gizapa ethoa oko ale minozo.

Onesipoloni gakó

¹⁵ Asia mikasiuka mukí vegenalite ahuli asú inimikave. Keikutí nene Pigeloki itó Helemogeneki niasimó. Nene mota gelenane.

¹⁶ Onesipoló eza kalapusi numukú minukumú avoza helemigo gamena gamena luhusáne ale kii lonetamó nenazo, Guivahanímo ezagi vegenala zuhagi milumaváini geleko agika hize kimino.

¹⁷ Áisi Loma apatoka oake nenikumú vitágá ike ike nelémo utó imó.

¹⁸ Guivahanímo gilikó, lamaná okikoma, gamena napaló Guivahanímo agika hize amitive loko noluve. Itó Epeso numutokagi eza nasahilí onetoko hoza aleko minamó nene komasí nomimó nene lamaná gelenane.

2

Izesuni gimisivagi ve lamaná minati gakó

¹ Gipáne geza Izesu Kilistotoka voko gímizunikeve loko nasahilí lehizelimi-aká noimó nenémini agikagú minoko alévolé ozo.

² Ve mukilitini kovogisaló gakó mukí lo gumumóma nene, ve lugáamú gelekako alévolé ina vegená minikikoma, ámina gakó lehizekimikako, ámináminiki vegená lugáa lainim-ikitataze.

³ Geza Izesu Kilistoni gimisivagi ve lamaná loló oko minoko, gezagi gopoguni militatakumú goselé gepelemino.

⁴ Ami ve lili iiki hozaváa alita vete hanuva vegenalite iki miliki itatotí apazá minanigave. Ami ve lili itave loko kelémo etó i ve agulizaki ve nenémo gilikó lagaváa gilitive liki nenémini hozagó alitune liki gilitaze.

⁵ Itó lesisitakú nene ve makolímo ámina zohilímini gizapa vevámo lesismú lo huta gakó avutá itimó nene, gihiláa aleminogo ive.

⁶ Makó eza zuhaina oko amuza moloko miluma geleko zuhá iti vémo nosánetá omolokiko goí oko nanogo ive.

⁷ Guivahanímo gigika alémo zou lokiko nene, netá matá mukí gele vevesataninazo, anoza gakó láa loko lo nogumumó nenémini mogonáa geleko alémo etó ozo.

Pauló monokumule loko milumámini amupiló minamó

⁸ Geza Izesu Kilistokumú gele minozo. Eza Tevitini agávolaho heleneikutí móromoká oko oti veve loko aí gakó lamaná loaká nouve.

⁹ Ámina gakó lamanakumule loko gasovagi netá noguhuke, miluma geleká nouve. Lá nouke, galana veginana nagá zinimikago noumóza, Ómasímini gakó nene nagá alinamamóma neve.

¹⁰ Neza miluma hozaváa Ómasímo kelémo etó i vegenakumule loko gasovagi netá geheaká noumó nene keza Izesu Kilistó kugutó vizeaká netá itó alévolé lapanalagi ali lá itave loko lá oaká nouve.

¹¹ Gakó makó láa loko nemó nene gakó gihila neve:

Áisi hilikú miní amunimó nekoma nene,
ezagi makó minoko aleko inogo une.

12* Miluma netá lumupiló noitiko nene,
nenemule loko goselé lepelemíko hanuva gihitunimó nene,
alika ezagi apizeko mininake
aí hozaló gizapa inogo une.

Aikumú noamive loko egamega otatunimó nene,
eza áminámini oko egamega oletanogo ive.

13 Leza monokú alévolé amitunimó nene,
ezáa mogonamú egamega amitimó nenazo,
eza hanuva lonoi gakotó amegesaló moloko minanogo ive.

Ómasímo hozaló vevamú giliko lamaná iti gakó

14 Monó gilina vegená geí gizapaló niámó nene gakó imane ale gosohá
oko lo kemekoko Ómasímini avogisaló láa loko lo hukoko lo kemezo: Ha gakó
pisila nomi gakó likivilege vino. Ámina gakó nenémo negénegé iki liva liva
niago gele vegená nene kelémo golesa oaká noive.

15 Ómasímo geikumú gelekiko hozaló ve lamaná loló itane loko amuza
moloko minoko hoza alezo. Lá oko gakó gihiláa nene ale vesesoko lo kemeko
noako, geí hozamú govoza heleaká netá nene gumupiló iteminogo ive.

16 Gihila nomi gakokumú vivi vovoga nilikoma, gemegesa kemezo. Lá
niámó nene láa liki niviki monó ahulanigave.

17 Soza gakóini nenémo litá oko halamé napa nenéminoko minoko vegená
mukitoka napa oko vo alinogo ive. Ve nenéminá keikutí makó Haimeniasiko
Pailitoko keza nene niasive.

18 Keza nene gakó gihila ánigi satikasike ahulikasike, ligika nene hele
minakutí mota otekamó nenazo, alika gosohá lugupegi lelémo oteakaláa
nomive likasike monó gele vegená lugáa kilími gopá-napa niasive.

19 Ómasímini vegenala zuha keza gehani lukesa hizinamó nenémini iki
minikago, netá makolímó kelémo mómoká aminogo ive. Keí lukesanító
Ómasímo luhuva láa loko gizonoiomóma neve:

Guivahanímo ezáa vegenala zuha ánigo vevesoaká noive.

Itó makó láa loko gizonoiomóma neve:

Guivahanímini agulizá ali mina vegená mukitoka gopa napa netáini litá iki
ahuli asú iíki kemegesa amitaze.

20 Leza monó guluhá vegená nene lapegitana noune. Agulizaki ve
makolímimi numuni napagú nene lape haitopaitímimi golitunú itó sili-
vaturú lilí inamóma itó zatunú itó mikasitunú lilí inamóma nene neve. Makó
nene netá lamanakumú neve, itó makó nene ha netakumú neve.

21 Makó keza gopa napa netá mositamó nene kigika gizopa lokiko nene,
lape gihila lilí ikiko, numuni amelaho lusa geko kelémo otopá zekiko,
haitopaitó hoza nene numuni amelahini alitanigave.

22 Gosohá ve nenete kugupémo haitopaitó netakumú mumuzó oaká
noikutí nene géisi mino otopá zezo. Lá okoko nene, gezagi itó kigika
gizopa lo minago Guivahanímú voká voká liki sele liki miniáká nia vegenaki
vevesoko minoaká, gele alévolé oaká, likigika kemeaká, hulu oko nonagá oko
minoakakumú amuza milalo.

* **2:12:** Mat 10:33; Luk 12:9

23 Lovaga liki gemé ziki nila gakó negi gakó ha gakó nene givilege vino. Nenémini gihila nene lova leta lava leta oaká nemó nene gelenane.

24 Guivahanímini hozaló ve keza lili ali iki lova leta lava leta amiki, vegená mukí alévolékutí li kememiki hulugutí monó vevesiki lainim-ikitataze.

25 Kéisi legesó iki monolímini gala véa nene kilími vevesatave. Ómasímo kagata alekiko kigika ali viligiki gakó lamaná ánigi vevesatahe liki lá inigave.

26 Lá ikiko, monolímini gala vetini kagata goha koló okiko, Satani gele-husigú apilinigi akutí nene gologí okimikiko, Omasímo lititoka molatitoka iki minataze.

3

Gamena asú inogo noiko utó ita vetini mogona

1 Geza gakó makó láá loko gele hee lozo: Gamena asú inogo noiko, golesa netá utó oko puu linogo ive.

2 Vegená lá iki minanigave: Kezáinimú gilikó itekiko, moni henonimú kumu helepelé iko miniki, kezáini iki milíki ita netalímo kumu helepelé okiko, netá matakumú aliki letiki, kezáini kugupe ali otiki, izóikini améikini gakó gili ahuuliiki, netá lamaná makó kimitató lekegepoka liki mokáneve lamiki, kigika lamanaki nomiko,

3 kigikatunú nasahilí nomimó miniki, lihima ali miniki, lotoka lataka hiziki, kugupe kigikaló gizapa amiki, gala kemetameni iki miniki, netá lamanakumú gili golesa iiki,

4 kimimika liaká iki, kogoka kagaka viziki, kezáini alími napa itiki, kigika nene Ómasiloka milamiki kigikáa nene kugupémo amu heleaká noi netató milanigave.

5 Lá iki kugupémo nene monó kugupe itimóza, monolímini zámusa nene vasá zi ahulanigave. Lá iki niminiko, geza ánigookoma, gemegesa kemeko kezagi apizemo.

6 Ve nenémináagutí lugáa keza asugunatoka viki gopa napa mihina nia venalitini numúikú itiki kogoka viziki gakó li kimiki kiviligiáká niave. Ámina vená keza lihima napa genavagi ali minake, la netá lami netá nenémo kumu helekago,

7 monokú mina vetini gakó giliaká niámóza, Ómasímini gakó gihila gili vevesisá amave.

8 * Ve losítá keí kugulizá Zaneko Zapeleko kéisi nene Moseni gakó pelevesava zesimó áminagó iki ámina ve kigika gopa o vimó nenete lelí monolímini gapo ahuuliaké negi hiziaké gopa ikave.

9 Zaneko Zapeleko keza negi hizesimó nenémini mogona utó imómáminiki kéisi negi nihizemó nenémini mogona utó okiko, vegená mukító keza ánigi asú itamó nenazo, netá matá iki miliki niámó nene nana itotí lá imi imi ititave. Ma lá aminigave.

Timotini agata alike lo asú oko lo ami gakó

10 Lá imóza, makó minusike oko moloko umó itó monó lainim-oketumó itó oko moloko uke hoza alumó nenémini mogona kelepizumó, itó Ómasím gele alévolé oko minumó itó netá matakumú goselé nepelemigo legesó oko minumó, itó Izesuni vegená nigika kemeko minumó, itó gasovagi netá numupiló itigo amánapa oko ote minumó,

* **3:8:** Gá 7:11

11 * itó gopoguni nimilinitago miluma geleko minumó, itó Atiokia nūmutokagi Ikonio numutokagi Listela numutokagi gopoguni haitopaitó milinitago miluma netalímini agikagú minumó nene, némegetoko anike ánígonanímoma neve. Lá oko minumóza, Guivahanímó ámina netakutí gologí onetamóma neve.

12 Itó vegená keza Izesu Kilistotoka viki gímižiiki monó gapoló vitamó nene keza mukitoka gasovagi netá kumupiló itinogo ive.

13 Lá onoimóza, ve golesagi soza monó liaká vegi keza kogoka vizita vegi kogoka vizikiko iliki niva vegi nenete hoza alilikí niviko napa omo itinogo ive.

14 Géisi nene gakó lo gemeaká umó nene gigika onoimóma neve. Lá okago, gakó lo gemehá vegenalitini mogona gelenanimó nenazo, nenemú ale gikitoko ale minozo.

15 Geza izegipa namutó minanike apazá pepa monó gotola gatoloko noitenike, save alekanike Izesu Kilistonimú gele alévolé anikeve loko gugutó viziti gakó gelenane.

16 Monó gotola pukugú luhuva gizinamó mukító nene Ómasímini Sikalahulímo kigika ale vávani okimikago ali utó inamóma neve. Nenegutí gatoko noguluko monolímini mogona lelepizeaká noive. Lá ike, lagata aleaká noive, itó gopa gakó noluko lelémo gapoló moloaká noive, itó lagata alike lelémo vevesoaká noive, itó hee loko minoko aleko ituni gapo lelepizeko lelémo vevesokiko,

17 Ómasímini vegenala gihila loló oko mininake monokú legepagi avasavagi mininake, monó hoza lamaná haitopaitolímini aleko minanogo une.

4

1 Neza Ómasímini avogisaló itó Izesu Kilistó eza minoko vegená logómulagi itó helemolági gona mololetanogo i vémini avogisaló nene Izesú amuzavagi aniteko gizapa oletatímómove loko láo loko lo hukoko lo gimitoze, gelezo.

2 Geza nene monó lo utó oko lo kimitanimó nene, vegená neménú nokivisiko nokivisemiko gopa lo kemezo. Kagata aleko kelémō vevesoko kelémō oteko goselé gepelemiko lainim-oketozo.

3 Minomo iteko gamena makó alitokiko, monó gihilamú géneka liiki ahulanigave. Lá niiki, monó nene kagataturú giliko lagavagi minatímó nenémínigó gilitune liki tísá kilími nupa ikiko, hanuva gopa gakó kumu hiliti gakó li kimikiko,

4 monó gihila nene kemegesa amiiki, gitene gakkukú viki gíminigave.

5 Keza lá itamóza, géisi nene gigika gagataló gizapa oko minozo. Gasovagi netá gumupiló noitikoma, alévolé ozo. Izesuni gakó lamaná lo utó oaká hoza naleko ale gúezo. Ómasímo hoza gimimó nene ale lutegeko alezo.

6 Nénisi hilito gamena mota alitokave. Nipili hilikiko nugupelotí miguhala nanigave.

7 Nénisi nene hoza lamaná aleloko yumó nene mota ale asú onouve. Zohikú eza aviligigo eza aviligigo iaká niámó nenémínoko hoza ale lutegeko makiló anitekuve. Gakó gihila gizapa umó nene gologolo samímoma neve.

8 Itó okulumakutí gonanalivagi akilí lamaná nene vevesiki miniki aliki iaká nia vegenalitini mututoni nenémó negeva noimó nene gamena napaló Guivahani áisi ale vevesoko gona moloaká vémo nezagi mukí vegená eza

* **3:11:** Apo 13:14-52; 14:1-7; 14:8-20

anititi gamenamú lagata losi gelemoko ageva oaká nouhá vegena nene ámina akilí lehizeletanogo íve.

Vegená lugáatini gakó

⁹ Geza nene nenitoka atove loko amuza moloko litá oko atanikumú noluve.

¹⁰* Temá áisi nene mikasigú netakumú giligo, itekago, ahulonimiaké Tesalonika numutoka vokave. Keleseké eza Galesia mikasiloka vokave. Taetasí eza Talamesia mikasiuka mota vokave.

¹¹* Leza nene Lukakigó nousive. Makí nene hozagú nelémo vatí iti ve noinazo, nemémú alémoko ano.

¹²* Tikikoní nene amiselekugo, Epeso numutoka novive.

¹³* Anogo nookoma nene, hepekumú luhoaká gó nene Toloa numutoka Kaloponi numutó gololohá o molonoumómá alenetoko ano. Itó monó gotolánemagi itó pepa agila makó molonoumómagi alenetoko ano.

¹⁴* Kapatunú netá matá loló oaká ve Alesaté nene netá golesa goha alenimikaze, nemémú minoko Guivahanímó lihimala lelegí oko aminogo íve.

¹⁵ Eza amuza moloko lelí monó gakkumú pelevesava zimó nenazo, áisi gelémo gopa napa okatize, gizapa etoha oko minozo.

¹⁶ Goní nougo, ganá ápi oko není mogonamú lo nokumugo, makolímo nelémo vatí oko hize lé onetamímoma neve. Keza mukító ahuli asú initamímoma neve. Nenémini lihima nene Ómasímó ahuloketino.

¹⁷ Guivahani nenémo nasahilí onetake hize lé onetake, aí gakola lo utó oloko vinake lo lutigitane loko itó hetoka vegenalite gili asú itave loko luhusáne ale gilitonetamó. Lá noike gasovagi metalímimi agepagutí asene zenetake vínasonetamole.

¹⁸ Itó Guivahani eza golesa netá nemupe manamupe nelémo vatí oko asene zenetoloko voko okulumakú aí avogisaló avasavagi nelémo molanogo íve. Áí lapaná nene mino lúaló moloko minino. Lamaná.

Gékéini loketa gakó

¹⁹* Itó imane Piliskaki vana Akuilaki itó Onesipoloni vegenala zuhagi gekéini noloketuze, nene lo kemezo.

²⁰* Elastó eza Koliti numutoka minamó, itó Tolopimoni avisékago Mileto numutoka ahulotonouze.

²¹ Geza nene golini gamena alitamiko atove loko amuza moloko ano. Eupuló eza gekeka nologetaze, itó Putené itó Linó itó Kalautiá kezagi ligivetegé lugáagi nene géké niligetave.

²² Guivahanímó geí sikalahutoka minino. Ómasilokatí nasahilí nene lekeli-toka mino moloko minino.

* **4:10:** Kolo 4:14; Pile 24; 2 Koli 8:23; Gal 2:3

* **4:11:** Apo 12:12; 13:13; 15:37-39

* **4:12:** Epe

6:21-22

* **4:13:** Apo 20:6

* **4:14:** 1 Tim 1:20; Age 62:12; Lom 2:6

* **4:19:** Apo 18:2; 2 Tim

1:16-17

* **4:20:** Apo 19:22, 20:4

Taetasini Luhuva Pauló Gizo Amimó

Taetasini nónohá amike gizo ami gakó

1 Neza Paulona Ómasímini gelekelé ve itó Izesu Kilistoni aposolo nouke hoza nimimó nene Ómasímo kelémo etó i vegená keza monokú alévolé itave loko itó nenéminiki miniki aliki itakumú gakó gihila monokú nemó nene gili vevesatave loko ámina hoza nimimóma neye.

2 Není hozámini mogona lá oko neve: Ómasi soza losá ami vémo gozapá mikasigi okulumaki utó ami gamenáló nene alévolé lemetameni lehizeletatove loko lo mololetoko likumú lagata losi gelemoko ageva oko minoaká noune.

3 Nene gakó nene Ómasímo gamenamú giligo, etokago, aí gakó li utó niago, ale utó imó. Ómasi lugutó vizeaká vémo lo hukonetató ámina hoza lehizenetamó.

4 * Monó gapoló gelémo muluke gelémo lá u ve Taetasiga, gezagi nezagi hamó monó gele alévolé onousi ve luhuva imane gizo nogumuze, gelezo. Ómasi ameteho itó Izesu Kilistó lugutó vizeaká ve aitokatí nasahilí itó hulu geitoka minino.

Kiliti pokolálo Taetasí monó hoza aleko minati gakó

5 Kiliti mikasi pokolálo ahulogetumó nene hoza agepa minamó nene ale vevesoko ale apasatane loko logetumómáminoko geza numutó namató mohona oko monó gizapa ve kelémo molatane loko ahulogetumóma neve.

6 * Ve makolímohe makolímohe lihimavala nomitimó, ganakutí vená hamokó ale minati vémo, aí izegipala nenete Izesukumú gili alévolé itamó, itó vegená makolite aikumú gilikó ha netá matató ahulo latila oaká ve hokolizá oaká ve nomitimó, ve nenémináá pastoli hozagú kelémo molatane loko logetumóma neve.

7 Itó Ómasímini hozaló gizapa itamó nenazo, ámina hoza alinigi nia ve nene lihimáini nomitimó minataze. Lá iki gínikaha amitamó itó litá iki alévoleka lamitamó, piá nagamí vauva aliki namitamó, lova gakó lamitamó, moni henonimú lagaváá gelemitamó minataze.

8 Lá iiki veno vegená ikikoma nasahilí ikitiki kilími milatamó, itó netá lamanakumukó kumu hilitimó, zou liki minatamó, hee hee liki miniki aliki itamó, kigika gizopa lo minatimó, itó kigika kugupeló gizapa itamó neve.

9 Lá iiki monó gakó nenémo hize lé oketiko, monó gihila lamaná nene vegená li kimiki kagata aliki hizi lé ikitiki, lelí monó aliki letiaká nia gakó pelevesava ziki ali amunagú itave loko lo keme keme nouri gakokú nene, leza guluko alévolé noi gakó ali gikitiki ali minata ve nene pastoli lilí itave.

10 Mogona lá oko nekumú noluve: Ve mukí nene gínikaha niave. Ha gakokumú li volaló imaló iki kogoka viziajá ve niave. Ómasímini anosa nene kugupeló moloakakumú amuza miliaká nia ve nenete vauva aliki lá iaká niave.

11 Lá iaká nia ve nenete moni henoni alitune liki etami mogona aliki lainim-oketatune liki giliaké, ve lugáá venáini izegipáiñigi kilími gopa iaká niakumú kegepa apizilo loko loketatune.

¹² Kiliti mikasi pokolaló nia ve kezáikutí gakó mogona gele hee lo mina ve makolímo láo loko limó neve:

Kiliti vegená keza nene sozaló vegená, akohú galagitana, nosánetakumú iza galámo imómámini iaká niámó nene gasovagi vegená minake hozamú goselé kepeleaká noi vegená niave.

¹³ Neza ámina gakokumú gulugo gihila loló okave. Nenemú geza vauva aleko gahá kemeko kagata alekako, monó gakó nene gili vevesiki miniiki,

¹⁴ Zuta vetini gitene gakó ha gakó nene gili aleminigave, itó monó gelema vegenalite gakó gihilama kemegesa amiake hanuva gakó li hukinamó nene gili aleminigave.

¹⁵ Kigika gizopagi mina vegenalite netá matakumú gelego, gizopa loakalíminigó neve. Itó golesa netá nenémo kigikagú siholoni gekago gili alevolé ama vegenalitini kigika kagatagú siholoni gekago golotuva loaká noimó nenazo, nenemú keza netá matakumú gelego, ámináminoko siholoni geko golotuva loakalíminigó neve.

¹⁶ Keza Ómasímini mogona gelenoune liki kegepatunú liaká niámóza, iki miliki iaká niámó nenémo mogonáimi lo utó oaká noigo, gihila nomive. Keza nene vegená golesa gakó gili ahuliaká vegená hoza lamaná alitatímini oko nomive.

2

Monó lamanalímini agikagú gakó

¹ Géisi nene monó gihila lamanalímini agikagutikó lo kemezo.

² Ve olopa keza etó iki zou liki miniki, kigika kugupe gizapa iki miniki, monó gelenouhá nene gili vevesiki itó Izesuni vegená makó kigika kimiiki itó hulu iki gasovagi netalímini agikagú alevolé iki minatave loko loketozo.

³ Áminagó oko olopa vená keza monó vená lilí iki miniki, lotoka hiziki li volaló imaló amiki, piá nagamilímini gelekelélaá minamitave loko loketozo.

⁴ Lá iki vená gosohá nene netá lamanakumú lainim-ikimikiko váinigi izegipánigi kigika keitoka miliki gizapa lamaná ikitatave.

⁵ Itó lá iiki olopa vená keza kigika kugupe gizapa lamaná iki, mokoló minamiki, numúító apáító miniki netá matáini gizapa lamaná iki, kigika lamanaki miniki váini nene gelekelé lamaná ikitiko, vegená makolite ániigli Ómasímini gakó alivi letivi amitave.

⁶ Ámináminoko gosohá ve keza kigika kugupe gizapa iki etó iki minatave loko kagata aleko lo kemezo.

⁷ Itó géisi netá lamanakumú ale etó oko zou lo minoko monó gakó nene giza zohikutí lamoko lo keme-loko novoko, goí okako, ániigli gémegetiki vitave.

⁸ Monó nene ale vevesoko lo kemekako, nenemú pelevesava zemiko, monokumú lova ali limiaká nia vegenalite lelikumú gakó golesa linigi vitagá iiki kovoza helekiko ahulatave.

⁹ Megusa izegipa lili iki hagítana hoza aliki miniaká nia vegená nene ve napáinitini gakó gili aliki gelekelé lamaná ikitatave loko, itó ve napáini keza laga kivisitive liki ve napáinitini konotó aliki keí gakó pelevesava zemitave loko loketozo.

¹⁰ Ve napáinitini netá matá gumina alemiki, netá matató gizapa lamaná iki hoza aliki iki miliki itamó nenémo vevesokiko, Ómasi lugutó vizeaká vémini monó nene némini manámini iki ali otitave.

11 Nenemule loko Ómasímo numutó namató vegená kugutó vizitove loko hagitana oko nasahilí olimiaká netá ale utó okave.

12 Lá oake, ámina nasahilí nenémo apí olimioko lelémo vevesokago, imane mikasigú ha netá golesamú lumu helepelé oaká imó nene ahulokinake, imane mikasiuka ligika lugupe gizapa lamaná oko vevesoko mininake, monó lemetameni iko minanogo une.

13 Lá inake, Ómasí napa lugutó vizeaká ve Izesu Kilistoni lapaná utó itikumú ageva oaká nounimó nene gonanalivagi netá nenazo, nenemú lagata losi gelemoko ageva oaká noune.

14 * Áisi nene lelikumule loko miluma gilike, netá golesa aleaká uhakutí akagá oletatove loko minoko aleko imoláa ahulamó. Lá oake, aí vegenala zuha lelémo etó oake monó gihila amuza miliki aliki minatave loko ligika nagamí zeko lelémo lamaná imóma neve.

15 Gakó imane lo nogumumó nene ale hutilí oko lo kemezo. Monolímini zámuza alenikumú gelenoko kagata aleko kelémo vevesozo. Ve makolímo geikumú gilikó, lememino.

3

Lamaná oko oko moloko ituni gakó

1 Monó vegená geí gizapaló minamó nene gakó ale gosohá oko láa loko lo kemezo: Keza kiapegini itó gamani vegená iti minamoláa gelekelé ikitiki gakóini gili alitaze. Lá iíki hoza lamanaláa haitopaitolímini alitakumú ali vatí itaze.

2 Alivi letivi iki lova leta lava leta amitaze. Hulu iki miniki, vegená mukilitini kovogisaló zou liki minataze.

3 Lezate gozapá ámináminoko minunike, negi hizeko gínikaha oaká nouko, lílímí gopa iaká amó. Lá okunike, lumu heleaká netá lagava geleaká uni netá nenémini gelekeleláa otoko minunike, vegená kelémo golesa unike, vegenalite iki miliki a netakumú nenéminoko minatuninaze lokunike, levé nogoza noaká unimó. Lá nouko, lelikumú gili golesa niago, keza mukahá lepelego leza mukahá kupuluko oko minoaká unimó.

4 Lá oko nouko, alika nene lugutó vizeaká ve Ómasímo nasahilí olimiaká itó agika lemeaká mogona ale utó oake lugutó vizimó.

5 Leza hee hee loko minoko oko moloko uhá ma lamaná nego, ánigoake lá amimó. Agika hize limikakeve loko, minoko aleko gosohalímini nagamí holoakakú itó Ómasímini Sikalahulímitokatí gosohá utó oaká nenémo lelémo lamaná imó.

6 Ómasí eza nene lugutó vizeaká ve Izesu Kilistotokatí Sikalahú nene vauva aleko lehizeletamó nene.

7 Izesuni nasahililámo Ómasímini avogisaló lihimate asú olimikago minoko, alévolé apakumú lagata losi gelemoko ageva oaká nounimó nene ali lá itave loko lá oletamó neve.

8 Gakó lo nolukumumó nene lamaná gihila nenazo, gakó imane amuza moloko lo kimitane loko noguluve. Lá okako, Ómasimú gili alévolé ina vegená keza netá lamaná loló itune likigó hoza vauva aliki alitave. Lá ita netá nene netá lamaná nenazo, lá itamó nenémo vegená kelémo lamaná itimó neve.

* **2:14:** Age 130:8; Gá 19:5; Gapo 4:20; 7:6; 2 Pit 2:9

⁹ Ha gakó li volaló imaló iki miniaká niamó nene gihila nomimó, itó avóike amunaloka ve hutilí iki omolelé amalelé iki miniliki itiki mina vegenalitini kugulizakumú lova leta lava leta iaká, itó Mosé lo hukoko li gakokumú ligí ahuligí iki lova isá isá iaká niamó, nene gakó nene ha gakó gihila nomimó nenazo, gele ahulokoko gemegesa amezo.

¹⁰ Ve makolite monó ali golesa iki hize hoú loaká netá ali utó ikikoma, gamena hamope gamena losítá ahe kagata aleko gakó lo kimitanimó nene gelemikoma, kimisele ahulokako, kezáinigó viki haitotoka minatave.

¹¹ Ve nenémináa netá golesa aliliki niviki kigika gopa o vimó miniake, kezáini iki miliki amó nenémo keí mogona lo utó okave loko gele minoko nenémini oketozo.

Hozamú lotake vegená gekéini loketamó

¹² * Atemasinihe Tikikonihe geitoka amiselekugo, anitekiko nene, Nikopoli numutoka noitoze, nenitoka atove loko amuza molozo. Neza nene ámina numutoka golini gamena minatomó onoize.

¹³ * Ve losítá Apoloki goní gakó mogonáa geleaká i ve Zenaki keza monó hozaló vitáive loko nosánetáini henokanóiki ale vatí oketatove loko amuza molozo. Lá okako, netá matakumú vitagá Amitáive.

¹⁴ Vegenate zuha keza hoza lamaná aliliki niviko kigika itive. Lá okiko, lugupémini netá hize lé omiakakumú nene nasahilí hoza aliliki niviko, monokú iki miliki itamó nenémo gihila ale utó inogo ive.

¹⁵ Nezagi makó nouni vegená keza mukitoka geikumú geké niligitave. Monokumule liki kigika limiaká nia vegená geké noloketuze, lo kemezo. Ómasilokatí nasahilí lekelitoka mino moloko minino.

* **3:12:** Apo 20:4; Epe 6:21-22; Kolo 4:7-8; 2 Tim 4:12 * **3:13:** Apo 18:24; 1 Koli 16:12

Pilemoni Luhuva Pauló Gizo Amimô

Pilemoni nónohá amike gizo ami gakó

¹ Neza Paulona Izesu Kilistokumule loko nagá numukú nou vémina itó ligiveteho Timotiki makó nousike Pilemô ligika gemenousi ve hamó hozaló ve nouninazo, nenemú luhuva netá imane gizo nogumuve.

²* Itó venaka ligiveteho Apiaki monó hozagú amuza moloko alévolé oaká noi gipaka Alikipó, itó geí numukú monokumú alegesá iaká nia vegenaki hamó luhuva gizo nolukumuve.

³ Ameteho Ómasilokatí itó Guivahanite Izesu Kilistotokatí nasahilí itó hulu lekelitoka minino.

Pilemô gele alévolé oake agika kimitímini mogona

⁴ Numuna loaká nou zupa zupa nene gugulizá oko geikumú Ómasi agepoka loaká noumô nene

⁵ geza Guivahani Izesukumú gele alévolé oaká anike, Ómasímini vegenala zuha gigika kemeaká noanimó nenemini gakola nene vegenalite likago gelekuke ló oaká nouve.

⁶ Itó géisi nene gele alévolé oakakú emane lezagi ligika molo hamó okinake, netá lamaná mukí Kilistotokatí lelitoka utó oaká noimó nene gele vevesoko gilitane loko Ómasiloka loaká nouve.

⁷ Nigivénéga, geza Ómasímini vegenala zuha nasahilí okimiaká noane. Lá oko gigika kemenikumú nene mulúnegú lamaná noguluke, nogoliza vizeaká nouve.

Pauló Onesímini goha alématihe loko Pilemoni loká imó

⁸ Nenemú etati netá alitane loko Kilistoni gakotó lo hukoko logetatomó nelina, vávani oko lo gumulinamóza,

⁹ leza monokú nouhá vegená eza agika amigo eza agika amigo oaká nounikeve loko hagitana voká noluve. Neza Paulona Izesu Kilistoni monó gakó lole ale vémina itó aikumule loko nagá numukú nou vémina noluve.

¹⁰* Neza nagá numukú nouke, ve makó alémo monó gapoló muluke alémo lá u ve agulizá Onesímo aikumú noluve.

¹¹ Agulalímini mogona nene lelémo vatí oaká ve nego, áisi goí oko gelémo vatí amigo etamimóza, itínasa nene gezagi nezagi lelémo vatí oaká ve loló okago etokave.

¹² Áisi nene není gomuháne noimóza, goha alémo atiginá okugo, geitoka novize.

¹³ Neza nene Izesuni gakó lamanakumule loko nagá numukú nougo, áisi nene geitó omolelé oko gelekelé onetative loko ale gilitanogo umóza,

¹⁴ geza gele nememanító alémo lá okugo alévoletutí nemekatane loko gelekugo, gena okago, hulugutí nimitane loko gelekuke alémo atiginá nogetuve.

¹⁵ Onesímo ahulogetamó nenemini mogona lá oko noitive: Ahulogimikoma nene, gamena koma oko vokiko atiginá oko nene gezagi alévolé oko mino-loko voko minanogo ive.

* **1:2:** Kolo 4:17 * **1:10:** Kolo 4:9

16 Nene gelekelekó ogetamitive. Koma itetigí oko minatize. Monokú gi-givekaho loló okago húnane novive. Itó nigika amenou ve noimóza, geitokagi ha netakumupe Guivahanímini izegipa loló ikumupe áminámini oko itetigí oko minatimó neve.

17 Nenemú nenikumú gelekako, gigivekaho noitomó nene, Onesímini alémo mulukauka molatanímó nene, gelekako, Pauloni alémo mulukauka molanimó gilitize.

18 Itó goí oko netá makó ale golesa ogetonoitimó itó geitoka lihimala ma netimó nene, ámina lihma nenitoka molatane.

19 Neza Paulona láá loko není nigizanitunú luhuva gizo nogumuve: Nezáne apasoko giminogo uve. Lá itomóza, nenitokatí alévolé gemetameni alenimó nenémini lihma napa geitoka nemó nenemú ma lamuve.

20 Nenemú, nigivénega, geza Guivahanimule loko netá makó loló one-tatane loko noluve. Kilistotoka gímisusimómove loko mulénegú lamaná gilitove loko naná naná onetozo.

21 Geza není gakó imane gele alitane loko gelenouke luhuva imane nogizuve. Itó lutímintigó negopa gigikagutí geleko netá makó loló itane loko gelenouve.

22 Itó lekeza nene nenikumú numuna nilató Ómasímo nagakutí gologí onimikiko geitoka vitove loko nene gele hamó oko gelenouve. Nenemú géisi nene akato numuni ale vavá onetozo.

Vegená makó gekéini loketamó

23* Izesu Kilistokumule loko nagá numukú minusi ve nigivéneho Epapalá geikumú geké nologetave.

24* Lá oake, hamó hozaló ve Makí, Alistakó, Temá, Luká keza nene ámináminiki geké niligitave.

25 Guivahani Izesu Kilistoni nasahilí likigikagú mino moloko minino.

* **1:23:** Kolo 1:7

* **1:24:** Apo 12:12,25; 13:13; 15:37-39; Kolo 4:10,14; 2 Tim 4:10-11

Hipulu Vegenalitini Luhuva Gizo Kimimó

Ómasímo gipalámini agepa ale vávani okago gakó lo limimó

¹ Ómasí eza gozapá agepagutí gakó liaká a vetini kegepa ale vávani okimikago, keza avotegini nene gakó haitopaitolímini itó gapová haitopaitolímini li kímiliki iva iva amóza,

² gamena asú inogo noigo imane gamena nene gipalámini agepa ale vávani okago aí gakó lo utó oko lo limimó. Gipala eza mukí netá matalímimi mututonáa lolóoko minative loko lota vémini zámuzatunú mukí netá ale utó imó,

³ Ómasímini lapanalámini gonanalivámini luhuváa aitoka utó imó neve. Itó Ómasímo minoko aleko itímini lelegiláa aitoka minokanazo, nenemú ezáa zámuzalaló molo gele minake loaká noi gakó nenémo netá mukí hize lé omiaká noive. Áisi nene lihimate nagamí zelimiaká hozaváa ale asú oake, vozaú vémini agizani lamagaloka voko mitó minoko gizapa oko minamó noive.

⁴ Lá noike ageló kivilege asú oko minamómámini lelegilaló nene agelolitini kugulizáini avilegeko iteko mina agulizá alimó neve.

Gipalámo ageló kivilege asú noi gakó

^{5*} Ómasímo gakó makó gipala lo amimó nene ageló makó láa loko lo amesá amive. Makó nene gipala láa loko lo amimóma neve:

Géisi nene gipáne noanize,

nénisi nene itínasa gelémo utó nomuluve.

Itó lá okove:

Nénisi nene amelahina lolóoko minatoze.

Itó áisi nene gipáne minative.

^{6*} Makó nene minoko ganá gipala amiselekago, mikasiuka liminogo noigo, gipalámini gakoláa láa liki luhuva gizinamóma neve:

Ómasímini ageló vegená keza mukító gupá zi amiki agepoka li amitave.

^{7*} Itó helegaloka ageló vegenakumú láa loko luhuva gizonoiomóma neve:

Ómasímo lokago aí ageló vegenalitini kemetameni ale viligokago hepé kemetameni ali luhiaiká niave.

Keza gelekelé izegipala loló o kimikago ló guluma kemetameni ale luhiaiká niave.

^{8*} Lá onoimóza, gipalamú nene láa loko luhuva gizonoiomóma neve:

Ómasí geza geí gonanalivagi siá alévoletálaló minoloko voko minanogane.

Itó geí zámuzámini hánusaváa ale minanike geí gasovaló nene ale hehe loko gizapa oaká noane.

⁹ Geza nene hee loko minoaká netakumú giviseaká noive.

Itó netá golesamú nene gumu helesá amive. Nenemú Ómasímo geí

Ómasí áisi nene gogoliza vizitani netupa hologimikago gigivekagini kivilegkane.

^{10*} Makó nene gipalamú ve makolímo láa loko lonoiomóma neve:

* **1:5:** Age 2:7; 2 Sam 7:14; 1 Iki 17:13 * **1:6:** Gapo 32:43; Age 97:7 * **1:7:** Age 104:4 * **1:8:** Age 45:6-7 * **1:10:** Age 102:25-27

Guivahani geza ganatilisi mikasímini guhaiváa molanimóma neve.

Itó okulumakuka keza nene gigizani luhuva ma niave.

11 Keza miniki haha inigave. Itó géisi nene mino alévolé oko minanogo ane.

Kéisi nene luhoaká gó nenéminiki minikanazo, litaha lanigave.

12 Lá iki niko, géisi nene gakeko ale molanogo ane.

Lá okako, keza nene haitó kemetameki lilí inigave.

Lá itamóza, géisi nene noani gemetamenigi áminalokó minanogo ane.

Itó meleke gamenavaka nene ma asú aminogo ive.

13* Itó Ómasímo gipala láa loko lo amimó neve:

Oko nigizani lamáganeloka minoloko voko noako

gala vega kelémo nupa okugo gigisa lapuvauka minanigave

loko gipala lo ami gakó nene ageló makó láa loko lo amesá amimó nenazo,

14 ageló mukí keza sikalahuki netá Ómasímini gelekeleláa nene lugutó vizeakalímini gihiláa ale lá ituni vegená lilími vatí itave lokogó kimiseleaká noive, itó Izesú nene ageló kivilege asú onoive loko gelenoune.

2

Lugutó vizeaká iteko minamó

1 Gipalámini mogona lá oko noinazo, leza gopa gapo golesagú gapo veleko vokatune loko gipalamú gakó gulunímoma nene goha ale gosohá oko amuza moloko alévolé oko geleko minatune.

2 Agelogini kegepagutí gakó Mosé gizamó nenémo gihila zekago, vegenalite agelogini gakóini avutá oaká itó gele ahulokoko pelevesava zeakalímini mogona utó okago nene, lihimavagi nenazo, nenémini ago helegáa lihma mota alikamóma nenazo,

3 Lélisi nana oko lugutó vizeaká netá iteko minamó nene gele ahulokuko voko haha itimó neve. Ezáa Guivahanímo ganatilisi ámina lugutó vizeaká gakó lo utó molamó nene kagataturú gili kolosiki gilina vete li limi limi ago ago, alévolé onoimóma neve.

4 Lá onoigo, Ómasímo ezáa haitopaitó alévolé suni itó zámuzalámini netala netá gosohá ale utó moloake keí gakó nene hize lé otake Sikalahutokatí monolímini zámuza ezáa litoka molatoka oko gona molake limimó.

Izesú lugutó vizeakalímini Guivahani noive

5 Mikasi alika utó itimómámini gakó nolumó nene Ómasímo ageló keza gizapa itave loko loketamó negopa, vegenalita gizapa itave loko loletamóma neve.

6* Nenemú nene monó gotolaú ve makolímo Ómasi lo ami gakó lo utó moloko láa loko limóma neve:

Géisi vegená ánenémináa nene nanáinimú gele kemeaká noane.

Itó ve nenémináatini kagapilamó nanamú ánigoko kelémo vatí oaká ane.

7 Nene gamena alínipáisí ageló vegenalitikutí limiki minatave loko lokimikanímiza,

netá golivagitunú itó lapanalámini agulizatunú ale akoloketanimó neve.

8 Lá okanike netá mukí nene kigisa lapuvauka ale molokane.

Ómasímo netá mukí nene vegenalitini sepéikuka molamó nene gona molamike netá mukí avasavagi lehizeko asú imó. Itína gamena nene mukí netá nene vetini sepéikuka molonoigo ánigosá amune.

* **1:13:** Age 110:1 * **2:6:** Age 8:4-6

9 Lá noimóza, Izesuni mogonáa nene ánígoko geleaká noune. Gamená alínipa makó nene ageló vegenalitikutí lemeko minamóza, miluma gilike hilimómove loko lapanaki itó agulizá napagi lehizetamó nene ale akiseake noive. Itó ageló vegenalitikutí lemeko minamó nene Ómasímini nasahili lelí limitive loko lokago, áisi nene heleaká netá ekesalímini nene vegená mukitoka lelikumule loko gilimó neve.

10 Ómasímo netá muki nenémo aí gelegele minative loko noi ve itó netá mukilimímini amelaho loló oko mina vémo mohola gipala muki nene gonanalivagi lapaná lehizeketatove loko gilimó nene kugutó vizeakalímini Guivahani eza miluma geleoko vo milisegekogó minatane loko Izesuni lotamó nene etokave.

11 Itó kigika alémo mokoná loaká noi ve nemó itó kelémo mokoná lamoláa keza minamó keí améipo hamokó noize, nenemú Izesú nene izegipa nugunamotamóneve loketatove loko gelekago avoza helemive.

12 * Nenemú Izesú Ómasí lo ami gakoláa lá oko neve:
Neza vegenáne zuha geí mogonamú lo kemekinake monó gele vegenáne zuhatini holúikú nama loko gegepoka litove.

13 * Itó eza Ómasímú li gakó makó lá okogi neve:

Neza aikumú gele zagéko minanogo uve.

Itó makoki lá oko neve:

Imane nezagi itó Ómasímo izegipala nimimoláagi leza mukitoka noune.

14 Nenemú Ómasímini izegipala leza nene lugupe mémelagi vegená minoaká nouninazo, Izesú ámináminoko lelí lugupe ale luhamó. Lá imó nene ezáa nohilike heleaká amelahini Satani zámuza nene apele kulutokago,

15 heleaká netakumú kehelele vizeakalímo nagá zekago miniki aiki a gamenavámini nagakú mina vegená vínasoketatove loko nenémini imómá neve;

16 Ámina netá nene ageló kelémo vatí itove loko lá osá amive. Eza Avalahani agapilamó zuhagítana nia vegená lekelémo vatí oaká noive liki monó gotolaú luhuva gizinamóma neve.

17 Itó Izesú eza lelí guguni gizoaká ve napa nene ageló negopa, kugupe mémelagi vegená kelémo vatí itove loko limimó nenazo, Ómasímini avogisaló eza litokó minokó hoza alévolé oko aleakalímini itó agika hize lemeakalímini loló itive loko, Ómasímo vegená lelí lihimatemú goha izapaló molamitive loko nene agunamotamola lezagi muki netakú hamó lelegító minatave loko lotonoimómá neve. Gapováa lugáa makó minamimó neve.

18 Ezáa lelikitana miluma gilike lemékú miliakakú yo holamó nenazo, nenemú vegená lelitoka lemékú moloaká netá nene utó o lemekiko, lelémo vatí itimó neve.

3

Izesuni agulizalímo Moseni avilegeneive

1 Nenemú Ómasímini apazá vegená nigivénegita, okulumakú netá izá miliki alitave loko sele lo likimimó neneta, lekeza monó gele alévolé oaká nounitímini lole ale ve itó guguni gizo ameaká noi ve napa Izesuni ánigi hee liki ánigalo.

* **2:12:** Age 22:22 * **2:13:** Isa 8:17,18

^{2 *} Ómasímo ámina hoza alitive loko lo molotató áisi nene Mosé nene Ómasímini vegenala zuha gelekelé oketamó nenéminoko Ómasímo litokó minatíminko Ómasímini hoza alévolé oko minoloko voko ale minamó.

³ Numuni geeká noi vémini agulizálimo genei numunímimi agulizá avilegeaká noive. Ámináminoko Izesuni agulizálimo Moseni avilegeko lanpalagi neve.

⁴ Itó numuni ale utó moloaká nene vegenalita geeká netá nemóza, netá mukí ale utó moloaká ve nene Ómasi noive.

⁵ Itó Mosé eza Ómasímini numunigitana lilí iki mina vegenatoka minake Ómasímo litokó gelekelé hoza alévolé oko aleko minake, Ómasímo alika Izesukumú lo utó iti gakokumú gakola lo moloaká imó.

⁶ Lá oko minamóza, Kilstó eza nene gipalámo Ómasímini numunigitana mina vegenatoka gizapa noketake Ómasímo litokó hoza alévolé oko aleaká noive. Numuni nene lélisi nene noune. Itó nene hanuvamukopa, ale vavá oleta netakumú ageva oaká nouni netakumú gele gele mininake mulutegú lamaná nogilinake minoloko vitunimó nene Ómasímini numuni loló oko noune loko litunize.

Ómasímini mino gelekelé oakalagú vo holatuni gakó

^{7 *} Isilae vegenalite Ómasímini gakó gili ahuliaké mino gelekelé oakalagú vi hilamakumú nene Sikalahulímo li gakóma monó gotolaú láa liki gizinamó nene gele minatunize:

Itína nene lekeza Ómasímini anó lupa gilinitamó nene,

⁸ mikasi gomopalaló Isilae vegenalite gínikaha iake

mesaha ake Ómasi gimivagú milamó nenéminiki likigika hize lí iko minamilo.

⁹ Avotike keza neneló melekeni 40 oko novigo

golivagi netá mukí loló oaká umó

nene ánigiaká amó nemóza, hokolizá i nimiaké
giminegú miliaká amóma neve.

¹⁰ Neza nenemú mesaha okuke keza gamena gamena gopa napa kagatatunú giliaká niamó niaze,

ító není gapo ánigi vevesiki ánigisá amamóma neve loko lonoumómá neve.

¹¹ Neza mesaha oketuke keza mino gelekelé oakánegú vi hilaminigave loko alévolé oko lo hukoko lumómá neve.

¹² Nigivénérita, lekelitokatí makó likigika anupaki miniiki monó gili ahuli-iki alévolé ve Ómasi lekemegesa amikatave liki gizapa iki minalo.

¹³⁻¹⁴ Leza ganá apí oko gele seketigí uni gakó nene ale gikitoko alinake anosaló anitunimó nene Kilistoni nasahilí izá moloko ale minuni vegená loló itunimó nenazo, gamena gamena itó gamenavatini ha neikoma golesa netalímimi gimilegú moloká aleká oaká nénemo lekelitokatí ve makó apikulú alekoko Ómasimú agika hize lí okative liki, eza agata aliko eza agata aliko iki luhusatini ali alévolé iki minalo.

^{15 *} Nenemú monó gotolaú gakó makó láoko nemó nene gele alitunize:

Lekeza itína Ómasímini anó lupa gilinitamó nene

Isilae vegená gínikaha iake mesaha amó

* ^{3:2:} Nam 12:7

* ^{3:7:} Age 95:7-11

* ^{3:15:} Age 95:7-8

nenéminiki likigika hize lí iko lá amilo.

16 * Nene hí vegenalite Ómasímini anó lupa gili ahuliake pelesa ziaká amó neve. Mosé ale goí oketago Izipi mikasiukatí a vegenalite lá amóma neve.

17 Itó hí vegenakumú Ómasímo izapaló molokago melekeni 40 oko vimó neve. Nene golesa netá aliake mikasi gomopalaló hili gesá a vegenakumú nene nenémini imóma neve.

18 Itó hí vegenakumú mino gelekelé oakánegú vi hilaminigave loko alévolé oko lo hukoko loko limó neve. Nene gakola gili ahuliake pelesa ziaká a vegená Isilae vegenakumú nene limó neve.

19 Nenemú lá oko gelenoune. Keza Ómasimú gili alévolé amatímo mino gelekelé oaká apalaloka vi hilamamó neve.

4

1 Mino gelekelé oakalagú vi hilatave loko lo mololetoni gakó nene haha animó nenazo, nenemú leketitokatí makolímohe makolímohe Isilae vegetanitana oko ámina gapoloka vo legesó okative loko lelegesá ligitize.

2 Nene hanuvamú nomive. Ómasímini gakola lamaná Mosé lo kimimó áminagó leza lagataló vo holokave. Itó keza ámina gakó gelemóza, mukilite kigikagú ali milamago lemeko minamigove loko keitoka hutuvagó minamó.

3 * Leza monó gele alévolé oko gelenounimoláate ámina mino gelekelé oakalagú vo aniteaká noune. Nenemú Ómasímini gakó gili ahulakumú láa loko limó:

Neza mesaha oketuke keza mino gelekelé oakánegú vi hilaminigave loko alévolé oko lo hukoko lumó neve.

Nene mikasímini guhaiaváa molake netá mukí loló o asú onoitotí mino gelekelé oko minake, alika ámina gakó limó.

4 * Ámina mino gelekelé oaká gamenamú nene Ómasímo netá mukí loló o asú oake gamena nampa 7 neneló mino gilimó neve liki luhuva gizina gakó nene monó gotolaú neve.

5 * Lá okago, veletoka Isilae vegenakumú nene keza není mino gelekelé oakánegú vi hilaminigave, loko limó.

6 Leza Ómasímini mino gelekelé oakakú vo holatuni gapo nene ha neve. Lá onoimóza, gozapá vo holoakálímini gakó lamaná lo kimi vegená keza gili ahuliake vi hilamamó nenazo,

7 * nenemú itína vo holatuni gamena makó moloake, mota lo lukumu gakó nene alika Tevitini agepagú molokago, láa loko limó:

Lekeza itína nene Ómasímini anó lupa gilinitamó nene,
likigika hize lí iko minamilo.

8 * Zosúa nene mino gelekelé oaká numuni apá gihláa ale utó moloketamó nelina, Ómasímo alika haitó mino gelekelé gamenamú lamilinamó nenazo, nenemú Ómasímo haitó mino gelekelé gamenamú limó neve loko gelenoune.

9 Nenemú láa loko gilitunize: Ómasímini vegenala zuha lelí mino gelekelé oko minoaká holisi makó ha neve.

* **3:16:** Nam 14:1-35 * **4:3:** Age 95:11 * **4:4:** Apí 2:2 * **4:5:** Age 95:11 * **4:7:** Age 95:7-8

* **4:8:** Gapo 31:7; Zos 22:4

10 * Ómasímo hoza ale asú oake mino gilimó ámina iki vegená makó keza Ómasímo mino gilitó mini milatamó nene hozáini alilikí nivitakutí mini gilikilí iki minamó gelekave.

11 Lá onoimó nenazo, lelitokatí makolímo Ómasímini gakola gili ahulakumú vegená gozapá gínikaha gapo miliki vamó áminaló vokatinazo, Ómasímini mino gelekelé oaká apatoka vo holatune loko amuza molatunize.

12 Ómasímini gakó gele ahuloakakumú makó láa loko gilitune: Ómasímini gakó nene alévolé oko minoakalímini neve. Itó amuzavagi neve. Itó amítakó agepáa amegesaloka itó agómulaloka sánevetá nene avilegeko noimokitana nenazo, netenú hukomo lemeko lemenigi ligikagi itó helisate mapilihavetegi ómuvgagi noko helegetoaká noive. Lá oake, áminatunú nene Ómasímo ligikámó geleakaláa itó gele laga oakalímini mogona ale utó moloaká noive.

13 Itó áisi netá mukí ale utó molamó nenazo, Ómasímini avogisaló nene hí netá asuguná oko minative. Aí avogisaló nene netá mukí halakeko nomive. Itó goní hoza alinogo uni vémini avogisaló nene utó okogó neve.

Izesú lelí guguni gizoaká ve sipisite noive

14 Lelí guguni gizoaká ve sipisi iteko minamó makó minoletonoi ve Ómasímini gipala Izesú áisi nene okulumakú iteko noive. Neneló minoletonoinazo, monola loaká nounímó nene ale gikitoko ale minatunize.

15 Itó guguni gizoaká ve sipisite eza gena liviseko láa noigo ánigo ámegeletosá amive. Lelitoka lemekú moloaká netá utó oaká noimó ámináminoko aitoka haitopaitolímini utó imóma nemóza, aitoka lihima hamoláa minamimó neve.

16 Lá onoimó nenazo, netá makolímohe makolímohe omo lovogisaloka noikoma, áisi nasahilí oletoko agika hize lemeko lelémo vatí itive loko leza nasahilila aleaká siá eza gizapa olimiaká noimómaló lehelele vizemiko anititune.

5

1 Mikasiuka ve lelitokatí guguni giziaká ve napa napa keza Ómasímini vegenakumule loko Ómasiloka utó i amiiki lihimáikumú agepoka liká netá matá guguni gizi amiká amitave liki kilími etó iaká niave.

2 Ve nenémínáa kezagi keé lamamó minikanazo, negi nagí gatizá minunike otolova o vunimoláa lelikumú hulu iki milumavate gilitató niave.

3 * Nenémú keza keé lamamómave liki, vegenalitini lihimamú itó kezáini lihimáikumú netá matá guguni gizi amiaká niave.

4 * Itó ámina hoza ite minamó nene kezáini kigikagutí gakotó negopa, guguni gizoaká ve napa keza Ómasímo kelémo etó okake ámina hoza nene kigizakú molokave. Ámina hoza amelaho Alonani nene gozapá ká emane amunaloka ámináminoko Ómasímo amimóma neve.

5 * Itó Kilstó eza ámináminoko ezáamú giligó itekago guguni gizoaká ve napa loló amimóma neve. Nene Ómasímo láa loko lomikago loló imóma neve: Geza nene gipáne noanize.

Nénisi nene itínasa nene gelémo utó nomuluve.

6 * Itó gakó makó láa loko lo amimó neve:

Géisi nene Melikisetekeni avevezahaló oko guguni gizo ameaká ve mino lúaló moloko minanogane.

⁷* Izesú eza mikasiuka mina gamenaló hilinogo noitotí alémo atiginá oaká zámuzagi mina veloka like sele napa like agómulagutí ive nogosa lemekago voká sipisi lotamó. Lá okago Ómasímini amakuka lemeko minamómave loko gele amimó.

⁸ Eza Ómasímini gipala minamóza, gopa nene miluma maluma geleloko vitotí Ómasímini gakó gele aleakálímini mogonáa ánígo hee limó.

⁹ Lá oake, guguni gizoaká ve napa loló itikumú vo milisegeko mina ve loló oake aí gakola gili aliaká a vegená mukitoka keí kugutó vizeaká nekisáa nomítímini améipo loló imó nene,

¹⁰ lelí guguni gizo ameaká ve sipisi Melikisetekeni avevezahaló minative loko Ómasímo lotató lá imó neve.

Monó ahulikatave loko kagata alímó

¹¹ Nenémini gakó mukí nemóza, lekelisi geleakatini alínipagi minikago, lo likimitove loko gulumó gena okave.

¹²* Lekeza gamena hána monó gililiki iva iva iki minatitegi vegená lugáatini tísá lilí alina, etalinamóza, lekeza monó avogisáa nene goha lo lekemeakató mini milikave. Lekeza likigikámini nosá alévoletáa namitató niave. Hanuva aminikó niki minata lelegító minikave.

¹³ Aminí niaká nia vegená nene hehe loko minoaká mogona ma gili hee lamanazo, vegená nenémináamú nene namuni niave loko loketatunize.

¹⁴ Nosánetá alévoletáa nene olopa vegenalitini mututoni neve. Kagata kigika koloso lamaná okago, netá golesámini itó lamanalímíni mogona gili-likí nivake nenémini mogonáa gili vevesiaká nia vegenalitini mututoni lilí inamó neve.

6

¹ Nenémú nene leza lá okove loko Kilistoni gakó avogisáa apí ikú loakálímini nene molokuko neko, gakó amegesáa loloko itinake loakálímini gapo nene miní amitunize. Monó guhaiváa litaha nene nomilinake, gihila nomi hozalotí ligika emane ale viligoaká itó Ómasimú gele alévolé oaká,

² itó nagamí holoaká gakó haitopaitolímini itó gotító ligizani moloko lusa geeká, itó helenosakutí oteaká, itó lihima moloketomo vova vova oaká gakó nanamú goha apí itune.

³ Ómasímo gelekiko, lamaná okikoma, gakó amegesáa makó miní amitunize.

⁴ Nenémini amitunikumú láa liki gililo: Monolímo nene vegená lugáatini kigika alémo hanatokago okulumakutí nosánetá niki gilinamó, itó Sikalahú ali lá inamó,

⁵ itó Ómasímini gakó itó alika utó iti gamenámini alévolé zámuzámini lagaváa gilinamóza,

⁶ Ómasímini vegená nenémináa keza monéna monó ahulatamó nene, Ómasímini gipala goha zohota zaló apiliiki avoza netá lilí itatamó gilitimó nenazo, kigika goha ali viligikiko kelémo atiginá oakaláa nene ma nomive.

⁷ Mikasi makó nene golinímo gamena gamena zeko minake alémo geha zekago, vegenalite ámináló zuhaina zahaina iaká niago, nosánetáini ale utó molokimiaká noimó nene Ómasímini lusaló nene mikasi amelahitoka gihiláa utó oaká noimóza,

⁸ * ámina mikasiloka liliha gasovagi netakó vizitítimo gohogó mikasi loló okikoma usí vizekiko lolímo latító neve. Mikasimú lumó nene mikasimú negopa, vegenakumú lo moloko noluze, glilo.

⁹ Nigika lekemenou vegenáise, neza gakó láa loko nolumó nene lekeza lapuluva itave loko geleko lamuve. Lukugutó vizimó nenémimi gihiláa lekelitoka utó oloko voko minative loko gele seketígí oko noluve.

¹⁰ Ómasí eza ma ale gopa oko lá oko osá amive. Eza hee loko mina ve noinazo, lekeza aikumule liki hozaváa aliake likigika aminatímimi gihiláa nene vegenala zuha kilími vatí ake nasahilí ikimiaká amó itó itína nalemó nene ezáa neménú agatí molaminogo ive.

Ale vavá oleta netakumú ageva oko minatune

¹¹ Lekeza mukitoka hamó lelegító vávani iki lilí ikiko, lehizeletati netá ale lá itune liki ageva iki lakagatágó minoloko noitiko gamena asú itive loko gelenouve.

¹² Nenémimi gihila nene lekeza migelelé amiki vegená lugáate gili alévolé inake itó goselé kepelemigo legesó iki netá matá lo moloketamó ali aliaká nia vegenalite vilina gapoló nene kemegesaló miliki iliki vitave loko noluve.

¹³⁻¹⁴ * Nenémimi gakola makó láoko neve: Avalahani nene Ómasímo lo hutake nénisi nene lusa goha gegetoko goha gegetoko inogo uve. Itó okinake geí gagapilamó zuha hize hutilí ogimiká hize hutilí ogimiká inogo uve. Loko lo molotake ve makó iteko minamómámini agulizató lo hukatove loko gilimóza, vitág oake ezáa agulizató ale alévolé oko lo hutamó.

¹⁵ Itó Avalahá eza Ómasímo láa loko lo molota gakkumú goselé apelemigo legesó oko minoloko itikeve loko ámina gakolímimi gihila ale lá imó.

¹⁶ Vegenalita ligizani iteko ve makolímimi avogisaló ale alévolé oko lo hukoaká gakó nolinake lelikutí ite mina vémini agulizató lokuko, pelesa zeaká gakó nene utó aminogo ive.

¹⁷ Ámináminko Ómasímo eza limitove loko lo moleta netakumú nene Ómasímo genezala ale viligoko haitó gakó lítihe liki kagata losi gilikatave loko agikatunú giligo alévolé okago limó neve. Nenémimi mogonáa ale utó molatove loko lo moloketa netalímimi gakolímimi amupiló ale alévolé oko lo hukoaká gakó nene miní amimó.

¹⁸ Lá imó nene eza soza saza gakó nomimó mina vémo ale alévolé oko gakó losítá limó nene hize oteake amekago nene, aí amakuka golisi oko halá guni vegená lezagi nene netá matá ale vavá oletamó nenémimi gihilamú amuza moloko alitune loko gele minature loko lá imó neve.

¹⁹ * Ale vavá oleta netakumú logoliza vizekó ageva oko nounitímigo ligikámini lukesavate lolóoko noike guguni giziaká ve napate monó za-vusavegú ímeha gó agikagú itiaká amómáminoko okulumakú Ómasímini avogisaló lelémoko iteaká noive.

20 * Neneloka lelikumule loko ale goí olimiaká ve Izesú áisi nene ale goí o mololetoko voko agikagú vo hola ve Melikisetekeni avevezahaló lelí guguni gizoákká ve loló oake alévolé oko mino lúaló moloko minanogo ive.

7

Melikiseteké Ómasímini guguni gizo ameaká ve mina gakó

1 * Melikisetekeni mogonamú lo likimotoze, gililo. Eza nene Saleme numutoka agulizaki ve napa itó Ómasi napámini guguni gizoakká ve minamó. Lá noigo Avalahage kugulizaki ve gala véini kipili gizatotí atiginá niago, Melikisetekége viki gapoló hotu likasike eza Avalahani nónohá zetamó.

2 Lá omikago, Avalahá lovagutí vauna netá alekamó nene gatoko gona moloake netá 10 10 minakutí hamopamó nene Melikisetekeni amimó. Itó Melikisetekeni agulizámini mogona lelí gakokutí nene hee loko minoakalímini agulizaki ve napave. Itó Saleme apalímini agulizaki ve minakeve loko, agulizá makó lelí gakokutí nene hulu Guivahanive loko neve.

3 Melikisetekeni izolahiko amelahiko itó avolage keí kugulizá nene monó gotolaú luhuva gizinamamóma neve. Keí mogonamú vitágá iki iki ali utó milamamó neve. Eza minoko aleko imó nene apí imoláagi minamimó itó hilimoláagi minamimó nenazo, eza Ómasímini gipalagitana minake guguni gizoákká ve miní ameko mino-loko voko minamó nominave.

4 Imane gili guni iki gililo. Melikiseteké nene ve napa loló oko noigo, avoteho gihila Avalahá eza ve iteko minamó nenémo lovagutí vauna netá lamanakó gatoko gona moloake netá 10 10 minakutí Melikisetekeni hamopamó amimó neve.

5 * Livaini agapilamola lugáa guguni giziaká ve lilí iki mina ve keza Avalahani zuha lili amó nemóza, kigive kagavegutí netá matáini mukí omolamó 10 10 minakutí hamopamó ali alitave liki li mila gakó ali nupa iki lakutí nene li hukikitiki lamó neve.

6 Lá onomóza, Melikiseteké eza nene Livaini mulusigutí utó ami vémo nene Avalahani netá mata mukí 10 10 minakutí nene hamopamó gopa alimó. Lá noike, Ómasímo netá lamaná gimitove loko lo molota ve Avalahani nene nónohá zetamó.

7 Itó iti mina vete limi mina vegená nónohá zikimiaká niakumú nene makolímo ma gelemuve loko lamitimó nenazo, nenemú Melikiseteké eza Avalahani avilegeko ve napa minamó neve loko gelenoune.

8 Lugaloka nene guguni gizi amiaká nia ve keza miniki hilitamó nenete vegenalitini netá matáini 10 10 nekutí hamopamó aliaká niave. Itó lugaloka ámina netá 10 10 nekutí hamopamó ali ve Melikisetekékumú nene eza hili gakó itó agapilamó zuhatini gakó ma nominazo, eza minoloko voko minoaká noi veve liki luhuva gizinamó gelekave.

9-10 Neza gelekugo lá okave. Livaí eza avolahini agupeuka ha noigo, Melikisetekékei hotu li lomala niasigo, Avalahani liví nene ale amimó nene Livaini amimó geleneive. Lá okago, Livaí eza vegenatotí henoni 10 10 nekutí netá hamopamó aliaká a vetini avóipo mina vémo Avalahani amatoka minake ámina netá nene Melikisetekeni ale amimó gelekave. Itó Livaiki aí agapilamó zuhagi guguni giziaká ve lilí amó mukító nenete Melikiseteké mota Livaini avilegekave liki linamó gelekave.

11 Livaini agapilamó zuhatini guguni gizoaká hozámini gizapaló nene Ómasi eza Mosé lo hukoko li gakó nene Isilae vegená kimimóza, ámina guguni giziaká ve keza gapo velemó nenémo vo milisegeko minatuni netá ale utó ilina, alika guguni gizoaká ve makó haitolímini Melikisetekeni avevezahaló nanamú utó iline. Guguni giziaká ve Alonani agapilamó zuha minamó nenete lilími vatí ita lelegító minaline. Lá oniomóza, Izesú utó oake eza Alonani avevezahaló oko minamive. Eza Melikisetekeni avevezahaló utó iméne.

12 Nenémini mogona makó lá oko neve: Guguni gizoaká hoza litaha senisim oko gosohá makó ale utó itove loko lonoimó nenazo, Ómasímini avogisaló vo holoakakumú lo hukoko li gakó ámina iki senisim ikiko, gosohalímini makó utó itive loko lonoimó neve.

13 Lo hukoko li gakó nenémo Izesutoka vo alekago, eza guguni giziaká zavusavegú hoza ali ve Livaini agapilamolaloka likita vetini mulusigutí utó amimó. Izesú nene haitó mulusigutí utó imó nene ámina mulusigutí ve makolímo guguni giziaká zavusavegú hoza alesá amimó neve.

14 Guivahanite eza Livaini zuhagutí negopa, agunala Zutani zuhagutí utó imó neve loko mota gele asú oko gelenoune. Itó Zutani agapilamó zuha keza guguni gizi amiaká hoza alitakumú nene Mosé gakó makó lonamimóma neve.

Izesú Melikisetekeni avevezahaló utó i gakó

15 Itó guguni gizoaká ve gosohámámini mogona makó láoko utó okave. Guguni gizoaká ve makó Izesú eza Melikisetekeni avevezahaló utó okave.

16 Eza guguni gizoaká ve loló imó nene Livaini agapilamó zuhagutí utó inigave liki li hukiki linató negopa, eza alévolé oko minoakalímini zámuzaló guguni gizoaká ve minamó minokave.

17 * Aikumú nene monó gotolaú nene géisi Melikisetekeni avevezahaló guguni gizoaká ve mino lúaló moloko minanogo ane liki luhuva gizinamómá neve.

18 Nenemú Mosé lo hukoko li gakó nenémo vo milisegeko minatuni netá ma ale utó oloko vamimó nenazo, helegaloka guguni gizoakalímini gakó gozapá limó nene amuza nomító gihila makó utó amimole loko ale otopá zimó.

19 Itó helegaloka nenémini avilegetigí oko guguni gizoaká gosohakutí netá lamanakumú ageva oakalímini gihiláa ale utó molamó nenémo gapo velelimikago, Ómasímini avogisaloka voaká noune.

20 Gosohá guguni gizoaká nenémo Izesutoka utó imó nene Ómasímo ale alévolé oko lo hukotató alévolé zámuzalagi utó o amimó. Goí iki guguni giziaká ve keza Ómasímo ale alévolé oko lo hukoko lamító guguni giziaká ve líl iki minamíza,

21 * gosohá imane nene Ómasímo ale alévolé oko lo hukotató Izesú eza guguni gizoaká ve gihiláa loló oko noive. Aí luhuva gakó Ómasímo lo amimó nene láoko neve:

Guivahanímo ale alévolé oko lo hukake géisi guguni gizoaká ve mino lúaló moloko alévolé oko minanogane loko li gakó nene ahulaminogo ive.

22 Mognáa nenéminoko minokago, Izesú nene lo múnaheaká gakó gihilámini ale alévolé iti ve loló imó neve.

²³ Itó goí iki guguni giziaká ve keza nene hoza miní amiki aliliki nivake hili vivi amó nenazo, ámina hoza agepaló alita ve mukí minamó.

²⁴ Lá inamóza, Izesú alévolé oko minoaká ve minoakeve loko guguni gizati hoza nene miní ameko mino lúaló moloko minanogo ive.

²⁵ Nenemú alévolé oko minoakakú noi vémo nene gamena gamena lelikumule loko Ómasiloka voká loaká noinazo, aikumú gele alévolé unikeve loko Ómasímini avogisaló voaká nouni vegená vatí oko lugutó vizeloko voko minatimó neve.

²⁶ Lelémo guni guni oaká vele Izesú nene lelí guguni gizoaká ve napa noimó nene etokave. Eza apazá keké vizeko minoko lihimá nomimó agika gizopa lo minamó eza golesa netá aliaká a vegenakutí etó oko minake, okulumá avilege asú oko nomina ve nenémináamo hoza lá oko aleaká noimó nene etokave.

²⁷* Áisi nene guguni giziaká ve napa litahagitana nomive. Keza gamena gamena ganá kezáini lihimáinimú ganatilisi guguni gizi amiaké alika vegenalitini lihimáinimú giziaká niámóza, hoza nenémináa aliti mogona Izesú nene lihimavagi minamikumule loko nomimó. Eza agika aguapeva nene lehizetake guguni hamó nene gizo amekago voko asú imó.

²⁸ Mosé lo hukoko li gakotó nene vegená kigikámo gopa i vegená nene guguni giziaká ve minatave loko gopa loketamóza, Mosé lo hukoko li gakó amupiló nene Ómasímo ale alévolé oko lo hukoaká gakó nenémo gipala alémo etó okago, áisi nene guguni gizoaká ve minoloko voko mino lúaló moloko minatikumú vo milisegeko minamó neve.

8

Izesú lo múnakeaká gakó gosohalímini guguni gizoaká ve noive

¹* Gakó nolumó nenémini gotola ale nupa oko lá oko neve. Lelí guguni gizoaká ve napa eza veletoka okulumakú Ómasímini golivagi holomáló amakuka agizani lamagaloka voko noive.

² Eza apazá zugusave itó monó seli numuni gihiláa nenegú lelikumú Ómasiloka loaká noimó nenémo guguni gizoaká hoza loló okave. Ámina zugusave gihilama nene mikasi gomopaláló monó seli numuni vegenalite gemokopa, Guivahani ezáa ale utó imó.

³ Guguni gizi amiaká ve napa mukitoka keza iza goula nosá gizi vatá iaká itave liki kilimi etó amó nenazo, nenemú lelí guguni gizo ameaká ve Izesú ezagi Ómasí guguni gizo amitive loko lonoi ve minamó.

⁴ Itó mikasiuka Mosé lo hukoko li gakotó Livaini mulusigtí guguni giziaká ve nene hanuva niámó nenazo, Izesú eza keí mulusigtí utó amimó nenazo, eza itínasa mikasigú minamó nelina, lihimatemú guguni gizoaká ve minamíline.

⁵* Keza monó numukú hoza aliaká niámó nene hanuva avevezaha neve. Gihiláa nene okulumakuka neve. Nenémini gakola makó nene monó gotolaú láoko neve: Mosé eza monó seli numuni gitove loko noigo, Ómasímo láaa loko lo amimó: Gelenape. Agokaló noako ametamenía gelepizumó nenémáminoko netá mukí loló ozo loko lotamó.

⁶ Gosohá lo múnahi gakó iteko nemó nene ezáa gosohá lo mola gakó iteko nemó nenémo guhaiváa loló omikago ale utó molamó nenazo, ámina seli

numuni gitikumú láa loko lotamóza, imane nene Izesú eza Ómasigi vegeñaki kelémo apizitove loko lo múnahi gakó gosohá nenémo iteko nene neve. Áminámini oko guguni gizoaká hoza ezáa aleaká noimó nenémo iteko mukí guguni giziaká vetini hozanini kivilegekave.

⁷ Gozapá lo múnahi gakó minamó nenémo vihelé lo minamó nelina, alika makó utó itive loko gakoláa utó amiline.

^{8 *} Lá onoimóza, Ómasi áisi nene Zuta vegeñakumú gele golesa oake, lo múnahi gakó gosohakumú láa loko limó nene monó gotolaú láa liki luhuva gizinamóma neve:

Minoko gamena makotó nene Isilae vegeñaki itó Zuta vegeñaki lo múnahæká gakó gosohá makó ale utó oketatove loko Guivahanímo loko limó neve.

⁹ Gosohá nenémo gozapá avóike Izípi mikasiukatí kelémoko atove loko kigizató alu gamena kezagi lo múnahæká gakó moloketu gakokitana nomive.

Keza lo múnahæká gakó litaha nenémini agikagú ali hehe liki minamago, nénisi ánigo ahuloketumó neve.

¹⁰ Itó alika Isilae vegeñaki láa loko gakó lo múnahinogo uve:

Neza lo hukoaká gakónéa kagatagú molokugo liminogo ive.

Lá okoko kigikagú luhuva gizokugo minatize.

Neza Ómasinini minatoze.

Itó keza vegeñáne zuha minataze.

¹¹ Lá okiko ámemena niamó itó iti minamó mukí keza
nenikumú gili asú iki gilitamó nenazo,

nenemú ve makolímo agivelahinihe itó ahalulahinihe
geza litá oko Guivahanímini mogonáa gele hee lozo loko monó lo ameko
lainim-otaminogo ive.

¹² Lá okomú gilinigave: Neza nigika hize kiminake golesa netáini ahuloke-tanogo uve.

Itó lihimánimú goha nagata ma geleminogo uve loko Guivahanímo
lokave.

¹³ Itó Guivahani eza lo múnahæká gakó gosohalímini gakoláa láa loko like,
gozapá minamó nene mota litaha lokave loko limó neve. Itó netá litaha
hulupa lo vi netalímo haha itító neve.

9

Litaha seli numunima monó numuni makó gihiláámini avevezahaló mi-namó

¹ Lo múnahæká gakó litahagú nene Guivahanímini avogisaló gupá ze
ameaká gakó minamó, itó imane mikasiuka monó seli numuni gemó

^{2 *} nenémini gakola lá oko minamó: Ámina seli numukú nene sahaza makó
hizi hukamó makó avogisaló minamó, agulizá apazale liki lamó, nene
nene lamu ló hána itó holoma agisavagi minamó, itó holoma amupiló nene
Ómasímini avogisaló milina peleti nene minamó.

^{3 *} Itó voko agika makó ímeha gotunú hizi hukamó minamó, agulizá apazá
gihiláa etole loko minamó.

4 * Nenegú nene anuvagi paulá guguni gizoaká holoma makó golitunú lilí amó nene minamó. Itó golitunú hitina pokisi nene lo munaheaká gakolímimi pokisi minamó. Áminagú laisigitana netá agulizá mana nosalímimi somo nene golitunú lilí inamóma nene minamó. Itó Alonani hánusa sisiváagi nene minamó. Itó gatapa gehani losiló nene gapo lota gakó luhuva gizokago minamó.

5 * Veletó nene Ómasímini lapanalímimi avevezaha netá kogokénagi netá ageló nenéminko losítá keza pokisimámini amupiló lihima gilatoakakumú golani hepa hepa iaká ató nene kogokénatunú ali hitikasike minasimó. Nenémini gakola hána okative loko miní ameko lo asú amitove.

6 * Netá nenéminki milikago, nego, numuni avogisa nenegú nene guguni giziaká a ve keza gamena gamena itiki hozanini aliki miniaká amóza,

7 * apazá gihiláa etole loko mina numuni agikagú nene guguni giziaká vetini ve napa ezágó melekeni makolímimi agikagú nene gamena hamó zupa iteaká imó. Lá oake meme izatini itó pulumaká izatini golani aleneikegó itike ezáa lihima itó vegenalitini lihimáini gopa alinamó nenemule loko lihima gilatoaká holomaló golanima hepa imó.

8 Ámina netalímini mogonamú nene Sikalahulímo láa loko lo nolimive: Seli numuni nene ha neiko apazá gihila etó onoi zavusavegú Ómasímini avogisaló vo holatuni gapo koló o gesá amimó neve.

9 Itó ámina seli numuni minamó nenémó imane gamenaló Izesú loló oaká noi netalímini avevezahaváa neve. Nene ánigokinake nene apazá seli numukú iza goula nosá guguni gizi vatá iaká nenémó Ómasímini monó lituni vegená ligikagú vihelé lo miniko minatuni netá ale utó amitimó neve loko gilitune.

10 Nenémó lugupeloka li mila gakó nenegó neve. Itó zahí nagamí itó lugupe nagamí zeaká nenéminki gakoláa neve. Nene Ómasímini gakotó utó okago, vegenalite ámegetiliki viki niko alika Kilistó lo munaheaká gakó gosohá utó itive loko lo hukoletamó neve.

11 Lá onoimóza, Kilistó áisi nene netá gihiláa ale utó inogo molamó nenéminki guguni gizoaká ve napa utó imó. Lá oake seli numuni haitolímimi nene vo milisegeko minamó itó gihiláa lamaná minamó itó kigizanitunú gemamó itó imane mikasiuka nomimó nenegú itimó nene

12 eza memegi pulumakalitinigi golani negopa, ezáa golaniagi apazá etó oko mina apakú gamena hamó itike meinavate hizeko gologí oletati gapo vilimó nenémó alévolé oko mino lúaló moloko minanogo ive.

13 * Memegi pulumakalitinigi golani itó pulumaká akalevámini lanía nene golotuva mogona alina vegenatoka hepa hepa iake kugupeloka holokimikago, vihelé igo minamó.

14 Lá okanazo, Kilistó eza nene mino-loko vova vova oaká Sikalahulímo hize lé otago, ezáa agika agupe avasavagi minamó nene Ómasi lehizemiske, lélisi oko moloko oaká uhá netá hutuváa ligikagú gímizimó nene Kilistoni golanímo aleko iteko nagamí zeko lelémo vávani okiko, alévolé Ómasi gelekeleláa otanogo une.

15 Nenémú nene Kilistó eza lá oake, lo munaheaká gakó litaha nenéminki gizapál minunike lihima ale utó mulunikutí akagá oletatove loko hilimó

* **9:4:** Gá 30:1-6, 25:10-16, 16:33; Nam 17:8-10; Gapo 10:3-5 * **9:5:** Gá 25:18-22 * **9:6:** Nam 18:2-6

* **9:7:** Liv 16:2-34 * **9:13:** Liv 16:15-16; Nam 19:9,17-19

neve. Lá okamó nenazo, Ómasímo sele lo kimi vegená keza alévolé oko minoaká helisa henoni alitave loko lo moloketamó nene ali lá itave loko Ómasigi vegenaki kelémo apizeakakumú lo múnahi gakó gosohá ale utó mololímikave.

¹⁶ Helisa henonímini gapováa lá oko neve. Izegipatini améipo hilimómámini mogona utó o lamaná okagogó helisa henoni alita gapo koló itive.

¹⁷ Gosohá agómulagi noiko, helisa netalímini gakó nene hanuvagó minanogo ive. Helekiko, améipini netá matakumú luhuva gizina gakó nene gihila zekiko, helisa henonima gona miliki alinigave.

¹⁸ Nenemú ámináminoko lo múnahaeká gakó litaha nenémo pulumaká ahe memetini golani lepikagogó vo alimóma neve.

¹⁹* Nenémini mogona lá oko neve: Mosé eza lo hukoko li gakó luhuva gizamó nenémini gakola lo keme asú oake, pulumaká izatini itó meme izatini golani nene nagamiki ale gopa oake, sagelegelegítana netató nene meme izámini zopova golohatunú molo likeake, nenetunú nene ahipí zeake, lo hukoko li gakolímini pepaló itó vegenatoka hepa hepa imó.

²⁰ Lá noike, Ómasímo lo múnahaekálímini gakó lo hukoleketamó nene golani imanémo ale alévolé oko minative loko lo kimimó.

²¹* Mosé nene monó seli numuni nemó itó apazá hozámini netá matá nemó nene láoko ahipí zeto asú imó.

²²* Itó lamaná Mosé lo hukoko li gakotó netá mukí otigí nene memetini itó pulumakalitini golanitunú ale guluví loaká noimó neve. Golani lepinamató nene lihima gilatoakaláa ma nomive.

Lihimate Kilistoni amupiló itekago agohí geake Ómasi guguni gizo amike hilimó

²³ Netá matá gihila okulumakú nemó nenémini avevezahaváa nene gahanamatini golanitunú nenéminiki nagamí ziki ali guluvitatave loko lonoimó nemóza, okulumakú iteakalímini gapo gihila nene guguni gizoakalímini etó oko haitolíminitunú nagamí zeko ale mokoná lative loko lonoimóma neve.

²⁴ Nenemú nene Kilistó eza apazá zavusave kigizanitunú gemó itó netá gihilámini avevezaha minamó nenegú nene vo holonamive. Eza okulumakú iteake Ómasímini avogisaló lelikumule loko hize lé oletati hoza nene aleaká noive.

²⁵ Zuta vetini guguni giziaká vetini ve napa áisi meleketó meleketó gamena hamokó zupa apazá numukú voaká noive. Lá noike, ezáa golaniatunukopa, hanuva netalímini golania aleake iteaká imóza, Kilistó eza agika agupéa gamena gamena ahuloletamó nelina, eza mikasímini guhaiváa utó itotí emane heleloko ova ova oko komásí minamiline.

²⁶ Lá onoimó nenazo, Kilistó ezáa agika agupéa nene lelikumule loko abulanogo gamena mukí itemimóma neve. Áisi nene Ómasímo mola gamena asú inogo noigo gamena hamokó ezáa agika agupéa nahulíko, lihimate asú itive loko utó imó nene asú o lamaná okave.

²⁷ Vegenalita gamena hamokó hilitune loko itó alikáa lihimatemú goní inogo une.

²⁸* Ámina oko Kilistó eza mukí vegenalitini lihimaváini aí amupiló itekago, agohí geake Ómasi guguni gizo amike hilimó. Itó lihimate asú itive loko

negopa, eza kogoliza viziki ageva iki miniaká nia vegená kugutó vizeaká hoza ale lutigitove loko alika goha utó inogo ive.

10

¹ Mosé lo hukoko li gakó nene makó gihiláa alika utó ititímini avevezahaváa neve. Gihila lamaná nomive. Nenemú guguni giziaká ve napa keza Mosé lo hukoko li gakotó kilisimasiló kilisimasiló guguni áminámini ikigó giziaká niamó nenémo Ómasímini avogisaló viaká nia vegená nene monéna vo milisegeko minoaká gapo velesá ale utó amimóma neve.

² Ómasi gupá zi amiaká nia vegená nene monéna kigika ale gizopa loketamó nelina, ligikagú lihimate nomimó nominune liake guguni gizoaká nene ahulaline.

³⁻⁴ Lá onoimóza, guguni gizoakakú memetini itó pulumakalitini golani lekémó nenémo lihimaváini asú oakaláa ma nominazo, guguni gizoaká nene kilisimasiló kilisimasiló nigizago, lihimaváinimú goha giliaká niave.

⁵* Nenemú nene Kilistó mikasigú limitove loko noikeye ezáa agupe guguni gizatikumú nene amelahini lo ami gakó nene monó gotolaú láa liki gizinámoma neve:

Guguni gizo gemeaká nene haitopaitolímiminimú gumu helemive.

Lá okaninazo, nugupe ale vavá onetanimó neve.

⁶ Haitopaitó izatunú apiliki saga liki guguni giziaká amó nene ánigo lamaná osá amane.

Lihimavate asú itive loko guguni gizoakakumú ma gelesá amane.

⁷ Lá okago, láa loko lumó: Gelenape. Ómasi geza litanitoka molatanitoka itove loko nouve.

Lo hukoko li gakolímini luhuvagú není gakó gizonoitó alitove loko nouve.

⁸ Iza guguni gizo gemeaká haitopaitolímiminimú gelesá amane loko, itó haitopaitó izatunú apiliki gé liake lihimavate asú itive liki guguni giziaká niamó nene ánigo lamaná osá amanimó neve loko limó nene, ámina guguni gizoaká hoza nene Mosé lo hukoko li gakotokó giziaká akumú limóza,

⁹ némiaka loake Izesú miní ameko láa loko limó: Ómasi geza litanitoka molatanitoka itove loko nouve loko limó nenazo, lihimate asú iti gapo litaha nene ale otopá zeake, gapo gosohalímimi nene ale utó imó.

¹⁰ Nenemú Ómasímini gakotó Izesu Kilistoni agupe nenémo guguni gizokago, leza mukitoka ligika ale guluvitokago nounimó nene goha aleminogo ive. Mota alekago monéna asú onoive.

Kilistó ezáa golanitunú guguni hamó gizokago asú okave

¹¹* Zuta vetini guguni giziaká ve mukitoka keza gamena gamena hozanini aliki oti minake guguni giziva giziva iki miniaká niamóza, nenémo nene vegenalitini lihimáini gilatoketosá amive.

¹²* Lá onoimóza, Kilistó nene lihimate asú itive loko ezáa golanitunú guguni gizokago, asú okamó nenazo, nenémini amupiló gohalá aminogo ive. Itó lá oake, Ómasímini agizani lamagaloka mitó minamó.

¹³ Neneló Ómasímo gala veva agisa lapuvauka kelémo molatikumú ageva noive.

14 Ligika avasavagi lelémo etó oaká gapoló voaká nouhá vegená nene guguni hamó gizoake, lelémo vo milisegeko minatuni gapoló molokago, lutegekamóma neve.

15 Itó Ómasímini Sikalahulímo ezagi ámina gakó nene lamaná gihila neve loko lo utó oko lo lemekamóma neve. Aí gakola monó gotolaú láoko neve:

16* Aliko gamenaló lo munaheaká gakó láoko ale utó moloketatove loko Guivahanímo láoko nolive: Neza nene lo hukoko lu gakó nene kigikagú molokimikugo, lemekago, kagatagú luhuva gizokugo minatimó neve.

17* Loko loake, áminaló miní ameko láoko live:

Golesa netainimú itó lihimánimú goha geleminogo uve.

18 Nenemú lihimate mota ahulonooitó nene netá golesamú guguni gizoaká nene áminagó oko asú o lamaná okave.

Ómasímini avogisaló anitinake monó ale gikitoko ale minatune

19 Nenemú nigivénegita, Izesuni golani nenémo gahe segelimitako, leza Ómasímo apazá minoaká noitoka ititunikumú ligika nene vávani oaká noive.

20 Monó zavusavegú ímeha gó nene aí agupémini avevezaha minamó nenazo, nenémo zeko hoú lo losi noigo Ómasímini amatoka voakalímini gapo gosohalímini itó alévolé oko minoakalímini ezá ale koló oletamó nenazo,

21 itó eza iteko voake, guguni gizoaká vele napa loló oake, Ómasímini vegenala zuha lelí gototeló gizapa ve noinazo,

22* nenemú eza gele alévolé unitímo ligika vávani onoiko, soza ligikagi minaminake, itó lihimategi nominuko gena livisi netá nene aí golanitunú holomikago, ligika vávani ominikó, itó lugupe nene nagamí agómula ominatitunú nagamí zelimikiko noinake Ómasímini avogisaló anititune.

23 Lá noinake, leza gakó lo molató amegesaló moloaká ve noinazo, ageva nouni netá nene lagata losi pasi amoko ale gikitoko gizapa oko minatunize.

24 Itó ligikatunú nasahilíoko ligika eza amiko eza amiko inake, netá gihila loló oakakumú eza alémo vatí iko eza alémo vatí iko oko minatune loko ligika ale vávani oaká gapomú vitagáoko minatune.

25 Lá inake, monokumú alegesá oakakú vegená lugáate isá amake amanapa iki miniká niámio nenémini aminake, eza ale kii lotiko eza ale kii lotiko itunize. Guivahani ati gamena mota alitokanazo loko gele mininake amuza moloko nenémini itunize.

26 Nenémini amitunikumú láiki gililo: Leza Ómasímini gakó gihiláa nenémo ligika hize hanatokiko, golesa netá nene goha lagata geleko alémo etóoko ale minukoma, lihimate asú itive loko guguni gizoakaláa makó ma nomíve.

27* Nenegopa nenémini lihimaváa golivagi napa ló agénahunámini lehelele viziko ageva minanogo une. Ló guluma nenémo Ómasi lova ali amiaká nia vegená nene akohú kipilinogo ive.

28* Ve makolímo Mosé lo hukoko li gakó avutá okago, ve losive makolehe itó lositakó ahe aí gakola likago, aí mogona golesa utó okago, miluma gilitamake litá iki hiliaká niave.

29* Nenémo genavagi otigíoko nemóza, ve makolímohe makolímohe Ómasímini gipala ale mumusopa zitimó, itó apizeko munaheakalímini gakó

* **10:16:** Zel 31:33 * **10:17:** Zel 31:34 * **10:22:** Liv 8:30; Izi 36:25 * **10:27:** Isa 26:11 * **10:28:**

Gapo 17:6, 19:15 * **10:29:** Gá 24:8

gosohá ale alévolé oaká golani lepimó nenémo agika ale mokoná lamó nenemú ánígo ha gele gele itímó, itó nasahilí olimiaká Sikalahuni nene aleko letatimó nene, Ómasímo nana otatimó neve. Eza goní napa genavagi inogo ive.

³⁰* Gilinahe. Lihima kemeaká nene není hozámini ago helegáa neve, itó apasoaká nene nezáne inogo uve loko li vemú gelenoune. Itó Guivahani eza vegenala zuha keitoka gakó hoza aleko gona moloketanogo ive loko li vémini mogona geleaká nouhá nenazo, litaha gapoló atiginá oko vitunikumú goní aminogo une loko litupe. Íi.

³¹ Gamená napaló alévolé oko minoaká Ómasímini agizakú holoaká nene genavagi netá nekumule loko noluve.

³² Lekeza gozapá Kilistoni gakó ganá gelekumú goha gililo. Gamená nene zupa likigikagú nene Ómasímini liví nenémo hize hanatolikimikago, miluma malumámini agikagú minake Izesukumú génopa hoza aliki alévolé iki minamó.

³³ Itó lekeza miluma metalímo lukumupiló itekago, gopoguri mililikitake lokovoza hiliti netá lilí ilikitinamó. Itó gamena makó lekeza nene likigive lakagave netá nenémíná lilí nikitagó lekezagi miní amiki miluma gilikitamó.

³⁴ Likigive lakagave nene monokumule liki nagá numukú ahulikimikago, keikumule liki mulutini gitihiná imóma neve. Itó monóini nomi vegenalite henokanotini ipá i alikago nene, likigikámini henoni lamanaláá alévolé oko mino-loko voakalímini okulumakuka molonoune liki giliake, lokogoliza viziaká amóma neve.

³⁵ Lá iki minamó nenazo, itína nene Ómasimú gele zageakatini ahulamilo. Nenémo minoko alika meinava napa ale utó oleketanogo ive.

³⁶ Ómasímo lititoka molatitoka oko moloko inake netá ale vavá oleketamó nenémíni gihiláá alika alitune liki lekeza genavagi netalímini agikagú hulu iki minalo.

³⁷* Izesú lelí hozámini meinaváá liminogo goha atikumú monó gotolaú luhuva makó láá liki gizinave:

Gamená alínipa makó neve. Nene asú noigo anogo ize.

Ative liki lina ve nene mino otoha amoko litá oko anitinogo ive.

³⁸ Lihimáini nomi vegenáne nenete gili alévolé atímo alévolé iki miniki aliki inigave.

Itó makó keza ahuliiki atiginá iki vitamó nene keikumú gelekugo laga niviseminogo ive
loko Guivahanímó limó neve.

³⁹ Itó leza keé lamunike goselekeselé oko monó ahulunike lapuluva oaká gapómini mututoni noamune. Lélisi nene Izesunímú gele alévolé okunike lemeni lugutó vizeakalímini mututonáa noune.

11

Ómasimú gele alévolé oakalímini mogonáá

¹ Ómasimú gele alévolé oakalímini mogonáá lá oko neve: Netá matakumú lagata losi gelemoko ageva oaká nounimó nene alitune loko gele seketigí o minatune, itó ánígamumi netakumú ageva oaká nounimó nene ale ligizakú itune loko gele hamokó itune.

2 Avotege lugáá gozapá miniki aliki amó nenete Ómasimú gili alévolé iki miniaká amó nene Ómasímo ánigokago lamaná oaká imó.

3 * Gozapá nene Ómasímini gakotó mikasiuka netaki okulumakú netaki ánigoaká nouni netá nene ánigamosalagutí utó imó neve loko gele alévolé unikeve loko hee loko gelenoune.

4 * Atani gipala Epoló gele alévolé oakala minakeve loko Ómasi guguni gizo amimó nene Ómasímo ánigokago, lamaná okago, uvolaho Kaini nene ánigo goselé imó. Epoló gele alévolé oakala nene Ómasímo ánigokago lihimala minami ve minake, guguni gizo amekago alimómámini mogona neneló ale molamó. Itó Epoló helekamóza, gopa gele alévolé oko mina gakó imane lo lemeaká noimó gelekave.

5 * Enokú eza gele alévolé oaká ve minamole loko Ómasi eza ánigo lamaná oake heleaká nene aitoka utó amitive loko gosohá agómulagi okulumakú alémoko itímó. Lá omikago vegenalite aikumú vitágá amó. Itó velesá itenamigo aí mogonamú nene Ómasímo Enokuni ánigo laga imó neve loko utó onoimóma neve.

6 Nenemú láo loko gilitunize: Ómasi eza noive loko itó aí mogonamú amuza moloko vitágá ituni vegená nene meinava limitive loko ligikatunú gele seketígí okogó aí amatoka voakaláa nenazo, gele alévolé oakate minamitimó minokukoma, Ómasímo ánigatimó ma ánigo lamaná amitimó neve.

7 * Noá eza gele alévolé oaká ve minamómove loko Ómasímo alika ale utó iti netá velesá ánigamigo, goí oko gakó agata aleko lo amekago, Noá nene Ómasimú goliva giliike vegenala zuhagi gosohá minatave loko nene loake, nagamikú lape sipisi loló imó. Lá noike, mikasiuka vegenalitini lihimáinimú goní ita mogonamú lo utó oake, lihima asú omikago minoakalímini gihiláá Ómasimú gele alévolé unikeve loko aleaká unitímíni gihiláá nene ale utó imó.

8 * Ómasímo mikasi makó geí helisa henoni minative loko lehizegetaže, geza mikasiga ahulokoko makotoka voko minatane loko Avalahani lo amekago, Ómasimú gele alévolé oakeve loko gele aleake mikasi nenemupe nenemupe limó nene gelemike, gele gopa oake gopa vimó.

9 * Gele alévolé oaká ve minoakeve loko mikasi ánigo molotamó neneló vike aniteake, gutá minake, seli numuni moloake minake, ánuvanegú ako minamó. Gipala Isaká itó aí gipala Zakopó keza ámina lo moloketa netá ali lá itái ve minasike ámináminiki seli numukú miniaká asimó.

10 Avalahá eza alévolé lukesavagi apá makó utó itive loko Ómasímo vogunahana moloake ale utó mola apakumú ageva oko minamó.

11 * Venala Salá eza gohuna vená noike, Ómasimú gele alévolé oakalímini minoakeve loko gelehosi moloake izegipala getati gamena asú okago, zámuza amekago, izegipa agatupagi minamó. Ómasímo nene agómulaló lo molomikago gihila zeaká noi vemámo lo utó molokave loko gele seketígí oake nenémíni imó.

12 * Itó nenemú nene hele vegenakitana mina ve hamokutí hize hutilí oakalímini zámuzzáa asú oakakú agapilamó zuha hizi hutilí amó keza okulumatoka sonohí minoloko voko oko noimó nenémíni avevezahaló, itó age

* **11:3:** Apí 1:1; Age 33:6; Zon 1:3 * **11:4:** Apí 4:3-10 * **11:5:** Apí 5:21-24 * **11:7:** Apí 6:13-22
 * **11:8:** Apí 12:1-5 * **11:9:** Apí 35:27 * **11:11:** Apí 18:11-14, 21:2 * **11:12:** Apí 15:5, 22:17, 32:12

nagamí agataló emane getani nemó nenéminoko vegentalita gatoko gato asú amoakalimini avevezahaló utó iliki vamó.

^{13 *} Ámina vegena mukitoka Ómasimú gili alévolé iki minake miniki hili vamó keza ale vavá oketa netalímini gihila nene velesá alemake, hanuva hotó nego ánigiake, kogoliza viziki ali kamatoka milamó. Lá iki minake, leza mikasiuka hanuva veno ve gutá noune liki gelemó.

¹⁴ Gakó nénika liki liaká nia vegentalite gotó apáini gihila makó ali utó milanigi kigikagú giliiki minamómámini mogona mota utó okave.

¹⁵ Lá iake, keza numuni apáini itó mikasinini ahulakumú miluma makó giliiki lá amamó. Ámina apakumú kivisekago nelina, atiginá iki anigi hanuva aline.

¹⁶ Lá onoimóza, keza nene numuni apáini lamanaláa makó alinigi nene-mukó gelemó nene okulumá apakumú gelemó neve. Ómasimú nene Ómasile liki likago, gelekago agoliza napa vizekave. Nene ezáa numuni apá makó okulumakú ale utó moloketakumú geleneike agoliza vizekave loko gele-noune.

^{17 *} Itó Avalahá eza Ómasímo amekú mola gamena nene gele alévolé oaká ve minoakeve loko gipala Isakani apeleko gizatove loko gele vávani imó. Ezáa agapilamó zuha hizi hutilí itave loko Ómasímo lo molota gakó nene ale ali ve minamóza, gipala hamó nene apeleko gizatove loko gele hamó imó.

^{18 *} Isakatokatí hizi hutilí itamoláamú gagapilamola gihila minanigave loko lota gipala minamóza, ámina gipa nene apeleko Ómasi guguni gizo amitove loko gilimó.

¹⁹ Avalahá eza Isakakumú láa loko gilimó netive: Ómasímo eza Isakani heleneikutí alémo otitove loko nenémini zámuza aleneive. Lá onoinazo, heleneikutí alémo atiginá imó gelekave loko anoza letoko limóma neve.

^{20 *} Itó Isáká eza gele alévolé oakeve loko alika utó iti netalímini gakó nene Zakoponi itó Esauni lo kimike nónohá zeketamó.

^{21 *} Zakop nene Ómasimú gele alévolé oaká ve minoakeve loko hilinogo noike Zoseheni gipala losítá nónohá nozeketake, hánusatunú hize gikitoake ote minake Ómasi gupá ze ameko agepoka limole.

^{22 *} Zosehé eza gele alévolé ve minoakeve loko hiliti gamena alitokago, Isilae vegena miniki Izipi mikasi ahuliiki vitakumú geleake ezáa helisamú gói oko lo hukoko nene vinigi niiki není helisagi aliki vilo loko lo kimimó neve.

^{23 *} Itó Mosé utó okago, izolahiko amelahiko nene Ómasimú gili alévolé iaká aleve minikasikeve liki izegipáinimú izegipate lamaná netá neve liki ánig kumu hilikasigo, agulizaki ve Palaoni gakokumú kelegesá legemigo ikani losive makole novigo alími halá gesimó.

^{24 *} Itó Mosé napa oake Ómasimú gele alévolé o minake, Palaoni moholámini gipalave liki litanigi ago óe loko gele ahulamó.

²⁵ Eza golesa netalímini lagaváa mino háná oko minamoakalímini nenemú giligo lemekago, Ómasímini vegena zuha kezagi miluma netalímini agikagú niago, kezagi miní ameko glitove loko mino etó imó.

* **11:13:** Apí 23:4; 1 Iki 29:15; Age 39:12 * **11:17:** Apí 22:1-14 * **11:18:** Apí 21:12 * **11:20:** Apí 27:27-29,39-40 * **11:21:** Apí 47:31-48:20 * **11:22:** Apí 50:24-25; Gá 13:19 * **11:23:** Gá 1:22, 2:2

* **11:24:** Gá 2:10-12

26 Lá oake, eza minoko Palaoni helisa henoni ale lá ooko Izipi mikasigutí moni henokanoni itó netá matá minumuni mukí alitikumú giligo, ha netá loló okago, Ómasímo gologí oletative loko lo mololeta vemule loko miluma gilimoláa minatove loko nenemú giligo gihiláa loló imó. Eza minomo noitike okulumakú nenémini meinaváa alitove loko lá imó neve.

27* Itó Mosé eza gele alévolé oakeve loko Izipi mikasi ahulamó nene agulizaki ve Palaoni izapaló molakumú nene ahelele vizimó negopa, Ómasí ánígamoakálímíni aí agómulatunú ánígamó gelekago, alévolé oko minake lá imó.

28* Mosé eza gele alévolé imómove loko lokago, sipsip iza apilivi givi iake, vauna aleaká ageló nenémo Isilae vegenalitini ganá gipáini nene asenini zeketative loko golaníatunú numuni gateni zaló hilitamó.

29* Itó Isilae vegená keza Ómasimú gili alévolé iakeve liki age nagamí agulizá golohá nagamikú likiki vamó nene nagamí nene mino ezega emega okago gunahá mikasiló vamó. Itó Izipi ami ve keza nene ámina oko vitune liki nivago, age nagamilímo kelémo sumizá namó.

30* Itó Isilae vegená keza gili alévolé a vegená minikakeve liki Zeliko numutó nene gamena 7 oko novigo vegegisa nene ali vigikago vegegisa nenémo lemeko akamó.

31* Itó gapoló mokoló vená Lahapá eza Ómasimú gele alévolé itímo ve losítosa Zosuá kimiselekago vegená kemení áníganigi guhu gapo vasimó nene numunagú kelémo molokago, Ómasímini gakó pelesa ziaká a vegená nene Ómasímo kepeleake Lahapani nene aseva zetamó.

32* Lá ikamóza, gakó lugáa nanave loko lo asú itove. Giteoná itó Palaká itó Samisoní Zepitá Tevití Samuelé itó Ómasímini agepagutí gakó liaká ve keí gakó lo asú okó linogo nelina, loloko novugo háná íline.

33* Keza Ómasimú gili alévolé a vegená mukí minikakeve liki lugáate vegená mukí nene lova ali kemeke kivilegemó, itó Isilae vegenatokagi hetoka vegenatokagi gizapa ikitiki kagata aleaká hoza aliki kilími hehe lamó, itó Ómasímo netá lehizeketatove loko lo moloketa netalímíni gihiláa alemó. Itó lugáate laezoni akohú galatini kegepaló alego,

34* lugáate ló gulumámíni agénahuna ali geha zego, lugáate lova amupiló nitekegi lá amóza, gosohá minamó. Keé lamatite goha nene amuza milamó. Itó lugáate lovagú amuza milake mikasi lugalokatí gala venini kipilivi gizivi amó.

35* Vená lugáate Ómasimú gili alévolé amómave loko Ómasímo izegipáini hilinakutí kelémo oteake goha izóikitoka kelémo gímizimó. Itó helegaloka Ómasimú gili alévolé ina vegená lugáa nogosani kepeleke gopoguni milikitamó nene monó ahulikiko aselini zeleketatupe liki li kimikago alikaloka lamaná oakakú goha otinogo une liki giliaké, gili ha iake helemó.

36* Ómasimú gili alévolé a vegená lugáa giza nikitake gopoguka likitake segi nogosanitunú kepelemó. Itó lugáa keza kigisa kigizató seni nagá aliake nagá numukú ahulikitamó.

* **11:27:** Gá 2:15 * **11:28:** Gá 12:21-30 * **11:29:** Gá 14:21-31 * **11:30:** Zos 6:12-21 * **11:31:** Zos 6:22,25, 2:1-21 * **11:32:** Gon 6:11-8:32, 4:6-5:31, 13:2-16:31, 11:1-12:7; 1 Sam 16:1; 1 Kug 2:11; 1 Sam 1:1-25:1 * **11:33:** Tan 6:1-27 * **11:34:** Tan 3:1-30 * **11:35:** 1 Kug 17:17-24; 2 Kug 4:25-37
* **11:36:** 1 Kug 22:26-27; 2 Iki 18:25-26; Zel 20:2, 37:15, 38:6

37* Vegená lugáa gehanitunú kipili helemó, itó lugáa nene kugupenini ziki gitgemó. Itó lugáa nene sopolotunú kipili helemó. Lugáa keza Ómasimú gili alévolé amómave liki kimisili ahulikago, keza mikasi gomopalaló itó agokaú gutá iki minake, mei tutuhunauka itó geha mulikú akiki mihina iki minamó. Lá iki minake gineganéini nomigo sipsip iza meme izatini galupaváa ali luhiake, gaúnámini amupiló minake, megusa izegipa lilí iki milumámini amupiló minamó.

38 Nenéminate gevená lugáa keza nanáinilotí mikasiuka apiziki minikago hehe laline.

39 Nenémíná keza mukitoka gili alévolé akumú Ómasímo ánígago lamaná imó. Lá okago, gopa nene netá lehizeketatove loko lo moloketa netalímini gihila nene kogómulagi mina gamenaló ma ali utó milamamó.

40 Nenémíni mogona lá oko neve: Ómasi eza lelitoka netá ite minamoláa moletanogo gelekago minamó nenemú keza goí iki ámina netá alemamó. Aliko nene lezagi vo milisegeko minutuni netá nene ali utó itave loko Ómasímo moloketonoimóma neve.

12

Guivahanímo lagavutó zeaká noive

1 Ómasimú gele alévolé oakalímini mogona li utó a vegená mukilite zohító mulusi napa nenéminkí miniake lilími vigikamó nenazo, nenemú lesis-iaká nia vegenalite ololu liaká nia mogonamú gele mininake gena lepeleaká netá nene gololohá oko ale ahulatunize. Itó lihima netalímini nagá likimó nenegi guluhoko ale ahulatunize. Lá okinake gapo lelepizimó nenenlokó goselé aminake ololu lokogó vitunize.

2 Láa noinake gele alévolé oakatemú ale goí moloaká itó nenémíni gihiláa ale utó moloaká ve Izesú nene makimáminoko logómulaloka noiko aitoka ánígo zage loko ololu litune. Eza agoliza nene utó o amitive loko lonoitó zohota zaló heleakalímini avoza napámini amupiló itikumú giligo ha netá loló okago, miluma gilike hilímó. Lá oake, Ómasímini gonanalivagi siató agizani lamagaloka iteake mitó noive.

3 Golesa netá itó hokolizá nene Izesuni lilí itamó nene gele ahuloake, legesó oko minamó. Lekeza aikumú nigiliki goselé amilo. Likigikatini golosasa gekatize.

4 Lekeza golesa netakumú gimilikú moloaká netalímo lekelémo akanogo noigo amuza miliki lova ali namego lukugupelini apilikago golani velesá amíve.

5* Itó Ómasímo lekelikumú izegipáneve lolikimiaké luhusatini ale kii loleke-take, gakó makó lo likimimó nene lakagatí molokahe, olo. Gakó láa loko limó neve:

6 Guivahanímo agika kemeaká noi vegená mukitoka kagavutó zeko kelémo hehe loaká noive.

Itó aí izegipala lamaná kelémo molamó mukitoka nogosani kemeko kelémo hehe loaká noinazo,
nenemú gípáne geza Ómasímo gelémo hehe lanogo gagavutó nozikoma, nenemú gelekako lememino.

Itó golesa netakamú nogosani gemekikoma, gigika golosasa gemino.

7 Guivahanímo lakagavutó zekikoma, goselé amiki alévolé iki minalo. Ve makolímohe makolímohe gipala apeleko alémo hee lamitihe. Lá oko nomive. Kelémo hee loaká nene vegená mukilite lá iaká nianazo, Ómasímo ánígokago aí mohola gipala lili ikago, lekelémo hehe línogo nenémini olikimiaká noive.

8 Itó Ómasímo izegipala mukitó kelémo hee loaká noinazo, lekeza nene lá oleketamiko minatamó nene, mohola gipala gihila lilí iki minaminigave. Nene gapoló izegipave loko loleketañogo ive.

9 Itó makó lítoze. Mikasiuka ametuge keza nene lagavutó zikago, leza géneka lamoko kelémo napa uháma nenazo, ligikámini ametehini agahaisiuka lemeko minokuko etanogo ive. Lá okinake mino lamanatoka moloko minanogo une.

10 Ametuge kezáini kagata geletó nene melekeni gamena luguhá oko novigo lagavutó ziki lilií hehe liki miniaká amóza, Ómasí áisi nene netá gihiláa utó o limiteve loko itó ezá apazá keké vizeko nomina mogona izá miliki alitave loko lá olimiaká noive.

11 Lagavutó zeko lelémó hehe loaká netá utó okagoma, ganatilisi gelekuko laga netá negopa, milumavagi loló oaká noive. Itó alikaloka nene hehe loakakú minoaká nounimó nenémini gihiláa nene huhu lelitoka utó inogo ive.

Ómasímini nasahilí ániyi ahulikatave loko kagata alímó

12 * Nenemú lekelisi likigika gopa o vimó likigisa likigizani akatamó lili niikima mielelé amiki alévolé ilo.

13 * Monolímini gapogú vinigi niiki kigisa gepili mina vegená makó monéna golesa i asú ikataze. Goha monokú mielelé amitave liki lekeza Ómasímini gapoló nene ali hehe liki mihina ilo.

14 Lekeza mukí vegenaki hulu oko minatune liki amuza milalo. Kigika golotuva lovímó nenete miniki Guivahani ánígamitamó nenazo, likigikagú gizopa lo miniko minatakumú amuza milalo.

15 Lekelitokatí ve makó Ómasímini nasahilikutí velehé limikataze, gizapa iki minalo. Lá niiki holutíku gohege golesa makolímo sisiva isekoko loko loaká noimó nenéminoko likigikámini ekesalámo napa okiko, vegená mukilitini kigika gopa okatinaze, gizapa ikitiki minalo.

16 * Lá niiki lekelitokatí makolímohe makolímohe mokoló ve keza mini etó iki minamake miniaká amó nenéminoko Esauni gapoló vokatize. Esaú eza nene hamokó nosánetakumule loko ká emane alikaloka utó otati helisa netá nene ahulamómá neve.

17 * Lekeza aí mogona mota gilinave. Eza alika amelahitokatí lusa alitove lokago amelaho óe lokago, netá matá imó nene nana oko haha itive loko geleake, ive nama oloko viha viha voko avisa lamómá neve.

18 * Lekeza Isilae vegená alemó nenéminiki Sinai agoka ali giliaká avotigilaló amave. Ló gulumagú ma vi hilamamómá neve. Itó límusi sipisi hitakú itó límugusi ze minakú itó ohuhú nalikú nenémini agikagú ma vi hilamamómá neve.

19 Lekeza Sinai agokaloka pikuli napa zimó itó Ómasímini anó lupa napa ma gelemamómá neve. Gelemoláate nene gakó makoki gelemitune liake negénegé iki minamómá neve.

* **12:12:** Isa 35:3 * **12:13:** Ano 4:26 * **12:16:** Apí 25:29-34 * **12:17:** Apí 27:30-40 * **12:18:** Gá 19:16-22, 20:18-21; Gapo 4:11-12, 5:22-27

20 * Gakó láa loko lo molamóma nene gilikago kehelele vizimó: Vegená makó keza agokaló lisi gilikikoma, lekeza gehanitunú kipili hilitaze. Itó izamukí ámináminiki itataze.

21 * Ámina golivagi netá utó okago, Mosé nene áingoake, neza nenemú nelegesá legekago luvoluvu zekuve loko limó.

22 Lekeza agoka nenémínáló negopa, lekeza Zaion agokaú alévolé oko mi-noaká Ómasímini numuni apá Zelusale apakitana oko mina apá okulumakú netoka anitikave. Lá niake, ageló gatoko gato asú amoakalímini niató,

23 itó aí izegipala zuha gihila kugulizáini okulumakú gizo molamó keza kogoliza vizíki ali nupa iki minató vi anitikave. Lá niake, vegenala mukitoka lihimatemú gona mololetati ve Ómasi noító imi anitikave. Itó hehe liki minake hele vegená kigikagú lo vihelé minoakatoka kelémo mola vegenalitini kemetameni niatoka miní amikamóma neve.

24 * Itó lo múnahaeká gakó gosohá ale utó mololeta ve Izesutoka vi anitikave. Itó Epoloni golanímo nene uvolaho apele hili lihimamú apasative loko mikasiukati limó nenelokopa, Izesú ezáa golani hepa hepa imó nenémo aleko iteko netá gihilamú sele loaká noimó neneló vi anitikave.

25 Lekeza gakó lo lekemeaká noi ve Ómasímini gakola gili ahulikanazze, gizapa iki minalo. Gozapá Mosé nene mikasiuka minake gakó makó kagata aseva aleko lo kemekago, gakó hutuváave liki ahula vegenatoka netá golivagi utó o kimimóma neve. Lá okanazo, itína nene okulumakú minake ehe loko lo nolimi ve nene lemegasa amitunímó nene áminaló nogosani lememiko ha minatupe.

26 Gozapá Sinai agokaló gakó noligo mikasi mómomká imó. Lá imóza, gakoláa makó itína logómulaló lá oko lo mololimikave: Neza minoko mikasi nene goha alémo mómomká itomóza, lá noinake okulumaki nene alémo mómomká inogo uve loko limó.

27 Goha nene alémo mómomká inogo uve loko limó nenemú netá matá muki ale utó molamó nene ale mómomká okoko ale tolova itove loko geleake limóma neve. Lá itímó nene alévolé oko minoaká netá mómomká amiti netá nene utó okoko minoloko voko minative loko lá inogo ive.

28 Nenemú leza alévolé netá makó mómomká amitimó minoloko voko minoaká netá nene ale lá itunikumú Ómasi agepoka linake lehelele viziko gupá ze ameko eza gele lamaná iti netá aleko monola loko minature.

29 * Nene nanamú negopa. Ómasile eza lotunú gizo lúnoaká ve noinazo.

13

Oko moloko nouko Ómasímo áingo lamaná iti gakó

1 Monokú agunala uvolaho likigika eza amigo eza amigo iaká niamó nene lekejítoka lememino.

2 * Lugáate keza veno vegená kilími milanigi vegená kelémo nomulupe liki ageló nene kilími milinamóma nenazo, veno vegená numuteuka kelémo molatune likima goselekasesé amilo.

3 Likigive lakagave monokumule liki nagá numukú kilími milamolamú giliko lekezagi likilími milinamó giliko kilími vatí ilo. Lá niiki lezagí hamó lugupegi noune liki giliiki kilími golesa palasa ikitago nia vegenalite miluma giliaká nia netá nene lukumupiló itino.

4 Mokoló itó ve vená huki ezega emega iaká nia vegená keza Ómasímo lihima kiminogo inazo, vego venako minoaká sunimú gilikiko netá gihila loló ino, itó ve aleve suni ali gopa amilo.

5 * Likigikatini nene moni henokanoniló vamino. Nénisi nene ahulogetaminogo uve, itó viselegetaminogo uve loko Guivahanímo loniomó nenazo, netatini ali minakumú mukahá makahá amiki vitagá nouni netá ale utó oletanogo ive liki hulu ikigó minalo.

6 * Nenemú leza amuza alekinake monó gotolaú ve makolímo gizonoi gakó makó láa loko litunize:

Guivahani eza nelémo vatí oaká ve noinazo,

neza netá nemú manamú nelegesá legeminogo ive.

Vegenalite nana netá golesa alinitatakumú nehelele vizitive.

7 Monó gizapa velini Ómasímini gakó li likimiaká a vemú giliki minalo. Lá niki monolímini gapovaló nivake helemoláatiní kigizaka ánigi zagi miniki keitoka kémegetiki niviki gili alévolé iakinini ali minalo.

8 Izesu Kilstó eza goí oko minamó itó itítagi noimó áminámini okogó mino lúaló moloko minanogo ive.

9 Lá onoinazo, haitopaitó gosohá monó li nilikimikoma gelemilo. Ómasímini nasahilí neméno likigikatini ale alévolé olíkimikiko nene lamaná inogo ive. Netá noakalímini itó namoakalíminimú li hukina gakó nenémo ma lelémo vatí aminogo ive. Nene gakó ámegetiki vamó nenete gihila ma ali utó milinamamómá neve.

10 Izesú nohiligo ezáa agupe nene lelí guguni gizoaká netá loló okamó nenazo, Zuta vetini apazá seli numukú Ómasí gelekelé imiaká nia vegenalite likikámini nosánetá gihila natave loko gele kemenamive.

11 * Lekeza mota gilinave. Guguni giziaká vetini ve napa nenémo pulumaká izahé meme izahé apeleko gé loake, golani nene vegenalitini líhimáikumú guguni gizatove loko Ómasímini apazá zavusavegú aleko itekago gahaváa nene númaseloka aliki limiki ló gizi ahuliaká niave.

12 Itó Izesú eza ámina oko ezáa golanitunú vegená ligika ale guluvitoletatove loko Zelusale numuni númaseloka apilikago hilimó.

13 Nenemú leza ámina oko avotegini gakó gele alekuko Ómasímo lugutó vizitihe liki liaká nia vegená ahulokimikinake aitoka lemeko aí amupiló avoza hili netá ámina oko lumupiló itekiko gihitunize.

14 Lá noinake alévolé apá makó Zelusalegitana imaneloka lelitoka minamize, hanuva minoko utó itimoláa nenemú nene ligikámo ageva oaká noive loko nogilinake lá itunize.

15 Nenemú legepatunú lituni netalímo Izesuni agulizá ale oteko noiko Ómasí miní ameko agepoka loko minatunimó nenémo lelí guguni gizo ameaká netate loló okiko Izesuni amekuko, Ómasí alapizitive.

16 Ómasí eza nasahilíki netá itó netá lamaná izá moloko vegená kimituni netakumú gelekago guguni gizo ameaká netá gihiláa loló oaká noinazo, ámina netá alitune liki lakagata gili minalo.

17 Monokú kugulizaki velini nene lekemetameniló gizapa ilikitiki ali hehe liki miniaká nianazo, keí gakó gili aliiki keí kamatoka limiki minalo. Keza nene hozaninímini mogonamú alika gamenaló nene li utó milanigave.

* **13:5:** Gapo 31:6,8; Zos 1:5 * **13:6:** Age 118:6 * **13:11:** Liv 16:27

Lekeza hokolizá atímo miluma nigiliki ámina hoza alitamó nene lekelémo vatí iti netá lekelitoka utó amitimó nenazo, nenemú hozaváini kigika lamanatotí alitave liki gelekelé ikitiki némini manámini ikitalo.

¹⁸ Neza etó okogó oko moloko itove loko amuza moloaká noumó nenazo, nigikagú lihima netikumú vitagá oaká nouve. Lá noumómave loko nenikumú Ómasiloka liki minalo.

¹⁹ Guivahanímo není gapo hize lí noi netá ahulooko nelémo atiginá okiko lekelitoka litá oko vitove loko numuna loakatunú nilími vatí ilo loko gala vizeko lo nolukumuve.

Ómasi agepoka limó

²⁰ Hulu amelaho Ómasi eza Guivahanite Izesú ezáa golanitunú alévolé oko minoakalímini lo münaheaká gakó ale alévolé imómave loko sipsip izaló gizapa ve napa loló i ve hilikutí alémo atiginá o lemeka ve

²¹ Ómasi áisi netá lamaná haitopaitolímini lehizeleketoko lekelémo vávani okiko eza litítoka molatitoka gili alitave loko noluve. Lá niiko, ezáa gelekiko lamaná iti netá nene Izesu Kilistoni zámuzatunú likigikagú ale utó ino. Áí luhuva gegemá okiko agepoka loloko iteva iteva oko alévolé oko minino. Lamaná.

Vegená gekéini loketamó

²² Nigive nagavese, neza gakó hána gizo lekemenamumó nenazo, lakagata aleko luhusatini ale alévolé iti gakó imane lo lukumumó nene lakagata gili hee liki gili minalo.

²³ Itó lo likimitoze, gilio. Ligiveteho Timotini mota kalapusigutí gu-luhimikanazo, eza litá oko okikoma, alémoko vinake ángoleketativíe liki gilio.

²⁴ Monó gizapa velini itó Ómasímini vegená lugáa mukí nene gekéini noloke-tuze, li kimilo. Italia mikasiukatí likigivetike imaneló niamolate gekelini nililikitago lo nolukumuve.

²⁵ Ómasímini nasahilí nenémo lekelitoka minoloko voko minino. Lamaná.

Zemusini Luhuva

Zemusí geké loketake luhuva gizamó

¹ * Neza Zemusina Ómasímini gelekelé ve itó Guivahani Izesu Kilistoni gelekelé vémina nezáne luhuva imane nogizuve. Lekeza Isilae vegená mulusi 12-a hutilí i va vegenakutí Izesuni vegenala zuha lilí amoláá geké nololeketeve.

Gele alévolé oakakumú itó lugupe ale oteakakumú

²⁻³ Nigive nagavese, gopoguni nimililikitikoma nene, gimilikú milikiko lekeza Ómasímú alévolé iki gilinamómámini mogona lá oko utó itive liki giliiki gili golesa amiki lokogoliza viziki minalo. Lekeza monokú alévolé itave liki gopoguni mililikitata netá nenémo lekelémo vatí inogo ive.

⁴ Gopoguni nimililikitikoma nene, zou liki lipiziki minatamó nene, likigika lamanaki vihelé lo miniko minanigave.

⁵ Ómasímo nene vegená hize lé oketoko gínikaha amoko kemeaká noinazo, lekelikutí ve makolímo gele vevesoakala vitagá okokoma Ómasiloka lokiko aminogo ive.

⁶ Kagata losi gilita vegená nene hepé alike age nagamí valahuká zeaká noimó nenéminiki miniaká nianazo, Ómasiloka voká loko ámina netá alitohe alemitohe loko agata losi gelemoko gele hamó oko Ómasiloka litimó nene ámina netá alinogo ive.

⁷⁻⁸ Kagata losipasi giliaká nia vegenalite zová ziki mihina iaká nianazo, Guivahanilokatí netá ma aleminigave.

⁹ Gohogó vegená lekeza Ómasímo lekelémo vatí oaká noikumú nene lokogoliza viziki minalo.

¹⁰ * Itó henotiki vegená lekeza za guvava nenéminiki lutihimí zitamó nianazo, Ómasímo lekelí henonimú giligo lemeaká noikumú lokogoliza viziki minalo.

¹¹ Ho noiteko lokiko netá guvava makinogo ive. Lá ooko guvava legemó zekiko avogisa gopa inogo ive. Ámina iki henóiki vegenalita hozagazagú niviki tolova inigave.

Gopogunigi itó gimileguki moloakakumú

¹² Gimíkú milata netá asú okiko alévolé iki minata vegenalite nene, Ómasímo kigika aitoka miliki minata vegená kimitove loko lo moloketonito nene gosohá kemetameni nene golivagi akilikitaná alitamó nianazo, gopoguni nimililikitikoma alévolé itamoláá nene kogoliza viziki minanigave.

¹³ Ve makolímohe netá makolímohe netá golesamú Ómasi gimivagú molaminogo ive, itó netá golesa makokumú Ómasímo gimilegú molosá amimó nianazo, gimilikú nimilikoma Ómasímo gimilegú nomolave liki lamilo.

¹⁴ Lumu heleaká netalímo gimilegú molokago gelehusígú apeleká noune.

¹⁵ Lumu nenémo ezáa nalamula molokiko gele ahulamitunimó nene lihimá alinogo une. Ámina lihimate nene lulu vizeko napa napa okiko Ómasímo viselelimikiko tolova inogo une.

16 Nigika lukumu nigivénegita, gopa amilo. Gimilegú moloaká nene Ómasilokatí nomive.

17 Mukí netá lamaná vihelé lo minoaká netakó lamaná nene Ómasilokatí neve. Ómasí ameteho eza okulumató hanatoaká netá mukí kelémo utó imó neve. Ámina netá ali viligá aligá iaká niámóza, Ómasímo nenémini osá amive.

18 Leza Ómasímini vegenala zuha ganá apí oko loló itune loko Ómasímo geleko moloko noitó aí gakó gihila gele alévolé okuko gosohá lemetameni lemekave.

Ómasímini gakó gele aleakakumú

19-20 Nigika lukumu nigivénegita, lekeza imane gakó gililo. Lizapaló moloaká nenémo Ómasímini avogisaló hee loko oko moloko ituni netá ma ale utó amitimó nenazo, lekeza Ómasímini gakó litá iki nigiliki likizapaló molatikumú gakó makó litá iki lamilo.

21 Golotuva netá itó musi netá itó netá golesa aleaká mukí nene ahuliiki Ómasímini gakó likigikagú molamó nene ali gikitiki alilo, Ómasímini gakolímo lukugutó vizitimó nenazo.

22 Ómasímini gakó gili ahulata vegená nene gopa inigave. Nenemú gakola nene giliiki ámegetalo.

23 Ve makolite Ómasímini gakó giliki gili alemítamó nene gapokapokú kogoka kegepa ánigiaká niámó nenéminiki minanigave.

24 Kogoka kegepa ánigiaké viki litá oko kagatí moloaká noive.

25 Lá onoimóza, Ómasímo lo huka gakó lamaná nene gologí olimiaká gakkukú monolímini mogonamú vitágá oloko vinatek lagatí molamiko gele alekogó minatunímó nene, Ómasímo nónohá zelimikiko logoliza vizeko minanogo une.

26 Makó keza monó noguluhá vegená noune liki litamó nenete kegepa gizapa amitamó nene, monó lupe liki soza lotuváa linigave.

27 Megusa izegipa itó vená getó muhelé iki nikó kelémo vatí itunímó itó mikasiuka monó gelema vegenalitini mogona nenémo lelémo golesa okative loko gizapa oko minatunímó nenémo monó lituni netá loló oko Ómasímini avogisaló hee loko lamaná minanogo ive.

2

Vegená ánigoko gona moloaká

1 Nigive nagavesé, lekeza lapanalagi Guivahani Izesu Kilistokumú mota gili alévolé nianazo, vegená makokumú sigaga nilikitake vegená makokumú ánigi ahuliaká nia netá nene ahulalo.

2 Ve makolímo netá lamaná akolokoko agizató nene goli gehanitunú lili a lini akolokoko monó numutikú noitiko, itó ve makó gohogó ve nene ginegane litaha akolokoko ititimó nene,

3 lekeza netá lamaná akolonoiti vema ánigiiki sigaga limiiki holoma lamanató alími miliiki gohogó ve neneka, omaneló voko oteko minozo itó mikasiló ha minozo liki li amitamó nene,

4 lekeza vegená kugupe hetokagó ánigiaké gona miliki kilími haitopaitó iake, lakagata golesa giliiki vegená gizaká iaká niave.

5 Nigika lukumu nigivénegita, nenemú lo likimitoze, gililo. Gohogó ve niave liki liaká nia vegená makó nene Ómasímo kelémo etó okago,

Ómasimú gili alévolé nianazo, Ómasímini avogisaló nene henóiki vegená lili ikamó neve. Lá niago, Ómasímo kigika aitoka nimila vegená nene lo moloketonoimómáminoko aí gizapa olimiakálímini lapaná nene lehizeketanogo ive.

⁶ Lekelisi gohogó vegená ánigi ahuliaká niamóza, henóiki vegená nenete vasá zilikimiaké goní ilikimiaká niave.

⁷ Lekelisi Izesuni agulizakumú sigaga liaká niamóza, henóiki vegená nenete Izesuni agulizá alivi letivi iaká niave.

^{8*} Monó gotolaú Ómasímo lo hukoko li gakokutí gakó alévolela láá loko neve: Gezakamú geleaká noanimó nenéminoko gigivekaginimú geleko gigika kemezo loko limó neve. Lekeza ámina lo huka gakó gili alitamó nene netá gihila alitamóza,

⁹ gevená makokumú sigaga nilikitiki gevená makokumú ánigi goselé itamó nene lihima alitamó nenazo, Ómasímo lo huka gakó mota gili ahulikave loko linogo ive.

^{10-11*} Ómasímo haitó ve vená ipá i ezega emega amilo loko limó itó vegená kipili helemilo loko lo hukamó neve. Itó lekeza haitó ve vená ipá i ezega emega amiki vegená kipili hilitamó nene Ómasímo lo hukoko li gakó mota pelevesava zikamó nenazo, ve makolímo Ómasímo lo hukoko li gakó mukí nene gele alekoko hamokó gele ahulatimó nene, mukitoka mota avutá imó gilinogo ive.

¹² Ómasímo lo hukoko li gakó gologí olimiaká gakó gili alitamoláagi gili ahulatamoláagi alika lelémo nupa oko gona mololetanogo ive. Nenémú gakó niliki netá matá naliki nolu gakokumú gili minalo.

¹³ Ve makolímo agika hizekiko vegená makó kelémo vatí amitimó nene, Ómasímo ámina oko agika hizekiko alémo vatí amiko, ámina ve goní napa inogo ive. Itó kigika hizekiko kilími vatí ita vegená nene Ómasímo ámina oko agika hizekiko kelémo vatí inogo ive, itó goní okimiakaláa nene koma minanogo ive.

Geleakaláagó netá gihila nomive

¹⁴ Nigive nagavesé, ve makolímo neza Izesukumú gele alévolé okuve loko litímó nenémo monokú mogona lamaná makó ale utó amitimó nene, hutuva loló inogo ive. Nenémini okogó gele alévolé oloko vitunímó nene, Ómasímo lugutó vizeminogo ive.

¹⁵ Likigivetipo ve makó ahe vená makó ahe gineganemú ahe itó nosánetakumupe vitagá noikoma,

¹⁶ lekelitokatí makolímo aló vozo, mumusí oko nooko no gagatupa oko minozo loko lo amitimóza nasahilí otamitimó nene, hutuva inogo ive.

¹⁷ Vegená makolite monó gili alévolé iiki monokú mogona lamaná makó ali utó amitimó nene, Ómasimú gili alévolé itamola mota helekave.

¹⁸ Ve makolímo nolu gakokumú géneka litímó nene, láá loko lo amitimó neve: Geza monó gele alévolé okanimóza, neza nene monokú mogona lamaná ale utó oaká nouve. Monokú mogona lamaná nelepizemoko gele alévolé oaká animokó nelepizitanímó nene, neza monokú mogona lamaná ale utó oaká noumó nene gelepizekugo, Ómasimú gele alévolé noutímíni mogona hanuva gilinogo ane loko linogo uve.

19 Lekeza nene Ómasi hámakó noive liki liaká niamó nene gakó gihila nilamóza, holosi golesa nenete ámina iki giliake alika goni itakumú kehelele vizekago luvolovo ziaká niave.

20 Negi nagi vegenakumú litune. Vegená makó keza Ómasimú gili alévolé itamóza, monokú mogona lamaná makó ali utó amitamó nene, gele alévolé oakajni mota helekave loko litune.

21* Avoteho Avalahá nene gipala Isakani Ómasi guguni gizo aminogo noigo, Ómasimo geleake, novogisaló lihimavala asú omikago noive loko li gakó nene mota gilinave.

22 Nenemú eza gele alévolé omo novike monokú mogona lamaná ale utó oaká imó, itó monokú netá lamaná ale utó oloko vitímo gele alévolé i netá nene vihelé lo minamó neve.

23* Nenemú monó gotolaú nene Avalahá eza Ómasimú gele alévolé okago, nenemule loko Ómasimo gelekago lihimavala asú omikago minamó neve loko li gakó nene alévolé imó. Itó vegenalite Avalahakumú eza Ómasimini zogova lamaná noive liki liaká amó.

24 Lá oniomó nenazo, gele alévolé oakatemukó gelekoko Ómasimo eza novogisaló mota lihimatini asú olikimikago niave loko lamitimóza, gele alévolé onounike monokú mogona lamaná ale utó oakakumú gelekoko novogisaló lihimatini asú olikimikago niave loko linogo ive. Nene mota gilinave.

25* Ámináminoko Zosuá eza vegená guhu gapo viki asuguná iki vegená kemeni ánigatave loko kimiselekago, mokoló vená Lahapá noitoka ikago, áisi kelémo numukú moloake, gala vegenalite ánigiiki kipilikatave loko kimisele makó gapoloka molokago vamó. Ámina mogona gihila ale utó okago, Ómasimo aikumú novogisaló lihimala asú omikago noive loko limó.

26 Ve makolímimi agikagú ameni nomigo mota helekave loko litune. Ámina oko ve makolímo Ómasimú gele alévolé okoko monokú mogona lamaná ale utó amitimó nene gele alévolé oakala mota helekave loko litune.

3

Genezate

1 Nigive nagavesse, tisá mukí nene aleko iteko goní hoza napa ale liminogo inazo, lelekikutí ve mukilite monó tisá lili amino.

2 Leza mukító gopa oaká noune. Makó keza gakokú gopa amitamó nene, vihelé likigó minanigave. Kegepaló gizapa itamó nenete kugupeloka netá mukí hanuva gizapa lamaná itamó neve.

3 Aenitunú lili a netá nene hosi izatini kegepa holutó moloko nagá zeko nagató aleko gelelehá nouko, gapo vinogo nounitoka viaká niave.

4 Ámina oko sipi nene netá napa napa nemóza, itó hepé napa nenémo alémoko voaká noimóza, sipi ale ataloaká ve nenémo iha komaló ale molo molo nogiliko ámina sipi napa nene eza gilitoka vinogo ive.

5 Ámina oko genezate nene netá koma nemóza, netá koma-kama oko alesá amuve loko ale napa napa oaká noive. Ló luluhá koma nenémo guluma oake zazuha gihinahisi lo asú oaká noive.

6 Ámina oko genezate nene lokitana neve. Lugupémini netakutí nene mikasiuka netá golesa mukilitini nogosani neve. Genezatémo lugupe ligika

* **2:21:** Apí 22:1-14 * **2:23:** Apí 15:6; 2 Iki 20:7; Isa 41:8 * **2:25:** Zos 2:1-21

ale gopa o asú oaká noive. Ló luluhámo guluma oake zazuha gihinahisi lo asú oaká noimómáminoko ló apakutí Satani vegenala zuhate mikasiuka vegená mukitoka genezate ali viligá aligá ago gakó golesa lokuko áminalotí oko moloko nouni netá nene golesagó oloko novive.

⁷ Iza goula itó zauka gaha-nama, itó gosihá, itó nagamikú netá haitopaitolímíni mukí kilími kagata ligatamó neve, itó kilími kagata ligiaká niamóza,

⁸ genezate nene ve makolímo agata aleminogo ive. Genezate nene netá golesa noike hanuvagi minosá amive. Ale viligá aligá oko minoaká noive. Genezate nene zahámegeta golesa heleaká netá neve.

⁹* Helegaloka genezatetunú nene Guivahani ametehini agepoka loaká noune, itó helegaloka Ómasi ezáagitana kelémo utó i vegená nene genezatetunú usí vizekimiaká noune.

¹⁰ Ámina hamokó genezatetunú nene gakó lamaná lo kemeko kegepoka loaká noune, itó ale viligoko usí vizekimiaká noune. Nigivénérita, nene etami suni neve.

¹¹ Nagamí hinipiní hamokutí nene noaká nagamiki ekesá nagamiki lemeaká noive.

¹² Itó loisi nenémo anasi golatihe, itó gizasímo nene loisi golatihe, itó age nagamikutí noaká nagamí utó itihe. Lá aminogo ive.

Ómasilokatí gele vevesoakaláá

¹³ Lekelikutí ve makó nene netakumú gele vevesoaká ve itó gele hee loaká ve noitimó nenémo zou ve minoko hee loko oko moloko itimó nene, gele vevesoakalímíni mogona ale utó inogo ive.

¹⁴ Lá onoimóza, likigikagú gínikahagi gezaokaní gezaokaní liki kemekugú nikí minatamó nene, sozagi likataze, lukugupe aliki itiki leza gele hee lonoune liki lamilo.

¹⁵ Ámina netá alitamó nene, gele vevesonoune liki lina gakó nene hutuváa neve. Ómasímo ámina netá alilo loko losá amive. Satá nene ámina netá alilo loko gala vizeaká noigo, litaha lemetamenitunú aleaká noune.

¹⁶ Kigikagú kemekugú noaká netá itó gezaokaní gezaokaní loaká netá netitoka nene vegenalite gopa netá aliki netá golesa mukí lilí inigave.

¹⁷ Ómasímo gele vevesoaká netá lehizeliaká noimó nene, ligikagú gizopa lo minago hulu vegenakó minoko gínikaha amoko muheléini ánígokoko kelémo lamanatamaná okoko ligitagani oko genezate lositaki minoko soza losá amune.

¹⁸ Vegená nene hulu vegenakó miniiki netá mukí zou liki alitamó nene, hulu utó inogo ive.

4

Monóini nomi vegená ániyi lamaná iakakumú

¹ Lekeza nene lova leta lava leta iki lova hiziaká niamómámini mogonamú lo likimitoze, gililo. Lukugupémini lukumu heleaká netalímo likigikagú vo alekago lova utó oaká noive.

* ^{3:9:} Apí 1:26

² Lá iake, lukumu hili netá nene alitupe liki amuza milaha milaha alemake vegená visilikimiaká niave. Netá matá ánígi lamaná iki ali likigizakú inamake lova napa hiziaká niave. Netá matakumú Ómasiloka voká lamanazo, alísá amave.

³ Itó netá makokumú Ómasiloka voká likamóza, likigika hee loko minamitta lekeza lukugupémo amu heleaká noi netakumukó gopa Ómasiloka liaká nianazo, Ómasímo lekememinogo ive.

⁴ Gumesisiló vegenalita monó gelema vegenalite giliaká niamó nenémini iki laga likivisiti netakumukó gilitamó nene, Ómasímini gala veva lilí itave liki gelemahe. Monóini nomi vegená kumu heleaká noi netakumukó likivisitimó nene, Ómasímini vegenala minaminigave.

⁵ Ómasímo monó gotolaú nene není Sikalahú kigikagú moloketumó nene hanuvamú ahulotamuve, netá golesa alitahe loko gizapa itive loko ahulotonouve loko limó.

⁶ * Lá onoimóza, lumu heleaká netá golesa gili ahulatave loko nasahilí oletoko hize lé olimiaká noive. Nenemú monó gotolaú Ómasímo kugupe ali otiaká nia vegenalitini lukesa akeleaká noive, itó limiki mina vegenalitini lukesa hize lé okimiaká noive loko lonoimóma neve.

⁷ Lekeza Ómasiloka gímiziiki aí amakuka limiki minalo. Satani visilitatamó nene, golisi inogó ive.

⁸ Itó Ómasímini avogisaló vi alitatamó nene, eza ámina oko lokovogisaló omo alitanogo ive. Golesa netatini nene ahulalo. Vitupe atupe liki vénehekánehé nilamó nene ahuliiki likigika nagamí zilo.

⁹ Lekeza mogonatitoka giliiki miluma giliiki ive iki niviki likigika hizino. Giza iki lokogoliza vizeaká netatotí ive iki miluma giliaká netatini utó ino.

¹⁰ Guivahanímini avogisaló limiki minikikoma lekelémo otinogo ive.

Likigivetikini gakó golesa li kimiakakumú

¹¹ Nigivénegita, lekezatinimú alivi letivi iki gakó golesa lamilo. Makó eza agivelahinimú gakó golesa lomikiko lihima molotatimó nene Ómasímo lo huka gakokumú gakó golesa loko aleko letamó gilinogo ive. Geza nene Ómasímo lo huta gakó aleko letatanimó nene, gele alemoko aleko letoko gakó gihila nomive loko litanimóza,

¹² Ómasímo ezágó lo huka gakó ale utó oake gakó akó loko gona mololetanogo ive. Ezágó lugutó vizitimó neve, itó lelémo tolova itimó neve. Lá noiko nene vegenalitini mogonataganamú lotuva legeaká nene lekelí hoza nomive.

Iki miliki ita netakumú lukugupe ali otemilo

¹³ * Lekeza nene itínahe azohe apá makotoka vinake kilisimasí hamó minokinake, hoza alinake henoni ale utó itune liki liaká nia vegenalita nene gakó makó lo likimitoze.

¹⁴ Azo utó iti netá nene lekeza gilinake nilahe, olile. Lekelisi nene miniki aliki niamó nene ló lokilagítana neve. Ló lokila notike notike vegenalite gamena lagasó ánigikago líta oko asú oaká noive.

¹⁵ Nenemú Ómasímo giliiko lamaná noikoma nene, minoko aleko oko moloko itune liki lilo.

* **4:6:** Ano 3:34 * **4:13:** Ano 27:1

16 Itína nene, iki miliki ita netakumú lukugupe aliki itiaká niamó nenémo etamive.

17 Makó keza netá lamaná alitune liki gilinita netá lilí amitamó nene, lihima alinigave.

5

1 Lekeza henotiki vegenalita gakó makó lo likimitoze, gililo. Netá golivagi lekelitoka utó itimó nenaze, nenemú miluma giliki ive nama ilo.

2 * Henotini mota hulupa lokago, gineganetini lamaná nene gúnakonite mota hukatató niave.

3 Lekelí monitini gaupá gimó nenémo moni aliki etoha iki ali minamómámini mogona alika utó okoko, lokitana oko lekezagi henotinigi lanogo ive. Henoni ali nupa iki milinamóza, mukí mikasiuka netá asú iti gamena mota alitokanazo, ámina gamenaló henotinímíni lihima golesa alinigave.

4 * Gilinahe. Lekelí mikú hozaló vete govisi hoza aliki gihisi hukikago, lekeza etami suni aliki meinava kememago, hoza ale vete ive nama amó nenémo Ómasímíni agataló holokago lihimatinimú geleake láa loko nolive:

5 Lekeza mikasiuka imane iki miliki ake niki lagaváa giliaká niake, giliki gehatiaká niamóza, Ómasímo lekehelú iti gamena mota alitokave.

6 Lekeza vevesiki nia vegená nene goní ikimiakte nukepelego keza lihima lova iki likipilisá amave.

Goselekaselé amoakakumú itó Ómasiloka loakakumú

7 Nigivénérita, Guivahani atiginá oko ati gamenamú goselekaselé amiki aí ageva iki minalo. Gilinahe. Zuhaina vete mini zuhá iake gói o golinigi itó alika golinigi zekiko minumuni omolokiko gihila lamaná aleko natune liki goselekaselé amake gizapa iki miniaká niave.

8 Guivahanite atiginá oko ati gamena alitokaze, nenemú lekezagi ámina iki goselekaselé amiki likigika Ómasiloka mili alévolé iki minalo.

9 Nigivénérita, goní oletati ve Ómasí nene alító noive. Goní ikataze, lekeza mukahá makahá amilo.

10 Ómasímíni agepagutí gakó liaká a ve gopoguni nimilikitago goselekaselé amake Guivahanímíni agulizá iki miniaka a vetini kigizakaú lisiki hulu iki minalo.

11 * Gilinahe. Keza alévolé iki mina vegenakumú nene Ómasímo nónohá zeketa vegenale loko loaká noune. Zopú eza miluma maluma geleko goselé amike minamoláama mota gilinave. Miluma gili gamenava asú omikago Guivahanímó netá matá lamaná alika lehizetamó nene mota gilinave. Nenemú Guivahanímó muhelete ánigokoko agika hize lemeko hize lé oletatimóma neve loko gilitune.

12 * Nigivénérita, alévolé gakó makó litoze, gililo. Okulumakú liví ziki likigizani itiki li hukamilo. Itó mikasiuka netá makokú liví ziki li hukamilo. Ómasiló goní ikatanazo, lekeza nene oo alitune itó óe alemitune linigima nene gakó lamanakutí lilo.

13 Lekelikutí makolímo eza miluma maluma geleko nominokoma Ómasiloka lino. Itó lekelikutí makolímo agoliza vizeko nominokoma Ómasi agepoka lokoko nama lino.

14 * Lekelikutí ve makó avisekikoma monó gizapa ve sele lo kemekiko, anitiki Ómasiloka liki Guivahanímimi agulizá ali otiki netupagitana nagamí hilitatave.

15 Lá niiki Ómasimú gili alévolé iminiki litamó nene, Guivahanímo alémo guni okiko avisi vema nene zokanogo ive. Itó lihimavatini minatimó nene, Ómasímo ahuloketanogo ive.

16 Nenemú Ómasímo lekelémo zokative liki eza hize lé omikiko eza hize lé omikiko iki lihimatini lí utó utó miliki Ómasiloka lilo.

17* Vevesiki minata vegenalite numuna litamó nene, netá gihila mukí alinigave. Ilaizá nene lezagıtana vemámo golini zemitive loko amuza moloko Ómasiloka lokago, kilisimasí losive makole asú oake nekisa ikani 6 oko novigo mikasiló golini zemigo,

18 * alika nene goha golini zitive loko Ómasiloka lokago, golini zekago, mikasigú netá matá goha goloko itimó.

19 Nigivénérita, lekelitokatí makolímo monokú gapo zová zavá zekiko, agivelaho makolímo alémo atiginá okikoma,

20 * gakó láá liki gilitaze: Makolímo lihimavagi ve gapo golesagutí alémo atiginá itimó nene, ámina lihimavagi vémini amenía monéna tolova inogo ikutí agutó vizeko lihimala mukí ale ahulomikave liki gilitaze.

Pitani Luhuva Nampa 1

Nónohá kimike lo kimi gakó

¹ Neza Pitana Izesu Kilistoni aposolo noutímina, Ómasímo kelémo etó i vegená lekeza Zelusalegatí hutilí iake Potu itó Galesia itó Kapatosia itó Asia itó Pitinia mikasiuka viki gá nia vegená luhuva imane gizo nolukumuve.

² Lekeza nene Sikalahulímo lekelémo apazá zekiko Izesu Kilistoni gakó gili alitave loko itó aí golani hololeketamó nenémo likigika nagamí zekiko minatave loko Ómasi ametipo lo molonoító minakutí lekelémo etó imóma neye.

Ómasilokatí nasahilí itó hulu lekelitoka minoloko iteko minino.

Okulumakú alévolé henonimú lagata losi gelemoko ageva oaká noune

³ Leza Guivahanite Izesu Kilistoni amelaho Ómasi agepoka litunize. Áisi nene Izesu Kilistoni nene heleneikutí alémo otekamole loko agika napa oko hizelimikago gosohá lemetameni limigo Ómasilokatí utó okunike netá lamaná alitune loko lagata losi gelemoko ageva oaká minokoko voko mi-noakalímini gihiláa geleko minoaká noune.

⁴ Itó heleneikutí alémo otekamole loko okulumakú helisa henonite hulupa legeko lá amoakalímini itó anuva oko gelesamoakalímini itó helemoakalímini ageva nounimó nene miniki okulumakú alitave loko ale vavá oletamó.

⁵ Lá oake, Ómasímo aí zámuza latunú gizapa noleketiko aikumú gili alévolé iki nikó minoko gamena asú noiko lukugutó vizeaká netá lehizeleketanogo noimó nene utó oko lamaná inogo ive.

⁶ Lá itikumú lokogoliza viziki niminamóza, Ómasímo gilikó etokikoma, gamena alínipáisí gopogunímini amupiló itiki miluma gilikí miniki gopa lokogoliza viziikki minatave loko noluve.

⁷ Gilinahe. Goli gehani minoko lapuluva oaká netalímini pipizá netá gopa netimoláa nene lolímo lo asú okiko goli gehanigó etó oko minanogo ive. Ámináminoko gele alévolé oaká netatinímini meinava goli avilegeko iteko minamóza, gopoguni mililikitata netalímo alémo mómomá noikoma, gele alévolé oakatini kii loko noiko, Izesu Kilistó anititi gamenaló nene lukugulizá ali otiki lekegepoka niliko gonanaliváa lekelitoka utó inogo ive.

⁸ Lekeza Izesuni ametamenía ánígamatita gopa likigikatini amiaká niave. Lá niake itína gamena nene lokogómulatunú aí ánígamake aikumú gopa nene gili alévolé iaká niave. Lá niake lokogoliza viziki lagaváa haitolimini vegetalita legepatunú lo utó moloko lamoakalímini nene giliaká niave.

⁹ Ómasímú gele alévolé oakatinímini gihiláa nene likigikatini lukugutó vizeaká netá nene omo lokovogisaloka okaze, nenemú lokogoliza nivizeve.

¹⁰ Ámina lugutó vizeaká netá nene Ómasímini agepagutí gakó liaká a ve keza nana okoko utó itímó neve liki gozapá vitagá iki nenémini mogonamú agizaka hiziki minamó neve. Lá iake lekelitoka Ómasímini nasahilí utó itive liki alikamú gakó li miliaké minamó.

¹¹ Kilistó eza miluma gelekoko alika lapanalagi gonanalisi alitikumú Kilistoni Sikalahulámo gakó nene kigikagú molokago keza gamena nanahé

zupa itó nana gamenaló Kilistotoka utó o amitive liake nenémini mogonamú vitagá iki minamó.

12 Keza hoza alemó nene kezáikumule loko nomive. Ómasímo lekelitoka utó itive loko lo utó oko lo kimimóma neve. Itó alika nenémini gihila utó okago Ómasímini Sikalahú amiselekago, eza okulumakutí lemeake zámuza lehizekimikago Izesuni gakó lamaná li hutilí a vete li lekemego gilinamóma neve. Ámina gakó nekisáa nene ageló keza gele guni itupe liki gili miniaká niave.

Etó oko minoko aleko ituni gakó

13 Nenémú lekeza likigika lakagatatinímini nagá zi gikitiki niminiki gizapa etoha iki Izesu Kilistó goha utó oko nasahilí oleketatikumú lakagata losi gelemiki ageva iki minalo.

14 Lekeza gozapá numuká vegéná minake gatizá minago lukugupémo amu heleaká netá aliki minamó. Itínasa nene ámina netató iki miliki amiki Ómasí gili amilo.

15 Sele lo likimi ve Ómasi eza apazá keké vizeko noitíminiki iki miliki niiki apazá keké vizikigó minalo.

16 * Nenémú Ómasímo li gakó makó nene monó gotolaú láa liki luhuva gizinamóma neve:

Neza apazá keké vizeko nounazo, lekeza ámina iki apazá keké viziki minalo.

17 Lekeza ametehove liki limiaké Ómasiloka liaká niave. Eza voko aleko oko aleko itigopa, minoko aleko oko moloko ituni avotigila oko hee loko gona mololetanogo ive. Nenémú lekeza mikasiuka gá ve minata gamenaló nene lekehelele víziko minalo.

18 Lekeza láa liki gili minalo: Lekeza avotike netá gihila nomi gapoló nivago netá hutuváamo goli silivá nenéminímo meinavatini hizeko gologí oleketonamímóma neve.

19 Lekeza Kilistoni golani meinava iteko minamó nenetunú meina hizeko gologí oleketonoimómáma neve. Eza guguni gizoaká sipsip iza agupe gololó imó itó avasavagi vové avé loko minamó nenéminoko minamómáma neve.

20 Itó gozapá mikasi ale utó ami gamenaló nene Ómasímo hoza gakó lomikago utó i ve nenémo alikama gamena asú inoga noigo lekelikumule loko utó imómáma neve.

21 Lá oake, Ómasiloka lekelémo apizekago lekeza heleneikutí alémo oteake gonanalivagi lapaná ale luhota vemú gili alévolé iake gele alévolé oakatini itó lakagata losi gelemiki ageva iakatini nene Ómasilokagó neve.

22 Lekeza gakó gihila gili aliáká niago, lekelí likigikatini mokoná lamómave loko likigivetikini nene soza netá alikitamiki lamanakutí likigika kimiaká niave. Nenemule liki likigika lamanakutí eza amiko eza amiko iki múnahiki minalo.

23 Lekeza gosohá utó amó nene avotike hiliaká amómámini zuhaváa negopa, alévolé ve Ómasilokatí utó amómáma neve. Alévolé lemetameni ale utó oko alévolé oko minoaká gakokutí Ómasímini gakokutí utó amómáma neve.

24 * Nenémini gakó makó nene monó gotolaú láa loko nemómáma neve:
Vegená mukító nene gihisi nenéminiki niave.

Itó ánigi laga hiliaká netáini nenémo netá guvava lamaná nenéminoko neve.

* **1:16:** Liv 11:44-45, 19:2 * **1:24:** Isa 40:6-8

Gihisi nene gulu gulu vizeaká noive.

Itó guvaváa nenémo lutehemó zeaká noimóza,
 25 Guivahanímini gakó nene alévolé oko mino lúaló moloko minoakalímini
 neve.
 Ámina gakó lamaná li likimikago gilinamóma neve.

2

Guivahanímo alévolé oko minoaká gehani noigo ai apazá vegena noune

1 Lekeza hokolizá soza netá itó genezatini losi minoaká itó kemekugú noaká itó aleko letoaká nene ahuli asú ilo.

2 Ahuli asú iiki izegipa namuni keza aminikumú kiviseaká noimó nenéminiki likigikatinímini aminí lamanakumú likivisino. Ámina aminí lamaná niliki viki monokú napa iiki gehatiki minataze.

3 * Guivahanímini nasahililamú makó lagaváa gilinita vegenalita némini itaze.

4 Lekeza Guivahani minoloko voko minoaká gehanigitana noi ve vegenalite ánigi ahulamóza Ómasímo giligo meinaváa iteko mina ve alémo etó i veloka viki gímizilo.

5 Lá niiki sikalahutinigi gehani lilí i asú iiki miní amiki miniliki itiki Ómasímini Sikalahulímini monó numuni lilí ilo. Lá iiki nene apazá guguni gizi amiaká vegena niiki Ómasiloka liakatunú guguni gizi amikiko Izesu Kilstotoka vokiko, gelekoko gele laga itize.

6 * Izesukumú monó gotolaú gakó láa loko nemóma neve:
 Neza alévolé gehani makó meinava iteko minamó nene alémo etó okuke Zaion agokaloka geha lapusa nohizuve.

Aikumú gili alévolé itamó nenete viki netá alemamómave liki mulúikú ma mesaha aminogo ive.

7 * Lekeza aikumú gili alévolé iaká nia vegena toka nene eza netá meinava iteko minoaká noive. Itó gili alévolé ama vegena kumú nene monokú láa loko lonoimóma neve:

Numuni giaká ve keza gehani makó ánigi goselé iake ali ahulamó nenémo geha lapusa loló oake noive.

8 * Itó aikumú monokú luhuva makó láa liki gizinamóma neve:

Ámina gehani amupilotí lotohá kipilinogo ive.

Itó ámina gehanilotí kepele molanogo ive.

Loko limó nene monó ahulakumú lotohá kipilitive loko lonoitó viki nenémini iaká niave.

9 * Lá onoimóza, lekeza nene lekelémo etó onoi vegena itó agulizaki ve napatémini guguni gizi amiaká nia vegena itó Ómasímini apazá keké viziki nia vegena la lili' ake aí zuha lili' iki niave. Lekeza límugusigutí lekelémo otopá zeake lapanalámini silikakénaló lekelémo mola vémini gakó li hutilí ikiko hutilí itive loko sele lo likimímoma neve.

10 * Lekeza gozapá nene ha netá minamóza itína nene Ómasímini vegena zuha lili' iki niave. Gozapá nene gopa minamóza itína nene agika hize likimitímini agikagú niave.

* 2:3: Age 34:8 * 2:6: Isa 28:16 * 2:7: Age 118:22 * 2:8: Isa 8:14-15 * 2:9: Gá 19:5-6; Isa 43:20-21; Tae 2:14; Isa 9:2 * 2:10: Hos 2:23

Ómasímini gelekelé vegená minatune

11 Nigive nagavese, neza gala vizeko lakagata aleko lo likimitoze, gililo. Lekeza mikasiuka gá niámó itó hanuva veno vegená niatita lukugupémini laga aviseaká noi netalímo likigika loya ale ameaká netá nene mosilo.

12 Lá iki monó gelema vegenalitini holúikú etó iki minalo. Lá iki niiko, ámina vegenalite mogonataganatini ánigiki giliiki golesa netá aliaká nia vegená niave liaká nia gakó nene ahuliiki iki miliki ita mogonatini lamaná ánigiki Ómasímo gakó hoza aleketati gamenaló nene Ómasí agepoka liki minataze.

13 Vegenalita gizapa ve haitopaitolímini kilími milamó nene lekeza Guivanimule liki gelekelé ikitalo. Gamanitini agulizaki ve napámini gakola

14 itó kiapege kéisi li huka gakó gili alilo. Ómasímo golesa netá aliaká nia vegená nene nogosani kimitave loko itó gakóini giliiki netá lamaná aliki miniaká nia vegená kegepoka litave loko gamanite kelémo etó onoimóma neve.

15 Lekeza lá iki lamaná iki miliki itamó nenémo vegená negía keza lekelikumú negi gakó liaká niámó nene kegepaló gahumá ikitatave loko Ómasímo loleketonoimóma neve.

16 Lekeza mukí netalímini nagakutí mota gologí olimikamóma neve liki lamaná iki miniki aliki ilo. Itó lá iki minatamó nenémo golesa netalímini gahumaláa loló amino. Lekeza alévolé iki miniki Ómasímini gelekelé izegipa lílí iki minalo.

17 Lekeza mukí vegená kilími guni ilo. Itó likigive monokú niámoláa likigika kimilo. Ómasímú lekehelele viziko minalo. Gamanitini agulizaki ve napáa nene alími napa ilo.

Kilstó miluma giliike ale goí moleta tamó

18 Gelekelé izegipa lekeza gizapa velinitini kamatoka limiki miniki nasahilí ikitiki gakóini gili alilo. Itó huluváá itó kigika lamanaki mina vegenakumukó negopa, ve lolaváá itó gínikaha ve kezagi nenémini ikitalo.

19 Keza galana nomító hanuvamú miluma hoza alilikitikoma lekeza Ómasímú giliiki gínikaha amiki lamaná iki niko, Ómasímo lekelikumú giliiki lamaná itize.

20 Itó lekeza lihima netá naliko nilikipilikoma, gínikaha amiki niko, ve makolímo geké leleketa ihe. Lá aminogo ive. Nenemú lamaná iki miniko likipiliki miluma netá alilikimikoma legesó iki minalo. Lá itamó nene Ómasímo giliiko lamaná inogo ive.

21 Lekeza nenémini itave loko sele lo likimimóma neve. Kilistó eza ámina oko lekelikumule loko miluma giliike ale goí oko gapo veleketamóma nenzao, lekeza agizaka hiziki vilo.

22 * Áisi nene lihima makó ale utó molamimóma neve. Itó agepagutí soza makó lamimóma neve.

23 * Alivi galativi nitago eza alevo galatovo oko loketamimóma neve. Itó miluma nogiliike gamuni oketamike mogonataganamú ale hee loko lo hukoaká ve Ómasíloka leheta oko minamóma neve.

24 * Lelí lihimá aí amupiló itekago, agohí geake, zohota zaló hilimó nene netá golesa aleakakumú hele vegenakitana iki mómomá iki otemitave loko,

* **2:22:** Isa 53:9 * **2:23:** Isa 53:7 * **2:24:** Isa 53:5

ító hee loko minoakakumú miniki aliki itave loko lá imóma neve. Itó aí agómuni nenémo likigikámini agómuni gimóma neve.

²⁵* Lekeza sipsip iza nenéminiki hela hiziki mihina amóma nemóza, itína nene likigikámini gizapa ve nenémo lekelémo atiginá okago aitoka anitikave.

3

Ve alevetini gakó

¹* Vená lekeza ámina iki vatinitini kagahisiuka limiki minalo. Itó vatini lugáa nene monokumú gelemake miniaká nitamó nene monokú vi hilatave liki gakó nene li kememiki hanuva likigika lamanaki minikiko

² vatini nene lekeli iki miliki miniki aliki iaká netá nene gizopa lo miniko ániigliki kigika ali viligiki minataze.

³* Lekeza lukugupémini gonanaliváa nene nagatumó iki zopovatini ali lamaná iki gonanalisi itakumú itó likigisa likigizatoka gonanalisi iki meinava iteko mina netá milatakumú itó ginegane luhuvagi luhatakumú gilikiko ha netá loló ino.

⁴ Lá noiko geha itó hulu iki minata metalímo likigikagú vaí o lamaná oko gikí okiko gonanalisitini nene alévolé oko minoakalímini itó litaha lamoakalímini Ómasímo gelekiko iteko minati netá likigikagú minative.

⁵ Monónigi vená gozapá miniliki amó keza kigikámini gonanalisi netá nenémináa aliki miniki amó. Lá ake Ómasiloka leheta iki váinitini kagahisiuka limiki miniaká amóma neve.

⁶* Salá eza ámináminoko vana Avalahani gakola nene gele aleake aikumú guivahaníneve loko lomiaká imó. Itó lekeza netá lamaná lilí iki netá nemú manamú lekelegesá legemiko minatamó nene Salani izegipala zuha niave loko loleketanogo une.

⁷* Itó ve lekeza ámina iki venatinigi hamolíminiki alévolé lekemetameni ali lá inamóma nenazo, Ómasiloka numuna liki akiki otikitini nenémo voko lí amitive liki venatinigi apiziki miniki zámuzáini lemeko nenaze liki gili miniki venatini nene netá matá nene likigika lamanakutikó li kimiki minalo.

Oko moloko itunitímo vo guni noiko milumámini amupiló itituni gakó

⁸ Lá niiko lo asú oko lo likimotoze. Lekeza mukitoka likigikatini mili hamokó iki geha ziki miniki likigika eza amiko eza amiko iki likigivetikini milumáini gilikí lukugupelini aliki limiki minalo.

⁹ Netá golesa nalilikitíkoma, lekeza ali viligiki netá golesa alikitamilo. Alivi letivi nilikitíkoma lekeza ali viligiki aliki letamiki nónohá zikitalo. Lekeza nónohá zelekétatove loko Ómasímo sele lo lekemeneimóma nenazo, lekeza ámina iki lusa gakó nene li kimilo.

¹⁰⁻¹²* Nenemú monó gotolaú gakó makó láa loko neve:
Guivahaní eza hee hee líki miniaká nia vegenatokágó agovisa kemeko aitoka liaká niakumú agata moloko gámémé noimóza,
golesa netá aliajá nia vegená nene Guivahanímo ánigamó ánigo goselé oaká noinazo,
makó keza alévolé oko minoakakumú lagaváa kivisekiko logoliza vizeko mi-noko aleko itune liükima genezáiniló gizapa iiki gakó golesa lamitaze.

* **2:25:** Isa 53:6 * **3:1:** Epe 5:22; Kolo 3:18 * **3:3:** 1 Tim 2:9 * **3:6:** Apí 18:12 * **3:7:** Epe 5:25; Kolo 3:19 * **3:10-12:** Age 34:12-16

Itó kegepatunú soza gakó makó lamitaze.
 Itó golesa netá kemegesa amiiki netá lamanakó alitaze.
 Hulugú miniki nenémini hozaváa aliki amuza miliki alitaze.

Gopoguni mililitatamómámini amupiló itituni gakó

¹³ Lekeza netá lamanakumú viki gímiiki niko hí vémo netá golesa loló oleketetative.

¹⁴*^{*} Itó lekeza iki miliki itatímo vo guni noiko miluma netalímini amupiló ititamó nene, Ómasímo nenemú gelekiko lokogoliza viziti netá loló inogo ive. Itó lova ali likimiki lekelegesá ligiti gakó nilikoma, likigisa likigizakutí luvolovo zemino. Itó mulutini itemino.

¹⁵ Likigikatini ali guluvitiki ali guni ikiko Kilistó eza Guivahanitini loló o likimino. Lá okiko netá matakumú likigikatunú lakagata losi gelemiki ageva iaká niakumú loká nilikitikoma, vávani oko ámina mogona lo utó moloko lo kimitune liki ali vatí iki minalo.

¹⁶ Lá niiki gakó nene legesó iki keikumú giliko lemémiko likigikagú gakó nomiko lamaná iki lilo. Lá niko lekelikumú alivi letivi niko, Kilistogegi apiziki lamaná iki iki miliki itamó nenémo ve nenémináa keza soza sazánímímini mogonáini utó okiko kovoza napa hilitaze.

¹⁷ Ómasímo likipilikí nagá likimitakumú gelekiko lamaná okiko, netá lamaná lili niko lili ilikitatamó nenémo itekave lokomú noluve. Itó lekeza lihimá alikiko lili ilikitatamó nenémo lemekave.

¹⁸ Kilistó eza ámina oko hee lo mina ve miluma gilike vegéná golesa lelikumule loko hilímó. Eza lihimate asú itive loko lelikumú gamena hámakó helekago mota asú okave. Nene Ómasíloka lelémo molanogo loló imó nene agupegí minoakeve loko apilikago hilímó. Itó Sikalahulagi minoakeve loko góha móromáoko otimó.

¹⁹ Oteko minake nene hiliki vamoláa keza sikalahulitini nene nagá geisagú niatoka leme ko monó lo kimimó.

²⁰* Keza gozapá Noá eza sipi napa loló oko noigo Ómasímo agikagú hulu ominatímove loko kigika ali viligatahe loko kegeva oko minoloko noitigo gakoláa gili ahuli ahuli imi itemó. Lá niago, ve vená 8-así nene ámina sipigú itikago, nagamilímo kelémo veletó okago hanuva mínamó.

²¹ Nenémini helegáa nene monó nagamí holoakalímo lekelémo lamaná oaká noive. Monó nagamilímo lugupémíni golotuváa nene nagamí zesá amive. Monó nagamí nohulunike Ómasí eza ligikate nagamí zelimikiko eza gele lamaná itító minoko aleko itune loko voká loaká noune. Monó nagamí nohuluko Izusu Kilistoni heleneikutí alémo otekamole loko lugutó vizeaká noive.

²² Itó ezáa okulumakú iteko Ómasímini agizani zamagaloka iteake mitó noigo ageló mukí itó vegéná iti minamoláa zámuzagi niamoláa keza aí agahaisiuka limíki niave.

4

Ómasímini agepagú gakotó gele aleko minatue

¹ Kilistó agupe miluma gelekamole liki lekeza ámina iki lili ilitatave liki zámuzaga aliki amuza milalo. Lá niiki makolímohe makolímohe monokumule

* **3:14:** Mat 5:10 * **3:14:** Isa 8:12-13 * **3:20:** Apí 6:1-7:24

loko agupe miluma geleká noitítimo golesa netá alitikumú goha mumuzó amitive loko gele minatize.

² Itó lukugupémo minoko aleko iti gohalaló lukugupémo amu heleaká noi netá alemiki Ómasímo gilitó molató nene gili aliki minalo.

³ Amunaloka hetoka vegená keza lagaváa giliake netá matá lá iki aliki minamó neve: Mokoló netá itó golotuva netá nenémini hozaváa lilí iki minake, piá nagamí niki sipaki niake, iza goulá nosá negi nagamiki vauva aliki niki lekemeni ziki eza avilígigo eza avilígigo iki, soza ómai netá gupá zi amiki minamó. Ámina netá nene lekezagí goselé lekepelemigo iliki viki niago gamena hána hána vimó neve. Nenemú goha miní amiki lá amilo.

⁴ Itó itína nene hetoka vegenalite golesa netalímini agikagú minake nosánetá niki meleketakeni iki kogoliza viziki niago lekeza kezagí apiziki minake ámina netá lilí amago, keza giliake, ininá niake lekelí nene alivi letivi iaká niave.

⁵ Lá ikamóza, hele vegená itó logómulagi vegená lelí mogonataganamú goní oletatove loko ale vatí oletonoi ve Ómasiloka gakó hoza sipisi alinogo une.

⁶ Nenemú helemoláa keza Izesuni gakó lamaná lo utó oko lo kimimó nene hele vegenalitini gapoló nivake kugupetunú lihima alikago Ómasímo keí mogonataganamú goní oketamóza, helegaloka Ómasímini gapoló viki alévolé oko minoakakú miniki aliki itave loko ámina gakó lamaná lo kimimóma neve.

Ómasímini nasahilí legesó oko ale mininake gona molatune

⁷ Netá matá mukí asú iti gamena mota alitokave. Nenemú lekeza likigika lukugupe gizapa iki gili koló iki Ómasiloka numuna loakakumú vávani iki minalo.

⁸* Lá niiki ligika kemeaká nenémo lihima mukí eza ahulotiko eza ahulotiko oaká noimó nenazo, netá mukí kivilegeko mina netá nene likigika eza amiko eza amiko iakakumú amuza milalo.

⁹ Lekeza goselé lekepelemiko veno vegená nene eza nasahilí otiko eza nasahilí otiko kilími numutiuka miliki kilími lamaná ilo.

¹⁰ Lekeza Ómasímini monolímini zámusa haitopaitolímini lehizeleketató nene hoza aliki lekeza mukitoka vo alitive liki Ómasímini nasahilí nene legesó iki alí miniki gona moloaká vegená minalo.

¹¹ Itó monó gakó li utó itamó nenete Ómasímini gakola lamaná li utó iki li kimitaze. Itó vegená nasahilí ikitatamó nenete Ómasímo zámusa kemekiko netunú nasahilí ikitataze. Lekeza némini manámini niiki Ómasímini agulizá vitive liki lá ilo. Izesu Kilistoni zámuzatunú aí luhuva utó itize, nenemú gonanalivagi lapaná itó gizapa olimiaká zámusa aitoka minatímo minoloko voko mino lúaló moloko minatize. Lamaná.

Kilistoni vegenala minunikumule liki gopoguni mililitanigave

¹² Nigika lukumu vegenáise, lekelitoka gimilíkú moloaká netá agepagi netá utó noimó nene lekeza netá gosohá utó o lemekave liki hukili amilo.

¹³ Kilistó miluma gilímó nenémini agikagú miniki mulutikú agila guluma iko minalo. Lá iki miniki aí gonanalivagi lapanala utó o lekemekiko ámina oko mulutikú agila guluma noiko lokogoliza viziki minalo.

* **4:8:** Ano 10:12

14 Lekeza Kilistoni agulizá ali minakumule liki aliki letiki mumusopa nizilikitikoma, gilikiko nene lapanalímini amelaho Ómasímini Sikalahú nene lekelitoka lemeko minatímini mogona lá oko utó okave liki gili minataze.

15 Lekelitokati ve makolímohe makolímohe goní omikiko nagá numukú miluma gilitimó nene apele heleakakumupe itó guminamupe itó hokolizakumupe itó geligeli oakakumupe itó laskoli minoakakumupe loló amino.

16 Itó helegaloka makó eza Kilistoni vegenala minakumule liki nagá amikikoma nene, nenemú gelekiko avoza helemiko Kilistoni agulizalaa nene ale minoko Ómasí geké lo amitize.

17 Gilinahe. Ómasí eza vegenalitini mogonataganamú gona moloketati gamena mota alitokave. Itó vegenala zuha lelitoka ámina hoza apí oko alinogo ive. Nenemú lelitoka ganatilisi napa okoko alitimó nenazo, aleloko voko Ómasímini gakó lamaná gili ahuliaká nia vegenatoka voko nolutegeko nene, nanámini oketative.

18 Nenemú monó gotolaú gakó makó láa loko neve:
Ve lamaná keza lihimáinimú goní ita gamenaló silipa oko kugutó viziko minatamó nenazo,
nenemú monó gili ahuliaká itó golesa netá aliaká nia vegená keza nana itamó neve.

19 Itó nenemú Ómasímo gilikó lamaná onoi miluma malumámini amupiló itita vegenalite kelémo utó oaká ve Ómasí eza lokago alévolé oaká vémini agizakú nene kigikáini miliiki lamaná iki iki miliki minataze.

5

Ómasímini sipsip izá mulusi gizapa oketatune

1 Lekelitoka monó olotiva ve niamó nene ámina oko monó olotiva ve noucímina gakó lo lekemekugo, gilitaze. Neza Kilstó miluma maluma gilimó nene nogómulatunú lamaná ángutímima noluve. Itó minoko gonanalivagi lapaná utó oloko voko utó noiko nene, izá moloko alito ve neza lakagata aleko gakó imane lo nolukumuze, gililo.

2* Ómasímini sipsip izá mulusi lekeza gizapa ikitatave loko loleketonoimó nene alévolekutikopa, mulutikú lamaná ominiko gizapa lamaná ikitalo. Lá niiki moni henokanoni aleakakumú gilikí negopa, ámina hozamú mulutikú ahuu ahuu lokiko iki miliki itaze.

3 Lá niiki ve napáini lilí iki lá amilo. Sipsip izatini ali goí ikitiki monokú nene likigizaka hiziki vitave liki kilími zou liki kilími viro.

4 Itó minoko gizapa ve napa nenémo aniteko gonanalivagi akilí alévolé oko minoakalímini hitolikimikiko, hitiki minataze.

5* Gosohá ve lekeza ámina iki olopa vetini kagahisiuka limiki minatave loko lo nolukumuve. Lá niiki lekeza mukitoka lukugupe aliki limiki minata netalímo hoza aleaká gineganetini loló okiko ali akaliki eza gelekelé otiko eza gelekelé otiko iki minalo. Nenemú monó gotolaú gakó makó láa loko neve: Ómasí eza kugupenini aliki itiaká nia vegenalitini lukesa akeleaká noive.

Itó kugupe aliki limiki mina vegená nene hize lé oketake nasahilí okimiaká noive.

6* Nenemú Ómasímini alévolé gizapaló lukugupe aliki limiki gupá zi amilo. Lá ikiko, eza mola gamenaváa alitokiko áisigó lukugulizá ale otinogo ive.

⁷ Ómasímo nene vatí oko gizapa oko lekelémo guni oaká noive, nenemú lekeza netá matá gena netá lakagata gululusi giliaká nia netá mukitoka nene aí agizakú milalo.

⁸ Lekeza lakagata gili koló iki gizapa iki minalo. Gala velini Satá eza akohú galagitana oko agepa á oaká noi ve eza aí akohitohe aí akohitohe loko agepa á oloko vogá ogá oaká noive.

⁹ Nenemú lekeza gili alévolé i miniki vasá zilo. Lá niiki likigive lakagave monokú niamó numutó namató niamoláá keza miluma maluma ámina iki gili miniaká niave iki gililo.

¹⁰ Itó Ómasí nasahilí amelaho eza Kilstotoka gímizemómove loko gonanalivagi lapaná alévolé oko minoakalíminiloka vi hilatave loko sele lo likimi ve áisi miluma maluma gamena alínipáisí nigilikó, lekelémo vevesati zámuza lekemekoko lekelémo kii loko lukesavatini hize kii loleketanogo ive.

¹¹ Nenémini zámuza nene aitokagó minamó nene minoko minoloko voko mino lúaló moloko minino. Lamaná.

Vegená makó gekéini loketamo

¹²* Neza gakó imane Sailasini nene lo ame ame nougo luhuva gizo nolikimive. Neza aikumú gulugo, nígivéneho gihila loló onoive. Neza Ómasímini nasahililamú gihila noive iki gilitave loko gakó ahaváisí lo utó moloko lo lukumuke hize lé oleketatove loko lo nolukumuve. Ámina nasahililímini agikagú alévolé iki otí minalo.

¹³* Papelonia numutokatí Ómasímini vegenala zuha lezagi lelémo etó i vegená keza geketini nililikitagó noluve. Itó monokú alémo mulu ve Makí ezagi geketini nololeketave.

¹⁴ Lekeza monokú apizi lamaná iki eza aputá viziko eza aputá viziko iki minalo.

Kilstotoka gímiziki nia vegenalita Ómasímini hulu lekelitoka mino moloko minino.

* ^{5:12:} Apo 15:22,40 * ^{5:13:} Apo 12:12, 13:13

Pitani Luhuva Nampa 2

Nónohá kimike lo kimi gakó

¹ Neza Saimon Pitana Izesu Kilistoni gelekelé ve itó aposolo nénisi nene Izesu Kilstó eza Ómasile itó lugutó vizeaká ve hee loko mina ve minoakeve loko gele alévolé oaká gihiláa lehizeletamokitana oko lehizeleketa vegenalita luhuva imane gizo nolukumuve.

² Lekeza Ómasimú itó Guivahanite Izesukumú gili guni iki gililikí niviko nasahilí itó hulu nene lekelitoka miní ameko utó oloko voko minino.

Ómasímo lelémo etó oake sele lo limi gakó

³ Izesú ezáa lapanalagi itó lamanalagi nene izá miliki alitave loko sele lo likimi ve ánígoko gelekuko Ómasiloka gímizi miniki iki miliki itave loko ligikámini lukesaváa mukí nene Ómasímini zámuzalámo lehizeletonoimóma neve.

⁴ Lá oake, netá gihila ite minamoláa meinaváa napagi nemó alitave loko lo moleta netá lehizelimidagó nene, alekuko, nenémini gihiláa lelitoka utó okiko, mikasiuka gumesisímini gihila lapuluva oaká netá nene lemegesa amekinake Ómasímini ametamenigi itunize.

⁵ Nenemú lekeza gili alévolé iki miniáká niató amuza miliki hee liki mini-akatini nene miní amilo. Hee liki miniáká niató nene mukí netá mogonamú geleaká nene miní amilo.

⁶ Netá mogonamú geleakató nene likigika nemó lukugupe nemó gizapa oaká nene miní amilo. Nenémini agikagú amuza milikiko, gasovagi netá utó noikoma, amanapa o minoaká nene miní amitaze. Amanapa o minoakató nene, likigika lamanaki minoaká nene miní amilo.

⁷ Likigika lamanaki minoakató nene likigivetikinimú miluma gelekimiaká nene miní amilo. Miluma gelekimiakató nene, likigika kemeaká nene miní amilo.

⁸ Ámina netá matá nenémo lekelitoka minoko hize hutilí noikoma, Guivahanite Izesu Kilistoni mogonamú geleakaláa gili miniki hozaváa alikiko, hutuváa loló amoko gihiláa zinogo ive.

⁹ Itó nolu netá matá ali minamita vegenakumú láá loko litunize: Keza kemenímini agómula liko vimó neve. Golesa netáini goí oko Ómasímo nagamí zeketoko kelémo lamaná imó nene kagatí molokave loko litunize.

Guivahanímini lapanaláa nene agómula gihilatunú ánigamó

¹⁰ Nigive nagavese, lekeza nenemú Ómasímo lekelémo etó oake sele lo likimimó nenémini gihiláa lekelitoka mino alévolé itive liki amuza milalo. Lekeza lá itamó nene goselekaselé ikiko monokutí velehé lememinigave.

¹¹ Lá iki miniko Ómasímo giligo vávani olikimikiko Guivahanite lugutó vizeaká vele Izesu Kilistoni avogisaló alévolé oko minoakalímini agikagú nene vi hilanigave.

¹² Lekeza netá matá mukikumú imane mota lo lekemekuháma neve. Itó ámina gakó gihilámini agikagú alévolé iki niminamóza, ámina gakómáló nene ale gosohá oko lo lekeme lekeme oko minanogo uve.

¹³⁻¹⁴ Neza gamena hána minaminake mikasi nugupe ahulatove loko Guivahanite Izesu Kilistó lo utó oko lo nemekago gelenoumó nenazo, neza mikasi

nugupegi nomininake gakó imane lo lekeme lekeme oko mininake lekelémo ote ote oko itove loko gulugo etokave.

15 Nenemú helekugo, lekeza gakó nene ali gosohakosohá iki mili gilikilí iki viva viva iki minata gapomú vitagá inogo uve.

16 Neza Guivahanite Izesu Kilistoni zámuzalamú itó anititi gakó lo lemekugo nene, lekeza gilikó gitene gakó loló amino. Vegenalite kagata gilikí ali guní iki lakutí lo lukumumó negopa, neza Guivahanímini golivagi lapanaláa utó noigo, nezáne nogómula gihilatunú ánígonoutotí lo lukumumómá neve.

17* Nene Ómasi amelaho eza Izesuni agulizá ale otike gonanalisi lehizemikago, okulumakú lapanalagi velokatí nene nene nigika amu gipáne noive, aí nene ánígo laga alekuve loko limimóma neve.

18 Neza aposolo lugáagi áisigi apazá agokaló nouko, gakó nénika loko okulumakutí lemekago gelenouháma neve.

19 Itó leza nenemú Ómasímini agepagutí gakó liaká a vetini gakó gelekuko gihiláa lamaná loló oloko iteaká noive. Nenémo livikitana oko límugusigú hize hanatokamó nenazo, lekeza nenemú lokogómulatunú ánígi gisili hiziki niko, gó lo lapaná latize. Itó sonohí napa ganakomekitana oko Izesuni lapaná nenémo likigikagú hize hanatoko minatize.

20-21 Ómasímini agepagutí gakó nene vegenalita gilikí alivi hiziikki makó linamó negopa, Ómasímini Sikalahulímo kelémo vávani noigo Ómasilokatí gakó liki miniaká amóma nenazo, nenemú ganatilisi gakó makó láa liki gili guní iki gilio: Ómasímini agepagutí gakó liaká a vete monó gotolaú luhuva gizi mila gakolímimi mogonáa nene ve makolite kezáini kigikagutí gili guní iake lamoakalímini neve.

2

Monó lili ali ve sozámini keí gakó

1 Isilae vegenatoka gakó lili ali ve sozáminigi nene gozapá utó iake minamó. Lekelitoka áminagó iki monó lili ali ve sozámini utó inigave. Keza soza monó ali utó milikiko, lekelitoka hoú loaká netá itó latila oaká netá nene utó inogo ive. Itó nenegó nomive. Guivahanímo nohilike lihimaváini meina hizeketa gakokumú egamega oaká nenegi alinigave. Lá ikiko, kezáini iki miliki atímo lapuluva oaká netá nene galinali kugupeló utó inogo ive.

2 Vegená nenémináa keza mokoló netá naliko vegená mukilite ánígiikki kímegetanigave. Itó keikumule liki vegená lugáate monó gihilámini gapomú aliki letanigave.

3 Lá okiko, soza monó liaká ve keza moni henokanonimú mumuzó itatímo itó kigikagutí gakó utó ititímo lokogoka viziki netá matatini hanuva alinigave. Hoza lá iki alitakumú keí lihima kimitove loko Ómasímo gozapá ale vatí oketamó nene, voko haha amive. Itó vi tolova iakáini nenémini agepéa ale molamó nene ha neve.

4 Ve nenémináatini mogonamú láa liki gilio: Ageló lugáate netá golesa alikago Ómasímo aserini zeketamike meikú nagá zeko kehelú ahulokago, ká emane límugusi lapalapa zikú limiki niave. Neneloka goní ita gamenamú ageva iki niave.

* **1:17:** Mat 17:1-5; Mak 9:2-7; Luk 9:28-35

5 * Itó gozapá netá matá mukí itó vegená nene Ómasímo asenini zeke-tamimóma neve. Makó Noá nene hee loko minoakalímíni gakó loaká i veki vegenala zuha 7 kezagigó asenini zekimikago, gosohá niago, vegená golesa keitoka nagamí veleko kepele gesá imóma neve.

6 * Itó Soto apatokagi Gomola apatokagi ámina oko lapuluva itave loko lokago, lokú liki mikasi amóma nene vegená golesa alikaloka utó iki minatamó nenete ámina netalímo lelitoka utó okative liki gilitave loko nenémini imóma neve.

7 * Itó ámina apá alémo latila inogo noike nene hokolizá ve keza mokoló netá kovoza helemigo aliki niago, hee lo mina ve Lotí eza ámina netá golesamú miluma geleko mina vema agutó vizimó.

8 Lotí eza monolagi ve minoakeve loko keí holúikú noigo, keza netá golesa aliki minikago gamena gamena ánígoká geleká ike, mulunagú gele golesa oko minoaká imó.

9 Nenemú Guivahanímini mogonáa lá oko mota utó okamó nenazo, áisi nene monóiki mina vegená nene gimilegú moloaká netakutí lugutó vizeaká zámuzagi noive. Itó monóni nomi vegená nene gamena napaló goní oketato ve loko nagá kimitikumú geleneive.

10 Litaha kigikámo amu heleaká netá golesa ámegetiake goihá giligili iki gizapa véinitini gakó gili ha gele gele iaká nia ve nene Ómasímo aleko iteko alévolé oko nagá kiminogo ive.

Ámina soza monó ve nenémináa nenete kelegesá legemigo hokolizá iki miniaká niave. Itó lapanáiki niamoláa nene alivi letivi ikitiki miniaká niave.

11 Lá niago ageló keza nene zámuza itó helisa haitolímini alinatite Guivahanímini agovisaló ámina soza monó liaká ve nene lihimáinimú lotuva ligiki alivi letivi iki ikitísá amamóza,

12 soza monó liaká ve nenémináa nene kigika kagata nomimó gaha nama kipilikí nia netakitana mina vegená keza netá matalímini mogonáa gili hee liki gilinamake ámina netakumú gopa napa gakó golesa liaká niave. Nenemú gaha nama tolova iaká niatíminiki tolova inigave.

13 Lá iiki netá golesa galasa aliki miniaká niamómámini meinaváa aliki miluma gilinigave. Keza límugusígú negopa ho napa lató nene kugupémo amu heleaká noi netá golesa amuza miliki aliaká niamó nenémo kogolizanini loló o kemeaká noive. Holutikú musi netá itó golotuva netá lilí iki niago lokovoza utó oaká noive. Nosánetató nene lekezagí niki minake ali gopa napa iki gasova vegenalitini suni aliaká niakumú kogoliza viziaká niave.

14 Kogómulatunú mokoló netá kogómula ánigoaká itó netá golesa lugáa nekumú lagaváa sipisi ali miniaká nia ve keza monokú alévolé ama vegená kimimika nilake itó moni henokanoni nenéminimú amuza mililiki nívago kigikáini loló oaká noive. Ve nenémináate meinímímini mututoni lilí niave.

15 * Keza gapo hee lo minamó nene kemegesa amiaké olí hiziki Posoleni gipala Palámo vi gapoló ámegetiki nivave. Palámo golesa netalímini meinaváa alinogo mumuzó imóza,

16 Guivahanímo ámina lihimamú gahá amimó nene, toki iza gakó lamoaká netalímo vegenalitini gakó loake soza gakó lole ale ve Palámini negi netá lekesava amimó.

Ámina lili ali ve sozámini mogonáini

¹⁷ Soza monó liaká ve nenémináate nagamí utamó nenéminiki minake itó hepelímo límusi huhu lokago, voko aleko oko aleko oko voaká noimó nenémini iki niave. Kegepagutí gakó linamó nenémini gihila utó osá amive. Ve nenémináa keza límugusi lapalapavagú anititave loko loketamó neve.

¹⁸ Kezánimú gelego iteaká noi gakó ha gakó liake nene, monó giliaké litaha gapo izoha nahula vegena nene kogoka viziaxá niave. Lá niake mokoló netatunú kogokagú milikago, anitikago, litaha kigikámo amu heleaká noi netá aliake vegena makó kei gelehusigú apilitave liki lá iaká niave.

¹⁹ Lukugupémo amu hili netá hanuva alinigave liki li mililikimaká ni-amóza, kezái kigikáini anuva onoitímini nagakú niake némiaka liaká niave. Nenémini mogonamú láa loko gelenouve: Ve makolite netá makolímini gelekeleváá minatamó keza ámina netalímíni nagalagú vi hiliki minanigave.

²⁰ Gilinahe. Ve makó keza Guivahanite lugutó vizeaká ve Izesu Kilstoni mogona nene lamaná iki giliakave liki monóni nomi vegentalitini golutuva netáini kemegesa aminitakutí ámina netalímo goha kovogisaloka okoko agulizaki ve goha loló okemekiko ámina netató gimiizi lamaná itamó nene, gozapá miniki aliki amó nenémo komáisí golesa imóza, alika miniki aliki itamó nenémo golesa o lamaná inogo ive.

²¹ Ve nenémináa keza hee loko voaká gapo lamaná nene ánigi lamaná amalina, golesa itigí i minaline. Itó gapo lamanató vikatitegi itó apazá gakoláa li kimikago gelemómatégi goha atiginá iki gozapá litaha gapoló vitamó nene golesa o lamaná inogo ive.

²² * Ve nenémináa keitoka anoza gakó láá liki liaká niamó nene alévolé okago niave:

Gala eza nosánetá noake itó musi veleake ámináa nene goha noaká noive. Itó iza eza nagamikú akoake goha goihá holoaká noive.

3

Guivahani atiginá iti gakó

¹ Nigika lukumu vegenaise, luhuva netá goha imane gizo lukumugo losi noive. Ámina luhuva lositakú nene neza ale gosohá oko lo lekemekinake mulutini alémo otekugo giliakatini nene lamanalímínigó minative loko gizokumó nene

² lekeza Ómasímini agepagutí gakó liaká a ve apazá minamó nenete gozapá alika utó iti netakumú lina gakó itó lekelí aposolo vegena leza Guivahanímo lo mola gakola lo lukumuhá nene gili minatave loko gizo lukumumóma neve.

³ * Ganatilisi imane gili zagiki gililo. Alika gamenama alitokiko, vegena golesa utó iiki kugupémo amu heleaká noi netató ali gikitiki aliki miniki gakotini alivi letivi iki lilikitiki

⁴ láa liki linigave: Guivahani atiginá itove loko lo mola gakolímini gihiláa hí neve. Gozapá avotege ámina gakó gililiki viki minake helemó. Lá okago netá matá mukí mikasi utó i gamenaló emane ámina netá minoloko iteko hanuva nemóma neve. Itó ámina okogó itína nominave liki linigave.

⁵ * Keza vegena lá iki giliaké gakó makó lá oko nemó nene gopa gili ámijaká niave: Ómasímini gakotó okulumá gozapá utó imó, itó mikasi ámina oko nagamikutí utó oake nagamilagi minamó neve.

6 * Itó alika ámina nagamilímogó vegená itó netá matá mukí kelémo sumizá noake kepele gesá imó neve.

7 Itó okulumaki mikasigi ha niasimó nene ámina gakotó Ómasímo kelémo gikitokago lolímini mututonáa lili iki niasive. Vegená golesa lihimáinimú goní oketati gamena utó okiko, latila itáikumú ageva iki niasimole.

8 * Nigika lukumu vegenáise, netá makó imanegi gili gopa napa amilo. Guivahani eza gamena hamokumú giligo melekeni 1000-igitana loló oaká noive. Itó melekeni 1000 neremú giligo gamena hamokitana loló oaká noive.

9 Guivahani eza gakó lo moleta tamó nenémini gihiláa utó itive loko lig-itagani oko gamena molo háná osá amive. Vegená lugáate gilikago lá oaká noimóza, lá oko nomive. Eza ve lugáama latila itave loko gelesá amike vegená mukitoka kigika ali viligatave loko geleake lekelikumule loko geha zeko ageva oko minoaká noive.

10 * Guivahanímini gamena nene guminaló ve nenéminoko galinali utó inogo ive. Utó okiko okulumá eza anó sipisi moloko voko tolava inogo ive. Itó okulamató nego ánígoko moloko oaká nouni netá mukitoka nene lolímo loko haha inogo ive. Lá noiko mikasigi itó mikásimini amupiló netá matá mukí nene lolimo lo asú inogo ive.

Lo asú oko lo kimi gakó

11 Netá matá mukí nene nenéminoko haha o asú itító nenazo, neremú lekeza etó iki keké vizi miniki monokú alévolé iki miniki ali minalo.

12 Lá niiki Ómasímini gamena napa atikumú lakagata losi gelemiki ageva iki govisi aliki letiki minalo. Ámina gamena alitokiko okulumá nene lolímo loko haha inogo ive. Itó okulamató nego ánígoko moloko nouhá netá mukí nene ló gulumagú holokiko loko gili gili molokiko asú inogo ive.

13 * Lá onoimóza, lélisi nene okulumá gosohá itó mikasi gosohá ale utó moloko lehizeletatove loko lo moleta kumú ageváa noune. Itó nenegú vegenalite mini hee liki miniaká nenémo gíki o lamaná oko minanogo ive.

14 Nigika lukumu vegenáise, lekeza netá nenéminámú ageva iki miniaká nianazo, aí agovisaló likigika geha zimó gízopa lo miniko lihimate nomimó minutune liki amuza milalo.

15 Lá niiki Guivahanitémo gamena molo háná okikoma láa liki litaze: Lelémo lugutó viziti gamena neve. Ligiveteho ligika ameaká nouni ve Pauló eza Ómasílokáti geleakalagi minatímove loko lo lukumu netakumú luhuva gizo likimímoma neve.

16 Eza mukí luhuva netá gizoaká noikú nene ámina netakumú gakó lo lekemeloko voko noimómá neve. Itó aí luhuva netalagú gakó lugáámini mogonáa genavagi nego ve negi itó keé lamamó keza ali gopánapa iaká niámó nene aí luhuva netakó nomive. Monó gotola gakó lugáa mukitoka nene ali gopánapa iki kezáini vi tolava iaká gapoló nivake lá iaká niave.

17 Nigika lukumu vegenáise gakó imane lakagata aleko lo lekemekugo gilinamómá nenaze, vegená golesa keí gopánapa gakóini likigikagú lemekiko, likilími gopa ikiko monokutí limiki akikataze, gizapa iki minalo.

18 Lá niiki Guivahani lugutó vizeaká vele Izesu Kilistoni nasahilí itó aí mogonatagana gili kolosiki gili hee liliki viki minalo. Aí lapaná itínasa utó o lamaná okoko ámina oko minoloko voko mino lúaló moloko minino. Lamaná.

Zonini Luhuva Nampa 1

Alévolé oko minoakalímini agepagú gakotó mina ve

1 * Mukí netá apí oko utó ikutí ká emane minoloko voko minamó itó lagatatumú gulunimó itó logómulatunú ánígunimó itó logómulatunú ánígo gisili hizeko ánígunike ligizanitunú ale geleko ánígunimó nene minova minova oko minoakalímini agepagú gakotó mina vermú luhuva imane gizo nolukumuve.

2 * Minoaká gihila utó o lamaná okago ánígununita alévolé oko minoloko voko minoakalímini gakola nene lo utó moloko lo lekemeaká noune. Alévolé oko minoloko voko minoaká ve nene amelahitoka minoloko voko minake alika lelitoka utó imó.

3 Nenemú netá matá ánígoko geleko unímoma ámina oko lo lekemeaká nounimó nene lekeza gilikiko ligika molo hamó oko lamaná oko apizeko minutune loko nenemú loafá noune. Itó ligika molo hamó oko lamaná oko apizeko nominuhá nene ametehitoka itó gipala Izesu Kilistotoka neve.

4 Nenéminoko utó okiko, mulutegú agila guluma o asú itive loko luhuva netá imane gizo nolukumuve.

Ómasímini lapanakú minoko aleko ituni gakó

5 Gakoláa nene Izesutokatí lá oko gelekuhámave loko lo lekemeaká noune: Ómasiloka límugusi makó ma nomive. Lapaná loake molo minamó neve.

6 Leza límugusigú minoko aleko inake Ómasigi ligika molo hamó oko lamaná oko apizekune loko litunimó nene sozagi linogo une. Itó netá gihiláa nene ma ale minamitune.

7 Ezáa nene lapanakú noive. Ámina oko leza nene lapanakú minoko aleko itunimó nene ligika molo hamó oko vatí oko apizeko minanogo une, itó gipala Izesu Kilistoni golanímo lihima netate monéna nagamí zekiko ligika guluvitanoive.

8 Leza golesa netate nomive loko litunimó nene ligikate agoka vizinogo une. Itó gakó gihila gotoláa nene ligikagú ma minaminogo ive.

9 Itó golesa netate lo utó molatunimó nene, Ómasímo lo moleta netá amegesáló moloaká ve netá hee lokogó aleaká noi ve noinazo, golesa netate nagamí zeko lihimavate ale ahulo asú inogo ive.

10 Golesa netá aliáká niave loko lolimiaká noinazo, leza golesa netá alesá amune loko litunimó nene Ómasímu nene sozaló veve loko lotunimó gilinogo ive. Itó aí gakoláa nene ligikagú minaminogo ive.

2

Golesa netatemú goní nouko lelitoka alemo moloaká ve Izesú

1 Izegipánemata, netá golesa alikatave loko gakó imane gizo nolukumumóza, makó keza netá golesa alitamó nene, ametehitoka golesa netatemú goní nouko Izesu Kilistó eza hee loko mina vémo lelitoka alemo moloaká ve noive loko lo nolukumuve.

2 Aisi nene lihimate asú itive loko gapo veleletamó nene lelikumukó negopa, numutó namató vegéná mukikumukive loko monéna veleletamóma neve.

3 Ómasímo lo hukoko li gakó nene gele alekuko, aikumú gele guni unitímini mogonáa utó okiko, gilinogo une.

4 Itó lo huka gakoláa gili alemítamó nenete Ómasimú gele guni o noune litamó nene sozaló veve loko loketatunize. Ve nenémináatini mulúukú gakó gihiláa nomive loko litunize.

5 Itó helegaloka Ómasímini gakó ámegetiki minatamó keza kigika Ómasi amikamómámini gihiláa utó o asú okave. Lá okago nene, Ómasiloka gímizi lamaná iakalímini mogonáa utó okiko, ánigoko gilitunize.

6 Lá oko utó itikumú noluve: Makó keza Ómasiloka gímizeko noune litamó keza Izesú oko moloko imó nenémini avevezahaló minanigave.

Lo hukoko li gakó gosohá

7* Nigika lukumu vegenaíse, neza lo hukoaká gakó gosohá makó lo nolukumumó negopa, litaha mogonalokatí gili-likí viki mínamóma nene, gakó li likiminamóma nenémini lo huka gakó litaha gohakú lo lakagata naluve.

8 Itó gakó luhuva nogizumó imane lo hukoko li gakó gosohá noimó nogilive. Itó límugusi mota tolova noigo, lapaná gihiláa nene utó o lamaná oko noinazo, ámina gosohá lo hukoko li gakó nene Izesutoka itó lekelitoka gakó gihiláa loló oaká noive.

9 Itó kigivéikini mukahá kipiliaká nita vegenaíkeza nene lapanakú noune liki litamó nene, keza límugusigú niake nilave loko litune.

10 Itó kigivéikini kigika kimiiki nasahilí ikitatamó keza nene lapanakú vatí iki minanigave. Lá niiko, golesa netakumú gala vizé vizé nenémo keitoka ma utó osá aminogo ive.

11 Itó makolímohe makolímohe agivelahini mukahá apilitimó nene límugusigú minanogo ive. Itó límugusímini gapoló vinogo ive. Eza límugusímo agikámíni agómula likokamó nenazo, ligitagani okoko gapo nene ánigo hee loko ma ánigaminogo ive.

12 Mohóne gipáne lekeza Izesuni agulizá alinakumú lihimatini ahulolikimikamóma nenazo, nenemú gakó imane gizo nolukumuve.

13 Améikita lekeza minoloko voko minamó noi vemú gili guni iki gilikamóma nenazo, nenemú lekelí gakoláa imane gizo nolukumuve. Itó gosohá ve lekeza golesa netalímini amelahnáa amuza mili miliki aviligidamóma nenazo, nenemú gakó imane gizo nolukumuve.

14 Itó mohóne gipáne lekeza ametipini mogonamú gili guni iki gilikamole loko luhuva imane gizo nolukumuve. Améikita lekeza minoloko voko minamó noi vemú gili guni iki gilikamómave loko gakoláa imane gizo nolukumuve. Gosohá ve lekeza amuzaváa milamole loko itó Ómasímini gakoláa likigikagú nego golesa netalímini amelahnáa aviligidamole loko gakoláa imane gizo nolukumuve.

15 Mikasiuka Ómasigi nomi suni itó mikasímini amupiló netá matá utó netó mulutini milikiko lukumu helemino. Makó keza mulúini nene mikasímini amupiló ne netató milikiko minatimó keza kigika nene améipini amisá amave.

16 Gilinahe. Mikasiuka netá matá mukí nene lugupémo mumuzó oaká noi netá itó logómulámo ánigo laga oaká netá itó ligika lugupe aleko ite ite netá nene ametehitokatí nomive. Nene mikasiukatile.

* **2:7:** Zon 13:34

17 Itó mikasi eza gumesisivagi minoko vo otolova inogo ive. Lá itimóza, Ómasímini agikaló mini milatamó keza miniliki viki mini lúaló miliki minani-gave.

Kilistoni gala vela napámini gakó

18 Mohóne gipáne, gamena nene mota alínipa o asú okave. Nenemú lekeza Kilistoni gala ve napa utó itive liki lina gakó mota gilinave. Itó itína gala veva mukí utó iake miniliki vinave. Nenemú nene gamenaváa mota alínipa o lamaná okave loko gelenoune.

19 Kilistoni gala ve keza utó amoláa nene lelitokatí ahulilimiaké vikamoláa nene lelí ligive lagave gihila lilí iki minamamó neve. Keza ligive lagave gihila minalina nene, ma ahulilitamaline. Itó ahulilimikamole loko keza ligive gihila lilí iki minamatímíni mogona utó okave.

20 Lá ikamóza, lekeza mukító nene apazá amelaho Sikalahula hololeketa-mole liki gakó gihila geleakalímini lilí iki niave. Nenemú luhuva imane gizo nolukumuve.

21 Lekeza gakó gihila gelemave lokogopa gakó gihila giliaká niamómave loko, itó soza saza mukí nene gakó gihilámini agikagutí ma utó osá amimole loko luhuva imane gizo nolukumuve.

22 Soza sazaló veve nene éaginimú litune. Ve makolímohe makolímohe Izesú eza gologí oletative loko amisili ve nomive loko nolikoma, aikumú sozaló veve loko litune. Amelahiko gipalago ánígi ahulata vegenakumú nene Kilistoni gala vegenale loko litunize.

23 Makó keza Ómasímini gipala ánígi ahulatamó nene amelahnigi ánígi ahulanigave. Makó keza gipalamú ali miniki litamó keza nene amelahnigi alími kamatoka milanigave.

24 Lekeza mogonalokatí emane monó gakola gililikí iki minamó nene gili zagi minalo. Monó gakoláa gili zagi minatamó nene amelahiko gipalago keítoka gímizi lamaná inigave.

25 Izesú lehizeletatove loko lo mololeta netá nene alévolé lemetamenigi minoaká nene neve.

26 Likigika ali gopánapa ilikitani nia vegenakumú gakó láa loko luhuva nogizumóza,

27 lekelikumú láa loko noluve: Sikalahú mololeketamó nene mulutikú minoko aleko oaká noive. Nenemú ve makolímo sozagi lamanaki nanave loko ale gizaká oko lo likimitive. Nene ma nomive. Sikalahú hololeketamó áisi gakó mukí lainim-oleketoko lo lekemeaká noive. Itó aí gakola nene sozagi ma nomive. Lamanakó nenazo, nenemú Sikalahulímo lo likimi gakó nene gili alíiki Kilistotoka gímiziki minalo.

28 Mohóne gipáne lekeza likigika avasavagi miniko miniki Kilistó eza anititi gamenaló utó noiko agómulaló lokovoza helemitive liki Kilistotoka gímiziki minalo.

29 Ómasi eza hee loko noitímo noive liki gilinitamóma nene, netá ali hee liaká nia vegená mukító keza Ómasilokatí utó amole liki gili zagitave.

1 * Gilinahe. Ameteho nene mohóneve gipáneve loletamó nene agika haitolíminoko limike lá oletamóma neve, itó leza lamaná aí izecipala nomi-nune. Itó monóini nomi vegená keza Ómasímini mogona ánigi hee lisá amanazo, nenemú lelí mogona ánigi hee lisá amave.

2 Nigika lukumu vegenáise, leza itínasa nene Ómasímini mohola gipala nounize, itó minoko nana avevezahaló utó itunimó neve. Nenémini mogona litá oko utó o lamaná amimóza, láa loko gelenoune. Guivahani utó iti zupahé nene ametamenía ánigo gisili hizeko ánitatune, nenemú lezagí aí ametamenigitana minanogo une.

3 Itó makó keza nenemú kagata losi gelemiki ageva iki minata vegená nene, Guivahani eza vové aveláa noinazo, ámináminoko minatune liki kigikáa alími guluvitanigave.

4 Lihima netá aleaká nenémo Ómasímo lo mola gakó ahelú oaká netá nenazo, lihima netá aliaká nia vegená keza Ómasímo lo mola gakó nene avutá iáká niave.

5 * Itó lekeza Izesuni mogona giliaká niave. Eza lihimate ale olové inogo utó imó. Lá oake ezáaloka nene golesa netala ma minamimó neve.

6 Nenemú makó keza Izesuki apiziki miniaká nia vegenalite golesa netá aliki minaminigave. Itó makó keza golesa netá aliki miniaká niamó nenete Izesuni mogonáa ánigi hehe lisá amave.

7 Mohóne gipánemata, makolímo oko lekelémo gopa itove loko nolikoma, gili amemilo. Makó keza netá ali hehe liki nalikoma, keikumú nene hee liki miniaká nia vegenale loko litunize. Itó Izesú nominatíminki hehe liki minataze.

8 Makó keza lihima netá aliki minatamó nene Satani vegenala minatave. Satá eza lihima netá nene mogonalokatí aleloko voko minamó. Itó aleko mi-noaká noigo, Ómasímini gipalámo Satani hozaváa nene apeleko ale ahulanogo omo anitimó neve.

9 Ómasilokatí utó amó nenete Ómasímini ametameni ali minamó nenazo, keza lihima netá aliki minaminigave. Keza Ómasilokatí utó ikamole liki lihima netá aliki minaminigave.

10 Ómasímini izecipala itó Satani izecipala keí mogonatagana lá oko nene utó iko ániganogo une. Makó hehe liki minamitamó keza Ómasilokatí niave loko lamitunize. Itó makó keza kigikáini nene kigivéikini kememikoma keikumú nene ámina oko litunize.

Ligika eza amiko eza amiko oko minatune

11 * Monó gakó lekeza mogonalokatí gililikí iva iva niamó nene lá oko neve: Ligika eza amiko eza amiko oko minatunize.

12 * Atani gipala Kaini ámegetamitunize. Eza golesa netalímini amelahnáámini gipala loló oake agunala apele hilimóma neve. Lá imó nene ezáa oko moloko imoláa golesa okagove loko, itó agunalámo oko moloko imoláa lamaná okagove loko apele hilimó neve.

13 Nigive nagavese, monóini nomi vegenalite alivi galativi nililikikitikoma, giliiki gosohá suni neve liki lamilo.

14 * Ligika nene ligivetegini kemeaká nounimó nenazo, nenemú hele-nouhakutí atiginá oko voko alévolekú vo holokuháma neve loko geleaká

noune. Vegená makolite kigivéikini kigika kememitamó nene kigika hele vimó minikave.

¹⁵ Itó kigivéikini mukahá kipilita vegená nene kipili hiliaká ve kigikagi niave. Itó kipili hiliaká vegená nene alévolé kemetamenigi iki minamave liki lekeza giliaká niave.

¹⁶ Izesú eza lelikumule loko minoko aleko imola nahulake agika lim-imómámini mogona ale utó molokago ánígokune. Nenemú leza ámina oko ligivetegnimile loko minoko aleko itunimolá ahulatave loko loletonoimómá neve.

¹⁷ Ve makolímo iza goula nosá henokanoni minumunímo vaí oko minati vémo agivelaho makó nene netá makokumú vitagá noiko ánígooko ánígo goselé itímó nene, Ómasiloka agika ma molamive loko litunize.

¹⁸ Mohóne gipáne, leza ligika nokiminake nene gakotunukó itó legepatunukó nomive. Nasahilitunú itó legepatunú ligika kemesá neve.

Ómasímini avogisaló ligika ale hamokó molatune

¹⁹ Lá okuko, gakó gihláámini vegenala nounitímini mogonáa utó okiko, ánígoko gilinogo une. Itó ligikagú losi pasi noikoma Ómasímini avogisaló ligikagú hulu iko minatunize.

²⁰ Netá golesamú goní ituni gakó ligikagú nekoma, láa loko litunize: Ómasi eza ligikámini avevezahaló nomive. Eza haitolimino minake, netá matá gele kolosoko geleká noinazo, lihimatemú oko ahuloletaminogo ive.

²¹ Nigika lukumu vegenáise, netá golesamú goní ituni gakó ligikagú nomikoma, Ómasímini avogisaló lehelele vizemiko vatí oko minanogo une.

²² Itó gakoláa gele alekunike oko moloko oaká nouni netá nene eza gele lamaná oaká noinaze, nenemú nene aitoka netá matakumú voká lokuko lemekáá noive.

²³* Gakoláa lo hukoko li gakó láa loko neve: Gipala Izusu Kilistoni aguziláláa gele alévolé inake loletonoimómáminoko ligika eza amiko eza amiko oko minatune.

²⁴ Lo huka gakoláa gili alita vegená keza Ómasigi apizi lamaná iki niminiko, Ómasi eza mulúkú minoko aleko inogo ive. Itó Sikalahú lehizeletamó áisi lo lemekago, Ómasi eza mulutegú minoko aleko oaká noive loko geleká noune.

4

Gakó makó Ómasilokatí nehe nomihe gele hee litune

¹ Nigika lukumu vegenáise, Sikalahulímo lelémo vávani igo loaká noune liki liaká nia vegenalitini gakó nigiliki mukí nene Ómasilokatí neve liki gelemilo. Gakó lili ali ve sozámini mukí utó iake hutíl ikamó nenazo, gakó makó nene Ómasilokatí nehe nomihe gele hehe litune liki mili gililo.

² Ómasímini Sikalahulímo kelémo vávani okave liki lá iki ánígataze. Izusu Kilistó nene lelí lugupe ale luhoake utó imó neve liki li utó miliki lita vegená nene Ómasilokatí niave loko gilitune.

³ Itó makó keza Izesunimú láa liki lamikoma nene, Ómasilokatí niamave. Keza Kilistoni gala ve napámini gakotó nilave loko gilitune. Aikumú nene mikasiuka utó itive liki li likimikago gilinamóma neve. Itó ítína nene mota utó okave.

* ^{3:23:} Zon 13:34, 15:12,17

4 Mohóne gipáne, lekeza Ómasilokatí utó iake, monó gakó lili ali veva sozámíni nene amuza miliki kiviligikamóma neve. Lekelí mulutikuka mi-noaká noi vémini zámuzalámo mikasiuka noi ve golesámini zámuzala nene avilegeneive.

5 Monó lili ali ve sozámíni keza mikasímini amupiló netakumukó liaká nianazo, monóini nomi vegenalite gakóini nene ali kagatagú miliaká niave.

6 Leza nene Ómasilokatí utó unimó nenazo, Ómasímini mogona ánigi hee liki ániga vegenalite gakote giliaká niave. Ómasilokatí utó amamó nenete gakote gili ahuliaká niave. Gakó gihilámini mogona itó ale gopa oaká gakolímini mogona lá oko utó noigo ánigo guni oaká noune.

Ómasímini mogona nene agika lemeakalímini neve.

7 Nigika lukumu vegenáise, ligika kemeaká suni nene Ómasilokatí nenazo, nenemú leza ligika eza amiko eza amiko oko minatunize. Makó keza kigivéikini nene kigika kimiki nasahilí ikitatamó nene Ómasilokatí utó a vegená niave. Itó Ómasímini mogona gili hee linave.

8 Ómasímini mogona nene agika lemeakalímini nenazo, makó keza vegená makó kigikatunú nasahilí ikitatitamó nene, Ómasímini mogona ánigi hee lamáve loko litune.

9 Ómasímini gipala hamó nene alévolé oko minoaká netá nene aitotí alitune loko mikasiuka amiselekago limitímo agika limimómámini mogona lelitoka utó o lamaná okave.

10 Ligika kemeakalímini mogoná lá oko neve: Leza Ómasi ligika amehá negopa, áisi nene agika limike gipala amiselekago limike lihimate asú iti gapo veleletamó.

11 Nigika lukumu vegenáise, Ómasi eza haitolíminoko agika lemekamó nenazo, nenemú leza ámina oko ligika eza amiko eza amiko oko minatune.

12 * Vegenalita Ómasi ánigoaká nene ma ánígonamunimóza, ligika eza amiko eza amiko oaká nenegú oko moloko itunimó nene Ómasímo mulutegú minoko aleko noitímini mogoná ale utó inogo ive. Itó agika lemeaká noimó nenémo vihelé loko minanogo ive.

13 Áisi lelí lelémo amakuka moloaká noive. Itó lelí mulutegú minoko aleko oaká noive. Nenémini mogona nene Sikalahula lehizeletamole loko gelenoune.

14 Ameteho numutó namató vegená lugutó vizitive loko gipala amiselekago limimó nene leza logómula gihilatunú ánigokunimóma neve. Itó nenemú gakó imane lo utó moloaká noune.

15 Itó Izesú eza lamaná Ómasímini gipala noive liki lita vegená keza Ómasiloka gímiziki minanigave, itó Ómasímo ámina oko mulúikú minoko aleko inogo ive.

16 Ómasímo agika lemeaká noimó nene ánigoko gelenoune. Itó gele seketigí oko gelekune.

Ómasímini mogona nene agika lemeakalímini neve. Itó vegená makó kigika kimiliiki viki miniki aliki ita vegená keza Ómasiloka gímiziki minanigave. Itó Ómasímo mulúikú minoko aleko inogo ive.

* **4:12:** Zon 1:18

17 Nenéminoko ligika kemeaká nouni netá nene vihelé loko minanogo ive. Lá okiko Izesú eza mikasiuka imane minoko aleko oaká imómáminoko leza minoaaká nounimó nenazo, nememú gamena napaló mulutegú hukili amiko ote hee loko minutane.

18 Lelegesá itó ligika kemeaká keza apiziki minisá amasive. Ligika kemeaká netá gihilámo nene lelegesá legeaká netá ahelú inogo ive. Netá makokumú lelegesá ligitimó nene ámina netalímo miluma gilituni netá lumupiló molatihe loko lelegesá legeaká noive. Nememú makó keza kelegesá ligiti vegenatoka kigika kemeaká netalímo vihelé loko minamive loko litune.

19 Ómasímo ganá agika limimóma nenazo, nememú ligika kemeaká noune.

20 Ómasi ligika ameaká noune liki kigivékini mukahá kipilita vegenakumú nene sozaló veve loko litune. Mota gilinahe. Ligivetegini logómulatunú ánígoaká vegená ligika kememitunímó nene, Ómasi ánígamoaaká ve ligika amesá nomive.

21 Izesú láa loko lo hukoleta gakó geleaká noune: Ómasi kigika amiaká nia vegenalite ámina iki kigivékini nene kigika kemeakalímini genaváa keitoka neve.

5

Mikasiuka netá apelekuko limiti mogona

1 Izesukumú nene gologí oletative loko lo moleta veve liki gili seketígí itamó keza Ómasilokatí utó a vegená niave. Itó makó keza améipini nene kigika amitamó nene agapilamolagi kigika kimiaká niave.

2 Leza Ómasi ligika ameko lo hukoleta gakó gele aleaká nountímó Ómasímini mohola gipala ligika kemeaká noupe loko nenémini mogona lo utó moloaká noive.

3 * Ómasi ligika ameakalímini mogona nene lo huka gakó mukí gele aleakakú neve. Ómasímo lo huka gakó ámegetoaká nene genavagi nomive.

4 Ómasilokatí utó unimó mukitoka leza mikasi amupiló netá golesa lisomikuko lemeaká noive. Mikasi amupiló netá golesa lisomikuko lemeaká noitímíni zámuza nene agulizaláa gele alévolé oakate nene neve.

5 Éage amuza miliki mikasímini amupiló netá golesa mukí lisimikiko limitive. Izesunímú Ómasímini gipala noive liki gili seketígí iki gilita vegenalitegó nenémini inigave.

Ómasímo gipalámini gakola hize lé ota gakó

6 Izesu Kilistó áisi nene nagamilagi golanigi utó imole. Nagamilagigó nomive. Utó imó nene monó nagamí holamoki golani lekike hilimoki neve.

7 Sikalahú eza gakó gihiláámini amelaho noinazo, Sikalahulímo nene ámina mogonamú lokago, gihila zeaká noive.

8 Nememú Sikalahú ezáa itó monó nagamí holamó nenémo itó golani lekike hilimó nenémo Izesuni mogona hizi lé itake hoza aliaká niave. Sikalahú itó nagamila itó golaniva keza losive makole niatite Izesú nene Ómasímini gipala noive liki hamó gakó liaká niave.

9 Goní ikitató nene vegenalita oko moloko imole liki litamó itó oko moloko amimole liki litamó nene gele seketígí itune. Lá onoimóza, Ómasímo li gakó

nenémo avilegeko alévolé oko noive. Ómasi eza gipalámini gakola hize lé otamó nene láa loko neve:

10 Ómasímini gipalamú gili alévolé ita vegena keza kigikatunú gelego alévolé oaká noive. Itó Ómasímini gakó gili alévolé amita vegena keza Ómasímo gipalamú li gakó gilikago hutuvagó loló onoimó nenazo, nenemú vegena nenémináate Ómasimú sozaló veve nilamó geleneive.

11* Itó gipalámini mogona hize lé oko gakó limó nene láa loko neve: Ómasi eza alévolé lemetameki minoaká netá ale utó molo limimó, itó alévolé oko minoakálímini mogonáa nene gipalaló neve.

12 Ómasímini gipala ali gikitiki minata vegena keza alévolé kemetameni alikamó neve. Itó Ómasímini gipalaló gímizema vegena keza alévolé oko minoaká nene alemave.

Alévolé lemetameki minoaká gakó

13 Ómasímini gipalamú gili alévolé inamó lekeza alévolé lekemetameki minoaká nene mota alenoune liki gili seketígí iki gilitave loko luhuva imane gizo nolukumuve.

14 Leza láa loko Ómasímini avogisaló gele olopá onoune: Ómasiloka netá makokumú voká lokuko nene ezáa gilitó molató noikoma gele liminogo ive.

15 Itó netá nemupe manamupe voká lokuko gele liminogo ive loko gele seketígí onounimó nenazo, netá makokumú voká lotatunimó nene litá oko ale ligizakú itune loko gelenoune.

16 Ve makó eza agivelaho makolímo golesa netá alekikoma ánígokoko lolímini mututonáa loló oakálímini nomikoma, ánígokoko nene aíkumú Ómasiloka lotino. Lokikoma, Ómasímo alévolé gapoló alémo molatize. Itó golesa netalímini nagaláa nene lolímini alévolé nagala alemitimolamú noluve. Golesa netá makolímini nagá nene lolímini nagaláa nene neve. Nenémináamú numuna hoza alitave loko lamuve.

17 Netá golesa mukitoka nene lihima aleakálímini nemóza, golesa netá lugáa nene lolímini nagaláa alévolelagú lelémo molatítímini nomive.

18 Leza láa loko geleká noune: Ómasilokátí utó atite nene golesa netá aliki minaminigave. Ómasímini gipalámo gizapa okimikiko golesa netalímini amelaho kugupeló ma ale geleminogo ive.

19 Leza Ómasilokátí utó unimó neve loko, itó monóini nomi vegena mukitoka keza golesa netalímini amelahini sepenuauka akiaká niave loko gele noune.

20 Itó láa lokogi gelenoune: Ómasímini gipala eza mikasiuka lemeake gele guni oakate ale utó olimikamó nenazo, Ómasi gihilámini mogona gele guni oko geleká noune, itó Ómasi gihilaloka gímizekuniimó nene gipala Izesu Kilistoni sepenuauka minoko aleko oaká noune. Áisi nene Ómasi gihila itó alévolé oko minoakálímini amelahóa noive.

21 Mohóne gipáne lekeza soza saza ómai netakumú gizapa i guni iki minalo.

Zonini Luhuva Nampa 2

Nónohá kimike gizo kimi gakó

¹ Monokú olotiva ve neza Guivahanímo alémo etó i venaki izegipalagitana mina vegená nene luhuva netá imane gizo nolukumuve. Neza nigika lekemeaká nouke gizo nolukumuve. Itó nénisigó nomive. Gakó gihiláa giliki kigikagú miliaká nia vegená mukitó kigika likimiaká niamó nene

² monó nene ligikagú noigove loko itó lezagi alévolé oko minoloko voko minatikumule loko ligika lekemeaká noune.

³ Ómasi ameteho itó amelahini gipala Izesu Kilistó eza nasahilí oletoko agika molo lemeko hulu ale utó oletoko noiko, gakó gihilámini itó ligika kemeakalímini agikagú minoloko voko mino lúaló moloko minatune.

Kilistó lo limi monó ale gikitature

⁴ Mohó izegipaka lugáa keza ameteho lo hukoko li gakó lo limimó nene gili aliaké gakó gihiláa ali miniaká niamó nenémini mogona gelekuke mulúnegú lamaná geleaká nouve.

^{5*} Itó imane vená geza Guivahanímo lo hukoko li gakó makó lo gemekugo gelezo. Gakó gosohá ma nomive. Litahama mogonalokatí emane geleloko ova ova oko nominuhá gakó nene láá loko lo gimitoze: Ligika eza amiko eza amiko oko minatune.

⁶ Ómasímo lo huka gakó gele aleaká nenémo ligika kemeaká netá loló onoive. Ómasímo lo hukoko li gakó mogonalokatí gililiki iva iva iki niminamó nene likigika kimiliki viki minatave loko neve.

⁷ Gilinahe. Haitó monó alitave liki logoka viziaká ve mukí utó iake numutó namatót hutilikave. Keza Izesu Kilistonimú nene mikasi lugupegi utó imóma neve loko loaká nouhá gakó nene zivi hitivi iaká niave. Ve nenémináa nene logoka viziaká ve itó Kilistoni gala veva nene niave.

⁸ Monolímmini hozava alinamómámini gihiláa nene gopa olifikatize, gizapa iki minalo. Lá niiki miniki meinava vatí iki alitaze.

⁹ Kilistoni monó lo limimó nene ali gikitamiki avilígiki gakó makó liiki ali gopa ita vegená keza Ómasi ali kamatoka aminigave. Makó keza láá lamíki Kilistoni gakó lamaná ali minatamó nenete ametehove itó gipalave ali kamatoka inigave.

¹⁰ Ve makolímohe makolímohe Kilistó lo limi gakó ale minamitimó nenémo lekelitoka gakó lainim-oleketatove nolikoma, numutikú alími milamilo. Itó alími lakamatoka milamilo.

¹¹ Ve makolímo vegená nenémináa kelémo geha zitimó nene hoza golesa aliaká niatoka kelémo vatí noive.

Gekéini loketa gakó

¹² Gakó lugáa mukí nemóza, luhuva gizoaká nagamitunú luhuva netákú gizo likimitove loko gelemuve. Neza lekelitoka litá oko vokugo, leg-epatunú logele hagele oko gelekinake mulutegú agila guluma napa itive loko gelekuke.

¹³ Geza mohó gugunaka Ómasímo alémo etó imó aí izegipala zuhagi geketini nililikitago noluve.

* ^{1:5:} Zon 13:34, 15:12,17

Zonini Luhuva Nampa 3

Gaioni nónohá amike gizo ami gakó

¹* Monokú olotiva ve neza nigivénega gihila Gaioga geí luhuva netá imane gizo nogumuve. Neza geikumú lamaná geleká nouve.

² Nigivénega, gigika nene monokú vatí oko nego gelekuke, ámina oko gugupeloka miluma gelemoko némini manámini netá geitoka zeloko amiko vatí oko minatane loko Ómasiloka loaká nouve.

³ Geza gakó gihilámini gapolokó voaká noane. Nenemú ligive lugáá keza ake gakó gihiláa ale gikitoaká anikumú li nimikago gelekuke mulúnegú lamaná geleká nouve.

⁴ Monokú kelémo molokugo mohó izegipáne lilí ina vegenalite gakó gihilámini gapoló viaká nia gakó gelekuke mulúnegú lamaná geleká noumó nene haitolíminoko netá makolímo ma avilegeminogo ive.

Gaió nasahilí oketakumú agepoka limó

⁵ Nigivénega, geza ligivetegini kelémo lamaná oaká noanimó nene alitokatí negopa, hotokatí nenegi kelémo vatí oaká animó nene vatí oko loló noanize.

⁶ Imaneló Izesuni vegenala zuhatini kovogisaló nene gigika kemeko nasahilí okimiaká anikumú avetó iaká niave. Izesuni vegená makó geitoka nivikoma, geza Ómasímini gakó lili ali iaká niakumú nasahilí oketoko kimisele molokako vitamó nenémo lamaná inogo ive.

⁷ Keza Guivahanímini agulizalamule liki mikasinini ahuliake monóini nomi vegenatokatí moni henokanoni makó alisá amake, monó hozaló vinamó neve.

⁸ Leza ve nenémináá nasahilí o kemeko hize lé okimikuko, monó hozámini hamó hozaló ve loló okuko gakó gihiláa hutílítive loko loletonoimóma neve.

Tiottelepeko Temetelioko kei gakó

⁹ Neza monó gakó lili ali iaká nia vetini mogonáinimú nene Guivahanímini vegenala zuhaloka luhuva alínipa makó gizumóza, Tiotelepé eza ve uvóipina minatove loko loaká noi vémo gakóne nene gele ahuloaká noive.

¹⁰ Nenemú neza vinake oko moloko noitímimi mogonáá ale utó molanogo uve. Eza lelikumú soza like alevo letovo oaká noive. Itó nenegó nomíve. Monó vegená nivago eza kelémo amatoka molamike, vegená lugáate nasahilí ikitanigi niago, gahá kemeake monó lili ali vegenáma nene monó numúini hize lí okimiaké kimisele ahuloaká noive.

¹¹ Nigivénega gihila, vegenalite golesa netá lilí nikoma áminaló kêmegetamo. Netá lamaná lili nikoma kêmegetatanize. Netá lamaná alilikí vita vegená nene Ómasilokatí utó a vegená niave. Golesa netá alilikí vitamoláa nene Ómasímini mogona ánígi hee liki ánígama vegená niave.

¹² Vegená mukilite Temeteliioni mogonamú nene lamanale likago gelekune. Itó monokú aí mogonáá mota utó onoimóma neve. Neza ámina oko ve lamaná noive loko hize lé omiaká nouve. Itó aikumú soza gakó losá amumó nene mota gelenane.

Vegená gekéini loketamó

* ^{1:1:} Apo 19:29; Lom 16:23; 1 Koli 1:14

¹³ Gakó lugáa mukí nemóza, luhuva gizoaká nagamitunú luhuva gizatove loko gelemuve.

¹⁴ Neza geitoka mota vitove loko gele minuve. Vo anitekugo legepatunú logele hagele oko gilitíize.

¹⁵ Ómasímini hulu nene geitoka mino moloko minino. Gigive gagave keza gekeka niligitave. Geza ámina oko ligive lagavetini gekéini noloketu gakó lo kemezo.

Zutani Luhuva

Nónohá kimike gizo kimi gakó

¹* Neza Zutana Izesu Kilistoni gelekelelää itó Zelusalega monó gizapa ve napa Zemusini agunala noutímina Ómasi ameteho monokú sele lo lekemeko agika lekemeaká noikú lekelémo moloko Izesu Kilistoni gizapaló lekelémo mola vegená lekelí luhuva imane gizo nolukumuve.

² Ómasímo agika hize lekemeaká itó hulu itó agika lekemeaká nene ale hutíl oleketo-loko voko minino.

Soza monó liaká a vetini mogonáinimú lo kimimó

³ Nigika lukumu vegenáise, neza lugutó vizeaká nene mukí vegenalita izá moloko aleaká nouni netakumú luhuva gizo likimitove loko amuza mulumóza, monó gele vegená gele alévolé oakalímini gakola Ómasímo lemeneimóma nene gopa okative loko lekeza mukitoka amuza miliki hozaváa alévolé iki nalikí lova sava itakumú gala vizeko luhuva gizo likimito gamenaváne alitokave.

⁴ Nenemú lo likimitoze, gililo. Ve lugáa monóini nomimó keza holutikú asuguná iki itiki niake Ómasi nene nasahilagi ve noikeve loko gumesisi mokoló hoza aleaká nouhakumú goní oletaminogo ive liki li gopa niake hamokó gizapa vele Guivahanite Izesu Kilistoni nene zivi hitivi imiaká niave. Keza nene vi tolova imi tolova atímini mogonáini gozapá nene monó gotolaú luhuva gizinamóma neve.

⁵* Ómasímo lihimáinigi vegená makó nene gozapá goní oketa gakó nene lekeza gili asú inamóza, áminama ale gosohá oko noluve. Isilae vegená mulusi Izipi mikasigutí gologí okimiake, alika aikumú gili alévolé ama vegená ahulokimikago, lapuluva amóma neve.

⁶ Itó ageló makó keza gizapa hozanini ahuliaké numuni apáini ahuliaké, keza gamena napaló lihimáini alita gamenámini ageváa iki minanigi alévolé seni nagá nenémo ale gikitoake límugusitunú asapú oketamó neve.

⁷* Itó Soto itó Gomola itó apá luga luga minoloko vitó mina vegená keza ámináminiki gopa iki gumesisi mokoló netá itó musi netá ali utó milikago, ló sipisi alévolé oko minoakalíminigú ahulokimikago miniki niave. Nene ánígokuko lelegesá ligitive loko némini oketamó nenazo, nenemú lakagatí molamino.

⁸ Itó soza monó liaká nia ve keza ámina iki vamó ánígunimole liki kugupetunú musi netá aliaká niave. Lá niake kugulizaki ve alivi galativi iki lapanáiki ve ageló nene ali mumusopa ziaká niave.

⁹* Agelolitini ve uvóipo Maikolí nene soza monó liaká vegitana minamive. Eza Moseni gonosiváamú éaho alitihe liki Sataki gakotunú lova ikasike pelesa alesa zesike, Satani gakó golesa lotanogo gilimó nene gena okago, Guivahanímo gahá giminogo ive lokogó lo amimóza,

¹⁰ soza monó liaká ve imane keza gili guni ama netakumú alivi letivi iki miniaká niave. Iza galagitana lili iake kugupémo amu heleaká noi

* **1:1:** Mat 13:55; Mak 6:3 * **1:5:** Gá 12:51; Nam 14:29-30 * **1:7:** Apí 19:1-24 * **1:9:** Tan 10:13,21, 12:1; Ali 12:7; Gapo 34:6; Zak 3:2

netakumú hanuva kigikatunú giliake, gili guni ina netalímo kelémo golesa okago lapuluva iaká niave.

11* Agae, keza miniki nana itamó neve. Keza Kaí vi gapogú viaká niave. Itó moni henokanonimú lagaváa ali miniki soza monó loaká ve Palámini gapogú viaká niave. Itó Kolá eza Ómasímo kelémo etó i gizapa vemú pelevesava zekamole loko lapuluva imómáminiki hokolizá iiki lapuluva inigave.

12 Lekeza monokumule liki ali nupa iki nosánetá ninató nene ve nenémináa keza iza nosánetakumú ahuu ahuu liki gihúme kovoza helemimó kezánimukó ali napa napa iki niave. Monónini nomi vegená keza nene gó zihe zihe liki límusi nene hanuva hepelímo se ahulokago voko golini zemoko haha oaká noimó, itó za makolímo nugunugu loko itekoko gihila zeaká gamenaló nene gihila zesá amímó nenéminiki niave. Ve nenémináa hili vamó keza asuto ahuloakató niave.

13 Age nagamí amuzavagi valahuká zeko gituhú galakalá golotuvagi utó oaká noive. Soza monó liaká ve nenémináatini golesa netáini avozavagi nenémini oko utó oaká noive. Sonohí lugáa keza atohimí ziaká niamó nenete gapo lelepizeminigave. Soza monó liaká ve sonohí nenémini iki nia ve nene límugusi lapalapava alévoletáa nene Ómasímo ale vavá oketonoimóma neve.

14* Atatokatí utó iliki va vegená 5 utó ikago, alika ve nampa 7 Enokú utó imó. Áisi nene ámina soza monó liaká ve utó itakumú láa loko limó: Gililo. Guivahanímo apazá ageló vegenala mulusi napa tausen mukí kelémoko anogo ive.

15 Lá okoko vegená mukitoka mogonáini lo utó moloko hokolizató vegená monónini nomimoláa keí hokolizáinímíni mogonáa apasoko lihimaváa kiminogo ive. Itó hokolizató ve monónini nomimó keza Ómasimú alivi letivi iki gakó golesa litamómáminí lihimaváa kiminogo ive loko limó neve.

16 Ve nenémináa keza géneka háneka lake gínikaha gánakaha iki kugupémo amu heleaká noi netá aliki nenegú minake kezánimú ali nupa napa iki nimina ve keza vegená lugáate netá matá limitave liki kegepoka liki giminiukú miliká aliká iaká niave.

Kagata alike gakó loketamó

17 Nigika lukumu vegenáise, lekeza gozapá Guivahanite Izesu Kilistoni aposolote li lekeme gakó giliki minalo.

18* Keza nene gamena napa alitokiko, gumesisi mokoló hozánimú amuza miliaká nia ve utó iiki monotinimú alivi letivi ilikitatave liki li kimiaká amóma neve.

19 Ve nenémináate hizi hoú liaká netá ali utó miliaká niave. Ómasímini Sikalahú mulúikú minamigo mikasigú mogonamú giliaká niave.

20 Lá iki niamóza, nigika lukumu vegenáise, lekeza apazá monotini gihiláa nenémo likigika loló okiko alévolé iliki itiki minalo. Šikalahlímo lekelémo vávani noiko numuna liki minalo.

21 Lá niiki Guivahanite Izesu Kilistó eza geha ze lekemeko alévolé oko mi-noaká netá lehizeleketatikumú ageva iki niminiki Ómasímo agika lekemeaká noikú minalo.

22 Monó alitupe alemitupe liake, ligitagani ivamoláamú likigika hizi kimilo.

* **1:11:** Apí 4:3-8; Nam 22:1-35; Nam 16:1-35 * **1:14:** Apí 5:18,21-24 * **1:18:** 2 Pit 3:3

23 Lokú hiliki haha inigi nia vegená kilími atiginá ilo. Itó vegená lugáamú likigika hizekiko kilími vatí ilo. Lá niiki keí golotuva mogonámo lekelitoka itekative liki lekehelele viziko gizapa iki minalo.

Ómasi agepoka limó

24 Itó hize lé olíkimikiko, akiki otiki amiki niko gonanalivagi lapanalaló lihimavatini minamitimó niko lokogolizagi lekelémo molati ve

25 Guivahanite Izesu Kilistoni hozatunú lugutó viziti ve Ómasi hamokó aitoka gonanalivagi lapaná itó alévolé zámuza itó gizapa oaká zámuza gozapá gamena nomító ale minamó itó itínagi ámina oko aleneimó itó minoloko voko mino lúaló moloko minanogo ive. Lamaná.

Alika Utó Iti Netakumú Zonini Lo Ami Gakó

Izesú ale vesamá oko li gakó

1 Imane nene Izesu Kilistó ale vesamá oko li gakó gamena hána vamiko netá matá utó itive loko Ómasímo lo mola gakó neve. Ómasímini gelekelé vegena zuha lo kimitive loko Izesuni lo amekago áisi agelolahini amiselekago, gelekelé veva Zonina lo nemeko nelepizekago,

2 néni nene Ómasímini gakó itó Izesu Kilistó lo utó i gakó nene ánigo guni oko gulutíminave loko gele minuke imaneló lo utó oko luhuva nogizuve.

3 Itó luhuva imane mukitó alévolé iti gamena mota alitokamó nenazo, netá matá alika utó iti gakó imane nene gatiki li kimita vegenaki itó gakó luhuva imane giliiki gili alita vegenaki Ómasímo nónohá zeketonoi vegená niave.

Ómasímini vegenala zuha mulusi 7 nónohá kimi gakó

4* Neza Zonina Asia mikasiuka Ómasímini vegenala zuha mulusi 7 niamó lekelí luhuva netá imane gizo nolukumuve. Ómasí goí oko mina ve itó itína hanuva noi ve itó atiginá oko anogo i velokatí itó zámuzáini 7 nei Sikalahú gonanalivagi siató noi velokatí

5* itó Izesu Kilistotokatí nene nasahilí itó hulu lekelitoka mino moloko minino. Izesú áisi nene Ómasímini gakó amegesa moloko avetó oaká ve itó ganá heleakakutí oti ve itó numutó namató vegenalitini kugulizaki véini uvóipo noive. Eza agika lemeaká noike ezáa golaniátunú lihima netategutí gologí oletake

6* Ómasí amelahini lehizemikugo minatave loko aí avogisaló guguni gizoaká ve lelémo molamó neve. Aitoka nene gonanalivagi itó zámuzalagi mino lúaló moloko minanogo ive. Lamaná.

7* Gilinahé. Límusi amupiló noago vegená mukitó kogómulatunú áníganigave. Itó galutá hize vegená kezagi áníganigave. Itó numutó namató vegená mukí keza aí ánígiki aí gakó gili alemakumú ive nama inigave. Ámina gakó nene lá oko utó ino. Lamaná.

8* Guivahani Ómasí osá amosá ve eza goí oko mina ve itó itína noi ve, itó anogo i ve áisi nene nénisigó apí oaká itó ale asú oaká amelahina nouve loko nolive.

Izesuni ameni ánígamó

9 Likigivetipina Zonina lekezagi Izesukumule loko miluma maluma itó Ómasímo gizapa olimiaká itó genavagi netá geheko legesó oko ote minoaká netá izá moloko alekunike minoaká nouni ve neza Ómasímini gakó itó Izesuni agulizá lo utó oko lo kumule liki Patamo mikasi pokolagú nimisili ahuli milikago minumóma neve.

10 Guivahanímini gamenaló Sategú nene Sikalahulímo nigikámini agómula ale panava zekago nemegesaloka gakó napa pikuli nenéminoko utó imó.

* **1:4:** Gá 3:14; Ali 4:5 * **1:5:** Isa 55:4; Age 89:27; Gá 1:6 * **1:6:** Ali 5:10 * **1:7:** Tan 7:13; Zon 19:34,37; Zak 12:10; Mat 24:30 * **1:8:** Ali 22:13

11 Utó oake láa loko noligo gulumó: Netá ániganogo animó nene pepagú luhuva gizokoko vegenáne zuha mulusi 7 kezaloka ahulokako Epeso numutoka itó Similina numutoka itó Pelagamu numutoka itó Tiatila numutoka itó Saliti numutoka itó Pilatelepi numutoka itó Lautisia numutoka vitize.

12 Itó neza gakó lo nimi vema ánígatove loko mino viliguke lamu liví 7 golitunú lilí amó nene ánígumó.

13 * Liví holulagú makó nego ánígumó nene ametamenía vegená lemata menigitana noigo gineganeváa hána agisaló leme minamó. Itó apinaloka holotani golitunú lilí amó nene minamó.

14 ** Itó gotola zopova mokoná nene límusigitana gizopa loko minamó, itó agómula luga luga nene ló guluma nenéminoko minamó.

15 * Itó agisa luga luga nene goli gehani lokú loake velu velu loaká noimó nenéminoko minamó. Itó anó lupa nene nagamí lisani sipisi nenéminoko sasa loko minamó.

16 Agizani zamagaloka nene sonohí 7 ale minamó. Itó agepagutí amítá makó nene amegesaloka itó agómulaloka sánevetaláa minamó nene leme mínago ánígumó. Itó agómula avogisa nene ho silikákéna nenémini oko lapana loko minamó.

17 * Ametamenía lá oko nego ánígokuke agisagú pou loko akumó. Heleaká nenéminoko akonougo agizani zamagaloka nene numupiló moloake láa loko lo nimimó: Geza gelegesá legemino. Goí moloko itó alika moloko

18 itó alévolé amelahina neza imane nouve. Gelenape. Neza hulumóza, goha otekuke mino lúaló moloko minanogo uve. Itó heleakalímini itó galémimi gahémimi kí néni alenouve.

19 Nenémú netá nániganimó nene itína utó noimoláa itó alika utó itimoláa nenegi luhuva gizo asú ozo.

20 Itó nigizani lamagalokagú sonohí 7-a itó lamu liví 7-a golitunú lilí ago áníganimó nene asuguná netalímini mogonáa lo gimitoze, gelezo. Sonohí 7 nene Ómasímini vegenala zuha mulusi 7 keí gizapa nikita ve ageló vegená nenéminiki niave. Itó lamu liví 7 nene monó gele vegená mulusi 7 nenetini avevezaha niave.

2

Epeso vegenatoka gakó ahulamó

1 Miní ameko láa loko lo nimimó: Epeso numutoka Ómasímini vegenala zuhatini ageló nenéminoko gizapa noketa vémo gakó láa loko luhuva gizo amekako lo kimitize: Sonohí 7 agizani zamagalokagú ale mina ve lamu liví 7 golitunú lilí amó nenémini agilikagú vogá ogá oaká noi ve áisi lekelikumú láa loko nolive:

2 Neza iki miliki iaká niamó nenémini mogonáa itó hozalinímini mogonáa goselé lekepelemigo legesó iki aliaká niamó nenémini mogonáa gelenouve. Lekelisi vegená golesa galasa ámigi mu kizapa iaká niave. Itó vegená lugáá lezagi aposolove liake soza likago sozáinímini mogonáa ali utó milikave.

3 Itó amuza miliki miniki nenikumule liki miluma malumámini amupiló goselé lekepelemigo hulu iki miniaká niave.

* **1:13:** Tan 7:13, 10:5 * **1:14:** Tan 7:9 * **1:14:** Tan 10:6 * **1:15:** Izi 1:24; 43:2 * **1:17:** Isa 44:6, 48:12; Ali 2:8, 22:13

4 Lá onoimóza, nénisi nene lekelikumú netá lá okomú gulugo golesa oaká noive. Lekeza gozapá likigika nimiaká amómámini oko gamena imanéa nene ma minamive.

5 Gozapá veletó ká mezane monokú lamaná iki mihina iki minamopa itína nene mota velehé limikave. Lekeza nenemú goha giliiki likigika ali viliiki gozapá gapoló goha lisiki vilo. Nenémini amikoma neza lekelitoka aniteko lamu livitini nene zeko liho ahulanogo uve.

6 Makó nene lekelikumú gulugo lamaná oaká noive. Lekeza Nikolaoni vegenala zuha keza netá iki miliki niamó nene mukahá kipiliaká niave. Itó neza ámina oko mukahá kepeleaká nouve.

7* Sikalahulímo Ómasímini vegenala zuha gakó nénika loko lo nokimimó nene lakagata koló imó neneta gili vevesiki gililo. Makó keza monokú alévolé iliki viki Satani lovaváa aviligitamoláa nene alévolé oko minoakalimini za gihila Ómasímini zazuhagú noimó nene natave loko gele kiminogo uve, loko limó.

Similina vegenatoka gakó ahulamó

8* Itó Similina numutoka Ómasímini vegenala zuhatini ageló nenémini oko gizapa noketa vémo gakó láa loko luhuva gizo amekako lo kimitize: Goí moloko itó alika moloko eza heleake oti vémo lekelikumú láa loko nolive:

9 Lekeza miluma malumámámini amupiló likilími-liki ahulilikimikago niamó itó gohogó vegená miniaká niamó nene gelenouve. Itó lekeza monolímimi henokanotiki vegená niave. Itó Zuta vegená noune liki liaká niamó nenete lekelikumú alivi letivi iaká niave. Nenegi gelenoumóza, keza soza likave. Zuta ve gihiláa negopa, Satani vegenala zuha niave.

10 Lekelitoka miluma maluma netá goha utó o likiminogo ive. Nenemú lekelegesá legemino. Gilinahe. Satá eza gimilukú moloaká netá utó o likimitive loko lekelitokatí lugáa nene nagá numukú kelémo molanogo ive. Lá okiko, gamena 10 oko novigo miluma giliki minanigave. Lekelisi monó nene ale gikitiki ali miniki hilikiko, gonanalivagi akilikitana oko alévolé oko minoaká nene ale hitoleketanogo uve.

11* Sikalahulímo Ómasímini vegenala zuha gakó nénika loko lo nokimimó nene lakagata koló imó neneta gili vevesiki gililo. Makó keza monokú alévolé iliki viki Satani lovaváa aviligitamoláa nene alika heleaká nenémo ma kelémo golesa palasa aminogo ive, loko limó.

Pelagamu vegenatoka gakó ahulamó

12 Itó Pelagamu numutoka Ómasímini vegenala zuhatini ageló nenémini oko gizapa noketa vémo gakó láa loko luhuva gizo amekako lo kimitize: Amitá makó amegesaloka itó agómulaloka sánevetaláa minamó alenei vémo lekelikumú láa loko nolive:

13 Lekeza nimina apalímimi mogonáa gelenouve. Neneló Satani vegenala zuha niave. Lekeza gakónéa itó nugulizánéa ale gikitiki ali miniaká niave. Itó neneló Satá minoko aleko oaká noító nene není gakó lo amutokó lo kemeaká i ve Atipasini apelego hili zupahé nenikumú gili alévolé amó nene ahulamamóma neve.

14* Itó neza lekelikumú koma gulugo golesa oaká noive. Lekelí numutoka vegená lugáa niamó keza Palámimi gapogú viaká niave. Palámo eza Palakani

nene Isilae vegená lo kimiti gakó lo amekago áisi gala vizekago soza ómai netalímini miguhala niki minake mokoló minake golesa amó.

¹⁵ Ámináminiki lekelí apatoka vegená lugáa keza Nikolaoni vegenala zuhatini mogona golesa aliake áminámini iaká niave.

¹⁶ Nenemú lekeza likigika ali viligalo. Némini amikoma neza lekelitoka galinali aniteko ámina vegená nene negepagutí nolimi amitatuń lova ale kiminogo uve.

^{17*} Sikalahulímo Ómasímini vegenala zuha nene gakó nénika loko lo nokimímo nene lakagata koló imó neneta gili vevesiki gilio. Makó keza monokú alévolé iliki viki Satani lovaváa aviligitamoláa nene halá ge mina mana nosá gihila kiminogo uve. Itó gehani mokoná nene etó etó oko kemekugo nenenló kugulizá luhuva gosohá miniko gehani amelaho ezagó ámina agulizá gilinogo ive, loko limó.

Tiatila vegenatoka gakó ahulamó

¹⁸ Itó Tiatila numutoka Ómasímini vegenala zuhatini ageló nenémini oko gizapa noketa vémo gakó láa loko luhuva gizo amekako lo kimitize: Ómasímini gipala agómuláa ló guluma nenéminoko noi ve agisáa goli gehani lokú loake velu velu loaká noimómáminoko noi vémo lekelikumú láa loko nolive:

¹⁹ Neza iki miliki iaká niatímini mogona itó likigika kimiaká niatímini mogona itó Ómasímú gili alévolé iki minatímini mogona itó nasahilí ikimiaká niatímini mogona itó genavagi netalímini agikagú hulu iki niámó nenémini mogonáa gelenouve. Itó gozapá amuza miliki lagasó minamó ítína nene goha itekave. Nenegi gelekuve.

^{20*} Itó neza lekelikumú gulugo láa oko koma golesa onoive. Lekelisi nene Isilae vetini agulizaki vená golesa Zesepelokitana mina vená ánigi ahuliaká niago áisi Ómasímini agepagutí gakó loaká vená nouve loake, vegenáne zuha gakó lo kemeaká ike kogoka vizeake gala vizekago, gumesisi mokoló hoza aleke soza ómai netalímini miguhala aliki niaká niave.

²¹ Itó agikáa ale viligative loko gamena molotumóza, áisi agikáa ale viligamike mokoló netala ahulanogo gelesá amive.

²² Gilinahe. Neza nenemú lokugo, avisí netá nene utó o amekiko ako minatize. Lá noike, áisigi mokoló mogona lili iaká niámó kezagítoka miluma maluma sipisi utó itize. Kigika ali viligiiki venalímini mokoló netala ahulamikoma, nenéminoko utó o kiminogo ive.

^{23*} Itó ámina venalímini izegipamú lokugo, golivagi netalímo utó oko kepele gesá itize. Némini okugo, numutó namató monó gilina vegenalite nenikumú kigikámini kagatámini mogonáá ánigo hehe loko áigonane liki gili guni iki gilitaze. Neza vegená mukí iki miliki itatímini avotigila apasoko kiminogo uve, loko limó.

²⁴ Itó Tiatila numutoka vegená lugáa lekeza ámina soza gakó gili ahuliaká niave. Lá niake, gevená lugáa keza Satani mogonatagana gele hee loko gelenoune liki liaká nia vetini gakó lekeza gilisá ama vegenalita gakó lo likimitoze, gilio. Neza genavagi netá makó nene lukumupiló molaminogo uve.

²⁵ Itó netá alinamó nene ali gikitiki ali minalo. Lá iliki niviko anititoze.

^{26*} Makó keza monokú alévolé iliki viki Satani lovaváa aviligiki neza

* **2:17:** Gá 16:14-15,33-34; Zon 6:48-50; Isa 62:2, 65:15 * **2:20:** 1 Kug 16:31; 2 Kug 9:22 * **2:23:**

oko moloko noumómáminiki iki miliki iliki viki ali lutigitamoláa nene nénișiamuza kemekugo haitopaitó mikasiuka vegenalitini ve uvóike lilí iki minikiko

27 aménehitokatíamuza alumó ámina oko kemekugo aeni hánusa ali minikiko gizapa ikitataze. Lá niiki nogosanitunú mikasi somo zeko lana oaká nouhá néminiki lá ikitanigave.

28 Itó sonohí gazakomé miní ameketanogo uve.

29 Sikalahulímo Ómasímini vegenala zuha gakó nénika loko lo nokimimó nene lakagata koló imó neneta gili vevesiki gililo.

3

Saliti vegenatoka gakó ahulamó

1 Miní ameko láa loko lo nimimó: Saliti numutoka Ómasímini vegenala zuhatini ageló néminoko gizapa noketa vémo gakó láa loko luhuva gizo amekako lo kimitize: Ómasímini Sikalahú zámuzu 7 alenei Sikalahú itó sonohí 7 alenei ve néremo lekelikumú láa loko lokave: Neza iki miliki atímíni mogonáa gelenouve. Vegená keza ánígolikimikago lokogómulagi niamó geleneimóza, likigikáa nene hele vimó niave.

2 Nenemú lekelisi nene mómoká iki otiiki gosohá lugáa hilinigi niamó nene kigikáa emane ale kii likitalo. Neza Ómasímini avogisaló iki miliki iaká niago ánígumó nene hehe lamive.

3 * Lekeza netá matá li likimikago gilinamó nenema alími gosohá iki ali gikitiki miniki likigika ali viligalo. Ali viligiki gizapa iki minamitamó nene, lova ale likiminogo uve. Gamena nomulumó nene lekeza gelemiko gumináló ve néminoko litá oko anitinogo uve.

4 Saliti numutoka nene vegená lugáate gineganéini goihá zisá amave. Vegená némináate miniki gineganéini mokoná ali miniki nezagi mihina iki miniki aliki inigave. Lekeza néminí ita avotigila iki niave.

5 * Makó keza monokú alévolé iliki viki Satani lovaváa avilitamó nenete gineganéini mokoná lamaná kemekugo ali luhanigave. Itó kugulizá nene alévolé kemetameki nia vegenalitini kugulizáini giza pukugutí gilato ahulaminogó uve. Neza kugulizá nene aménehini avogisaló itó ageló vegenalitini kovogisaló lo utó molanogo uve.

6 Sikalahulímo Ómasímini vegenala zuha gakó nénika loko lo nokimimó nene lakagata koló imó neneta gili vevesiki gililo.

Pilatelepia vegenatoka gakó ahulamó

7 * Itó Pilatelepia numutoka Ómasímini vegenala zuhatini ageló néminí oko gizapa noketa vémo gakó láa loko luhuva gizo amekako lo kimitize: Apazá noi ve itó lokago alévolé oaká noi vémo agulizaki ve Tevití gizapa oko mina apalímini kií ale minake gahe segeneító ve makolímo voko ale lí aminogo i ve eza ale lí noító ve makolímo gahe segeminogo i vémo lekelikumú láa loko nolive:

8 Neza iki miliki iaká niatímíni mogonáa gelenouve. Gilinahe. Neza lokovogisaló gahe makó segelikimikugo ve makolímo gahe geminogo ive. Lekeza amuzatini lagasóisí nemóza gopa nene gakóné ali guni iki ali minake nugulizá ahulamamó nene gelenouve.

* **3:3:** Mat 24:43-44; Luk 12:39-40; Ali 16:15 * **3:5:** Ali 20:12; Mat 10:32; Luk 12:8 * **3:7:** Isa 22:22

9 * Gilinahe. Satani mulusigutí vegená lugáá keza Zuta vegená noune liki liaká niamó nenete soza liake Zuta ve gihiláá ma minamave. Neza keí nene gala vizekugo lekelitoka anitiki kalapusa hizi likiminigave. Lá niiki lekelikumú nene nigika lekemenou vegená niave liki gilinigave.

10 Lekeza goselekaselé amiki negeva minatave loko loleketonou gakónéa nene ali guni iki ali minamó nenazo, nenemú gimíkú moloaká gamena nene numutó namató vegenatoka zeloko vitimóza, lekelitoka zeloko vokative loko nénisi nene vegegisa hizeleketoko alata mololeketanogo uve.

11 Neza litá oko anitinogó uve. Nenemú makolímo gonanalivagi akilitini akúvasokative liki netá matá alinamó nene ale gikitiki ali minalo.

12 * Makó keza monokú alévolé iliki viki Satani lovaváá aviligitamoláa nene Ómasinémini zavusavegú lapusa nenéminoko hizekimikugo keza nenegú alévolé iki miniki goha hetoka ma olíí lememinigave. Itó kumupiló Ómasinémini agulizá luhuva, itó Ómasinémini apá nene Zelusale apá gosohá okulumakutí Ómasilokatí limiti apalímini agulizá itó neza nugulizá goso-halímini luhuva nene kumupiló gizanogo uve.

13 Sikalahulímo Ómasímini vegenala zuha gakó nénika loko lo nokimimó nene lakagata koló imó neneta gili vevesiki gililo.

Lautisia vegenatoka gakó ahulamó

14 Itó Lautisia numutoka Ómasímini vegenala zuhatini ageló nenémini oko gizapa noketa vémo gakó láá loko luhuva gizo amekako lo kimitize: Gakó gihiláá loakálímini mogonáá noi ve itó gakó lokago alévolé oaká noi ve Ómasilokatí netá utó imó nenémini mogonáá noi vémo lekelikumú láá loko nolive:

15 Lekeza iki miliki iaká niatímíni mogonáá gelenouve. Lekeza monoku-mule liki amuza miliki ali mumusí isá amave, itó amuza miliki ali geha zi asú amamoláa nene gelenouve. Geha zeko minatune likima nene geha zikigó minatanazo.

16 Lekeza vogalatikú koma mumusí otigí onoimó nianazo, negepagutí musi velelikimikugo liminigave.

17 Lekeza lekezatinimú láá liki liaká niave: Ligikámini minumuni mukí lelitoka neve. Leza nana netá ma vitagá oaká noune. Netá matakumú makó vitagá osá amune liki liaká niamóza, lekeza keé lamamó mogonalini gelemake ve ámemená gohogó vegená likatiká ivamó zapakó miniaká niave. Nenemagi nene lekeza gili hee liki gilisá amave.

18 Nenemú lakagata aleko lo lekemekugo gililo. Lekeza nenitokatí goli gehani vové avetoko minamó meinaváá iteko minamó nene meina hizikiki, lamaná henotiki vegená minanigave. Itó ginégane mokoná meina hiziki ali luhiiki, lukugupe zapakó minatímíni avoza ali hitataze. Itó lokogómulámini netupaváá meinava hiziiki lokogómulaloka hilikiko goloutatize.

19 * Neza nigika kemeaká nou vegená nene aséito zeko kelémo hehe loaká noumó nenazo, nenemú lekeza amuza miliki likigika ali viligalo.

20 Gilinahe. Neza likigikámini gahe amegesaloka otenouke hoko-hoko loaká nouve. Makó keza gakóne imane giliiki gahe siginimikiko, keí numukú itinogo uve. Iteko kezagí noko minanogo une.

* **3:9:** Isa 49:23, 60:14 * **3:12:** Ali 21:2; Isa 62:2, 65:15 * **3:19:** Hip 12:6

21 Neza amuza moloko Satani lovaváa avilegekuke, améneho nene gonanalivagi siató minoaká noitó minoaká nouve. Makó keza monokú alévolé iliki viki Satani lovaváa aviligitamoláa nene áminámini oko nénisi nene alesa molokugo, není gonanalivagi siató nougo, namatoka makó minanigave.

22 Sikalahulímo Ómasímini vegenala zuha gakó nénika loko lo nokimímó nene lakagata koló imó neneta gili vevesiki gililo.

4

Okulumakú Ómasi agepoka liaká nia gakó

1 Neza netá nenéminoko ánígokuke, okulumatoka ánígumó nene gahe makó koló onoigo ánígumó. Ánígokugo nene gakó ganá utó igo gulumó nene, pikuli nenéminoko utó ike láá loko lo nimimó: Geza imaneló iteko noako netá matá alika utó itimó nene gelepizekugo ánígatanize.

2 Loko noli agepagi Sikalahulímo nigikáne ale viligokago okulumakú gonanalivagi siá makó minató ve makó noigo ánígumó.

3 * Eza ametamenía meinava iteko mina gehani agulizá zasipa gehani nenémini oko, itó koniliiani gehani golohá nenéminoko lapetapé oko minamó. Lolovaloka nene hugepavalámo ametamenía nene gihisigó nenéminoko lúvize távize oko nego ánígumó.

4 Itó gonanalivagi siá napa hizi vigiki nene gonanalivagi siá lugáa 24 nego ánígumó. Siá nenémini amupiló nene monokú olotiva ve 24 keza gineganéini mokonakó ali luhiake minilikí vamó, itó gotító nene akilí gonanalivagi golitunú lilií amó nene hitinago ánígumó.

5 * Itó gonanalivagi siá napalotí nene gó melevezá oko gó pou pou loko anó sipisivagi minamó. Itó gonanalivagi siá avogisaloka nene ló liví 7 loko minamó nene Ómasímini Sikalahú zámuzala 7 alenei Sikalahulímini liví minamó.

6 ** Itó gonanalivagi holomámini avogisaloka nene kalasi lagáminitunú lilií amó nene age nagamikitana oko minake gesá oko minamó.

Itó gonanalivagi siá napa agilika luga luga nene netá alévolé losive losive minilikí vi minamó. Keza kogómulaloka itó kemegesaloka kogómula vaí oko minamó.

7 Makó eza laizon akohú gala gelevimó, makó nene pulumaká akaleváagitana ametameki, makó eza avogisá vegená ametamenigi, itó makó eza nama luipá agokéna ale talalo minamó nenémini ametameki minamó.

8 * Netá alévoletá losive losive nene kogokéna 6, itó kogokéna velelápá itó amuná kogómula minamokó, itó límugusi zeko gó loko sele liki láá liki nama liaká niave:

Guivahani Ómasi zámuzala ale asú oko aleaká noi ve eza goí oko mina ve, itó itína hanuva noi ve itó minoko anogo noi ve etó oko keké vizeko noive.

9 Itó alévolé netá losive losive keza gonanalivagi siató mino lúaló moloko minoaká noi ve alévolé oko minoaká amelahini agulizáláa ali otiki agepoka liki kogoliza vizi amiki niago,

* **4:3:** Izi 1:26-28 * **4:5:** Ali 8:5; 11:19; 16:18; 1:4 * **4:6:** Izi 1:22 * **4:6:** Izi 1:5-10, 10:14 * **4:8:** Isa 6:2-3; Izi 1:18, 10:12

10 monokú olotiva ve 24 keza gonanalivagi siá minoaká noitoka alévolé oko minoaká amelahini amatoka gupá zi ameke agulizá ali otiki siámámini amakuka gonanalivagi akilíni nene akúvasi nimilake láa liki liaká niave:

11 Guivahani Ómasile géisi nene netá mukí ale utó molanimó, itó geí gakotó netá matá utó o asú oake minoaká noinazo, vegenalita gonanalivagi gugulizató itó zámuzakaló ali otiki ali utó iko minati avotigila oko noane.

5

Ómasímini sipsip akalevámo pepa asaivagi alimó

1 * Itó gonanalivagi siató minoaká noi vémo agizani zamagaloka ali gakina pepa makó aleneigo ánígumó. Itó ámina pepa nene amegesaloka itó agómulaloka luhuva nego ánígumó. Itó huma 7-atunú ali gilitiki lilí amó.

2 Itó amuzavagi ageló makó ánígumó áisi nene gakó napagutí láa loko limó: Hí ve hehe loko minatímo pepa nenémini humaváa akágá iko lamaná itímó neve.

3 Loko lokago, okulumakukahe itó mikasiukahe itó mikasi agikagú emanehe makolímo oteko pepa nene humaváa akágá okoko ánígamítimó imó.

4 Lá okago, pepa nene akágá okoko ánígati avotigila oko mina ve makó nomigo, mulúnegú golesa okago ive umó.

5 * Ive nougo, monokú olotiva ve makolímo láa loko lo nimimó: Ive amo. Ánígozo. Zutani mulusigutí akohú gala laizonigitana mina ve eza Tevitini agapilamola nenémo Satani lovaváa avilegeake pepa nene huma 7-atunú ali lakolí amó nene akágá itímó neve.

6 * Loko noligo, neza nogómulta ahulo moloko gonanalivagi siá minató netá alévoletláa losive losive itó monokú olotiva ve keí holúikú sipsip iza akaleva makó apilivi givi amó ametameki nego ánígumó. Sipivaláa 7 minamó, itó agómuláa ámina oko 7 minamó nene Ómasímini zámuzala 7 alenei Sikalahú nene amiselekago, mikisa nekisa vokisauka minoloko vonoimó aí avevezahaló minamó.

7 Itó akalevámo vike gonanalivagi siató mina vemámini agizani zamagalokatí pepa asaivagi nene alimó.

8 * Pepa asaivagi alekago, alévolé oko minoaká netá losive losive itó monokú olotiva ve 24 keza sipsip iza akalevamámini amakuka gupá zi amemó. Lá iake, keza nama litive liki ziaká netá napa nene ali minake, itó lape makó nene golitunú lilí amoki nene kigizakú etó etó iki ali minamó. Anuvavagi paulá Ómasiloka gizo ameakakumú nene lapegu vaí o minamó nenémo monó gele vegenalite Ómasiloka liaká niatímini avevezaha neve.

9 * Nama gosohá makó láa liki lamó neve:
Geza gipilikago helenike géi golanikatunú vegená mukí nene
mukító nagaki itó mukító konoki itó mukító kugupegi itó mukító
mikasigú vegená

meina hizeko gologí okimikanike Ómasi noitoka kelémo molokanimole.

10 * Ómasi ametehini gelekelé itatave loko
aí avogisaló guguni gizoaká ve kelémo molanimó neve.

* 5:1: Izi 2:9-10; Isa 29:11 * 5:5: Apí 29:9; Isa 11:1,10 * 5:6: Isa 53:7; Zak 4:10 * 5:8: Age 141:2

* 5:9: Age 33:3, 98:1 * 5:10: Gá 19:6; Ali 1:6

Kelémo molokako mikasiuka gizapa iki miniki kugulizaki minanigave. Lá onoinazo, pepa humaváa akagá itani avotigila oko noane, liki lamóma neve.

11 * Goha nogómula ahulo moloko ánigumó nene ageló mukilitini kegepagutí gakó mukí gulumó. Nampáini nene 100 milioni itó tausen tausen minamó. Keza nene gonanalivagi holomaló itó netá alévolé oko minoaká netá losive losive itó monokú olotiva ve minatoka hizi vego iki minake,

12 gakó napagutí nama láa liki lamó:

Sipsip akaleva imane goí iki apili hilinamó nenémo
zámusa itó henoni itó gele vevesoaká itó amuza aliti lelegító itó vegená
mukilite agepoka liki aí agulizá ali otikiko,
aí lapaná utó oko minati avotigila oko noive.

13 Liki likago, neza mukí okulumakuka ne netá itó mikasigú ne netá itó mikasi emane amunagú ne netá itó age nagamí agikagú ne netá mikasi haitopaitokú nia netá nenete lá liki nama nilago gulumó:

Gonanalivagi siató minoaká noi veló itó sipsip akaleva noitoka
kegepoka itó kugulizá ale oteáká itó keí lapaná utó oaká itó zámusa
keítoka minoloko voko mino lúaló moloko minanogo ive.

14 Liki likago, netá alévolé oko minoaká netá losive losive keza konotó
alki lamanale likago, monokú olotiva ve keza kalapusa hizi amiki gupá zi
amemó.

6

Sipsip akalevámo pepa humaváa 6 akagá imó

1 Itó neza nogómula ahulo moloko ánigumó nene, sipsip akalevámo pepa humaváa 7-agutí makó nene akagá imó. Akagá noigo, alévolé oko minoaká netá 4 keitokatí makó eza gó galaketoko sele loko limó: Ano.

2 * Loko lokago, ánigumó nene, hosi iza mokoná makó ago, amupiló ve makó minamó eza gimisiva itó gonanalivagi akilí ali amikago aleneike lovagú netá avilegemo vike netá mukí aviliginogo novigo ánigumó.

3 Itó sipsip akaleva eza pepa humaváa nampa 2 nene akagá okago, alévolé
oko minoaká netá nampa 2 áisi ano loko sele lokago,

4 * hosi iza golohá makó utó oake amó. Amupiló nene ve makó minamó
nenémo mikasigú hulu ale olové okimikiko, vegená keza eza apele ahulokiko
eza apele ahulokiko itave loko nenémini zámusa amemó. Itó lova napa ale utó
itimó nenémini zámusa itó sopolو hána nenegi amikago ale minamó.

5 * Itó sipsip akaleva nenémo pepa humaváa nampa 3 nene akagá okago,
netá alévolé oko minoaká nampa 3 áisi ano loko sele lokago, neza nogómula
ahulo moloko ánigumó. Nánigugo, hosi iza anupá makó amó. Ve makó
amupiló minamó eza sigeli makó ale minamó.

6 Itó netá alévolé oko minoaká keí holúikutí vegená konokitana utó oake,
láa loko ligo gulumó: Mukí netalímini meinava mota iteko nenazo, laisi kapu
4 nenémini meinaváa 2 kina, itó polisi kapu 12 nenémini meinaváa ámina oko
nemóza, olivi nogoza itó vain nagá nene vauna hizemilo loko limó.

7 Itó sipsip akaleva nenémo pepa humaváa nampa 4 nene akagá igo, alévolé
oko minoaká netá nampa 4 nenémo ano loko sele lokago,

⁸* nogómula ahulo moloko nánigugo, hosí iza makó agupéa goni agupe lamó nene ago, ánigumó. Itó amupiló mina vémini agulizá nene heleakalímo itó amegesaló ámegetoko a vémini agulizá nene galegú lemeakalímo, itó mikasigú vegená lakani losive losive hizi hoú liki niago, mulusi makó nene lova itó gaúna napa itó vegená mukitó kivise gesá oaká netá itó zauka gaha akohú netá nene utó iki gevená lapuluva ikitatave loko nerémini zámuza kemekago ali minasimó.

⁹ Itó sipsip akaleva nenémo pepa humaváa nampa 5 akagá okago ánigumó nene Ómasímini gakó ali minake li hutilí akumule liki kipili hele vegenalitini kemeni nene guguni gizoaká itámini sepekuka niago, ánigumó.

¹⁰ Keza gakó gamoga giki sele lake láa liki lamó: Apazá Guiyahani gihila geza gamena napama ale háná okane. Geza golanitíemini lihima monóni nomi vegenatoka noimó nene nanahé apasatane.

¹¹ Liki likago, mokoná gó háná etó etó iki kimi asú iake, láa liki li kememó: Gelekelé izegipa likigive lugáá ámina iki kipili hilitamó keí nampáini vaí itító neze, lakavasú viziki ageva kománetá minalo liki lamó.

¹²* Itó netá lá oko ánigumó: Sipsip akaleva eza pepa humaváa nampa 6 nene akagá okago, imimá napa imó. Lá noigo, ho nene gónupa o asú oake, ikani nene golani loló imó.

¹³* Itó sonohí keza hepelímo naligo gohuna zámini gihila legemó zimómáminiki okulumatotaká mikasiuka ligimí zizi amó.

¹⁴* Itó okulumá eza nene usí pepa likeaká nouhámámini oko vímegeake, voko haha imó. Itó agoka itó mikasi pokola keza mukitó numuni apáini ahuliake haitotoka víká víká amó.

¹⁵* Nenéminoko utó noigo, mikasigú gamani ve napa itó gizapa ve itó amitini ve napa itó heníoki ve itó amuza ve itó vegená lugáá mukitoka iti minamó itó limi minamó gelekelé vegená itó hanuva vegená keza geha mulikú itó agokaló gehani napámini amegesauka halá giki minamó.

¹⁶* Lá iki niake, agokagi itó gehani napagi sele li kemeke láa liki lamó: Limiki zi hitilitamave. Gonanalivagi siató minoaká noi vémini avogisaló utó o amekatunize. Itó sipsip akalevamámo mukahá olimikatize.

¹⁷* Mukaháinímini gamena napa utó okanazo, avogisaló éaho alévolé oko minatimó neve, liki lamó.

7

Isilae vegená 144 tausen kovogisaló Ómasímini anosa minamó

¹* Lá okago, neza nogómula ahulo moloko ageló losive losive ánigumó. Keza mikasi nekisa losive losiveló miniliki vinago ánigumó. Mikasiló hepé losive losive ali minamó nene mikasiukahe itó age nagamikú ahe itó veletoka hepé makó alemitive liki ali minamó.

² Itó ho noititokatí ageló makó noitigo ánigumó. Eza alévolé oko minoaká Ómasímini anosa ale minamó. Áisi nene ageló losive losivema mikasiuka itó age nagamikuka vauna alita zámuza kemeneimoláa sele lo kimike láa loko limó:

* **6:8:** Izi 14:21 * **6:12:** Ali 11:13; ZOE 2:10,31 * **6:13:** Isa 34:4 * **6:14:** Ali 16:20 * **6:15:** Isa 2:19-21 * **6:16:** Hos 10:8; Luk 23:30 * **6:17:** ZOE 2:11; Mal 3:2 * **7:1:** Zel 49:36; Tan 7:2

^{3 *} Lekeza mikasiuka itó age nagamikuka itó veletoka litá iki vauna hizemilo. Leza goí oko Ómasímini vegenala zuhatini golihító nene anosa molokimikuko neze.

⁴ Loko lokago, vegená golihító Ómasímini anosa minamó keí nampáinimú lo nemekago lá oko gulumó: Isilae vegenalitini mulusi haitopaitó mukikutí 144 tausen nene kovogisaló Ómasímini anosa minamó.

⁵ Zutani mulusigutí 12 tausen nene anosavagi minamó. Lupeni mulusigutí 12 tausen, Kateni mulusigutí 12 tausen,

⁶ Aseloni mulusigutí ámina oko 12 tausen, Napatalini mulusigutí 12 tausen, Manaseni mulusigutí 12 tausen,

⁷ Simeoni mulusigutí 12 tausen, Livaini mulusigutí 12 tausen, Isakaloni mulusigutí 12 tausen,

⁸ Zepuloni mulusigutí 12 tausen, Zoseheni mulusigutí ámina oko 12 tausen, Pezamini mulusigutí ámina oko 12 tausen nenémináate Ómasímini anosa nene golihító minamó.

Haitopaitó mikasiukatí mulusi napa napa mina gakó

⁹ Lá okago, nogómula ahulo moloko ánigumó nene, numutó namatotí vegená nene mukító kugupegi itó mukí nagaki itó mukító konoki vegená mulusi napa napa nene ve makolímo gatoko gato asú amosálímini keza gonanalivagi sialímimi avogisaló itó sipsip iza akalevámíni amatoka niago, ánigumó. Keza nene gineganéini mokoná ali luhiake itó geké litanigi kigizakú nene kokonasi agila letiki ali minamó.

¹⁰ Ali minake, gakó napagutí láa liki lamó: Lugutó vizeaká netá nene gonanalivagi siató minoaká noi Ómasile aitokatí itó sipsip akaleva aitokatí neve.

¹¹ Itó ageló mukí itó monokú olotiva ve itó alévolé oko minoaká netá losive losive keza gonanalivagi siá alími vigiake gonanalivagi sialímimi amatoka kogoka hizinake Ómasímini agulizá ali oteke láa liki lamó:

¹² Lamaná. Nónohá zeaká itó aí lapaná itó gele veverosoaká itó agepoka loo loo itó agulizaláá ale oteaká itó helisa itó amuza nene Ómasileloka minoloko voko mino lúaló moloko minanogo ive. Lamaná.

¹³ Liki li nahulago, monokú olotiva ve makolímo loká onetake limó: Gine-gane mokonaki ali luhiaká ni/moláa nene éage niave, itó hitokatí niave.

^{14 *} Loko loká onimikago, gakó láa loko lo amumó: Gugulizaki venemaka, géisi gelenanimole. Lo nememané. Loko lokugo, eza limó: Keza gopoguni sipsi molokimiakalímimi agikagutí kegepagi amóma nena. Gineganéini nene sipsip akalevámímini golanitunú nagamí ziki ali mokoná linamole.

¹⁵ Nenémú keza Ómasímini gonanalivagi siá amatoka mini ki únaká neteká monó zugusavéagú gelekelé itiki miniaká niave. Lá niago, gonanalivagi siató minoaká noi vemámo gizapa oketoko minanogo ive.

^{16 *} Lá noiko, nosánetakumú gaúnáini ma heleminigave, itó nagamikumú kiviseminogo ive. Itó homámohe itó netá makolímo kugupéini loko vímegeminogo ive.

^{17 *} Siá holuláaló sipsip akaleva noimó áisi nene gizapa venini minanogo ive. Lá oko minova minova oakalímimi nagamí hinipinímaló kelémo-loko

* **7:3:** Izi 9:4,6 * **7:14:** Tan 12:1; Mat 24:21; Mak 13:19 * **7:16:** Isa 49:10 * **7:17:** Age 23:2; Isa 25:8

vinogo ive. Lá okiko, Ómasímo kogómula nogozáa gilato asú inogo ive, loko lo nimimó.

8

Pepa humaváa nampa 7 akagá imó

¹ Lá okago, sipsip akaleva eza pepa humaváa nampa 7 akagá okago, okulumakú mukí netá matá mómoká iki konó milamago, hapu aowa oko vimó.

² Nene asú noigo ageló 7 Ómasímini amatoka oti miniaká niamó nene pikuli 7 kemekago ali minimini inago ánígumó.

³* Itó ageló makolímo lape makó golitunú lilí amó nene aleloko ake, guguni gizoaká ita amatoka ote minamó. Neneloka anuvavagi paulá lamaná mukí nene Ómasiloka gizative liki alimi amikago, gonanalivagi siá avogisaloka nene guguni gizoaká ita golitunú lilí a netalímini amupiló anuvavagi paulá gizoake monó gele vegenalite Ómasiloka numuna liaká niamó nelénó miní ameketamó.

⁴ Lá noigo, agelolímini agizakutí lokila anuvavagi nenémo monó gele vegená kéisi Ómasiloka liaká nia netató nene miní amekimikago, Ómasiloka itimó.

⁵* Ageló eza némini oake, guguni gizoaká italotí ló luluhá aleake, lapevagú molo vaí oake, mikasigú ale tulu lo ahulokago limimó. Nolimigo, gó galaké galaké anó sipisigi nolike, gó melezá oko nominago, imimá napa imó.

Ageló 7 keza pikuli hahu lamó

⁶ Lá noigo, ageló 7 keza pikuli ali minamó nenete pikuli hahu linigi ali vatí iaka minamó.

⁷* Lá okago, ageló nampa 1 áisi nene pikuli hahu lokago, golini óvisopa gihilagi loki itó golanigi ali gopa amó nenémo mikasigú zimó. Nozigo, mikasiuка lakani hize hoú lo losive makole noigo, lakani makokú nene za mukí lolímó lamó, itó lakani lugáa nene gihisi mukí lolímó lo asú imó.

⁸ Itó ageló nampa 2 áisi pikuli hahu lokago, agoka napagitana netá ló gulumavagi age nagamikú apate-loko limimó. Lemekago, age nagamí hize hoú lo losive makole okago, makokú nene golani loló imó.

⁹ Lá okago, age nagamikú haitopaitó netá hize hoú lo losive makole okago, makokú mina netá matá nene hili gesá amó, itó nagamikú sipi mukí nene atigimi vámó.

¹⁰* Itó ageló nampa 3 áisi pikuli hahu lokago, sonohí napa makó nene okulumakutí atoheake limimó nene, liví nenéminoko guluma oake nagamí lugáagú limimó.

¹¹* Sonohí agulizaláa nene ekesalagive. Nagamí nene hize hoú lo losive makole okago, makó nene ekesá o asú okago, ámina nagamí na vegená nene ekesalámo kepelekago, mukí hili gesá amó.

¹²* Hili gesá niago, ageló nampa 4 áisi nene pikuli hahu lokago, ho ikani itó sonohí netenini lapanáini hize hoú lo losive makole okago, makolímini lapaná nene asú imó. Lapanáini koma noigo, gó soza moloko gó lamó. Itó holugú ámina oko ikani sonohí soza moloko lapaná lomo vimó.

* **8:3:** Gá 30:1-3 * **8:5:** Liv 16:12; Gá 19:16; Ali 11:19, 16:18 * **8:7:** Gá 9:23-25; Izi 38:22 * **8:10:**
Isa 14:12 * **8:11:** Zel 9:15 * **8:12:** Isa 13:10; Izi 32:7; Zoe 2:10, 3:15

13 Itó neza nogómula ahuloko nama gosúveha napa makó ánígumó. Ánígumó nene ká vozane veletó gasa geko minake, gakó napa like láa loko sele límō: Agae, agae, agae. Ageló losive makoletini pikuli ha neve. Nene hahu litató nene mikasigú vegená keza nanámini itamó neve loko ligo, gulumó.

9

1 Itó ageló nampa 5 áisi nene pikuli hahu lokago, ageló makó sonohikitana minamó eza okulumatokatí lutegeake, mikasigú nolimigo ánígumó. Itó aseva nomi galémini gaheváá sigitive loko nenémini kií amikago ale minamó.

2* Itó galémini gaheva nosigigo, lokila napa itimó nene gihisi vitú okuko lokila iteaká noimó nenéminoko galegutí itimó. Lokilámo nene iteko ho agomulaló itó vogalaló ká mezane se hitamó.

3* Ze nohitago, lokilámini agikagutí ganú nene mikasigú lemémó. Kegepáa nene gámukelímini agepáa nenémini oko minamó.

4* Keza mikasigú gihisi zazuha itó zagila tagila nene vauna alemitave loko lo hukoketamó. Ómasímini anosa kovogisáló minami vegená nene lova ali kimitave loko loketamó.

5 Itó kipilikiko hilitave loko nomi. Hanuva ikani ligizani lugaloka asú igo nenémini agikagú akohú nikipilikó, miluma maluma giliki minatave loko gele kimimó. Gámukelímo lepelekago, miluma maluma geleaká nounimó nenéminiki miluma gilitave loko gele kimimó.

6* Ámina gamenaló vegená keza lá iti netakumú hilitune liki hilita gapomú vitagá itaha itaha, heleminigave. Heleaká nene sele litaha litaha, gopa ma heleminigave.

7* Itó ganúmate hosi iza kemetamenigi minamó nene gala ve keza lovaló vinigi hosi iza ali vavá ikimiaké aliki viaká nia kemetamenigi minake gotóitoka akilí golitunú lilí amó gele vi netá nene minamó. Itó kovogisáa nene vegená logoka legepagitana,

8* itó zopováini nene hána hána nene vená lugáatini zopovagitana, itó kegepáa nene laizon akohú galámini agepagitana,

9* itó apítoka nene sioti aenitunú lilí amó gelevi netá minago, ánígumó. Itó kogokénagutí anó molamó nene hosi iza mukí keza lovaló vinigi gelelehá oaká kaligi ololu liake konó napa miliaká niamó nenémini oko minamó.

10 Kagasáa gámukelímini agasagitana oko, kegepáa nene kagasauka minamó. Nenetunú vegená ikani ligizani lugaloka asú igo nenémini agikagú akohú kipilikí minanigave.

11 Itó ageló makó eza aseva nomi galeló gizapa oaká noimó nenémo kugulizaki venini noive, agulizá nene Hipulu vegenalitini gakokutí Apaton, itó Kiliki vegenalitini gakokutí Apolion, itó lelí gakokutí nene vauna aleakató ve.

12 Agae, genavagi miluma netá makó nene asú okamóza, lositá nene hanuva neve, loko límō.

13* Lá okago, ageló nampa 6 áisi nene pikuli hahu lokago, guguni gizoaká ita golitunú lilí amó Ómasímini avogisáló minoaká nemómámini sipiva losive losive nenenetó ve makolímimi anó lupa makolímo iteake,

* **9:2:** Apí 19:28 * **9:3:** Gá 10:12-15 * **9:4:** Izi 9:4 * **9:6:** Hio 3:21; Zel 8:3 * **9:7:** Zoe 2:4
 * **9:8:** Zoe 1:6 * **9:9:** Zoe 2:5 * **9:13:** Gá 30:1-3

14 ageló nampa 6 nene láá loko lo amimó: Zupaletis nagamí napaló ageló losive losive nagá zekimikamómá nene gologí oketozo.

15 Loko lokago, ageló losive losive keza ámina kilisimasiló itó ámina ikató ámina gamenaló itó ámina aowa ahaváisí nene mikasigú vegená hizi hoú i losive makole iiki niko, mulusi makó nene kipili gesá itave loko kegeva iki minamoláa nene gologí oketamó.

16 Itó ami ve hosí izatini kemegesaló mina vetini napáini 200 milionive liki lago, gulumó.

17 Vegenaki hosi izagi keí kemetameni nene, neza vamokitana ángumó nene lá iki minamó: Apítoka siotigitana netá aenitunú lilí amó nene golohá itó gumugumusí itó gihuká nenémini iki luhiki minamó. Itó hosi izatini gotóni nene laizon akohú galámimi gotola nenéminoko noigo, kegepagutí nene loki itó lokilagi itó gihuká gehani ló nolago limimó.

18 Hosi izámini agepagutí nene loki itó lokilagi itó gihuká gehani ló nolago limimó nenémo mikasiuka vegená hize hoú lo losive makole oake noigo, mulusi makó nene kepele gesá imó.

19 Ámina hosi izatini zámuzáini nene kegepagú itó kagasaroká minamó. Kagasa nene gosihá nenéminoko gotónigi noigo, nenetunú vegená miluma netá lilí i kimiaká niave.

20* Itó ámina vegená mukitoka kivise asú iti netalímó vegená lugáa kepele helemo novigo, lugáa asenini zeketamoláa keza kigikáa ali viligamake, keza soza netá lilí iake ali mini mini amó nene ali ahulamamó. Soza ómai netá golutunú itó silivatunú itó aenitunú itó gehanitunú itó zatunú lilí a netá ángoko geleká nomimoláa itó gapo moloko vamoakálímini nene miní amiki gupá zi kimiki minamó.

21 Lá iki minake vegená kepele heleká itó soza lusa geeká itó gumesisi mokoló netá itó gumina nene ahulamamómá neve.

10

Ageló makolímo pepa koma ale gakinakutí ale atalo minamó

1 Itó amuzavagi ageló makómá okulumakutí limigo ángumó nene agupeloka límusi leto voko minamó, itó gotolaló nene hugepa lo minamó, itó avogisaló nene ho silikakéna ahuloko minamó. Itó agisa luga luga nene lapusagitana oko ló guluma oko minamó.

2 Agizakú nene pepa koma makó ale minake nene ale gakinakutí ale atalo minamó. Agisa sogalokatí nene age nagamí amupiló liso minamó. Agisa zamagalokatí nene mikasiloka liso minamó.

3 Lá oko noike laizon akohú galámoo anó sipisi molamó nenémini oko gakó napagutí sele litó nene gó galaké 7 nenete konó milamó.

4 Konó milikago, gelekuke gakóini nene luhuva gizanogo nougo, okulumakutí anó lupa makó galinali nenitoka láá loko limimó: Gó galaké 7 keza gakó lamó nene, luhuva gizo molamo. Hanuva gigikagú minino.

5* Loko lokago age nagamí amupiló itó mikasiloka liso mina agelómámo agizani zamagaloka nene okulumatoka ale otimó.

6 Ale otike mino lúaló moloko alévolé oko minanogo noi vémo okulumatoka itó mikasiuka itó age nagamikú netá matale ale utó molo asú i ve Ómasímini agulizató gakó láá loko lo hukamó: Gamena makó ageva minaminogo une.

* **9:20:** Age 115:4-7, 135:15-17; Tan 5:23 * **10:5:** Gapo 32:40; Tan 12:7

7 Ageló nampa 7 áisi pikuli huhu lokiko anó napa molanogo ive. Nene zupahé Ómasímini agepagutí gakó liaká ve keza gelekelé itiki mina vegená nene emane Ómasímo asuguná gakó lo kimimómámini gihiláa utó o asú oko utó inogo ive.

8 * Loko noligo, okulumakutí anó lupa goí oko gulumóma ámina oko goha utó oake, láa loko lo nimimó: Geza voko age nagamí amupiló itó mikasiló lisoko noi agelómámini agizakutí luhuva netá ale gakinakutí ale atalo minamóma nene alezo.

9 Loko lokago, neza ageló noitoka voko pepa koma ale minamó nene nimitive loko lokugo, láa loko lo nimimó: Alekoko nozo. Nokako, ale gegepaló nomolako nene, himoni nogozamáminoko laga givisitimóza, gigikauka ekesá inogo ive.

10 Loko loake, pepa nene nemekago numó. Nokuke, negepaló nene himoni nogozamáminoko oake, laga imóza, no mikilí okugo, nigikauka ekesá imó.

11 Lá okago, geza vegená mulusi mukí kugupe haitopaitoki itó gakóini haitopaitó itó kugulizaki ve haitopaitó keí sala gakó makó nenegi goha lozo loko lo nimimó.

11

Ómasímini gakola li utó utó ve lositosini gakó

1 * Itó ageló makolímo molo gelekáa nogosani hánusagitana makó nemeake, láa loko lo nimimó: Geza oteko Ómasímini zugusavegi guguni gizoaká itagi molo geleko agikagú Ómasi gupá zi amiki nia vegenáma gatozo.

2 * Itó zugusavémini apaláa nene molo geleko ánigamoko hanuva ahulokozo. Nene hetoka vegená keile loko hize huko ahulonoimó neze. Keza neneló apazá apáne Zelusalega nene ikani 42 nenémáni agikagú lisi lana iki minamatamó neve.

3 Itó neza gakóné li utó utó ve losítá lokimikugo, ginegane litaha ali luhiiiki vegená nene gakóné li kimi kimi iki nimirisiko, ikani 42 goloko hilinogo ive.

4 * Keza olivi za lositáma itó liví lositáma mikasímini Guivahanímáni avogisaló nimirasimó nene gakóné li utó utó ve lositámámini avevezahaló niasive.

5 Ve makolímohe makolímohe ámina ve lova ale kimitimó nene, kegepagutí vele limiti lolímó liki vímiginigave. Nenémáni ve makolímohe makolímohe lova ale kimitimó nene, ezáa lapuluva inogo ive.

6 * Goliniló gizapa itái zámuza kemeneimó nenazo, Ómasímini gakola li kimiki nimirisiko, golini zeminogo ive. Itó likisiko, mukí nagamí hinipinilímó golani loló inogo ive. Nenémáni zámuza kemeneimóma neve. Itó mikasigú vegenatoka kivise asú ití netá haitopaitolímámini utó itive liki likisiko, utó inogo ive.

7 * Itó monó litái gamenaló asú okiko, aseva nomi galegutí akohú netá golivagi netá itinogo ive. Iteko lova ale kemeko kivilegeko kepelekiko hilinigasive.

8 Hilikisiko, vegená keza gonosíini ahulikiko, taoní napámini gapoló aki minanigasive. Guivahaninini nene gozapá ámina apató zohota zaló apilikago

* **10:8:** Izi 2:8-3:3 * **11:1:** Izi 40:3; Zak 2:1-2 * **11:2:** Luk 21:24 * **11:4:** Zak 4:3,11-14 * **11:6:** Gá 7:17-19; 1 Sam 4:8 * **11:7:** Tan 7:7,21; Ali 13:5-7, 17:8

hilimóma neve. Apá nenémini agulizaláa anoza gakokutí Sotove itó Izipive liki liaká niave.

⁹ Lá okiko, numutó namató gevená lugáa kemetameni haitopaitoki itó haitopaitó nagaki itó gakóini haitopaitoki nene gonosiváa gamena losive makole itó nekisáagi nenegú ánikigíki minanigave. Lá niiko, lugáate gale zeketatune liki likiko, géneka li kiminigave.

¹⁰ Itó ámina monó lili ali ve netetosa mikasiuka vegena nene miluma netá sipsi kimiaká asimó nenazo, helesikumú kogoliza viziki iza lulú giki ali helegra helegra inigave.

¹¹* Itó gamena losive makole itó nekisáa oko vokiko, Ómasilokatí gosohá minoaká netá ale utó moloaká sikalahú nenémo gonosíikú nene lemekiko, mómoká iki otinigasive. Otikisiko, vegena keza ánigiiki kehelele goha vizekiko, gakó laminigave.

¹² Lá okiko, okulumatotí anó lupa napa makó láa loko limitive: Kee, imaneloka itilizo. Loko lokiko, gala velini keza ániginiko, límusímo asapú okimikiko okulumakú itinigasive.

¹³* Itó okulumakú nitisisko, áminasító imimá napa nene itive. Noiko, ámina numutoka apá hamó golesa okiko, apá lugáa 9 ha minative. Itó imimalimo vegena 7 tausen kepelekiko, hili gesá inigave. Itó gosohá minatamoláa keza kelegesá legekiko, Ómasi okulumá amelahini lapaná ali otinigave.

¹⁴ Agae, genavagi miluma netá lositá nene mota utó okamóza, hamó nene mota utó inogo inae.

Pikuli nampa 7 huhu lamó

¹⁵* Lá okago, ageló nampa 7 áisi pikuli huhu lokago, okulumakú nene konó lupa napa lake láa liki lamó: Itína nene numutó namató kugulizaki vetini gizapa okimiaká zámuza nene Guivahanitémini itó gologí oketative loko lo moloketa vémini agizakú noigo, eza gizapa oketoko kugulizaki venini minoloko voko mino lúaló moloko minanogo ive.

¹⁶ Liki likago, monokú olotiva ve 24 Ómasímini avogisaló gonanalivagi siató mina vete lemeke gupá zeke Ómasi láa liki agepoka lamó:

¹⁷ Guivahani Ómasi osá amosá ve neneka,

geza minanimó itó itinagi nominane.

Amuzaka napa ale atalokanike gugulizaki minoko
gizapa okimiaká hozaga apí oko ale utó nomolanikumú gegepoka nolune.

¹⁸* Mukí numutó namató vegena kizapaló golesa molamó neve.

Mesaha oketatani gamena alitokago,

hele vegenalitini lihimamú goní oketatani gamena utó okave.

Itó gelekelé izegipaka geí gegepagutí gakó liaká a ve

ító monó gele vegena lugáa itó geí zámuzamú gili olopá iki niamó iti
minamó itó limi minamó

keza meinaváini kimitani gamena alitokave.

Itó mikasiuka netá ali gopa iaká nia vegena kelémo lapuluva itani game-
naváagi mota alitokave.

¹⁹* Liki agepoka likago, okulumauka Ómasímini zagusave koló okago, lo
múnaheáká gakolímímini pokisi nene zagusave agikagú utó imó. Itó gó melevezá

* **11:11:** Izi 37:10 * **11:13:** Ali 6:12, 16:18 * **11:15:** Gá 15:18; Tan 2:44, 7:14 * **11:18:** Age 115:13 * **11:19:** Ali 8:5, 16:18,21

ító konó lupa napa itó gó galaké itó imimá itó golini óvisopa gihila napa limimó.

12

Vená makoki gosihá sipisimagi kei gakó

¹ Lá okago, okulumató anosa napa lá oko utó imó: Vená makó minamó eza agupeló ho silikakéna luho minamó. Itó agisa amunauka nene ikani milimikago minamó. Itó gotolaloka nene sonohí 12-atunú lilí ita akilí hitamó.

² Itó eza izegipa agatupagi minoko izegipala getanogo miluma geleko gopaga loko minamó.

³ * Itó lá oko noigo, okulumatoka anosa makó lá oko utó imó: Gosihá sipisi makó minamó nene ametamenía golohá loko minamó, itó gotoláa 7, itó sivipáa nene 10, itó gotola minoloko vitó vitó nene kugulizaki vetini akilí makó hitimikago minamó.

⁴ * Lá onoi gosihalímo okulumatoka iteko minake agasatunú sonohí nene hize hoú lo losive makole oko hizeko atohe ahulo ahulo igo, mulusi makó nene mikasiuka lememó. Itó gosihá sipisi eza lá oake, venalímo izegipa getokiko mikilí itove loake voko amatoka gizapa oko minamó.

⁵ * Itó izegipala getokago nene, numutó namató vegena aeni hánusatunú gizapa oketative loko lo molotamó. Itó ámina gipa getokago nene, ipá iki aliki itiki Ómasímini amatoka gonanalivagi holomámini amakuka ahulitamó.

⁶ Lá okago vená eza golisi vike mikasi gomopalaló ikani 42 nenémini agikagú nasahilí nitiko minative loko Ómasímo ale vatí ota apatoka voko minamó.

⁷ * Lá okago, okulumatoka lova napa utó imó. Agelolitini gizapa ve Maikolí itó izegipa agunamotamola keza sipisi gosiháma nene amiseleko apilitune liake lova ali utó amó. Itó helegaloka sipisi gosihá nene izegipa agunamotamolagi ámina iki gimisi magé iki minamó.

⁸ Itó lá ikamóza, gosihagegi nene keé liki lova aviligitamoláa amigo, okulumakutí kimisiliake gahe gikitamó.

⁹ * Lá amó nene amepa gosihá napa eza gozapá ká emane amunalokatí mina ve Satá eza nene numutó namató ve kogoka vizé vizé oaká i vema ahelú i ahulikago, mikasigú limimó. Ezagi izegipala zuhagi monéna kehelú i ahulikago lememó.

¹⁰ * Lá niago, okulumató gakó napa láa loko utó noigo gulumó: Ligive lagavetini galanáikumú Ómasímini avogisaló gamena gamena únaká neteká goní okimiaká noi vema nene okulumatokatí ahelú i ahulikago lemekanazo, Ómasilémo lugutó vizeaká itó aí alévolé itó aí gasova itó gologí oletative loko lo mololeta vevámini gizapa oaká zámuza nene utó o lamaná okave.

¹¹ Keza sipsip iza akalevamámini golanitunú itó goselé kepeleko kelegesá legemigo Ómasímini gakó liaká atunú amuza miliake aviligidamóma neve. Lá iki miniki alikiinímú gelemake, itó lapuluva itupe liki gilisá amamóma neve.

¹² Nenémú okulumá agika itó nenegú mína vegentalita lokogoliza vizilo. Itó mikasiuka itó age nagamikuka niamoláa agae, lekeza nana itamó neve.

* **12:3:** Tan 7:7 * **12:4:** Tan 8:10 * **12:5:** Isa 66:7; Age 2:9 * **12:7:** Zut 9 * **12:9:** Apí 3:1;
Luk 10:18 * **12:10:** Hio 1:9-11; Zak 3:1

Imane Satá eza gamenaváa mota asú inogo ive loko geleneike izapaló golesa molago lekelitoka núane nolimive.

¹³ Lá okago, gosihá sipisima ahulimikago, mikasigú lemeko minakumú geleake, izegipa geta venáma agizató alinogo ámegetoko vimó.

¹⁴ * Lá okago ámina vená nene nama gosúveha sipisímini agokéna losítá ali amikago, mikasi gomopalaló minoko aleko oáká itoka gosihá sipisimú golisi voko halá gimó. Neneloka nasahilíitiki niko, kilisimasí losive makolegi hapumagi vinogo ive.

¹⁵ Lá noiko, vená nene golisi okago, gosihá sipisi eza amegeosaloka agepagutí nagamí nene vele ahulokago, ámina nagamilímo vele lemeake veleko vimó nene ámina vená alémoko vinogo nenémini imó.

¹⁶ Lá inogo noigo, mikasímo vená agutó vizike agepa aká okago, gosihá sipisi nenémo vili nagamí nene mikasi agepagú leme asú imó.

¹⁷ Leme asú okago, gosihá sipisi eza venámamú izapaló molokago, ámina venalímini izegipa agunamotamola Ómasímo lo huka gakó nene gili aleke Izesuni gakó goselé kepelemigo li utó miliki liaká a vegená nene lova ale kiminogo vimó.

¹⁸ Novike, age nagamí getatoka lemeko minamó.

13

Akohú gala losítá keí gakó

¹ * Noigo, neza ánígutoka age nagamikutí nene hela netá napa makó itimó. Eza nene sipivaláa 10 itó gotoláa 7 itó gotoláa minoloko vitó vitó nene kugulizaki vetini akílí minamó. Itó gotolaló agulizá minamó nene Ómasí aleko letoko loaká gakó minamó.

² * Hela netá napa ánígumó eza ametamenía nene pusi sipisimámini oko, agizanía nene peá galámini agizani nenémini oko, itó agepa nene laizon akohú gala agepamáminoko minamó. Itó gosihá sipisi nenémo ezáa zámuza itó ezáa gonanalivagi siá itó ezáa guivahani loló oko minoaká zámuza nene amímó.

³ Hela netalímini gotoláa makó agómunigi minake hele minamó gelekago ánígumó. Itó nenémo agómuni ha omikago lamaná imó. Lá okago nenemú numutó namató vegenalite sigaga liake hela netá napama ámegetiki vamó.

⁴ Lá niake gosihá sipisimámo guivahani loló oko minoaká zámuza amekamómave liki géké vaké liki gosiháma gupá zi amemó. Lá niake akohú netá amepa netáma ámina iki alími napa ake láa liki lamó: Hela netá napa makó ezagitana minamive. Itó makó éaho lova ale amitimó neve.

⁵ * Liki likago, agupe alimi iti iti gakó, itó Ómasi alevo letovo otoko litive loko agepáa gúmusi molomikamó. Itó ikani 42 nenémini agikagú mikasiuka gizapa oko minative loko zámuza amímó.

⁶ Itó nenemú Ómasi eza noimó agulizala nemó itó minoaká apala nemó keza okulumakú miniaká niamoláagi apí oko alevo galatovo oko loketoko minamó.

⁷ * Itó Ómasímini vegená lova ale kemekoko kiviligitive loko gele amekago, néminí oaká imó. Itó numutó namató vegená kugupe haitopaitó itó gakóini

* ^{12:14:} Tan 7:25, 12:7

* ^{13:1:} Ali 17:3,7-12

* ^{13:2:} Tan 7:4-6

* ^{13:5:} Tan 7:8,25, 11:36

* ^{13:7:} Tan 7:21

haitopaitó itó mulusi haitopaitó mukilitini agulizaki ve loló oko minative loko amuza ale amimó.

⁸* Lá okiko mikasigú gevená mukí keza hela netá napama gupá zi amiki agepoka litanigave. Itó sipsip akaleva apili hele vémo gozapá mikasi utó ami gamenaló alévolé kemetameki nia vegenalitini kugulizáini nene puku makokú luhuva gizo molokago mina vegenalitegó nene hela netáma nene nenémini itaminigave.

⁹ Lakagata hee lo minamó neneta gakó imane gili guni iki gililo:

¹⁰* Makó keza kalapusi numukú minatave loko lonoimóma nene kalapusi numukú ahlilikitataze. Makó eza sopolotunú ve makó apele helekikoma ámináminiki sopolotunú ámina ve apili hilitaze. Ómasímini apazá vegená keza ámina zupahé nene siti viziki gili alévolé iki minatakumule.

¹¹ Itó mikasi agikagutí hela netá napa makó itigo ánigumó. Eza sipsip iza nenéminoko sipivala losítá minamó. Anó lupa nene gosihá sipisi nenéminoko minamó.

¹² Lá noike góí oko iti akohú netalímini zámuzagi minake aí avogisaló hoza aleko minamó. Lá noike, mikasigú numutó namató vegená lokimikago, góí oko iti hela netá agómunigi minake hilitotí mómoká oko oti ve nene gupá zi amiki agepoka liaká niave.

¹³ Itó hela netá napa alika utó imó nenémo haitopaitó golivagi netá aleaká noive. Lá noike haitó suni napa makó lá oko alimó: Áisi lokago, mikasigú vegená mukitoka ániginago, okulumakutí ló nene mikasiuka limimó.

¹⁴ Alévolé suni nenéminoko loló itive loko gele amekago, góí oko utó i hela netalímini avogisaló loló ike mikasigú vegená kigika ale gopánapa oaká noive. Lá noike mikasiuka vegená lokimikago, hela netá napama amunaló emane sopolotunú apili hilikago goha oti netalímini vogunahana nene lili amó.

¹⁵ Vogunahana nene lili iake, milikago noigo, alika utó i hela netá napa eza gele amimómove loko vogunahana alémo otekago, gakó loaká noive. Gakó lokago, vegená keza kalapusa hizi amemó. Amamoláa nene kipili helemó.

¹⁶ Itó aí gakotó nene vegená mukitó iti minamó limi minamó henóiki itó itó kugulizaki itó gelekeléini nene kigizani zamagaloka itó golihítoka anosa makó gizi asú inigave.

¹⁷ Lá ikiko hela netá napa nenémini anosa nene agulizá luhuvahe itó agulizálámini nampavahe ali minisá amamoláa keza netá matá meina hizeaká itó salimoaká gapo hizi lí ikitanigave.

¹⁸ Nene anosámini mogonamú silipa iki gili vevesatave. Vegená makó keza gakó giliaká vegená niikima, hela netá napamámini nampavalámini mogonáa ali utó miliki gilitaze. Nampaváa nene ve makolímini agulizálámini napaváa nene 666 nenéminoko neve.

14

Vegená 144 tausen gologí oketamó keí nama

¹* Lá okago, neza nogómula ahulo moloko ánigumó nene sipsip iza akalevama Zelusale numutoka Zaion agokaló oteneigo ánigumó. Ezagi vegená 144 tausen ámina agokaló alegesá iki minamó nene golihítoka ezää agulizá luhuva itó amelahini agulizá luhuva gizikago ánigumó.

* **13:8:** Age 69:28; Ali 3:5, 17:8, 20:12, 21:27 * **13:10:** Zel 15:2, 43:11 * **14:1:** Izi 9:4; Ali 7:3

2 Lá niago okulumatokatí anó lupa gulumó nene nagamí lisani sipsimámini oko sasa loko itó gó pou pou loko limimó. Lá noigo, anó lupa gulumó nene gevená mukilite musiki ziaká netá napatunú nizego anó moloaká noitíminoko nego gulumó.

3 Lá noigo, gonanalivagi sialímimi amatoka nene netá alévoeláa losive losive itó monokú olotiva vetini kovogisaló nama gosohá makó liki miniáká amó. Ámina nama nene vegenalita gelesá avevezaha oko minamimó. Vegená 144 tausen nene numutó namató vegenatokatí meina hizeko gologí oketa vegená kéisigó gilitatíminoko neve.

4 Keza nene venaki mokoló netá lilí amake kigika gizopa lo minamoláa sipsip akaleva noitoka ámegetiki viaká niámoláa keza numutó namató vegená lugáalokatí Ómasímini amatoka itó sipsip akalevámini amatoka miniáká niámoláagó apí oko kelémo molamoláa niave.

5 Keza nene galanáini nomi vegená nianazo, kegepaukatí soza gakó makó olío lemémimóma neve.

Ageló losive makoletini gakó

6 Ageló makó nene ká vozane veletó letoko novigo ánigumó nene, gakó lamaná alévoeláa minova minova oaká gakó nene mukí mikasiuka vegená kugupe haitopaitó itó konóini haitopaitó itó haitopaitó nagá lo utó oko lo kimitove loko mohona noigo ánigumó.

7 Áisi nene gakó napagutí sele loko láá loko limó: Vegená gona moloke-tati gamena mota alitokanazo, Ómasi golivala gilitiki aí agulizá ali otijo. Okulumaki itó mikasigi itó age nagamí itó hanuva nagamí goihá nagamiki kelémo utó i ve Ómasi nene agepoka liki minalo.

8 * Loko loake novigo, amegesaloka ageló makó oake láá loko sele limó: Papelonja apá napama mota tui loko vokave. Ámina apá amelage numutó namató vegená alévolé vain nagamí nalo nalo liki gala vizeaká netá aliki mokomú gala viziki miniáká atímo tui loko vokave.

9 Loko loake novigo, amegesaloka ageló makolímo oake gakó napa like láá loko limó: Makó keza hela netá napamahe itó vogunahanahe kalapusa hizi amitamó itó golihító aí anosa ali milatamó itó kigizakú aí agulizá luhuva gizatamó nenete

10 * vain nagamikitana oko Ómasímini mukahá nemó hanuva nagamiki ale mukahá amoko gopa napa oketati lapevagutí kemekiko natave. Lá ikiko apazá ageló itó sipsip iza akaleva keí kovogisaló loki itó gihuká gehani ló lokiko, áminagú limiki niiki miluma napa giliiki minanigave.

11 * Itó miluma giliiki va vegená nenémínáa niviko, lova lova oko minanogo ive. Itó nenémíni lokilaváa iteloko volko mino lúaló moloko minanogo ive. Nenemú hela netá napamahe itó vogunahanahe kalapusa hizi amiáká nia vegená niámó itó agulizálámini anosa ali miniáká nia vegená nene milumámo ma ahuloketoko vaminogo ive. Itó kavasú viziki itó geha ziki ma aminigave. Gamena gamena milumámo ze lemeko miniko, giliiki viki minanigave.

* **14:8:** Isa 21:9; Zel 51:8; Ali 18:2

* **14:10:** Isa 51:17; Izi 38:22; Ali 19:20

* **14:11:** Isa 34:10

12 Loko limó nenazo, nenémo Ómasímo lo huka gakó itó Izesuni monó ali gilitiki amegesaló miliaká nia vegená Ómasímini apazá vegenala keza nene alévolé iki minatakumú sele lo lemeaká noive.

13 Lá okago, okulumatokatí gakó makó láa loko limigo gulumó: Imane gamenalotí veletoka Guivahaniloka gímeziki miniki hilita vegená keza mulúkú lamaná gilinigave loko luhuva gizozo. Loko lokago, Sikalahulímo láa loko limó: Lamaná. Keza iki miliki iáká amómámini gihiláa kêmegetoko vinogo inazo, hozanini miliiki mini gilinigave.

Mikasiuka hozámini gihiláa aliti gakó

14 Goha ánígumó nene límusi mokoná galinali utó imó nene límusi amupiló ve makó minamó eza ametamenía vegenakitana oko, itó gotolaloka nene kugulizaki vetini akilí golitunú lilí amó nene hitoake minamó. Itó agizakuka nene nosánetá hukoaká amítá sánevetaláa makó ale minamó.

15 * Lá noigo, okulumakú monó zavusavegutí ageló makolímo lemeake límusi amupiló mina vema gakó napagutí láa loko lo amimó: Mikasigú hozámini gihiláa mota utó o asú okaze. Itó hukoko ale molatani gamenaváa mota alitokaze. Nenemú geza amítakatunú hozagámini gihiláa huko molozo.

16 Loko lokago, límusi amupiló mina vémo amitala ale zohota oko zeake mikasigú gihiláa hukoko ale gesá imó.

17 Lá noigo, ageló makolímo okulumakuka monó zavusavegutí olío lemeake ezagi ámina oko amítá sánevetaláa ale minamó.

18 Aleko noago, agivelaho makó nenémo okulumakuka zavusavémini guni gizoaká itáló minatotí amó. Eza lolímini gizapaváa nenémo agivelaho amítá sánevetaláa ale mina ve nene gakó napagutí láa loko lo amimó: Gihiláa guzá lo asú okamó nenazo, geza amítakatunú mikasigú vain nagalímini gihila huko asú ozo.

19 Loko lokago, ageló agivelaho nene amítáma ale zohota oko zeake, mikasiuka vain gihiláa huko asú imó. Huko asú oake Ómasímini mukahálímini mí zeko liliáká zeaká gehanímini agikagú ahulokimikago limi asú amó.

20 * Lá ikago, numuni apá heláaloka mí ziki mili lí ikago, áminagutí Ómasímo mukahá oketa vegenalitini golani nene nagamikitana oko lemeko minamó. Lemeko ohuni molago, 2 mitaló iteko velemó zimó. Itó ohuni molatímini hánáa nene 320 kilomita mololoko voko minago ánígumó.

15

Ageló 7 keza vegená mukí kivise asú iti netá 7 ali minamó

1 Lá okago, okulumató haitó luhuva golivagi makó utó igo ánígumó nene ageló 7 keza vegená mukí kivise asú iti netá 7 ali minamó. Ámina netá nene miní ameko utó noiko, Ómasímini mukahá omo asú oko anogo ive loko lo molamó.

2 Itó age nagamí makó ánígumó nene, kalasitunú lilí a netá ló gulumavagi ali gopa napa iki lilí amó gele minamó nego, ánígumó. Itó hela netá napama ezagi itó vogunahanavagi itó agulizalámini nampava nene alévolé iki avilegemoláa keza kalasitunú age nagamí lilí amómámini agilikaloka Ómasímini musiki zeaká netá napa ali mina vegená nene ánígumó.

3 * Keza Ómasímini gelekelé veva Moseni itó sipsip akalevámini nama láa liki lamó:

Kee, Ómasi Guivahani osá amosá velemaka,
oko moloko animó nene íteko neve.

Itó golivagi netá aleaká noane.

Numutó namató vegentalitini Guivahani geza gapoka nene lamaná itó gihila
lamaná neve.

4 * Geza hamolika apazá keké vizeko noane.

Nenemú numutó namató vegentá geitoka iki kalapusi hizi giminigave.

Geza hehe loko aleko oko moloko ani netá nene utó o lamaná okamó nenazo,
Guivahani geza éaho golivaga gelegetamitive,

ító éaho gugulizaka ale napa amitive.

5 * Liki likago, neza nogómula ahulo moloko ánigumó nene okulumakú monó zavusavémini gaheváa koló igo ánigumó.

6 Koló noigo, ageló 7 keza vegentá mukí kivise asú iti netá 7 ali minamoláa zavusavegutí lememó. Keza ginegane mokoná ali luhiake apítoka nene golitunú lili a holotani ali zemó.

7 Itó alévolé oko minoaká netá losive losivemagutí makolímó ageló 7 nene lape 7 golitunú lilí amó nene keme asú okago ali minamó. Ámina lape agikagú nene Ómasi mino lúaló moloko minoaká vémini mukahá vaí o minamó.

8 * Itó monó zavusave napa agikagú nene Ómasímini lapanalagutí itó zámuzalagutí lokila vaí oake molo minamó. Itó ageló 7 keza vegentá mukí kivise asú iti netá 7 velesá ali utó mili asú amago, zagusavegú itiaká gapováa nene mili lí ikago itemamó.

16

Lapegutí lekikago Ómasímini mukahá limi gakó

1 Lá okago, monó zavusave agikagutí gakó napagutí ageló 7 láa loko lo nokimigo gulumó: Lekeza viki lape 7 nene aliki lekikiko, Ómasímini mukahá nene mikasigú limitive.

2 * Loko lokago ageló nampa 1 áisi nene voko lapeva ale lepekago, mikasigú limimó. Limike, vegentá keza hela netá napámini anosa ali minamoláa itó aí vogunahaha kalapusa hizi amiaká amolaloka gánatisi napa utó oake, kagavuki itó milumavagi utó imó.

3 Lá okago ageló nampa 2 áisi nene lapevagutí netá ale lekekago, age nagamikú holokago, age nagamí nene gonositini golanigitana loló noigo, age nagamikú netá nene hili gesá amó.

4 * Hili gesá niago, ageló nampa 3 áisi voko lapevagutí netá leke ahulokago, mukí nagamí napagú itó mukí nagamí hinipinikú limimó. Lemekago golani nagamí loló o asú imó.

5 Loló o asú okago, ageló makó nagamító gizapa ahulomikago noitímo láa loko Ómasi lo namigo gulumó: Apazá keké vizeko minanitika goí oko minanimó itó itína noanimó geza golesa netá lá oko lihimáinímini meinava kemeaká ani netá nene ale gopa okogi nomimó mota utó okave.

* **15:3:** Gá 15:1

* **15:4:** Zel 10:7; Age 86:9

* **15:5:** Gá 38:21

* **15:8:** 1 Kug 8:10-11; Isa 6:4

* **16:2:** Gá 9:10

* **16:4:** Gá 7:17-21; Age 78:44

6 Geí apazá vegená itó gegepagutí gakó liaká a vetini golani lekemómámini lelegí oko golani kemekako ninamó nene hee lokave. Golesa netá alinámámini meinaváa hee loko kemekane.

7 Loko noligo, guguri gizoaká italotí agelolímini agepagutí gakó láa loko ligo gulumó: Guivahani Ómasi osá amosá ve geza lamaná oko ale hee lokogó lihimá apasoaká noane.

8 Loko lokago ageló nampa 4 áisi lapevagutí netá aleko leke ahulokago, hogú vo holative loko gele amekago ho nenémo vegená lovo vímegevo imó.

9 Lá okago, vegená keza hómini mumusikasilámo lovo vímegevo igo, Ómasímini gakotó vegená mukí kivise asú iti netá nenéminoko ale utó i vémini agulizala alivi letivi iki lamóza, kigikáini ali viligamamó. Itó Ómasímini lapaná ali otemamó.

10 * Itó ageló nampa 5 áisi lapevagutí netá nene hela netá napámini gonanalivagi siató lepekago limimó. Lemekago, eza gizapa oko mina maksiuka nene límugusi lapa-lapa zeko minamó. Nego, vegená keza miluma sipisi giliiki genezáini akohiki gikitiaké minamó.

11 Itó milumaváinimú itó kagavúinimú okulumakú Ómasi alivi letivi amóza, kigikáini ali viligiki iki miliki a netá golesa ahulamamó.

12 * Lá okago ageló nampa 6 áisi nene lapevagutí netá nene leke ahulokago, nagamí napa agulizá Zupaletisi loko nekú lemekago, ho noititokatí kugulizaki ve napa anitita gapováa koló itive loko ámina nagamí nene uto asú imó.

13 Lá okago, neza ánigonougo, gosihá sipisimámini agepagutí, itó hela netá napamámini agepagutí, itó soza saza monó lole ale vemámini agepagutí holosi golesa losive makole gizalá gili va netá itemó.

14 Keza nene Satani gelekelé izegipalatini holosi nenete alévolé suni alitave loko nenéminí zámuza ali minake numutó namató kugulizaki ve napa gala vizikago, Ómasi osá amosá vémini gamena napaló ali nupa iki lova hizinigave.

15 * Gilinahe. Neza guminaló ve nenéminoko galinali anitinogo uve. Nenemú vegená makó kugupe zapakó minatító okugo kovoza helekatinazo, kigikáa gosohaki miniki kigikámini gineganeváa gizapa iki minatamó keza kogoliza vizinigave loko Guivahanímo nolive.

16 * Itó holosi keza lova hizitune liki mikasi makó agulizaláa Hipulu gakokutí Alamagetonive liki latoka kugulizaki ve napa nene kilími nupa i asú amó.

17 Itó ageló nampa 7 áisi lapevagutí netá nene vogalaló ká melane leke ahulokago limimó. Nolimigo, monó zavusavegú gonanalivagi siatotí gamena imane mota asú okave loko gakó napagutí anó lupa lemekago gulumó.

18 * Lá okago, gó melevezá itó gó galaké itó anó sipisi nenémo moloake nominago, imimá sipisi noigo ánigumó nene vegená ganatilisi mikasiuka utó atotí imimá napa makó nenéminoko utó igo ánigamuhatímíni utó imó.

19 * Lá noigo, Papelonja apá nene zevo hutilí ovo noigo hoú lo losive makole imó. Itó numutó namató vegenalitini apá napa nene tui loko vimó.

* **16:10:** Gá 10:21-22 * **16:12:** Isa 11:15 * **16:15:** Mat 24:43; Luk 12:39; Ali 3:3 * **16:16:** Zak 12:11 * **16:18:** Ali 8:5, 11:13 * **16:19:** Isa 51:17

Itó Papelonia apá napámini amelagini keikumú Ómasi eza gele minake vain nagamikitana oko mukahá okimiti lapegeutí kemeko namó.

²⁰* Lá okago mikasi pokola nemó itó agoka nemó mukí vo tolova o asú imó.

²¹* Itó okulumatotí golini óvisopa gihila napa napa gehani monuni nenémini okómo lemeko vegená zevo ategewe imó. Noigo, óvisopa gihila nenémo vauva aleko zevo ategewe oko kipilikumú Ómasi alivi galativi amó.

17

Mokoló venakitana apá napámini gakó

¹* Lá okago, ageló 7 keza lape 7-a ali minamó keitokatí makolímo nenitoka oake, láa loko lo nimimó: Mokoló venakitana apá napama nagamí amupiló nemómámini lihima alinogo ize. Okako, gelepizugo, ánígatane.

²* Numutó namató kugulizaki ve napa ezagi mokoló mihina iaká amó. Itó numutó namató vegená nenete keza ámina venatokatí nene vain nagamikitana oko mokova mikilí iake, matúini gopa oaká noimó.

³ Nene ánígatane loko lo nemekago, nigika ale viligokago, mikasi gomopalaló nelémoko vimó. Neneloka vená makó ánígumó nene hela netá napa golohá makolímini amupiló minamó. Ámina hela netalímini agupeló agulizá mukí minamó nene Ómasi aleko letoko loaká gakó haitopaitolímini gizikago minamó. Itó ámina netalímini gotoláa 7-a itó sipiváa 10-a minamó.

⁴* Itó vená eza gindeganeváa nene okohu gó golohá lovímó ale akolo minamó. Itó gonanaliváa nene goli gehanigi meinava iteko mina netá ale guni oko akalamó. Itó agizakú lape makó golitunú lilí amó ale minamó nene, mokovámini golotuváa ulínaka itó netá golesa vaí oko minamó.

⁵ Itó golihilaló asuguná agulizá Papelonia apá napa numutó namató mokómini itó golotuva netalímini izolahináa nénisi nene nouve liki luhuva gizikago minamó.

⁶ Itó vená eza Ómasímini apazá vegenala itó Izesutoka gímiziki minamómove liki kipili hele vegenalitini golani nake nake, matuna gopa okago nego, ánígumó.

Anigokuke, ininá golesa nouke nagata gululusi gulumó.

⁷ Lá nougo, agelolímo láa loko loká onetamó: Nanamú ininá noane. Neza ámina venálímini mogona itó hela netá napámo agohí geneimó nenémini mogona, itó hela netá napámini gotola 7-a itó sipivala 10-a nenémini mogona itínasa lo utó oko lo gimitoze, gelezo.

⁸* Geza hela netá áñiganimó nene gozapá agómulagi minamó itína nene noamive. Alika nene aseva nomi galegutí atiginá oko itekoko voko minoko voko golesa o lamaná inogo ive. Itó eza gozapá minamó itó itína nene noamínazo, atiginá oko okiko mikasiuka vegená keza áñigiki sigaga litanigave. Mikasi utó amitokatí emane alévolé kemetameki nia vegenalitini kugulizáini giza pukugú kugulizá gizi milama vegenalite nenémini inigave.

⁹ Itó itína kigika koló omina vegenalitegó ámina anozámini mogona giliakató neve. Gotola 7 keza ámina venámámo ase hizeko nomina agoka 7 netentini avevezaha neve.

* **16:20:** Ali 6:14 * **16:21:** Gá 9:23; Ali 11:19 * **17:1:** Zel 51:13 * **17:2:** Isa 23:17; Zel 51:7
* **17:4:** Zel 51:7 * **17:8:** Tan 7:7; Ali 11:7; Age 69:28; Ali 13:8

10 Itó agoka 7 nene kugulizaki ve napa 7-atini avevezaha niave. Keikutí kugulizaki ve 5 keza haha ikamóza, makó nene itína hanuva noive. Makó nene minoko utó okoko gamena ahaváisi minative loko lotonoimóma neve.

11 Hela netá napa gozapá minamó itó itína gamena nene noamimó áisi nene kugulizaki ve napa 7 keitoka miní amekiko, nampáini nene 8 inogo ive. Lá okiko, eza minoko lapuluva oakakú nene vo holanogo ive.

12 * Itó sipiva 10-a ániganimó nene kugulizaki ve napa 10 keí avevezaha niave. Keza gizapa oaká zámusa velesá alinamamóma neve. Kugulizaki ve minata zámusa nene apí iki hela netámagi gamena alínipásí alinigave.

13 Keza gelekáini hamó minokiko, hela netá napamámini gelekeleláá itiki gizapa oaká zámuzáini nene aí agizakú milanigave.

14 Lá niiki Ómasímini sipsip akaleva nene lova ali amiki minanigave. Lá nikó sipsip iza akaleva áisi nene guivahanitini ve uvóipo itó kugulizaki vetini ve uvóipo noinazo, eza nene amuza moloko kehelú inogo ive. Lá noiko, áisi nene kelémo etó okoko alesa molo kemekiko, aitoka alévolé iki gímize vegená nene ezagi apiziki minanigave.

15 Loko loake, láa loko miní ameko lo nimimó: Nagamí napa nene mokoló vená eza agilikaloka noigo ániganimó nenémo numutó namató vegená kugupe haitopaitó itó mulusi haitopaitó itó haitopaitó konoki vegenalitini avevezaha noive.

16 Itó sipivala 10 ániganimó nene kugulizaki ve napa 10-agí itó hela netá napamagi nene mokoló venáma mukahá apiliiki ahelú ikiko, agupe zapakó minoko helekiko, mémela nikiko, lumáa nene lolímo lanogo ive.

17 Lá itimó nene, hanuva ma aminogo ive. Ómasímo kigikagú ale vávani okiko, eza agata gilimoláa nene gili aliiiki kigika hamó nominiko, gizapa oaká zámuzáini nene hela netámámini agizakú mili asú iiki aí gelekelela minanigave. Lá nikó, Ómasímini gakó nene alévolé inogo ive.

18 Itó vená makó ániganimó nene numuni apá napámini avevezaha noive. Ámina apá nenémo nene numutó namató kugulizaki vetini apá gotola loló okiko gelekelé itiki minatave loko nenémini zámusa aleneive, loko limó.

18

Papelonia apá tui loko vi gakó

1 Lá okago ageló makó okulumakutí limigo ánigumó. Eza helisálamo alévolé oko minamó, itó lapanalámo mikasiuka hize sata igo ánigumó.

2 * Eza gakó napa like láa loko limó: Papelonía apá napama tui loko vokave. Vokago holosi haitopaitolímini numuni apá loló oko nominave. Mota gaha nama golesatini numuni apá loló oko nominave.

3 * Mukí numutó namató vegenalite alévolé vain nagamikitana oko mokova mikilí iaká amóma neve. Numutó namató kugulizaki ve napa keza ámina mokoló venaki ámina netá aliki miniaká amóma neve. Numutó namató pisinisi hoza aliaká vete ámina hozámini moni aliake henóiki vegená lilí amóma neve.

4 * Loko lokago, okulumakutí gakó napa makó láa loko limigo gulumó: Vegenáne zuha lekeza ámina numuni apá nene ahuliiki golisi amave. Neneló

* **17:12:** Tan 7:24 * **18:2:** Ali 14:8; Isa 13:21; Zel 50:39 * **18:3:** Ali 14:8 * **18:4:** Isa 48:20; Zel 50:8, 51:6,45

miniki ámina apalímini lihima netala alími vatí ikiko vegena mukí kivise asú iti nejala lekelitoka zeloko vokatize.

⁵* Ámina apalímini lihima netala nene amupiló amupiló oko iteko okulumá ze gilitimó noive. Itó imane Ómasímo lihimavalamú agatí molamive.

⁶* Nenemú netá golesa lilí ilikitató apasiiki nenéa aviligiki amupiló amupiló iki apasikitalo. Nenémini helegáa ekesá netá lekeza natave loko ali vavá ilikitamó nene aliki itiki amupiló amupiló iki kimilo.

⁷* Kugupéini aliki itiki minake lagámini amupiló minake, meleketakeni ali miniaká amóma neve. Nenémini helegáa miluma itó mulúini gitihiná oaká netá nene ali utó i kimilo. Ámina apá nenémo agikatunú nene neza imane nugulizaki vená napa nouve. Neza getó minamuve. Miluma gelemoko lagámini amupiló minoloko voko minanogo uve.

⁸ Loko loaká imó nenazo, gamena hamó zupahé ámina apatoka vegena mukí kivise asú iti netá mukí utó o amitize. Guiyahani Ómasi eza amuzalagimo lihimavaláa napasotató nene heleaká netá itó mulúini gitihiná oaká netá itó gaúna heleaká netá utó okiko, ámina apató lolimo lo asú inogo ive, loko limó.

⁹* Itó numutó namató kugulizaki ve napa ámina venaki mokoló mihina iake ámina apató ló gehani giziki nake meleketakeni aka miniaká amó keza ló lokilaváá itekiko, ángiiki íve nama iki miluma gilinigave.

¹⁰ Lá niiko, genavagi netá geleko haha imómámini mogona ángiiki kehelele vizekiko, hotó miniki agae, agae, Papelonía apá napama lihimakámini meinaváá galinali anitegimikave liki linigave.

¹¹* Itó numutó namató pisinisi hoza aliaká ve keza lelí henonite nene eáho itína meina hizitimó neve liki ámina iki miluma gili amitaze.

¹²* Keí henokanoni nene lá iki salimiaká amó: Goli gehani itó silivá gehani itó meinava iteko mina gehani haitopaitolímini, itó meinava iteko mina lulú, itó kugupeló netá gonanalivagi mukí mokoná itó okohugó itó golohá itó za lamaná haitopaitolímini itó elepani iza sipivatunú ali lolohalo a netá itó zasila lónohanitunú, itó kapatunú itó aenitunú itó gala gehanitunú ali guni iki lilí ina netá.

¹³ itó silogoheni anuva haitopaitolímini itó anuvavagi paulá guguni gi zoakakumu itó lokila anuvavagi iteaká i netá itó anuvavagi netupa lamaná itó vain nagamí itó gilisima itó polisima laisima itó sipsip iza itó pulumaká iza itó hosi iza itó hosi izate gelelehá oaká kali netá lamaná mukí itó megusa izegipa itó vegentalitini kemeni salimiaká amóma neve.

¹⁴ Itó pisinisi hoza aliaká ve keza láá liki litave: Minumunikama ángiigo gelekelé oko minoaká animó nene haha o asú okave. Itó golivaka hizi netá mota gololohá okave. Itó gonanaligama voko haha okamó nenazo, nana oko goha alitanimó neve liki litave.

¹⁵* Itó ámina apatoka netá nenémináa salimiki moni henokanoni ali nupa iaká a vegena keza genavagi netá geleko haha imó nene ángiiki hotó oti miniki ive nama ikitiki miluma gilikitiki

¹⁶ agae, agae. Numuni apá napamave. Gineganega luhuvagi mokoná okohu golohá ale luhoaká amimómave. Itó gonanalivagi netá

* **18:5:** Apí 18:20-21; Zel 51:9 * **18:6:** Age 137:8; Zel 50:29 * **18:7:** Isa 47:7-9 * **18:9:** Izi 26:16-17
* **18:11:** Izi 27:31,36 * **18:12:** Izi 27:12,13,22 * **18:15:** Izi 27:31,36

haitopaitolímini meinava iteko minamó nenémini amupiló minoaká animómave.

17* Lá animóza, imane henokanokama galinali lapuluva noinae liki linigave.

Itó nagamikú sipi amelage itó áminagú veno vegená itó sipigú hozaváa aliaká ve itó age nagamikú pisinisi hoza aliaká a ve keza ámina iki ló lokilaváa itekiko ánigiiki hotó miniki

18* miluma gilikitiки ive iki numuni apá napama nenémináa makó hitoka netive.

19* Liki liiki goihá lánehá iki ive nama iki miniki láa liki litave: Agae, agae. Apá napamave. Age nagamikú sipi amelage ámina apalímimi netá matalalotí henokanóniigi lilí iaká a vegená keza galinali gámekokó pizekave liki linigave.

20* Ámina apá napámini lihimavaláa lekelitoka minamó nene Ómasímo itína apasokamómave liki okulumakú niamó itó Ómasímini apazá vegenala itó aposolo itó Ómasímini agepagutí gakó liaká ve niamó lekeza lokogoliza viziki mulutlikú lamaná gili.

21* Loko agelolímo li gakó nenéminoko utó okago, ageló alévoláa makolímo gehani napa makó geheko oake age nagamikú hize ahulokago limimó. Nolimigo, láa loko limó: Papelonja apá napa ámina oko amuza moloko ahelú o ahulokiko, voko haha o lamaná inogo ive.

22* Itó musiki ziki voká ziki kita ziki hololopani huhu liki pikuli ziki miniaká a vegenalitini konó lupa nene ámina apatoka goha makó utó aminogo ive. Itó kigizanitunú luhuva miliki netá ali utó miliaká amoláa nene ámina apatoka goha minaminigave. Itó hoza gaza nenémini hoko-hoko haka-hakáa nene utó aminogo ive.

23* Itó mota gámekokó pizinogo ive. Livilímini lapanaláa nene keitoka makó utó aminogo ive. Itó izoha alimi nímiliko ve vená keza gakó litamó nenémini konó lupa ámina oko ámina apakú makó utó aminogo ive. Nene ámina apakú pisinisi hoza aliaká véa numutó namató ve napa lilí iki miniaiká amómá neve. Itó keí gipe lakegusanímo numutó namató vegená kigikáini ale gopa imó.

24* Itó Ómasímini agepagutí gakó liaká a ve itó Izesuni apazá vegená itó numutó namató monó alinakumule liki kipili hele vegenalitini golánimini meinaváa nene ámina apá napaloka minanazo, nenemú nene nenémini otanogo ive, loko agelolímo limó neve.

19

1 Lá okago neza okulumakutí vegená mulusi sipisi keí konó lupa napa gulumó. Keza láa liki lamó: Haleluia. Ómasi agepoka lilo. Lugutó vizeaká itó gonanalivagi lapaná itó zámuzala helisalagi minamó nene Ómasímini mututoní neve.

2* Áisi nene lihimatémini meinaváa kemeaká hoza alekago gihiláa lelegí oko utó okave. Mokoló vená napa eza numutó namató ve mokoló mogona apí o kimike kelémo lapuluva oaká i venámámini lihima nekisáa apasamó. Lá

* **18:17:** Izi 27:26-30 * **18:18:** Izi 27:32 * **18:19:** Izi 27:30-34 * **18:20:** Gapo 32:43; Zel 51:48

* **18:21:** Zel 51:63-64; Izi 26:21 * **18:22:** Isa 24:8; Izi 26:13 * **18:23:** Zel 7:34, 25:10 * **18:24:**

Zel 51:49 * **19:2:** Gapo 32:43

noike gelekelé vegenala zuha kipili helemómámini golanímini lihima aitoka minamó nene apasokave liki lamó.

3 * Liki liake Ómasi agepoka lilo liki goha liki apá napamaló ló lokilaváa iteva iteva oko mino lúaló moloko minanogo ive liki lamó.

4 Itó monokú olotiva ve 24 itó alévolé oko minoaká netá 4-a keza kalapusa hiziki Ómasi gonanalivagi siató noi ve agepoka lake lamanale, Ómasi agepoka lilo liki lamó.

Ómasímini sipsip akaleva nene vená alemo ami gakó

5 * Lá okago, gonanalivagi siá minatokatí anó lupa makó láa loko utó imó: Ómasímini gelekelé vegenala zuha lekeza nene agepoka lilo. Limi minamó iti minamó golivala giliki miniaká niamó neneta, agepoka lilo.

6 * Liki likago, neza vegená mulusi nenetini konó lupa goha gulumó nene nagamí lisani napamáminoko sasa loko itó gó pou pou loko nominago, gakó napa láa loko utó imó: Guivahani Ómasile osá amosá ve eza agulizaki vete loló oko gizapa olimiaká hozava utó o lamaná noize, Ómasi agepoka lilo.

7 Ómasímini sipsip akaleva nene vená alemo amiti gamena alitokave, itó vegenala zuha keza aí vená lili inigi ali vatí ikamó nenazo, nememú leza logoliza vizeko mulutegú lamaná geleko agulizá ale otitune.

8 Keza mokoná ginégane vové avé loko minamó ali akalatave loko gele kemeneimóma neve. Liki lamó nene Ómasímini apazá vegenala keza vevesiki iki miliki iaká amó nenémo góini loló onoikumú linamó neve.

9 * Gakó láa loko utó okago, agelolímo gakó makó láa loko lo nimimó: Geza lá oko luhuva gizozo: Ómasímini sipsip iza akaleva nene vená alemo amiti gamenaló nosá lagámini natave loko alesa molo likimi vegenala zuhalita mulutikú lamaná gililo. Loko loake, láa loko limó: Gakó lo nogumumó nene Ómasímini gakó gihiláa lamaná nene lo nogumuve.

10 Loko lo nemekago, nalapusa hizekoko gupá ze amitove loko nougo, óe, lá amo loake, láa loko limó: Néminamo. Neza gelekelé ve gigivekahina gigive gagave Izesú lo utó i gakola ali gikitiki ali miniaká nia vegenalitini kigivéipina nouve. Ómasigó gupá ze amezo. Izesú lo utó i gakó nenémo Ómasímini agepagutí liaká a ve kelémo vávani igo alika utó iti netakumú liaká amóma neve, loko limó.

Gizopa hosi iza amegesaló mina vémini gakó

11 * Lá okago, neza nogómula ahulo moloko ánígumó nene okulumá koló okago, hosi iza gizopa makó nego ánígumó. Ámina hosi izámini amupiló mina vémini agulizala nene litokó minoaká itó gakó gihiláa loaká ve eza lihimámini meinava kemeaká hoza itó lovavagi hozava ale gopa amoko ale hee lokogó aleáká noive.

12 * Agómula gihiláa nene ló guluma oko minamó. Itó gotolaloka nene kugulizaki ve napatiní akilí mukí hitoake minamó. Itó agulizá luhuváa minamó nene ezáagó gatoko geleká noive.

13 Ginegane hána nene golani hilimikago minamó itó agulizá nene Ómasímini agepagú gakotó mina veve liki milamó.

* **19:3:** Isa 34:10 * **19:5:** Age 115:13 * **19:6:** Izi 1:24 * **19:9:** Mat 22:2-3 * **19:11:** Age 96:13;
Isa 11:4 * **19:12:** Tan 10:6

14 Eza novigo, okulumakutí gimišigi ve mulusi napa mukí gineganéini mokoná vové aveláa luhi minake, hosi iza mokonalitini kemegesaló itiki miniake ámegetiki vamo.

15 * Agepagutí nene sopoló hána sánevataláa makó ite minamó. Nenetunú nene numutó namató vegená kepeleko kiviligitive, itó aeni hánusa makó ale minoko gizapa oketanogo ive, itó Ómasi osá amosá vémini mukahá golesa ale utó moloko lihimáini apasoaká hoza alinogo ive.

16 Gineganeló itó humailaló agulizá luhuva nene kugulizaki vetini agulizaki ve itó guivahanitini guivahanive loko gizokago minamó.

17 * Lá okago, neza nogómula ahulo moloko ageló makó homámini lapanató oteneigo ánígumó. Mukí nama nene vogalaló vigá igá niago, mukitoka gakó napagutí sele lo kimike limó: Ómasímo ló gehani napa nogizaze, iki alegesá ilo.

18 Lá niiki kugulizaki ve napatini kugupe mémeláini itó ami gizapa vetini kugupe mémeláini itó ve alévoleláa keí kugupe mémelá itó hosi izatini itó lova véinitini kugupe mémelá itó ve mukilitini gelekelé izegipáini itó nagakú minamake hanuva minamoláa iti minamó limi mina vegenalitini kugupe mémeláini nataze loko limó.

19 Lá okago, neza hela netá napama itó numutó namató vetini kugulizaki véini itó izegipa kugunamotamói iki alegesá iake niago ánígumó. Keza nene hosi iza gizopámini amegesaló mina vegi izegipala agunamotamolagi lova ale kimitune liki anitemó.

20 * Itó hela netá napamagi itó gakó lole ale ve sozámini eza nene akohú netámámini avogisaló alévolé suri haitopaitolímini ali vegi nene kigizató alemó. Ámina gakó lole ale ve sozámini nenémo amunaló emane hela netalímini agulizá luhuva ali minamoláa itó vogunahanaló kalapusa hiziki agepoka liaká amoláa nene ámina alévolé suni alike kigika ale gopa oketamóma neve. Ezagi hela netá napagi kogómulagi niasigo kelémoake lolagi nagamilagú gihuká gehani ló loko noikú ahulokimikago lemesimó.

21 Limikasigo, kugunamotamoláa nene hosi iza gizopámini amegesaló mina vémini agepagutí sopoló hána sánevataláa nenémo kepele gesá imó. Lá okago, mukí nama nenete aniteke kugupe mémeláinía niki niki kagatupa imó.

20

Kilisimasi 1000 nenémini gakola

1 Lá okago, okulumakutí ageló makó limigo ánígumó nene aseva nomi galémini kií itó seni nagá napa makó nene agizakú aleneigo ánígumó.

2 * Áisi nene gosihá sipisi gozapá ká emane amunaukatí mina ve Satani nene agisa agizató aleake kilisimasi 1 tausen nene nagá numukú minative loko lotamó.

3 Lomiake, galegú hize ahulokago limimó. Lemekago, gaheváa nene alévolé oko geake humatunú moloko alémo kii limó nene, numutó namató vegená kigika goha ale gopa oketamoko hanuva minoloko voko kilisimasi 1 tausen ale ahulokiko, gologí omikiko nene, itekoko gamena alínipáisí minative loko lotamó.

4 * Itó neza gonanalivagi siá mukí nego ánígumó nene netá golesamú livi hukivi hoza alitave loko loketa vegená nene áminaló minimi nivago ánígumó. Itó Izesuni agulizala li utó miliki Ómasímini gakola kelegesá legemigo ali gikitinago, luváini hukimi va vegenalitini kemeni ánígumó. Keza hela netá napama itó vogunahanaló kalapusa hiziki agepoka lisá amamoláa itó aí anosa nene golihító ali milamamoláa itó ali kigizakú milamamoláa ánígumó. Keza luváini hukinakutí goha otiki miniki Kilistogegei kugulizaki vete alia káho ali ki míniko, kilisimasi 1 tausen vinogo ive.

5 Hililiká va vegená lugáa keza otemake kilisimasi 1 tausen nene asú itive liki ageva iki ha minamó. Helenosakutí oteaká ánígumó nene oteaká nampa 1 neve.

6 Ámina hilinakutí oteaká netató miní amiaká nia vegená keza Ómasímini apazá vegená niakumú mulúkú lamaná giliaká niave. Vegená nenémináa keza heleaká nampa 2 nenémo kugupelotí poposá vizinogo ive. Keza Ómasímini itó Kilistoni guguni giziaká vegenala lilí iki minanigave. Lá niiki Izesuki kugulizaki ve hoza aliliki niviko kilisimasi 1 tausen oko vinogo ive.

Satá monéna lapuluva iti gakó

7 Itó kilisimasi 1 tausen asú noiko, Satani nene nagá numukutí gologí imikiko, goha itinogo ive.

8 * Iteoko numutó namató mikasi nekisa vokisauka Gogo mikasiukatí itó Magogo mikasiukatí vegená kigika ale gopa okimioko kelémo negi hizeoko vegená gala viziko, lova ali utó inigi alegesá inigave. Keza nampáini nene getani nenéminiki gatoko gato asú amoakalímini nitave.

9 Vegená nenémináate mikasiuka hutilí iki Ómasímini apazá vegenala nitatoka itó Ómasímo amu heleaká noi apá Zelusalega viki gohoni milanigi ali virginigave. Lá niko, Ómasímo okulumakutí ló amiselekiko livi lúnivi inigave.

10 Lá ikiko, Satá nene amunaló vegená kogoka vizi ve nene hela lolímini ohunagú gihuká gehani ló loko minakú ahelú i ahulikiko limitimó nene hela netá napamagi itó soza gakó lole ale vegi áminagú emane amunaló limiki minasitotí ageva iki minasikú liminogo ive. Keza nene gasovagi netá gihikimikiko, gamena gamena únaká neteká miluma giliki mini lúaló miliki minanigave.

Gonanalivagi siá mokonalímini avogisaló goní ita gakó

11 * Itó gonanalivagi siá sipisi mokoná makó ánígumó. Itó amupiló mina vémini avogisa ánígumó nene okulumaki mikasigi keza aí avogisalotí golisi ikasike goha utó amasimó.

12 Lá niasigo, hele vegená iti minamó limi minamoláa gonanalivagi siató Ómasímini avogisaló otinago ánígumó. Lá niago siató mina vémo puku mukí ale ataloko minamó. Makó ale atalago ánígumó nene alévolé kemetameki nia vegenalitini kugulizá gizo mola puku minamó. Itó hililiki vamoláa keza goí iki hanuva minake iki miliki amómámini mogonamú ámina pukugú gizi milinató nene goní oketamó.

13 Itó ámina gamenaló age nagamikú hiliki va vegenaki kelémo atiginá imó. Itó heleakalímini itó galegú lemeakalímini agikagú hiliki va vegenaki kelémo atiginá imó. Itó hililiki vamoláa mukitoka keza iki miliki iaká a mogona lotuva legeko nenémini helegáa apasoko kimimó.

14 Lá okago hele vegenaki galegú minamolagi nene lolagi nagamí ohukú kehelú o ahulokago lememó. Nenémo heleaká nampa 2 loló onoive.

15 Itó vegená makó nene alévolé kemetameki nia vegenalitini kugulizá luhuva gizo mola pukugú minami vegená nene lolagi nagamí ohukú kehelú o ahulokago limiki minamó.

21

Okulumá gosohá itó mikasi gosohá utó itive

1* Itó okulumá litahagi itó mikasi litahagi keza viki haha ikasigo itó age nagamí ámina oko voko haha okago okulumá gosohaki mikasi gosohaki ánígumó.

2* Itó apazá apá Zelusale numuni apá gosohá nene okulumakutí Ómasilokatí nolimigo ánígumó nene ve makotó vená alimi aminigi gonanalisi imikago minamó nenéminoko nego ánígumó.

3* Itó gonanalivagi siatotí anó lupa sipía makó láa loko gulomó: Ánígalo. Ómasímini numuni apá nene vegenalitini kovogisaló utó noive. Áisi nene holúkú minoko aleko noiko keza vegenala zuha lilí iki minanigave. Ezáa keitoka mino moloko nooko Ómasíini minanogo ive.

4* Eza kogómula nogoza gilatoketanogo ive. Heleaká itó miluma geleaká itó ive nama oaká itó lagavú geaká nene asú okiko ma goha utó aminogo ive. Litaha netá nenémináa nene voko haha inogo ive, loko limó.

5 Itó gonanalivagi siató noi vemámo láa loko lo nimimó: Gililo. Neza netá mukí nene gosohá ale utó nomuluve. Loko loake, geza imane netakumú luhuva gizo molozo. Gakó gihila imane lokugo alévolé oakalímini neve.

6* Loko loake, láa loko lo nimimó: Ale lamaná o asú okuve. Neza goí moloko alika moloko netá apí oaká itó ale lutegeaká amelahina nouve. Makó keza nagamikumú kivisekikoma, nenitokatí alévolé kemetameki mi-noakalímini nagamí nene hinipinikutí ihiiki niliki viki minatave loko hanuva kiminogo uve.

7* Makó keza monokú alévolé iliki viki Satani lovaváa aviligitamó nenete netá imane mili alinigave. Itó nénisi nene Ómasíini loló oko nougo, kéisi nene izecipáne lilí iki minanigave.

8 Lá onoimóza, gasovagi netakumú golisi gele vegená itó monó gili ahuliaká nia vegená itó golotuva netá aliaká nia vegená itó kipili hiliaká nia vegená itó mokoló vegená itó gipe lakegusató vegená itó soza ómai netá gupá zi amiaká nia vegená itó soza gakotó vegená mukí nene ámina netá ali miniaká nia vegenalitini numuni apá nene lolagi nagamí ohunagú gihuká gehani ló loko nekú minatave loko lonoimóma neve. Nenémo nene heleaká nampa 2 loló onoive, loko lo nimimó.

Zelusale apá gosohá utó iti gakó

9 Itó ageló 7 keza lapéinigú vegená mukí kivise asú iti netá 7 vaí okago ali minakutí makolímo nenitoka ake láa loko lo nimimó: Ano Ómasímini sipsip akalevamámini alemo amiti vená gelepizitoze.

* **21:1:** 2 Pit 3:13; Isa 52:1; Ali 3:12 * **21:2:** Isa 61:10 * **21:3:** Izi 37:27 * **21:4:** Isa 25:8, 35:10,
65:19 * **21:6:** Isa 55:1 * **21:7:** 2 Sam 7:14

10 * Loko lokago, nigikáne ale noviligago agoka napa háná háná makotó nelémoko itike apázá apá Zelusalega nene Ómasilokatí okulumakutí nolimigo nelepizigo ánigumó.

11 Ómasímini gonanalivagi lapaná neneló noigo, ámina apalímini avogisa nenémo gehani meinava iteko minamó agulizá zasipa gehani nenémini oko avogisámo hanato minamó.

12 * Gehani geisa napa háná nene numuni apá ale vigeko mina geisámini gatenía 12-a minamó. Itó gateni hamopamotó nene ageló makó minamó. Itó gatetó nene Isilae vegená mulusi 12 keí kugulizá nene luhuva gizi milikago nego ánigumó.

13 Ho noititoka gateni losive makole itó ezegaloka gateni ámina oko losive makole itó emegaloka gateni ámina oko losive makole itó ho nolimitoka ámina oko gateni losive makole neve.

14 Ámina geisámini lukesaváa nene 12 minomo vonoive. Itó lukesaváa 12 nenémini amupiló Ómasímini sipsip akalevámini aposolo 12 keí kugulizá gizo molokago minomo vimó.

15 * Láa loko lo nimi ageló nenémo hánusaváa makó golitunú lilí ikago ale minamó nene numuni apá itó gatenaváa itó geisaváa molo geleaká hánusa minamó.

16 Ámina apá gohaláa tovoimoláa itó zohota vimoláa nene hamó lelegitokó nego, agelolímo hánusavatunú molo geleko ánigamó nene 2400 kilomita nego ánigamó. Itó tovoimoláa itó zohota vimoláa itó háná itimoláa nene hamó lelegító neve.

17 Itó geisámini háná imoláa molo gelekago 66 mita nenémini oko minamó. Vegenalita molo geleaká netá nene agelolímo ale minake molo giliго ánigumó.

18 * Numuni apalímini geisa nene mokoná gehani agulizá zasipa gehani nenetunukó gekago minamó. Itó ámina apá nene goli gehani vové avé lokalímini kalasi nenéminoko hanato mina netatunú lilí ikago minamó.

19 Ámina numuni apalímini lukesaváa nene meinava ite mina gehani haitopaitolíminitunú ali votamó. Lukesaváa nampa 1 nene mokoná gehani agulizá zasipa gehanitunú lilí amó. Itó lukesaváa nampa 2 nene gumugumisi gehani agulizá sapai gehanitunú lilí amó. Lukesaváa nampa 3 nene agulizá agate gehanitunú lilí amó. Lukesaváa nampa 4 nene gihisigó gehani agulizá emalali gehanitunú lilí amó.

20 Lukesava nampa 5 nene mokonaki golohaki gehani agulizá satonikisi gehanitunú lilí amó. Lukesaváa nampa 6 nene golohá gehani agulizá koniliá gehanitunú lilí amó. Lukesaváa nampa 7 nene gihuká gehani agulizá kilisalaiti gehanitunú lilí amó. Lukesava nampa 8 nene gihisigó gehani agulizá pelilo gehanitunú lilí amó. Lukesaváa nampa 9 nene gihuká gehani agulizá topasi gehanitunú lilí amó. Lukesaváa nampa 10 nene gihisigó gehani agulizá kilisopelesi gehanitunú lilí amó. Lukesaváa nampa 11 nene mikasi guhí gelevi gehani agulizá haiasini gehanitunú lilí amó. Lukesaváa nampa 12 nene golohá gehani agulizá ametisi gehanitunú lilí amó.

21 Itó gatenía 12 nene mokoná pesekú 12 meinaváa iteko minamolatunú lilí amó. Gateni hamopamó nene pesekú hamopamó sipisitunukó lilí amó.

Itó numuni apalímini gapováa nene goli gehani vové avetoakalíminitunú lilí ikago kalasi nenéminko hanato minamó.

22 Guivahani Ómasi osá amosá ve áisi itó aí sipsip akaleva nenémo monó zavusave napa loló onoimó nenazo, ámina apatoka monó numuni nomigo ánígumó.

23 * Itó ámina apatoka Ómasímini gonanalivagi lapaná nenémo hize hanatazite, itó aí sipsip akaleva nenémo liví loló okoko minanogo inazo, neló ikani ho lapanáini hize hanatati hozaváa nomive.

24 * Numutó namató vegena keza ámina apalímini lapanalagú mihina inigave. Itó numutó namató kugulizaki ve napa keza gonanalisi netáini nene áminalokágó aliliki vinigave.

25 * Ámina apá nene límugusi zeko gó loko ma aminogo ive. Lá onoinaze, ámina taonímini gateni nene holisakámáminoko koló oko minanogo ive.

26 Numutó namató vegentalitini gonanalivagi netá meinava iteko mina netá nene ámina taonigú aliliki anitinigave.

27 * Golotuva netá makó nene áminagú iteminogo ive. Itó kovoza netá makó alita vegena itó soza gakó li minata vegena keza ámina apakú vi hilamigave. Ómasímini sipsip akaleva nenémo alévolé kemetameki nia vegentalitini kugulizá nene pukugú gizo molokago mina vegena kó vi hilamigave.

22

1 * Itó agelómámo minova minova oakalímini nagamí napa makó nelepizigo ánígumó nene agómula golouto mina nagamí nene Ómasi itó sipsip akaleva kei gonanalivagi siatokatí lomoko novike,

2 * ámina apalímini gapo holukú lomoko vimó. Itó nagamí helega helega alévolé lemetameni ale utó oaká za noimó nenémini gihiláa haitopaitolímini 12 nene ikani gola zupa zupa gihila zeko guzá loaká noive. Numutó namató vegena keza ámina agiláa nene niki zoki lamaná inigave.

3 Ámina apakú nene usilagi netá minaminogo ive. Ómasi eza itó aí sipsip akaleva kei gonanalivagi siá nenegú utó okiko, gelekelé izegipala keza gupá zi aminigave.

4 Itó aí agoka agepa ánigi minanigave. Itó agulizalímini luhuváa nene golihító minanogo ive.

5 * Itó Guivahani Ómasi ezáa nene lapaná kemekiko ali minatamó nenazo, ámina apató nene límugusi ma zeminogo ive. Itó lamu liví ahe itó hómini lapanalahe nenémini hozaváa ma utó aminogo ive. Itó apá amelage keza kugulizaki ve lilí iki gizapa okimiaká hoza aliki mini lúaló miliki minanigave.

Izesú atiginá iti gakó

6 Itó agelómámo láa loko lo nimimó: Gakó imane gakó gihila itó lokugo alévolé oakalímini neve. Guivahani Ómasímo eza agepagutí gakó liaká ve ale kegepagú moloaká i ve áisi nene agelola amiselekago, gamena hána amiko utó itive loko lonoi netá nene gelekelé veva lekeza gilitave loko lo gemeko nogelepizigo ánígane.

* **21:23:** Isa 60:19-20 * **21:24:** Isa 60:3 * **21:25:** Isa 60:11 * **21:27:** Isa 52:1 * **22:1:** Izi 47:1
 * **22:2:** Apí 2:9 * **22:5:** Isa 60:19; Tan 7:18

⁷ Izesú nene gelenape. Neza litá oko núane vinogo uve. Itó makó keza imane pukugú alika utó iti gakó gizo molamó nene legesó iki gizapa iki ali minata vegentalite kogoliza vizinigave loko nolive.

⁸ Itó neza Zonina netá imane ánígoko gele asú umó. Gele asú okugo, netá imane nelepizi agelolímini agisauka voko lipizekuke gupá ze aminogo nougo,

⁹ eza óe loake láa loko lo nimimó: Néminamo. Neza gelekelé ve gigivekahina nouve. Itó Ómasímini agepagutí gakó liaká nia vetini kigivéipina nouve. Itó imane pukugú gakó legesó iki ali minata vegentalitini kigivéipina nouve. Geza Ómasigó gupá ze amezo.

¹⁰ Loko loake, láa loko lo nimimó: Gakó nene gihila ziti gamenaváa mota alitokaze, nememú geza puku imanegú alika utó iti netalímini gakó nene ali halá gemo.

¹¹* Nenemú golesa netá aliaká nia vegena keza alikigó minataze. Itó kigikáini golotuva lovímó keza ámináminigó minataze. Itó monokú hee liki mininatite nene hee likigó miniliki viki minataze. Itó apazá niamoláa nene ámina iki apazá keké viziki miniliki viki minataze, loko lo nimimó.

¹²* Izesú láa loko limó: Gelenape. Neza litá oko vinogo uve. Vinake nene lihimatini meinava apasoko likimitove loko aleko vinogo uve. Vegená iki miliki amómámini meinaváa lelegí oko etó etó oko kiminogo uve.

¹³* Neza goí moloko alika moloaká ve lolováa itó mogonáa apí oaká itó ale asú oqák amelahina nouve.

¹⁴* Gineganéini nagamí ziki ali vové avé liaká nia vegena Kumú gulugo lagámini oaká noive. Keza nene lokimikugo alévolé lekemetameni ale utó oaká zámini gihila nataze, itó imane apalímini gatekú ititaze.

¹⁵ Gipe lakegusató vegena itó mokoló vegena itó kipili hiliaká nia vegena itó soza ómai netató gupá zi amiaká nia vegena itó sozaló vegena nené numuni apá númaseloka minanigave.

¹⁶ Neza Izesuna agelóne amiselekugo eza nene vegena zuha mulusi milató milató lekeza nene gakó imane lo utó moloko lo likimitize. Neza nene Tevitini agapilamola itó aí nagalagutí nouve, itó sonohí gazakomé lapanalagi ve nouve, loko limó.

¹⁷* Ómasímini Sikalahulímo itó aí sipsip akalevámini venakitana mina vegentalite ano liki liaká niave. Itó makó keza gakó imane giliiki ámina iki ano liki linigave. Minova minova oakalímini nagamikumú likivisekikoma, imanelokatí iki ihiki nataze. Natune likima iki imanelokatí nagamí nene meinava nomimó hanuva nataze, alo.

¹⁸* Imane pukugú alika utó iti netalímini gakó luhuva gizonoumó nene gatiki gilita vegena lekeza lakagata aleko ehe loko noluze, gililo. Makó kezáini kagatatunú giliiki imane gizo nomulu gakotó makó miní amiki milata vegena nene Ómasímo vegena mukí kivise asú iti netá imane pukugú gizo mulu netató miní ameketanogo ize, ehe.

¹⁹ Itó makó keza imane pukugú alika utó iti netalímini gakokutí makó huki ahulata vegena taka Ómasímo alévolé kemetameni ale utó oaká zámini gihiláa itó apazá apala nene moseketanogo ive. Ámina netalímini gakó nene imane pukugú gizo molokugo neve.

* ^{22:11:} Tan 12:10 * ^{22:12:} Isa 40:10 * ^{22:13:} Ali 1:8,17 * ^{22:14:} Apí 2:9 * ^{22:17:} Isa 55:1

* ^{22:18:} Gapo 4:2, 12:32

20 Imane lo utó mola gakó hize lé oaká ve áisi nene Oo, mota núane vinogo uve loko nolive.

Lamaná. Guivahani Izesú geza ano.

21 Guivahani Izesuni nasahilí nenémo lekelitoka mino moloko minino.